

Holy Bible

Aionian Edition®

**Malagano ga Ambi
Mwera Bible**

AionianBible.org
The world's first Holy Bible untranslation
100% free to copy and print
also known as " The Purple Bible "

Holy Bible Aionian Edition ®
Malagano ga Ambi
Mwera Bible

CC Attribution ShareAlike 4.0, 2018-2024
Source text: eBible.org
Source version: 7/13/2024
Source copyright: CC Attribution ShareAlike 4.0
Pioneers.org, 2019

Formatted by Speedata Publisher 4.19.18 (Pro) on 7/19/2024
100% Free to Copy and Print
TOR Anonymously
<https://AionianBible.org>

Published by Nainoia Inc
<https://Nainoia-Inc.signedon.net>

We pray for a modern public domain translation in every language
Report content and format concerns to Nainoia Inc
Volunteer help is welcome and appreciated!

Celebrate Jesus Christ's victory of grace!

Preface

Mwera at AionianBible.org/Preface

The *Holy Bible Aionian Edition* ® is the world's first Bible *un-translation!* What is an *un-translation?* Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aīdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aīdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is *eternal!* However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by-nd/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

History

Mwera at AionianBible.org/History

- 04/15/85 - Aionian Bible conceived as B. and J. pray.
- 12/18/13 - Aionian Bible announced as J. and J. pray.
- 06/21/15 - Aionian Bible birthed as G. and J. pray.
- 01/11/16 - AionianBible.org domain registered.
- 06/21/16 - 30 translations available in 12 languages.
- 12/07/16 - Nainoia Inc established as non-profit corporation.
- 01/01/17 - Creative Commons Attribution No Derivatives 4.0 license added.
- 01/16/17 - Aionian Bible Google Play Store App published.
- 07/01/17 - 'The Purple Bible' nickname begins.
- 07/30/17 - 42 translations now available in 22 languages.
- 02/01/18 - Holy Bible Aionian Edition® trademark registered.
- 03/06/18 - Aionian Bibles available in print at Amazon.com.
- 10/20/18 - 70 translations now available in 33 languages.
- 11/17/18 - 104 translations now available in 57 languages.
- 03/24/19 - 135 translations now available in 67 languages.
- 10/28/19 - Aionian Bible nursed as J. and J. pray.
- 10/31/19 - 174 translations now available in 74 languages.
- 02/22/20 - Aionian Bibles available in print at Lulu.com.
- 05/25/20 - Illustrations by Gustave Doré, La Grande Bible de Tours, Felix Just.
- 08/29/20 - Aionian Bibles now available in ePub format.
- 12/01/20 - Right to left and Hindic languages now available in PDF format.
- 03/31/21 - 214 translations now available in 99 languages.
- 11/17/21 - Aionian Bible Branded Leather Bible Covers now available.
- 12/20/21 - Social media presence on Facebook, Twitter, LinkedIn, YouTube, etc.
- 01/01/22 - 216 translations now available in 99 languages.
- 01/09/22 - StudyPack resources for Bible translation study.
- 02/14/22 - Strong's Concordance from Open Scriptures and STEPBible.
- 02/14/23 - Aionian Bible published on the TOR Network.
- 12/04/23 - Eleēsē added to the Aionian Glossary.
- 02/04/24 - 352 translations now available in 135 languages.
- 05/01/24 - 371 translations now available in 151 languages.

Table of Contents

NEW TESTAMENT

Matei	11
Maliko	99
Luka	155
Yowana	250
Itendi	322
Bhaloma	419
1 Bhakolinto	457
2 Bhakolinto	494
Bhagalatia	518
Bhaepheso	531
Bhapilipi	544
Bhakoloshai	553
1 Bhateshalonike	562
2 Bhateshalonike	570
1 Timoteo	575
2 Timoteo	585
Tito	592
Pilimoni	597
Bhaebhulania	599
Yakobho	627
1 Petili	637
2 Petili	648
1 Yowana	655
2 Yowana	665
3 Yowana	667
Yuda	669
Nng'ibhulo	672

APPENDIX

- Reader's Guide
- Glossary
- Maps
- Destiny
- Illustrations, Doré

NEW TESTAMENT



A Yeshu gubhashite, "Atati mwaaleshelelange, pabha bhakakwimanyanga ibhatendanga."

Gubhagebhelenje nngubho yabho kwa tendela shikoma.

Luka 23:34

Matei

1 Sheshino ni shitabhu sha nndondonga gwa mena gwa
lubheleko Iwa a Yesu Kilishitu bha ulongo gwa a Daudi,
bha ulongo gwa a Bhulaimu, puyaaliji nnei. **2** A Bhulaimu
gubhankwete Ishaka, a Ishaka gubhankwete Yakobho, a Yakobho
gubhankwete Yuda na ashaakulugwe na ashaapwakwe, **3**
a Yuda gubhankwete Peleshi naka Shela anyinabhabhonji
pubhashemwaga a Tamali, a Peleshi gubhankwete Eshiloni, a
Eshiloni gubhankwete Lami. **4** A Lami gubhankwete Aminadabhu.
A Aminadabhu gubhankwete Nashoni, a Nashoni gubhankwete
Shalomoni. **5** A Shalomoni gubhankwete Bhoashi, akwabhe
Bhoashi pubhashemwaga a Laabhu, a Bhoashi gubhankwete
Obhedi kwa akongobhabho a Luti, a Obhedi gubhankwete
Yeshe, **6** Nabhalabho a Yeshe gubhankwete Mpalume Daudi.
A Daudi gubhankwete Shelemani ku bhakongwe bhaliji
akongobhabho a Ulia bhukala. **7** A Shelemani gubhankwete
Leobhoamu, a Leobhoamu gubhankwete Abhiya, a Abhiya
gubhankwete Ashapu, **8** A Ashapu gubhankwete Yoshepati,
a Yoshepati gubhankwete Yolamu, a Yolamu gubhankwete
Ushiya, **9** a Ushiya gubhankwete Yoshamu, a Yoshamu
gubhankwete Ashi, a Ashi gubhankwete Eshekia, **10** a Eshekia
gubhankwete Manashe, a Manashe gubhankwete Amoni, a
Amoni gubhankwete Yoshiya, **11** a Yoshiya gubhankwete
Yekoniya na ashaapwakwe, mobha Bhayaudi gubhapelekwenje
ku Bhabhuloni. **12** Bhayaudi bhakapelekwanjeje ku Bhabhuloni,
a Yekoniya gubhankwete Sheatieli, a Sheatieli gubhankwete
Shelubhabbeli, **13** a Shelubhabbeli gubhankwete Abhiudi, a
Abhiudi gubhankwete Eliakimu, a Eliakimu gubhankwete Asholi,
14 A Asholi gubhankwete Shadoki, a Shadoki gubhankwete

Akimu, a Akimu gubhankwete Eliudi, **15** a Eliudi gubhankwete Eliashali, a Eliashali gubhankwete Matani, a Matani gubhankwete Yakobho, **16** a Yakobho gubhaakwete a Yoshepu bhaaliji ambujebhabho a Malia, anyinabhabho a Yesu bhaashemwa a Kilishitu. **17** Bhai puyaliji ibheleko likumi limo na nsheshe kutandubhila a Bhulaimu mpaka a Daudi na ibheleko likumi limo na nsheshe kutandubhila a Daudi mpaka pubhapelekwenje ku utumwa ku Bhabhuloni, na ibheleko likumi limo na nsheshe kutandubhila pubhapelekwenje ku utumwa ku Bhabhuloni mpaka pubhabhelekwe a Kilishitu. **18** Kubhelekwa kwa a Yesu Kilishitu pukwaliji nnei, a Malia anyinabhabho a Yesu, bhalii muntemela na a Yoshepu, bhakanabhe gwabhala gubhaabhweni a Malia bhalii na shitumbo kwa komboya naka Mbamu jwa Ukonjelo. **19** Pabha a Yoshepu bhashinkubha bhanguja bhakapinjileje kutokomaya ntemela gwabho, kwa nneyo gubhapinjile kwaaleka kwa nng'iyo. **20** Bhalii nkuganishiya genego, nnugono malaika jwa Bhakulungwa gwabhakoposhele nng'agamii alinkuti, "A Yoshepu bha ulongo gwa a Daudi, nnajogope kwaatola a Malia bhabhe akongobhenu, pabha Mbamu jwa Ukonjelo ni abhatendile bhabhe na shitumbo. **21** Shihakole mwana jwannume, shimunsheme lina lyakwe Yesu, pabha jwenejo apinga tapula bhandu bhakwe na yambi yabhonji." **22** Genego gashinkukoposhela nkupinga limalile liblobhe libhalugwile Bhakulungwa kuka nkulondola jwabho, **23** "Nng'ishana shakole shitumbo, shankole mwana jwannume, shibhanshemanje lina lyakwe Manueli," malombolelo gakwe, "A Nnungu pamo na uwe". **24** Kwa nneyo, a Yoshepu bhakajumusheje gubhatendile malinga shibhalugulilwe naka malaika jula, gubaatolile a Malia kubha akongobhabho. **25** Bhakaamanyiji akongobhabho a Malia mpaka bhakankoleje

mwana jwannume. Na a Yoshepu gubhanshemile lina lyakwe, Yesu.

2 A Yesu kubhabhelekwele ku Bheteleemu, nkowa gwa ku Yudea, mobha ga a Elode pubhaliji a mpalume, a Yesu bhakabhelekweje, bhakwiimanyanga ndondwa gubhaikengenenje ku Yelushalemu kopoka kulikoposhela lyubha, **2** gubhabhushiyenje, “Kwali kwei mwana abhelekwe, mpalume jwa Bhayaudi? Twashinkulubhona lutondwa lwakwe lulikoposhela, putwaliji kulikoposhela lyubha na uwe tushikwiya kuntindibhalila.” **3** A Mpalume Elode bhakapilikaneje genego, gubhatengwishe na bhandu bhowe bha ku Yelushalemu. **4** Bhai, gubaashemilenje bhakulungwanji bhaabhishila bhowe na bhaajiganya bha Shalia, gubaabhuhiyenje, “Kilishitu shabhelekwe kwei?” **5** Gubhaajangwilenje, “Ku Bheteleemu nkowa gwa ku Yudea malinga shiishite jandikwa naka nkulondola jwa a Nnunu kuti, **6** ‘Ugwe Bheteleemu uli munkowa gwa ku Yudea, Ugwe nngabha jwanshoko muilambo imanyika ya ku Yudea, Pabha kunngwako apinga koposhela kalongolele, shaabhalongolelanje bhandu bhangu Ishilaeli.’” **7** Penepo, a Elode gubaashemilenje kuntemela bhakwimanyanga ndondwa bhala, gubaabhuhiyenje shakani pulwankoposhelenje lutondwa. **8** Kungai gubaatumilenje ku Bheteleemu bhalinkuti, “Nnjendangane nkabhushishiyanje ukoto ngani jika jwene mwanajo. Mummonangaga kunnugulilanje nkupinga na nne nyende ngantindibhalile.” **9** Bhakapilikananjeje malobhe ga a mpalume bhakwimanyanga ndondwa bhala gubhajabhwilenje, bhai lutondwa lubhalubhweninji bhalinginji kulikoposhela lyubha lula gulwaalongolelenje, gulupite jima panani paaliji mwana pala. **10** Bhakalubhonanjeje lutondwa gubhainonyelenje kaje. **11**

Bhai, gubhajinjilenje nnyumba, gubhammweninji mwana jula na akwabhe a Malia, gubhatemingene ulungolungo kuntindibhalila. Kungai gubhagopwelenje ibhajigelenje, gubhampelenje upo, shaabhu na lubhani na manemane. **12** A Nnunu bhakwaaleyangaga nng'agamii, bhanaabhujilanje kabhili a Elode, gubhapitilenje mpanda guna kubhuja kunngwabhonji. **13** Bhajeninji bhala bhakajabhulanjeje, malaika jwa Bhakulungwa gwabhabkoposhele a Yoshepu nng'agamii, gwabhalugulile, "A Elode bhapinga kunnoleya mwanajo bhammulaje, bhai nnjumushe! Muntole mwanajo na akwabhe mmutushilanje ku Mishili, nkamatangane mpaka pushininnugulilanje kabhili." **14** A Yoshepu bhakajumusheje gubhantolile mwana jula na akwabhe, gubhajabhwilenje nashilo nashilo kubhutushila ku Mishili. **15** Gubhatemi kweneko mpaka pubhaawile a Elode. Genega gashinkukoposhela nkupinga gamalile galugwilwe na Bhakulungwa kwa ntenga guka nkulondola jwabho, "Nashinkunshema mwanangu kopoka ku Mishili." **16** A Elode bhakamumanyeje kuti bhashitembwa na bhakwimanyanga ndondwa bhala, guyaashimile kaje. Gubhaamulishe bhabhulagwanje bhana bha shileu bhowe pa shilambo sha Bheteleemu na ilambo ya nnyenje jakwe bha yaka ibhili na pai jakwe. Bhashinkutenda nneyo kwa tolelela pubhalugulilwe na bhaashomanga ndondwa bhala malanga gubhalubhweninji lutondwa kulikoposhela lyubha. **17** Nneyo gakumalilaga malobhe galugwilwe na ankulondola bha a Nnunu a Yelemia bhalinkuti, **18** "Lilobhe lishipilikanika ku Lama, ililo na nguto yaigwinji. A Laeli bhanakwagutilanga ashibhana bhabho, numbe bhangapinga tagwa ntima, pabha bhana bhowe bhawilenje." **19** Bhakaweje a Elode, malaika

jwa Bhakulungwa gwabhabkoposhele a Yoshepu nng'agamii ku Mishili kula, **20** gwabhalugulile, "Nnjumushe! Muntole mwana na akwabhe, mmujangane ku shilambo sha Ishilaeli, pabha bhapingangaga kummulaga mwanajo bhala, bhawilenje." **21** Bhai, a Yoshepu bhakajumusheje, gubhantolile mwana jula na akwabhe, gubhabhujengene ku shilambo sha Ishilaeli. **22** Ikabheje a Yoshepu bhakapilikaneje kuti a Lekelao, bhana bhabho a Elode, bhashibha a mpalume bha ku Yudea gubhajogwepe kubhuja. Bhalabho bhakalugulilweje nng'agamii, gubhapite nkowa gwa ku Galilaya, **23** nikwenda tama ku shijji sha ku Nashaleti. Nkupinga gamalile malobhe galugwilwe na ashinkulondola bha a Nnungu, "Shibhashemwe Bhanashaleti."

3 Gene mobhago gubhakoposhele a Yowana bhaabhatisha, bhalilunguya kuanga ja ku Yudea, **2** bhalinkuti, "Mwiipetanje, pabha Upalume gwa Kunnungu ubhandishile." **3** Bhenebha a Yowana bhalugwilwe na ankulondola bha a Nnungu a Ishaya bhalinkuti, "Lilobhe lika mundu linapilikanika kuanga, 'Mwaalashiyanje Bhakulungwa mpanda gwabho, Nngoloyanje mushibhapite.'" **4** A Yowana shibhawalaga shiwalo sha mabhetya ga ngamia, na nshipi gwa lipende nshigunu. Shalya shabho pushaaliji maije na bhushi gwa mukonde. **5** Bhai, bhandunji kukoposhela ku Yelushalemu na nkowa gowe gwa ku Yudea na ilambo yowe ya nnyenje lushi lwa Yolodani, gubhaajendelenje. **6** Bhakaipetanjeje yambi yabhonji na bhalabho gubhaabhatishenje mmashi ga lushi lwa Yolodani. **7** Ikabheje a Yowana bhakaabhonanjeje Mapalishayo na Mashadukayo bhabhagwinji bhalikwaaajiilanga nkupinga bhabhatishwanje, gubhaalugulilenje, "Mmanganya bhana bha lijoka! Gani ammalanjilenje nnjibhutukanje nnjimwa ja a Nnungu

jikviya? **8** Bhai nnanguyanje kwa itendi, kuti mwiipetilenje. **9** Nnaganishiyanje mmitima jenunji kuti, ‘Uwe, ulongo gwa a Bhulaimu! Ngunakummalanjilanga kuti, a Nnungu bhanakombola kugayuya aga magangaga gabhe bha ulongo bha a Bhulaimu. **10** Na libhago libhishilwe tayali mmatepo ga mikongo, bhai kila nkongo ukaogoya iepo ya mmbone upinga shelwa nileshelwa pa moto. **11** Nne ngunakummatishanga kwa mashi kulangula kuti mwiipetilenje. Ikabheje bhene bhakwiya nnyuma jangubho bhashikola mashili kumbunda nne, numbe ngaatopela nkali jigala ilatu yabho. Bhenebho shibhammatishanje kwa Mbumu jwa Ukonjelo na moto. **12** Bhenebho bhashikamula shipeta mmakono gabho nkupinga bhapete, ngano bhabhishe munngokwe na maashe bhajoshe pa moto gwangaimika.” **13** Gene mobhago a Yesu gubhaishe ku lushi Iwa Yolodani kukoposhela ku Galilaya, gubhaajendele a Yowana nkupinga bhabhatishwe. **14** Ikabheje a Yowana gubhalinjile kwaibhilila bhalinkuti, “Nne namwene ngunapinga bhatishwa na mmwe, pakuti nnanyiila nne?” **15** Ikabheje a Yesu gubhaajangwile, “Nnaino mmwe nneshepe ibhe nneyo, pabha inapinjikwa tutende yowe ibhaapinga a Nnungu.” Bhai, a Yowana gubhakundile. **16** A Yesu bhakabhatishweje gubhakopweshe mmashi, shangupe ku nnungu kukuugukaga, gubhammweni Mbumu jwa a Nnungu alituluka mbuti nnjubha nikwaatula panani jabho. **17** Lilibhe gulipilikanishe koposhela kunnungu, “Jweneju mwanangu jungumpinga annonyela.”

4 Kungai Mbumu jwa Ukonjelo gwabhalongweye a Yesu mpaka kuanga nkupinga bhakalingwe naka Lishetani. **2** Gubhatabhile mobha makumi nsheshe shilo na mui, kungai gubhakwete shibhanga. **3** Bhai, Lishetani gwabhaishile kukwaalinga, alinkuti, “Monaga mmwe nni Mwana jwa a Nnungu, nngaamulishe

magangaga gabhe mikate.” **4** A Yeshu gubhajangwile, “Ishijandikwa, ‘Mundu akaalamila nkatepe, ikabhe kwa kila lilobhe libhaabheleketa a Nnungu.’” **5** Lishetani gwabhalongweye kwenda ku Yelushalemu, Shilambo sha Ukonjelo, gwabhakweshiye kunani kaje liekalu, **6** gwabhalugulile, “Monaga nni Mwana jwa a Nnungu, mwileshele pai, pabha ishijandikwa. ‘A Nnungu shibhaamulishe malaika bhabho kukunjangutila, shibhannjigalanje mmakono gabhonji nkupinga nnaiulaye lukongono lwenu pa liganga.’” **7** A Yeshu gubhannugulile, “Nneilapeila ishijandikwa, ‘Nnaalinje Bhakulungwa a Nnungu bhenu.’” **8** Kungai Lishetani gwabhalongweye kabhili kunani shitumbi shashileu, gwabhalangwiye upalume gwa kila shilambo pa shilambolyo na indu yakwe yowe ya konja, **9** akwaalugulilaga, “Nng’wilaga ulungolungo nindindibhalila, shinimpe indu yowei.” **10** Penepo, a Yeshu gubhannugulile, “Shoka apano Lishetani! Ishijandikwa, ‘Mwaatindibhalile na kwaakamulila maengo Bhakulungwa a Nnungu bhenu jikape.’” **11** Bhai, Lishetani gwabhaleshile a Yeshu na ashimalaika gubaikengene kukwaatumishila. **12** Bhai a Yeshu bhakapilikaneje kuti a Yowana bhashitabhwa nnigelesha, gubhapite ku Galilaya. **13** Gubhajabhwile ku Nashaleti shijiji shaaliji ku Galilaya, gubhapite tama ku Kapalanaumu, shilambo shaaliji nnyenje litanda lya Galilaya, mumpika gwa ilambo ya makabhila ga Shabkuloni na Naputali. **14** Bhai gulimalile lilobhe lyalugwilwe na a Ishaya ankulondola bha a Nnungu bhalinkuti, **15** “Ilambo ya makabhila ga Shabkuloni na Naputali, kuloya kubhaali kung’ambu lushi lwa Yolodani, ku Galilaya ilambo ya bhandu bhangabha Bhayaudi, **16** bhandu bhatemingene nnubhindu bhashikushibhonanga shilangaya shikulungwa, bhatemingene nnubhindu na shiwili

sha shiwo, shilangaya shishikwaalangashiyanga!" **17** Kuumila penepo a Yesu gubhatandwibhe kulunguya bhalinkuti, "Mwiipetanje yambi yenunji, pabha Upalume gwa Kunnungu ubhandishile!" **18** A Yesu bhalipita nnyenje litanda lya Galilaya, gubaabhwениنجи bhandu bhabhili, a Shimoni guna bhashemwaga a Petili na apwabho a Ndeleya, bhalitejelanga lyau nkutanda yamaki. **19** Bhai, gubhaalugulinje, "Nngagulanje, shininnjiganyanje kwaajiyabhonji bhandunji kwangu nne, malinga shinkutandanga yamaki." **20** Shangupe gubhaleshilenje mau gabhonji, gubaakagwilenje. **21** Bhakajendeje mmujo kashoko, gubaabhwениنجи bhananji bhabhili a Yakobho na apwabho a Yowana, bhana bha a Shebhedayo. Pubhalinginji muntumbwi na ainabhabhonji a Shebhedayo, bhalialayanga mau gabhonji. Bhai, a Yesu gubaashemilenje, **22** shangupe gubhaguleshilenje ntumbwi gula na ainabhabhonji, nigubaakagwilenje. **23** A Yesu bhatendaga owela mmbali yowe ya ku Galilaya na jiganya mmashinagogi na kwaalugushiyanga Ngani ja Mmbone ja Upalume gwa a Nnungu. Na lamya kila ilwele ibhakwetenje bhandu. **24** Yowe ibhatendile ila guishumile nkowa gowe gwa ku Shilia. Bhalwelenji bha kila namuna na bhakwetenje maoka na bhalwelenji shialala na bhandunji bhapolokanga, gubaapeleshelenje nabhalabho gubhaalamiyenje bhowe. **25** Bhandunji bhabhagwinji gubaakagwilenje koposhela mmbali ja ku Galilaya na ku Dekapoli na ku Yelushalemu na ku Yudea na ku ng'ambu lushi lwa Yolodani.

5 A Yesu bhakaabhonanjeje bhandunji bhabhagwinji, gubhakwelile pa shitumbi gubhatemi. Bhaajiganywa bhabho gubaajendelenje, **2** nabhalabho gubhatandwibhe kwaajiganyanga bhalinkuti. **3** Mbaya bhaalaganga mmitima

jabhonji, pabha Upalume gwa Kunnungu gwabhonji. 4 Mbaya bhaiñikenje, pabha shibhaangalaywanje. 5 Mbaya bhaitimalikenje, pabha shibhapegwanje shilambo. 6 Mbaya bhakwetenje lilaka na lokolila tenda ibhapinga a Nnungu, pabha shibhatendanje. 7 Mbaya bhakwetenje shiya, pabha a Nnungu shibhaabhonelanje shiya. 8 Mbaya bhakwetenje ng'aniyo ya mmbone mmitima jabhonji, pabha shibhaabhonanje a Nnungu. 9 Mbaya bhaaloleyanga ulele, pabha shibhashemwanje bhana bha a Nnungu. 10 Mbaya bhaapotekwanga kwa ligongo lya tenda ibhapinga a Nnungu, pabha Upalume gwa Kunnungu gwabhonji.

11 "Mbaya mmanganyanji bhandunji bhantukanangaga na kumpotekanga na kunnambililanga kila indu yangali ya mmbone kwa ligongo lyangu nne. 12 Mwiinonyelanje na angalila pabha upo yenunji yaigwinji kunnungu. Ni nnepeyo shibhaapotekenje ashinkulondola bha a Nnungu bhukala, nkanabhe bhelewanda. 13 "Mmanganyanji mbuti nnjete ja shilambolyo! Nnjete jikanonye jitagwe nndi jinonye kabili? Jikapwaa kabili, ikabhe kujawa palanga jilibhatwe na bhandunji.

14 "Mmanganyanji mbuti shilangaya sha shilambolyo! Mbuti shilangaya sha shilambo shili pa shitumbi shikaishika. 15 Wala bhandu bhakakoleyanga kandili niunishila lidebhe, ikabheje pabhika panani mesha jaamulishilanje bhowe bhalinginji nnyumba. 16 Nneyo peyo shilangaya shenunji shilangaye pa bhandunji, nkupinga bhaibhonanje itendi yenunji ya mmbone, bhaakuyanje Ainabhenunji bhalu kunnungu. 17 "Nnaganishiyanje kuti njikwiya angabhanya Shalia ya a Musha na majiganyo ga ashinkulondola bha a Nnungu. Nangaika kuangabhanya, ikabhe kuumalishiya. 18 Kweli ngunakummanjilanga, mpaka kunnungu na shilambolyo pushiipitepo, shakwa nkali shishoko

sha shalia shipinga shoywa mpaka gowe pushigamalile. **19**
Bhai, jojowe akaakunda nkali amuli jimo jili jajishoko punda
yowe, nikwaaajiganyanga bhananji bhanakundanje, jwenejo
shaabhe jwanshoko Muupalume gwa Kunnungu. Ikabheje jwene
shaakunde shalia nikwaaajiganyanga bhananji kukunda shalia,
jwenejo shaabhe jwankulungwa Muupalume gwa Kunnungu.
20 Kwa nneyo ngunakummalanjilanga, aki jenunji ibhaga
jikapunde ja Ashimapalishayo na bhaajiganya bha Shalia, ngu,
nkajinjilanga Muupalume gwa Kunnungu. **21** "Mpilikenenje
bhanyikala bhashinkulugulilwanga, 'Nnabhulaje! Shabhulajejo
shapate ukumu.' **22** Ikabheje nne ngunakummalanjilanga, jojowe
akuntumbalila mpwakwe shaukumulwe, akunnyegaya mpwakwe
shapelekwe ku lukumbi kuukumulwa. Na akunshema mpwakwe
nngumba anapinjikwa kuleshelwa pa moto gwa ku Jeanamu.
(Geenna g1067) **23** "Bhai, monaga nnipinga shoya mbepei yenu pa
shitala, nikumbushila kuti mpwenu ashikola mpwai na mmwe, **24**
nneshe mbepei yenu pa shitala, nkatandubhe kulundana naka
mpwenu, kungai mmuje nshoye mbepei yenu. **25** "Shangupe
mpatane naka mmagongo nnjenu nninginji mumpanda nkanabhe
ika ku bhaukumula. Nkupinga mmagongo nnjenujo anampeleshe
kubhaukumula, na bhaukumula nikunkamuya ku bhalinda
bhantabhanje. **26** Kweli ngunakummalanjila, nkakopoka
mwenemo mpaka pushinnipe mmbiya yowe. **27** "Mpilikenenje kuti
bhandunji bhashinkulugulilwanga, 'Nnalabhelabhe!' **28** Ikabheje
nne ngunakummalanjilanga, jojowe akunnola jwankongwe
kwa kunnokolila, muntima gwakwe alebhelebhe najo. **29**
Bhai, monaga liyo lyenu lya kunnilo linnebhiyaga, nnikolotole
nkajae kwaatalika. Mbaya shiobhe shibhalo shimo pa shiilu
shenu, nngalingana shiilu shenu showe kujawa pa moto gwa

ku Jeanamu. (Geenna g1067) 30 Monaga nkono nnilo gwenu unnebhiyaga, nngukate nkaujae kwaatalika. Mbaya shiobhe shibhalo shimo pa shiilu shenu, nngalingana shiilu showe kuleshelwa pa moto gwa ku Jeanamu. (Geenna g1067) 31

"Numbe yalugwilwe, 'Mundu akunneka nkagwe, annjandishile talaka.' 32 Ikabheje nne ngunakummalanjilanga, akumpa nkagwe talaka ikabhe kwa ligongo lya labhalabha, anakuntenda alabhelabhe, naka jwannume annombaga jwankongwe aleshilwe na ambujegwe, analabhalabha. 33 "Kabhili mpilikenenje kuti bhanyikala bhashinkubhalanjilwanga, 'Nnalumbile kwa unami, ikabhe nnaapinjikwa ntende imwaalumbile Bhakulungwa,' 34 Ikabheje nne ngunakummalanjilanga, nnalumbilanje wala kunnungu, pabha shitengu sha Upalume gwa a Nnunu, 35 wala shilambolyo, pabha palibhatila makongono gabho, wala ku Yelushalemu, pabha shilambo sha a Mpalume bhakulu. 36 Wala nnalumbile kwa ntwe gwenu, pabha nkaakombola kulutenda luumbo lwenu lumo lubhe lwanawe eu lwanapi, 37 Mmeleketaga, 'Elo,' bhai ibhe 'Elo,' mmeleketaga, 'Nngabha,' bhai ibhe 'Nngabha.' Pabha shoshowe shiipunda penepo kushikoposhela kuka Lishetani. 38 "Mpilikenenje kuti yabheleketwe, 'Liyo kwa liyo, lino kwa lino.' 39 Ikabheje nne ngunakummalanjilanga, nnampindikulile mundu akunshima. Mundu ankomaga lipapa litukwa lya kunnilo, muntendebhushiye na lya kunshinda. 40 Mundu anng'ukumulaga nkupinga atole lishati lyenu, munneshele atole na likoti lyenu, 41 Mundu anshishilishiaga munjigalile nshigo gwakwe maili jimo, munjigalile maili gabhili. 42 Akunnjuga shindu mumpe, na jwalakwe apinga kumpoleka nnantundumalile. 43 "Mpilikenenje yabheleketwe kuti, 'Mwaapinje atami ajenu, na kwaashima amagongo ajenu.' 44 Ikabheje

nne ngunakummalanjilanga, mwaapinje amagongo ajenu na mwaajujile kwa a Nnungu bhakumpoteka, **45** nkupinga mmanganje bhana bha Ainabhenunji bha kunnungu. Pabha bhenebho bhanakwaalangashiyanga lyubha bhandu bhowe bha mmbone na bhangalinginji bha mmbone na bhananyeya ula ku bhakwetenje aki na bhangakolanga aki. **46** Kwa nndi a Nnungu bhampanganje upo mwaapingangaga bhandu bhakumpinganga? Pabha, nkali bhakamula koli pubhatendanga nneyo peyo! **47** Monaga mwaabhuyangaga abhali ashaalongo ajenunjipe, bhuli nkutendanga shindu shashi sha punda? Pabha nkali bhandu bhangabha Bhayaudi pubhatendanga nneyo peyo? **48** Bhai, nkamilikanje malinga shibhakamilishe Ainabhenunji bha kunnungu.

6 “Mwiteiganje nnatendanje indu ya mmbone pa bhandu nkupinga bhammonanje. Nngabha nneyo, Ainabhenunji bha kunnungu bhakampanganga upo. **2** “Bhai, punkunnjangutila jwangali shindu, nnagombe mmbila. Nnatende malinga shibhaatendanga bhagulumba mmashinagogi na mmipanda, nkupinga bhalumbililwanje na bhandunji. Kweli ngunakunnugulilanga, bhene bhanganyabho bhapatilenje upo yabhonji. **3** Ikabheje punkunnjangutila mundu jwangali shindu, nkali mundu jwa tome na mmwe, anamumanye inkutenda. **4** Nshoye mbepei yenu kwa nng’iyo, na Ainabhenu bhakwiibhona indu ya nng’iyo, shibhanng’upe. **5** “Punkwaajuganga a Nnungu, nnatendanje malinga bhagulumba. Pabha bhanganyabho, pubhajuganga bhanaapinganga kujima mmashinagogi na nnyenje mipanda nkupinga bhalolwanje na bhandunji. Kweli ngunakummalanjilanga, bhalabhonji bhapatilenje upo yabhonji. **6** Ikabheje mmwe punkwaajuga a Nnungu,

nnjinjile kukati jenu, nng'ugale nnango, mwaajuje Ainabhenu bhakabhonekana. Na bhalabho Ainabhenu bhakwibhona indu ya nng'iyo, shibhanng'upe. **7** "Punkwaajuganga a Nnungu, nnajobhelanje malinga bhandunji bhangabha Bhayaudi. Pabha pubhaaganishiyanga kuti a Nnungu shibhaapilikananje kwa ligongo lya gwinji gwa malobhe gabhonji. **8** Nnabhanganje malinga bhanganyabho. Pabha Ainabhenunji bhai manyi inkupinganga, nkali nkanabhe kwaajuganga. **9** Bhai, nnjuganje nnei, 'Atati nni kunnungu, Lina lyenu likuywe. **10** Upalume gwenu guishe. Linkupinga mmwe litendeshe pa shilambolyo malinga shiikutendeka kunnunguko. **11** Ntupe lelo shalya sha togoleta lelo. **12** Ntuleshelele itulebhile, malinga na uwe shitukwaaleshelelanga bhatulebhilenje. **13** Nnatubhishe mmalinjilo, ikabheje ntuembuye naka Lishetani jula. Pabha upalume ni gwenu na mashili na ukonjelo pitipiti. Amina.'

14 "Pabha Mwaaleshelelangaga bhandu ibhannebhilenje, nneyo peyo Ainabhenunji bha kunnungu shibhanneshelelanje innebhilenje. **15** Ikabheje nkaaleshelelanje bhandunji yambi yabhonji, na bhalabho Ainabhenunji bhakkneshelelanga innebhilenje. **16** "Punktahanga, nnaumalanje kumeyo malinga bhagulumba. Bhanaumalanga kumeyo nkupinga bhabhonekanje na bhandu kuti bhashitahanga. Kweli ngunakummalanjilanga bhanganyabho, bhatapilene upo yabhonji. **17** Ikabheje mmwe punktabha, nnabhe kumeyo na mpakale mauta muntwe. **18** Nkupinga bhandunji bhanamumanyanje kuti nnatabha, ikabheje mmanyishepe na Ainabhenu bhakaabhoneka, nabhalabho Ainabhenu bhakwiibhona ya nng'iyo shibhanng'upe. **19** "Nnaibhishilanje shibhiko pa shilambolyo pano, ipukuu na nkubha inaangabanya na bhagwii bhanakaaanga nijibha. **20** Ikabhe

mwibhishilanje indu yenunji kunnungu kwikaangabhanika na ipukuu na nkubha, nkali bhagwii bhakakaanga nijibha. **21** Pabha pushili shibhiko shenu, na ntima gwenu shugubhe popo. **22** “Liyo mbuti kandili ja shiilu, bhai liyo libhaga lyalikoto, shililangaye shiilu shenu showe. **23** Ikabheje liyo libhaga lilwele shiilu shenu showe shishibhe nnubhindu. Bhai, ibhaga shilangaya shili nkati jenu shilepelaga kulangaya, shilubhe lubhindu lwa punda! **24** “Jwakwa ntumwa akombola kwaatumishilanga bhakulungwanji bhabhili, pabha shanshime jumo nikumpinga junajo, eu shalongane naka jumo nikumpetekuya junajo. Nkakombola kwaatumishila a Nnungu na tumishila mali. **25** “Kwa nneyo ngunakummalianjilanga, nnakolanje lipamba ga gumi gwenunji, kuti nniyanganje nndi eu mpapilanje nndi, wala ga iilu yenunji kuti nng'walanje nndi. Bhuli, gumi ukapunda shalya? Bhuli, shiilu shikapunda iwalo? **26** Mwilolanje ijuni ya mukonde, ikapanda, wala ikauna na wala yangali nngokwe jojowe. Nkali nneyo Ainabhenunji bha kunnungu bhanakwiiliya. Bhuli, mmanganyanji nngabha mmammbonenji kupunda ijuniyo? **27** Gani munkumbi gwenunji kwa kola lipamba kwakwe anakombola kwijenjesheya kapela lyubha limo lya mobha gakwe galama? **28** “Kwa nndi kola lipamba ga iwalo? Nnolanje malubha ga mukonde shigakutikonja? Gakakamula liengo wala gakapota. **29** Ikabheje ngunakummalianjilanga, nkali a Mpalume a Shelemani bhayene na yowe ibhaakwete bhangawashwa kwa konja malinga lilubha limo. **30** Bhai ibhaga a Nnungu bhanakuliwasha liamba lya mmigunda, lelo lipali na malabhi lilileshelwa pa lituto lya moto, bhuli bhakapunda kunng'washanga mmanganyanji? Mmanganya nkwenetenje ngulupai jishoko. **31** “Bhai, nnakolanje lipamba, ‘Shitulye indi eu shitupapile indi eu shituwale indi!” **32** Pabha

bhandu bhakakwaamanyanga a Nnungu bhanaabhushilanga
yene yoweyo. Ainabhenunji bhali kunnungu bhamumanyi
kuti nnakwiipinganga indu yoweyo. **33** Ikabhe, nnoleyanje oti
Upalume gwa a Nnungu na aki jabho na gene gowego, a
Nnungu shibhannjenjesheyanje. **34** Bhai, nnaabhushilanje ya
malabhi, pabha malabhi shigaiabhushile gayene. Shilaje sha
lyubha limo shinatogolela kwa lyubha lyolyo.

7 "Nnaukumulanje bhananji, a Nnungu bhanakwiya
kunng'ukumulanga. **2** Pabha shinkwaukumulanga bhananji,
nneyo peyo na mmanganyanji pushinng'ukumulwanje, shipimilo
shinkwapimilanga bhananji na a Nnungu shibhampimilanje
shosho. **3** Bhai, pakuti nnakushibhona shipande shili nniyo lika
mpwenu, na lipoto lili nniyo lyenu nnalibhone? **4** Nkukombola
bhuli kunnugulila mpwenu, 'Leka nikushoye shipande nniyo
lyako,' akuno nninkwete lipande nniyo lyenu? **5** Mmwe
mmagulumba! Nshoyeti lipande itemi nniyo lyenu, penepo
shinnole ukoto nikombola shoya shipande shili nniyo lika
mpwenu. **6** "Nnaapanganje ashimbwa indu ya ukonjelo,
bhanatendebhukanga nikunnumanga, wala nnaaleshelelange
lulu yenunji ashingulubhe, bhanalibhatanga. **7** "Nnjunganje na
mmanganyanji shimpewwanje, nnoleyanje na mmanganyanji
shimpatanje, nng'olishiyanje na mmanganyanji shing'ugulilwanje.
8 Pabha, jojowe ajuga anaposhela, aroleya anapata, na aolishiya
anaugulilwa. **9** Bhuli, apali jojowe munkumbi gwenunji atenda
mwanagwe annjugaga nkate shampe liganga? **10** Eu annjugaga
shamaki, shampe lijoka? **11** Bhai, monaga mmanganyanji,
nkali nninginji mwangali bha mmbonenji, nnamanyanga
kwaapanganga ashibhana bhenu indu ya mmbone, bhuli!
Ainabhenunji bhali kunnungu bhakapunda kwapanganga ya

mmbone bhakwaajugangabho? **12** “Bhai yowe inkupinganga bhandu bhantendelanje na mmanganyanji mwaatendelanje nneyo peyo. Pabha genega ni malombolelo ga Shalia ja a Musha na majiganyo ga ashinkulondola bha a Nnungu. **13** “Nnjinjilangane pitila nnango gwa nyilila, pabha mpanda guloya kuobha ushipanuka na nnango gwa jinjilila kweneko gushipanuka na bhabhagwinji bhaapitanga gwene mpandago. **14** Ikabheje nnango gwanshoko na mpanda gukwenda kugumi gushibhana na bhakuubhonanga gwene mpandago, bhashokope. **15** “Mwiteiganje na ashinkulondola bha unami, bhakunnjiilanga bhalibhonekanga mbuti ngondolo, ikabheje kwa nkati maogo ga jogoya. **16** Bhai, shimwaamanyanje kwa itendi yabthonji. Bhuli, bhandu bhalikabhanga shabbihu mmaukutu ga mibha, eu tini mmbigili? Ng'oo! **17** Bhai, nkongo gwa mmbone gunaogoya iepo ya mmbone, nkongo gwangali gwa mmbone gunaogoya iepo yangali ya mmbone. **18** Nkongo gwa mmbone gukaogoya iepo yangali ya mmbone, na wala nkongo gwangali gwa mmbone gukaogoya iepo ya mmbone. **19** Nkongo gogowe gukaogoya iepo ya mmbone gupinga shelwa na leshelwa pa moto. **20** Kwa nneyo, shimwaamanyanje ashinkulondola bha unami kwa itendi yabthonji. **21** “Nngabha kila mundu anjema, ‘Mmakulungwa, Mmakulungwa,’ shajinjile Muupalume gwa Kunnungu, ikabhe jwene shatende ibhapinga Atati bhalii Kunnungu. **22** Lyubha lya ukumu bhabhagwinji shibhamalanjilanje, ‘Mmakulungwa, Mmakulungwa! Kwa lina lyenu twatendaga londola na kwa lina lyenu twatendaga shoya maoka, na tenda ilapo yaigwinji.’ **23** Penepo shinaabhalanjilanje, ‘Ngu, nangammanyanga mmanganyanji, nnjokanganile apano mmanganya nkutendanga yambi.’ **24** “Kwa nneyo, mundu jojowe apilikana malobhe gangu

nitenda, shalandane naka mundu akwete lunda, ashengele nyumba pa ndandali niolela iishi yakwe ukoto na nyumba nikamilika mbuti jishenjilwe pa liganga likulu. **25** Ula gujinyele, nushi gwigumbele mashi, mbungo jikulungwa jikupugaga nikoma nyumbajo, ikabheje jangagwa pabha jashinkuolelwa ukoto nikamilika mbuti jishenjilwe pa liganga likulu. **26** “Ikabheje jojowe apilikana malobhe gangu ninngatenda, shalandane naka mundu nngumba ashengele nyumba jakwe pa lianji. **27** Ula gujinyele, na nushi guigumbele mashi, na mbungo guijipujile nikoma nyumba jila, gujigwile, numbe kwa ng’indo gwa nkulungwa.” **28** A Yeshu bhakamaliyeje kubheleketa gene malobhego, bhandu bhashinkukanganigwanga na majiganyo gabho. **29** Pabha bhatendaga jiganya malinga mundu akwete ukulungwa, nngabha malinga bhaajiganya bha Shalia bananji.

8 A Yeshu bhakaeleleje kopoka kushitumbi, bhandunji bhabhagwinji gubaakagulenje. **2** Bhai, gwaishé mundu jumo akwete mangundula nitindibala alinkuti, “Mmakulungwa, mpingaga nnakombola kunamiya!” **3** A Yeshu gubhagolweye nkono, gubhankwashiye bhalinkuti, “Ngunapinga! Ulame.” Shangupe gwalamile mangundula gakwe. **4** Kungai a Yeshu gubhannugulile, “Upilikane, unannugulile mundu jojowe, ikabhe ujende ukailanguye ku bhaabhishila, ukapeleshe mbepei malinga shiyalugwilwe na a Musha kwaakong’ondelanga kuti nnamile.” **5** A Yeshu bhalijinjila ku Kapalanaumu, nkulungwa jwa manjola jumo gwabhajendele, gwabhashondelesheye **6** alinkuti, “Mmakulungwa, ntumishi jwangu kumui, ashigona nnwele kaje.” **7** A Yeshu gubhaalugulile, “Shinyie ninnamiye.” **8** Bhakulungwa bha manjola bhala gubhaajangwile bhalinkuti, “Mmakulungwa, nne nngabha najwa mmbone kwa jinjila mmwe nnyumba jangu,

ikabheje mmelekete lilobhepe naka ntumishi jwangu shalame. **9**
Pabha nkali nne nili pai ja ukulungwa uka mundu junu, njikola
ashimanjola bhalinginji pai jangu. Ninnugulilaga jumo, ‘Jabhula!’
Anajabhula, naka junu, ‘Jia!’ Alikwiya, naka ntumwa jwangu,
‘Tenda ashi! Anaatenda.’ **10** A Yesu bhakapilikaneje genego,
gubhakanganigwe, gubhaalugulilenje bhaakulupalilangaga bhala,
“Kweli ngunakummalanjilanga, nganabhe kummona mundu
pa shilambo sha Ishilaeli akwete ngulupai jikulungwa malinga
jeneji. **11** Bhai, ngunakummalanjilanga kuti bhandu bhabhagwinji
bhapinga kwiyangana kopoka kulikoposhela lyubha na kulititimila,
nabhalabhonji bhapinga tamangana pa kalamu na a Bhulaimu na
a Ishaka na a Yakobho Muupalume gwa Kunnungu. **12** Ikabheje
bhapinjikwangaga kubha Muupalume shibhabhinjilwanje ku
lubhindu lwa palanga, kushibhagutanje na tauna meno.” **13**
Kungai a Yesu gubhaalugulile bhakulungwa bha manjola
bhala, “Mmuje kumui, ibhe malinga shinshite kulupalila.”
Naka ntumishi jwabho gwalamile malanga gala. **14** A Yesu
gubhaishe kungwabho a Petili, gubhaaimene akwebhabho a
Petili anyinabhabho akongobhabho bhali bhagonile pashinanda,
bhalwele. **15** Bhai, a Yesu gubaakwashiye nkono gwabho
bhalwele bhala na shilwele shila shikwaalekaga, gubhajinwishe
nikwatumishilanga. **16** Likaishileje ligulo gubhaapeleshelenje
bhandunji bhabhagwinji bhakwetenje maoka, gubaabhinjilenje
ashimaoka kwa bheleketape. Na kwaalamyanga bhalwelenji
bhowe. **17** Bhashinkutenda nneyo nkupinga limalile lilobhe
lyalugwilwe na ankulondola bha a Nnunu a Ishaya kuti,
“Bhashitolu uwangali mashili gwetu, Bhashijigala ilwele yetu.”
18 A Yesu bhakalubhoneje lugwinjili lwa bhandu lwaatimbilile,
gubhaamulishenje bhaajiganywa bhabho bhajombokanje litanda.

19 A Mwalimu bha Shalia bhamo gubhaajendele, gubhaalugulile, "Mmaajiganya, nne mbinga kunkagula kokowe kushinnjende."

20 A Yesu gubhaajangwile, "Nansheto akwete lishembo, na ijuni ishikola maui, ikabhe Mwana juka Mundu jwangali pa pumulila."

21 Kungai mundu jwa munkumbi gwa bhaajiganywa bhabho gwabhalugulile, "Mmakulungwa, nnesheoti nyende ngaashishe Atati." **22** Ikabheje a Yesu gubhannugulile, "Ngagula! Bhandunji bhakakwaapinganga a Nnungu nimalinga bhawilenje, bhalekanje bhawilenje bhashikane ashaayenenji." **23** A Yesu gubhakwelile muntumbwi, pamo na bhaajiganywa bhabho, gubhapitengenenje.

24 Kashokope, mbungo jikulungwa jikupugaga nnitanda mula, mpaka mabhimbili ga mashi gugajinjile muntumbwi mula. Ikabheje a Yesu bhashinkugona lugono. **25** Bhaajiganywa bhabho gubhapite kwaajumuya bhalinkutinji, "Mmakulungwa, ntutapule, tunatitimila!" **26** A Yesu gubhaalugulilenje, "Mmanganya nkwenenje ngulupai jishoko, pakuti nnajogopanga?" Bhai gubhajimi, gubhajikalipile mbungo na mabhimbili gala, guitendile jii kwa kaje. **27** Bhandu bhala gubhalapilenje bhalinkutinji, "Bhenebha bhandu bhashi? Nkali mbungo na mabhimbili inakwaakunda!" **28** A Yesu bhakaisheje kung'ambu ku shilambo sha Bhagadala, gubhaimenenje bhandunji bhabhili bhakwetenje maoka bhalikoposhelanga kumakabhuli. Bhashinkujogoyanga na jwakwa mundu akombolaga kupita gwene mpandago.

29 Gubhatandwibhenje jobhela bhalinkutinji, "Nkutuloleya nndi mmwe Bhanabhabho a Nnungu? Bhuli, nshikwiya kutupoteka gakanabhe ika malanga gakwe?" **30** Bhai, tome na penepo lyashinkupagwa likundi lya ngulubhe ilishungwa.

31 Bhai, ashimaoka bhala gubaashondelesheyenje a Yesu bhalinkutinji, "Ibhaga ntushoyaga, ntuleshe tukaajinjilanje

ashingulubhe bhala.” 32 A Yeshu gubhalugulilenje, “Ayaga, nnjendangane.” Gubhaashoshileyenje bhandunji bhala, gubhapite kwaajinjilanga ashingulubhe. Likundi lyowe lya ngulubhe gulieleleshele nnitanda, guiwile yowe. 33 Ikabheje bhashunga bha ngulubhe ila gubhabhutukenje, gubhapitengene kunnjini. Kweneko gubhatalashiyenje ga ngulubhe ila na ga bhandunji bhakwetenje maoka bhala. 34 Kwa nneyo bhandunji bhowe pa shilambo pala gubaajendelenje a Yeshu, bhakaabhonanjeje gubhaashondolesheyenje bhajabhule pa shilambo shabhonji.

9 A Yeshu gubhakwelile muntumbwi, gubhajombweshe litanda gubhaishe kushilambo shabho. 2 Kweneko bhandu gubhaapeleshelenje mundu jumo apolweshe, agonile pa shinanda. A Yeshu bhakajibhoneje ngulupai jabhonji, gubhammalanjile mundu apolweshe jula, “Ambwiga! Mwiilume ntima, yambi yenu nneshelwelwe.” 3 Bhaajiganya bha Shalia bhananji gubhaganishiyenje mmitima jabhonji kuti, “Bhene bhandubha bhanakwaakupulu a Nnungu!” 4 A Yeshu gubhaimanyi ng’aniyo yabhonji, gubhashite, “Pakuti nnaganishiyanga ya nyata mmitima jenunji? 5 Shei shipepeshe, kubheleketa, ‘Uleshelelwe yambi yako,’ eu kubheleketa, ‘Jinuka ujende?’ 6 Ikabheje, mmumanyanje kuti Mwana juka Mundu ashikola ukulungwa pa shilambolyo gwa kwaaleshelelanga bhandu yambi yabhonji.” Penepo gubhammalanjile mundu apolweshe jula, “Jinuka utole shinanda shako ujende kunngwako.” 7 Bhai mundu apolweshe jula gwajimi, gwapite kunngwakwe. 8 Bhandu bhowe palugwinjili pala bhakaibhonanjeje yeneyo, gubhalapilenje na jogopa gubaakushiyenje a Nnungu bhaapelenje bhandu gwene ukulungwago. 9 Na a Yeshu bhakajabhuleje penepo, gubhaabhweli bhandu bhamo lina

lyabho a Matei, bhatemi nnyumba ja bhakamula koli. Bhai, a Yeshu gubhaabhalanjile, "Nngagule." Nabhalabho a Matei gubhajimi, gubhaakagwile. **10** A Yeshu bhakatameje kumui kwa a Matei nkulya shalya, bhakamula koli bhabhagwinji na bhakwetenje yambi bhananji, gubhaikengenenje nitamanabhonji nkulya pamo na bhaajiganywa bhabho. **11** Ashimapalishayo bhakabhonanjeje nneyo, gubhabhalanjilenje bhaajiganywa bhabho, "Pakuti bhaajiganya bhenunji bhanalya shalya na bhakamula koli na bhakwetenje yambi?" **12** A Yeshu bhakapilikaneje, gubhaabhalanjilenje, "Bhakotonji bhakakunnoleyanga mmitela, ikabheje bhakunnoleyanga mmitela bhalwelenji. **13** Bhai, nnjendangane nkaijiganyanje malombolelo ga gene malobhe gano, 'Shingupinga shiya, nngabha mbepei.' Nangaika kwaashemanga bhakwetenje aki, ikabheje bhakwetenje yambi." **14** Kungai bhaajiganywa bha a Yowana Bhabhatisha gubhaajendelenje a Yeshu, gubhaabhushiyenje, "Uwe na Mapalishayo tunatabha. Pakuti bhaajiganywa bhenu bhakaatabhang?" **15** A Yeshu gubhaajangwilenje, "Bhuli, bhashemilwenje kundowa bhalipinjikwanga kwigutanjila bhaliningji naka nnyene nkulomba? Ikabheje shigaishile mobha nkulomba shashoywe, penepo shibhatabhanje. **16** "Jwakwa mundu atotela shibhamba sha ambi munngubho ja bhukala, pabha shibhambasho shishikwinyale nipunda pwengula nngubhojo. **17** Wala bhandu bhakaataganga divai ja ambi mmipatila ja bhukala. Bhatendangaga nneyo, divaijo shijikwebhe nipapula mipatilajo na divai nijitika, ikabheje bhandu bhanataganga divai ja ambi mmipatila ja ambi, na yowe shiilonjeye ukoto." **18** A Yeshu bhalinkubheleketa genego, a kalongolele bha Shiyaudi gubhaishe, nitindibhala bhalinkutti, "Mwali jwangu

ashiwa nnainope, shonde ngunakunnjuga tulongane nkammishile nkono gwenu shalame.” **19** A Yeshu gubhajabhwile nikwaakagula pamo na bhaajiganywa bhabho. **20** Bhakongwe bhamo bhalwalaga shilwele sha nsholosholo yaka likumi limo na ibhili, gubhaakagwile a Yeshu shilinyuma, gubhakwashiye libhiniko lya nngubho jabho. **21** Bhashinkutenda nneyo pabha bhashinkwiibhalanjila bhayene, “Ngwayape nngubho jabho shiname.” **22** Bhai, a Yeshu gubhatendebhwishe nigubhaabhweni, gubhaabhalanjile, “Mwanangu, unakole lipamba! Ngulupai jako jikulamiye.” Bhakongwe bhala gubhalamile shilwele shabho shila malanga gala. **23** A Yeshu bhakaisheje ku nyumba ja bhakulungwa bhala gubhaabhweninji bhaagombanga imbeta na bhandunji bhabhagwinji bhalinginji nshililo, **24** gubhaabhalanjilenje, “Nshokangane! Mwaliju jwanngawa, ikabheje ashigonape.” Nigubhaeshilenje kwa kaje. **25** Bhai, bhandunji bhala bhakashokangananjeje, a Yeshu gubhajinjile nkati, gubhankamwile nkono, mwali jula gwajimi nnyene. **26** Jene nganijo gujishumile nshilambo showe. **27** A Yeshu bhakajabhuleje penepo, ashinangalole bhabhili gubhaakagwilenje bhalijobhelanga, bhalinkutinji, “Mmaulongo gwa a Daudi, ntubhonele shiya.” **28** A Yeshu bhakaisheje kumui, ashinangalole bhabhili bhala gubhaajendelenje, bhalabho gubhabhushiyenje, “Bhuli, nnikulupalilanga kuti ngunaakombola kunnamiyanga?” Nabhalabhonji gubhaajangwilenje, “Elo Mmakulungwa,” **29** Penepo a Yeshu gubhakwashiye meyo gabhonji, bhalinkuti, “Ibhe malinga shinshite kulupalilanga.” **30** Meyo gabhonji gakubhalakukaga. Numbe a Yeshu gubhaakalipilenje, “Nnannugulilanje mundu jojowe genega.” **31** Ikabheje gubhajabhwilenje, nishumya ngani ja a Yeshu

nshilambo showe. **32** Na bhandunji pujabhulangaga, mundu jumo bhubhu akwete lioka, gwapelekwe kwa a Yeshu. **33** Shangupe akashoyweje lioka, mundu jula gwatandwibhe bheleketa. Bhandunji gubhalapilenje bhalinkutinji, "Yene indui tukanabhe kuibhona pa Ishlaeli!" **34** Ikabheje Mapalishayo gubhashitenje, "Bhanashoya maoka kwa mashili gaka nkulungwa jwa maoka." **35** A Yeshu bhatendaga owela ilambo yowe na ijiji yowe, bhalijiganya mmashinagogi na lunguya Ngani ja Mmbone ja Upalume gwa a Nnungu, na lamya ilwele yowe na kila ungakola mashili. **36** Bhai, bhakabhoneje lugwinjili lwa bhandu gubhaabphonelenje shiya, pabha bhashinkutotoshelanga na bhashinkukolanga lipamba malinga ngondolo yangali nshunga. **37** Penepo gubhaabhalanjilenje bhaajiganywa bhabho, "Maneng'eno gamagwinji, ikabheje bhakamula maengo bhashokope. **38** Bhai, mwaajuganje bhayene maneng'eno bhatume bhakamula maengo ku maneng'eno gabho."

10 A Yeshu gubhaashemilenje bhaajiganywa bhabho likumi limo na bhabhili, gubhaapelenje mashili ga shoya maoka na lamya ilwele na ungakola mashili gwa kila namuna. **2** Mena gabhonji mitume likumi limo na bhabhilibho ni gegano, bhantai a Shimonibhashemwaga a Petili, na apwabho a Ndeleya, na a Yakobho na a Yowana bhana bha a Shebhedayo, na **3** a Pilipi na a Bhatolomeyo, na a Tomashi na a Matei bhakamula koli, na a Yakobho bhanabhabho a Alupayo, na a Tadei **4** na a Shimonibhakanaani, na a Yuda Ishikaliote bhaatendebhwishe a Yeshu. **5** A Yeshu gubaatumilenje mitume likumi limo na bhabhili bhala gubhaalajiyenje bhalinkuti, "Nnajendangane ku bhandu bhangabha Bhayaudi, wala nnajinjilanje mwilambo ya Bhashamalia. **6** Ikabhe nnjendangane ku bhandu bha

Ishilaeli bhaobhilenje mbuti ngondolo. 7 Pushinnjendangane nnunguyanje nnei, 'Upalume gwa Kunnungu ubhandishile.' 8 Nnamiyanje bhalwelenji, nnyuyanje bhawilenje na nnamyanje bhakwetenje mangundula na nshoyanje maoka. Nshipiegwanga gwayoyo, nshoyanje gwayoyo. 9 Nnajigalanje mmbiya yoyowe mmiuko jenunji. 10 Nnajigalanje nng'uko mumpanda, wala lishati lya tingiganya, wala ilatu ya tindiganya, wala imbo. Pabha atenda maengo anapinjikwa alipwe. 11 "Nnjinjilangaga nshilambo eu shijiji shoshewe, munnoleyanje mundu jwa pwaa na ntamangane kunngwakwe mpaka pushinjabhulanje. 12 Punkujinjilanga nnyumba, mwaajujilanje ulele. 13 Na ashaayene gwene muigo bhamposhelangaga, bhai ulele gwenunji shugwapwaanje, ikabheje bhakamposhelanje, ulele gwenunji shugummujilanje mmanganyanji. 14 Monaga mundu akanaga kumposhelanga eu kumpilikilanlanga, bhai pushinshokanje jene nyumbajo eu shene shilambosho, nkung'undanje ndutuli mmakongono genunji ibhe shilangulo sha kwaaleyanga ga kana ntenga gwa a Nnunu. 15 Kweli ngunakummalianjilanga, lyubha lya ukumu bhandunji bha shene shilambosho bhapinga patanga mboteko, kupunda yaapatilenje bhandunji bha ilambo ya Shodoma na Gomola. 16 "Nholanje, ngunakuntumanga malinga ngondolo munkumbi gwa maogo, bhai nkolanje lunda malinga lijoka na mwiitimalikanje malinga ngunda. 17 Mwiiteiganje na bhandunji, pabha shibhanshitakiyanje kulukumbi na kunkomanga ibhoko mmashinagogi gabhonji. 18 Shimpelekwanje ku bhatagwala na bhapalume kwa ligongo lyangu nne, nkupinga nngong'ondelanje kunngwabhonji na kubhandunji bhangabha Bhayaudi. 19 Bhai, pushimpelekwanje ku bhaukumula, nnakolanje lipamba kuti shimmeketanje ndi,

pabha malanga gaishilaga shimpegwanje sha bheleketa. 20
Pabha nngabha mmanganyanji shimmeleketanje, ikabhe Mbumu
jwa Ainabhenunji a Nnungu abheleketa kupitila mmanganyanji.
21 "Mundu shantendebhushe mpwakwe nkupinga abhulagwe
na ainamundu shibhantendebhushe mwanagwabho na bhana
shibhaatendebukanje bhaakwetenje nikwaabhulaganga. 22
Bhandunji bhowe bhapinga kunshimanga mmanganya kwa
ligongo lyangu nne. Ikabheje shaipililile mpaka kumpelo,
shatapulwe. 23 "Bhandu bhampotekangaga nshilambo shimo,
mmutushilanje shilambo shina. Kweli ngunakummalanjilanga,
nkamaliyanga ilambo yowe ya Ishilaeli Mwana juka Mundu
akanabhe ika. 24 "Nkujiganywa akakumpunda nkujiganya
jwakwe, wala ntumwa akakwaapunda bhakulungwa bhakwe.
25 Inakomboleka bhaajiganywa kubha malinga bhaajiganya
bhabho, naka ntumwa kubha malinga bhakulungwa bhakwe.
Monaga bhaashemilenje bhayene nyumba Bhelishebhuli,
shibhaashemanje mena ga nyata kaje bhandu bha nnyumba
jabho. 26 "Bhai, nnaajogopanje bhene bhandunjibho, pabha
shoshowe shiunishilwe shipinga unukulwa, na shoshowe shiishwe
shipinga undukulwa. 27 Lingummalanjilanga pa lubhindu,
mmalanganje pashilangaya na limpilikenenje shinong'ona
nnunguyanje palugwinjili. 28 Nnaajogopanje bhabhulaganga
shiilupe, ikabheje bhakaakombolanga kuobhya mbumu, mbaya
kwaajogopa bhakombola kuobhya shiilu na mbumu kumoto gwa
ku Jeanamu. (**Geenna g1067**) 29 Ndyondyo ibhili ikaushwa kwa
ela jimope? Ikabheje jwakwa nkali jumo agwa pai gwangali
Ainabhenunji a Nnungu kumumanya, 30 ikabheje mmanganyanji,
nkali umbo ya mmitwe jenunji ishibhalanganywa yowe. 31
Bhai nnajogopanje, mmanganyanji mmammbonenji kupunda

ndyondyo yaigwinji. 32 "Mundu jojowe aangunda pa bhandu kuti jwangu, na nne shinyiye kunkong'ondela kwa Atati bhali kunnungu. 33 Ikabheje jojowe shaangane pa bhandu, numbe nne shininkane kwa Atati bhali kunnungu. 34 "Nnaganishiyaje kuti njikwiya peleka ulele pa shilambolyo, nngabha! Nangajiya peleka ulele ikabhe ngondo. 35 Pabha njikwiya kwaalekanyanga mundu na ainagwe, mwali na akwabhe, akwemundu na nkamwanagwabho, 36 ashaamagongo bhaka mundu, bhandu bha nnyumba jakwe. 37 "Akwaapinga ainagwe eu akwabhe kupunda shaambinga nne, akakombola kubha nkujiganywa jwangu, wala akumpinga mwanagwe eu nabhti jwakwe kupunda nne, akakombola kubha nkujiganywa jwangu. 38 Wala mundu akaujigale nshalabha gwakwe ningagula akakombola kubha nkujiganywa jwangu. 39 Mundu apinga kulama gwangali ngulupalila nne, akakola gumi gwa pitipiti, ikabheje shakunde bhulagwa kwa ligongo lya ngulupalila nne, shakole gumi gwa pitipiti. 40 "Akumposhelanga mmanganya, anamboshela nne, na amboshela nne, anakwaposhela bhandumile bhala. 41 Akumposhela nkulondola jwa a Nnungu kwa ligongo lyabha nkulondola jwa a Nnungu, shaposhele upo ilandana na ika nkulondola jwa a Nnungu. Akumposhela akwete aki kwa ligongo lyabha akwete aki, shaposhele upo ilandana na ika akwete aki. 42 Na mundu jojowe shampe jumo jwa munkumbi gwa bhene bhashoko bhashokobha, kapela shikombe sha masi gaima, pabha bhaajiganywa bhangu, kweli ngunakkummalanjilanga, jwakwapi shalepele poshela upo yakwe."

11 A Yeshu bhakamaliyeje kwaalajiyanga bhaajiganywa bhabho likumi limo na bhabhili bhala, gubhajabhwilenje penepo, gubhapite jiganya na lunguya mwiiilambo yabhonji. 2 A Yowana bhabhatisha

bhali bhatabhilwe kuligelesha gubhapilikene ga itendi ya a Yesu Kilishitu. Bhai, a Yowana gubhaatumilenje bhaajiganywa bhabho bhakaabhuyanje. **3** Gubhaabhuhiyenje, “Mmwe ni bhakwiya bhala, eu twaalindile bhana?” **4** A Yesu gubhaajangwilenje, “Nnjendangane nkaalugulilanje a Yowana indu inkwpilikananga na inkwibhonanga, **5** ashinangalole bhanalolanga na ashinangwabha bhanakwendanga na bhakwetenje mangundula bhanalamanga na ashinangapilikane bhanapilikangananga na bhawilenje bhanayukanga na bhaalaga bhanalungushiwanga Ngani ja Mmbone. **6** Mbaya mundu jojowe akalebha kwa ligongo lya leka ngulupalila nne.” **7** Bhai, bhantenga bha a Yowana bhala bhalijabkulanga, a Yesu gubhatandwibhe kwaabhalanjilanga makundi ga bhandu ngani ja a Yowana, “Mwashinkwendangana kuanga kulola nndi? Kulola litete lilitikinywa na mbungo? **8** Igala, mwapitengeneje kulola nndi? Mundu awete nngubho ya konja? Bhandu bhaawalanga nngubho ya konja mwaakutamanga nnyumba ya ashimpalume bha shilambo. **9** Ikabheje, mwapiteneje lolanga nndi? Nkulondola jwa a Nnungu? Elo, ngunakummalanjilanga, mumweninji nkulungwa kupunda nkulondola jwa a Nnungu. **10** “A Yowana ni bhantenga bhalugwilwe Mmajandiko ga Ukonjelo, ‘Nhole, ngunakuntuma mutenga jwangu annongolele, ashanng’alashiye mpanda gwenu.’ **11** Kweli ngunakummalanjilanga, akanabhe koposhela jwa nnibhondo ali jwankulungwa kwaapunda a Yowana bhabhatisha. Ikabheje, jwene ali jwanshoko Muupalume gwa Kunnungu, ni jwankulungwa kwaapunda bhenebho. **12** Tandubhila mobha ga a Yowana bhabhatisha mpaka nnaino, Upalume gwa Kunnungu gunakomanilwa na bhandunji bhanalinganga kuutola kwa mashili na bhakwetenje mashili bhanakuutolanga. **13** Pabha

ashinkulondola bha a Nnungu bhowe na Shalia, mpaka mobha ga a Yowana, bhashinkulondolanga ga gene mobha gano. **14** Bhai, monaga shinkundanje, a Yowanabho ni a Eliya bhapinjikwaga bhaisque. **15** Akwete makutujo apilikane. **16** “Bhai, nandanye na ndni alu lubhelekolu? Malinga bhashanda bhatemingenenje kushoko, bhalo kwaabhalanjilanga ashaajabhonji bhalinkutinji, **17** ‘Twanngombelenje imbeta, ikabheje mwangainanga! Twajimbile nyimbo ya ililo, ikabheje mwangagutanga!’ **18** Pabha a Yowana bhaisque, bhakaalya wala papila, gubhashitenje, ‘Bhashikola lioka.’ **19** Mwana juka Mundu gwaisque, alilya na papila, gubhashitenje, ‘Mwaalolanje bhaakongolela kulya na kolelwa, ashaambwiga ajabho bhakamula koli na bhakwetenje yambi!’ Nkali nneyo lunda lwa a Nnungu lumanyishe kuti lwammbole kwa itendi yakwe.” **20** Kungai a Yesu gubhatandwibhe kwaagambanga bhandunji bha mwiilambo mubhatendile ilapo ya igwinji, pabha bhandu bhakwe bhangapinganga kwiiipeta. **21** “Ole gwenunji bhandu bha ku Kolashini! Ole gwenunji bhandu bha ku Bhetishaida! Pabha, ilapo itendeshe kungwenunji monaga ikatendeshe ku Tilo na ku Shidoni, bhandu bhabhonji bhakaiptilenje kwa wala maguniya na pakala liu kuti bhaleshilenje yambi. **22** Ikabheje, ngunakummalanjilanga, lyubha lya ukumu mmanganya nkupinga patanga mboteko ya punda ya bhandunji bha ku Tilo na ku Shidoni. **23** Na mmanganyanji bhandu bha ku Kapalanaumu, bhuli, shinkuywanje mpaka kunnungu? Nkupinga tuluywanga mpaka kundamo ja bhawilenje! Pabha, ilapo itendeshe kungwenunji monaga ikatendeshe kubhandu bha ku Shodoma, shene shilambosho shikaapali mpaka lelo. (**Hadēs**
g86) **24** Ikabheje ngunakummalanjilanga, lyubha lya ukumu mmanganyanji nkupinga patanga mboteko ya punda ya bhandu

ku Shodoma.” **25** Gene malangago a Yeshu gubhashite, “Ngunatenda eja kwenu mmwe Atati, Mmakulungwa bha kunnungu na pa shilambolyo, pabha yene indui nshikwaiyanga bhakwetenje lunda na bhaashomanga, nikwaunukulilanga bhana bhashoko bhashoko. **26** Elo Atati, pabha shiishite kunnonyela mmayene.” **27** Gubhaabhalanjilenje bhandunji, “Atati bhashingamuya indu yowe. Jwakwapi akummanyia mwana ikabhe Atati, wala akwaamanya Atati ikabhe Mwana, na jojowe apingaga Mwana kung'unukulila. **28** “Nnjiyangananje mmowe nkuabhukanga na topelwa na mishigo, nne shinimpumulianje. **29** Nkundanje kulongoywa na nne malinga ng'ombe atabhilwa lingongota, nkupinga mwijiganyanje kwangu nne. Pabha nne najwakwiitimalika na najwashinunu, numbe mmanganyanji shimpumulilanje. **30** Pabha lingongota lyangu likaatona na nshigo gwangu ukaatopa.”

12 Gene malangago, a Yeshu bhatendaga pita mmigunda ja ngano Lyubha iya Pumulila. Bhai, bhaajiganywa bhabho gubhakwetenje shibhangga, gubhatandwibhenje kupulula maashe ga ngano, nitauna. **2** Mapalishayo bhakagabhonanjeje genego, gubhaaluguliljenje a Yeshu, “Nnole, bhaajiganywa bhenu bhanatendanga indu ikapinjikwa tenda Lyubha iya Pumulila.” **3** A Yeshu gubhaajangwilenje, “Bhuli, nkanabhe shomanga ibhatendile a Daudi na ashaajabhonji pubhalinginji na shibhangga? **4** Shibhashite jinjila nnyumba ja a Nnungu gubhalile mikate jabhishilwe kwa ligongo iya a Nnungu jiila. Pabha bhenebho nkali na ashaajabhonji bhakaapinjikwangaga kulya jene mikatejo, ikabhe bhaabhibhilape. **5** Eu bhuli, nkanabhe shomanga nshitabhu sha Shalia ja a Musha kuti, puyakoposhelaga Lyubha iya Pumulila bhaabhibhilanga bhatendaga lekanga

kagula Shalia nniekalu, ikabheje bhakaganishiwanga kuti bhanalebhanga? **6** Bhai, ngunakummalanjilanga kuti pepano apali ali jwankulungwa kupunda liekalu. **7** Kaliji nkamumanyinji malombolelo ga gene malobhe gano, 'Shingupinga shiya nngabha mbepei,' nkanaaukumulanje bhandunji bhangalebhanga. **8** Pabha, Mwana juka Mundu, ni nkulungwa jwa Lyubha lya Pumulila." **9** A Yeshu gubhashoshile penepo, gubhajinjile nshinagogi jabhonji. **10** Ashinkupagwa mundu akwete nkono upolweshe. Bhai, bhandu gubhaabhushiyenje a Yeshu, "Bhuli, ilipinjikwa kunamiya mundu Lyubha lya Pumulila?" Bhashinkwaabhuanya nkupinga bhapatanje shiumilo sha kwaashitakia. **11** Ikabheje a Yeshu gubhaabhalanjilenje, "Tujile mundu munkumbi gwenunji, ngondolo jwakwe atumbushilaga nniimbo, bhuli, akanshoya mwenemo pabha Lyubha lya Pumulila? **12** Na mundu ni jwa mana kupunda ngondolo! Bhai, shalia jetu jinakutupinga kutenda ya mmbone Lyubha lya Pumulila." **13** Kungai gubhannugulile mundu jula, "Goloya nkono gwako." Gwaugolweye, ukulamaga nibha malinga guna gula. **14** Ikabheje Ashimapalishayo gubhakopokenje palanga, gubhatendilenje nkungulu shanabhuli shibhaabkulanganje a Yeshu. **15** A Yeshu bhakagamanyeje genego, gubhajabhwile kweneko. Bhandu bhabhagwinji gubhaakagwilenje, nigubhaalamiyenje bhalwelenji bhowe, **16** gubhaamulishenje bhanannugulilanje mundu ga bhenebho, **17** nkupinga gamalile malobhe gubhabhelekete a Ishaya ankulondola bha a Nnungu bhalinkuti, **18** "Nnole ntumishi jwangu juninng'agwile, Jungumpinga anonyela muntima gwangu. Shimishe Mbamu yangu muka jwenejo, Jwalakwe shalunguyе ya aki ku bhandunji bhangabha Bhayaudi. **19** Akakola mitau wala kujobbela, Wala lilobhe lyakwe likapilikanika

mmipanda. **20** Nnai upondeshe akautemanya, Wala utambi ushoya lyoi akauima, Mpaka pushatende ukumu jipinjikwa jitagwale. **21** Bhandu bhangabha Bhayaudi shibhalikulupalilanje lina lyakwe.” **22** Penepo bhandu gubhaapeleshelenje a Yesu mundu jumo nangalole aliji bhubhu ligongo ashinkukola maoka. A Yesu gubhanshoshiye lioka jula, gwakombwele kubheleketa na lola. **23** Lugwinjili lowe gubhakanganigwenje bhalinkutinji, “Bhuli, pana jweneju Ulongo gwa a Daudi?” **24** Ikabheje Mapalishayo bhakapilikananjeje genego, gubhashitenje, “Jwene munduju anashoya maoka kwa mashili gaka Bhelishebhuli, nkulungwa jwa maoka.” **25** A Yesu, bhakaimanyeje ng'aniyo yabthonji, gubhaalugulilenje, upalume gogowe ugabhanikaga makundi nikana, shiugwe, na shilambo eu likaja lyolyowe ligabhanikaga makundi nikana, likalonjeya. **26** Ibhaga Lishetani anashoya maoka, bhai, upalume gwakwe shigulonjeye shanabhuli? **27** Mmanganya nkutinji ngunashoya maoka kwa mashili gaka Bhelishebhuli, bhuli, bhaakulupalila bhenunji bhanakwashoyanga kwa mashili gakeni? Kwa lyene ligongolyo bhanganyabho shibhanng'ukumulanje. **28** Ikabheje monaga ngunashoya maoka kwa mashili ga Mbamu jwa a Nnunu, bhai, mmumanyanje kuti Upalume gwa a Nnunu ung'ishilenje. **29** “Jwakwa mundu akombola kujinjila nnyumba jika mundu akwete mashili nikumpokonyola indu yakwe, gwangali tandubha kuntabha. Penepo shakombole kumpokonyola indu yakwe. **30** “Jojowe akakwiilunda na nne, anangana, naka jojowe akalopola pamo na nne, anajaanganya. **31** Kwa lyene ligongolyo, ngunakummalanjilanga, bhandu shibhaleshelelwanje yambi yabthonji yowe, na matukano gowe, ikabheje ga kuntukana Mbamu jwa Ukonjelo bhakaleshelewanga. **32** Na

kabhili, abheleketa lilobhe lya kuntauka Mwana juka Mundu shaleshelelwe, ikabheje abheleketa lilobhe lya kuntauka Mbumu jwa Ukonjelo, akaleshelelwa, wala nshilambolyo sha nnaino shino, wala shikwiyasho. (aiōn g165) 33 “Nkongo ubhaga gwa mmbone na iepo yakwe shiibhe ya mmbone, na nkongo ubhaga gwangali gwa mmbone na iepo yakwe shiibhe yangali ya mmbone, pabha nkongo pukumanyika kwa iepo yakwe. 34 Mmanganya nninginji malinga majoka! Nkukombolanga bhuli kubheleketa indu ya mmbone nninginji mmangali bha mmbonenji? Pabha mundu yabheleketa ingumbele muntima gwakwe. 35 Mundu jwa mmbone anatenda indu ya mmbone, pabha nshibhiko shakwe mushigumbala indu ya mmbone, ikabheje mundu jwa nyata ntima, anatenda indu ya nyata pabha ntima gwakwe ushigumbala indu ya nyata. 36 “Bhai, ngunakummalanjilanga, lyubha lya ukumu bhandu bhapinga kwiya jangulanga ga malobhe gowe gangali ga mmbone gubhabheleketenje. 37 Pabha kwa malobhe genu shinnjiye bhoneka kuti nkewe aki, na kwa malobhe genu shinng'ukumulwe.” 38 Penepo Mapalishayo na bhaajiganya bha Shalia bhananji gubhaalugulilenje a Yesu, “Mmaajiganya, tunapinga tushibhone shilangulo kopoka kwenu mmwe.” 39 Nabhalabho gubhaajangwilenje, “Alu lubhelekolu lwa lebha na lukakulupalika kwa a Nnungu! Nnapinganga shilangulo, nkapewanga ikabheje shilangulo sha a Yona ankulondola bha a Nnungu. 40 Shibhashite tama a Yona mobha gatatu shilo na mui nnipitu lika shamaki, nneyo peyo Mwana juka Mundu shatame mobha gatatu nnitaka shilo na mui. 41 Bhandu bha ku Ninawi shibhakoposhelanje mobha ga ukumu, nabhalabhonji shibhaluukumulanje alu lubhelekolu kuti lushilebha, pabha bhandu bha ku Ninawi bhaipetilenje kwa ligongo lya miungu

ja a Yona, na mbena apano apali ali nkulungwa kupunda a Yona. **42** A Malikiya bha kwibhanda shibhakoposhele alu lubhelekolu pushiluukumulwe, na bhalabho shibhaluuukumule kuti lushilebha, pabha bhenebho bhashinkukopoka kwa taliya, nkupinga bhapilikane malobhe ga lunda ga a Shelemani, na mbena apano apali ali nkulungwa kupunda a Shelemani. **43** "Lioka anshokaga mundu, anatimbilatimbilila nng'anga nkuloleya pa pumulila na anapabphone. **44** Penepo anakwilugulila nnyene, 'Shimuje kumui kungoposhele,' ikabheje pabhuja nakupaimana pangali shindu, pali papyejilwe nikonjelewa, **45** shajende kwaatolanga ashimaoka bhananji shabha, bhajogoyanga kupunda jwenejo, na bhowe bhanakwiya kunjinjilanga mundujo. Na ali jika mundujo shijibhe jangali ja mmbone kupunda kundandubho. Na malinga shiipingabha kwa lubheleko lwa lebhalu." **46** A Yesu bhali nkubheleketa na bhandu bhabhagwinji, anyinabhabho na ashaapwabho gubhaikengene nijimangana palanga, bhalipinganga kubheleketa nabho. **47** Bhai, mundu jumo gwabhalugulile, "Anyinabhenu na ashaapwenu pubhalinginji palanga, bhanapinganga kubheleketa na mmwe." **48** Ikabheje a Yesu gubhaajangwile bhandu bhala, "A mama nne agani? Na ashapwanga nne ashigani?" **49** Kungai gubhaagolosheyenje nkono kwaalanguyanga bhaajiganywa bhabho, bhalinkuti, "Nnole abha ashaamama na ashaapwanga! **50** Pabha jojowe atenda yakupinga Atati bhali kunnungu, jwenejo ni mpwanga nne na nnumbwangu nne na a mama nne."

13 Lyubha lyolyo, a Yesu gubhajabhwile pamui pala, gubhapite tama nnyenje litanda. **2** Makundi gamakulungwa ga bhandu gashinkwaatimbilila mpaka a Yesu gubhakwelile muntumbwi gubhatemi. Bhandu bhowe gubhajimingene nnyenje litanda.

3 Nabhalabho a Yesu gubhaalugulilenje indu yaigwinji kwa ndango, bhalinkuti, "Mpilikananje! Nkupanda ashinkwenda panda mmbeju. 4 "Paliji nkumiya mmbeju, ina gwigwilile mumpanda, ijuni gwiishe nilya. 5 Ina gwigwilile pamaganga pangali litaka lyaligwinji. Gwiimelile shangupe pabha litaka likataliyeje, 6 lyubha likabhaleje, gwiinyalile, na pabha mbubhu yakwe yangajendeya gwijumwile. 7 Ina gwigwiile pa mikongo ja mibha, na jalakwe gujikulile niutalila. 8 Ina gwigwilile pa litaka lya mmbone, gwiimelile, gwiogwele ina makumi kumi na ina makumi shita na ina makumi gatatu. 9 Akwete makutujo na apilikane!" 10 Bhaajiganwa bhabho gubhaajendelenje nikwaabhuwa, "Pakuti nnabheleketa na bhandunji kwa ndango?" 11 A Yesu gubhaajangwilenje, "Mmanganya nshijaliwanga kwiimanya indu ya nng'yo ya Upalume gwa Kunnungu, ikabheje bhanganyanjibho bhangajaliwanga. 12 Pabha akwete shindu apinga pegwa na jenjeshewa, ikabheje jwangali shindu, nkali shakwete shila, shipinga tolwa. 13 Ngunabheleketa nabhonji kwa ndango, pabha bhanalolanga ikabheje shakwa shibhakushibhonanga, bhanapilikanilanga ikabheje bhakapilikananga, wala bhakaelewanga. 14 Gatimilile gubhabhelekete ankulondola bha a Nnungu a Ishaya ga kuti, Bhakulungwa bhaashite, 'Kupilikana shimpilikananje, ikabheje nkaelewanga. Nkupinga lolanga, ikabheje nkashibhonanga shindu 15 Pabha mitima ja bhene bhandunjibha jishitopa Bhashiibhangga makutu gabhonji, Bhashikupilanga meyo gabhonji. Gwangali nneyo, bhakalolilenje na meyo gabhonji, Bhakapilikenjenje na makutu gabhonji, Bhakaelewenje mmitima jabhonji, Bhakandendebhushilenje, bhashite Bhakulungwa, ngaalamiyenje.' 16 "Ikabheje mbaya mmanganyanji, pabha

meyo genunji ganalola na makutu genunji ganapilikana. 17
Kweli ngunakummalanjilanga, ashinkulondola bha a Nnungu
na bhandunji bha aki bhabhagwinji bhashinkulokolilanga
kugabhma gunkugabhonangaga, bhanagabhonanje, na pilikana
gunkupilikanangaga, bhanagapilikananje. 18 “Bhai, mmanganya
mpilikananje lutango luka nkupanda. 19 Jojowe akulipilikana
lilobhe lya Upalume gwa Kunnungu gwangali kulielewa, pali
malinga mmbeju igwilile mumpanda ila, na Lishetani anakwiyatola
shipandilwe muntima gwakwe shila. 20 Mmbeju jipandilwe pa
liganga jila jinalandana naka mundu akulipilikana lilobhe lya a
Nnungu, shangupe anakuliposhela nikwiinonyela, 21 ikabheje
akakulibhika muntima gwakwe nilonjeya, na pushiika shilaje
kwa ligongo lya lyene lilobhelyo, shangupe anatenguka. 22
Mmbeju jigwilile pa mikongo ja mibha, inalandalana naka mundu
akulipilikana lyene lilobhelyo, ikabheje ga lipamba lya shilambolyo
shino na ga pinga kola indu inautalila lilobhelyo, na lyalakwe
likaogoya iepo. (aiōn g165) 23 Mmbeju jipandilwe nnitaka lya
mmbone jinalandana naka mundu akulipilikana lyene lilobhelyo
na kulielewa, na jwalakwe malinga mmbeju iogoya iepo, jimo
makumi kumi na jina makumi shita na jina makumi gatatu.” 24 A
Yesu gubhaalugulilenje bhandunji lutango luna, “Upalume gwa
Kunnungu ushilandana naka mundu apandile mmbeju ya mmbone
mungunda gwakwe. 25 Ikabheje bhandu bhalibhagonilenje,
mmagongo nnjabho gwaishe, gwapandile likonde mungunda
gwabho gwa ngano, gwajjabhulile. 26 Bhai, ngano ikameleje na
tandubha tumbuka, likonde nalyalakwe gulikulile. 27 Bhatumishi
bha bhayene nngunda bhala gubhaajendelenje, nikwaalugulila,
‘Mmakulungwa, imwapandile mmbeju ya mmbone mungunda
gwenu. Igala nnaino likonde kulikopweshe kwei?’ 28 Nabhalabho

gubhaajangwilenje, ‘Amagongo ajangu bhatendile nneyo.’ Bhai, bhatumishi bhabho gubaabhuhiyenje, ‘Bhuli nnipinga tujende tukatutumbule?’ **29** Nabhalabho gubhaajangwilenje, ‘Nngabha, inabha pushintutumbulanje likonde nnatutumbulanga na ngano.

30 Nnekanje yowe ikule pamo mpaka mobha ga maneng’eno. Gene mobhago shinaalugulilanje bhaunanga, nkumbililanje likonde mmatuto njokoa. Ikabheje ngano nnopolanje nkabhikanje mungokwe jangu.” **31** A Yeshu gubhaaluguliljenje bhandunji lutango luna, “Upalume gwa Kunnungu unalandana na mmbeju ja aladali jatolile mundu jumo, gwapandile mungunda gwakwe. **32** Mmbeju jene jajishoko kupunda mmbeju yowe, ikabheje jimelaga jinakula nipunda yalya yowe munngunda, nibha malinga nkongo gwankulungwa, nkali ijuni inakwiyashenga maui nnyambi yakwe.” **33** A Yeshu gubaabalanjilenje lutango luna, “Upalume gwa Kunnugu ushilandana na ngedule jibhatolile bhakongwe bhamo, gwaangenyenye na utandi madebhe gabhili na nushu, utandi gowe guumwishe.” **34** A Yeshu bhashinkwaalugulilanga bhandu gene gowego kwa ndango. Bhangaalugulilanga shindu shoshowe gwangali ndango, **35** nkupinga litimilile lyelila, lyalugwilwe na ankulondola bha a Nnungu, “Shimelekete nabhonji kwa ndango Shing'unukule gaishiywe tandubhila kupanganywa kwa shilambolyo.” **36** Kungai a Yeshu gubhaalajilenje bhandunji bhala, gubhajinjile nnyumba. Bhaajiganywa bhabho gubhaajendelenje, gubhaabhalanjilenje, “Nntulugulile ukoto ga lutango lwa likonde munngunda.” **37** A Yeshu gubaabhalanjilenje, “Apanda mmbeju ya mmbone ila, Mwana juka Mundu, **38** Nngunda gula shilambolyo. Mmbeju ya mmbone ila, bhandunji bhalinginji Muupalume gwa Kunnungu. Ikabheje likonde lila bhandunji bhaka Lishetani. **39** Mmagongo apandile likonde lila ni Lishetani.

Mauno, mpelo gwa shilambolyo na bhaunanga, ashimalaika.

(aiōn g165) 40 Malinga makonde shigakuti kumbililwa nijokwa moto, pushijiyebla lyubha lya mpelo gwa shilambolyo. (aiōn g165)

41 Mwana juka Mundu apinga kwatumanga ashimalaika bhakwe bhakaalopolanje koposhela Muupalume gwabho bhowenji bhalinginji shiumilo sha bhandu kutenda yambi, na bhowe bhaatendanga ya nyata. 42 Nikwaaleshelanga nnishembo lya moto, kweneko bhapinga gutanga na tauna meno. 43 Kungai, bhanguja bhala bhapinga ng'anyimanga mbuti lyubha Muupalume gwa Ainabhabhonji. Akwete makutujo na apilikane! 44 "Upalume gwa Kunnungu unalandana na shibhiko shiishiwe munngunda. Mundu jumo gwashibhweni, gwashiishiye kabhili. Ashinkuangalala kwa kaje, gwapite kuusha yowe yakwete, gwaumile nngunda gula. 45 "Kabhili, Upalume gwa Kunnungu unalandana naka mundu jumo ausha indu, nkuloleya liganga lya konja lya mmbiya yaigwinji lishemwa lulu. 46 Akajibhoneje lulu jimo ja mmbiya yaigwinji, gwapite usha yowe yaakwete, gwaumile lulu jila. 47 "Kabhili, Upalume gwa Kunnungu unalandana na lyau litejilwe mmashi, yamaki ya kila namuna gwiiitanjile. 48 Lyau lila likagumbaleje, bhandunji gubhautilenje kunyenje bhaali, gubhatermingenjenje, gubhaagwilenje yamaki ya mmbone gubhatajilenje mwiikapu yabhonji na yangali ya mmbone gubhaijailenje. 49 Nneyo pushijiyebla kumpelo gwa shilambolyo, shibhakoposhelanje ashimalaika, bhapinga agulanya bhandunji, bhangali bha mmbone na bhakwetenje aki, (aiōn g165) 50 na kwaleshelanga pa moto bhangali bha mmbonebho. Kweneko shibhagutanje na tauna meno." 51 A Yesu gubaabhushiyenje, "Bhuli, nngaelewenje gene gowego?" Gubhaajangwilenje, "Elo." 52 Nabhalabho gubaabhalanjilenje, "Bhai nneyo, kila

bhaajiganya bha Shalia bhajigenywe ga Upalume gwa Kunnungu, bhanalandana na bhayene nyumba bhashoya nshibhiko shabho indu ya ambi na ya bhukala.” **53** A Yeshu bhakamaliyeje kubheleketa ndango yoweyo gubhaijabhulile, **54** gubhapite kushijiji shabho ku Nashaleti. Kweneko gubhaajigenyenje bhandunji nshinagogi jabhonji, mpaka gubhakanganigwenje, gubhashitenje, “Jweneju kwapatile kwei lwene lunda na mashili ga tenda yene ilapo? **55** Bhuli, jweneju nngabha mwanagwabho apundi shelemala bhala? Bhuli, akwabhe nngabha a Malia na ashapwakwe nngabha a Yakobho na a Yoshepu na a Shimoni na a Yuda? **56** Bhuli, ashalumbugwe, bhowe nngabha tulitama nabhonji pano? Bhai, kwapatile kwei gene gowega?” **57** Bhai, gubhaashimilenje. Ikabheje a Yeshu gubhaalugulilenje, “Nkulondola jwa a Nnunu akalepela kukuywa, ikabheje pa shilambo shakwe na kunngwakwe!” **58** Kwa nneyo, bhangatenda ilapo yaigwinji pepala kwa ligongo lya ungakulupalila gwabhonji.

14 Gene mobhago a mpalume Elode gubhapilikene ngani ja a Yeshu. **2** Bhai, gubhaalugulilenje bhatumishi bhabho, “Bhenebha a Yowana bhabhatisha bhashiyuka, pabha mashili gabho ganatenda ilapo.” **3** Pabha a Elode bhashinkwaakamula a Yowana, nikwatabha kuligelesha kwa ligongo lya a Elodia, akongobhabho a Pilipi, apwabho. **4** Pabha a Yowana bhashinkwaalugulila a Elode “Nngabha alali mmwe kwaalomba bhene bhakongwebho!” **5** A Elode bhashinkupinga kwaabhlaga a Yowana, ikabheje bhashikwaajogopanga bhandunji, pabha bhamumanyinji kuti, a Yowana ankulondola bha a Nnunu. **6** Lyubha lya shikukuu sha bhelekwa kwabho a Elode, mwali jwabho a Elodia ashinkuina pa bhajeninji. A Elode guyaanonyele, **7** mpaka gubhalumbile kumpa mwaliijo shoshowe shapinga

juga. **8** Najwalakwe, akuno ajigenywe na akwabhe, gwashite, "Mmbe nnainope nshipeta, ntwe gwa a Yowana bhabhatisha."

9 A Elode gubhainjishe, ikabheje kwa ligongo lya lumbila kwabho na ga bhajeninji, gubhaamulishe apegwe. **10** Bhai, a Elode gubhantumile mundu kuligelesha akaakate ntwe a Yowana. **11** Ntwe gwabho guuishe guli nshiniya, gubhampele mwali jula, najwalakwe akwaapaga akwabhe. **12** Bhaajiganywa bha a Yowana gubhaikengenenje, gubhatolilene maiti gala, gubhashishilenje. Kungai gubhapite kwaabhalanjilanga a Yesu.

13 A Yesu bhakapilikaneje ngani ja a Yowanajo, gubhajabhwile pepala na ntumbwi, gubhapite kujika kwangali bhandu. Ikabheje bhandu gubhamumanyinji, gubhaakagwilenje na makongono kukoposhela mwilambo yabbonji. **14** Bhai, bhakaisheje kumbwani gubhaluweni lugwinjili lwa bhandu, gubaabhonelenje shiya, gubaalamiyenje bhalwele bhabhonji. **15** Ligulo, bhaajiganywa bhabho gubhaajendelenje gubhaalugulilenje, "Putuli pano pa anga na ligulo liishe. Bhai, mwaalajilanje bhandunji bhajendangane kushijiji bhakaiumilanje shalya."

16 A Yesu gubhaalugulilenje, "Ikapinjikwa bhajendangane, mmanganyanji mwaapanganje shalya." **17** Na bhalabhonji gubhaalugulilenje, "Jitukwete mikate nng'anope na yamaki ibhili." **18** A Yesu gubhaalugulilenje, "Mmbanganje yowe akuno." **19** Gubhaamulishe bhandu bhatamangane mmayai. Kungai a Yesu gubhatolile mikate nng'ano jila na yamaki ibhili ila, gubhalolile kunnungu, gubaatendele ej a Nnunu. Kungai gubhagebhenye mikate jila, gubhaapelenje bhaajiganywa bhabho, na bhalabhonji gubhaapelenje bhandunji. **20** Bhandu bhowe gubhalilenje, nijukuta. Kungai bhaajiganywa gubhakundikenyenje malepei gala, gubhagumbeyenje ikapu

yaishoko likumi limo na ibhili. **21** Bhandu bhalilenje bhala pubhalinginji bhanabhalume elupu nng'ano, gwangali kwabhalanganishiyanga bhanabhakongwe na bhana. **22** Shangupe, a Yeshu gubhaamulishenje bhaajiganywa bhabho bhakwelanje muntumbwi, bhalongolelanje jomboka litanda akuno bhalikwaalajilanga bhandunji. **23** Bhakaalajilanjeje bhandunji, gubhakwelile kushitumbi jikape kujuga Nnungu. Lyene ligulolyo pubhaliji jikape kweneko, **24** na gene malangago ntumbwi gula pugwaliji tome pakati pakati litanda, ikabheje gwatendaga komwa na mabhimbi pabha mbungo jatendaga puga kopoka mmujo jabhonji. **25** Shilo, tome na kumashelo, a Yeshu gubhaajendelenje bhaajiganywa bhalikwenda panani mashi. **26** Bhaajiganywa bhabho bhaakabhonanjeje bhalikwenda pantundu mashi gubhajogopenje kwa kaje, gubhashitenje, "Lioka!" Gubhajobhelenje bhalijogopanga. **27** Shangupe, a Yeshu gubhabhelekete nabhonji, "Mwiilumanje ntima, ni nne. Nnajogopanje!" **28** A Petili gubhaalugulile, "Mmakulungwa, ibhaga kweli mmwe, nnugulile nyiye kweneko pantundu mashi."

29 A Yeshu gubhashite, "Ayaga, nnjiye." A Petili gubhatulwishe muntumbwi mula gubhatandwibhe kwenda panani mashi, bhalikwaajendela a Yeshu. **30** Ikabheje bhakajibhoneje mbungo jila, bhakujogopaga, gubhatandwibhe titimila, gubhagutile nguto, "Mmakulungwa, nndapule!" **31** Penepo a Yeshu gubhagolweye nkono gwabho, gubhaakamwile nikwaalugulila, "Mmwe nkwete ngulupai jishoko! Pakuti mwangakulupalila malobhe gangu?"

32 Kungai gubhakwelilenje muntumbwi mula, na mbungo jila jikupumulaga. **33** Bhowe bhalinginji muntumbwi mula guhaatindibhalilenje, bhalinkutinji, "Kweli mmwe ni Bhanabho a Nnungu." **34** Gubhajombokenje litanda, gubhaikengenenje

kushilambo sha Geneshaleti. **35** Bhandunji bha kwekula bhakamumanyanjeje, gubhashumiyenje nganijo mmbali yowe. Bhai gubhaapeleshelenje a Yeshu bhalwelenji bhowe, **36** gubhaashondelesheyenje bhaalekanje bhaakwayanje nkali libhiniko lya ngubho jabho. Na bhowe bhaakwashiyenje gubhalamilenje.

15 Kungai Mapalishayo na bhaajiganya bha Shalia gubhaikengenenje koposhela ku Yelushalemu, gubhaajendelenje a Yeshu, nikwaabhuwa, **2** "Pakuti bhaajiganywa bhenu bhakakamulanga ikubho itujigenywe na bhanangulungwa bhetu? Bhakaanabhanga makono ukoto pa shalya." **3** A Yeshu gubhaajangwilenje, "Pakuti numbe mmanganyangi nnalekanga Shalia ja a Nnungu, nikagulila ikubho yenunji?" **4** A Nnungu bhaashite, 'Gwaajogope ainago na akwenu, pabha ishijandikwa, akwaatukana ainagwe eu akwabhe, abhulagwe.' **5** Ikabheje mmanganya nnajiganyanga kuti mundu abhaga na shindu shakwaapa ainagwe eu akwabhe, ikabheje ashibheleketa, 'Shene shindushi njikwaapa a Nnungu,' **6** bhai, akapinjikwa kabili kwaajogopa ainagwe nikwaapa! Nnei shinkuti kulinyegeyanga lilobhe lya a Nnungu nkukagula ikubho yenunji. **7** Mmanganya mmagulumba! A Ishaya bhalondwele ukoto genu mmanganya." **8** A Nnungu bhanabheleketa, "Bhene bhandunjibha bhananyogopanga kwa malobhepe, Ikabheje mitima jabhonji jishitalikangana na nne. **9** Kundindibhalila kwabhonji kwayoyo, Pabha majiganyo gabhonji ni malajilo ga shigundupe." **10** A Yeshu gubhaashemilenje bhandu bhagumbelenje bhala, gubhaalugulilenje, "Mpilikananje, na mmumanyanje! **11** Shindu shalya mundu shikakuntenda mundu anyate, ikabhe malobhe gakopoka nkang'wa, ni

gakuntenda mundu anyate." **12** Kungai bhaajiganywa gubhaajendelenje, nikwaabhuaya, "Bhuli, mmumanyi kuti Mapalishayo bhashinkutumbalanga bhakapilikananjeje malobhe genu?" **13** A Yesu gubhaajangwilenje, "Litepo lyolyowe lyangapandwa na Atati bha kunnungu, lipingatutumbulwa. **14** Mwaalekanje bhanganyabho, ashikalongolele nangalole. Nangalole annongoyaga nangalole mwine, bhowe bhanaabhili shibhatumbushilanje nniimbo." **15** A Petili gubhashite, "Nntulugulile ukoto ga lutango." **16** A Yesu gubhashite, "Nkali mmanganya mpaka nnaino nkanabhe kumumanyanga? **17** Bhuli, nkakumumanyanga kuti shoshowe shijinjila nkang'wa shinakwenda nnipitu na kungai shinaepukwa kulilindi? **18** Ikabheje malobhe gakopoka nkang'wa mugakoposhele muntima, na genego ni gakuntenda mundu anyate. **19** Pabha muntima inakoposhela ng'aniyo ya nyata, kubhulaga na labhalabha na gwii na kong'ondela unami na matukano. **20** Genego ni gakuntenda mundu anyate. Ikabheje kulya shalya gwangali nabha makono kukakuntenda mundu anyate." **21** A Yesu gubhajabhwile pepala gubhapite tama mmbali ja ku Tilo na ku Shidoni. **22** Bhai, bhakongwe bhamo Bhakanaani bha shene shilambosho gubhaaishile, gubhautiye lilobhe bhalinkuti, "Mmakulungwa, Bhaulongo gwa a Daudi, mmonele shiya! Mwali jwangu analaga kaje lioka." **23** Ikabheje a Yesu bhangaajangula. Bhai, bhaajiganywa bhabho gubhaajendelenje, nikwaabhalanjila, "Mwaalugulile bhajabhule, pabha bhanakutukagula bhalijobhela." **24** A Yesu gubhajangwile, "Nangatumwa ikabhe kubhandu bha ku Ishilaeli bhaliningji malinga ngondolo iobhile." **25** Penepo bhakongwe bhala gubhaatindibhalile, bhalinkuti, "Mmakulungwa, nnjiye

kunnyangutile.” **26** A Yeshu gubhaajangwile, “Nngabha mmbone tola shalya sha bhana nikwiijaila mbwa.” **27** Bhakongwe bhala gubhashite, “Kweli, Mmakulungwa, ikabheje nkali mbwa inalya malepeyo gagwa pa mesha ya ashinangologwe.” **28** Penepo a Yeshu gubhajangwile, “Mama, ngulupai jenu jikulungwa, bhai, ntendelwe malinga shinkupinga.” Lioka jula akunshokaga mwali jula, nigwalamile malanga gala. **29** A Yeshu gubhashoshile pepala gubhapite nnyenje litanda lya Galilaya, gubhajombweshe ku shitumbi, nigubhatemi. **30** Bhandu bhabhagwinji gubhaaishilenje bhalikwaapeleshelanga bhalemelenje na ashinangalole na ashinangwabha na bhubhu na bhalwelenji bhabhagwinji, gubhaabhisihilenje mmujo jabho, nabhalabho a Yeshu gubhaalamiyenje. **31** Lugwinjili lwa bhandu lula lwashinkulapa bhakaabhonanjeje ashibhubhu bhalibheleketanga, bhalemelenje bhalamilenje, ashinangwabha bhalijimajimanga, na ashinangalole bhalilolanga, bhandu gubhaainiyenje a Nnunu bha Ishilaeli. **32** Bhai, a Yeshu gubaashemilenje bhaajiganywa bhabho, gubhashite, “Ngunakwaabbonelanga shiya bhandunjibha, pabha bhashitamangana na nne mobha gatatu, nnaino bhangalinginji shalya. Ngapinga kwaalekanga bhajabkulangane gwangali kulya shalya, bhanaondokanga mumpanda.” **33** Bhaajiganywa bhabho gubhaalugulilenje, “Putulipano paanga, shitupate kwei shalya sha jukuta bhandu bhabhagwinji nnei?” **34** A Yeshu gubaabhushiyenje, “Mikate jilingwa jinkwetenje?” Gubhaajangwilenje, “Shabha na yamaki ishokope.” **35** Bhai, a Yeshu gubaamulishenje bhandu bhatamangane pai. **36** Gubhatolile mikate shabha jila na yamaki ila, gubhatendile eja kwa a Nnunu, gubhagebhenye, gubhaapelenje bhaajiganywa bhabho, na bhalabhonji gubhaagabhanishiyenje bhandunji.

37 Bhowe gubhalilenje nijukuta. Kungai gubhakundikenyenje malepei, gubhagumbeyenje ikapu shabha yaikulungwa. 38 Bhalilenjebho pubhalinginji bhanabhalume elupu nsheshe, gwangali kubhalanganishiya bhanabhakongwe na bhana. 39 Bhai, a Yeshu gubhaalajilenje bhandunji, gubhakwelile muntumbwi, gubhapite mmbali ja ku Magadani.

16 Mapalishayo na Mashadukayo gubhaajendelenje a Yeshu, bhalikwaatejelanga, gubhaajujilenje bhaatendelanje shilangulo kopoka kunnungu. 2 A Yeshu gubhaajangwilenje, "Shiikaza shigulogulo mmanganya nkutinji, 'Malabhi kipingasha ukoto pabha liunde lishishejela' 3 Kulisha nkutinji, 'Lelo kukasha ukoto mbungo jipinga puga, pabha liunde lishishejela na maunde gashibhindula!' Bhai, mmanganya nnamanyiilanga kujimanya mióngwe kwa lola liunde, ikabheje nkakwimanyanga ilangulo ya jene mióngwe jino? 4 Lubheleko lwa lebha na lukakulupalika kwa a Nnunu! Nnapinganga shilangulo, ikabheje lukapegwa shilangulo shoshowe ikabhe shilangulo sha a Yona." Bhai, gubhaaleshilenje, nigubhaijabhulile. 5 Bhaajiganywa bhabho bhakajombokanjeje ng'ambu jabhili ja litanda, gubhang'amulenje kuti bhashilibhalanga kujigala mikate. 6 A Yeshu gubhaalugulilenje, "Mwilolesheyange na mwiteiganje na ngedule ya Mapalishayo na Mashadukayo!" 7 Ikabheje bhalabhonji gubhataukengenenje ashayenenji, "Bhanabheleketa nneyo pabha twangajigala mikate." 8 A Yeshu gubhaimanyi ng'aniyo yabbonji, gubhaalugulilenje, "Mmanganya mmandunji bha ngulupai jishoko! Pakuti nnabheleketanga ga ligongo lya ngajigala mikate? 9 Bhuli, nkanabhe ng'amulanga? Bhuli, nkaakumbushilanga punagebhenye mikate nng'ano jila kwa bhanabhalume elupu nng'ano? Bhuli ikapu yaishoko ilingwa imwagumbeyenje ya malepei? 10 Eu, mikate shabha

jila jibhagabhanishiyenje bhanabhalume elupu nsheshe, bhuli, imwakundikenyenje ikapu yaikulungwa ilingwa ya malepei? **11** Pakuti nkang'amulanga kuti ngabheleketaga ga mikate? Ikabheje mwiteiganje na ngedule ya Mapalishayo na Mashadukayo!" **12** Penepo bhaajiganywa gubhamumanyinji kuti bhashikwaalugulilanga bhaiteiganje nngabha na ngedule ya mmikate, ikabheje bhaiteiganje na majiganyo ga Mapalishayo na Mashadukayo. **13** A Yeshu bhakaisque ja ku Kaishalia Pilipi, gubhaabhushiyenje bhaajiganywa bhabho, "Bhandu bhakutinji Mwana juka Mundu ni gani?" **14** Gubhaajangwilenje, "Bhananji bhakutinji a Yowana Bhabhatisha, bhananji a Eliya, bhananji a Yelemia, eu jumo munkumbi gwa ashinkulondola bha a Nnungu." **15** A Yeshu gubhaabhushiyenje, "Na mmanganyanji bhuli, nkutinji nne gani?" **16** A Shimonu Petili gubhajangwile, "Mmwe a Kilishitu, Bhanabhabho a Nnungu, bhali bhabhakoto." **17** A Yeshu gubhashite, "Mbaya mmwe a Shimonu bhanabhabho a Yona, pabha nngabha mundu anng'ibhulile yenei, ikabhe Atati bhali kunnungu. **18** Nne ngunakunnugulila mmwe a Petili, mmwe lindandawe na panani lindandawe ngupinga shenga likanisha lyangu, wala mashili ga kundamo ja bhawilenje gakalikombola.

(Hadēs g86) **19** Shinimpe punguo ya Upalume gwa Kunnungu, shoshowe shishintabhe pa shilambolyo, shishitabhwe kunnungu na shoshowe shishinngopole pa shilambolyo, shishigopolwe kunnungu." **20** Kungai gubhaalimbiyenje bhaajiganywa bhabho, bhanannugulilanje mundu jojowe kuti bhenebho a Kilishitu. **21** Tandubhila gene malangago a Yeshu gubhatandwibhe kwaalugulilanga bhaajiganywa bhabho gwangali nng'iyo kuti bhanapnjikwa kwenda ku Yelushalemu, na kweneko bhapinga potekwa na bhanangulungwa na bhakulungwanji bhaabhisila

na bhaajiganya bha Shalia. Kuti, bhapinga bhulagwa na lyubha lya tatu shibhayuywe. **22** A Petili gubhaatolile kuntemela, gubhatandwibhe kwaakalipila, “Inabhe nneyo Mmakulungwa! Lyeneli likankoposhela!” **23** Ikabheje a Yesu gubhatendebhwishe, gubhaalugulile a Petili, “Nnyabhlile apano, Lishetani! Mmwe nnang’ibhilila. Ng’aniyo yenu nngabha ya a Nnuntu ikabhe ya shigundu!” **24** Kungai a Yesu gubhaalugulilenje bhaajiganya bhabho, “Mundu jojowe apinga ngagula nne, anapinjikwa aikane nnyene, ajigale nshalabha gwakwe angagule. **25** Pabha, mundu apinga kulama gwangali ngulupalila nne, akakola gumi gwa pitipiti, ikabheje shakunde bhulagwa kwa ligongo lya ngulupalila nne, shakole gumi gwa pitipiti. **26** Mundu shiimpwaile nndi apataga indu yowe ya pa shilambolyo na akuno aliobhya gumi gwakwe gwa pitipiti? Eu, mundu shashoye shindu shashi pa gumi gwakwe gwa pitipiti? **27** Pabha, Mwana juka Mundu shaishe na ukonjelo gwa Ainagwe pamo na ashimalaika bhakwe, penepo shannipe kila mundu malinga shashite tenda. **28** Kweli ngunakkummalanjilanga, bhapalinji bhananji pepano bhakawanganga bhakanabhe kummonanga Mwana juka Mundu alikwiya malinga Mpalume.”

17 Gakapiteje mobha shita, a Yesu gubhaatolilenje a Petili na a Yakobho na a Yowana apwabho, gubhajombokenje ku shitumbi shashileu. **2** Kweneko, a Yesu gubhapindikwishe lubhombo pa meyo gabhonji, kumeyo kwabho kwashinkung’anyima malinga lyubha na nngubho yabho puyaliji yanawe malinga shilangaya. **3** A Musha na a Eliya gubhaakoposhelenje, gubhalinginji nkubheleketa na a Yesu. **4** Penepo a Petili gubhaalugulile a Yesu, “Mmakulungwa, shankonja uwe kubha apano! Mpingaga shinjenje mabhanda gatatu, limo lyenu na lina lya a Musha

na lina lya a Eliya.” **5** Pubhaliji nkubheleketa nneyo, liunde lya nawe likwaunishilangaga, lilobhe gulipilkanishe koposhela nniundemo, “Jweneju ni mwanangu jungumpinga, anonyela, mumpilikanilanje.” **6** Bhaajiganywa bhakapilikananje nneyo gubhagwilenje namanguku, gubhajogopenje kaje. **7** A Yesu gubhaajendelenje, nikwaakwayanga, gubhashite, “Nnjimangane, nnajogopanje!” **8** Bhakalolanjeje kunani bhangammonanga mundu juna, ikabhe a Yesu jikape. **9** Bhai, pubhalinginji bhalielelanga kopoka kushitumbi, a Yesu gubhaalimbiyenje bhalinkuti, “Nnannugulilanje mundu indu imwiibhweninji, mpaka Mwana juka Mundu pashayuywe.” **10** Kungai bhaajiganywa bhabho gubhaabhushiyenje, “Pakuti bhaajiganya bha Shalia bhakutinji inapinjikwa bhatandubhe kuika a Eliya?” **11** A Yesu gubhaajangwilenje, “Kweli, a Eliya shibhaishe kualaya indu yowe. **12** Ikabheje ngunakummalianjilanga, a Eliya bhaaishe bhanganyabho bhangaamanyanga, ikabhe bhashinkwaatendelanga mwaapinjilenje. Nneyo peyo mwana juka Mundu apinga potekwa mmakono gabhonji.” **13** Penepo bhaajiganywa bhala gubhamanyinji kuti bhatendaga kwaabhalanjilanga ga a Yowana Bhabhatisha. **14** Bhakaikangananjeje ku bhandu bhagumbelenje bhala, bhandu bhamo gubhaajendele a Yesu, nikwaatindibhalila, **15** gubhashite, “Mmakulungwa, mummonele shiya mwanangu ashikola shialala, numbe analaga kaje, papagwinji anagwila pa moto eu mmashi. **16** Nashinkumpeleka kubhaajiganywa bhenu ikabheje bhangakombolanga kunshoya.” **17** A Yesu gubhajangwile, “Alu lubheleko Iwangali ngulupai na Iwa puganika! Shindame na mmanganya mpaka shakani? Shinikakatimile na mmanganya mpaka shakani? Munnjiyenajonji akuno mwanajo,”

18 Bhai, a Yeshu gubhankalipile liokajo, nigwanshoshile mwana jula, gwalamile malanga gala. **19** Kungai bhaajiganywa gubhaajendelenje a Yeshu shintemela, gubhaabhushiyenje, "Pakuti uwe twangakombola kunshoya lioka jula?" **20** A Yeshu gubhaajangwilene, "Kwa ligongo lya ungakulupalila gwenunji. Kweli ngunakummalanjilanga, ibhaga shinkolanje ngulupai, nkali jajishoko malinga mbeju ja aladali, shinkombolanje kushilugulila nkali ashi shitumbishi, 'Shokapa ujende akula,' shishijende. Shakwa shoshowe shikaakomboleka kungwenunji." **21** Ikabheje lioka jwa nnei akashoka ila kwa tabha na juga. **22** Pubhalinginji pamo ku Galilaya, a Yeshu gubhaalugulilenje, "Mwana juka Mundu apinga kamuywa ku bhandunji. **23** Bhapinga kummulaganga, ikabheje lyubha lya tatu shayuywe." Bhaajiganywa gubhainjikenje kaje. **24** A Yeshu na bhaajiganywa bhabho bhakaikanganeje ku Kapalanaumu, bhakamula koli ja liekalu bhala gubhaajendelenje a Petili, gubhaabhushiyenje, "Bhuli, bhaajiganya bhenunji bhalilipa koli ja Liekalu?" **25** A Petili gubhajangwile, "Elo, bhalilipa." Bhai a Petili bhakajinjileje nnyumba, bhakanabhe bheleketa lilobhe, a Yeshu gubhaabhushiye, "A Shimoni, mmwe nkubhona bhuli? Ashimpalume bha shilambolyo bhanalonganga koli kwa ashigani? Kwa ashaayene shilambo eu ku bhajeninji?" **26** A Petili gubhajangwile, "Kopoka ku bhajeninji." A Yeshu gubhaalugulile, "Bhai monaga nneyo, bhashilambo bhakaalipanga koli. **27** Ikabheje tunaatumbayanje, nnjende kulitanda nkatambishe ndowana, shamaki shatandubhe tanjilajo muntole, munng'unukule kang'wa, nkatimo shimwiimane mmbiya ya koli. Ntole nkaapanganje pangunne na mmayene."

18 Gene mobhago bhaajiganywa gubhaajendelenje a Yeshu, gubhabhushiyenje, "Gani ali jwankulungwa Muupalume gwa

Kunnungu?" 2 A Yeshu gubhanshemile mwana jumo, gubhannjimishe pakati jabhonji, 3 gubhashite, "Kweli ngunakummalianjilanga, nkatendebukanje nibha malinga bhana, ngu, nkajinjilanga Muupalume gwa Kunnungu." 4 Jojowe akwiinyegaya nibha malinga aju mwanaju, jwenejo shaabhe jwankulungwa Muupalume gwa Kunnungu. 5 Jojowe akumposhela mwana jumo malinga jweneju kwa ligongo lyangu nne, anamboshela nne. 6 Jojowe shannebhye jumo jwa bhashokonji bhaangulupalinga nne, mbaya akatabhilwe liganga likulungwa nnukoi nileselwa pa shilindili sha mashi. 7 Ole gwenunji bhandu bha pa shilambolyo kwa ligongo lya ilokoli. Illokoli shiikoposhele, ikabheje ole gwakwe jwene shaikumbuyejo.

8 "Monaga nkono eu lukongono lwenu lunnebhyaga, nnukate na nnjae kwataliya. Mbaya nnjinjile mugumi gwa pitipiti nni gwangali nkono eu lukongono, nngalingana na leselwa pa moto gwa pitipiti nni na makono na makongono genu ganaabhili. (aiōnios g166) 9 Liyo lyenu linnebhyaga, nnikolotole na kulijaa kwataliya. Mbaya nnjinjile mugumi gwa pitipiti nni na shongo, nngalingana leselwa pa moto gwa ku Jeanamu nni na meyo genu ganaabhili. (Geenna g1067) 10 "Mwiteiganje! Nnannyegayanje jumo jwa bhashokonjibha. Ngunakummalianjilanga, ashimalaika bhabhonji kunnunguko mobha gowe pubhalinginji tome na Atati bha Kunnungu. 11 Pabha Mwana juka Mundu ashinkwiya kwaatapulanga bhandu bhaobhilenje. 12 Nkubhonanga bhuli? Mundu akolaga ngondolo makumi kumi, anng'obhaga jumo, shatende bhuli? Anakwiileka ngondolo makumi tisha na tisha ila pa shitumbi, nikwenda kunnoleya aobhile jula. 13 Kweli ngunakummalianjilanga, ampataga apinga kwinonyela kupunda makumi tisha na tisha yangaobha ila. 14 Nneyo peyo,

Ainabhenunji bha Kunnungu bhakaapinga aobhe nkali jumo jwa bhashokonjibha. **15** “Mpwenu annebhelaga, munjendele nkanneye nninginji mmabhilipe. Ampilikanaga mumpatile mpwenu. **16** Akampilikane, nnjende naka mundu jumo eu bhabhili na mmayene, nkupinga kwa ukong'ondelo gwa bhandu bhabhili eu bhatatu, monaga lipali lilibhe limanyishe nimala. **17** Akaapilikilanje bhanganyabho, mwaalugulilanje bhandu bha nnikanisha. Na monaga akaapilikilanje, mumone malinga bhandu bhakakwaamanyanga a Nnungu eu bhakamula koli. **18** “Kweli ngunakummalianjilanga, shoshowe shishintabhanje pa shilambolyo, shishitabhwe kunnungu, na shoshowe shishinngopolanje pa shilambolyo shishigopolwe kunnungu. **19** Kweli ngunakummalianjilanga kabhili, bhabhili bhenunji pa shilambolyo bhalaganangaga shoshowe sha juga, Atati bhalil kunnungu shibhaatendelanje. **20** Pabha popowe pubhaimananga bhandu bhabhlili eu bhatatu kwa ligongo lyangu nne, nne mbali pamo na bhanganyabho.” **21** Kungai a Petili gubhaajendele a Yeshu, gubhaabhushiye, “Bhuli Mmakulungwa, mpwanga anebhele palingwa ninneshelele? Nkali pa shabha?” **22** A Yeshu gubhaajangwile, “Ngaalugula mala shabhape, ikabhe nkali makumi shabha mala shabha. **23** Pabha Upalume gwa Kunnungu unalandana naka mpalume jumo atendile eshabhu ika ntumishi jwakwe. **24** Eshabhu ikatandubheje, gubhapeleshelwe mundu jumo alongwaga ligambo mmbiya yaigwinji. **25** Jwene mundujo akakweteje shindu sha lipa, bhakulungwa bhakwe gubhaamulishe aushwe jwenejo na akagwe na ashibhanagwe na indu yowe yaakwete, nkupinga lipila ligambo lila. **26** Bhai, ntumishi jula gwabhatindibhalile, nigwashite, ‘Nnindile shininnipe ligambo lyenu lyowe.’ **27** Bhakulungwa

bhala gubhammonele shiya ntumishi jula, gubhanneshelele ligambo lila, gubhanneshile aijabhlile. **28** “Ntumishi jula gwajabhwile, gwanng’imene ntumishi nnjakwe annongaga ligambo lya mmbiya makumi kumi. Gubhankamwile, nikunkida pa nngulo alinkuti, ‘Unipe inguulongal!’ **29** Ntumishi nnjakwe jula akuntindibhalilaga nikunshondelesheya, alinkuti ‘Nninde shininnipe yowe’. **30** Ikabheje jwanngakunda, gwapite kuntabha kuligelesha mpaka pushalipe ligambo lyowe. **31** “Bhai, bhatumishi ajakwenji bhakaibhonanjeje itendeshe gubainginikenje kwa kaje, nigubhapite kwatashiyanga bhakulungwa bhabhonji gakoposhele. **32** Bhakulungwa bhala gubhanshemile ntumishi jula, gubhammalanjile, ‘Ugne ujwanyata ntima! Gwashinkunyuga nikuleshelele, gunikuleshelele ligambo lyako lyowe. **33** Bhuli, ikapinjikweje ugwe kummonnela shiya ntumishi nnjako malinga shinikubhonele shiya nne?’ **34** “Bhai, bhakulungwa bhala gubhatumbele kaje, nigubhampeleshe akapotekwe mpaka pushalipe ligambo lyowe. **35** A Yeshu gubhashite, Atati bhalikunnungu shibhantendelanje nneyo peyo monaga mundu akanneshelele mpwakwe mpaka muntima.”

19 A Yeshu bhakamaliyeje kubheleketa gene malobhego, gubhajabhwile ku Galilaya nigubhapite ku Yudea, kung’ambu lushi lwa Yolodani. **2** Bhandu bhabhagwinji gubaakagwilenje kweneko, gubaalamiyenje bhalwelenji. **3** Mapalishayo bhananji gubhaaishilenje, gubaalinjilenje bhalinkutinji, “Bhuli, alali mundu kunneka nkagwe kwa shiumilo shoshowe?” **4** A Yeshu gubhaajangwilenje, “Bhuli, nkanabhe shomanga Majandiko ga Ukonjelo kuti a Nnunu kundandubho bhashikumpanganya mundu jwa shileu naka jwankongwe, **5** nigubhashite, ‘Kwa lyene ligongolyo, jwannume shabhaleshe ainagwe na akwabhe,

nilundana na akagwe, na bhanaabhili shibhabhanganje shiilu shimo? **6** Kwa nneyo, bhanganyabho nngabha bhabhili kabhili, ikabhe shiilu shimo. Bhai, shibhalundikenye a Nnungu, mundu analakanye.” **7** Ikabheje Mapalishayo gubhaabhuhiyenje, “Bhai, kwa ndi a Musha bhashinkutulajila kunneka, nikunnjandishila talaka jwankongwe?” **8** A Yeshu gubhaajangwilenje, “A Musha bhashinkunnekanga ntendanje nneyo kwa ligongo lya nonopa mitima jenunji, ikabheje kundandubho ikaliji nneyo. **9** Bhai ngunakummalianjilanga, jojowe shanneshe nkagwe ikabhe kwa ligongo lya labhalabha, nilomba jwankongwe juna, analabhalabha na akunnomba jwankongwe aleshilwe jula analabhalabha.” **10** Bhaajiganywa bhabho gubhaalugulilenje, “Ibhaga indu ya mundu naka nkagwe ili nneyo, mbaya nngalomba.” **11** A Yeshu gubhaalugulilenje, “Nngabha bhowe shibhakundanje gene majiganyo gano, ikabhe bhajaliwenje na a Nnungu kutama gwangalomba bhala. **12** Pabha ipali iumilo ya tama gwangalomba, bhana shibhelekwa, bhana bhashiuwanga ntonga na bhandu, na bhana kwa ligongo lya tumishila Upalume gwa Kunnungu. Akombola kukunda gene majiganyo gano, akunde.” **13** Kungai bhandu gubhaapeleshelenje a Yeshu bhana bhabhashoko nkupinga bhaabhuhiilanje makono nikwaajujilanga. Ikabheje bhaajiganywa bhabho gubhaakalipilenje. **14** A Yeshu gubhashite, “Mwaalekanje bhanabho bhajiyangane kwangu nne, wala nnaaibhililanje, pabha Upalume gwa Kunnungu gwa bhandunji bhalinginji malinga bhanabha.” **15** Bhai, gubhaabhuhiilenje makono nkwaajujilanga mboka, nigubhashoshile pepala. **16** Mundu jumo ashinkwaishila a Yeshu, gwabhabhuhiye, “Mmajiganya mmammbone, ndende shindu shashi sha mmbone nkupinga mbate gumi gwa pitipiti?”

(aiōnios g166) 17 A Yeshu gubhammalanjile, "Pakuti, unanjema najwammbone? A Nnungupe jikape nibhali bhammbone. Upingaga kujinjila mugumi gwa pitipiti, ukunde amuli ya a Nnungu." 18 Mundu jula akwaabhuuya, "Amuli yashi?" A Yeshu gubhashite, "Unabhlaje, Unalabhelabhe, Unajibhe, Unakong'ondele unami, 19 Gwaajogope ainago na akwenu, na gumpinje ntami nnjako malinga shukwiipinga gwamwene." 20 Nshanda jula gwabhalugulile, "Gene gowego nigakamwile, shindubhile nndi kabhili?" 21 A Yeshu gubhannugulile, "Monaga upingaga kukamilika, kaushe indu yako, mmbiyayo ukaapanganje bhaalaga, na ugwe shukole shibhiko kunnungu, kungai ujiye kuungagule." 22 Nshanda jula akapilikaneje genego, gwaajabhlile ali ainjishe, pabha ashinkubha tajili. 23 A Yeshu gubhaalugulilenje bhaajiganywa bhabho, "Kweli ngunakummalanjilanga ipingabha ukomu tajili kujinjila Muupalume gwa Kunnungu. 24 Ngunakummalanjilanga kabhili, ikakomala kuka nnyama jwankulungwa jwa langwa ashemwa ngamia, kupeleta pa lilanga lya ingano, nngalingana tajili kujinjila Muupalume gwa Kunnungu." 25 Bhakapilikaneje nneyo bhaajiganywa bhala gubhalapilenje kwa kaje, nigubhashitenje "Bhai gani, shakombole kutapulwa?" 26 A Yeshu gubhaalolilenje, nigubhashite, "Ku bhandu indu malinga yeneyo ikaakomboleka, ikabheje kwa mashili ga a Nnunu, yowe inakomboleka." 27 Kungai a Petili gubhashite, "Bhuli uwe? Tushileka yowe kunkagula mmwe, bhai shitupate nndi?" 28 A Yeshu gubhaajangwilenje, "Kweli ngunakummalanjilanga kunnungu na shilambolyo pushijiyebha ya ambi, Mwana juka Mundu shatame pa shitengu shakwe sha ukonjelo, numbe mmanganya likumi limo na bhabhili nngagwilenje nne, shintamangane mwiitengu likumi limo na

ibhili nnikwaukulanga makabhila likumi limo na gabhili ga Ishilaeli. **29** Na jojowe aleshile nyumba, eu ashaapwakwe eu ashaalumbugwe, eu ainagwe eu akwabhe, eu bhana eu migunda, kwa ligongo lyangu nne, shaposhele mala makumi kumi na shakole gumi gwa pitipiti. (aiōnios g166) **30** Ikabheje bhabhagwinji bhalinginji bhantai, shibhabhanganje bha kumpelo, na bhalinginji bha kumpelo shibhabhanganje bhantai.

20 “Upalume gwa Kunnungu ushilandana naka mundu akwete nngunda gwa mishabhibhu, nilabha lyamba kukwaatolanga bhakamula maengo kubhakamulanje liengo mungunda gwakwe. **2** Gubhalegene nabhonji kwaalipanga ela jimo kwa lyubha limo, kungai gubhaapelekenje kunngunda gwabho. **3** Jikaisheje shaa tatu ja lyamba gubhapite kabhili kushoko gubhaabhwениنجي bhandunji bhana bhajimingenenje kushoko, bhangalinginji shatenda. **4** Gubhaalugulilenje, ‘Nnjendangananje nkakamulanje liengo kunngunda gwangu gwa mishabhibhu, na nne shininnimpanganje aki jenunji.’ **5** Bhai, gubhapitengene. Bhayene nngunda bhala gubhapite kabhili shaa shita ja mui, na shaa tisha nndengulo, gubhatendile nneila peila. **6** Nkali shaa kumi na moja ja shigulogulo, gubhapite kabhili, gubhaaimenenje bhandunji bhana bhajimingenenje kushoko. Bhai, gubhaabhushiyenje, ‘Pakuti nshijimangana totolo gwangali kamula liengo?’ **7** Gubhaajangwilenje, ‘Pabha jwakwapi atupele liengo.’ Nabhalabho gubhaalugulilenje, ‘Nnjendanje nkakamulanje liengo mungunda gwa mishabhibhu.’ **8** “Kukapilileje, bhayene nngunda bhala gubhannugulile nkujimilila jwabho, ‘Gwaashemanje bhaakamula maengo gwaalipanje nshaala gwabhonji, tandubhila jwa kumpelo, mpaka jwa ntai.’ **9** Bhai, gubhaikengene bha kumpelo bhala, gubhaposhelenje kila mundu ela jimo. **10** Bhakaikanganeje

bhatainji bhala, pubhaganishiye shibhapegwanje kupunda bhananji bhala, ikabheje na bhalabhonji gubhapegwilwenje ela jimo jimo **11** Gubhaposhelenje ela yabhonji, gubhatandwibhenje kwainginishila bhakulungwa bhala. **12** Bhalinkutinji, 'Abha bhandunji bhatolilwenje kumpelo bhashikamulanga liengo lishaa limope, pakuti nshikututendela malinga bhanganyabha, uwe tushikamula liengo kwa kaje nibhalilwa na lyubha totolo?' **13** "Bhakulungwa bhala gubhannjangwile jumo, 'Ambwiga, shakwa shininkumbile! Bhuli, twangalagana nshaala gwa ela jimo kwa lyubha limo? **14** Nntole aki jenu, mwijabhulile. Njipinga kwaapanganga bha kumpelobha malinga mmwe. **15** Bhuli, ngapinjikwa tenda shingupinga namwene kwa indu yangu? Bhuli, nnamonela lupimilo pabha njibha nannguja?" **16** A Yesu gubhamaliye bheleketa bhalinkuti, "Bhalinginji kumpelo shibhabhanganje bha ntai, na bha ntai, shibhabhanganje bha kumpelo." **17** A Yesu pubhajombokaga kwenda ku Yelushalemu, bhashinkwaatolanga bhaajiganya likumi limo na bhabhili bhala kuntemela na bhalinginji mumpanda gubhaalugulilene, **18** "Mpilikananje! Tunakwenda ku Yelushalemu, na kweneko Mwana juka Mundu apinga kamuywa ku bhakulungwa bhaabhisila na bhaajiganya bha Shalia na bhalabhonji shibhanng'ukumulanje abhulagwe. **19** Shibhankamuyanje kubhandu bhangabha Bhayaudi, nkupinga bhannyegayanje na akomwe ibhoko na komelwa munshalabha, ikabhe lyubha lya tatu shayuywe." **20** Penepo anyinabhabhonji bhana bha a Shebhedayo gubhaaishile a Yesu bhalu na ashibhana bhabho, gubaatindibhalile nikwaajuga shindu. **21** A Yesu gubaabhushiye, "Nkupinga nndi?" Bhakongwe bhala gubhaalugulile, "Nnumbile kuti ashibhanangubha shibhatamangananje Muupalume gwenu

jumo nkono nshinda na junna nkono nnilo.” 22 A Yesu gubhaalugulilenje, “Nkakushimanya shinkujuganga. Bhuli, shinkombolanje kwiipililila malanga ga mboteko malinga shimbinga pitila nne?” Gubhaajangwilenje, “Shitukombole.” 23 A Yesu gubhaalugulilenje, “Kweli shimwiipilililanje malanga ga mboteko gumbinga pitila nne, ikabheje gani shatame kunkono nnilo eu nkono nshinda gwangu, nngabha gangu nne, ikabhe shibhapegwanje bhapanjilwenje na a Nnungu bhala.” 24 Bhaajiganywa likumi limo bhala bhakapilikinanjeje genego, gubhaatumbalilenje ashaajabhonji bhabhili bhala. 25 A Yesu gubhaashemilenje, gubhaalugulilenje, “Mmumanyinji kuti bhaatagwala bha bhandu bhangabha Bhayaudi bhanakwaatagwalanga bhandu kwa mashili, na bhakulungwanji bhabhonji bhanakwabhonelanga nneyo peyo. 26 Kwenu mmanganya inabhe nneyo, ikabhe mundu apinga kubha jwankulungwa, abhe ntumishi jwenunji, 27 na mundu apinga kubha jwantai munkumbi gwenunji abhe ntumwa jwenunji. 28 Nneyo peyo, Mwana juka Mundu jwangaika kukamulilwa maengo, ikabheje kukamula liengo na shoya gumi gwakwe nkupinga kwaagombolanga bhandu bhabhagwinji.” 29 A Yesu na bhaajiganywa bhabho bhalishokangana ku Yeliko, lugwinjili lwa bhandu gulwaakagwile. 30 Bhai, bhashinkupagwanga ashinangalole bhabhili bhatemingenenje nnyenje mpanda, bhakapilikinanjeje kuti a Yesu bhapinga pita gwene mpandago, gubhautienje lilobhe, “Mmakulungwa, Bhaulongo gwa a Daudi, nntubhonele shiya!” 31 Lugwinjili lwa bhandu lula bhakwaakalipilangaga kupinga bhapumulanje. Ikabheje bhanganyabho gubhapundilenje kweya lilobhe, “Mmakulungwa, Bhaulongo gwa a Daudi, nntubhonele shiya!” 32 A Yesu

gubhajimi, gubhaashemilenje nikwabuyanga, “Nkupinganga nintendelanje nndi?” **33** Gubhaajangwilenje, “Mmakulungwa, tunajuga tulole.” **34** Bhai, a Yeshu gubhaabhonelenje shiya, gubhaakwashiyenje meyo gabhonji, na shangupe gubhalolilenje, nigubhaakagwilenje.

21 A Yeshu na bhaajiganywa bhabho bhakabhandishilanjeje ku Yelushalemu gubhaikengenenje ku Bhetipage tome na shitumbi sha Misheituni, gubhaatumilenjeje bhaajiganywa bhabho bhabhili, **2** gubhaalugulilenje, “Nnjendangane kushijiji shili mmujo jenunji, kweneko shimung’imananje mbunda atabhilwe naka mwanagwe. Mwagopolanje nkajiye nabhonji. **3** Monaga mundu ammuyangaga shoshowe, munnugulilanje, ‘Bhakulungwa bhanakwaapinganga,’ nabhalabho shangupe shibhampanganje.” **4** Genega gashinkutendeka nkupinga gatimilile gegala galugwilwe na ankulondola bha a Nnunu bhalinkuti, **5** “Mwaabhalanjilanje bhashilambo ku Shayuni, ‘Munnole, Mpalume jwenu anakwiya! Ashikwitimalika na ashikwela mbunda, Mwana jwa mbunda.”” **6** Bhaajiganywa bhala gubhaptengene, nigubhatendilenje malinga shibhalugulilwenje na a Yeshu. **7** Gubhanjiye nabhonji mbunda jula naka mwanagwe, gubhatandikenje nngubho yabhonji panani jabhonji na a Yeshu gubhakwelile nitama panani nngubho paka mwana mbunda. **8** Bhandu bhagumbelenje bhala gubhatandikenje nngubho yabhonji ina mumpanda, na bhandu bhananji gubhatemilenje maagala gubhatandikenje mumpanda. **9** Bhandu bhabhagwinji bhalinginji mmujo na bhalinginji nnyuma bhala, gubhautiyenje lilobhe bhalinkutinji, “Nnumbililwe Bhaulongo gwa a Daudi! Apegwe mboka jwene akwiya kwa lina lya Bhakulungwa! Bhalumbililwe a Nnunu bhami Kunnungu!” **10** A Yeshu

bhakajinjileje ku Yelushalemu, shilambo showe gushigumbele nnjasha. Bhandunji gubhalinginji nkubhuya, "Jweneju gani?" **11** Likundi lya bhandunji munkumbi mula gubhashitenje, "Bhenebha a nkulondola bha a Nnungu a Yesu, kopoka ku Nashaleti shilambo sha Galilaya." **12** Bhai, a Yesu gubhajinjile ku liekalu, gubhaabhinjilenje palanga bhandu bhaushangaga na uma indu ku liekalu, gubhapindikulenye mesha ya bhaatindiganya mmbiya bhala na itengu ya bhaushanga ngunda. **13** Gubhaalugulilenje, "Ishijandikwa Mmajandiko ga Ukonjelo, 'Nyumba jangu shijishemwe nyumba ja nyujila nne.' Ikabheje mmanganya nshikujitendanga lishembo lya bhaapokonyola indu." **14** Ashinangalole na bhalemelenje gubhaajendelenje ku liekaluko, nabhalabho a Yesu gubhaalamiyenje. **15** Bhai, bhakulungwanji bhaabhisila na bhaajiganya bha Shalia bhakaibhonanjeje ilapo ibhatendile a Yesu, na bhana bhashoko pubhautiyangaga lilobhe ku liekalu bhalinkutinji, "Bhalumbililwe Bhaulongo gwa a Daudi," gubhatumbelenje. **16** Kwa nneyo gubhaalugulilenje, "Bhuli, nkapilikana ibhaabheleketanga?" A Yesu gubhaajangwilenje, "Elo, ngulipilikana! Bhuli, nkanabhe shomanga Mmajandiko? 'Kwa kang'wa ya bhana bhashoko na ashinambombe Shibhannumbililanje.'" **17** Bhai, gubhaaleshilenje, gubhajabhwile pa shilambo pala gubhapite ku Bhetania, gubhagonile kweneko. **18** Lyambape a Yesu bhalibhuja kwenda ku Yelushalemu, gubhakwete shibhanga. **19** Gubhagubhweni nkongo gumo gwa tini nnyenje mpanda, gubhaujendele, ikabheje bhangashibhona shindu ikabhe maambape. Bhai, gubhaulugulile nkongo gula, "Unaogoye kabili iepo pitipiti!" Shangupe nkongo gwa tini gula ukunyalaga. (aiōn g165) **20** Bhaajiganywa bhakaubhonanjeje bhashinkulapanga, gubhashitenje, "Kwa

nndi agu nkongogu ushinyala shangupe?" **21** A Yeshu gubhaajangwilenje, "Kweli ngunakummalianjilanga, monaga nkolangaga ngulupai gwangali lipamba, shinkombolanje tenda nngabha ga ntinipe, ikabheje nkali kushilugulila ashi shitumbishi, 'Tutumbuka ukatumbushile mmashi,' shiitendeshe. **22** Na nkolangaga ngulupai, shoshowe shishinnjuganje kwa a Nnungu, shimpegwanje." **23** A Yeshu bhakajinjileje ku liekalu bhalikujiganya, bhakulungwanji bhaabhishila na bhanangulungwa bha bhandunji gubhaajendelenje nikwaabhuya, "Nnatenda genega kwa ukulungwa ukeni? Gani ampele jene amuliji?" **24** A Yeshu gubhaajangwilenje, "Na nne ngunakumuyanga, nnyangulangaga, bhai na nne shininnugulilanje ngunatenda genega kwa ukulungwa ukeni. **25** Bhuli, ubhatisho gwa a Yowana kugwakoposhele kwei? Bhuli, kugwakoposhele kwa a Nnunu eu ku bhandu?" Ikabheje gubhabheketeleje ashaayenenji, Tulugulaga, "Kugwakoposhele kwa a Nnunu," shibhatubhuye, "Bhai, pakuti mwangakulupalilanga?" **26** Na tulugulaga, "Kugwakoposhele ku bhandu," tunakwaajogopanga bhandunji pabha bhowe bhanakundanga kuti a Yowana ankulondola bha a Nnunu. **27** Bhai, gubhaajangwilenje, "Tukakumumanya!" Nabhalabho a Yeshu gubhaalugulilene, "Numbe nne ngannugulilanga ngunatenda genega kwa ukulungwa gwashi." **28** "Mmanganya nkubhonanga bhuli? Bhandu bhamo bhashinkukola bhana bhabhili. Gubhannugulile jwankulu jula, 'Mwanangu, lelo ukakamule liengo kunngunda gwa mishabhibhu.' **29** Nshanda jula gwajangwile, 'Ngajenda!' Ikabheje gwaibhushiye, kungai gwapite kamula liengo. **30** Ainamundu bhala gubhannugulile jwa nnung'una jula nneila peila, jwalakwe akwaajangulaga, 'Atati shinyende!' Ikabheje jwangajenda. **31** Bhuli, bhene bhabhiliba

jwei atendile ibhapinga Ainamundu?" Gubhaajangwilenje, "Jwankulu jula." Bhai, a Yeshu gubhaaluguliljenje, "Kweli ngunakummalanjilanga, bhakamula koli na bha labhalabha shibhannongolelanje kujinjila Muupalume gwa a Nnungu." **32**
Pabha a Yowana bhanng'ishilenje na kunnanguyanga mpanda gwa aki mwangaakulupalilanga, ikabheje bhakamula koli na bha labhalabha bhashinkwaakulupalilanga. Nkali nkagabhonanjeje gowego mmanganya mwangaipetanga nikwaakulupalila. **33** A Yeshu gubhashite, mpilikananje lutango luna. Bhandu bhamo bhashinkulima nngunda gwa mishabhibhu, gubhatimbiliye lubhigo, gubaolile liiko lya minyila divai, gubhashenjile na nyingo ja tama bhalinda. Kungai gubhaakolishiyenje bhaalima, gubhajabhwile kwenda shilambo sha talika. **34**
Gakaisheje mobha ga maneng'eno, gubhaatumilenje bhatumishi bhabho ku bhaalimanga bhala, nkupinga bhakatolelanje ndalo. **35** Bhaalimanga bhala gubhaakamwilenje bhatumishi bhala, jumo gubhankomilenje na junu gubhammulegenje na junu gubhankomilenje maganga mpaka gwawile. **36**
Bhandu bhala gubhaatumilenje kabhili bhatumishi bhana, bhabhagwinji punda bhalongolelenje bhala. Bhaalimanga bhala gubhaatendelenje nneila peila malinga bhalongolelenje bhala. **37** Kumpelo gubhantumile mwanagwabho akuno bhaliganishiya, shibhannjogopanje pabha mwanangu. **38** Ikabheje bhaalimanga bhala bhakmonanjeje mwanagwabho gubhabheleketenje ashaayenenji, "Jweneju ni apinga lishi, tummulaje tutole ulishi gwakwe!" **39** Bhai, gubhankamwilenje, gubhampelekenje kunyenje nngunda gwa mishabhibhu gula, gubhammulegenje. **40** "Lelo, bhayene nngunda gwa mishabhibhu pushibhaishepo, shibhaatendanje bhuli bhaalimangabho?" **41** Gubhajangwilenje,

"Shibhaabhulagenje bhaalimanga bhangali bha mbonenjibho, na nngunda gula shibhaapanganje bhaalimanga bhananji, shibhajiye kwaapanganga ndalo." **42** Penepo a Yeshu gubhaalugulilenje, "Bhuli, nkanabheshomanga yenei Mmajandiko? 'Liganga libhalikanilenje bhaashenga Nnaino lishibha liganga likulu lya pa ndumba. Bhakulungwa bhatendile lyeneli, Na kunngwetu uwe ni lya lapa!' **43** "Kwa nneyo ngunakkummalanjilanga, Upalume gwa a Nnungu upinga shoywa kungwenunji, bhapegwanje bhandunji bha ilambo ina, shibhakombolanje kutenda ibhapinga a Nnungu." **44** Na jwene shaagwile lyene ligangalyo, shatemekanje ipande, na jojowe shilinngwile lyene ligangalyo, shakandaganywe. **45** Bhakulungwanji bhaabhisila na Mapalishayo bhakapilikananje ndango ya a Yeshu, gubhamanyinji kuti bhanakwaabheleketanga. **46** Kwa nneyo gubhaloleyenje mwakwaakamulila, ikabheje bhatendaga kwaajogopanga bhandunji, pabha bhandunji bhamumanyinji kuti ankulondola bha a Nnungu.

22 A Yeshu gubhabhelekete nabhonji kabhili kwa lutango bhalinkuti, **2** "Upalume gwa kunnungu ushilandana naka mpalume jumo antendele mwanagwe kalamu ja ndowa. **3** Bhai, gubhatumile bhatumishi bhabho bhajendangane kukwaatolanga bhashemilwenje ku ndowa, ikabheje bhashemilwenje bhala bhashinkukananga. **4** Gubhatumile kabhili bhatumishi bhana, bhalinkuti, 'Mwaalugulilanje bhashemilwenje bhala, kalamu jangu nnaino tayali, malume gangu ga ng'ombe ya jimbala na matumbwe iinjilwe na kila shindu tayali, nnjiyangane ku ndowa.' **5** Ikabheje bhangaimukanga, gubhaijabhulilenje, junu ku nngunda gwakwe na junu ku indu yakwe nnyene, **6** bhananji gubhaakamwilenje bhatumishi bhala nikwatukananga, gubhaabhulegenje. **7**

A mpalume bhala gubhatumbele, gubhatumile manjola
kukwaabhlaganga bhaabhulegenje bhatumishi bhabho, na
joka moto shilambo shabhonji. **8** Kungai gubhaalugulilenje
bhatumishi bhabho, ‘Kweli, kalamu ja ndowa pujili tayali,
ikabheje bhashemilwenje bhala bhangapinjikwanga. **9** Bhai,
nnjendangane mmalekano na bhabhowe bhushimwaimanange
mwaashemanje bhaikangane ku ndowa.’ **10** Bhatumishi
bhala gubhashoshilenje, gubhapitengene mmipanda, gubhaishe
nabhonji bhandu bhowe, bha mmbonenji na bhangalinginji
bha mmbonenji. Nyumba jila gujigumbele bhajeninji. **11**
“Ikabheje a mpalume bhakajinjileje kukwaalolanga bhajeninji,
gubhammweni mundu jumo jwangawala nngubho ja ndowa.
12 Bhakulungwa gubhammushiye, ‘Ambwiga, nnjinjile bhuli
gwangali wala nngubho ja ndowa?’ Ikabheje jwangajangula,
gwaitamile ilili. **13** Penepo a mpalume bhala gubhaalugulilenje
bhatumishi, ‘Muntabhanje makono na makongono nkanjaanje
palanga ku lubhindu, kweneko shikubhe shililo na yaga
meno.’ **14** A Yesu gubhamalishiye bhalinkuti, “Bhashemilwenje
bhabhagwinji, ikabheje bhaagwilwenje bhashokope.” **15**
Kungai, Mapalishayo gubhajabhlengene, nigubhapengenenje
shanabhuli pushibhaatanjiyanje a Yesu kwa malobhe gabho.
16 Bhai, gubaatumilenje bhaajiganya bhabhonji na bhandunji
bha a Elode, gubaabhuhiyenje, “Mmaajiganya, tumumanyi kuti
mmwe mmandu bha kulupalika, na nnaajiganya mpanda gwa a
Nnungu kwa kulupalika na nkakunnjogopa mundu jojowe, pabha
mmwe mwangali luagu. **17** Bhai, ntulugulile nkubhona bhuli?
Alali eu nngabha alali kulipa koli kwa a Kaishali?” **18** Ikabheje a
Yesu gubaumanyi ungamanyika gwabhonji, gubhaalugulilenje,
“Mmanganya mmagulumba, kwa nndi nnaninganga? **19**

Nnanguyanje mmbiya ja lipila koli." Gubhaalangwiyenje. **20**
Bhai, a Yeshu gubhaabhushiyenje, "Pishaji na majandikoga
gakeni?" **21** Gubhaajangwilenje, "Ya a Kaishali." Penepo a Yeshu
gubhaalugulilene, "Bhai, ya a Kaishali mwaapanganje a Kaishali,
na ya a Nnungu mwaapanganje a Nnungu." **22** Bhakapilikananjeje
nneyo gubhalapilenje, gubhajabhlengenenje nikwaaleka. **23**
Lyene lyubhalyo, Mashadukayo bhananji bhaabheleketanga
kuti, bhawilenje bhakayukanga, gubhaajendelenje a Yeshu.
24 Bhai, gubhaabhushiyenje bhalinkutinji, "Mmajiganya, a
Musha bhalugwile, mundu alombile awaga gwangali leka
bhana, inapnjikwa jwannung'una abhatole bhakongwebho,
nkupinga abhakolele bhana akulugwe. **25** Bhai, panngwetu pano
bhashinkupagwanga bhandu shabha. Jwankulu ashinkulomba
gwawile gwangali kolela bhana, gwanneshele mpwakwe
bhashitenga bhala. **26** Nibha nneyo peyo kuka mpwakwe jwa
bhili, naka jwa tatu, mpaka bhowe shabha. **27** Bhakawanganjeje
bhowebho, bhakongwe bhala nabhalabho gubhawile. **28**
Bhuli, lyubha lishibhayukanje, shibhabhe bhakongwe bhakeni?
Pabha bhashinkulombwa na bhowe shabha." **29** A Yeshu
gubhaajangwilenje, "Mmanganya nnapuganikanga kwa ligongo
lya nngagamanya Majandiko ga Ukonjelo wala mashili ga a
Nnungu. **30** Pabha bhawilenje pushibhayukanje bhakalombanga
wala lombwa, shibhabhanganje mbuti ashimalaika kunnungu.
31 Ikabheje ga yuka bhawilenje, bhuli, nkanabhe shomanga
gubhannugulilene a Nnungu gala? Bhalinkuti, **32** 'Nne a
Nnungu bha a Bhulaimu na bha a Ishaka na bha a Yakobho!'
Bhai, bhenebho nngabha a Nnungu bha bhandu bhawilenje,
ikabheje bha bhandu bhakotonji." **33** Bhandu bhagumbelenje
bhala bhakapilikananjeje nneyo, gubhalapilenje kwa majiganyo

gabho. **34** Mapalishayo bhakapilikananjeje kuti a Yesu bhashikwaapeyanga Mashadukayo, gubhaimenenje pamo. **35** Jumo munkumbi gwabhonji, akujimanya Shalia, akwaabhuyaga a Yesu nkwaalinga, **36** “Mmaajiganya, amuli jashi jili jikulungwa Nshalia ja a Musha?” **37** A Yesu gubhaajangwile, ““Mwaapinje Bhakulungwa a Nnunu bhenu kwa ntima gwenu gowe na mbumu yenu yowe na kwa lunda lwenu lowe’. **38** Jeneji ni amuli jikulungwa na ja ntai. **39** Jabhili jilandana na jenejo, ‘Mwaapinje atami ajenu malinga shinkwipinga mmayene’. **40** Shalia yowe ya a Musha na majiganyo ga ashinkulondola bha a Nnunu inashimilika kwa yene amulii.” **41** Mapalishayo bhakaimananjeje pamo, a Yesu gubhaabhuhiyenje, **42** “Mmanganya nkubhonaga bhuli ga a Kilishitu? Bhuli, mwana juka gani?” Gubhaajangwilenje, “Bhaulongo gwa a Daudi.” **43** A Yesu gubhaabhalanjilenje, “Bhai, ikomboleka bhuli kwa a Daudi kwa longoywa naka Mbumu jwa Ukonjelo bhanakwaashema a Kilishitu Bhakulungwa? Pabha bhashinkubheleketa, **44** ‘Bhakulungwa bhashinkwaalugulila Bhakulungwa bhangu. “Ntame nkono nnilo gwangu, Mpaka pushinaabhikanje ashaamagongo ajenu pa makongono genu.” **45** Bhai, ibhaga a Daudi bhanakwaashema a Kilishitu ‘Bhakulungwa’ nibha bhuli bha ulongo bhabho?” **46** Wala jwakwa mundu abhajangwile. Tandubhila penepo jwakwa mundu alinjile kwaabhuva kabhili.

23 Kungai a Yesu gubhaabhalanjilenje bhandunji bhagumbelenje na bhaajiganywa bhabho, bhalinkuti. **2** Bhaajiganya bha Shalia na Mapalishayo bhashipegwanga ukulungwa gwa shitengu sha a Musha. **3** Kwa nneyo nkamulanje na tenda shoshowe shishibhannugulilanje. Ikabheje nnakaguyanje itendi yabhonji, pabha bhakaatendanga

malinga shibhaajiganya. **4** Bhanatabhanga mishigo ja topa nikwaatwikanga bhandunji mmakoyo, ikabheje ashaayenenji bhakapinganga kujangutila nkali kwa lukowe.

5 Bhanatendanga itendi yabhonji nkupinga bhalolwanje na bhandunji. Bhanawalanga mabhadili gamakulungwa pa shenyi na mmakono gajandikwe Shalia na leupya mbundo ya pai ya nngubho yabhonji. **6** Bhanaapinganga tama mwiitengu ya mmujo nkalamu na mmashinagogi. **7** Bhanapinganga kukomaywa kwa jogopekwa kushoko na bhanapinganga shemwa na bhandunji, Bhaajiganya. **8** Ikabheje mmanganyanji nnashemwanje, Bhaajiganya, pabha bhaajiganya bhenunji bhamope, na mmanganya mmowe malinga bhandu bha lutumbo lomo. **9** Wala nnanshemanje mundu jojowe, Atati, pa shilambolyo, pabha Ainabhenunji bhamope, bhalu kunnungu.

10 Wala nnashemwanje, Ashikalongolele, pabha kalongolele jwenunji jumope, ni a Kilishitu. **11** Ali jwankulungwa munkumbi gwenunji anapinjikwa abhe ntumishi jwenunji. **12** Jojowe akwiikuya apinga nyegaywa, na akwiinyegaya apinga kuywa.

13 Ole gwenunji bhaajiganya bha Shalia na Mapalishayo, mmagulumba! Pabha nnakwaugalilanga bhandunji nnango gwa Upalume gwa Kunnungu, mwaashayenenji nkajinjilanga, na wala bhapinganga jinjila bhala nkakwaalekanga bhajinjilangane.

14 Ole gwenunji mmaajiganya bha Shalia na Mapalishayo bhagulumba! Pabha nnapokonyolanga nyumba ya bhashitenga na nnajuganga Nnungu kwa leupya, nkupinga mmonekananje kubhandu kuti mmambonenji, kwa nneyo shinng'ukumulwanje kupunda bhananji. **15** Ole gwenunji bhaajiganya bha Shalia na Mapalishayo, mmagulumba! Nnaowanga mmashi na palitaka nkupinga mumpatanje mundu shakagule dini jenunji.

Mumpatangaga, nnakuntendanga mwana jwa ku Jeanamu pabhili kupunda mwaashayenenji. (Geenna g1067) **16** Ole gwenunji ashikalongolele nangalole! Mmanganya nkutinji mundu alumbilaga kwa lina lya liekalu, kwene kulumbilako nngabha shindu, ikabheje alumbilaga kwa shaabhu ili nniekalu, kwene lumbilako kunakuntabha. **17** Mmanganya ashikalongolele bhangumba! Shei shipundile, shaabhu eu liekalu litenda jene shaabhujo jibhe ja ukonjelo? **18** Kabhili nnkutinji kuti mundu alumbilaga kwa shitala nngabha shindu, ikabheje alumbilaga kwa mbepei ibhishilwe pa shitala, kwene lumbilako kunakuntabha. **19** Mmanganya ashinangalole! Shei shipundile, upo ila, eu shitala shitenda mbepeiyi ibhe ya ukonjelo? **20** Alumbila kwa shitala analumbila kwa shitala, na kwa indu yowe ili pa shitala. **21** Na alumbila ku liekalu ashilumbila ku liekalu na kwa bhatama nkati bhala. **22** Na alumbila kunnungu ashilumbila ku shitengu sha Upalume gwa a Nnunu, na bhaatama panani jakwe. **23** Ole gwenunji bhaajiganya bha Shalia na Mapalishayo, mmagulumba! Nnashoyanga lipungu lya kumi, nkali maamba ga mmboga, bhishali na tindi, akuno nnilekanga indu ya mana ya Shalia malinga, aki na shiya na ngulupai. Genega gumpinjilwenje kugabhika mmitima gwangali kulibhala gana. **24** Ashikalongolele nangalole! Nnashoyanga libhembe, ikabheje nimila ngamia, nnyama jwankulungwa. **25** “Ole gwenunji bhaajiganya bha Shalia na Mapalishayo, mmagulumba! Mmanganya nninginji malinga mundu aukanga ikombe na bhakuli kua, ikabheje nkati mugumbele indu impatilenje kwa pokonyola na shojo. **26** Mmwe a Palishayo nangalole! Nng'ukanje oti shikombe nkati na kua shikukonje. **27** “Ole gwenunji bhaajiganya bha Shalia na Mapalishayo, mmagulumba! Puninginji mbuti

likabhuli lipashilwe shokaa, kwa palanga linabhoneka kukonja, ikabheje nkati kushigumbala maupa ga bhawilenje na ikoko yaigwinji. **28** Nneyo peyo mmanganya nnabhonekanga na bhandunji mbuti nkwetenje aki, ikabheje nkati nshigumbalanga ugulumba na ungamanyika. **29** “Ole gwenunji bhaajiganya bha Shalia na Mapalishayo, mmagulumba! Nnashenjelanga makabhuli ga ashinkulondola bha a Nnungu na konjeleya makabhuli ga bhandunji bhakwetenje aki. **30** Nnikutinji, ‘Monaga uwe tukapali bhukala ja ashinakulu bhetu, tukanakunde kwaabkulaganga ashinkulondola bha a Nnungu!’ **31** Kwa nneyo, nnakong’ondelanga mwaashayenenji kuti mmanganya bha ulongo gwa bhaabhulegenje ashinkulondola bha a Nnungu. **32** Bhai, mmaliyanje liengo libhatandubhenje bhanyikala bhenunji lila. **33** Mmanganya nninginji malinga majoka, bhana bha majoka! Shinnjikubhutukanje bhuli ukumu ja ku Jeanamu? **(Geenna g1067) 34** Pabha nnolanje, nne ngunakumpeleshelanga ashinkulondola bha a Nnungu, bhandunji bhakwetenje lunda na bhaajiganya bha Shalia. Bhananji nkupinga kwaabkulaganga na kwaakomelanga munshalabha bhananji, shimwaakomanje ibhoko mmashinagogi genunji na kwaabbinganga shilambo kwa shilambo. **35** Kwa nneyo kugambwa kowe shikung’ishilanje kwa ligongo lya minyai ja bhandunji bhakwetenje aki jijitishile pa litaka. Elo, tandubhila kubkulagwa kwa a Abheli bhaaliji bhanguja, mpaka kubkulagwa kwa a Shakalia bhanabhabho a Bhalakiya, bhumwaabhlulegenje ku liekalu pakati shitala na liekalu. **36** Kweli ngunakummalanjilanga, lwene lubhelekolu lupinga ukumulwa kwa ligongo lya genego. **37** “Ugwe Yelushalemu, Ugwe Yelushalemu! Ukwaabkulaganga ashinkulondola bha a Nnungu, na kwaakomanga maganga mpaka kuwa bhatumilwenje

kunngwako bhala. Palingwa njilinga kwaakundikanyanga ashibhanago, malinga nanunu jwa nnguku shakuti kwiigutamila yana yakwe, ikabheje gwaangapinga. **38** Bhai nnoje, nyumba jako shijibhe liame na ushubha. **39** Pabha, nkamonanga kabhili mpaka pushimmeleketanje, 'Apegwe mboka jwene akwiya kwa lina lya Bhakulungwa."

24 A Yeshu gubhakopweshe ku liekalu nigubhaijabhulile, bhaajiganya bhabho gubhaajendelenje nikwaalanguya majumba gatimbilile liekalu. **2** A Yeshu gubaabhalanjilenje, "Nnikugabhonanga gene gowega! Kweli ngunakunnugulilanga, lyakwapi liganga nkali limo shililepeshe panani liganga, yowe ipinga bhomolwa." **3** A Yeshu bhakatameje pa shitumbi sha Misheituni, bhaajiganywa bhabho gubhaajendelenje shitemela, gubaabhuhiyenje, "Nntulugulile genega pushigakoposhele shakani? Shilangulo shashi shishilanguye kwiya kwenu na mpelo gwa shilambolyo?" (*aiōn g165*) **4** A Yeshu gubhaajangwiljenje, "Mwiteiganje mundu anantembanje. **5** Pabha bhandu bhabhagwinji shibhaikangane bhalinkutinji, 'Nne a Kilishitu,' na bhalabhonji shibhaatembanje bhandu bhabhagwinji. **6** Shimpilikananje ililo ya ngondo na ngani ya ngondo, ikabheje nnajogopanje, pabha genego ganapinjikwa gakoposhele, ikabheje mpelo ukabheje. **7** Shilambo shipinga komana na shilambo shina, upalume gumo upinga komana na upalume guna. Shipinga pagwa shibhangna na ungumila kwa ilambo. **8** Yene yoweyo mbuti kutandubha kwa mboteko ya shitumbo nkupinga kwiigopola. **9** "Kungai bhandu bhowe shibhantendebukanje nkupinga mpotekwanje na bhulagwa. Na bhandunji bhangabha Bhayaudi bhapinga kunshimanga kwa ligongo lyangu nne. **10** Kabhili, bhabhagwinji bhapinga lekanga

ngulupai jabhonji na tendebhukana na shimana. **11** Bhapinga koposhelanga ashinkulondola bha unami bhabhagwinji bhapinga kwaapuganyanga bhandu bhabhagwinji. **12** Kwa ligongo lya jenjesheka ilebho, kупingana kwa bhandu shukubhujile nnyuma. **13** Ikabheje shaikakatimilile mpaka kumpelo shatapulwe. **14** Ngani ja Mmbone ja Upalume gwa a Nnungu jipinga lunguywa pa shilambolyo, kubha ukong'ondelo ku bhandu bhowe, penepo ni pushuishe mpelo gula." **15** Ashomajo agamanye malombolelo ga malobhe ga a Yesu gakwiya gano. Nigubhashite, a Danieli ankulondola bha a Nnungu bhalugwile ga nnjimwa ja nyatiya. Pushinnijibhonanje jjimi pa ukonjelo, **16** bhaliningji ku Yudea bhabhutushilanje mwiitumbi. **17** Ali pashitubhili anatulushe pai kutola indu nnyumba jakwe. **18** Ali kunngunda anabhuje kumui kutola nngubho yakwe. **19** Ole gwabhonji bhanabhakongwe bhakwetenje ndumbo na bhajonjeyanga gene mobhago. **20** Nnjunganje kwa a Nnungu nkupinga kubhutuka kwenunji kunabhe mobha ga mmbepo eu Lyubha lya Pumulila. **21** Pabha gene mobhago shipinga pagwa shilaje shikanabhe koposhela shitandubhile kupanganywa shilambolyo mpaka lelo, wala shikajiya pagwa kabhili. **22** Monaga gene mobhago a Nnungu bhakanapunguye jakwa mundu jojowe akatapwilwe, ikabheje gapinga punguywa kwa ligongo lya bhandu bhaagwilwenje na a Nnungu. **23** Bhai, mundu annugulilangaga, a Kilishitu pubhali apano, eu kubhali akula, nnankulupalilanje. **24** Pabha bhaapinga koposhelanga Bhakilishitu na ashinkulondola bha unami. Bhapinga tendanga ilangulo ya ikulungwa na ya lapa ya kombola nkali kwapuganyanga bhaagwilwenje na a Nnungu. **25** Mpilikananje, njikunnimbiyang gakanabhe koposhela genego. **26** Bhai, bhannugulilangaga, nnolanje,

kubhali kuanga, nnajendangane kweneko, eu, nnolanje, mubhali nnyumba, nnakulupalilanje. **27** Pabha malinga nnjai shijikuti meta nibhoneka kuliunde kowe, pushijiyebha malinga pushabhoneshe Mwana juka Mundu lyubha lyashaish. **28** Malinga, pene puguli ntui, nipugaimana matumbui, kwa nneyo shene shilanguloshi shinalangula kuti ku mpelo gwa shilambolyo kubhandishile. **29** Shangupe shipitaga shilaje sha gene mobhago, lyubha lipingabha nnubhindi, mwei ukalangaya na ndondwa ipingagwa pai na mashili ga indu ya kunnungu gapinga tenganyika. **30** Kungai, shilangulo shika Mwana juka Mundu shishibhoneshe kunnungu, penepo makabhila gowe ga pa shilambolyo gapinga kwiigutanjila, shibhammonanje Mwana juka Mundu alikwiya mmaunde ga kunnungu ali na mashili na ukonjelo gwanngwinji. **31** Na bhalabho shibhaatumanje ashimalaika bhabho na lipenga lya oneya, bhalabhonji bhapinga kwaalopolanga bhaagwilwenje bhabho kopoka mmbali yowe ya pa shilambolyo. **32** Bhai kwa nkongo mwijiganyanye alu lutangolu, shangupe nyambi yakwe puitandubha ipuka, nnakumumanya kuti shuku shibhandishile. **33** Nneyo peyo mmanganya pushinngabbonanje genega, mmumanyanje kuti bhabhandishile. **34** Kweli ngunakummalanjilanga, alu lubhelekolu lukapela gakanabhe koposhela gowego. **35** Kunnungu na shilambolyo shiipite, ikabheje malobhe gangu gakapita. **36** Ikabheje, ga lyene lyubhalyo, eu malanga jwakwa mundu akugamanya shigabhe shakani, wala ashimalaika bha kunnungu, wala Mwana, ikabhe Atati jikape. **37** Pabha malinga shiyaliji mobha ga a Nuu, puipingabha mobha ga kwiya kwakwe Mwana juka Mundu. **38** Pabha gene mobhago, nduluko jikanabhe tuluka, bhandunji bhatenda lyanganga na kolelwa

na lomba na lombwa, mpaka a Nuu pubhajinjile nshapina.

39 Bhangashimanyanga shipinga koposhela, mpaka pujaushe nduluko, jikwaajolangaga bhowe. Na malinga pushijiyebha lyubha lya kwiya kwakwe Mwana juka Mundu. **40** Gene mobhago bhandunji bhabhili shibhabhanganje mungunda, jumo shatolwe na junna shaleshwe. **41** Bhanabhabkongwe bhabhili shibhabhanganje bhaliyaganga, jumo shatolwe na junna shaleshwe. **42** Bhai, nsheyanye, pabha nkakulimanyanga lyubha lishibhaishe Bhakulungwa bhenunji. **43** Ikabheje nnimanyanje lyeneli, monaga bhayene nyumba bhakalimanyi lyubha lya kwiya nngwii, bhakasheshiye, ngubhakajileshileje nyumba jabho kujibhwa. **44** Kwa nneyo na mmanganya nsheyanye, pabha Mwana juka Mundu shaishe malanga gunkakugamanyanga. **45** A Yeshu gubhapundile kubheleketa bhalinkuti, bhai gani ntumishi akulupalika na akwete lunda, bhakulungwa bhakwe shibhantende abhe jwa nkulungwa ku bhandu bhabho, abhapanganje shalya pa malanga gakwe? **46** Mbaya jwene ntumishi, bhakulungwa bhakwe pushibhaishe shibhanng'imanre alitenda nneyo. **47** Kweli ngunakummalianjilanga, shibhammishe jwene ntumishijo agoye indu yabho yowe. **48** Ikabheje ntumishi jwangali jwa mmbone aibheleketelaga muntima gwakwe kuti, bhakulungwa bhangu bhanakabha kubhuja, **49** kungai gwatandwibhe kwaakomanga bhatumishi ajakwe na tandubha lya na papila pamo na bhaakolelwanga, **50** bhakulungwa bhakwe ntumishijo shibhaishe lyubha lyangaganishiwa na malanga gangamanyika. **51** Shihankome kwa kaje na kunkundikanya likundi limo na bhagulumba. Kweneko shikubhe shililo na tauna meno.

25 Gene mobhago, Upalume gwa Kunnungu upinga landana na bhalilikumi limo bhajigelenje taa yabhonji, gubhapitengene

kukumposhela nkulomba. 2 Nng'ano munkumbi gwabhonji pubhalinginji bhangumba na nng'ano bhashinkukolanga lunda. 3 Bhangumba bhala bhaashinkujigalanga taa yabbonji gwangali mauta ga sheituni ga jenjesheya. 4 Ikabheje bhakwetenje lunda bhala bhashinkujigalanga mauta nnyupa na taa yabbonji. 5 Pabha nkulomba ashinkukabha kwiya, bhali bhowe bhala gubhatandwibhenje kugweela na gubhagonilenje. 6 Ikabheje pakati shilo guipilikanishe njobhela ya kuti, nkulomba anakwiya, nnjendangane nkaposhelanje. 7 Penepo bhali bhowe bhala gubhajumukenje, gubhakolokweyenje taa yabbonji. 8 Bhangumba bhala gubaabhalanjilenje bhakwetenje lunda bhala kuti, ntupanganje mauta gashoko pabha taa yetu inaimika. 9 Ikabheje bhakwetenje lunda bhala gubhashitenje, gakatujenela tubhowe! Mbaya nnjendangane nkaumanje kugaushwa! 10 Bhai, bhali bhangumba bhala bhakajabhulanjeje kuuma mauta, nkulomba gwashe, na bhali bhalinginji tayali bhala gubhajinjilenje nnyumba pamo nakankulomba, na nnango ukuugalwaga. 11 "Kungai bhali bhananji bhala gubhaikengene nishema, 'Mmakulungwa, mmakulungwa, ntuugulile!' 12 Ikabheje bhenebho gubhaajangwilenje, 'Kweli ngunakummalianjilanga, ngakummanyanga mmanganyanji.'" 13 Kungai a Yesu gubhashite, "Bhai, nsheyanje, pabha nkakulimanyanga lyubha wala malanga." 14 "Pabha Upalume gwa Kunnungu ushilandana naka mundu apinjile jabhula mwanja, akwaashemangaga bhatumishi bhakwe nikwaakamuyanga indu yakwe. 15 Gubhampele kila mundu malinga shibhammweni kombola kwakwe, jumo mmbiya nng'ano na junia mmbiya ibhili na junia mmbiya jimo, kungai gubhajabhwile. 16 Shangupe a apegwile mmbiya ng'ano jula gwatendile upindi, gwapatile mmbiya ina

nng'ano. **17** Nneyo peyo na jwene apegwile mmbiya ibhili gwapatile mmbiya ina ibhili. **18** Ikabheje apegwile mmbiya jimo jula gwapite olela pai mmbiya ja bhakulungwa bhakwe jila. **19** "Gakapiteje mobha gamagwinji, bhakulungwa bha bhatumishi bhala gubhabhujile, gubhatandwibhe pita bhalanganya mmbiya ibhakamwiye na ibhapatilenje muupindi. **20** Ntumishi apegwilwe mmbiya nng'ano gwaishe ali ajigele mmbiya nng'ano ina, akwaalugulilaga, 'Mmakulungwa, mwashinkumba mmbiya nng'ano, nnole mmbiya nng'ano ina imbatile.' **21** Bhakulungwa bhakwe gubhannugulile, 'Sha mmbone, ntumishi nnguja na jwaakulupalika. Ushikulupalika kwa indu ya ishoko, shinikupe gamakulungwa. Jiya uangalale pamo na nne.' **22** "Ntumishi jun apegwilwe mmbiya ibhili gwaishe, gwashoshiye mmbiya ibhili ina yapatile gwashite, 'Mmakulungwa, mwashinkumba mmbiya ibhili bhai ntolé na mmbiya ina ibhili imbatile.' **23** Bhakulungwa bhakwe gubhannugulile, 'Sha mmbone, ntumishi nnguja na jwaakulupalika. Ushikulupalika kwa indu ya ishoko, shinikupe ya ikulungwa. Jiya uangale pamo na nne.' **24** "Kungai gwaishe apegwilwe mmbiya jimo jula, gwashite, 'Mmakulungwa, nimmanyi mmwe mmanonopa ntima, nnauna munkapandileje na kulopola munkamishiyeje mmbeju. **25** Nashinkujogopa, gung'ishiye mmbiya jenu pai. Bhai, nntole mmbiya jenu.'

26 "Bhakulungwa bhakwe gubhannugulile, 'Ugwe ntumishi jwangali jwa mmbone na nkata! Gwamumanyi kuti ngunauna mungapandileje na ngunalopola mungamishiyeje. **27** Bhai, gwashinkupinjikwa kujibhika mmbiya jangu kubhenki na nne pushimujepo ngatolile mmbiya jangu na pwaida! **28** Bhai, mumpokonyolanje mbiyajo nkampanganje akwete mmbiya likumi limo jula. **29** Pabha, akwete shindu apinga pegwa

na jenjeshewa. Ikabheje jwangali shindu jula, nkali shakwete shila shapokonyolwe. **30** Na gaka ntumishi jwangali pwaida jula, munnjaanje palanga kulubhindu! Kweneko kipingabha shiilo na tauna meno.” **31** Pushaishe Mwana juka Mundu mu ukonjelo gwakwe na ashimalaika bhakwe, penepo shatame pa shitengu shakwe sha upalume. **32** Bhandu bha ilambo yowe shibhaimananje mmujo jabho na bhalabho bhapinga agulanya bhandu mbuti nshunga shakuti agulanya ngondolo na mmbui. **33** Shibaibhishe ngondolo nkono nnilo na mmbui kunkono nshinda. **34** Kungai a Mpalume shibhaalugulilanje bhalinginji kunkono nnilo bhala, “Nnjiyangane mmanganya mpegwilenje mboka na Atati, mposhelanje upalume gummishilwenje tandubhila kupanganywa kwa shilambolyo. **35** Pabha nashinkukola shibhanga gumbelenje shalya, nashinkukola nnjota gumbelenje mashi, nashinkubha nannjeni gummboshelenje. **36** Punaliji na uukunu gummbelenje nngubho, punaliji nannwele gunng’ikenje kunnola na ngatabhweje gunng’owelenje.” **37** Penepo, bhandunji bhakwetenje aki bhala shibhaajangulanje bhakulungwa, “Mmakulungwa, shakani putwammweni nni na shibhanga nikumpa shalya, eu nni na nnjota nikumpa mashi? **38** Shakani putwammweni nni mmajeni nikumposhela, eu nni na uukunu nikumpa nngubho nng’wale? **39** Shakani putwammweni nni mmalwele eu ntabhilwe gutuishe kukunng’owela?” **40** A mpalume shibhaajangulanje, “Kweli ngunakummalanjilanga, shindu shoshowe shimuntendelenje jumo jwa ashaapwanga bhanyegalangabha, nshinkundendelanga nne.” **41** Kungai shibhaabhalanjilanje bhalinginji ku nkono nshinda gwabho bhala, “Nnyabhulilanje apano mmaaloshwa! Nnjendangane ku moto gwa pitipiti gwaalashiwe Lishetani na ashimalaika bhakwe. (aiōnios

g166) 42 Pabha nashinkukola shibhanga mwangambanganga shalya, nashinkukola nnjota mwangambanganga mashi ga ng'wa. **43** Punaliji nannjeni mwangamboshelanga, na punaliji na uukunu mwangambanganga nngubho, punaliji nannwele na punatabhilwe mwangang'owelanga." **44** Penepo na bhalabhonji shibhaajangulanje, "Mmakulungwa shakani putwammweni nni na shibhanga eu nnjota, nni mmajeni eu nni na uukunu, eu mmalwele eu ntabhilwe twangannjangutila?" **45** Na bhalabho shibhaajangulanje, "Kweli ngunakummalanjilanga, kila punkanilenje kwaatendelanga ashaapwanga bhanyegalangabha, nshinkukananga kundendela nne." **46** Bhai, bhanganyabho shibhajendangane ku mboteko ya pitipiti, ikabhe bhakwetenje aki bhala, shibhajendangane ku gumi gwa pitipiti. (*aiōnios g166*)

26 A Yeshu bhakamaliyeje bheleketa gowego, gubhaabhalanjilenje bhaajiganywa bhabho, **2** "Mmumanyinji gapitaga mobha gabhili shipinga pagwa shikukuu sha Pashaka na Mwana juka Mundu apinga tendebhukwa shaakomelwe munshalabha." **3** Gene mobhago bhakulungwanji bhaabhisihila na bhanangulungwa bha bhandunji gubhaiimenenje pamo nnyumba ja a Kayapa, bhaaliji Bhakulungwa Bhabhishila. **4** Gubhabheleketenje shibhatendanje bhuli, nkupinga bhaakamulanje a Yeshu kwa unami bhaabkulaganje. **5** Ikabheje gubhashitenje lyenelyo linatendeshe mobha ga shikukuu, jinakoposhela nnjasha ku bhandu. **6** A Yeshu pubhaliji ku Bhetania kunngwabho a Shimoni bhaakwete mangundula bhukala, **7** bhakongwe bhamo bhaakwete shupa sha alabhashita sha mauta ga nunjila ga mmbiya yaigwinji, gubhaaishile pubhaalyaga shalya pala, gubhaajitile mauta gala muntwe. **8** Bhaajiganywa bhabho bhakabhonanjeje genego

guyaashimilenje, gubhashitenje, "Kwa nndi jonanganya nnei?
9 Pabha aga mautaga gakaushiwe kwa mmbiya yaigwinji na elayo nipegwa bhalaganga." **10** A Yeshu gubhaimanyi ng'aniyo yabhonji, gubhaabhalanjilenje, "Pakuti nnakwaabhuyanga bhakongwebha? Pabha bhenebha bhashindendela shindu sha mmbone. **11** Bhalaganga nni nabhonji mobha gowe, ikabheje nne ngabha na mmanganya mobha gowe. **12** Abha bhakongwebha bhashinyitila mauta nkupinga mika tayali kwa mashiko gangu. **13** Kweli ngunakummalanjilanga, kila pushijilunguywe Ngani ja Mboneji pa shilambolyo, shene shibhatendile bhakongweshi, shipinga lunguywa nkwaakumbushila." **14** Kungai, a Yuda Ishikaliote, jumo munkumbi gwa likumi limo na bhabhili bhala, gubhaajendelenje bhakulungwanji bhaabhisila, **15** gubhashite, "Shimmbanganje nndi ninkamuyangaga a Yeshu?" Gubhaabhalanganishyenje mmbiya makumi gatatu. **16** Tandubhila penepo a Yuda bhatendaga loleya shanabhuli shibhaatendebhushe a Yeshu. **17** Lyubha lya tandubha shikuu sha mikate jangatagwa ngedule, bhaajiganywa bhabho gubhaajendelenje a Yeshu nikwaabhuwa, "Kwei kunkupinga tukakolokoye shalya sha Pashaka?" **18** A Yeshu gubhaajangwilenje, "Nnjendangane kunjini kuka mundu jumo, nkammalanjilanje, Bhaajiganya bhashite, 'Malanga gangu gubhang'agulile a Nnungu gabhandishile. Kunngwenu mbinga lila Pashaka na bhaajiganywa bhangu.'" **19** Bhaajiganywa gubhatendilenje malinga shibhalugulilwenje na a Yeshu, gubhakolokoyenje Pashaka. **20** Likaisheje ligulo, a Yeshu gubhatemi nkulya shalya na bhaajiganywa bhabho likumi limo na bhabhili bhala. **21** Bhalinginji nkulya, a Yeshu gubhashite, "Kweli ngunakummalanjilanga, jumo jwenunji apinga

ndendebhuka.” **22** Bhaajiganywa gubhainjikenje kwa kaje, jumo jumo gubhatandubhenje kwaabuya, “Mmakulungwa! Bhuli, nne?” **23** A Yeshu gubhajangwile, “Shapambe pamo na nne mmakuli ni apinga ndendebhuka. **24** Mwana juka Mundu anakwenda malinga Majandiko shigaataya, ikabheje ole gwakwe apinga kuntendebhuka Mwana juka Mundu! Mbaya jwene mundujo akanabhelekwe.” **25** A Yuda bhapinjile kwaatendebhuka, gubhaabhushiye, “Mmajiganya! Bhuli, nne?” A Yeshu gubhaajangwile, “Mmwe mmelekete.” **26** Bhalinginji nkulya, a Yeshu gubhatolile nkate, gubhatendile ej a kwa a Nnunu, gubhagebhenye, gubhaapelenje bhaajiganywa bhabho bhalinkuti, “Ntolanje nniyananje, sheshino shiilu shangu.” **27** Kungai gubhatolile shikombe, gubhatendile ej a kwa a Nnunu, gubhaapelenje bhalinkuti, “Mpapilanje mmowe, **28** pabha jejino minyai jangu jikong'ondela malagano, jijitika kwa ligongo lya bhandu, nkupinga bhaleshelewanje yambi yabbonji. **29** Ikabheje ngunakunnugulilanga, ngapapila kabhili divai ja shabhibhu mpaka lyubha pushimbapile divai ja ambi na mmanganya Muupalume gwa Atati.” **30** Bhakajimbanjeje lwimbo, gubhashoshilenje, gubhaptengene ku shitumbi sha Misheituni. **31** Kungai a Yeshu gubhaabhalanjilenje, “Shilo sha lelo, mmowe shinngananje nineka, pabha ishijandikwa kuti, ‘Shininkome nkushunga, na ngondolo shiipwilingane.’” **32** Ikabheje nyukaga shininnongolelanje kwenda ku Galilaya.” **33** A Petili gubhaabhalanjile a Yeshu, “Nkali bhowe bhalekangaga kunkulupalila nikummutuka, nne ngammutuka.” **34** A Yeshu gubhaabhalanjile a Petili, “Kweli ngunakummalanjila, shilo sha lelo lipongo akanabhe kongobhela shinngane patatu.” **35** A Petili gubhaabhalanjile, “Nkali ipinjikwaga kuwa pamo

na mmwe, ngu ngankana." Bhaajiganywa bhananji bhala gubhabheleketenje nneyo peyo. **36** Kungai a Yeshu gubhapite nabhonji ku bhushitani ja Getishemane, gubhaabhalanjilenje bhaajiganywa bhabho, "Ntamangane apano, nne naegejela mmujo kukwaajuga a Nnungu." **37** Gubhaatolile a Petili na bhana bhabhili bha a Shebhedayo, gubhatandwibhe kuinjika na tenguka. **38** Gubhaabhalanjilenje bhaajiganywa bhabho, "Ntima gwangu gushiinjika tome nawa, ntamangane apano, nsheyanje pamo na nne." **39** Bhai, gubhapite mmujo kashoko, gubhagwile namanguku, gubhajuile, bhalinkuti, "Atati, itendekaga ai mbotekoi inambate, ikabheje nngabha malinga shinguti pinga nne, ikabheje malinga shinkupinga mmwe."

40 Gubhaajendelenje bhaajiganywa bhala, gubhaimenenje bhagonilenje. Gubhaalugulile a Petili, "Pakuti mwangasheyanga na nne kapela shaa jimo? **41** Nsheyanje nkujuga, nkupinga nnalingwanga. Ntima unapinga, ikabheje shiilu shangali mashili."

42 Gubhapite gwabhili kukwaajuga a Nnungu bhalinkuti, "Atati, ikatendeshe ai mbotekoi kupita gwangali mmbata, bhai inkupinga itendeshe." **43** Gubhaajendelenje kabhili bhaajiganywa bhala, gubhaimenenje bhagonilenje, pabha bhashinkutopelwanga na lugono. **44** Bhai, gubhaaleshilenje, nigubhapite kukwaajuga a Nnungu gwatatu kwa malobhe gala pegala. **45** Kungai gubhaajendelenje bhaajiganywa bhala, gubhaalugulilenje, "Bhuli nnagonangape na pumulila? Nnolanje! Malanga gaishe, Mwana juka Mundu apinga kamuywa mmakono ga bhakwetenje yambi. **46** Nnjumukanje tujabhule! Nnolanje, andendebhuka jula abhandishile." **47** Bhai, a Yeshu pubhaaliji nkubheleketa nabhonji, shangupe gubhaishe a Yuda, bha munkumbi gwa likumi limo na bhabhili bhala. Bhali bhalongene

nabhonji likundi likulungwa lya bhandunji, bhali bhajigelenje mapanga na ndonga, bhatumilwenje na bhakulungwanji bhaabhisila na bhanangulungwa bha bhandunji. **48** Na bhaatendebhwishe a Yeshu bhala bhashinkwaapanganga bhandunji shilangulo bhalinkuti, "Bhene bhushinaajambatebho mwaakamulanje." **49** Bhai a Yuda gubhaajendele a Yeshu, bhalinkuti, "Ngunakunkomaya, Mmaajiganya!" Gubhaajembete. **50** A Yeshu gubhaabhalanjile, "Ambwiga ntende shinng'ishile." Bhandunji bhala gubhaikengene, gubhaakamwilenje a Yeshu nikwaatabha. **51** Jumo munkumbi gwa bhalinginji na a Yeshu bhala akugoloyaga nkono gwakwe, gwaolomwele upanga gwankomile ntumishi jwa Bhakulungwa Bhaabhisila, gwankatile likutu. **52** A Yeshu gubhammalanjile, "Bhika upanga gwako nnigonelo lyakwe, pabha jojowe abhulaga na upanga shabhulagwe na upanga. **53** Bhuli, nkakumumanyanga kuti ngakombwele kwaajuga Atati, nabhalabho shangupe bhakambeleshele makundi gamakulu makulu likumi limo na bhabhili ga malaika? **54** Ikabheje pushigamalile bhuli Majandiko gataya kuti inapnjikwa kubha nneyo?" **55** Gene malangago a Yeshu gubhaabhalanjenje likundi lya bhandunji lila, "Bhuli, nshikwiya ngamulanga nninginji na mapanga na ndonga mbuti nankupokonyola? Mobha gowe munaliji nniekalu nilijiganya mwangangamulanga. **56** Ikabheje gowega gashitendeka nkupinga gamalile majandiko ga ashinkulondola bha a Nnunu." Penepo bhaajiganya bhowe gubhaaleshilenje, nigubhabutukenje. **57** Bhai, bhandunji bhaakamwilenje a Yeshu bhala gubhaapelekenje kumui kwa a Kayapa, Bhakulungwa Bhaabhisila, kubhaimenenje bhaajiganya bha Shalia ja a Musha na bhanangulungwa. **58** A Petili gubhaakagwile nnyuma

mpaka kulugwani lwa Bhakulungwa Bhabhishila, gubhajinjile nkati gubhatemi pamo na bhalinda, nkupinga bhalole shipinga koposhela. **59** Bhai, bhakulungwanji bhaabhishila na bhalukumbi bhowe gubhaloleyenje ukong'ondelo gwa unami nkupinga bhaabhulaganje a Yeshu, **60** ikabheje gubhalepelenje, nkali bhapalinji bhaakong'ondela bhabhagwinji bha unami. Kungai gubhaikengene bhakong'ondela bhabhili, **61** nigubhashitenje, "Bhenebha bhashinkubheleketa, 'Ngunakombola kulibhomola Liekalu lya a Nnungu nikulishenga kabhili kwa mobha gatatu."

62 Bhakulungwa Bhabhishila gubhajimi gubaabhalanjile a Yeshu, "Bhuli, nkaajangula? Ibhakunkong'ondelanga nndi bhandunjibha?" **63** Ikabheje a Yeshu bhangaajangula. Bhakulungwa Bhaabhishila gubaabhalanjile, "Nnumbile kwa lina lya a Nnungu bhakwete gumi na ntubhalanjile monaga mmwe ni a Kilishitu, Bhanabhabho a Nnungu!" **64** A Yeshu gubhaalugulile, "Mmwe ni nkubheleketa! Ikabheje ngunakummalanjilanga, tandubbila nnaino, shimummonanje Mwana juka Mundu atemi nkono nnilo gwa Bhakulungwa Bhakwete Mashili, alikwiya mmaunde ga kunnungu." **65** Penepo Bhakulungwa Bhaabhishila gubhapapwile nngubho yabho gubhashite, "Bhashikupulu! Tunapinga bhaakong'ondela kabhili? Mpilikenenje shibhashite kupulu. **66** Nkubhonanga bhuli mmanganya?" Gubhaajangwilenje, "Inapinjikwa bhabhulagwe!" **67** Kungai gubhaaunilenje mata kumeyo, gubhaakomilenje ubha na bhana gubhaakomilenje mapapa, **68** bhalinkutinji "Mmwe a Kilishitu, bhai ntulondolele gani ankomile!" **69** A Petili pubhaliji bhatemi palanga lugwani, bhai, ntumishi jumo jwankongwe jwa Bhakulungwa Bhaabhishila akwaajendelaga, nigwashite, "Mmwe pumwaliji pamo na a Yeshu bha ku Galilaya." **70** A Petili

gubhakanile pa lugwinjili lwa bhowe gubhashite, "Ngakushimanya nkali shinkubheleketa." 71 Nabhalabho bhalikopoka pa nnango gwa lugwani, ntumishi juna jwankongwe gwabhabhweni, akwaalugulilangaga bhalinginji pepala bhala alinkuti, "Abha pubhaliji pamo na a Yeshu Bhanashaleti." 72 Ikabheje a Petili gubhakanile kabhili bhalilumbila, "Ngakummany aju munduju." 73 Kungai, bhandunji bhalinginji pepala gubhaajendelenje a Petili, gubhaabhalanjilenje, "Kweli mmwe nkumbi gumo, nkali kubheleketa kwenu kunakummanyiya." 74 Penepo a Petili gubhatandwibhe kwiilosha na lumbila bhalinkuti, "Ngakummany aju munduju!" Shangupe lipongo likukongobhelaga. 75 A Petili gubhakumbushile malobhe gubhabhalanjilwe na a Yeshu, "Lipongo akanabhe kongobhela, shinngane patatu." Bhai, gubhakopweshe palanga, gubhagutile kwa kaje.

27 Lyambape, bhakulungwanji bhaabhisila bhowe na bhanangulungwa bha bhandunji, gubhatemingenenje shitamo sha pinga kwaabhlaga a Yeshu. 2 Gubaatabhilenje mindondolo, gubhapite kwaakamuyanga kwa a Pilato bhaaliji bhakulungwa bha shilambo sha ku Yudea. 3 Kungai a Yuda bhaatendebhwishe a Yeshu bhala, bhakamumanyeje kuti a Yeshu bhashiukumulwa, nigubhaigamble, gubhaabujishiyenje bhakulungwanji bhaabhisila na bhanangulungwa bha bhandu mmbiya ipande makumi gatatu ila. 4 Bhalinkuti, "Njilebha kwa kuntendebhuka mundu jwangalebha abhulagwe." Ikabheje bhanganyabho gubhashitenje, "Uwe nndi? Kwali mmayene." 5 Na bhalabho a Yuda gubhaileshele mmbiya ila nniekalu, gubhakopweshe palanga, nikwenda kwiitabhila. 6 Bhakulungwanji bhaabhisila gubhaitolilenje mmbiya ila nigubhashitenje, "Nngabha alali kuibhika nshibhiko sha mbepei, pabha

mmbiya ya minyai.” **7** Bhai, gubhabheleketenje ashaayenenji, nigubhaumilenje nngunda guka nkugumba lilongo pabhe pa shishila bhajeniji **8** Kwa nneyo nngunda gula pubhashemangaga, Nngunda gwa Minyai. **9** Gugamalile malobhe ga ankulondola bha a Nnungu a Yelemia ga kuti, “Gubhatolilene mmbiya ipande makumi gatatu, galama jika jwene jubhampanjilenje bhei bha Ishilaeli jula, **10** gubhaumilenje nngunda guka nkugumba lilongo, malinga shibhamalanjile Bhakulungwa.” **11** A Yesu gubhajimi mmujo ja bhakulungwa bha shilambo sha ku Yudea, bhai, bhakulungwa bhala gubaabhuhiye bhalinkuti, “Bhuli, mmwe a mpalume bha Bhayaudi?” A Yesu gubaabhalanjile, “Mmwe ni nkubheleketa.” **12** Ikabheje bhakulungwanji bhaabhishila na bhanangulungwa pubhalinginji nkwaukumula, bhangajangula. **13** Kwa nneyo a Pilato gubaabhuhiye, “Bhuli, nkapilikana indu yowe ibhakunnugulangai?” **14** Ikabheje a Yesu bhangaajangula nkali lilibhe limo, bhakulungwa bhala gubhakanganigwe kwa kaje. **15** Bhai, gwashinkupagwa nkubho mobha ga shikuuu sha Bhayaudi shishemwa Pashaka, bhakulungwa bhatenda kwaugulilanga atabhilwe jumo jubhampinjilenje bhandunji. **16** Gene mobhago ashinkupagwa mundu jumo atabhilwe ashumaga ga ya nyata ntima, lina lyakwe a Bhalabha. **17** Bhai, bhandunji bhakaimananjeje pamo, a Pilato gubaabhuhiyenje, “Jwei junkupinganga ninng’ugulilanje, a Bhalabha eu a Yesu bhaashemwa a Kilishitu?” **18** Bhashinkubheleketa nneyo pabha bhashinkumumanya kuti bhashikwaapeleshalanga a Yesu kwa ligongo lya lupimilo. **19** A Pilato bhakatameje pa shitengu sha ukumu, akongobhabho gubaapeleshele ntenga, nikwaabhalanjila, “Nnatende shindu shoshowe kuka jwene mundu jwangalebhajo, pabha shilo njilaga nkwaagamilila bhenebho.”

20 Ikabheje bhakulungwanji bhaabhishila na bhanangulungwa gubhaakwisiyenje bhandunji bhajuganje bhaugulwe a Bhalabha na a Yeshu bhabhulagwe. **21** Bhai, bhakulungwa bhala gubhaajangwilenje, “Nnapinganga ning'ugulilanje jwei munkumbi gwa bhene bhabhilibha?” Gubhaajangwilenje, “A Bhalabha!” **22** A Pilato gubhaabhuhiyenje, “Bhai, naatende nndi a Yeshu bhaashemwa a Kilishitu?” Bhowe gubhashitenje, “Bhakomelwe munshalabha!” **23** A Pilato gubhaabhuhiyenje, “Kwa nndi? Ibhalebhile nndi?” Nabhalabhonji gubhapundilenje jobhela, bhalinkutinji, “Bhakomelwe munshalabha!” **24** Bhai, a Pilato bhakabhoneje kuti bhakaakombolanga kwa shoshowe na nnjasha inatandubha, gubhatolile mashi ninabha makono gabho pa lugwinjili lula bhalinkuti, “Nne nangali sha gambwa kwa bhulagwa kuka jwene munduju, kwali mwaashayene.” **25** Bhandunji bhowe gubhajangwilenje, “Shiwo sha bhene bhandubha tugambwe uwe na ashibhana bhetu!” **26** Bhai a Pilato gubhaaugulilenje a Bhalabha, na ashimanjola bhakaakomanje ibhoko a Yeshu, gubhaakamwiyenje bhakomelwe munshalabha. **27** Kungai ashimanjola bha bhakulungwa bha Shiloma gubhaajinjiyenje a Yeshu nnugwani lukulungwa lwa nyumba ja bhakulungwa bha Shiloma, gubhaimenenje likundi lyowe nikwaatimbilila a Yeshu. **28** Gubhaaulilenje nngubho yabho, nikwaawasha lijoo lya nnangali. **29** Gubhaeleyenje ingwa ja mibha, nikwaawasha muntwe, gubhaapelenje nnai kunkono nnilo gwabho. Gubhaatindibhalilenje nikwaanyegaya bhalinkutinji, “Shalamu a Mpalume bha Bhayaudi.” **30** Kungai gubaunilenje mata, gubhatolilenje nnai gula, nikwaakomanga muntwe. **31** Bhakaanyegayanjeje, gubhaulilenje lijoo lila, gubhaawashiyenje nngubho yabho, kungai gubhapite kwaakomelanga munshalabha.

32 Bhalinginji nkujabhlulangana, gubhaabhweninji bhandu bhamo lina lyabho a Shimoni, bha ku Kilene, gubhaashishilishiyenje bhaujigale nshalabha gwa a Yesu. **33** Bhakaikanganeje pashemwaga Golgota, malombolelo gakwe Shibhangha sha Ntwe, **34** gubhaapelenje divai ja anganya na shindu sha shashama. Ikabheje a Yesu bhakapayeje gubhakanile kupapila. **35** Bhalibhabhambilwe munshalabha, gubhagabhenenje nngubho yabho kwa shikoma, nkupinga limalile lilobhe libhalugwile ankulondola bha a Nnungu, bhashinkugabhananga nngubho yangu kwa shikoma. **36** Gubhatemingene pala muulinda. **37** Gubhakomelenje panani ntwe gwabho, ukumu jabho jijandikwe "BHENEBA NI A YESHU, A MPALUME BHA BHAYAUDI." **38** Malanga gogo bhaapokonyola bhabhili bhashinkukomelwanga mmishalabha pamo na a Yesu, jumo kunkono nnilo gwabho na junu kunkono nshinda. **39** Na bhandunji bhapitangaga mumpanda gubhaatukenenje, bhalitikinyanga mitwe jabhonji bhalinkutinji, **40** "Mmwe mwabhlenje kuti shinnibhomole liekalu nishenga kwa mobha gatatu, mwitapule mmayene, mmaga Mwana gwabho a Nnungu, nntulushe munshalabha!" **41** Nneyo peyo bhakulungwanji bhaabhisila na bhaajiganya bha Shalia, na bhanangulungwa gubhaanyegeyehenje a Yesu bhalinkutinji. **42** "Bhashinkwaatapulanga bhananji ikabheje bhanalepela kwiitapula bhayene! Eti bhenebho a mpalume bha Ishilaeli! Bhai, nnaino bhatulushe munshalabha na uwe shitwaakulupalile. **43** Bhanakwaakulupalila a Nnungu na bhashite kuti Bhanabhabho a Nnungu, bhai nnaino, a Nnungu monaga bhaapinga bhaatapule." **44** Nneyo peyo nkali bhaapokonyola bhakomelwenje mmishalabha pamo na bhenebho bhala gubhaatukenenje. **45** Bhai, tandubhila shaa shita ja mui

Iwashinkupagwa lubhindu pa shilambolyo mpaka shaa tisha.

46 Jikaisheje shaa tisha a Yeshu gubhautiye lilobhe bhalinkuti, "Eloi, Eloi lama shabhikitani?" Malombolelo gakwe "A Nnungu bhangu, a Nnungu bhangu, pakuti nshineka?" **47** Ikabheje bhananji bhajimingenenje pepala, bhakapilikananjeje nneyo gubhashitenje, "Bhanakwaashema a Eliya." **48** Shangupe jumo jwabhonji gwabhwutwishe lubhilo, gwatolile shiponji ninyobhya divai ja shashama, gwabhwishile munnai, nikwaapa bhapapile.

49 Bhananji gubhashitenje, "Nneshe tulole monaga a Eliya bhanakwiya kwaatapula." **50** Bhai, a Yeshu gubhakweshiye lilobhe kabhili, gubhawile. **51** Penepo lipashiya lyaliji nkati liekalu gulipapwishe ipande ibhili, tandubhila kunani mpaka pai, shilambo gushiungumile na maganga makulu gakukaikaga, **52** makabhuli gakuunukaga na bhandunji bha ukonjelo bhawilenje gubhayushiywenje, **53** na bhalabhonji bhakayukanjeje na a Yeshu bhakayusheje, gubhaptengene ku shilambo sha ukonjelo, yani ku Yelushalemu, gubaakoposhelenje bhandunji bhabhagwinji. **54** Bhai, bhakulungwa bha manjola na ashimanjola bhalinginji muulinda gwa a Yeshu, bhakabthonanjeje litaka liliungumila na yowe yakoposhele ila, gubhajogopenje kwa kaje, gubhashitenje, "Kweli aju munduju paaliji Mwana jwa a Nnungu."

55 Bhashinkupagwanga bhanabhakongwe bhabhagwinji pepala bhalolangaga bhali bhajimingenenje kwataliya. Bhanganyabho nibhaakagwilenje a Yeshu kopoka ku Galilaya na kwaatumishila.

56 Munkumbi gwabhonji bhashinkupagwa a Malia Magidalena na a Malia anyinabhabhonji a Yakobho na a Yoshepu pamo na anyinabhabhonji bhana bha a Shebhedayo. **57** Ikaishileje ligulo, gubhaishe bhandu bhamo atajili bha shilambo sha ku Alimataya, lina lyabho a Yoshepu. Nabhalabho pubhaaliji bhaajiganywa bha

a Yesu. **58** Gubhaajendele a Pilato gubhaajujile bhapegwe maiti ga a Yesu. Bhai, a Pilato gubhaamulishe bhapegwe.

59 A Yoshepu gubhatolile maiti gala, gubhailijile nshanda sha takata, **60** gubhabhishile maiti gala nnikabhuli lyabho lya ambi libhabheshiye nniganga likulu. Kungai gubhaingilishiye liganga pa nnango gwa likabhuli, gubhaijabhulile. **61** A Malia Magidalena na a Malia bhana bhala, gubhatemingene kuloya ku likabhuli. **62** Likapiteje Lyubha lya Kolokoya, bhakulungwanji bhaabhishila na Mapalishayo gubhaajendelenje a Pilato, **63** gubhashitenje, "Mmakulungwa, tushikumbushila nname jula akanabhewa ashinkubheleketa kuti, 'Gapitaga mobha gatatu shinyushe.' **64** Kwa nneyo nng'amulishe likabhuli libhe muulinda mpaka lyubha lya tatu, nkupinga bhaajiganywa bhakwe bhananjibhanje na kwaabhalanjilanga bhandunji kuti bhayushile. Na unami gwa kumpelo shuunyate kupunda unami gwa kundandubho gula."

65 A Pilato gubhaabhalanjilenje, "Ayaga, manjola nkietenje, nnjendangane nkabhiikanje ulinda malinga shinkukombolanga."

66 Bhai, gubhabhishilenje ulinda ku likabhuli, nibhika lulembo panani liganga lya ibhila lila na kunani jakwe, nkupinga mundu ashoyaga imanyishe, nigubhaabhishilenje ashimanjola.

28 Likapiteje Lyubha lya Pumulila, lyambape lyubha lya tandubha juma, a Malia Magidalena na a Malia bhana bhala, gubhapitengene kulola likabhuli. **2** Shangupe litaka likuungumilaga, pabha malaika jwa Bhakulungwa ashinkutuluka kopoka kunnungu nikuliingilishiya kunyenje liganga lila, nikulitamila. **3** Kubhonekana kwabho bhashinkung'anyima malinga nnjai, na nngubho yabho yashinkuwejela kwa kaje. **4** Bhalinda bha likabhuli lilla gubaungumilenje kwa jogopa, gubhalinginji mbuti bhashiwanganga. **5**

Ikabheje malaika jula akwaabhalanjilangaga bhanabhakongwe bhala, "Nnajogopanje, nimumanyi kuti nnakwaaloleyanga a Yeshu bhakomelwe munshalabha. **6** Bhakwapi apano, pabha bhayushile malinga shibhashite lugula. Nnjiyangane nnolanje pubhaagonekenje. **7** Bhai, nnjendangane shangu nkaabhalanjilanje bhaajiganywa bhabho kuti, bhayushile bhakaweje na nnaino bhanakunnongolelanga kwenda ku Galilaya, kweneko shimwaabhonanje. Ayaga, nimmalanjilenje."

8 Bhanabhakongwe gubhashoshilenje shangu pa likabhuli pala, bhalinginji na lipamba na angalala kwa kaje, gubhabutukenje lubhilo kukwaalugulilanga bhaajiganywa bhabho. **9** Shangupe, a Yeshu gubhaimene nabhonji, gubhashite, "Shalamu!" Bhanabhakongwe bhala gubhaajendelenje, gubhaatindibhalilenje nikwaakamula makongono gabho.

10 Kungai a Yeshu gubhaabhalanjilenje, "Nnajogopanje! Nnjendangane nkaabhalanjilanje ashaapwanga bhajendangane ku Galilaya, kweneko shibhamonanje." **11** Bhanabhakongwe bhala bhalijabhlulangana, bhalinda bhananji bha likabhuli lila, gubhabitengene kunnjini kuupeleka ntenga ku bhakulungwanji bhaabhisila, ga indu yowe ikoposhele. **12** Bhai, gubhaimenenje pamo na bhanangulungwa, bhakapatananjeje, bhanangulungwa bhala gubhaapelenje bhalinda bhala mmbiya yaigwinji, **13** bhalinkutinji, "Mmanganya ntayanje kuti, 'Bhaajiganywa bhabho bhashinkuikangana shilo gubhaajibhilenje uwe tuli tugonile.' **14** Monaga bhakulungwa bhapilikanaga, uwe shitukungulushe nabho na mmanganya nkatendwanga shindu."

15 Bhalinda bhala gubhatolilenje mmbiya ila, gubhatendilenje malinga shibhajigenywenje. Na lyene lilobhe lila gulilonjeye kushuma ku Bhayaudi bhowe, mpaka lelo. **16** Bhaajiganywa

likumi limo na jumo bhala, gubhapitengene ku Galilaya ku
shitumbi shibhaalajiyenje a Yeshu. **17** Bhaakabhonanjeje,
gubhaatindibhaliljenje, ikabheje bhananji bhashinkukolanga
lipamba. **18** A Yeshu gubhabhandishilenje, gubhaabhalanjilenje,
"Njipegwa ukulungwa gowe kunnungu na pa shilambolyo.
19 Bhai, nnjendangane nkaatendanje bhandunji bha ilambo
yowe bhabhe bhaajiganywa bhangu, nnikwabhatishanga kwa
lina lya Atati na lika Mwana na Mbumu jwa Ukonjelo, **20** na
kwaajiganyanga kukamula malajilo gowe guning'amulishenje. Na
nne puni pamo na mmanganya mpaka mpelo gwa shilambolyo."

(aiōn g165)

Maliko

1 Kutandubha kwa Ngani ja Mmbone ja a Yeshu Kilishitu bhanabhabho a Nnungu. **2** Malinga shijjandikwe nshitabhu sha ankulondola bha a Nnungu, a Ishaya. “A Nnungu bhashite, ‘Ngunakuntuma muntenga jwangu annongolele, anng’alashiye mpanda gwenu.’ **3** Apali mundu anapilikanika kuanga alinkuti. ‘Mwaalashiyanje Bhakulungwa mpanda gwabho, nngoloyanje mushibhapite.’” **4** A Yowana Bhaabhatisha kubhakoposhele kuanga, bhalilunguya kuti bhandunji bhaiptanje na bhatishwa nkupinga a Nnungu bhaaleshelelanje yambi yabhonji. **5** Bhandunji kukopoka mmbali yowe ya ku Yudea na bhashilambo bha ku Yelushalemu gubhaajendelenje kuanga kula, gubhaiptilenje yambi yabhonji, na a Yowana gubhaabhatishenje ku Lushi lwa Yolodani. **6** A Yowana shibhawalaga shiwalo sha mabhetya ga ngamia, na nshipi gwa lipende nshigunu. Shalya shabho pushaaliji majje na bhushi gwa mukonde. **7** Bhalabho bhatendaga lunguya bhalinkuti, “Nnyuma jangu bhanakwiya bhakwete mashili kumbunda nne, numbe nne ngapwaa nkali kutepa nigopola mbundo ya ilatu yabho. **8** Nne pungubhatisha kwa mashi, ikabheje bhenebho shibhammatishanje kwa Mbamu jwa Ukonjelo.” **9** Gene mobha pego, a Yeshu gubhaishe kukopoka kushijiji sha Nashaleti shilambo sha ku Galilaya, gubhabhatishwe na a Yowana ku Lushi lwa Yolodani. **10** Bhakakoposheje mmashi, shangupe gubhabhweni kunnungu kuugwishe na Mbamu alikwaatulushila ali mbuti nnjubha. **11** Lilobhe kukopoka kunnungu likupilikanikaga lilinkuti. “Ugwe mwanangu junguupinga unonyela.” **12** Shangupe Mbamu akwaalongoyaga a Yeshu kwenda kuanga, **13** kweneko gubhatemi mobha makumi nsheshe bhalilingwa naka Lishetani. Kweneko pubhaaliji pamo na bhannyama bha mukonde, akuno

ashimalaika bhalikwaatumishilanga. **14** A Yowana bhakatabhweje nnigelesha, a Yesu gubhapite ku Galilaya, gubhalungwiye Ngani ja Mmbone ja a Nnungu bhalinkuti, **15** "Malanga gamalile, na Upalume gwa a Nnungu ubhandishile. Mwiipetanje yambi yenunji na nnjikulupalilanje Ngani ja Mmbone!" **16** A Yesu pubhapataga nnyenje litanda lya Galilaya, gubaabhwениنجي bhaatanda yamaki bhabhili. A Shemoni na apwabho a Ndeleya bhalitandanga yamaki na lyau. **17** A Yesu gubhaalugulilenje, "Nngagulanje nnjiyangane ninnjiganyanje kwaajiya nabhonji bhandu kwa a Nnungu." **18** Shangu gubhaleshilenje mau gabhonji, gubaakagwilenje. **19** Bhakajendeje mmujo kashoko gubaabhwениنجи a Yakobho na apwabho a Yowana bhana bha a Shebhedayo. Na bhalabhonji mubhalinginji muntumbwi bhalialayanga mau gabhonji. **20** Shangupe a Yesu gubhaashemilenje, na bhalabhonji gubhaaleshilenje ainabhabhonji a Shebhedayo muntumbwi na bhatumishi, nigubaakagwilenje. **21** Gubaikengene ku Kapalanaumu, likaishileje lyubha lya Pumulila, a Yesu gubhajinjile nshinagogi, gubhatandwibhe kujiganya. **22** Bhandunji bhowe bhaapiliikenenje gubhaimukenje kwa majiganyo gabho. Pabha bhakajiganyaga mbuti bhaajiganya bha Shalia, ikabheje malinga mundu akwete ukulungwa. **23** Malanga gogo gwakoposhele mundu jumo aliji nshinagogi mula, akwete lioka lyangali lya mmbone, **24** nigwakweshiye lilobhe alinkuti, "Nkutupinga nndi mmwe a Yesu Bhanashaleti? Bhuli nshikwiya kutumaliya? Nne nimmanyi mmwe agani, mmwe Mundu jwa ukonjelo jwa Nnungu!" **25** A Yesu gubhankalipile lioka jula bhalinkuti. "Pumula! Gunshoshe munduju." **26** Bhai, lioka jwangali jwa mmbone jula gwanngwishiye mundu jula shialala, gwagutile kwa utiya,

kungai nigwanshoshile. **27** Bhandu bhowe gubhakanganigwenje, gubhabhuyenenje, "Sheneshi nndi? Igala majiganyo ga ambi? Abha bhandubha bhashikola mashili ga kugabhalanjila nkali maoka gangali ga mmbone na ganakwaapilikana!" **28** Shangupe ngani ja a Yesu gujishumile mmbali yowe ya ku Galilaya. **29** Bhakakopokanganeje nshinagogi mula, a Yesu gubhalongene na a Yakobho na a Yowana kwenda kumui kwa a Shimoni na a Ndeleya. **30** Bhai, akwebhabho a Shimoni bhakongwe pubhaaliji bhalwele, bhagonile pa shinanda. A Yesu bhakaishuje shangupe gubhaabhalanjilenjen. **31** A Yesu gubhaajendele bhakongwe bhala gubhaakamwile nkono, nikwaajinula. Na shilwele shila shikwaashokaga, gubhatandwibhe kwaatumishilanga. **32** Likaishileje ligulo, gubhaapeleshelenje a Yesu bhalwelenji bhowe na bhandu bha shikilwanga maoka. **33** Bhandunji bhowe bha shene shilambo shila gubhaloposhelenje pa nnango gwa nyumba jila. **34** Na a Yesu gubhaalamiyenje bhandu bhabhagwinji bhakwetenje ilwele, gubhaashoshiyenje maoka gamagwinji, ikabheje bhangagaleka gabhelekete pabha gabhamanyi kuti bhalabho agani. **35** Malabhi gakwe, kumashelo a Yesu gubhajabhwile nikwenda kujika kukwaajuga a Nnungu. **36** A Shimoni na ashaajabhonji gubhapitengene kukwaaloleya. **37** Bhakaabhonanjeje gubhaalugulilenje, "Bhandu bhowe bhanakunnoleyanga." **38** A Yesu gubhaabhalanjilenje, "Twendangane ku ilambo ina ya tome ngalunguye na kweneko, pabha na kweneko ni kundendile nyiye" **39** Bhai, gubhapitile kila mmbali ya ku Galilaya bhalipita lunguya mmashinagogi na shoya maoka. **40** Mundu jumo nnwele mangundula gwabhajendele a Yesu akwaatindibhalilaga alinkuti, "Mpingaga, nnikombola kunamya!" **41** A Yesu gubhamonele shiya, gubhagolweye

nkono gwabho, gubhankwashiye bhalinkuti, "Ngunapinga, ulame!" **42** Shangupe mangundula gala gakunshokaga mundu jula, gwalamile. **43** Kungai a Yeshu gubhammalanjile mundu jula ajabhule akuno bhalikunkomelesheya kuti, **44** "Upilikane, unammalanjile mundu jojowe shene shindushi, ikabhe ujende ukaalangule bhaabhisila shiushite lama, na ukashoye mbepei kwa lama kwako malinga shiamulishwe na a Musha, nkukong'ondela kuti ulamile." **45** Ikabheje mundu jula akajabhuleje gwatandwibhe kushumya ngani jila kila mmbali akuno alitalashiya gamagwinji, mpaka a Yeshu gubhalepele kwenda shilambo shoshowe nibhoneka ku bhandu, gubhatemi kunyenje shilambo, kujika. Nkali nneyo bhandunji koposhela kila mmbali gubaajendeelenje.

2 Gakapiteje mobha gashoko, a Yeshu gubhabhujile kabhili ku Kapalanaumu na bhandunji gubhapilikenenje kuti bhaisque kumui. **2** Bhai, gubhaikengene bhandunji nigumbala nnyumba mpaka palanga nnango. A Yeshu bhatendaga kwaalungushiyanga ngani jabho, **3** penepo gubhaikengene bhandunji nsheshe bhannjigelenje mundu jwa poloka ibhalo. **4** Ikabheje, kwa ligongo lya shuluka bhandu, bhangakombolanga kumpeleka mundu jula tome na a Yeshu. Bhai, gubhabhomolenje shipagala sha nyumba shitwela shibhajimi a Yeshu. Bhakabhomolanjeje lilanga, gubhantuluyenje mundu jula ali agonile pa likai. **5** A Yeshu bhakajibhoneje ngulupai jabhonji, gubhammalanjile mundu jwa poloka jula, "Mwanangu uleshelelwe yambi yako." **6** Na bhaajiganya bhananji bha Shalia bhapalinji penepo, gubhaganishiyenje mmitima jabhonji, **7** "Bhaabheleketa bhuli abha? Bhanakwaakupulu a Nnungu! Jwakwapi mundu akombola kuleshelela yambi ikabhe a Nnungu jikape." **8** Shangupe a

Yeshu gubhaimanyi ng'aniyo yabbonji, nigubhaalugulilenje,
“Pakuti nkuganishiyanga nneyo mmitima jenunji? **9** Shei
shipepeshe kummalanjila mundu apolweshe, ‘Uleshelelwe yambi
yako,’ eu kummalanjila, ‘Jinuka! Tola likai lyako ujende?’ **10**
Bhai, pungupinga mmumanyanje kuti, Mwana juka Mundu,
anakombola leshelela bhandu yambi pa shilambolyo.” Penepo
gubhammalanjile mundu jwa poloka jula, **11** “Ngunakuubhalanjila
jima, tola likai lyako ujende kunngwako!” **12** Akuno bhandu
bhalikunnolesheyanga, shangupe mundu jula gwajimi, gwatolile
likai lyakwe nigwaijabhulile. Bhandu bhowe gubhakanganigwenje
nikwaakuya a Nnungu bhalinkutinji, “Ngu, tukanabhe kushibhona
shindu malinga sheneshi.” **13** A Yeshu gubhapite kabhili kunyenje
litanda lya Galilaya. Lugwinjili lwa bhandu gulwaajendele,
gubhatandwibhe kwaajiganyanga. **14** Na pubhapitaga mumpanda
gubaabhweni a Lawi bhanabhabho a Alupayo, bhatemi nnyumba
ja lipila koli. Gubhaalugulile “Nngagule,” A Lawi gubhajimi
gubaakagwile. **15** Kungai, a Yeshu gubhatemi nkulya shalya,
nnyumba ja a Lawi. Bhakamula koli bhabhagwinji na bhakwetenje
yambi bhananji, gubhatemingenenje nkulya, pamo na a
Yeshu na bhaajiganywa bhabho. Pabha bhandu bhabhagwinji
bhashinkwaakagulanga. **16** Bhai, bhaajiganya shalia bha
munkumbi gwa Mapalishayo, bhakaabhonanjeje a Yeshu bhalilya
na bhakwetenje yambi na bhakamula koli, gubaabhuhiyenje
bhaajiganywa bhabho, “Kwa nndi abha bhanalya na bhakamula
coli na bhakwetenje yambi?” **17** A Yeshu bhakaapilikananjeje
gubaabhalanjilenje, “Bhabhakotonji bhakunnoleyanga
mmitela, bhakunnoleyanga mmitela bhalwelenji. Nangajiya
kukwaaloleyanga bhakwetenje aki, ikabheje bhakwetenje
yambi.” **18** Gene mobhago bhaajiganywa bha a Yowana

Bhabhatisha, na bha Mapashalishayo bhatendaga tabhanga.
Bhai, gubhaikengene kukwaabhuva a Yesu, “Bhaajiganywa
bha a Yowana na bha Mapalishayo bhanaatabhanga, kwa
nndi bhaajiganywa bhenu bhakaatabhanga?” **19** A Yesu
gubhajangwile, “Bhuli, bhashemilwenje kundoa bhalipinjikwanga
tabha akuno bhatemingene na nnyene nkulomba? Bhalinginji
na nnyene nkulomba bhakaatabhanga. **20** Ikabheje shigaishe
mobha nkulomba shashoywe, penepo shibhatabhanje.” **21**
“Bhandu bhakaakatanga shibhamba sha nngubho ja ambi
nitotela munngubho ja bhukala. Na bhatendangaga nneyo,
shibhamba sha nngubho ja ambisho, shipinga guluka nipapula
nngubho ja bhukalajo, na papapwishepo shipapunde pwenguka.
22 Wala bhandu bhakaataganga divai ja ambi mmipatila ja
bhukala. Ibhaga bhatendangaga nneyo, divai ja ambijo shijikae
mipatila ja bhukalajo, na divai na mipatila shijipwengushe. Divai
jaambi pataga mmipatila jaambi!” **23** Lyubha limo lya Pumulila,
a Yesu bhatendaga pita mmigunda ja ngano, bhaajiganywa
bhabho gubhatandwibhenje kutema maashe ga ngano. **24**
Mapalishayo gubaabhalanjilenje a Yesu, “Nhole! Kwa nndi
bhaajiganywa bhenu bhanatendanga shindu shikapinjikwa
Lyubha lya Pumulila?” **25** A Yesu gubhaajangwilenje,
“Nkanabheshomanga shibhatendile a Daudi na ashaajabhonji
pubhakwetenje shibhanga? **26** Shibhashite jinjila Nniekalu,
bhukala a Abhiashali pubhaaliji Bhakulungwa Bhaabhisila,
gubhalile mikate jabhishilwe kwa a Nnunu. Jikapinjikwaga
kuligwa ikabhe na bhaabhisilangape, numbe a Daudi gubhalile
nikwaapanganga na ashaajabhonji?” **27** Bhai, a Yesu
gubaalugulilenje, “Lyubha lya Pumulila lyashinkubhikwa kwa
ligongo lya bhandunji na nngabha bhandunji bhashinkubhikwanga

kwa ligongo lya Lyubha lya Pumulila! **28** Kwa nneyo, Mwana juka Mundu, ni Nkulungwa, nkali jwa Lyubha lya Pumulila.”

3 A Yeshu gubhajinjile kabhili nshinagogi, na nkati mula ashinkupagwa mundu jumo apolweshe nkono. **2** Bhandu bhananji bhalinginji mwenemo, gubhaalolesheyenje a Yeshu ibhaga shibhannamye Lyubha lya Pumulila nkupinga bhapatanje shiumilo sha kwaalugula. **3** A Yeshu gubhannugulile apolweshe nkono jula, “Jiya ujime pakati pakati pano.” **4** Kungai, a Yeshu gubhaabhushiyenje bhandunji bhala, “Bhuli, inapnjikwa Lyubha lya Pumulila kutenda ya mmbone eu kutenda yangali ya mmbone, kunnamya mundu eu kummulaga?” Ikabheje bhangajangulanga. **5** Penepo a Yeshu gubhaalolilenje bhowe bhali bhatumbele, akuno bhalijika, kwa ligongo lya mitima jabhonji jangapinga kulupalila. Kungai gubhammalanjile mundu jula, “Goloya nkono gwako!” Jwalakwe gwagolweye nkono gwakwe, na shangupe guulamile. **6** Shangu Mapalishayo gubhakopokenje palanga, gubhatemingenenje pamo na bhandunji bha a Elode nkupangana muutendelo, kuinga bhaabulaganje a Yeshu. **7** A Yeshu gubhajabhwile penepo na bhaajiganywa bhabho, gubhapite kulitanda lya Galilaya, na lugwinjili lwa bhandu lukwaakagulaga, kukopoka ku Yelushalemu na ku Yudea, **8** na ku Idumea na kung'ambu lushi lwa Yolodani na ku Tilo na ku Shidoni. Lwene lugwinjili lwa bhandulo Iwashinkwajendela ku Yelushalemu bhakaplikananjeje indu yaigwinji ibhatendaga. **9** Kwa ligongo lya gwinji gwa bhandu, a Yeshu gubhatumile bhaajiganywa bhabho bhaabhisilanje ntumbwi gumo, nkupinga bhanabhandishilwe na bhandunji. **10** Pabha bhashinkulamya bhandu bhabhagwinji, bhalwelenji bhowe gubhanokolenenje nkupinga bhaakwayanje bhalamanje. **11** Na maoka gangali ga

mmbone gala pugaabhonaga a Yesu, gatendaga kwaagwyiyanga bhandunji bhala mmujo jabho, akuno galijobhela, galinkuti, "Mmwe Bhanabhabho a Nnungu!" **12** Ikabheje a Yesu gubhaakalipilenje bhanaamanyiyanje ku bhandu. **13** A Yesu gubhajombweshe kwiiitumbi, gubhaashemilenje bhubhaapinjilenje bhayene. Bhai gubhaajendelenje, **14** gubhaagwile bhandu likumi limo na bhabhili, gubhaashemilenje mitume, nkupinga bhatame nabhonji bhaatumanje liengo lya pita lunguya, **15** na bhakombolanje kushoya maoka. **16** Bhai, bhene likumi limo na bhabhili bhaagulwenje bhala mena gabhonji pugaliji, a Shimoni, bhapegwilwe lina lya a Petili na a Yesu **17** na a Yakobho na a Yowana apwabho, bhana bha a Shebhedayo, a Yesu gubhaapelenje lina lya Bhoanege, malombolelo gakwe "Bhana bha nnjai," **18** A Ndeleya na a Pilipi na a Bhatolomeyo na a Matei na a Tomashi na a Yakobho bhanabhabho a Alupayo na a Tadei na a Shimoni Bhakanaani na **19** a Yuda Ishikaliote bhaatendebhwishe a Yesu. **20** Kungai a Yesu gubhajinjile nnyumba. Lugwinjili Iwa bhandu lukugumbalaga kabili, a Yesu na bhaajiganywa bhabho gubhalepelenje nkali kulya shalya. **21** Bhai, ashaarongo ajabhonji bhakapilikananjeje genego gubhapitengene kukwakamula, pabha bhandunji pubhabheleketangaga kuti bhalwele shalubha. **22** Nabhalabhonji bhaajiganya bha Shalia gubhaikengene kukopoka ku Yelushalemu, gubhashitenje, "Bhashikola Bheshebhuli! Numbe bhanashoya maoka kwa mashili gaka nkulungwa jwa maoka." **23** Penepo, a Yesu gubhaashemilenje gubhaabhalanjilenje kwa ndango, "Lishetani shakombole bhuli kwiiibhinga nnyene? **24** Ibhaga upalume gumo ugabhanikaga nibha makundi gataukangana, gwene upalumego ukalonjeya. **25** Na kabili, bha likaja limo bhalekanaga nibha likaja

litaukangana, lyene likajalyo likalonjeya. **26** Na ibhaga, upalume uka Lishetani ugabhanikaga nibha ikundi, ukalonjeya, ikabhe shigupele. **27** "Jwakwapi mundu akombola kujinjila nnyumba jika mundu akwete mashili, nikumpokonyola indu yakwe, ikabhe antabheoti mundu akwete mashilijo, penepo shakombole kumpokonyola indu yakwe. **28** "Kweli ngunakummalañjalanga, bhandu shibhaleshelewanje yambi yabhonji yowe na kwaakupulu kowe a Nnungu, **29** ikabheje, akummeleketela yangali ya mmbone Mbamu jwa Ukonjelo, ngu akaleshelewa, pabha shene shambisho shinalonjeya pitipiti." (aiōn g165, aiōnios g166) **30** A Yesu bhashinkubheleketa genego, pabha bhashinkwaalugulilanga kuti, "Bhashikola lioka jwangali jwa mmbone." **31** Anyinabhabho na ashaapwabho a Yesu gubhaikengene, nijimangana palanga, gubhantumilenje mutenga kukwaashema. **32** Bhandu bhabhagwinji bhashinkwaatimbililanga bhali bhatemingenenje. Bhai bhananji, gubhaaluguliljenje, "Anyinabhenu na ashaapwenu pubhalinginji palanga bhanakunnoleyanya." **33** A Yesu gubhaajangulenje, "A mama nne na ashaapwanga nne ashigani?" **34** Penepo gubhaaloliljenje bhandunji bhaatimbililjenje bhala, gubhashite, "Nnolanje! Abha ashaamama nne na ashaapwanga nne. **35** Mundu jojowe atenda ibhapinga a Nnungu, jwenejo mpwanga nne na nnumbwangu nne na nyinagwangu nne."

4 A Yesu gubhatandwibhe kujiganya kabili bhali nnyenje litanda lya Galilaya. Lugwinjili lukulungwa lwa bhandu lukwaishilaga, kwa nneyo gubhakwelile mutumbwi gubhatemi. Bhandu bhowe gubhatemingene nnyenje litanda. **2** Gubhajigenye indu yaigwinji kwa ndango, na nkujiganya kwabho gubhashite, **3** "Mpilikananje! Nkupanda ashinkwenda panda mmbeju. **4** Alipita miya mmbeju ila, ina guigwilile mumpanda, ijuni gwiishe guilile.

5 Ina guigwilile pa liganga likulu pangali litaka lyaligwinji, pabha litaka likataliyeje guimelile shangupe. **6** Lyubha likabhaleje ikunyalaga, na pabha mbubhu yakwe ikataliyeje, guijumwile. **7** Ina guigwilile pa mikongo ja mibha, mibha guikulile niutalila, mmbeju ila yangaogoya iepo. **8** Ina guigwilile pa litaka lya mmbone, guimelile, guikulile niogola, lubheju lumo lukuogoyaga iepo, lumo makumi gatatu na luna makumi shita na luna makumi kumi.” **9** Kungai gubhashite, “Akwete makutujo apilikane!” **10** A Yesu bhakatameje pa jika, bhaajiganywa bhabho likumi limo na bhabhili bhala, na bhandunji bhana bhaapilikanishiyangaga bhala, gubaabushiyenje malombolelo ga ndango ila. **11** Nabhalabho gubhaalugulilenje, “Mmanganyanji nshikolanga shikono sha kuimanya indu ya nng’yo ya mu Upalume gwa a Nnungu, ikabheje bhananjibho, yowe shibhabhalanjilwanje kwa ndango, **12** kwa nneyo, ‘Bhalolanje, ikabheje bhanashibhonanje shindu. Bhapilikananje, ikabheje bhanaimanyanje. Bhanakwiipetanga, Nileshelelwa yambi yabhonji na a Nnungu.’” **13** Bhai, a Yesu gubaabhalanjilenje, “Bhuli, mmanganya nkakulumanyanga lwene lutangolu? Bhai shimuimanyanje bhuli, ndango ina? **14** Nkupanda anapanda lilobhe lya a Nnungu. **15** Mbeju igwilile mumpanda, inalandana na bhandunji bhakulipilikananga lilobhe lya a Nnungu. Ikabheje bhakulipilikanangaga, shangupe Lishetani anakwiya kulishoya mmitima jabhonji. **16** Na mmbeju yagwilile pa liganga likulu, inalandana na bhandunji bhakulipilikananga lilobhe lya a Nnungu, shangupe bhanakuliposhelenga nikwiinonyela. **17** Ikabheje bhakakulibhikanga mmitima jabhonji, kwa nneyo likaishila pa melela nnjiga nilonjeya, na ikoposhelaga ya ukomu eu ya shilaje ga ligongo lya lilobhelyo, shangupe bhanalekanga. **18** Mbeju yagwilile pa mibha, inalandana na

bhandunji bhakulipilikananga lilobhe lila, **19** ikabheje ga lipamba
lya ndamo ya pashilambolyo, na tembwa ga angalila indu
na mboka na shilokoli yajinjilangaga inautalila lilobhe lila,
bhanogoyanje iepo. (*aiōn g165*) **20** Ikabheje mmbeju yagwilile pa
litaka lya mmbone, inalandana na bhandunji bhakulipilikananga
lilobhe lya a Nnungu, nikuliposhela, niogoya iepo, bhana makumi
gatatu na bhana makumi shita na bhana makumi kumi.” **21**
A Yesu gubhapundile kwaabhalanjilanga, “Bhuli, bhandunji
bhanakoleyanga kandili niunishila lidebhe eu nibhika nng'ungu?
Nng'oo! Pujibhikwa panani. **22** Bhai, shoshowe shishiyywe,
shishiundukulwe, na shoshowe shiunishilwe, shishiunukulwe. **23**
Akwete makutujo apilikane!” **24** Na kabhili gubhaalugulilenje,
“Nnganishiyanye inkupilikanangayo, shipimilo shinkwaapimilanga
bhandunji shila, a Nnungu shibhampimanje shosho, numbe
nijenjeshewa. **25** Pabha akwete shindu shapunde kujenjeshewa,
jwangali shindu, nkali shakwetesho shapokonyolwe.” **26** A Yesu
gubhapundile kubheleketa, “Upalume gwa a Nnungu unalandana
naka mundu apandile mmbeju munngunda gwakwe. **27** Shilo
anagona lugono na mui anajabhula, na penepo mmbeju ila
inamela nikula, akuno akakushimanya shitendeka. **28** Pabha
litaka liyene linameya mmbeju nikula niogola iepo, puitandubha
kuipuka liamba, nikwiya liashe, kungai ngano jinasha nniash
mula. **29** Na yalya ikomalaga, shangupe mundu jula anatola
mbopo jakwe, nipita anjila pabha mióngwe ja maneng'eno
jiishile.” **30** Kabhili a Yesu gubhashite, “Upalume gwa a Nnungu
tuulandanye na ndi? Eu tuutalashiye kwa lundango lwashi?
31 Malinga lubheju lwa aladali lushoko kupunda mmbeju yowe
ipandwa. **32** Ikabheje lupandwaga, lunamela nikula nibha
nkongo gwankulungwa kupunda mikongo jowe munngunda mula.

Nyambi yakwe inakula nikola shiwili, na ijuni inashenga maui gabhonji." **33** A Yeshu gubhajigenye malobhe gamagwinji kwa ndango ina yaigwinji ya malinga nneyo, gubhabhelekete nabhonji malinga shibhaelewangaga. **34** Shakwapi shibhabhelekataga gwangali ndango, ikabheje pubhabhaga jikape na bhaajiganywa bhabho, bhatendaga kwaatalashiyanga indu yowe. **35** Lyubha lyolyo ikaishileje ligulo, a Yeshu gubhaalugulilenje bhaajiganywa bhabho, "Tujomboshe litanda, twendangane mpaka ku ng'ambu."

36 Bhai, gubhaluleshilenje lugwinjili lwa bhandu lula, na a Yeshu bhangatuluka kabhili muntumbwi mula gubhajabhlengene. Na mitumbwi jina gujikagwile. **37** Bhai, mbungo jikulungwa gujitandwibhe kupuga, mabhimbili gakukomaga muntumbwi mula, mpaka ntumbwi ukutandubhaga kugumbala mashi. **38** A Yeshu mubhaliji nnyuma ntumbwi bhagonile bhajegamile pa nto. Bhai, bhaajiganywa gubhaajumwiyenje bhalinkutinji, "Mmajiganya, bhuli, nkaimuka kuti tupingawa?" **39** Bhai, gubhajumwishe, gubhajikalipile mbungo jila nikugaamulisha mabhimbili ga mashi, bhalinkuti, "Nyenye! Mpumule!" Penepo mbungo jila gujipumwile, nibha ilili kaje. **40** Kungai a Yeshu gubhaalugulilenje bhaajiganywa bhabho, "Pakuti nnajogopanga? Launo mwangalinginji ngulupai?" **41** Gubhajogopenje kwa kaje, gubhabhuyenenje, "Bhenebha agani, nkali mbungo na mabhimbili ganakwaapilikana?"

5 Bhai, gubhaikengene ku ng'ambu litanda lya Galilaya, ku shilambo sha Bhagelashi. **2** A Yeshu bhakatuleshejope muntumbwi, shangupe gubhaimikene naka mundu jumo jwa shikilwa maoka gangali gammbole, alikopoka ku makabhuli. **3** Jwene mundujo kwatamaga ku makabhuli na jwakwapi mundu akombolaga kuntabha kabhili kwa mindondolo nkali

ja itale, 4 pabha papagwinji bhalinjilenje kuntabha pingu na mindondolo ja itale ikabheje, atendaga kutula mindondolo ja itale jila na kuitemanya pinguyo, na wala jwakwapi mundu ankombolaga. 5 Mui na shilo kwatamaga ku makabhuli na mwiitumbi, alijobhela akuno alipita kwilengula mmaganga. 6 Na akaabhoneje a Yeshu kwaataliya, gwabhabhutushile, gwapite kwaatindibhalila. 7 Kwa lilibhe lya utiya nigwashite, "Nkumbinga nndi mmwe a Yeshu bhanabhabho a Nnungu bha kunani kaje? Shonde shonde, kwa lina lya a Nnungu nnamboteshe!" 8 Ashinkubheleketa nneyo pabha a Yeshu bhammadanjile kuti, "Ugwe lioka gwangali gwa mmbone, gunshoshe munduju." 9 Bhai, a Yeshu gubhammushiye, "Bhandu bhakuushemanga gani?" Gwajangwile, "Lina lyangu 'Likundi' pabha putuli tubhabhagwinji." 10 Lioka jwangali jwa mmbone jula, gwabhashondelesheye a Yeshu bhanaabhanganganje nshilambo mula. 11 Pa tome jakwe lyashinkupagwa likundi lya ngulubhe ilipitalya nsitumbi. 12 Bhai, ashimaoka bhala gubaashondelesheyenje a Yeshu bhalinkutinji, "Ntupeleshe ku ngulubhe kula tukaajinjilanje." 13 A Yeshu gubhaaleshilenje, nigubhapite kwaajinjilanga ashingulubhe bhala. Na likundi lyowe lya ngulubhe lya ishila elupu ibili, guieleleshele nnikote shibhutuka mpaka guitumbushile nnitanda. 14 Bhashunga bha ngulubhe ila gubhabhutukenje, gubhapite shumyanga jene nganijo kunnjini na mmigunda. Bhandunji gubhaptengene kulola itendeshe. 15 Gubhaajendelenje a Yeshu, gubhammweninji mundu akwete likundi lya maoka jula ali atemi, awete nngubho na ali na lunda lwakwe lwa mmbonepe, nigubhajogopenje. 16 Bhandunji bhagabhwjeninji genego pugatendekaga, gubhaatalashiyenje bhananji gampatile mundu jwa shikilwa maoka jula na ga

ngulubhe ila. **17** Bhai, gubhatandubhenje kwaajuga a Yesu bhajabhule nshilambo shabbonji mula. **18** A Yesu bhalikwela muntumbwi bhajabhule, mundu jula gwabhaujujile alongane nabho.

19 Ikabheje a Yesu gubhakanile. Ikabhe gubhammalanjile, "Ujende kunngwako, ukaabhalanjilanje ashaalongo ajako yowe ibhakutendele Bhakulungwa na shibhashite kukubhonela shiya." **20** Bhai, mundu jula gwapite, gwatandwibhe pita lunguya yowe ibhantendele a Yesu nshilambo shashemwaga Dekapoli, malombolelo gakwe ilambo kumi, na bhandu bhowe gubhakanganigwenje. **21** A Yesu bhakajombosheje na ntumbwi kubhuja kung'ambu, lugwinjili lukulungwa lwa bhandu lukwaagumbalilaga, gubhajimi nnyenje litanda. **22** Penepo gubhaishe bhakulungwa bhamo bha shinagogi bhashemwaga a Yailo. Bhakaabhoneje a Yesu gubhaigwishiye pa makongono gabho, **23** gubhaashondelesheye bhalinkuti, "Mwali jwangu jwannung'una nnwele tome nawa. Shonde twende nkammishile makono genugo nkupinga alame." **24** Bhai, a Yesu gubhalongene nabho. Na bhandunji bhabhagwinji gubaakagwilenje, akuno bhalinokolananga nkwaabhandishila. **25** Bhashinkupagwa na bhakongwe bhamo bhatendaga lwalla nsholosholo yaka likumi limo na ibhili. **26** Bhene bhakongwebho bhashinkulajilila kwenda mubhamitela bhabhagwinji. Na bhashinkujonanga indu yabho yaigwinji nkuiwaya na bhanalame, ikabhe nipunda kulwaliya. **27** Bhakapilikaneje ngani ja a Yesu, gubhapite, nipekenya lugwinjili lwa bhandu lula kunyuma ja a Yesu, gubhapite kwaya nngubho jabho. **28** Bhashinkutenda nneyo, pabha bhashinkwiibheleketela bhayene kuti, "Ngwayape nngubho jabho, shiname." **29** Shangupe nsholosholo gula ukupumulaga, gubaibhweni nshiilu shabho kuti bhalamile shilwele shabho shila. **30** A Yesu gubhaimanyi

kuti gashikwashoka mashili. Bhai gubhalutendebhushile lugwinjili lula, gubhabhushiye, "Gani angwashiye nngubho jangu?" **31** Bhaajiganywa bhabho gubhaajangulenje, "Nnilola bhandunji shibhakuti kunngumbalila, nkubhuya bhuli gani ankwashiye?" **32** Ikabheje a Yeshu gubhapundile kuloleya bhammone atendile shenesho. **33** Penepo bhakongwe bhala, bhali bhagamanyi gaapatile, gubhatandwibhe ungumila kwa jogopa, gubhapite kwigwiya pa makongono ga a Yeshu na gubhatalashiye gowe gatendeshe. **34** A Yeshu gubaabhalanjile, "A mwali, ngulupai jenu jinnamiye. Njende kwa ulele, na shilwele shenu nnamile." **35** A Yeshu bhakanabhe pumula kubheleketa, bhandunji kukopoka kumui kwa a Yailo bhala gubhaikengene, nikwaalugulila, "Mwali jwenu awile. Ga bhuli kupunda kwaabhuya Bhaajiganya?" **36** Ikabheje a Yeshu bhakapilikaneje gubhabheleketenje gala, gubaabhalanjile a Yailo, "Nnajogope, mmwe nkulupalilepe." **37** Penepo wala bhangaleka mundu jojowe abhakagule ikabhe, a Petili na a Yakobho na a Yowana apwabho. **38** Gubhaikengenenje kunngwabho bhakulungwa bha shinagogi bhala, na a Yeshu gubhapilikene njobhela na ililo na gubhaaimenenje bhandu bhabhagwinji bhalikwigutanjilanga. **39** Gubhajinjile nnyumba, gubhaalugulilenje, "Pakubha nnajobhelanga na guta? Mwali jwangawa, ashigonape." **40** Ikabheje bhalabhonji gubaeshilenje. Bhai, gubaakopoyenje bhowe palanga, gubhaatolile ainagwe na akwabhe mwali jula na bhaajiganywa bhabho bhatatu bhala, gubhajinjilenje kukati kwagonile mwali. **41** Kungai gubhankamwile nkono, gubhammalanjile, "Talita kumi" Malombolelo gakwe, "Mwali ngunakuubhalanjila ujinushe!" **42** Shangupe mwali gwajimi, gwatandwibhe kujima jima. Paliji jwa yaka likumi limo na ibhili. Penepo bhandu gubhakanganigwenje kwa kaje. **43**

A Yeshu gubhaakomelesheyenje bhanammalanjilanje mundu jene nganijo. Kungai gubhaabhalanjilenje bhampanganje shalya mwali jula.

6 A Yeshu gubhajabhwile, nigubhapite ku shilambo shabho na bhaajiganywa bhabho gubhaakagwilenje. **2** Likaishileje lyubha lya Pumulila, gubhatandwibhe jiganya nshinagogi. Bhandu bhabhagwinji bhabhagwinji bhashinkulapanga, gubhashitenje, "Bhaijigenye kwei genega? Na lwene lundalu bhalupatile kwei, na yene ilapoi, bhaatenda kwa mashili gashi? **3** Bhuli, bhenebha nngabha a pundi shelemala bhanabhabho a Malia, akulubhabhonji a Yakobho na a Yoshepu na a Yuda na a Shimoni? Bhuli, ashaalumbubhabhonji tukatama nabhonji apano?" Bhai, gubaakanilenje. **4** A Yeshu gubhaalugulilenje, "Nkulondola jwa a Nnungu akalepela kuywa, ikabhe pa shilambo shakwe na kwa ashaalongo ajakwe na pa likaja lyakwe." **5** Kwa nneyo bhangatenda ilapo pepala, ikabhe bhashinkwabhishilanga makono bhalwelenji bhashoko nikwalamyanga. **6** A Yeshu bhashinkulapa ligongo lyangakulupalila kwabhonji. Gubhapite muiiji pita jiganya. **7** Gubaashemilenje bhaajiganywa bhabho likumi limo na bhabhili bhala, gubaatumilenje bhabhili bhabhili. Gubaapelenje mashili ga shoya maoka. **8** Gubaalugulilenje kuti, "Mumpandamo nnajigalanje shindu shoshowe, ikabhe ntindisho, nnajigalanje nkate wala nkobha wala mmmbiya. **9** Nng'walanje makubhashi, nnajigalanje nngubho ja tindiganya." **10** Gubaalugulilenje kabhili, "Pamui popowe pushimposhelwanje, ntamangane popo mpaka pushinshokangane." **11** Na popowe pala bhakamposhelanje, eu kumpilikilanlanga, nshokangane na nkung'undanje litutuli mmakongono genunji ibhe shilangulo sha kwaaleyanga. **12** Bhai, gubhapite kwaalungushiyanga

bhandu bhaipetanje yambi yabbonji. **13** Bhashinkushoyanga maoka gamagwinji na kwaapakanga bhalwelenji mauta na kwaalamyanga. **14** Bhai, a mpalume a Elode gubhapilikene gowego, pabha kuiniyuwa kwa a Yesu kwashinkushuma mmbali yowe. Bhandu bhananji bhatendaga bheleketanga kuti, “A Yowana bhabhatisha bhashiyuka bhakaweje, pabha bhashikola mashili ga tenda ilapo.” **15** Bhana bhatendaga bheleketanga kuti, “A Eliya.” Bhananji bhalinkutinji, “Bhalabho ni ankulondola bha a Nnunu, malinga ashinkulondola bhananji bha bhukala.” **16** Ikabheje a Elode bhakapilikaneje jene nganijo gubhashite, “Bhenebha a Yowana bhunaainjile bhala, bhashiyuka!” **17** Pabha a Elode bhashinkuamulisha a Yowana bhakamulwe nitabhwa. Pabha a Elode bhashinkwaatola shilombani a Elodia bhaaliji akongobhabho a Pilipi apwabho a Elode. **18** Pabha a Yowana bhashinkwaalugulila a Elode ikapinjikwa mmwe kwaatola shilombani bhakongwe bha apwenu. **19** Bhai, a Elodia bhashinkukola nnjimwa gubhaaloleye a Yowana nkupinga kwaabhlaga, ikabheje gubhalepele. **20** Pabha a Elode bhatenda kwajogopa a Yowana, bhalabho bhamumanyi kuti pubhaliji bhandu bhakwete aki, na bha Ukonjelo, kwa nneyo gubhaibhilile. A Elode gubhapinjile kwapilikanishiya a Yowana, ikabheje kila pubhaapilikanishiyaga, bhatendaga tenguka kwa kaje. **21** Gulikoposhele lyubha lya pwaa, lyubha lya shikukuu sha bhelekwa kwabho a Elode. Gubhaalashienje shalya bhanangulungwa bha lukumbi lwabho, na bhakulungwanji bha manjola, na ashikalongolele bhakulu bha ku Galilaya. **22** Bhai, mwali jwabho a Elodia gwajinjile nkati nigwainile, gwabhanonyeye ainagwe a Elode na bhajeninji bhabho. Penepo a mpalume a Elode gubhannugulile mwali jula, “Juga shoshowe shukupinga shini

kupe." **23** Gubhalumbile bhalinkuti, "Shoshowe shushunyuje shinikupe, nkali gabhana upalume gwangu." **24** Mwali jula gwakopweshe palanga kukwaabuya akwabhe, "Nyuje ndi?" Na bhalabho gubhannjangwile, "Ntwe gwa a Yowana bhaabhatisha." **25** Mwali gwa jile kwa a mpalume alitumanduma gwashite, "Ngunapinga nnainope, mmbe nshaani ntwe gwa a Yowana bhaabhatisha." **26** A mpalume gubhainjishe kwa kaje, ikabheje kwa ligongo lya lumbila na ligongo lya bhajeninji bhapalinji bhala, bhangan kanila. **27** Bhai, shangupe gubhantumile linjola akaainje a Yowana. Na linjola gwapite kuligelesha gwabhainjile a Yowana. **28** Gwaishe nago ntwe nshaani, gwampele mwali jula na jwalakwe gwabhapele akwabhe. **29** Bhaajiganywa bha a Yowana bhakapilikananjeje genego, gubhapitelanga maiti ga a Yowana gubhashishilenje. **30** Mitume bhala gubhabhujilene gubhaimenenje na a Yesu, gubhaalugulilenje yowe ibhatendilenje na jiganya. **31** A Yesu gubhaalugulilenje, "Twendangane kujika kwangali bhandu nkapumulilanje kashoko." Bhashinkwaalugulilanga nneyo pabha bhashinkupagwanga bhandu bhaajendelangaga na bhuja, a Yesu na bhaajiganywa bhabho gubhalepelenje kupata nkali lilanga lya kombola kulya shalya. **32** Bhai, gubhakwelilene muntumbwi gubhapitengene kujika. **33** Bhandu bhabhagwinji kopoka mulambo mowe bhaabhwениnji pubhajabulanganaga, gubhakumanyinji kubhajendanganaga. Gubhapitengenenje lubhilo kulongolela kubhaapite a Yesu na bhaajiganywa bhabho, gubhalinginji bhatainji kuika. **34** A Yesu bhakatulusheje muntumbwi, gubhaaimenenje bhandu bhagumbelenje, gubhaabphonelenje shiya, pabha pubhalinginji malinga ngondolo yangali nshunga. Gubhatandwibhe kwaajiganyanga indu yaigwinji. **35** Ikaishileje

tome na ligulo, bhaajiganywa bhabho gubhaajendelenje a Yesu gubhaalugulilenje, "Nnaino kupilile, na putuli pano pa anga. **36** Mbaya mwaalugulilanje bhandu bhajendangane muilambo na mmigunda ja tome, bhakaiumilanje shalya." **37** A Yesu gubhaalugulilenje, "Mwaapanganje shalya mmanganya." Nabhalabhonji gubhaabhushiyenje, "Bhuli, tujende tukaume mikate ja mmbiya ya mishaala ja shaka shimo jika mundu?" **38** A Yesu gubhaabhushiyenje "Nkwetenje mikate jilingwa? Nkalolanjeti." Bhakalolanjeje, gubhaalugulilenje, "Jipali mikate ng'ano na yamaki ibhili." **39** A Yesu gubhaamulishenje bhaajiganywa bhabho bhaatamikanje bhandu pai mmanyai gamabhii, mmakundi makundi. **40** Bhandu gubhatemingenenje mmakundi makundi ga bhandu makumi kumi na makundi ga bhandu makumi nng'ano. **41** Kungai a Yesu gubhatolile mikate nng'ano na yamaki ibhili ila, gubhalolile kunnungu, gubhatendile eja kwa a Nnungu, gubhagebhenye mikate jila na gubaapelenje bhaajiganywa bhabho nkupinga bhaagabhanishianje bhandu. Na yamaki gubhatendile nneila peila. **42** Bhandu bhowe gubhalilenje nijukuta. **43** Gubhalokotenje malepeyo ga ipande ya mikate na yamaki, nigumbayanga ikapu likumi limo na ibhili. **44** Bhandu bhalilenje mikate jila pubhalinginji bhanabhalume elupu ng'ano, gwangali bhalanganishiya bhanabhakongwe na bhana. **45** A Yesu gubhaamulishenje bhaajiganywa bhabho bhakwelanje muntumbwi, bhajombokanje litanda bhalongoletanje ku Bhetishaida, bhayene gubhalepeshe bhalikwaalajilanga bhandu. **46** Bhakaalajilanjeje bhandu gubhapite jikape kushitumbi kukwaajuga a Nnungu. **47** Shigulogulo ntumbwi pugwaliji pakati pakati litanda, a Yesu pubhaliji jikape kunyenje litanda. **48** Bhai, gubhaabweninji bhaajiganywa bhalilajilanga na

ngoi ya nokolela ntumbwi, kunokola mashi, pabha mbungo jashinkupuga shilinyuma. Kumashelo a Yeshu gubhaajendelenje bhalikwenda pantundu mashi bhalipinga kwaapitangana. **49**
Ikabheje bhakaabhonanjeje bhalikwenda pantundu mashi, gubhaganishiyenje pana shiwili shabho, gubhajobhelenje. **50**
Pabha bhowe bhakaabhonanjeje a Yeshu bhashinkujogopanga.
A Yeshu gubhabhelekete nabhonji, "Mwilumanje, ni nne. Nnajogopanje." **51** Kungai gubhakwelile muntumbwi mubhalinginji mula na mbungo jikutondobhaga. Nabhalabhonji gubhalapilenje kwa kaje. **52** Pabha bhangagamanyanga malombole ga mikate jila. Mitima jabhonji jashinkutopa. **53** Gubhajombokenje litanda, gubhaikengene ku shilambo sha Geneshaleti gubhajimingene. **54** Bhakakopankeje muntumbwi mula, shangupe bhandu gubhaamanyinji a Yeshu. **55** Bhai, gubhapitengene lubhilo nshilambo showe, gubhatandwibhenje kwaajigalanga bhalwelenji mmakai nikwapeleshela a Yeshu kokowe kubhapilikenje bhapali. **56** Mowe mubhapitaga a Yeshu, ibhe mujiji eu mmijini eu mmigunda, bhandu bhatendaga kwaabhikanga bhalwelenji pa lubhala, gubaashondelesheyenje a Yeshu bhaakwayanje nkali libhiniko lya nngubho yabho. Na bhowe bhaakwashiyenje gubhalamilenje ilwele yabhonji.

7 Mapalishayo na bhaajiganya bha Shalia bhananji kukopoka ku Yelushalemu, gubhapitengene kwa a Yeshu. **2** Gubhaabhwениnji bhaajiganywa bhananji, bhalilyanganga shalya gwangali nabha makono, malinga shiikupinjikwa na ikubho ya Shiyaudi. **3** Pabha Mapalishayo na Bhayaudi bhowe bhashinkubhikanga mmitima jabhonji miungu ja bhanangulungwa bhabhonji, nngalya shindu gwangali nabha. **4** Na kabhili bhakalyanganga shindu sha kopoka kushokoni gwangali kuukanga, na jaapali mikubho jina

jibhayobhelelenje, malinga kuukanga bhilika na migabho na indu ya shabha. **5** Bhai, Mapalishayo na bhaajiganya bha Shalia gubhaabhuhiyenje a Yeshu, "Kwa nndi bhaajiganywa bhenu bhakaatendanga malinga shitushite jiganywa na bhanangulungwa bhetu, ikabheje bhanalyanganga gwangali nabha makono?" **6** A Yeshu gubhaajangwilenje, "Mmanganya mmagulumba, a Ishaya bhashinkulondola ukoto genu mmanganya kuti. 'A Nnunu bhanabheleketa kuti, bhene bhandunjiba bhananyogopanga kwa malobhepe, Ikabheje mitima jabhonji jishitalikangana na nne. **7** Kundindibhalila kwabhonji kwayoyo, Pabha majiganyo gabhonji ni malajilo ga shigundupe.' **8** "Mmanganya nnaalekanga malajilo ga a Nnunu, nkupinga nkamulanje miungu ja bhandu."

9 A Yeshu gubhapundile kubheleketa, "Mmanganya nnaalekanga Malajilo ga a Nnunu nkupinga nkagulanje ikubho yenunji. **10** Pabha a Musha bhaashite, 'Gwaajogope ainago na akwenu.' Na kabhili bhaashite, 'Akwaatukana ainagwe na akwabhe, anapinjikwa abhulagwe'. **11** Ikabheje mmanganya nnajiganyanga, 'Monaga mundu akwete shindu sha kwaapa ainagwe eu akwabhe, abheleketaga kuti, njikwapa a Nnunu, **12** bhai, akapinjikwa kabhili kwaapa ainagwe eu akwabhe.' **13** Nneyo shinkuti kulinyegayanga lilobhe lya a Nnunu ligongo lya miungu jenunji. Nnatendanga indu yaigwinji malinga yeneyo."

14 A Yeshu gubhabhelekete kabhili na lugwinjili lula bhalinkuti, "Mmbilikananje mmowe na mmumanyanje. **15** Shakwa shalya, shalya mundu shikuntenda anyate, ikabhe ikunkopoka nkati ni ikuntenda anyate. **16** Akwete makutu ga pilikanilajo apilikane."

17 Bhakaalekanjeje bhandu, gubhajnjile nnyumba, bhaajiganywa bhabho gubhaabhuhiyenje malombolelo ga lutango lula. **18** Na bhalabho a Yeshu gubhaalugulilenje, "Bhuli, nkali mmanganya

nkakumumanyanga malinga bhananji? Nkakumumanyanga kuti shalya, shalya mundu shikakuntenda anyate? **19** Pabha shikakunjnjila muntima ikabhe mmatumbope, kungai akakwenda kulilindi?" Kwa bheleketa nneyo a Yeshu bhashinkwiitenda yalya yowe kubha ya mmbone. **20** A Yeshu gubhapundile bheleketa, "Shikunkopoka mundu muntima shenesho shikuntenda anyate. **21** Pabha muntima uka mundu munakopoka ng'aniyo yangali ya mmbone ya labhalabha na gwii na bhulaga, **22** ya utwai na shienga na kwetela indu na unami na kujajatiika na lupimililo na matukano na mbwinya na ungumba. **23** Yene yowei muikopoka muntima uka mundu, yeneyo ni ikuntenda anyate." **24** A Yeshu gubhajabhwile pepala, gubhapite mmbali ya ku Tilo na ku Shidoni. Kweneko gubhajinjile nnyumba jimo, pubhapingaga inamanyishe na bhandu ikabheje bhangakombola kwiya. **25** Penepo bhakongwe bhamo bhashinkukola mwali akwete maoka, gubhapilikene ngani ja a Yeshu. Bhai, gubhaishe nikwiigwiya pa makongono ga a Yeshu. **26** Bhene bhakongwebho pubhaaliji Bhagiliki bha ku Poinike shilambo sha Shilia. Bhai, gubhaajujile a Yeshu bhanshoye mwali jwabho lioka jula. **27** A Yeshu gubhaalugulile, "Mwaalekanje bhana bhajukutanjeti, nngabha mwammbone kutola shalya sha bhana nikwiipa mbwa." **28** Ikabheje bhakongwe bhala gubhajangwile, "Kweli Mmakulungwa, ikabheje nkali mbwa ili pai mesha inalya malepeyo ga bhana." **29** A Yeshu gubhaalugulile, "Kwa ligongo lya lilobhe limmeleketelyo, nnjende, lioka linshoshile mwali jwenu!" **30** Bhai, gubhapite kunngwabho, gubhanng'imene mwali jwabho agonile pa shinanda na lioka jula anshoshile. **31** Kungai a Yeshu gubhajabhwile penepo gubhapite mmbali ja ku Tilo kupitila ku Shidoni, gubhaishe ku litanda lya Galilaya kupitila ku Dekapoli. **32** Bhai, gubhaapeleshelenje

mundu bhubhu na akaapilikana, gubhaajijilenje bhammishile makono. **33** A Yeshu gubhanshoshiye pa bhandu nikwenda najo kunyenje, gubhannjinjiye ngowe yabho mmakutu gakwe na gubhaunile mata nikunkwaya pa lulimi lwakwe. **34** Kungai a Yeshu gubhalolile kunani kunnungu, gubhatulwiye mbumu, gubhannugulile, "Epata," Malombolelo gakwe "Uguka." **35** Shangupe makutu gakwe gakuugukaga na lulimi lula guluugwishe, gwabhelekete ukoto. **36** A Yeshu gubhaamulishe bhanannugulilanje mundu yeila. Ikabheje pubhapundaga kwaalimbiyanga, nipubhapundangaga kushumiya ngani. **37** Bhandu bhashinkulapanga kwa kaje, gubhashitenje, "Bhanatenda indu yowe ukoto, bhanakwaatendanga ashinangapilikane, kupilikana kabhili na ashibhubhu kubheleketa."

8 Gene mobhago, lugwinjili lwa bhandu gulugumbele kabhili. Pabha bhakakwetenje shalya, a Yeshu gubhaashemilenje bhaajiganywa bhabho, gubhaaluguliljenje, **2** "Ngunakwaabphonelanga shiya bhandunjibha pabha bhashitamangana na nne mobha gatatu na bhangalinji shalya. **3** Naalugulilangaga bhajabhlangane kunngwabhonji bhalinginji na shibhanga, shibaondokanje mumpanda, pabha bhananji kubhakopokenje kwatalika." **4** Bhaajiganywa bhabho gubhaabhushiyenje a Yeshu, "Putuli pano p akonde, tupate kwei mikate ja jukuta bhandu bhowebha?" **5** A Yeshu gubhaabhushiyenje, "Nkwetenje mikate jilingwa?" Gubhaajangwilenje, "Shabha." **6** Bhai, gubhaamulishenje bhandu bhatamangane pai. Gubhatolile mikate shabha jila gubhatendile eja kwa a Nnungu, gubhajigebhenye, gubhaapelenje bhaajiganywa bhabho bhaapanganje bhandu, na bhalabhonji gubhaapelenje. **7** Bhashinkukolanga na

yamaki ishokope. A Yesu gubhatendile ej a kwa a Nnungu, gubhaalugulilenje bhaapanganje bhandu. **8** Bhandu gubhalilenje na jukuta. Gubhakundikenyenje malepei gubhagumbeyenje ikapu shabha. **9** Bhandu bhalilenje bhala pubhalinginji mbuti elupu nsheshe. A Yesu gubhaalajilenje bhandu, nikwaalekanga bhajendangane kumui. **10** Kashokope gubhakwelile mmashua pamo na bhaajiganywa bhabho, gubhapitengene shilambo sha ku Dalumanuta. **11** Mapalishayo gubhaikengenenje, gubhatandwibhenje kutaukangana na a Yesu. Nkwaalinga, gubhapinjilenje bhatende shilangulo kopoka kunnungu. **12** A Yesu gubhatulwiye mbumu, nigubhashite, “Pakuti alu lubhelekolu lunapinga ilangulo? Kweli ngunakummalanjilanga, alu lubhelekolu lukapegwa shilangulo shoshowe.” **13** Bhai a Yesu gubhaaleshilenje, gubhakwelile kabili mmashua, gubhatandwibhe mwanja gwa jomboka litanda. **14** Bhaajiganywa bhashinkulibhalanga jigala mikate, ikabhe nkate gumope gwapali mumashua. **15** A Yesu gubhaaleshiyenje bhalinkuti, “Nnolanje! Mwiteiganje na ngedule ya Mapalishayo na ya a Elode.” **16** Bhaajiganywa gubhatandwibhenje kubheleketa ashaayenenji, “Bhanabheleketa genego pakubha twangali mikate.” **17** A Yesu gubhamumanyi gubhaalugulilenje, Kwa nndi nnaganishiyanga ga ngajigala mikate? Bhuli, nkanabhe kumumanyangape? Bhuli mitima jenunji jishinonopa? **18** Bhuli, nkwenetenje meyo na nkalolanga? Nkwetenje makutu na nkapilikananga? Bhuli, nkakumbushilanga. **19** Lyene lyubha linagebhenye mikate ng'ano na kwaliyanga bhandu elupu ng'ano? Imwalokotenje ikapu ilingwa ya malepeyo? Gubhajangwilenje “Ikapu likumi limo na ibili.” **20** Na punagebhenye mikate shabha na kwaliyanga bhandu elupu nsheshe, imwalokotenje ikapu ilingwa?

Gubhajangwilenje, "Shabha." **21** Bhai, gubhaalugulilenje, "Nkanabhe ng'amulangape?" **22** A Yeshu na bhaajiganywa bhabho gubhaikengenenje ku Bhetishaida, gubhaapeleshelenje mundu jumo nangalole, nikwashondelesheya a Yeshu bhankwaye nkupinga alame. **23** A Yeshu gubhankamwile nkono, gubhapite najo kunyenje shijiji. Gubhanng'unile mata mmeyo, gubhankwashiye na makono, gubhammushiye, "Bhuli, ulikushibhona shindu shoshowe?" **24** Nangalole jula gwalolile, nigwashite, "Ngunakwabhonanga bhandu bhabhagwinji mbuti mikongo jilikwenda." **25** Kungai a Yeshu gubhankwashiye kabhili na makono kumeyo, na jwalakwe gwabhalakwile meyo nigwalamile, gwaibhweni indu yowe ukoto. **26** A Yeshu gubhannugulile ajende kunngwakwe nikung'amulisha, "Unabhuje kushijiji!" **27** Kungai a Yeshu na bhaajiganywa bhabho gubhapitengenenje muijiji ya ku Kaishalia Pilipi. Bhalinginji mumpanda a Yeshu gubhabhushiyenje bhaajiganywa bhabho, "Bhandu bhakutinji nne gani?" **28** Gubhaajangwilenje, "Bhananji bhakutinji mmwe a Yowana Bhabhatisha na bhananji bhakutinji a Eliya na bhananji bhakutinji jumo jwa munkumbi gwa ashinkulondola bha a Nnunu." **29** Nabhalabho a Yeshu gubaabhushiyenje, "Na mmanganya bhuli, nkutinji nne gani?" A Petili gubhaajangwile, "Mmwe a Kilishitu, nng'agwilwe na a Nnunu" **30** A Yeshu gubhaalimbiyenje bhanannugulilanje mundu jojowe jene nganijo. **31** A Yeshu gubhatandwibhe kwaajiganyanga bhaajiganywa bhabho kuti, inapinjikwa Mwana juka Mundu apotekwe na kanwa na bhanangulungwa na bhakulungwanji bhaabhisila na bhaajiganya bha shalia. Abhulagwe na lyubha lya tatu shaayushe. **32** A Yeshu bhashinkwaalugulilanga gwangali nng'iyo. Penepo a Petili, gubhaatolile a Yeshu

kunyenje na gubhatandwibhe kwaakalipila. **33** Ikabheje a Yesu gubhatendebhwishe, gubhaalolilenje bhaajiganywa bhabho, gubhaakalipile a Petili bhalinkuti, "Njoshela apano, Lishetani gwe! Pabha ukaganishiya ga a Nnungu ikabhe ga shigundupe."

34 Kungai a Yesu gubhaashemilenje bhandu bhagumbelenje bhala na bhaajiganywa bhabho, gubhaalugulilenje, "Mundu jojowe apinga ngagula nne, anapinjikwa aikane nnyene, ajigale nshalabha gwakwe angagule. **35** Pabha mundu apinga lamya gumi gwakwe shaguobhye, ikabheje akuguobhya gumi gwakwe kwa ligongo lyangu nne na ligongo lya Ngani ja Mmbone, shagutapule. **36** Bhuli, shiimpwaile indi mundu apegwaga indu yowe ya nshilambolyo showe akuno aliobhya gumi gwakwe?

37 Eu mundu shashoye shindu shashi pa gumi gwakwe? **38** Mundu jojowe munkumbi gwa lubheleko Iwangakulupalika kwa a Nnungu na Iwa yambilu, ashangolele oni nne na malobhe gangu, nne mwana juka Mundu shininkolele oni jwene mundujo, malanga pushing'ishe Muukonjelo gwa Atati pamo na ashimalaika bha Ukonjelo bha kunnungu."

9 A Yesu gubhapundile kwalugulilanga, "Kweli ngunakummalanjilanga, bhapalinji bhananji bhalinginji pepano bhakawanganga bhakanabhe kuubhonanga Upalume gwa a Nnungu ulikwiya kwa mashili." **2** Gakapiteje mobha nng'ano na limo, a Yesu gubhaatolilenje a Petili na a Yakobho na a Yowana, gubhapite nabhonji kushitumbi shashileu kwa jikape. Kweneko gubhapindikwishe lubhombo Iwabho, mmujo jabhonji, nibhoneka shinape. **3** Nngubho yabho yashinkung'anyima niwejela kwa kaje, wala jwakwapi nkushapa jojowe pa shilambolyo akombola kushapa nikwiitenda iwejele malinga nneyo. **4** Gubhakoposhelenje a Eliya na a Musha gubhakungulukenje

na a Yeshu. **5** A Petili gubhaalugulile a Yeshu, “Mmajiganya, shankonja uwe kubha apano. Bhai, tushenje itala itatu, shimo shenu mmwe, na shina sha a Musha na shina sha a Eliya.” **6** Mbena bhakashimanyaga shibhabheleketaga, pabha bhenebho na ashajabhonji bhashinkujogopanga. **7** Kungai gulyaunishilenje liunde malinga shiwili, lilobhe likupilikanikaga nniundemo “Jweneju Mwanangu jungumpinga, mumpilikanishiyanje.” **8** Shangupe bhakang'wang'wayanje, bhangammonanga mundu juna ikabhe a Yeshu jikape. **9** Bhai, pubhalinginji nkuelela shitumbi, a Yeshu gubhaalimbiyenje bhanannugulilanje mundu jojowe indu ibhaibhweninji, mpaka Mwana juka Mundujo, pushayushe awaga. **10** Bhai, gubhalibhishilenje mmitima lyene lilobhelyo, bhalibhuyananga ashaayenenji malombolelo ga yuka kopoka kubhawilenje. **11** Gubaabhuhiyenje a Yeshu, “Pakuti bhaajiganya bha Shalia bhakutinji mpaka bhatandubhe kuika a Eliya?” **12** A Yeshu gubhaajangwilenje, “Elo, a Eliya bhanakwiati kualaya yowe. Nkali nneyo, kwandi bhai ishijandikwa Mmajandiko ga Ukonjelo kuti Mwana juka Mundu anapinjikwa potekwa na kanwa? **13** Ikabheje ngunakkummalanjilanga, a Eliya bhaaishe, nabhalabhonji nigubhaatendelenje yowe ibhapinjilenje, malinga shibhajandishilwe Mmajandiko ga Ukonjelo.” **14** Bhakaishilanjeje bhaajiganya bhananji bhala, gubhalubhweninji lugwinjili lukulungwa lwa bhandu lwaatimbililenje bhalitaukangana na bhaajiganya bha shalia. **15** Shangupe lugwinjili lwa bhandu bhaakabhonanjeje a Yeshu, bhowe bhashinkulapanga kwa kaje, gubaabhuhiyenje kukwalamushila. **16** A Yeshu gubhabhuhiyenje, “Nkutaukangana ndi?” **17** Mundu jumo munkumbi mula gwabhajangwile, “Mmajiganya, njikwianajo mwanangu kwenu mmwe, ashikola

lioka likuntenda anabhelekete. **18** Papagwinji ashikilwaga anakunngwiya pai na kopoka shiulo nkang'wa, alitauna meno na ng'ang'anala shiilu showe. Njinkwaajuganga bhaajiganywa bhenu bhanshoyanje ikabheje bhangakombolanga." **19** A Yesu gubhaalugulilenje, "Mmanganya lubheleko Iwangali ngulupai! Shindame na mmanganya mpaka shakani? Shinikakatimile mpaka shakani? Munnjiyenajonji akuno." **20** Gubhampelekenje. Shangupe lioka jula akaabhoneje a Yesu, gwanngwishiye nikunng'ungumiya, aligalabhuka na kopoka shiulo nkang'wa. **21** A Yesu gubhaabhushiye ainamundu, "Genega pugampatile kutandubhila shakani?" Nabhalabho gubhajangwile, "Tandubhila ali mwana. **22** Papagwinji lioka linakunngwishiya pamoto na mmashi, nkupinga limmulaje. Bhai, ibhaga nnakombola, ntubhonele shiya na ntujangutile!" **23** A Yesu gubhaalugulile, "Kwa nndi nkuti, nkombolaga? Gowe ganaakomboleka kuka mundu akulupalila." **24** Penepo ainamundu bhala gubhagutile bhalinkuti, "Ngulikulupalila! Nnyangutile kwa ungakulupalila gwangu." **25** A Yesu bhakalubhoneje lugwinjili lwa bhandu lulikwaajiila shibhutuka, gubhankalipile lioka jula bhalinkuti, "Lioka ukuntenda mwanaju anabhelekete na anapilikane, ngunakuamulisha gunshoshe nshandaju na unannjinjile kabhilil!" **26** Lioka jula gwagutile, gwanng'ungumiye kwa kaje, kungai gwanshoshile. Nshanda jula paliji mbuti ashiwa, na bhananji gubhashitenje kuti, "Awile!" **27** Ikabheje a Yesu gubhankamwile nkono, gubhannjinwile na jwalakwe gwajimi. **28** Bhai, a Yesu bhakajinjileje nnyumba, bhaajiganywa bhabho gubaabhushiyenje pajika, "Pakuti uwe twangakombola kunshoya?" **29** Na bhalabho a Yesu gubaabhalanjilenje, "Lioka lya malinga lyeneli

nkakombolanga kulishoya, ikabhe kwa juga Nnungupe.” **30**
A Yesu na bhaajiganywa bhabho gubhashoshilenje pepala,
gubhapelengenyenje na mwanja gwabhonji pitila ku Galilaya. Na
bhalabho a Yesu bhakapinjileje mundu amumanye kubhali,
31 pabha bhatendaga kwaajiganyanga bhaajiganywa bhabho.
Gubhaalugulilenje, “Nne Mwana juka Mundu shingamuywe
kubhandu na shibhammulaganje, ikabheje lyubha lya tatu
shinyushe.” **32** Bhaajiganywa bhabho bhangalimanya
lyenelyo. Ikabheje gubhajogopenje kwaabhuya. **33** Bhai,
gubhaikengenenje ku Kapalanaumu. Pubhaliji nnyumba, a Yesu
gubhaabhushiyenje, “Mwataukanganaga nndi mumpanda?”
34 Ikabheje bhanganyabho gubhatemingenenje ilili, pabha
mumpanda bhatenda taukangana ga gani ali nkulungwa
jwabhonji. **35** A Yesu gubhatemi pai, gubhaashemilenje
likumi limo na bhabhili bhala, gubhalugulilenje, “Mundu
apinga kubha nkulungwa, anapinjikwa abhe jwa kumpelo na
ntumishi jwa bhowe.” **36** Kungai gubhantolile mwana jwa
nshoko, gubhannjimishe pakatipakati jabhonji, gubhannjambete,
gubhaalugulilenje, **37** “Akumposhela mwana jwa nshoko malinga
jweneju kwa lina lyangu, anamboshela nne, na amboshela nne,
akaamboshela nnepe, ikabheje na bhandumile bhala.” **38** A
Yowana gubhaalugulile a Yesu, “Mmajiganya, tushikummona
mundu jumo alishoya maoka kwa lina lyenu, na uwe gutulinjile
kunnimbiya pabha nngabha jwa munkumbi gwestu.” **39** Ikabheje
a Yesu gubhashite, “Nnannimbiyanje, pabha jwakwapi mundu
atenda ilapo kwa lina lyangu, popo pepo nimeleketela yangali ya
mmbone. **40** Pabha akakututauka, pali na uwe. **41** Mundu jojowe
shampanganje mashi ga ng'wa, ligongo nshibhanganga bhandu
bha a Kilishitu, kweli ngunakummalanjilanga akapelela upo

yakwe. 42 "Mundu jojowe shannebhye jumo jwa munkumbi gwa bhashokonji bhangulupalilangabha, kaliji mbaya jwene mundujo, atabhilwe liganga likulungwa lya yajila nnukoi lwakwe nileshelwa mmaali. 43 Nkono gwenu unnebhyaga muukate! Mbaya jinjila mugumi gwangali nkono gumo, nngalingana na kola makono ganaabhili, nileshelwa kumoto gwa ku Jeanamu. (Geenna g1067)

44 Mwenemo mbiu yakwe ikawa, wala moto gwake ukaimika.

45 Na lukongono lwenu lunnebhyaga, nnukate! Mbaya jinjila mugumi nni na lukongono lumo, nngalingana kola makongono ganaabhili, nileshelwa kumoto gwa ku Jeanamu. (Geenna g1067)

46 Mwenemo mbiu yakwe ikawa, wala moto gwake ukaimika. 47

Na liyo lyenu linnebhyaga nnishoye! Mbaya jinjila mu Upalume gwa a Nnungu nninkwete shongo, nngalingana kola meyo ganaabhili, nileshelwa kumoto gwa ku Jeanamu. (Geenna g1067)

48 Mwenemo mbiu yakwe ikawa, wala moto gwakwe ukaimika.

49 "Pabha kila mundu shaukangwe na moto malinga mbepei puiukangwa na nnjete. 50 Nnjete ni ja mmbone, ikabheje jikanonye jitagwe indi nkupinga jinonye? Ntamangane kwa ulele munkumbi gwenunji, nkupinga kunong'aya shilongani."

10 A Yeshu gubhajabhwile pepala gubhapite ku shilambo sha ku Yudea na mmbali ya ku ng'ambu lushi lwa Yolodani. Bhandu bhabhagwinji gubhaajendelenje kabhili, na bhalabho gubhaajigenyenje malinga shigwaliji nkubho gwabho. 2 Bhai, Mapalishayo gubhaajendelenje, gubhabhushiyenje nkwaalinga, "Bhuli, ilipinjikwa jwannume kunneka nkagwe?" 3 A Yeshu gubhaajangwilenje bhalinkuti, "Bhuli a Musha bhannajilenje nndi?" 4 Na bhalabhonji gubhashitenje, "A Musha bhakundile kuti, jwannume ajandishe talaka anneshe nkagwe." 5 A Yeshu gubhaalugulilenje, "A Musha bhashinkunnjandishilanga

jene shalajao kwa ligongo lya nonopa mitima jenunji. **6**
Ikabheje kutandubhila kupanganywa kwa shilambolyo, a Nnungu
bhashinkupanganya bhandu bhabhili, jwannume na jwankongwe.
7 Kwa nneyo, jwannume shabhalekanje ainagwe na akwabhe
nilundana na akagwe, **8** numbe shibhabhanganje shindu
shimo. Kwa nneyo bhakabhanganga bhabhili ikabhe shindu
shimo. **9** Bhai, shibhalundenye a Nnungu, mundu analekanye.”
10 Bhakajinjilanjeje kabhili nnyumba, bhaajiganywa bhabho
gubhaabhushiyenje ga genego. **11** Na bhalabho a Yesu
gubhaalugulilenje, “Akwaaleka akagwe nilomba jwankongwe
juna, analabhalabha. **12** Numbe jwankongwe akwaaleka
ambujegwe, nilombwa naka jwannume juna, analabhalabha.” **13**
Bhandunji bhashinkwapeleshelanga a Yesu bhana bhashoko
bhashoko nkupinga bhaakwayanje, ikabheje bhaajiganywa
bhabho gubaakalipilenje. **14** A Yesu bhakabhoneje nneyo,
guyaashimile nigubhaalugulilenje, “Mwaalekanje bhana bhashoko
bhashoko bhanyiilanje, wala nnaaibhililanje, pabha Upalume
gwa a Nnungu gwa malinga bhene bhanganyabha. **15**
Kweli ngunakkummalanjilanga, mundu jojowe akauposhele
Upalume gwa a Nnungu malinga mwana jwa nshoko, akajinjila
mwenemo.” **16** Kungai gubhaajambetenje bhana bhala,
nigubhaabhishilenje makono, nikwaajujilanga mboka. **17** A
Yesu bhakatandubheje mwanja gwabho kabhili, mundu
jumo gwabhaishile lubhilo, gwabhatindibhalile pamakongono
gabho, gwabhabhushiyе, “Mmajiganya mmambone, ndende
bhuli mbate gumi gwa pitipiti?” (aiōnios g166) **18** A Yesu
gubhannjangwile, “Pakuti unanjema najwa mmbone? Jwakwapi
ali jwa mmbone ikabheje a Nnungu jikape. **19** Gwiimanyi
amuli shiikuti lugula, ‘Unalabhelabhe na unabhlaje na unajibhe

unakong'ondele unami na unalambile na gwaishimunji ainago na akwenu.” **20** Nshanda jula gwabhalugulile, “Mmajiganya, gene gowego njikunda tandubhila ushanda gwangu.” **21** A Yesu gubhannolile gubhampinjile, nigubhannugulile, “Ushitubhilwa shindu shimo, ujende ukaushe yowe yuukwete, elayo, ukaapanganje bhaalaga, na ugwe shiukole shibhiko kunnungu, kungai ujiye ungagule.” **22** Akapilikaneje genego, gwajabhwile ali ainjishe, pabha ashinkukola indu yaigwinji. **23** A Yesu gubhalolile akuno na kukuno, gubhaalugulilenje bhaajiganywa bhabho, “Shiibhe ukomu kwa matajili kujinjila mu Upalume gwa a Nnungu.” **24** Bhaajiganywa gubhakanganigwenje kwa malobhe gabho. A Yesu gubhaajangwilenje kabhili, “Ashibhanangu nnolanje, shiishite komala kwa akulupalila mali, kujinjila mu Upalume gwa a Nnungu! **25** Ikakomala ngamia kupeleta pa lilanga lya ingano, kupunda akwete indu kujinjila mu Upalume gwa a Nnungu.” **26** Bhaajiganywa bhabho gubhapundilenje kukanganigwa nigubhabhalanjilenenje, “Bhai, igala gani shakombole kutapulwa?” **27** A Yesu gubhaalolilenje, nigubhashite, “Kubhandu ikakomboleka, ikabheje kwa a Nnungu nngabha nneyo, pabha kwa a Nnungu yowe inakomboleka.” **28** A Petili gubhashite, “Nnole, uwe tushileka yowe nikunkagula mmwe.” **29** A Yesu gubhashite, “Kweli ngunakummalianjilanga, jwakwa mundu jojowe aleshile nyumba, eu ashawakwe, eu ashalumbugwe, eu akwabhe, eu ainagwe, eu bhanagwe, eu migunda, kwa ligongo lyangu nne, na kwa ligongo lya Ngani ja Mmbone, **30** ikabhe agano malanga gano, shaposhole pa makumi kumi, nyumba, eu ashaapwakwe na ashaalumbugwe, eu akwabhe, eu bhanagwe na migunda, na mboteko, na malanga gakwiyago, gumi gwa pitipiti. (aiōn)

g165, aiōnios g166 31 Ikabheje, bhabhagwinji bhalingi bhantai, shibhabhanganje bha kumpelo, na bhalinginji bha kumpelo, shibhabhanganje bhantai.” 32 Bhai bhalinginji mumpanda, kujomboka kwenda ku Yelushalemu a Yesu gubhaalongoelenje, bhaajiganywa bhabho gubhakanganigwenje, na bhakagulangaga bhala gubhajogopenje. A Yesu gubhaatolilenje bhaajiganywa bhabho kuntemela, gubhatandwibhe kwaalugulilanga, gapinga kwaakoposhela, 33 bhalinkuti, “Mpilikananje, tunakwenda ku Yelushalemu, kweneko nne Mwana juka Mundu ngupinga tendebhukwa, nikamuywa ku bhakulungwanji bhaabhishila na bhaajiganya bha shalia, bhalabhonji shibhang'ukumulanje mulagwe, na shibhangamuyanje kubhandu bha ilambo ina, 34 bhalabhonji shibhanyegayanje, ning'unilanga mata na ngomanga na mishapilo, nimulaga na lyubha lya tatu shinyushe.” 35 A Yakobho na a Yowana bhana bha a Shebhedayo, bhashinkwaaajendelanga a Yesu gubhaalugulilenje, “Mmajiganya, tunakunnjuga ntutendele shindu shimo shitupinga kunnjuga.” 36 A Yesu gubhaabhushiyenje, “Nkupinganga nintendelanje nndi?” 37 Gubhaajangwilenje, “Ntubhishe tutame jumo kunkono gwenu gwa nnilo na junu kunkono gwenu gwa nshinda mu Ukonjelo gwenu.” 38 A Yesu gubhaalugulilenje, “Nkakushimanyanga shinkujuganga! Bhuli, shinkombolanje kuipililila malanga ga mboteko malinga shimbinga pitila nne, eu shinkombolanje kupitila malanga ga mboteko, malinga shingubinga pitila nne?” 39 Gubhaajangwilenje, “Shitukombole.” A Yesu gubhaalugulilenje, “Kweli shimwiipilililanje malanga ga mboteko gumbinga pitila nne, na shinkombolanje kupitila malanga ga mboteko, malinga shingubinga pitila nne. 40 Ikabheje gani shatame nkono nnilo eu kunkono nshinda,

nngabha gangu nne, ikabhe shibhapegwanje bhapanjilwenje na a Nnungu bhala.” **41** Bhaajiganywa bhana bhakapilikankanjeje genego, gubhashimilwenje na a Yakobho na a Yowana **42** Kwa nneyo a Yesu gubhaashemilenje, gubhaalugulilenje “Mmumanyinji kuti, bhene bhaganishiwanga kuti bhaatagwala bha bhandu bha ilambo ina, bhanakwaatagwalanga bhandu kwa mashili, na bhakulungwa bhabhonji bhanakwashishilishiyanga kukunda ukulungwa gwabhonji. **43** Ikabheje ikabha nneyo kwa mmanganyanji, apingabha jwankulungwa munkumbi gwenunji, shabhe ntumishi jwenunji. **44** Apingabha kalongolele munkumbi gwenunji, shabhe ntumwa jwa bhowe. **45** Pabha nne Mwana juka Mundu nangaika kuutumishilwa, ikabhe kutumishila na shoya gumi gwangu kwa ligongo lya kwaagombolanga bhandu bhabhagwinji.” **46** Bhai, gubhaikengenje ku Yeliko, nabhalabho a Yesu na bhaajiganywa bhabho pubhashokanganaga shene shilambosho na lugwinjili lwa bhandu, a Bhatimayo anangalole bhaajuga, bhanabhabho a Timayo, bhashinkutama nnyenje mpanda. **47** Bhakapilikaneje kuti a Yesu Bhanashaleti bhanapita penepo, gubhatandwibhe kuutiya lilobhe bhalinkuti, “A Yesu, Mwana jwa a Daudi, mmonele shiya!” **48** Bhandu bhabhagwinji gubhaakalipilenje, nkupinga bhapumule, ikabheje gubhapundile kuutiya lilobhe “Mwana jwa a Daudi monela shiya!” **49** A Yesu gubhajimi gubhashite, “Mwaashemanje” Bhai, gubhaashemilenje anangalole bhala, gubhaalugulilenje “Mwilume ntima! Nnjinushe bhanakunshema.” **50** Nabhalabho gubhajaile nkogo gula, gubhaumbile, gubhaajendele a Yesu. **51** A Yesu gubhaabhushiye, “Nkupinga nintendele nndi?” Anangalole bhala gubhaajangwile, “Mmajiganya ngunapinga nole.” **52** A Yesu gubhaalugulile, “Nnjabhule, ngulupai jenu jinnammiye.

Shangupe gubhatandwibhe kulola kabhili, gubaakagwile a
Yesu mumpanda."

11 Bhai, bhalinginji tome na ika ku Yelushalemu,
gubhaikengenenje ku Bhetipage na ku Bhetania tome na
shitumbi sha mikongo jishemwa Misheituni. Gubhaatumilenje
bhaajiganywa bhabho bhabhili, 2 gubhaluguliljenje,
“Nnjendangane kushijiji shili mmujo jenunji, pushinnjinjilanje
mwenemo, shimung’imananje mwana mbunda atabhiliwe,
akanabhe jigala mundu. Munngopolanje nkanjiye najonji.
3 Monaga mundu amuyangaga, ‘Pakuti nnatendanga
nneyo?’ Munnugulilanje ‘Bhakulungwa bhanakummpinga na
shibhamujenajo shangupe.’” 4 Bhai, gubhapitengenenje,
gubhang’imenenje mwana mbunda atabhiliwe pa nnango
gwa nyumba, nnyenje mpanda njindo, pubhanngopolangaga,
5 bhandu bhananji bhajimingenenje tome na penepo
gubhaabhushiyenje, “Kwa nndi nnakungopolanga mwana
mbundajo?” 6 Gubhaajangwilenje malinga shibhalajilwenje
na a Yesu, nabhalabhonji gubhaaleshilenje bhajabhulanje.
7 Gubaapeleshelenje a Yesu mwana mbunda jula.
Gubhatandikenje nngubho pantundu jakwe na gubhaakweshienje
a Yesu. 8 Bhandu bhabhagwinji gubhatandikenje nngubho
yabhonji mumpanda, na bhananji gubhatandikenje maagala
gubhatemilenje mmigunda. 9 Bhandu bhowe bhalongolelenje
na bhakagulangaga nnyuma, gubhautienje lilobhe bhalinkutinji,
“Bhainiywe! Bhapshele mboka bhakwiya kwa lina lya
Bhakulungwa! 10 Ushipewa mboka Upalume ukwiya, gwa
ainabhetu a Daudi. Bhainiywe a Nnungu kunani kaje kunnungu!”
11 A Yesu gubhajinjile kunjini ku Yelushalemu gubhapelelengeny
kwenda ku liekalu, gubhalolile indu yowe mowe. Pabha

yashinkubha ligulo, gubhabhujile ku Bhetania na bhaajiganywa bhabho likumi limo na bhabhili bhala. **12** Malabhi gakwe bhalinkushokangana ku Bhetania, a Yeshu gushaapoteshe shibhanga. **13** Bhai, gubhagubhweni nkongo ntini kwa taliya uli na maamba. Gubhagujendele nkuganishiya pana shibhakaiimane iepo. Bhakaisheje gubhagaimene maambape, pabha nngabha miongwe ja ogoya iepo. **14** A Yeshu gubhaulugulile ntini gula, "Tandubhila lelo na mobha gowe, mundu akalya iepo yako." Na bhaajiganywa bhabho gubhapilikenenje malobhe gubhabhelekete. (aiōn g165) **15** Bhai, gubhaikengenenje ku Yelushalemu. A Yeshu gubhapite ku Liekalu, gubhatandwibhe kwabhinganjilanga palanga, bhandunji bhaushangaga na uma indu mwenemo. Gubhapindikwile mesha ya bhatindiganya mmbiya, na itengu ya bhausha ngunda. **16** Na wala bhanganneshelela mundu jojowe, kujinjiya wala kopoya shindu ku Liekalu. **17** Kungai gubhaajigenyenje bhalinkuti, "Ishijandikwa Mmajandiko ga Ukonjelo kuti, 'Nyumba jangu shijishemwe nyumba ja jujila kwa bhandu bhowe!' Ikabheje mmanganya nshikujitendebhuyanga nibha lishembo lya kwiya bhagwii!" **18** Bhakulungwanji bhaabhisila, na bhaajiganya bha Shalia, bhakapilikananjeje genego, gubhatandwibenje loleya shanabhuli pushibhaabhlaganje. Ikabheje bhashinkujogopanga, pabha lugwinjili lwa bhandu Iwatendaga kanganigwa, kwa majiganyo gabho. **19** Likaisheje ligulo, a Yeshu na bhaajiganywa bhabho gubhashoshilenje pa nnjini pala. **20** Pa lyamba lyakwe bhalipitangana, gubhagubhweninji nkongo ntini gula gujumwile gowe kuumila kumbubhu. **21** A Petili gubhakumbushile, gubhaalugulile a Yeshu, "Mmajiganya, nnole! Ntini gumuuloshile gula, gujumwile!" **22** A Yeshu

gubhaalugulile, "Nnapinjikwanga mwakulupalilanje a Nnungu.

23 Kweli ngunakunnugulilanga, mundu ashilugulilaga ashi shitumbishi, 'Tutumbuka ukaileshele mmashi,' akuno akakola lipamba muntima gwakwe, ikabhe alikulupalila kuti yowe yabheleketayo inatendeka, shatendelwe shene shindusho. **24** Kwa nneyo ngunakunnugulilanga, punkujuganga shindu kwa a Nnungu, nkulupalilanje kuti mpegwilwenje na shimpeganje. **25** Punkujuganga Nnungu, munneshelelanje jojowe annebhilenje, nkupinga Ainabhenunji bhalu kunnungu, bhanneshelelanje yambi yenunji." **26** "Ikabheje nkaaleshelanje ajenunji, nkali Ainabhenunji bha kunnungu, bhaknneshelelanga yambi yenunji."

27 Gubhaikengenenje kabhili ku Yelushalemu, bhai pubhapitilaga kuliekalu, bhakulungwanji bhaabhisila, na bhaajiganya bha Shalia ya Musha, na bhanangulungwa gubhaajendelenje a Yesu,

28 Gubhaabhushiyenje, "Nnatenda genega kwa ukulungwa gwashi? Na gani ampele gwene ukulungwa gwa tenda yene indui?" **29** A Yesu gubhaalugulilene, "Shinimmuyanje oti, nnyangulangaga, numbe nne shininnugulilanje ngunatenda yenei kwa ukulungwa gwashi. **30** Mashili ga ubhatisho gwa a Yowana kugakopweshe kunnungu eu kubhandu?" **31** Gubhatandwibhenje kubhuyana ashaayenenji bhalinkutinji, "Tulugulaga kuti kugakopweshe kunnungu, shibhatubhuye pakuti mwangaakulupalilanga? **32** Na tulugulaga kuti kugakopweshe ku bhandu, ntape." Bhangajangulanga nneyo, nkwaajogopanga bhandu, pabha bhowe bhakulupalilene kuti, a Yowana pubhaliji kweli ankulondola bha a Nnungu. **33** Bhai, gubhaajangwilenje a Yesu, "Tukakukumanya." Na bhalabho a Yesu gubhaalugulilene, "Na nne ngannugulilanga ngunatenda genega kwa mashili gashi."

12 Bhai, a Yeshu gubhatandwibhe bheleketa nabhonji kwa ndango. "Bhandu bhamo bhashinkulima nngunda gwa mishabhibhu. Gubhashenjele ubhigo, gubhaolile liimbo lya minyila shabhibhu, nishenga na nnala. Gubhaapelenje ngunda gula bhaalimanga, nkupinga bhalipilanje, gubhapite mmwanja.

2 Miongwe ja maneng'eno jikaishileje, gubhantumile ntumwa jwabho kubhaalima, akatole shabhibhu ya mauno gabho.

3 Bhai bhaalimanga bhala gubhankamwilenje ntumwa jula, gubhankomilenje, nigubhamminjilenje gwangali shindu. **4** Bhayene nngunda gubhantumile kabhili ntumwa juna, nkali jwenejo gubhanng'uleyenje muntwe, gubhampentekuyenje. **5** Gubhantumile juna, naka jwenejo gubhammulegenje. Bhayene nngunda gubhaatumilenje bhananji bhabhagwinji, bhana bhashinkwaakomanga na bhananji gubhaabhulegenje. **6** Bhai gwalepeshe jumope, mwanagwabho jwa jika jubhammpingaga. Kungai gubhantumile jwenejo bhalinkuti, 'Shibhannjogopanje mwanangu.' **7** Ikabheje bhaalimanga bhala, gubhabhalanjilenenje kuti, 'Jweneju apinga tola ulishi, bhai tummulaje nkupinga ulishigo, ubhe gwetu!' **8** Bhai gubhankamwilenje, nikummulaga, gubhannjailenje kunyenje nngunda gwa mishabhibhu gula."

9 "Bhai bhayene ngunda shibhatende nddi? Shihaishe nikwabkulaganga bhaalimanga bhala, na nngunda gula nikwapanganga bhandu bhana. **10** Bhuli nkanabheshomanga yenei Mmajandiko ga Ukonjelo? Kuti, 'Liganga libhalikanilenje bhaashenganga, Nnaino lishibha liganga likulu lya pa ndumba.

11 Lyeneli bhatendile Bhakulungwa, Na kunngwetu uwe lya lapa." **12** Bhai bhakulungwanji bhaabhisila, gubhapinjilenje kwaakamula, pabha bhamumanyinji kuti Iwene lutangolo, Iwaalugulangaga bhalabhonji. Ikabheje gubhajogopenje lugwinjili

Iwa bhandu. Bhai gubhaaleshilenje, gubhajabhlengene. **13**
Bhai, Mapalishayo bhananji na bhandunji bha a Elode,
gubhatumilwenje bhakaateganje a Yeshu, kwa malobhe
gabho. **14** Bhakaikangananje gubhaalugulilenje, "Mmajiganya,
tumumanyi kuti mmwe mmanguja, na gunkubheleketa ga
kweli, na mmangali luagu, ikabhe nnajiganya ya kweli, ya
mpanda gwa a Nnungu. Bhuli, ilipinjikwa kulipa koli kwa a
Kaishali eu nng'oo? Twaape koli eu tunape." **15** Ikabheje a
Yeshu bhagumanyi ugulumba gwabhonji, gubhaalugulilenje
"Pakuti nnanininganga? Mmbanganjeti dinalijo nijilole." **16**
Gubhaapelenje. Bhai gubhaabhushiyenje, "Jene pishaji na
majandikoga, gakeni?" Gubhajangwilenje, "Ga a Kaishali." **17**
Bhai a Yeshu gubhaalugulilenje, "Ya a Kaishali, mwaapanganje
a Kaishali, na ya a Nnungu, mwaapanganje a Nnungu." Bhai,
gubhakanganigwenje kwa kaje kwa shene shijangulosh. **18**
Bhai Mashadukayo bhalugulanga kuti kwakwapi kuyuka kwa
bhandunji, gubhaajendelenje a Yeshu, nikwabhuva bhalinkutinji,
19 "Mmajiganya, Mmalajilo ga a Musha, bhashikutujandishila
nnei, 'Mundu awaga nikunneka nkagwe gwangali kolela mwana,
mpwakwe antole jwene nshitengajo, ankolele mwana nkulugwe.'
20 Bhai bhashinkupagwanga bhanabhalume shabha, bha likaja
limo. Jwankulu gwalombile, gwawile gwangali kukolela mwana.
21 Jwabhili gwantolile na jwalakwe gwawile gwangali kukolela
mwana, nneyo peyo nkali jwa tatu. **22** Bhai bhanaabhowe shabha,
gubhawilenje gwangali kuleka mwana. Bhai kungai bhakongwe
nabhalabho gubhawile. **23** Bhai lyubha lya yuka, bhakongwe bhala
shibhabhe bhakeni? Pabha bhowe shabha bhaalombilenje." **24**
A Yeshu gubaajangwilenje, "Bhuli mmanganyanji nnaobhang,
kwa ligongo lya nngagamanya majandiko ga Ukonjelo, na wala

mashili ga a Nnungu. **25** Pabha pushibhayukanje bhandu bhowe, kukapagwa kulomba wala kulombwa, ikabhe shibhabhanganje malinga ashimalaika bha kunnungu. **26** Na ga yuka bhawilenje, mwangashomanga nshitabhu sha a Musha, majandiko gataya ga shitekete shakolelaga moto shila? A Nnungu pubhaabhalanjile a Musha kuti, 'Nne a Nnungu bha a Bhulaimu na a Ishaka na a Yakobho.' **27** Kwa nneyo bhenebho nngabha a Nnungu bha bhawilenje, ikabhe a Nnungu bha bhakotonji. Bhai mmanganya nnaobhanga kwa kaje." **28** Bhai bhaajiganya bhamo bha shalia, bhaapali pubhataukanganaga a Yeshu na ashimashadukayo, gubhamanyi kuti a Yeshu bhashijangula ukoto, kwanneyo gubhaabhushiyi a Yeshu, "Jei amuli jili jikulungwa kupunda yowe?" **29** A Yeshu gubhaajangwile, "Jikulungwa ni ajino, 'Upilikane ugwe Ishilaeli! Bhakulungwa a Nnungu bhetu, ni Bhakulungwa bhamope. **30** Kwa nneyo Mwaapinje Bhakulungwa a Nnungu bhenu, kwa ntima gwenu gowe, na kwa mbumu yenu yowe, na kwa lunda lwenu lowe, na kwa mashili genu gowe.' **31** Na jabhili jakwe, ni ajino, 'Mumpinje ntami nnjenu malinga shinkwiipinga mmayene.' Jakwa amuli jina jikulungwa kupunda yenei." **32** Bhai bhaajiganya bha Shalia ya a Musha bhala gubhashite, "Mmaajiganya, penepo mmelekete ukoto, kuti a Nnungu bhamope, bhakwa bhana ikabhe bhenebho pebho. **33** Kwa nneyo, inapnjikwa kwaapinga bhenebho, kwa ntima gowe, na kwa lunda lowe, na kwa mashili gowe, na kumpinga ntami nnjenu, malinga shinkwipinga mmayene. Pabha lyeneli ni lya mmbone kupunda kwaapa a Nnungu indu ya mbepei ya tiniya na indu yowe ya bhishila." **34** A Yeshu bhakabhoneje kuti bhene bhandubho bhashijangula kwa lunda, gubaalugulile, "Mmwe, mwangataliya na Upalume gwa a Nnungu." Bhai tandubhila

penepo, jwakwa mundu alinjile kabhili, kwaabhu ya shindu. **35** Bhai a Yeshu bhali nkujiganya ku Likanisha, gubhabhushiye, “Pakuti bhaajiganya bha Shalia bhakutinji, a Kilishitu Bhana bhabho a Daudi? **36** Na a Daudi bhayene, bhakagumbayweje na mbumu jwa ukonjelo gubhashite, ‘Bhakulungwa, bhashinkwalugulila Bhakulungwa bhangu. Ntame nkono gwangu gwa kunnilo, Mpaka pushinaabhikanje ashaamagongo ajenu, pa libhatila makongono genu.’ **37** “A Daudi bhayene bhanakwashema a Kilishitu Bhakulungwa. Bhai ikomboleka bhuli, a Kilishitu kubha bhana bhabho?” Na bhandu bhabhagwinji, bhatendaga kwaapilikanishiyanga kwa nonyelwa. **38** A Yeshu mmajiganyo gabho gubhashite, “Mwiteiganje na bhaajiganya bha shalia, bhapita timbililanga mmashoko, bhali bhawetenje kanshu yabhonji yaileu, nkupinga bhakomaywanje kwa ishma na bhandunji, **39** bhatamangana mwitengu ya mmujo, ya nshinagogi na nkalamu. **40** Bhanapokonyolanga indu ya bhanabhabkongwe bhashitenga, akuno bhalikwitembanga kujuga kwa malobhe gamagwinji! Bhenebho shibhajiye ukumulwanga kwa mboteko ya kaje.” **41** Bhai a Yeshu bhashinkutama tome na shibhiko sha ekalu. Bhatenda kwaalolesheyanga bhandunji, pubhatagangaga mmbiya nshibhiko. Matajili bhabhagwinji gubhatajilenje mmbiya yaigwinji. **42** Bhai gubhaishe bhakongwe bhamo bhashitenga bhalaga, gubhatajile shilingi ibhili. **43** Penepo a Yeshu gubhaashemilenje bhaajiganywa bhabho, gubhaalugulilenje, “Kweli ngunakummalanjilanga, bhakongwe bhashitenga bhaalagabha, bhashitaga kupunda bhananji bhowe nshibhiko sha Likanisha. **44** Pabha bhananji bhowe ibhatajilenje ipundile ya indu yabhonji, ikabheje bhakongwebha, nkali nkulaga

kwabhomo, bhashitaga yowe ibhakwete, bhashitaga nkali
ibhakulupalilaga."

13 Bhai a Yeshu pubhakopokaga ku Likanisha, bhaajiganya
bhabho bhamo gubhaalugulile, "Mmaajiganya, nnole oti gene
magangaga shigashitebha gamakulungwa, na majumbaga
shigashitebha gamakulungwa!" **2** A Yeshu gubhaajangwile, "Kwali
nnikugabhona gene majumba shigashitebha gamakulungwa?
Lyakwa liganga shililepeshe pantundu liganga lina,
linabhomolwe." **3** Na a Yeshu pubhaatemi ku shitumbi sha
Misheituni, kuloya ku Likanisha, a Petili na a Yakobho na a Yowana
na a Ndeleya gubhaabhushiyenje kujika, **4** "Ntubhalanjile, genega
pushigakoposhele shakani? Na gabhandishilaga kukoposhela,
shilangulo shakwe shishibhe nndi?" **5** A Yeshu gubhatandwibhe
kwabhaalanjilanga, "Mwiiteiganje, mundu anantembanje.
6 Pabha bhandunji bhabhagwinji shibhaikangananje kwa
lina lyangu, bhalikwitayanga kuti bhenebho ni nne!
Nabhalabhonji shibhaobhyanje bhandu bhabhagwinjinji. **7** Bhai
pushimpilikananje ngani ja ngondo na ntenga kopoka kungondo,
nnajogopanje pabha genego ganapinjikwa gakoposheleti.
Ikabheje mpelo uyene ukaika shangu. **8** Pabha shilambo
shimo shishikomane na shilambo shina na upalume gumo
shigukomane na upalume guna, shigapagwe maungumilo
ga litaka muilambo na shishikoposhele shibhanga shapunda.
Genego shigabhe malinga kutandubha kupoteka kwa
shitumbo nkwigopola mwana. **9** "Ikabheje mmanganyanji
mwiteiganje. Pabha shibhankamulanje kumpelekanga nngumbi
ya bhanangulungwa bha nnyumba ya jujila Nnunu
nikunkomanga. Numbe shimpelekwanje kubhakulungwanji
ga ligongo lyangu nne, nkupinga ubhe ukong'ondelo

gwabhonji. **10** Ikabheje shikulongolele oti kulunguywa kwa Ngani ja Mbone kubhandu bhowe, mpelo gula ukanabheika.

11 Kwa nneyo pushibhankamulanje nikunshitakiyanga, nnaganishiyanjeti ga bheleketa, ikabheje mmeleketanje lilibhe lyolyowe shilinjiilanje malanga gogo pego, pabha nngabha mmanganyanji shimmelleketanje, ikabhe Mbumu jwa Ukonjelo.

12 Pabha jwannung'una shantendebhushe nkulugwe abhulagwe, ainamundu shibhantendebhushe mwanagwabho, nkali bhana shibhaatendebukanje bhaakwetenje kuinga bhabhulagwanje.

13 Bhandu bhowe shibhanshimanje ligongo lya lina lyangu. Ikabheje shaipililile mpaka kumpelo, jwenejo nishatapulwe."

14 Bhai mundu ashoma shene shitabhu shino, anapinjikwa apilikanishiye ukoto malombolelo ge malobhe gakwiyago. A Yesu gubhapundile bheleketa, "Penepo shinshibhonanje shindu shibhabhelenje a Daniel a nkulondola bha a Nnungu ga shindu sha nnjimwa ja shonanga, shijimi pakapinjikwa, bhai, bhalinginji ku Yudea bhabhutushilanje mwitumbi. **15** Ali pasitubhili anatulushe pai, nijinjila nnyumba kutola nngubho yakwe. **16** Najwalakwe ali kunngunda anabhuje nnyuma kutola indu yakwe. **17** Ikabheje mboteko yabonji bhanabhakongwe bhakwetenje ndumbo na bhaajonjeyanga gene mobhago! **18** Ikabheje njuganje genego ganakoposhele mobha ga shipwepwe. **19** Pabha gene mobhago shipinga koposhela shilaje shikulungwa, shikanabhe koposhela tandubhila kupanganywa kwa shilambolyo mpaka nnaino na wala shikakoposhela kabhili. **20** Kaliji Bhakulungwa bhakanaupikaye gwinji gwa gene mobhago, jwakwa mundu akatapwilwe. Ikabheje kwa ligongo lya bhaagwilwenje, bhashikugapunguya gene mobhago. **21** "Penepo mundu alugulaga, 'Nhole, a Kilishitu kubhali akuno' eu 'Kubhali akula,' nnakulupalilanje.

22 Pabha shibhakoposhelanje ashi kilishitu bha unami, na ashinkulondola bha unami, shibhatendanje ilangulo na ilapo, nkupinga itendekaga bhaapuganyanje nkali bhaagwilwenjwe bha a Nnungu. **23** Ikabheje mmanganyanje mwiteiganje. Pabha nimmalanjilenje gowe gakanabhe koposhela. **24** "Bhai gene mobhago shipitaga shilajesho, lyubha shilitajwe lubhindu na lwei lukalangaya. **25** Ndondwa shiigwe, na mashili ga kuliunde shigatenganyishe. **26** Penepo shibhamonanje Mwana juka Mundu ngulikwiya, kukoposhela kuliunde na mashili gamagwinji na Ukonjelo. **27** Penepo shinaatumanje ashimalaika bha a Nnungu, pita kwatolanga bhaagwilwenje, kopoka mmbali nsheshe ya shilambolyo, kukoposhela mpelo gumo gwa shilambolyo mpaka mpelo gwa liunde. **28** "Mwijiganyanje kwa lutango lwa ntini, ljambi lwake puluipuya maamba gaambi, nnakumumanyanga kuti shuku shibhandishile. **29** Nneyo peyo na mmanganyanje, pushingabbonanje genego galikoposhela, mmumanyanje kuti nne Mwana juka Mundu puni pannango. **30** Kweli ngunakummalanjilanga, alu lubhelekolu lukamala, gakanabhe koposhela gene gowega. **31** Kunnungu na shilambolyo shiipite, ikabheje malobhe gangu gakapita. **32** "Ikabheje ga lyene lyubhalyo na malanga gakwe jwakwa mundu akugamanya, nkali ashimalaika bha kunnungu, wala Mwana, ikabhe Atati jikape. **33** Mwiteiganje na sheya, pabha nkakugamanyanga malanga pushigakoposhele genego. **34** Pushiibhe malinga mundu ajabhula mwanja, akuno alikwaaleshelanga bhatumwa bhakwe kila mundu na liengo lyakwe, nikunnajila nkulinda asheye. **35** Bhai nsheyanye nnijuga Nnungu, pabha nkakumumanyanga shakani pushibhabhuje bhayene nyumba, monaga shiibhe ligulo, eu pakati shilo, eu malanga ga kongobhela lipongo, eu

lyamba, **36** ibhaga shibhaishe kwaimushila, bhanang'imananje nngonilenje. **37** Lyene lingummalanjilanga mmanganyanji, ngunakwabhaalanjilanga bhowe. Nsheyanje!"

14 Gali galepeshe mobha gabhilipe kuishila lyubha lya Shikukuu ja Pashaka na Shikukuu ja Mikate Jangatagwa Nguledile. Bhakulungwanji bhaabhishe na bhaajiganya bha Shalia ya a Musha gubhaloleyenje shiumilo sha unami sha kwaakamulila a Yeshu bhaabkulaganje. **2** Ikabheje gubhashitenje, "Tunaakamule lyubha lya shikukuu, inakoposhela nnjasha." **3** Bhai a Yeshu bhali ku Bhetania, kungwabho a Shimoni bhalwalile mangundula, bhali bhatemi nkulya, gubhaishe bhakongwe bhamo bhajigele shupa sha mauta ga nunjila ga nado, shialeywe kwa liganga lya alabhashita, gubhakaille shupa shila, nikwakushulila a Yeshu mauta ga nunjila gala muntwe. **4** Bhandunji bhana bhalinginji pepala guyaashimilenje, gubhabhalanjilenje, "Kwa nndi bhanajonanga mautaga? **5** Gakaushiywe, nipata mmbiya ya mbuti nshaala gwa shaka shimo uka mundu, nikwapanganga bhaalaga!" Gubaakalipilenje bhakongwe bhala. **6** Ikabheje a Yeshu gubhaaluguiljenje, "Mwaalekanje, kwa nndi nnakwaabuyanga? Shibhandendeleshi shammbone. **7** Pabha bhalaga nnatama nabhonji mobha gowe, mpingangaga kwa malanga gogowe, shimwaatendelanje ya mmbone. Ikabheje nne ngatama na mmanganyanji mobha gowe. **8** Bhenebha bhashitenda shibhakombwele, bhashimbakaya mauta shiilu shangu kwa ligongo lya shikwa. **9** Kweli ngunakummalanjilanga kuti, popowe pashilambolyo pushibhalunguyanje Ngani Jambone, lyene libhatendile bhene bhakongwebha, shilitaywe nkwaakumbushila." **10** Kungai a Yuda Ishikaliote, bhamo bha munkumbi gwa bhaajiganywa likumi limo

na bhabhili bhala, gubhapite ku bhakulungwanji bhaabhisila nkupinga kwaatendebhuka a Yeshu. **11** Bhakulungwanji bhaabhisila bhakapilikananjeje genego, guyaanonyelenje, gubhakundilenje kwapa mmbiya. Bhai a Yuda gubhaloleye malanga gammbone ga kwaatendebhuka a Yeshu. **12** Lyubha lya tandubha Shikukuu ja Mikate Jangatagwa Ngedule, malanga ga ingwa mwana ngondolo jwa Pashaka, bhaajiganywa bhabho gubhaabhushiyenje, "Kunkupinga lila kwei shalya sha Pashaka tukakolokoye?" **13** Bhai a Yeshu gubhaatumilenje bhaajiganywa bhabho bhabhili, bhalikwalugulilanga, "Njendangananje kunjini, kweneko shing'imananje na bhandu bhamo bhajigele lulo lwa mashi, mwaakagulanje, **14** mpaka nyumba jishibhajinjile, mwenemo nkaabhalanjilanje bhayene nyumba cuti, 'Bhaajiganya bhanabuya, jili kwei kati jajikulungwa ja bhajeninji, pushindame nne na bhaajiganywa bhangu nkulya Pashaka?' **15** Nabhalabho shibhannanguanje kati jajikulungwa kunani jibhishilwe ukoto. Mwenemo nkolokoyanje shalya shetu." **16** Bhai bhaajiganywa bhala gubhapitengenje kunjini, gubhakongenenje gowe malinga shibhabhalanjilwenje na a Yeshu. Gubhakolokoyenje shalya sha Pashaka. **17** Bhai likaisheje ligulo, gubhaikengenenje a Yeshu na bhaajiganywa bhabho likumi limo na bhabhili. **18** Na bhalabhonji bhalinginji bhalilyanganga, a Yeshu gubhashite, "Kweli ngunakunnugulilanga, jumo jwenunji alya na nne, shandendebhushe." **19** Penepo bhaajiganywa bhala gubhatandwibhenje kuinjika, jumo jumo gubhaabhushiyenje a Yeshu, "Bhuli nne?" **20** A Yeshu gubhaalugulilenje, "Jumo munkumbi gwenunji mmanganya, likumi limo na bhabhili, jwene apamba munkungu na nne. **21** Pabha nne Mwana juka Mundu shiniiwile malinga shinyandishilwe

Mmajandiko ga Ukonjelo, ikabheje mboteko yakwe, jwene mundu apinga ndendebhuka nne Mwana juka Mundu. Kaliji mbaya akanabhelekwe jwene mundujo.” **22** Nabhalabhonji pubhalinginji nkulya, a Yesu gubhatolile nkate, gubhatendile ej a kwa a Nnungu, gubhagebhenye nikwaapanganga bhaajiganywa bhabho bhalinkuti, “Ntolanje, sheshino shiilu shangu.” **23** Kungai gubhatolile nngabho, gubhatendile ej a kwa a Nnungu, gubhaapelenje bhowe, gubhalepeyenjenje. **24** Gubhaalugulilenje, “Jejino minyai jangu, jikong'ondela malagano, jjitika kwa ligongo lya bhandu bhaleshelewanje yambi yabhonji na a Nnungu. **25** Kweli ngunakummalianjilanga, ngapapila kabhili divai ja shabbihbu mpaka lyubha pushimbapile divai jaambi mu Upalume gwa a Nnungu.” **26** Bhakajimbanjeje Iwimbo, nigubhajabhlengenenje kwenda kushitumbi sha Misheituni. **27** A Yesu gubhaalugulilenje bhaajiganywa bhabho, “Mmowe shinngananje nineka. Pabha ishijandikwa Mmajandiko ga Ukonjelo ‘Shininkome nkushunga, na ngondolo shiipwilingane.’” **28** Ikabheje nyuywaga, shininnongolelanje kwenda ku Galilaya.” **29** A Petili gubhaalugulile, “Nkali bhowe bhannekangaga, nne nganneka!” **30** A Yesu gubhaajangwile a Petili, “Kweli ngunakummalianjila, shilo sha lelo, lipongo likanabhe kongobhela pabhili, shinngane patatu.” **31** Ikabheje a Petili gubhapundile bheleketa, “Nkali ipinjikwaga kuwa na mmwe, ngu, nganneka.” Bhaajiganywa bhowe gubhabheleketenje nneyo peyo. **32** Bhai gubhaikengenenje kushitalu shishemwa Getishemane. Na a Yesu gubhaalugulilenje bhaajiganywa bhabho, “Ntamangananje apano, nne nguli juga Nnungu.” **33** Kungai gubhaatolile a Petili na a Yakobho na a Yowana, a Yesu gubhatandwibhe kuinjika na tenguka kaje. **34** Gubhaalugulilenje bhaajiganywa

bhala, "Ntima gwangu unainjika tome nawa. Ntamangananje apano nsheyanje." **35** Gubhapite mmujo kashoko, gubhagwile, gubhajujile bhalinkuti, "Ibhaga inakomboleka, bhai malanga ga mbotekoga gang'embushe." **36** Gubhashite, "Atati, kwenu mmwe yowe inakomboleka. Mpingaga, nng'embuye na gene malanga ga mbotekoga, ikabheje nngabha malinga shingupinga nne, ikabhe malinga shinkupinga mmwe." **37** Bhai gubhabhujile, gubhaakongenenje bhagonilenje lugono. Gubhaabhushiye a Petili, "Bhuli a Shimon! Nshigona? Mwangakombola kusheya kapela lishaa limo?" **38** Kungai gubhaaluguliljenje, "Nsheyanje nnijuganga, nkupinga nnajinjilangane mmalinjilo. Ntima ulipinga, ikabheje shiilu shangali mashili." **39** Gubhapite juga kabhili bhalibhujila malobhe gala pegala. **40** Kungai gubhabhujile kabhili, gubhaaimenenje bhaajiganywa bhagonilenje, pabha meyo gabhonji gashinkutopelwa na lugono, wala bhangakombolanga kwaajangula. **41** Bhakaashilanjeje gwatatu, gubhaaluguliljenje, "Launo nnagonanga na pumulila? Nnaino itogolele! Malanga gaishe, nne Mwana juka Mundu kukamuywa mmakon ga bhandu bhakwetenje yambi. **42** Nnjumukanje, tujabhule, nnolanje andendebhuka jula abhandishile." **43** Bhai a Yesu pubhaliji nkubheleketa genego, shangupe gubhaishe a Yuda bhaaliji munkumbi gwa bhaajiganywa likumi limo na bhabhili bhala, bhalo bhalongene na likundi lya bhandunji bhajigelenje mapanga na ndonga, bhalikoposhelanga ku bhakulungwanji bhaabhisila na bhaajiganya bha Shalia ya a Musha na bhanangulungwa. **44** Bhene bhaatendebhwishe a Yesu, bhashinkwaapanganga bhandunji bhala shilangulo, bhalinkuti, "Bhene bhushinaajambatebho, mwaakamulanje mwaabhiikanje muulinda." **45** Bhai shangupe a Yuda gubhaishe, gubhaajendele

a Yeshu, gubhashite, "Mmajiganya!" Nigubhaajambete. **46** Bhai bhandunji bhala gubaakamwilenje a Yeshu nikwaatabha. **47** Jumo munkumbi gwa bhajimingene pamo na a Yeshu bhala, gwaolomwele upanga, gwaleshele nikunkata likutu ntumwa jwa Bhakulungwa Bhaabhisila. **48** A Yeshu gubaabhuhiyenje bhandunji bhala, "Nshinyilanga na mapanga na ndonga kungamula mbuti ngwii? **49** Mobha gowe punaliji na mmanganya kunyumba ja a Nnunu nilijiganya, mwangangamulanga. Ikabheje nnaino ganakoposhela genega nkupinga gamalile Majandiko ga Ukonjelo." **50** Penepo bhaajiganya bhowe gubhabhutukenje nikwaaleka a Yeshu. **51** Ashinkupagwa nshanda jumo abhakagulaga a Yeshu ali aiunishile nngubho jimope ja kitani, bhai gubhalinjilenje kunkamula. **52** Ikabheje gwaleshile nngubho jila, gwabhwutwishe makonope. **53** Bhai gubaapelekenje a Yeshu kubhakulungwanji bhaabhisila, kweneko gubhaimenenje bhakulungwanji bhaabhisila bhowe, na bhanangulungwa, na bhaajiganya bha Shalia ya a Musha. **54** A Petili gubaakagwile a Yeshu kwataliya, gubhajinjile nnugwani Iwa Bhakulungwa Bhaabhisila, gubhatemi pamo na bhalinda bhalijota moto. **55** Bhai bhakulungwanji bhaabhisila na bhalukumbi bhowe bha Lukumbi Lukulu Iwa Bhayaudi, gubhaloleyenje shiumilo sha kwa bhulajila a Yeshu. Ikabheje bhangashipatanga. **56** Bhandu bhabhagwinji gubhakong'ondelenje ya unami, ikabheje ukong'ondelo gwabhonji gwangalandana. **57** Na bhananji gubhakong'ondelenje ya unami bhalinkutinji, **58** "Twashinkwaapilikana bhenebha bhalinkuti, 'Nne shiomole Liekalu lishenjilwe na bhanduli, nishenga lina kwa mobha gatatu, nngabha na makono.'" **59** Ikabheje nkali nneyo, ukong'ondelo gwabhonji gwangalandana. **60** Bhai penepo

Bhakulungwa Bhaabhisila gubhajimi pakati pakati jabhonji
gubhaabhushiye a Yesu, bhalinkuti, "Bhuli, nkajangula shindu?
Bhandunjibha bhakunkong'ondelanga nndi?" **61** Ikabheje
bhenebho gubhatemi ilili, bhangajangula shindu. Bhakulungwa
Bhaabhisila gubhaabhushiye kabhili, "Bhuli mmwe ni a
Kilishitu, Bhana bhabho a Nnunu bha Ukonjelo?" **62** A
Yesu gubhajangwile, "Elo! Ni nne. Numbe shimmonanje nne
Mwana juka Mundu ndemi nkono nnilo gwa Bhakulungwa
bhakwete mashili, ngulikwiya mmaunde ga kunnungu." **63**
Penepo Bhakulungwa Bhaabhisila gubhapapwile nngubho
yabho, bhalinkuti, "Tupinjila nndi bhaakong'ondela bhana? **64**
Mpilikenenje matukano gabho! Bhai mmanganyanji nkutinji bhuli?"
Bhowe gubhapetenenje kuti, bhabhulagwe. **65** Bhai bhananji
gubhatandwibhenje kwaunilanga mata, gubhaaunishilenje
kumeyo, nikwaakomanga akuno bhalikwabuyanga, "Nnondole,
gani ankomile!" Na bhalinda gubaakomilenje mapapa. **66**
Bhai a Petili bhalii nnugwani mula, ntumishi jumo jwankongwe
jwa Bhakulungwa Bhaabhisila gwaishe, **67** akaabhoneje a
Petili bhalijota moto, gwabhalolile nigwashite, "Nkali mmwe,
pumwaaliji pamo na a Yesu Bhanashaleti." **68** Ikabheje a Petili
gubhakanile bhalinkuti, "Ngakushimanya shinkubheleketasho!"
Kungai a Petili gubhakopweshe palanga lugwani. Penepo
lipongo gwakongobhele. **69** Jwankongwe jula akaabhoneje a
Petili kabhili, gwabhalugulilenje bhandunji bhalinginji penepo,
"Bhene bhandubha, bha munkumbi gwabhonji." **70** A Petili
gubhakanile kabhili. Bhandunji bhatemingenenje pepala,
gubhaalugulilenje a Petili, "Nngabha unami, mmwe nkumbi
gumo, pabha mmwe mmandu bha ku Galilaya." **71** Ikabheje
a Petili gubhatandwibhe kulosha na lumbila, "Ngakwamanya

bhene bhandu bhunkwalugulangabha." **72** Penepo lipongo gwakongobhele gwabhili. Bhai a Petili gubhakumbushile malobhe gubhalugulilwe na a Yeshu kuti, "Lipongo likanabhe kongobhela pabhili, shinngane patatu." A Petili gubhatengwishe niguta.

15 Lyambape, bhakulungwanji bhaabhisila, na bha lukumbi bhowe bha Lukumbi Lukulu lwa Bhayaudi, na bhanangulungwa, na bhaajiganya bha Shalia ya a Musha, gubhapetenenje. Nigubaatabhilenje a Yeshu, gubhaapelekenje kwa a Pilato. **2** A Pilato gubhaabhushiye a Yeshu, "Bhuli mmwe A mpalume bha Bhayaudi?" A Yeshu gubhaajangwile, "Elo, malinga shinkubheleketa." **3** Bhakulungwanji bhaabhisila, gubhaashitakiyenje a Yeshu kwa indu yaigwinji. **4** A Pilato gubhaabhushiye a Yeshu kabhili, "Bhuli nkaajangula shindu? Nnole indu yaigwinji ibhakunnugulangai." **5** Ikabheje a Yeshu bhangajangula shindu kabhili, a Pilato gubhakanganigwe. **6** Mobha ga shikuuu, a Pilato bhashinkukola nkubho gwa kwaugulilanga bhandu nkutabhwa jumo, jubhakumpinganga. **7** Penepo ashinkupagwa nkutabhwa jumo, ashemwaga a Bhalabha, atabhilwe pamo na ajakwenji kwa ligongo lya nnjasha yabhuleje bhandu. **8** Lugwinjili lwa bhandu gulwaajendelenje a Pilato, nikwaajuga bhaatendelanje malinga nkubho gwabho. **9** A Pilato gubhaabhushiyenje, "Bhuli nnipinganga ninng'ugulilanje A mpalume bha Bhayaudi?" **10** Bhashinkubheleketa nneyo, pabha bhamumanyi kuti bhakulungwanji bhaabhisila, bhashikwaakamuyanga a Yeshu mmakono gabho, kwa ligongo lya lupimililo. **11** Ikabheje bhakulungwanji bhaabhisila gubhaakwishiyenje bhandunji kuti, bhaajunganje a Pilato mbaya bhaaugulilanje a Bhalabha. **12** A Pilato gubhaabhushiyenje kabhili, "Bhai nkupinganga naatende

nndi, bhene bhunkwaashemanga a mpalume bha Bhayaudi?" **13**
Bhandu bhowe gubhautiyenje lilobhe bhalinkutinji, "Mwaakomele
munshalabha!" **14** A Pilato gubhabhushiye, "Bhalebhile nndi?"
Ikabheje bhandunji bhala gubhautiyenje lilobhe, "Mwaabhambe
munshalabha!" **15** Bhai a Pilato nkupinga kulunonyeya
lugwinjili lwa bhandu lula, gubhaaugulilenje a Bhalabha.
Gubhalajile a Yeshu bhakomwe ibhoko, gubaakamwiyenje
bhaakomelanje munshalabha. **16** Nabhalabhonji bhalinda,
gubhaapelekenje a Yeshu nkati lugwani, ku ndamo ja a
mpalume kwashemwaga Plaitolio, gubaashemilenje likundi
lyowe lya bhalinda. **17** Gubhaawashiyenje a Yeshu lijoo lya
nnangali, gubhaeleyenje ingwa ja mibha, gubhaawashienje
muntwe. **18** Penepo gubhatandwibhenje kwaakomaya kwa
mbenji bhalinkutinji, "Tunakunkomaya A mpalume bha Bhayaudi!"
19 Gubaakomilenje na nnai muntwe, gubhaaunilenje mata,
gubhaatindibhalilenje kwa mbenji. **20** Bhakaatendelanjeje mbenji,
gubhaaulilenje nngubho ja shambalau jila, nikwaawasha nngubho
yabho, gubhaakopoyenje nikwaapeleka kunyenje shilambo,
kukwaabhamba munshalabha. **21** Bhandu bhamo bha ku Kilene,
lina lyabho a Shimoni, ainabhabhonji a Alekishanda na a
Lupo, bhatendaga pita mpanda bhalikoposhela kunngunda.
Bhai gubaashishilishiye kujamula nshalabha gwa a Yeshu.
22 Gubhaapelekenje a Yeshu mpaka pashemwaga Goligota,
malombolelo gakwe, Shihanga sha Ntwe. **23** Gubhaapelenje
divai jiengenyewe na ntela gwa litindili ushemwa manemanne,
ikabheje bhangaposhela. **24** Gubaakomelenje munshalabha,
gubhagebhenyenje nngubho yabho, gubhatendilenje shikoma,
kuti gani shaapate jeneji. **25** Bhai, pugaaliji malanga
ga shaa tatu ja lyamba pubhaabhbambiljenje munshalabha.

26 Na gubhabhishilenje mmbila ja kwaalugula, jijandikwe kuti, “A MPALUME BHA BHAYAUDI.” **27** Pamo na a Yesu, bhashikunkubhambwanga bhaapokonyola bhabhili, jumo kunkono gwabho gwa nnilo na junu kunkono nshinda. **28** Bhai penepo, gugamalile majandiko ga a Nnungu galugula kuti, “Gubhabhishilwe nkumbi gumo na bhaalebhanga.” **29** Bhai bhandunji bhapitanganaga gwene mpandago, nikwaabhonanga a Yesu bhali bhabhambilwe munshalabha, gubaatukenenje akuno bhalitikinyanga mitwe jabhonji bhalinkutinji, “Ayaga! Mmwe nkukombola kubhomola Liekalu nishenga lina kwa mobha gatatu! **30** Bhai nnaino mwitapule mmayene, ntulushe munshalabhamo!” **31** Nneyo peyo bhakulungwanji bhaabhishila na bhaajiganya bha Shalia ya a Musha, gubaatendelenje mbenji bhalibhalanjilananga, “Bhashitapula bhananji, ikabheje bhayene bhakaakombola kwiitapula! **32** Nkali bhene bhakomelwenje mmishalabha pamo na a Yesu bhala, gubaatukenenje bhalinkutinji, a Kilishitu, A mpalume bha bha Ishlaeli, nnaino bhatulushe munshalabha tulole, tukulupalile.” **33** Tandubhila malanga ga shaa shita mpaka shaa tisha, lubhindu gulutotile shilambo showe. **34** Malanga ga shaa tisha, a Yesu gubhautiye lilobhe bhalinkuti, “Eloi, Eloi, lama shabbakitani?” Malombolelo gakwe, “A Nnungu bhangu, a Nnungu bhangu, pakuti nshineka?” **35** Bhai bhandu bhananji bhajimengenenje penepo gubhashitenje, “Mpilikananje, bhanakwaashema a Eliya.” **36** Mundu jumo gwabhwutwishe kutola shiponji, nilobheka nnijashama, nitabhila munbai, nikwaapa a Yesu bhayonde akuno alinkuti, “Nnekanje, tulole monaga shibhaishe a Eliya kukwatuluya munshalabha.” **37** Penepo a Yesu gubhautiye lilobhe, gubhawile. **38** Bhai lipanshia likulungwa lya Nlikanisha gulipapwishe ikanje ibhili kuumila kunani

mpaka pai. **39** Bhai bhakulungwa bha manjola bhaajimi penepo bhalikwalolesheya a Yesu, bhakabhoneje bhaliwa shana nneyo, gubhashite, "Kweli, abha bhandubha pubhaliji Bhana bhabho a Nnunu." **40** Bhai bhashinkupagwanga bhanabhakongwe bhalolangaga bhalinginji kwataliya, munkumbi gwabhonji bhapali a Malia Magidalena, na a Malia anyinabhabhonji a Yakobho, apwabho a Yoshe, na a Shalome. **41** Bhenebha ni bhalongenenje na a Yesu ku Galilaya nibhaatumishilangaga, numbe bhapalinji bhanabhakongwe bhana bhabhagwinji, bhaikengenenje na a Yesu ku Yelushalemu. **42** Ikaishileje ligulo, pabha pulyaaliji lyubha lya kolokoya indu ya Lyubha lya Pumulila. **43** A Yoshepu, bhandu bha ku Alimataya bha ishimika bha munkumbi gwa Bhalukumbi Lukulu lwa Bhayaudi, na bhalabho bhatenda lolela kuika kwa Upalume gwa a Nnunu. Bhai gubhailumile ntima, gubhaajendele a Pilato, gubhaajujile shiilu sha a Yesu. **44** Ikabheje a Pilato gubhakanganigwe bhakapilikaneje kuti a Yesu bhawile. Bhai gubaashemile bhakulungwa bha manjola bhala, gubhaabhushiye monaga a Yesu bhawile. **45** A Pilato bhakapilikaneje kubhakulungwa bha manjola bhala kuti a Yesu bhawile, gubhaapele a Yoshepu shiilu shila. **46** Bhai a Yoshepu gubhaumile shanda ja nngubho ja alili, gubhatulwiye shiilu shila pai, gubhailijilile shanda. Gubhaashishile nnikabhuli lyaokwelwe nniganga likulungwa, gubaingilishiye liganga likulungwa kuibhila pannango gwake. **47** Bhai numbe a Malia Magidalena, na a Malia anyinabhabho a Yoshe, gubhapaweninji pubhashishilwe a Yesu.

16 Likapiteje Lyubha lya Pumulila, a Malia Magidalena, na a Malia anyinabhabhonji a Yakobho, na a Shalome, gubhaumilenje mauta ga nunjila, nkupinga bhakapakanje shiilu sha a Yesu.

2 Bhai lyubha lya tandubha jene juma jila, lyamba lyubha likatandubheje kukopoka, gubhapitengenenje kulikabhuli. 3 Bhalinginji mumpanda gubhabhuyenenje, "Gani shaatunokolele kunyenje, liganga likulungwa liibhilwe pannango gwa likabhuli lila?" 4 Ikabheje bhakalolanjeje, gubhalibhweninji liganga lila linokolelwe kunyenje, na pulyaaliji lyalikulungwa kaje. 5 Bhakajinjilanjeje nnikabhuli, gubhammweninji nshanda atemi nkono gwa nnilo, awete ngubho janawe jajileu, gubhaimukenje kaje. 6 Penepo nshanda jula gwabhabhalanjilenje, "Nnaimukanje, a Yesu Bhanashaleti bhunkwaloleyangabho, bhayushile, apano bhakwa, nnolanje pubhaagonekenje. 7 Nnaino, nnjendangananje nkaabhalanjilanje bhaajiganywa bhabho, na a Petili kuti, bhanakunnongolelanga ku Galilaya. Kweneko shimwaabhonanje malinga shibhammadlanjilenje." 8 Bhai, gubhakopokengenenje nnikabhuli mula shibhutuka, bhaliungumilanga nkujogopa akuno bhalikanganigwanga. Bhangammalanjilanga shindu mundu jojowe, pabha bhashinkujogopanga kwa kaje. Gubhapite kwaalugulilanga a Petili. 9 (note: The most reliable and earliest manuscripts do not include Mark 16:9-20.) A Yesu bhakayusheje, lyambape lyubha lya tandubha juma, gubhatandwibhe kwaakoposhela a Malia Magidalena, bhaashoshiye maoka shabha gangali ga mmbone. 10 A Malia bha ku Magidala gubhapite kwaabhalanjilanga bhalonganangaga na a Yesu, bhalinginji nkwigutanjila. 11 Ikabheje bhowe bhapilikenje kuti a Yesu bhabhakoto, numbe a Malia bha ku Magidala bhaaweni, bhangakulupalilanga. 12 Gakapiteje malanga gashoko, a Yesu gubhaakoposhelenje bhaajiganywa bhabhili, bhalibhoneka shinape. Bhaajiganywa bhala pubhalinginji mmwanja gwa mwijiji. 13 Nabhalabhonji gubhapitengenenje

kukwabhalanjilanga ashaajabhonji bhalepekenje. Nkali bhanganyabho bhangaakulupalilanga. **14** Kungai a Yesu gubhaakoposhelenje bhaajiganywa likumi limo na jumo bhala bhalilyanganga. Kungai gubhaakalipilenje kwa ligongo lya ngakulupalila na kunonopa mitima kwabhonji, pabha bhangaakulupalilanga bhaabhwениنجi bhakayusheje bhala. **15** Bhai, gubaalugulilenje, "Njendangananje nshilambolyo nkalunguyanje Ngani ja Mmbone kubhandu bhowe. **16** Shaakulupalile nibhatishwajo shatapulwe, ikabheje bhangakulupalilanga, shibhaukumulwanje. **17** Na yene ilanguloi shiibhe na bhene bhaakulupalilangabho, shibhashoyanje maoka kwa lina lyangu, shibhabheleketanje shibheleketi sha ambi. **18** Bhakamulangaga majoka eu bhang'wangangaga shindu sha bhulaga, shikaabhenganga. Shibaabhisilanje makono bhalwelenji na shibhalamanje." **19** Bhai, Bhakulungwa a Yesu bhakamaliyeje kubheleketa nabhonji, gubhanyakwilwe kunani Kunnungu, gubhatemi kunkono nnilo gwa a Nnungu. **20** Bhaajiganywa bhala gubhapitengenje mmbali yowe kuulunguya, Bhakulungwa gubhakamwile liengo kupitila bhanganyabho, na gubhakong'ondele lilobhe lyabho kwa ilangulo yabhonekaga nkulunguya kwabhonji.

Luka

1 Bhandu bhabhagwinjinji bhashilajililanga kujandika ukoto ngani ja indu yatendekaga munkumbi gwetu. **2** Bhashinkujandikanga malinga shitwatagulilwe na bhandunji bhagabhweninji pugatendekaga, kuumila kundandubho na bhalunguyangaga lilobhe lya a Nnungu. **3** Kwa nneyo, mmakulungwa a Teopili, numbe nne ngakagulileje ukoto yowe kuumila kundandubho, njibhona inapwaa ninnjandishile shiyashite tendeka, **4** nkupinga na mmwe muumanye ukweli gwa yowe innjigenywe ila. **5** Mobha ga upalume gwa a Elode ku Yudea, bhashinkupagwa bhaabhisila bhamo lina lyabho a Shakalia, bha likundi lya a Abhiya. Akongobhabho pubhashemwaga a Lishabheti bha shipinga sha a Aluni, bhakulungwa bhaabhisila. **6** Bhowe bhanaabhili bhashinkubhanganga bhandunji bha aki kwa a Nnungu, bhalikagulilanga amuli na malajilo ga Bhakulungwa gwangali kugambwa. **7** Ikabheje bhakakwetenjeje bhana, pabha a Lishabheti pubhaaliji nannii na bhanaabhili pubhalinginji bhakongopanji kaje. **8** Lyubha limo lya nnimbu gwa liengo lya bhishila gwa a Shakalia nniekalu, **9** malinga shigwaliji nkubho gwabhonji, a Shakalia bhashinkuagulwa kwa shikoma, bhajinjile nniekalu bhakatutumye lubhani. **10** Akuno lugwinjili lowe lwa bhandu pubhalinginji palanga bhalikwaajuganga a Nnungu, malanga ga tutumya lubhani. **11** Malaika jwa Bhakulungwa akwaakoposhelaga, gwabhajimile nkono nnilo gwa shitala sha tutumishiya lubhani. **12** A Shakalia bhakammoneje malaika jwa a Nnungu jula gubhatengwishe na jogopa. **13** Malaika jwa a Nnungu jula gwabhalugulile, “A Shakalia, nnajogope pabha kujuga kwenu kupilikenwe, na akongobhenu a Lishabheti, shibhankolele mwana jwannume, na mmwe shimussheme

lina lyakwe a Yowana.” **14** “Mpinga kwiiinonyela kwa kaje na bhandu bhabhagwinji bhapinga angalilanga kubhelekwa kwakwe. **15** Shabhe jwankulungwa pa meyo ga Bhakulungwa, akapinjikwa kung'wa togwa wala ukana, apinga gumbaywa Mbumu jwa Ukonjelo, kuumila nnutumbo lwa akwabhe. **16** Shaabhatendebhuyanje bha Ishilaeli bhabhagwinji bhaabhuilanje Bhakulungwa a Nnungu bhabhonji. **17** Shaalongolele pa meyo ga Bhakulungwa alikomboya na mbumu na mashili malinga a Eliya. Apinga lundanya mitima ja ashainamundu na bhana bhabhonji, apinga kwaatendanga bhakakwaakundanga a Nnungu kubha na ng'aniyo ya aki, nkupinga abhaalashiye Bhakulungwa bhandunji shibhabhanganje tayali kwaaposhela.” **18** A Shakalia gubhamushiye malaika jula, “Yeneyo nne pushiniimanye bhuli? Nne nankongopa na akangu na bhalabho bhakongopele.” **19** Malaika jwa a Nnungu gwabhalugulile, “Nne Gabhulieli, ntumishi ngujima pameyo ga a Nnungu, njitumwa kumelekete na mmwe, nintashiye jene ngani ja mmboneji. **20** Pabha mmangakulupalila gapinga koposhela kwa malanga gakwega, shimme bhubhu, nkakombola kubheleketa mpaka lyubha pushigakoposhele gunimmalanjilega.” **21** Penepo bhandu bhaalindililangaga a Shakalia gubhakanganigwenje kwa nndi bhashikabhiya Nniekalu mula. **22** Bhakakoposheje palanga bhakakombweleje kubheleketa nabhonji. Gubhamanyinji kuti ipali ibhaiweni Nniekalu mula. Ikabheje gubhapundile bheleketa nabhonji kwa ilangulo ya makono, pabha bhashinkubha bhubhu. **23** Nnimbu gwabho gwa liengo lya bhishila ukamaleje, a Shakaliya gubhabhujile kumui. **24** Pangakabhika a Lishabheti gubhajukwite shitumbo. Gubhatemi pamui miyei nng'ano. **25** Bhalinkuti, “Nnei ni shibhandendele Bhakulungwa bhakamoneje,

bhashinjosheya oni jangu, jinakolaga pa meyo ga bhandunji.”

26 Mwei gwa shita gwa shitumbo sha a Lishabheti, malaika jwa a Nnungu Gabhuliel i ashinkutumwa na a Nnungu ajende ku Nashaleti ja ku Galilaya, **27** kwa a mwali bhaishana bhashemwaga a Malia, ntemela gwa a Yoshepu bha shipinga sha a Daudi. **28** Malaika jula gwabhajendele, nikwaabhalanjila, “Shalamu shenu mmwe a Malia! Nshipegwa nema yaigwinji! Bhakulungwa pubhali na mmwe.” **29** A Malia bhakapilikaneje gene malobhego gubhatengwishe kaje, nikwiibhuya sha muntima, shene shalamushi malombolelo gakwe nndi? **30** Malaika jula gwabhalugulile, “Nnajogope a Malia, pabha Bhakulungwa bhashikumpa nema. **31** Pilikana! Shinnjukute shitumbo, na shinkole mwana jwannume na munsheme lina lyakwe Yesu. **32** Jwenejo apingabha jwankulungwa na shashemwe Mwana jwa bhalii Kunani Kaje. Bhakulungwa a Nnungu shibhampe shitengu sha upalume sha anaigwe a Daudi. **33** Kwa nneyo shabhe Nkulungwa jwa shipinga sha a Yakobho pitipiti na upalume gwakwe ukakola mpelo.” (aiōn g165) **34** A Malia gubhammushiye malaika, “Pushiitendeshe yeneyo bhuli, na nne niibhelele mwali nng’ishana nganabhe kummany a jwannume?” **35** Malaika jula gwajangwile, “Mbumu jwa Ukonjelo shannjiile na mashili ga Bhakulungwa a Nnungu shiganng’unisthile mbuti shiwilli, kwa nneyo, mwana shabhelekwejo, shashemwe jwa Ukonjelo, Mwana jwa a Nnungu. **36** Na mmumanye kuti nkali alongo ajenu a Lishabheti na ukongopa gwabho bhajukwite shitumbo sha mwana jwannume, aguno mwei gwabho gwa nng’ano na gumo kwa bhene bhamanyishe na bhandu kuti anannii. **37** Pabha shakwa shikaakomboleka kwa a Nnungu.” **38** A Malia gubhashite, “Nne nantumwa jwa Bhakulungwa, ibhe malinga

shiumalanjile." Bhai malaika jula gwajabhwile. **39** Gakapiteje malanga gashoko, a Malia gubhapite shangu ku shilambo shimo sha kuitumbi ya ku Yudea. **40** Kweneko gubhajinjile nnyumba ja a Shakalia, nikwaalamushila a Lishabheti. **41** A Lishabheti bhakapilikaneje lamushilwa na a Malia, shitumbo sha a Lishabheti shikutukulaga nkwiinonyela. Na bhalabho a Lishabheti Mbumu jwa Ukonjelo akwaagumbalaga, **42** nigubhabhelekete kwa lilibhe lya utiya, "Nshipiegwa mboka kupunda bhanabhakongwe bhowe, na mwana junkupinga kunkolajo ashipegwa mboka. **43** Kwa bhuli nne njikuywa nnei, nkali anyinamundu bha Bhakulungwa bhangu bhang'owele? **44** Nnole! Ngapilikanejepe kulamushila kwenu, shitumbo shangu shikutukulaga nkwiinonyela. **45** Mbaya mmwe nkulupalile kuti yene immalanjilwe na Bhakulungwa ila shiitendeshe." **46** Na bhalabho a Malia gubhashite, "Ntima gwangu unakwaakuya Bhakulungwa, **47** Na mbumu yangu inakwiinonyela ligongo lya a Nnunu Bhaatapula bhangu. **48** Pabha bhashikuubhona ungakola mashili uka ntumishi jwabho. Kwa nneyo kuumila nnaino ibheleko yowe shibhanjemanje akwete mboka, **49** Pabha a Nnunu Bhakwete Mashili, bhashindendela gamakulungwa. Na lina lyabho ni bha ukonjelo. **50** Bhenebho bhanakwaabphonelanga shiya bhene bhakwaajogopanga bhala, kuumila lubheleko mpaka lubheleko. **51** Pabha kwa mashili ga nkono gwabho bhashitenda gamakulungwa. Bhashikwapwilinganyanga bhakwetenje mbwinya mmitima jabhonji, **52** Bhashikwaatuluyanga bhapalume mwitengu yabhonji ya upalume, Nikwaakweyanga bhaitimalikenje. **53** Bhakwetenje shibhanga bhashikwaatendanga bhajukutanje ya mmbone, Ikabhe matajili bhashikwaalekanga bhapwilingane gwangali shoshowe. **54** Bhashikunnjangutila

ntumishi jwabho Ishilaeli, Bhalikumbushila miadi ja kummonela shiya. **55** Kwa a Bhulaimu na lubheleko Iwabho pitipiti, Malinga shibhaabhalanjilenje bhanangulungwa bhetu.” (**aiōn g165**) **56** A Malia nigubhatemi na a Lishabheti malinga myei jitatu, nigubhabhujile kunngwabho. **57** Mobha ga kwigopola a Lishabheti gakaishileje, gubhaigopwele mwana jwannume. **58** Ashaatami ajabho na ashaalongo ajabho bhakapilikinanjeje, kuti Bhakulungwa bhaabhonele shiya sha kaje a Lishabheti, gubhaengelelenje pamo na bhenebho. **59** Lyubha lya nane gubhaikengenenje kukuntaga mwana unyago, nigubhajinjilenje kumpa lina lya ainagwe, Shakalia. **60** Ikabheje akwabhe nigubhakanile, bhalinkuti, “Nngabha, ikabhe shashemwe a Yowana.” **61** Gubhaalugulilenje, “Pakuti jwakwa mundu muulongo gwenu ashemwa lyene linalyo!” **62** Bhai gubhaabhushiyenje ainagwe kwa ilangulo ya makono bhamumanyanje lina lyashi libhapinga kumpa mwanagwabho. **63** Numbe a Shakalia gubhajujile shibhao sha jandika, gubhajandishe nnei, “Lina lyakwe a Yowana.” Gubhakanganigwenje bhowe. **64** Popo pepo a Shakalia, gubhakombwele kubheleketa kabhili, bhalinkwaakuya a Nnungu. **65** Ashaatami ajabho bhowe gubhajogopenje, na bhandu bhowe bhatendaga kungulushilanga jene nganijo mmbali yowe ya shilambo sha mwiitumbi ya ku Yudea. **66** Bhowe bhapilikenenje genego, gubhaganishiyenje mmitima jabhonji nikwiibhuya, “Igala jwene mwanaju apingabha mundu jwashi?” Pabha nkono gwa Bhakulungwa pugwaaliji naka jwenejo. **67** A Shakalia, ainagwe mwana, gubhagumbeywe naka Mbamu jwa Ukonjelo, gubhalondwele nnei, **68** “Bhapegwe mboka Bhakulungwa a Nnungu bha Ishilaeli, Pabha bhashikwiya kukwagombolanga bhandu bhabho. **69** Bhashikutupa Nkutapula jwa makangala, Jwa

uukulu gwa a Daudi bhatumishi bhabho. **70** Bhabhelenje kuumila bhukala Kupitila bhaalondola bhabho bha Ukonjelo, (aiōn g165)

71 Kuti shibhatutapule mmakono ga ashaamagongo ajetu Na bhowe bhakutushimanga. **72** Pubhashite kuti shibhaabhonelanje shiya bhanangulungwa bhetu, Na shibhakumbushile malagano gabho ga Ukonjelo. **73** Bhashinkulumbla kwa ambuje a Bhulaimu, Kuti shibhatutende uwe **74** Tugombolwe mmakono ga ashaamagongo ajetu, Kupinga twatindibhalile gwangali lipamba, **75** Kwa Ukonjelo na aki Mobha getu gowe. **76** Na ugwe mwanangu, shushemwe, nkulondola jwa Bhakulungwa a Nnungu. Shugwaalongolele Bhakulungwa kukwaalashiya mpanda gwabho, **77** Kwaalungushiyanga bhandu bhabho kuti, shibhatapulwanje Kwa leshelelwa yambi yabhonji. **78** A Nnungu bhetu shibhatutendele nneyo kwa ligongo ly a potekwa ntima na shiya shabho, Na Ntapulo gwabho shiututulushile kukopoka kunnungu malinga nshenje, **79** Kupinga kwaamulishilanga bhowe bhatemingenenje nnubhindu lwa shiwo, Bhatulongoye ndamo yetu tutame kwa ulele.” **80** Mwana gwakulile na gwapundile kukola mashili muntima. Gwatemti kuanga mpaka lyubha lyailangwile ku bhandu bha Ishilaeli.

2 Gene mobhago, a Kaishali bhashemwaga a Augushito, bhakulungwa bhakulu bha upalume gwa Shiloma bhashinkulajiya bhalikwaapinganga bhandunji bhowe bhalinginji muupalume gwabho bhakajandikwanje. **2** Kwene kujandikwako pukwaaliji kutandubha kwene kuumila a Kileniashi pubhaaliji bhakulungwa bha shilambo sha ku Shilia. **3** Bhai bhowe bhapinjikwenje gubhapitengenenje kuujandikwa kila mundu kushilambo shakwe shabhelekwe. **4** A Yoshepu nabhalabho ni gubhajabhwile ku Nashaleti, shilambo sha ku Galilaya, pabha pubhaaliji

bha ulongo bha shipinga shimo na bhakulungwa a Daudi, gubhapite ku Bheteleemu shilambo sha ku Yudea kubhabhelekwe bhakulungwa a Daudi. **5** Gubhapite kuujandikwa na bha ntemela gwabho a Malia bhalo na shitumbo. **6** Bhalinginji ku Bheteleemu, lyubha lyabho lya kwigopola likuishilaga, **7** gubhankwete mwana lielo lyabho, gubhanng'washiye nngubho shinambombe, gubhanngoneshe pa lila ng'ombe, pabha bhakapatilenjeje pa gona nnyumba ja bhajeninji. **8** Tome na ku Bheteleemu bhashinkupagwanga bhashunga bhatamanganaga mukonde, shilo bhalinginji muulinda gwa ngondolo yabbonji. **9** Malaika jwa a Nnungu gwabhakoposhelenje na Ukonjelo gwa Bhakulungwa a Nnungu ukwamulishilangaga powe. Gubhatengukenje. **10** Ikabheje malaika gwabhalugulilenje, "Nnatengukanje! Pabha njikwiya kummalanjilanga ngani ja mmbone, jakwaanonyelanga bhandu bhowe. **11** Lelo nshilambo sha a Daudi ashibhelekwa nkutapula jwenunji, jwenejo ni Kilishitu ali Nkulungwa. **12** Na sheshino shishibhe shilangulo shenunji. Shimunng'imananje nambombe awashiyewe nngubho ya shinambombe, agonekwe pa lila ng'ombe." **13** Shangupe likundi lyalikulungwa lya ashimalaika bhananji bha kunnungu bhakwiiundangaga pamo naka malaika jula, bhalikwainiyanga a Nnungu bhalinkutinji. **14** "Bhakuywe a Nnungu kunani kunnunungu, Na pa shilambolyo pabhe na ulele, ku bhandu bhakwaanonyelanga." **15** Ashimalaika bhala, bhakajabhalanganeje kubhuja kunnungu, bhashunga gubhabhalanjilenenje. "Twendangananje ku Bheteleemu tukalibhone lyene likoposhele libhatubhalanjile Bhakulungwa."

16 Bhai, gubhabitengenje lubhilo, gubaimenenje a Malia na a Yoshepu naka nambombe jula agonekwe pa lila ng'ombe. **17** Bhashunga bhakammonanjeje mwana jula gubhaalungushiyenje

bhandu bhowe ngani jakwe jibhapilikenerje jila. **18** Bhowe bhapilikenerje jene ngani jibhalugulilwangaga na bhashungajo bhala gubhakanganigwenje. **19** Ikabheje a Malia gubhagabhisile gowe muntima akuno bhaliganishiya. **20** Bhashunga bhala gubhabhujengenenje, akuno bhalikwakuyanga na kwaainiya a Nnungu, kwa gowe gubhapilikenerje na kugabhona, gashinkubha malinga shibhalugulilwenje. **21** Gakamalileje mobha nane mwana gwatagwile unyago, gubhanshemilenje lina lyakwe Yesu, lina lyapegwilwe na malaika jwa a Nnungu, akwabhe bhakanabhe jukuta shitumbo. **22** Lukapiteje luuko, malinga Shalia ja a Musha shijilajila, a Yoshepu na akongobhabho a Malia gubhampelekenje mwana ku Yelushalemu kukunkamuya ku Bhakulungwa, **23** malinga Shalia ja Bhakulungwa shijishite, "Kila mwana jwa lielo jwannume shaabhe jwa ukonjelo jwa Bhakulungwa." **24** Nneila peila gubhashoshiyenje mbepei ya nnjubha ibhili eu mabhunda gabhili ga ngunda, malinga Shalia ja Bhakulungwa shijapingaga. **25** Gene mobhago ku Yelushalemu bhashinkupagwa bhandu bhamo, pubhaliji bhandu bha aki na bhatendaga kwaatindibhalila a Nnungu, pubhashemwaga a Shimoni. Bhenebho bhatendaga lolela gwa lilaka ntapulo gwa bha Ishilaeli. Mbumu jwa Ukonjelo paaliji pamo na bhenebho alikwaataga ntima. **26** Mbumu jwa Ukonjelo ashinkwaibhulila kuti bhakawa bhakanabhe kummona Kilishitu jwa Bhakulungwa. **27** Bhai bhalilongoywa na Mbumu jwa Ukonjelo, a Shimoni gubhapite ku Liekalu. A Yoshepu na akongobhabho, gubhampelekenje mwana Yesu Nniekalu kukuntendela malinga nkubho gwa Shalia ja a Musha shijapingaga. **28** A Shimoni gubhamposhele mwana Yesu jula mmakono gabho, akuno bhalikwakuya a Nnungu, bhalinkuti. **29** "Mmakulungwa nnaino malagano genu

gamalile, Mpingaga munneshe ntumishi jwenu akapumulile kwa ulele malinga shimwalajile. **30** Pabha meyo gangu gaubhwени ntapulo gwenu, **31** gummishile tayali ku bhandu bha ilambo yowe, **32** sheneshi ni shilangaya shipinga kwaamulishilanga bhandu bhangali kubha Bhayaudi, na Ukonjelo ku bhandu bhenu bha Ishilaeli.” **33** Ainamundu na akwabhe Yesu gubhakanganigwenje kwa malobhe gabheleketwe kwa ligongo lika mwana. **34** A Shimoni gubhaapelenje mboka, gubhaalugulile a Malia, akwabhe Yesu, “Aju mwanaju ashibhelekwa kwa ligongo lya kutuluywa na kukuywa kwa bhandu bhabhagwinji nshilambo sha Ishilaeli. Na jweneju shaabhe shilapo shipinga kanwa na bhandu. **35** Kwa nneyo ng'aniyo ya bhandu bhabhagwinji ipinga bhoneka gwangali nng'iyo! Na mmwe mmayene ntima gwenu upinga kumpoteka mbuti nng'omilwe na lipanga.” **36** Bhashinkupagwa bhakongwe bhamo bhakongopa, a nkulondola bha a Nnungu lina lyabho a Ana abhiti a Panueli bha shipinga sha a Asheli. Bhashinkulombwa nitama nshilombani yaka shabha ambunjebhabho ni gubhawile. **37** Gubhatemi nshitenga yaka makumi nane na nsheshe. Mobha gowego mubhatamaga Nniekalu bhalitabha nkwaajuga a Nnungu shilo na mui. **38** Popo pego, gubhaikopweye mmujo, gubhatendile eja kwa a Nnungu na gubhalungwiye ngani jika jwene mwanajo kubhandu bhowe bhatemingenenje nkulindilila kutapulwa kwa Yelushalemu. **39** Ainamundu na anyinamundu bhakatendanjeje yowe yalajilwe na Shalia ja Bhakulungwa, gubhabhujengene kunngwabhonji ku Nashaleti nshilambo sha ku Galilaya. **40** Mwana gwakulile, gwapundile kukola mashili, gwagumbele lunda na nema ja a Nnungu pujaaliji naka jwenejo. **41** Ainamundu na anyinamundu malinga shigwaliji nkubho gwabhonji gwa kwenda ku Yelushalemu kila shaka mobha ga

shikuu ja Shiyaudi jishemwa Pashaka. **42** Yeshu akaishileje yaka likumi limo na ibhili malinga shigwaliji nkubho gwabhonji bhowe gubhajombokenje kwenda kushikuu. **43** Shikapiteje shikuu, gubhatandubhenje mwanja gwa bhuja kunngwabhonji, ikabheje Yeshu gwalepeshe ku Yelushalemu, gwangali ainagwe na akwabhe kumumanyanga. **44** Pubhaganishiyangaga kuti mwali munkumbi gwa bhandu, gubhapitengenenge mwanja gwa totolo, kungai gubhatandubhenje kunnoleya kubhaulongo na kwa ashaambwiga ajabhonji. **45** Pabha bhangammonanga, gubhabhujengenenje ku Yelushalemu pita kunnoleya. **46** Lyubha lya tatu, gubhanng'imenenje ku Liekalu ali atemi munkumbi gwa bhaajiganya bha Shalia alikwaapilikanishiyanga akuno alikwaabhuyanga. **47** Bhowe bhapilikenenge malobhe gakwe, bhashinkulapanga kwa ijangulo yakwe na lunda lwakwe. **48** Ainagwe na akwabhe bhashinkukanganigwanga bhakammonanjeje. Akwabhe a Malia gubhammushiye, "Gwe mwanangu, kwa nndi ushikututenda nnei? Nne na ainago tushikuuloleya kwa lipamba." **49** Jwalakwe gwabhajangwilenje, "Kwa nndi mmanganya kunoleyanga? Nkakumumanyanga kuti nne ngunapinjikwa nnyumba ja Atati?" **50** Ikabheje bhankwetenje bhangagamanyanga malombolelo ga malobhe gabhaalugulilenje gala. **51** Bhai gubhalongenenajonji kubhuja ku Nashaleti, gwapundile kwaakundanga. Akwabhe gubhagabhisile muntima gene gowego. **52** Na jwalakwe Yeshu gwapundile kukula kwa shanga na lunda, gwapundile kipingwa na a Nnungu na bhandunji.

3 Shaka sha kumi na nng'ano sha tagwala kwabho a Kaishali Tibhelio, a Pontio Pilato pubhaliji bhakulungwa bha shilambo sha ku Yudea. A Elode pubhaliji bhakulungwa bha shilambo sha

ku Galilaya, na akulubhabho a Pilipi pubhaliji bhakulungwa bha ilambo ya ku Itulea na ku Tilakoniti. A Lishaniashi pubhaaliji bhakulungwa bha shilambo sha ku Abhilene, 2 a Anashi na a Kayapa pubhalinginji bhakulungwanji bha bhaabhisila. Gene mobhago a Yowana bhanabhabho a Shakalia gulyajiile lilobhe lya a Nnungu kuanga kula. 3 Bhai a Yowana gubhapite mitala jowe jipikene na lushi lwa Yolodani bhalilunguya kuti, bhandu bhalekanje yambi yabhonji na bhatishwa, nkupinga a Nnungu bhaaleshelelanye yambi yabhonji. 4 Malinga shiishite jandikwa nshitabhu sha a Ishaya a nkulondola, "Lilobhe lika mundu linapilikanika kuanga. 'Mwaalashiyane Bhakulungwa mpanda gwabho. Nngoloyanje mushibhapite. 5 Kila liimbo shilikulilwe, Kila shitumbi na shikweya shiilinganywe. Papindile shipagoloywe, Mipanda jangali ja mmbone jipinga alaywa. 6 Na, bhandu bhowe shibhaubhonanje ntapulo gwa a Nnungu." 7 Bhai a Yowana gubhaabhalanjilenje bhandu bhabhagwinji bhaikanganaga kuubhatishwa, kuti "Mmanganya bhana bha lijoka! Gani ammalanjilenje nnjibhutukanje nnjimwa ja a Nnunu jikwiya? 8 Bhai nnanguyanje kwa itendi kuti mwiipetilenje yambi yenunji nikwaabujila a Nnunu. Nnatandubhanje kwibheleketela kuti 'Uwe a Bhulaimu ainabhetu!' Numbe ngunakummalanjilanga, a Nnunu bhanakombola kugayuya magangaga nibha bhana bha a Bhulaimu. 9 Bhai nnaino, libhago libhishilwe mmatepo ga mikongo, kupinga kuushelanya nkongo. Kila nkongo ukaogoya iepo ya mmbone upinga shelwa nileshelwa pa moto." 10 Lugwinjili lwa bhandu lukwaabhuuya, "Bhai tutende bhuli?" 11 A Yowana gubhaajangwilenje. "Akwete nngubho ibhili anngabhile jwangali ngubhojo, akwete shalya atende nneyo peyo." 12 Numbe bhakamula koli gubaikengenenje

kupinga kubhatishwa, gubhaabhuhiyenje, "Tutende bhuli mmaajiganya?" **13** Numbe a Yowana gubhaabhalanjilenje, "Nnalonganje koli japunda jimmalanjilwenje." **14** Numbe ashimanjola na bhalabhonji gubhaabhuhiyenje, "Na uwe tutende ndi?" Gubhaajangulenje, "Nnatolanje indu ikamundu jojowe kwa mashili wala nnanshitakiyanje mundu kwa kunnambilila. Ntogolelanje na mishaala jenunji." **15** Bhandu bhatendaga lolelanga kwiya kwa bhaagombola, bhai gubhatandubhenje kwiihbuyanga mmitima jabhonji, pana a Yowana bha ni a Kilishitu. **16** Penepo a Yowana gubhaabhalanjilenje bhowe, "Nne ngunakumbhatishanga na mashi, ikabheje bhanakwiya bhakwete mashili kumbunda nne, numbe nne nangatopela nkali kubha ntumishi jwabho. Bhenebho shibhambhatishanje kwa Mbumu jwa Ukonjelo na kwa moto. **17** Bhenebho bhashikamula nkubhato mmakono gabho, bhalipinga kubhata yalya yabho na peta, ngano bhakabhishe munngokwe na maashe gangali shindu nijoka pa moto gwangaimika piti piti." **18** Bhai kwa genego na miungu jina jamigwinji, a Yowana bhakwaalungushiyangaga bhandunji Ngani ja Mmbone. **19** Ikabheje a Yowana bhashinkwaakalipila bhakulungwa a Elode, kwa ligongo lya kwaatola shilombani a Elodia, bhaliji akongobhabho akulubhabho na indu ina yangali ya mmbone ibhaitendekanya. **20** Kungai a Elode akuno bhalipunda kwitendekanya yangali ya mmbone, nigubhaatabhile a Yowana. **21** Bhandu bhowe bhakamananjeje kubhatishwa, a Yesu na bhalabho bhakubhatishwaga. Na pubhaaliji bhalijuga kwa a Nnungu, kunnungu kukuugukaga, **22** na Mbumu Jwa Ukonjelo akwaatulushilaga alibhoneka mbuti ngunda. Lilobhe likupilikanikaga kukopoka kunnungu. "Ugwe mwanangu junguupinga, unonyela." **23** A Yesu pubhatandwibhe liengo

lyabho kulugwinjili bhali na yaka malinga makumi gatatu, na bhandunji pubhaganishiyangaga kuti mwana jwa a Yoshepu, a Yoshepu pubhaliji bhanabho a Eli, **24** a Eli pubhaaliji bhanabhabho a Matiati, a Metiati pubhaaliji bhanabhabho a Lawi, a Lawi pubhaaliji bhanabhabho a Meliki, a Meliki pubhaaliji bhanabhabho a Yanai, a Yanai pubhaaliji bhanabhabho a Yoshepu, **25** a Yoshepu pubhaaliji bhanabhabho a Matatiashi, a Matatia pubhaaliji bhanabhabho a Amoshi, a Amoshi pubhaaliji bhanabhabho a Naumu, a Naumu pubhaliji bhanabhabho a Eshili, bhanabhabho a Nagai, **26** a Nagai bhaliji bhanabhabho a Matatiashi, a Maati bhaliji bhanabhabho a Matatiashi, a Matatia pubhaliji bhanabhabho a Shemeni, a Shemeni bhanabhabho a Yosheki, a Yosheki bhanabhabho a Yoda, **27** a Yuda bhaaliji bhanabhabho a Yowanani, a Yowanani bhaaliji bhanabhabho a Lesha, a Lesha bhaaliji bhanabhabho a Shelubhabeli, a Shelubhabbeli bhaaliji bhanabhabho a Sheatieli, a Sheatieli bhaaliji bhanabhabho a Neli, **28** a Neli bhaaliji bhanabhabho a Meliki, a Meliki bhaaliji bhanabhabho a Adi, a Adi bhaaliji bhanabhabho a Kosamu, a Kosamu bhaaliji bhanabhabho a Elimadamu, a Elimadamu pubhaaliji bhanabhabho a Eli, **29** a Eli bhaaliji bhanabhabho a Yoshua, a Yoshua bhaaliji bhanabhabho a Eliesheli, a Eliesheli bhaaliji bhanabhabho a Yolimu, a Yolimu bhaaliji bhanabhabho a Matiati, a Matiati bhaaliji bhanabhabho a Lawi, **30** a Lawi bhaaliji bhanabhabho a Shimoni, a Shimoni bhaaliji bhanabhabho a Yuda bhaaliji bhanabhabho a Yoshepu, bhanabhabho a Yonamu, a Yonamu bhaaliji bhanabhabho a Liakimu, **31** a Liakimu bhaaliji bhanabhabho a Melea, a Melea bhaaliji bhanabhabho a Mena, a Mena bhaaliji bhanabhabho a Matata, a Matata bhaaliji bhanabhabho a Nashani, a Nashani

bhaaliji bhanabhabho a Daudi, **32** a Daudi bhaaliji bhanabhabho a Yeshe, a Yeshe bhanabhabho a Obhedi, a Obhedi bhaaliji bhanabhabho a Boashi, a Bhoashi bhaaliji bhanabhabho a Shalomoni a Shelemani bhaaliji bhanabhabho a Nashoni, **33** a Nashoni bhaaliji bhanabhabho a Aminadabhu, a Aminadabhu bhaaliji bhanabhabho a Alamu, a Alamu, bhaaliji bhanabhabho, a Eshiloni, a Eshiloni bhaaliji bhanabhabho a Peleshi, a Paleshi bhaaliji bhanabhabho a Yuda, **34** a Yuda bhaaliji bhanabhabho a Yakobho, a Yakobho bhaaliji bhanabhabho a Ishaka, a Ishaka bhaaliji bhanabhabho a Bhulaimu, a Bhulaimu bhaaliji bhanabhabho a Tela, a Tela bhanabhabho a Naoli, **35** bhaaliji bhanabhabho a Shelungi, a Shelungi bhaaliji bhanabhabho a Leu, a Leu bhanabhabho a Pelegi, a Pelegi bhaaliji bhanabhabho a Ebheli, a Ebheli bhaaliji bhanabhabho a Shala, **36** a Shala bhaaliji bhanabhabho a Kenani, a Kenani bhaaliji bhanabhabho a Alupakishadi, a Lupakishadi bhaaliji bhanabhabho a Shemu, a Shemu bhaaliji bhanabhabho a Nuu, a Nuu pubhaaliji bhanabhabho a Lameki, **37** a Lameki pubhaaliji bhanabhabho a Metushela a Metushela pubhaaliji bhanabhabho a Eneko, a Eneko pubhaaliji bhanabhabho a Yaledi, a Yaledi pubhaaliji bhanabhabho a Maalaleli, a Maalaleli pubhaaliji bhanabhabho a Kenani, **38** a Kenani bhaaliji bhanabhabho a Enoshi, a Enoshi bhaaliji bhanabhabho a Sheti, a Sheti bhaaliji bhanabhabho a Adamu, a Adamu bhaaliji bha a Nnungu.

4 A Yeshu gubhabhujile kopoka ku lushi lwa Yolodani, bhali bhagumbelwe Mbamu jwa Ukonjelo, gubhalongweywe naka Mbamu jwa Ukonjelo mpaka kuanga. **2** Kweneko gubhalinjilwe naka Lishetani kwa mobha makumi nsheshe. Gene mobha gowego bhangalya shoshowe, kungai gubhaiplikene

shibhanga. **3** Penepo Lishetani gwabhabhalanjile, “Ibhaga mmwe nni Mwana jwa a Nnungu, nnyuye liganga lino libhe nkate.” **4** A Yeshu gubhannjangwile, “Ishijandikwa. ‘Mundu akalamila nkatepe.’” **5** Kungai Lishetani gwabhakweshiye kunani kaje, akwaalangulaga upalume gwa ilambo yowe gwanakamope. **6** Lishetani gwashite “Shinimpe ntagwale yene ilambo yowei, na indu yakwe yowe pabha njipegwa yowei, mbingaga kumpa mundu ngunakombola. **7** Yene yowei shiibhe yenu nndindibhalilaga.” **8** A Yeshu gubhannjangwile, “Ishijandikwa, ‘Mwaatindibhalile Bhakulungwa a Nnungu bhenu, Na kwaakamulila maengo bhenebho jikape.’” **9** Lishetani gwabhalongweye kwenda ku Yelushalemu, gwabhakweshiye kunani nnala gwa Liekalu, gwabhalugulile, “Ibhaga mmwe nni Mwana jwa a Nnungu mwigwiye pai, **10** pabha ishijandikwa. ‘Shibhaamulishanje ashimalaika bha kunnungu, kukumpa ulinda,’ **11** Kabhili, ‘Shibhannjigalanje mmakono gabhonji, Nnakwiikubhala lukongono nniganga.” **12** Ikabheje a Yeshu gubhannjangwile, “Ishijandikwa, ‘Nnaalinje bhakulungwa a Nnungu bhenu.” **13** Lishetani akabhalinjeje kila muutendelo, gwabhaleshile kwa malanga gashoko. **14** Penepo a Yeshu gubhabhujile ku Galilaya bhalilongoywa kwa mashili ga Mbamu jwa Ukonjelo, na ngani jabho gujishumile ku Galilaya na ilambo yowe ya tome. **15** Bhenebho bhatendaga jiganya bhandu mmashinagogi gabhonji, na bhowe gubhaalumbililenje. **16** Bhai, a Yeshu gubhapite ku Nashaleti, kubhalelelwe, na malinga shibhayobhelele, Lyubha Iya Pumulila gubhajinjile Nshinagogi. Gubhajimi kupinga bhashome Majandiko ga Ukonjelo. **17** Gubhaposhele shitabhu sha a Ishaya ankulondola, gubhashiunukwile gubhapaimene pajandishwe. **18** “Mbamu jwa Bhakulungwa pali na nne, Pabha

bhashing'agula Naapeleshelanje bhalaga Ngani ja Mmbone. Bhashinduma naalungushiyanje bhatabhilwenje kuleshelelwa kwabhonji, Na ashinangalole bhalolanje, Na kwaagombolanga bhabbonelwanga, **19** Na kulunguya shaka sha uguja gwa Bhakulungwa.” **20** Gubhaunishile shitabhu shila gubhampele ntumishi nigubhatemi, bhandunji bhowe bhalinginji nshinagogi mula gubaakolondolesheyenje meyo. **21** Nigubhatandwibhe kwa kwaabhalanjilanga, “Lelo gene Majandikoga gamalile nnipilikananga.” **22** Bhowe gubhalumbililenje na kanganigwa kwa malobhe ga mmbone gubhatayaga a Yeshu, gubhashitenje, “Bhuli jweneju nngabha mwanagwabho a Yoshepu?” **23** A Yeshu gubhaajangwilenje, “Nimumanyi shimmalanjilanje lutango lwa kuti, ‘Mmitela ilamye gwammwene,’ nakabhili shimmalanjilanje, ‘Yowe itupilikene ishitendeka ku Kapalanaumu ntende na pa shilambo shenu pano.” **24** Gubhapundile kubheleketa bhalinkuti, kweli ngunakummalanjilanga jwakwapi nkulondola akundwa pa shilambo shakwe. **25** Ikabheje mpilikananje, kweli ngunakummalanjilanga! Yaka ya a Eliya bhashinkupagwanga bhashitenga bhabhagwinji nshilambo sha Ishilaeli. Gene mobhago ula janganya yaka itatu na nushu, gushikoposhele shibhangha sha punda shilambo showe. **26** Nkali nneyo a Eliya bhangatumwa kuka nshitenga jojowe, ikabhe kuka jwankongwe nshitenga jwa ku Sheleputa shilambo sha Shidoni. **27** Na kabhili, bhapalinji bhamangundula bhabhagwinji yaka ya ankulondola a Elisha nshilambo sha Ishilaeli. Nkali nneyo jwakwapi jojowe alamiywe, ikabhe a Naamani bhandu bha ku Shilia. **28** Bhowe bhalinginji nshinagogi mula gubhatumbelenje kwa kaje bhakapilikananje genego. **29** Gubhajimingene, gubaakukulumyenje a Yeshu nshilambo

shabhonji shashenjilwe pantundu shitumbi, gubhaapelekenje mpaka nnushingu nkupinga bhaanokolelanje nnikote. **30** Ikabheje a Yeshu gubhapitile pakati jabhonji pepo, nigubhaijabhulile. **31** Kungai a Yeshu gubhaelele mpaka ku Kapalanaumu shilambo sha ku Galilaya, Lyubha lya Pumulila bhatendaga jiganya bhandu. **32** Gubhakanganigwenje kwa majiganyo gabho pabha bhatendaga bheleketa mbuti mundu akwete ukulungwa. **33** Na Nshinagogi mula ashinkupagwa mundu ashinkushikilwa na lioka jwa nyata gwajobhele alinkuti **34** "Ntuleshe, tukwete nndi na mmwe a Yeshu Bhanashaleti? Bhuli nshikwiya kutumaliya? Nne nimmanyi mmwe agani. Mmwe ni Mundu jwa ukonjelo jwa a Nnungu." **35** A Yeshu gubhankalipile lioka jula bhalinkuti "Pumula! Nsheshe munduju!" Bhai lioka jula akanngwiyeje mundu jula pai bhandu bhowe bhalilosheyanga, ni gwanshoshile gwangali kumpoteka wala kashoko. **36** Bhandu bhowe gubhakanganigwenje, gubhabhalanjilenenje. "Genega majiganyo gashi, kwa ukulungwa na mashili bhanakwaabhalanjilanga ashimaoka bhangali bha mmbone bhanshoshekane mundu, na inatendeka!" **37** Ngani ja a Yeshu jikushumaga mmbali yowe. **38** A Yeshu gubhakopweshe Nshinagogi, gubhapite kunngwabho a Shimoni. Bhakongwe bhamo akwebhabho a Shimoni bhatendaga sheluka kwa kaje, gubaajujilenje bhaalamye. **39** A Yeshu gubhajinjile nikwaakotimila bhalwele bhala, nikushikalipila shilwele shila, gushaashoshile. Shangupe bhakongwe bhala gubhajinwishe, gubhatandwibhe kwaatumishilanga. **40** Pulyatitimilaga lyubha, bhandu bhowe bhakwetenje bhalwelenji bha ilwele yoyowe ila gubhaapelekenje kwa a Yeshu, nabhalabho gubaakwashiyenje na makono, gubaalamienje bhowe. **41** Bhandu bhabhagwinji gugaashoshilenje maoka gangali

ga mmbone akuno galijobhela, "Mmwe Bhanabhabho a Nnungu." Ikabheje a Yeshu gubhagakalipile, bhangagaleka gabhelekete, pabha gaamanyi kuti bhenebho a Kilishitu. **42** Malabhi gakwe lyamba a Yeshu gubhajawile gubhapite kujika. Lugwinjili lwa bhandu lwatendaga kwaloleya. Bhakaaimananjeje, gubhalinjilenje kwaibhilila bhanajabhule. **43** Ikabheje bhalabho gubhaajangulenje, "Ngunapinjikwa kulunguya Ngani ja Mmbone ja Upalume gwa a Nnungu nneila peila na mulambo ina, pabha njitumwa kwa ligongo lya genego." **44** Gubhapundile kulunguya mmashinagogi ga ku Galilaya.

5 Lyubha limo a Yeshu bhashinkujima nnyenje litanda lya Geneshaleti na bhandu bhabhagwinji bhalibhaatimbililenje bhalinokolananga nkocabhandishila, kuinga pilikanishiya lilobhe lya a Nnungu. **2** Gubhajibhweni mitumbwi jibhili nnyenje litanda. Ashaayene bhatanda yamaki bhashinkutulukanga kualaya mau gabhonji. **3** A Yeshu bhakajinjileje mumashua gumo gwaaliji gwa a Shimoni, gubhaalugulile a Shimoni bhaunokolessheyem mashu ga taliya kashoko na mumpelo litanda. Gubhatemi, gubhajigenye lugwinjili lwa bhandu bhalimashua. **4** Bhakamaliyeje kujiganya, gubhaalugulile a Shimoni, "Mpeleshe ntumbwi pa shilindili, nkatejelanje mau genunji ntandanje yamaki." **5** A Shimoni gubhaajangwile, "Mmakulungwa, tushisheya shilo showeshi nkutanda yamaki ikabheje shakwa shitupatile, ikabheje pabha nkubhalanga mmwe, shindejele mau gano." **6** Bhakatejelanjeje mau gabhonji, gubhapatilenje yamaki yaigwinji, nkali mau gugatandwibhe kukutuka. **7** Gubaashemilenje ashaajabhonji bhalinginji mmitumbwi jina gubhaikengenenje kukwajangutanga, gubhagumbeyenje yamaki mitumbwi jinaabhili, gujitanbwibhe kutitimila mmashi. **8** A

Shimoni Petili bhakabhoneje nneila, gubhaatindibhalile a Yesu, gubhashite, "Mwijjabhulile apano Mmakulungwa, pabha nne nankulebhal!" **9** A Shimoni na ashaajabhonji gubhakanganigwenje gaapata yamaki yaigwinji nneila. **10** Nneila peila a Yakobho na a Yowana bhana bha a Shebhedayo bhalinginji bhatanda yamaki ajabhonji a Shimoni gubhakanganigwenje. A Yesu gubhaalugulile a Shimoni, "Nnajogope, kutandubhila nnaino nkatanda yamaki, ikabheje liengo lyenu shilibhe lya tanda bhandu." **11** Bhai bhakajikwakwatananjeje mitumbwi jila mpaka palanga ja litanda, gubhaleshilenje yowe gubhaakagulenje a Yesu. **12** A Yesu pubhaliji, kushilambo shimo, jwannume jumo jwa mangundula shiilu showe, gwabhabhweni. Bhai akwiigwyaga namanguku alikwaajuga a Yesu alinkuti, "Mmakulungwa, mpingaga, shinndakaye." **13** A Yesu gubhagolweye nkono gubhankwashiye akuno bhalibheleketa, "Ngunipinga, utakate!" Shangupe mangundula gala gakunshokaga. **14** A Yesu gubhannalajile mundu jula bhalinkuti, "Unammalanjile mundu jojowe, ikabhe ukailanguye ku bhakulungwa bhaabhisila, ukashoye mbepei ya takata kwako, malinga shijilugula shalia ja a Musha, ibhe ukong'ondelo kunngwabhonji kuti utekete."

15 Ikabheje ngani ja a Yesu jikupundaga kushuma kowe. Makundi ga bhandu gugalopweshe kukwapilikanishiya na kulamywa ilwele yabhonji. **16** Ikabheje a Yesu, papagwinji bhatendaga kwenda ku jika kukwaajuga a Nnungu. **17** Lyubha limo a Yesu bhatendagajiganya. Mapalishayo na bhaajiganya bha shalia kukoposhela mmbali yowe ya shilambo sha ku Galilaya na ku Yudea na ku Yelushalemu pubhalinginji popo bhatemingene. Na mashili ga Bhakulungwa pugaaliji na a Yesu nkupinga bhaalamyanje bhalwelenji. **18** Kashokope

gubhaikengene bhandunji bhannjigelenje mmashila mundu jwa poloka, gubhalinjilenje kunnjinjiya nkati bhampelakanje kwa a Yeshu. 5:18 **19** Ikabheje kwa ligongo lya gwinji gwa bhandu, bhangakombolanga kujinjiya nkati. Bhai gubhakwelilenje kushipagala, gubhapenwilenje nigubhantulwiyenje mundu jwa poloka jula na mashila, mpaka pakati pakati ja bhandunji mmujo ja a Yeshu. **20** A Yeshu bhakajibhoneje ngulupai jabhonji, gubhannugulile mundu jula, "Ambwiga nneshelelwe yambi yenu." **21** Mapalishayo na bhaajandika bha shalia gubhatandwibhenje kwiibhuyanga, "Bhenebha ni agani bhakwaakupulu a Nnungubha? Jwakwapi mundu akombola kuleshelela yambi ikabhe a Nnungu jikape!" **22** Ikabheje a Yeshu gubhaimanyi ng'aniyo yabhonji, gubhaabhushiyenje, "Kwa ndi nnakwiibhuyanga genega mmitima jenunji? **23** Shei shipepeshe, kubheleketa, 'Uleshelelwe yambi,' eu 'Jima ujende?' **24** Bhai pungupinga mmumanyanje kuti Mwana juka Mundu ashipegwa mashili ga leshelela bhandu yambi yabhonji pa shilambolyo." Penepo gubhammalanjile mundu jwa poloka jula, "Jima tola likai lyako guijendele kumui." **25** Shangupe, mundu jwa poloka jula gwajimi pa meyo gabhonji, gwatolile likai lyakwe, gwapite kumui akuno alikwaakuya a Nnungu. **26** Bhowe gubhakanganigwenje na shijogopele, gubaakushiyenje a Nnungu, bhalinkutinji, "Lelo tuibhweni ilapo." **27** Gakapiteje genego, a Yeshu gubhakopweshe palanga gubaaweni bhakamula koli bhamo bhashemwaga a Lawi bhatemi nnyumba ja kamulila koli. A Yeshu gubhaabhalanjile, "Nngagule!" **28** A Lawi gubhajimi gubhaleshile yowe gubaakagwile. **29** A Lawi gubaashemele a Yeshu shalya kunngwabho. Na likundi likulungwa lya bhakamula koli na bhandunji bhana pubhalinginji

popo bhatemingenerje nkulya. **30** Mapalishayo na bhaajiganya bha shalia bhalinginji nkumbi gumo, bhakwainginishilangaga bhaajiganywa bha a Yeshu bhalinkutinji. "Kwanndi nnalyanganga na papila na bhakamula koli na bhandunji bhakwetenje yambi?" **31** A Yeshu gubhaajangwilenje, "Bhabhakotonji bhakakunnoleyanga mmitela, ikabheje bhakunoleyanga mmitela bhalwelenji. **32** Nangajya kukwaloleyanga bhanguja, ikabhe bhakwetenje yambi nkupinga bhaipetanje." **33** Bhandunji bhala gubhaaluguliljenje a Yeshu, "Bhaajiganywa bha a Yowana Bhabhatisha bhanatabhanga mobhaga na juga, nkali bhaajiganywa bha Mapalishayo pubhatendanga nneyo peyo. Ikabheje bhaajiganywa bhenu mmwe bhanalyanganga na ng'wa."

34 A Yeshu gubhaajangwilenje, "Bhuli, ashaambwigamundu bhaka nkulomba, bhalipinjikwanga kutabha akuno bhatemingene pamo na nnyene nkulomba? **35** Shigaishe mobha, nkulomba shibhanshoyanje pa bhandupo, penepo shibhatabhanje." **36** A Yeshu gubaabhalanjilenje aluno lutango luno nkupinga kwaajiganyanga. "Jwakwa mundu apapula shibhamba ngubho ja ambi nitotela munngubho ja bhukala, ibhaga atendaga nneyo shajiangabhanye ja ambijo, na shibhambasho shikatolana na nngubho ja bhukalajo. **37** Wala jwakwa mundu ataga divai ja ambi mmipatila ja bhukala, pabha divai ja ambijo shijipwengule mipatila ja bhukalajo, mipatila shijipwengushe na divai shijijitishe. **38** Divai ja ambi pataga mmipatila ja ambi. **39** Jwakwa mundu jikunnonyela kung'wa divai ja ambi ang'waga ja bhukala, pabha bhakutinji, 'Ja bhukala ni ja mmbone kaje.'

6 Lyubha limo lya Pumulila a Yeshu bhatendagapita mmigunda ja ngano, bhaajiganywa bhabho gubhatandwibhenje kutema maashe ga ngano, nipulula nitikita na makono kutauna. 2

Ikabheje Ashimapalishayo bhana gubhaabhushiyenje, “Pakuti mmanganya nnalekanga shalia ja Lyubha lya Pumulila?” **3** A Yeshu gubhaajangulenje, “Bhuli mmangashomanga shibhatendile a Daudi na ashaajabhonji pubhakwetenje shibhang?” **4** Bhenebho bhashinkujinjila nnyumba ja a Nnungu, gubhatolile mikate ja ukonjelo jila, gubhalile nikwaapanganga na ajabhonji. Ikapinjikwaga mundu kulya jene mikatejo ikabhe bhakulungwanji bhaabhisila jikape.” **5** A Yeshu gubhaalugulilenje, “Mwana juka Mundu ni Nkulungwa jwa Lyubha lya Pumulila.” **6** Lyubha lina lya Pumulila, a Yeshu gubhajinjile nshinagogi gubhajigenye. Nkati mula ashinkupagwa mundu jumo nkono gwakwe gwa nnilo gwashinkupoloka. **7** Bhaajiganya bha shalia na Mapalishayo bhatendaga loleyanga shiumilo sha kwaashitakiya a Yeshu, kwa nneyo gwaatemingene nkulolela ibhaga shibhannamye mundu Lyubha lya Pumulila. **8** Ikabheje a Yeshu gubhaimanyi ng'aniyo yabhonji, gubhammalanjile jwa poloka nkono jula, “Jinuka, ujime mmujo ja bhandu bhowe.” Mundu jula gwapite jima mmujo. **9** Kungai a Yeshu gubhaalugulilenje, “Ngunakummuyanga, shalia jibhalanga bhuli ga Lyubha lya Pumulila, jinakutuleka tutende ya mmbone eu tutende yangali ya mmbone, kutapula gumi guka mundu eu kubhulaga mundu?” **10** Gubhaalolinje bhandu bhowe bhatemingene pepala, gubhammalanjile mundu jula, “Goloya nkono gwako.” Nigwagolweye, na nkono gwakwe guulamile. **11** Ikabheje gubhatumbelenje kwa kaje, gubhakungulushilenje shibhaatendanje nndi a Yeshu. **12** Lyubha limo a Yeshu gubhapite kushitumbi, nisheya nkwaajuga a Nnungu. **13** Pa lyamba lyakwe gubhaashemilenje bhaajiganywa bhabho, gubhaagwile bhandu likumi limo na bhabhili gubhaashemilenje, mitume. **14** A Shimonii bhapegwilwe lina na a Yeshu lya Petili na a

Ndeleya apwabho na a Yakobho na a Yowana na a Pilipi na a Bhatolomeyo, **15** A Matei na a Tomashi na a Yakobho bha a Alupayo na a Shimoni bhashemwaga “A Shelote,” Yani nshilambo apwatanila shilambo shakwe, **16** na a Yuda bhana bhabho a Yakobho na a Yuda Ishikaliote bhaatendebhwishe a Yesu kungai. **17** Bhakaeleleje kopoka kushitumbi na ajabhonji, a Yesu gubhajimi pashibhata. Penepo lyashinkupagwa likundi likulungwa lya bhaajiganywa bhabho na lugwinjili lwa bhandu kukopoka mmbali yowe ja ku Yudea na ku Yelushalemu na mbwani ja ku Tilo na ku Shidoni, **18** gubhaikengenenje kukwaapilikanishiya a Yesu na kuulamiyuwa ilwele yabhonji. Bhatendaga kwaalamyanga bhowe na bhashikilwangaga na maoka bhatendaga lamywanga. **19** Bhandu bhowe bhatendaga lajililanga kwaakwaya, pabha gatendaga kwaakopoka mashili ga lamya bhandu bhowe. **20** A Yesu gubhaatendebhushilenje bhaajiganywa bhabho, gubhashite. “Mbaya mmanganya nninginji mmalaganga, pabha Upalume gwa a Nnunu gwenunji. **21** Mbaya mmanganya nkietenje shibhanga nnaino, Pabha kungai shinnjukutanje. Mbaya mmanganya nkugutanga nnaino, Pabha kungai shinng’ekanje. **22** “Mbaya mmanganya bhandunji bhanshimangaga, nikummambalanga na kuntukananga na kumputuyanga kwa ligongo lika Mwana juka Mundu. **23** Genego galikoposhela mmanganya nng’angalanje, pabha, upo yenunji kunnunu shiibhe yaigwinji. Pabha bhanangulungwa bhabhonji bhashinkwatendelanga nneyo peyo ashinkulondola bha Nnunu. **24** Ikabheje ole mmanganya nninginji matajili, Pabha tayali mposhilenje. **25** Ole mmanganya nnjukutnjie nnaino, Pabha kungai shintotokanje. Ole mmanganya nkuekanga nnaino, Pabha kungai mpinga kwiigutanjilanga. **26** Ole mmanganya

bhandu bhannumbililangaga, Pabha bhanangulungwa bhabhonji bhashinkwatendelanga nneyo peyo ashinkulondola bha unami.” 27 “Ikabheje ngunakummalanjilanga nkumbilikananga mmwe, mwaapinganje bhamagongo ajenunji, mwaatendelanje ya mmbone bhankunshimanga. 28 Mwaajujilanje mboka bhakunnoshanga, na mwaajujilanje kwa Nnungu bhene bhakuntendelanga yangali ya mmbone. 29 Mundu ankomaga lipapa palitukwa limo muntendebhushiye na lya bhili. Mundu ampokonyolaga likoti lyenu nnanng’ibhililile kutola na lishati. 30 Jojowe akunnjuga shindu mumpe, na mundu ampokonyolaga indu yenu nnannonje. 31 Mwaatendelanje bhandu malinga shinkupinganga mmanganya bhantendelanje. 32 “Ibhaga mwaapingangaga bhakumpingangape, igala shimpegwanje upo yashi? Pabha nkali bhakwetenje yambi bhalipingana. 33 Na ibhaga mwaatendelangaga ya mmbone bhakuntendelanga ya mmbonepe shimpegwanje upo yashi? Nkali bhakwetenje yambi bhalitendanga nneyo peyo. 34 Na ibhaga nkwaapolekanga bhandu bhunkukulupalilanga shibhannipanje, shimpegwanje upo yashi? Nkali bhakwetenje yambi bhanakwaapolekanga bhakwetenje yambi ajabhonji nkupinga bhaabhujishiyanje yowe. 35 Ikabhe mmanganya mwaapinganje ashaamagongo ajenunji, na mwaatendelanje ya mmbone, mwaapolekanje nnalolelanje kubhujishiwa, na upo yenunji shiibhe yaikulungwa, na shimmanganje bhana bha Bhakulungwa a Nnungu. Pabha bhenebho ni bhanguja kwa bhangali bha mmbone na bhakapinganga kutenda eja. 36 Nkolanje shiya malinga Ainabhenunji shibhali na shiya. 37 “Nnaaukumulanje bhananji, na mmanganya nkaukumulwanga, nnaagambanje bhananji na mmanganya nkagambwanga, mwaaleshelelanje ashaajenunji,

na mmanganya shinneshelwanje. **38** Mwaapanganje bhananji ibhapinganga, na mmanganya shimpegwanje. Elo, shintabhanje mmapepe genunji shipimilo shigumbele nishinyilwa mpaka pakatika. Pabha shipimilo shosho pesho shinkwaapimilanga bhananji shimpinga pimilwanga na a Nnungu.” **39** A Yesu gubhaatanjilenje aluno lutango luno. Bhuli, nangalole kukombola kunnongoya mpanda nangalole mwine? Bhowe bhakatum bushilanga nniimbo? **40** Nkujiganywa akakwaapunda bhaajiganya bhakwe, ikabheje nkujiganywa amaliyaga kwijiganya shalandane na bhaajiganya bhakwe. **41** Kwa nndi unakushibhona shikoko shili nniyo lika nnjako, ikabheje ukakushibhona shipande shili nniyo lyako? **42** Eu shiukombole bhuli kunnugulila nnjako, Mpwanga linda nikushoye shikoko nniyo lyako, na akuno ukakushibhona shipande shili nniyo lyako? Ugwe nngulumba! Utandubhe kushoya shipande shili nniyo lyako, penepo shulole ukoto, nikombola kushoya shikoko nniyo lika mpwako. **43** “Nkongo gwa mmbone nngaogoya iepo yangali ya mmbone, na wala nkongo gwangali gwa mmbone nngaogoya iepo ya mmbone. **44** Nkongo pubhakuumanayanga kwa iepo yakwe. Pabha bhandu bhakaakabhanga tini munkongo gwa mibha, na wala bhakaakabhanga shabhibhu nnitepo lya mbigili. **45** Mundu jwa mmbone shatende ya mmbone ikopoka nshibhiko sha mmbone ili muntima gwakwe. Na mundu jwangali jwa mmbone shatende yangali ya mmbone ikopoka nshibhiko shangali shammbone ili muntima gwakwe. Pabha yaabheleketa mundu inngumbele muntima gwakwe.” **46** “Kwa nndi nnanjemanga ‘Bhakulungwa, Bhakulungwa,’ akuno nkatendanga ingummalanjilanga? **47** Shininnugulilanje shilanda sha mundu jojowe anyiila nne, nipilikanishiya malobhe gangu nikugakagulila.

48 Jwenejo analandana naka mundu akwete lunda, ashnjile pa ndandali niola nshingi ukoto mpaka nnindandawe na nyumba nishimilika. Nushi guigumbele mashi nipobhola, ndanje nikwenda koma nyumba jila, ikabheje jangatenganyika, pabha jashinkushengwa pa ndandali. **49** Ikabheje jojowe apilikana malobhe gangu anatende shindu shoshowe, jwenejo analandana na mundu ashnjile nyumba pa lianji gwangali kuolela ukoto, ndanje jakopoka nnushi jikaisheje, gujikomile nyumba jila, gujibhomweshe jowe nigwa."

7 Bhakabheleketeje gubhapinjile bhandu bhapilikananje gala, a Yeshu gubhapite kushilambo sha ku Kapalanaumu. **2** Kweneko bhashinkupagwa bhakulungwa bhamo bha manjola ga Bhaloma, bhenebho bhashinkukola ntumwa jwabho jubhampinjile kaje. Jwene ntumwajo atendaga lwala tome kuwa. **3** Bhakulungwa bha manjola bhala bhakapilikaneje nnganya ja a Yeshu, gubhaatumilenje bhanangulungwa bha Bhayaudi bhajendangane bhakaajuganje a Yeshu bhakannamye ntumwa jwabho. **4** Bhakaikanganeje kwa a Yeshu gubhaashondelesheyenje kaje, bhalinkutinji, "Bhenebha inapwaa kwaatendela nneyo, **5** pabha bhanakwapinganga bhandu bhetu, na bhashikutushenjela shinagogi jila." **6** Bhai a Yeshu gubhalongene nabhonji, bhandunji bhala. Bhalo tome na ika ku likaja lya bhakulungwa bha manjola ga Bhaloma bhala, bhakulungwa bha manjola bhala gubhaatumilenje asha ambwiga ajabhonji kubhaalugulilanje a Yeshu kuti, "Mmakulungwa nnapunde kwiiabhuya, pabha nne nangali malango ga kumposhela mmwe nnyumba jangu. **7** Na shiumilo niibhone nangali shanga sha kwiya kunngwenu mmwe. Ikabheje mmelekete lilobhepe na ntumwa jwangu shaalame. **8** Pabha nkali nne puni pai ja ukulungwa, pai

jangu bhapalinji ashimanjola. Na nimmalanjiga linjola jumo, 'Jenda' alikwenda, nimmalanjilaga junu, 'Jiya' anakwiya, na nimmalanjilaga ntumwa jwangu, 'Tenda ashi,' najwalakwe alitenda." **9** A Yesu bhakapilikaneje genego bhashinkuimonga kaje, gubhatendebhwishe nikululola lugwinjili lwa bhandu bhaakagulangaga bhala, gubhashite, "Nganabhe kummona mundu akwete ngulupai jikulungwa nnei nkali kubhandu bha Ishilaeli." **10** Bhandunji bhala bhakaikanganeje kumui, gubhanng'imenenje ntumwa jula alamile. **11** Lyubha lyolyo a Yesu gubhapite kushilambo shimo shashemwaga ku Naini, bhalii bhalongene na bhaajiganywa bhabho na likundi likulungwa lya bhandu. **12** Bhai, bhalii tome na nnango gwa lugwani gwa jinjilila nshilambo mula, gubhakoposhelenje bhandunji bhajigelenje maiti gaka nngwendo jumo mwana jwa jikape jwa bhakongwe bha shitenga. Bhandunji bhabhagwinji bha shene shilambo shila pubhalinginji pamo na bhakongwe bha shitenga bhala. **13** Bhakulungwa a Yesu bhakaabhoneje bhakongwe bhala gubhaabhonele shiya, gubhaalugulile, "Nnagute." **14** Kungai gubhapite kushikwaya shinanda shibhajigalilenje maiti shila, na bhajigelenje bhala gubhajimingene. Nigubhashite, "Nngwendo! Ngunakuubhalanjila, jinuka!" **15** Nngwendo awile jula, gwajinwishe gwatemi, gwatandwibhe kubheleketa. A Yesu gubhankamwiye kwa akwabhe. **16** Bhandu bhowe gubhajogopenje, gubhaainiyenje a Nnungu bhalinkutinji, "Ankulondola bhakulungwa bha a Nnungu bhakoposhele munkumbi gwetu. A Nnungu bhashikwiya kukwaajangutilanga bhandu bhabho." **17** Jene nganijo jikushumaga ku Yudea kowe na ilambo ya tome. **18** Bhaajiganywa bha a Yowana gubhaalugulilenje a Yowana yowe yatendekaga ila. Nabhalabho

a Yowana gubhaashemilenje bhaajiganywa bhabho bhabhili, **19**
gubhaatumilenje ku Bhakulungwa a Yesu bhakaabhuyanje.
“Bhuli, mmwe Bhaatapula bhakwiya bhala eu twaalindilile
bhana?” **20** Bhaajiganywa bhala bhakaaimananjeje a Yesu
gubhaabhalanjilenje, Tushitumwa na a Yowana Bhaabhatisha
tummuye kuti, “Bhuli, mmwe Bhaatapula bhakwiya bhala eu
taaalindilile bhana?” **21** Popo pepo a Yesu bhatendaga
kwaalamyanga bhandu bhabhagwinji bhalagangaga na
ilwele na bhashikilwanga maoka na kwaapanganga kulola
ashinangalole bhabhagwinji. **22** Bhai, a Yesu gubhaajangwilenje.
“Nnjendangane nkaabhalanjilanje a Yowana yowe impilikenenje
na kwiilolela mmashayenenji, ashinangalole bhanalolanga,
ashinangwabha bhanakwendangana, bhamangundula
bhanalama, ashinangapilikane bhanapilikana, bhawilenje
bhanayuywanga, na bhaalaga bhanalungushiywanga Ngani
ja Mmbone. **23** Mbaya jwene mundu ikakunshima kwa
ligongo lyangu nne.” **24** Bhaajiganywa bha a Yowana
bhakjabhulanganeje penepo, a Yesu gubhatandwibhe
kwaalugulilanga bhandu bhagumbelenje bhala nnganya ja
a Yowana. “Pumwapitengenjenje mukonde kukushibhona
nndi? Mwaganishiyanga kukulibhona litete litikinywa na
mbungo? **25** Ikabhe nneyo, kumwapitengenjenje kulola nndi?
Kumwapitengenjenje kukunnola mundu awalile nngubho ya
bhei jikulungwa? Bhaawalanga nngubho ya bhei jikulungwa
nitama ndamo ya poka mwaakutamangana mmajumba ga
shipalume! **26** Bhai, mmalanjilanje, mwapitengenjenje kulola
nndi? Mwapitengenjenje kunnola nkulondola? Elo, numbe
ngunakummalianjilanga, kupunda nkulondola. **27** Bhenebha ni a
Yowana bhalugwilwe Mmajandiko ga Ukonjelo. ‘Ngunakuntuma

muntenge jwangu, Anng'alashiye mpanda gwenu.” **28**
“Ngunakummalanjilanga, munkumbi gwa bhabhelekwenje
jwakwapi ali jwankulungwa kwaapunda a Yowana Bhabhatisha.
Ikabheje, jwene ali jwa nshoko kaje mu Upalume gwa a
Nnungu, ni ali jwa nkulungwa kupunda bhenebho.” **29** Bhandu
bhowe bhapilikenenje genego na nkali bhaakamula koli
nigubhakundilenje kuti a Nnungu ni bha aki na bhanguja pabha
bhashinkubhatishwanga na a Yowana. **30** Ikabheje mapalishayo
na bhaajiganya bha shalia, bhashinkukananga yatumbililwe na a
Nnungu, kwa nneyo nigibhakanilenje kubhatishwa na a Yowana.
31 A Yesu nigubhaabhushiyenje, “Bhai bhandu bha lwene
lubhelekolu naalandanyanje na ndi? Paakulandananga na
shindu shashi? **32** Bhashilandananga na bhana bhatemingene
pa lubhala lwa ushiya indu, bhalishemananga ashayenenji.
Twashinkunngombelenga imbeta, ikabheje mwangainanga!
Twashinkunnjimbilanga nyimbo ya ililo ikabheje mmanganya
mwangagutanga! **33** Pabha a Yowana bhashinkwiya, bhatendaga
tabha na bhakang'waga divai, mmanganya gunshitenje.
'Bhakwete lioka!' **34** Najwalakwe Mwana juka Mundu ashiika,
analya na kung'wa, mmanganya gunshitenje. 'Munnolanje, jwa
doka na kolelwaju, mmbwiga nnjabhonji bhakamula koli na
bhakwetenje yambi!' **35** Nkali nneyo, lunda lwa a Nnunu
lumanyishe kuti lwa mmbone na lwa aki kubhandu bhowe
bhakundilenje.” **36** Bhapalishayo bhamo bhashinkwaashemela
shalya a Yesu kunngwabho. Nigubhajinjile nnyumba ja a
bhapalishayo bhala gubhatemi kulya shalya. **37** Bhai, pene pa
shilambo pala, bhashinkupagwa bhakongwe bhamo bhakwete
yambi. Bhakapilikaneje kuti a Yesu mubhali nnyumba ja
a Palishayo bhala, gubhatolile shupa sha mauta ga nunjila

shieleywe kwa liganga lya alabhashita. **38** Nigubhajimi tome na makongono ga a Yeshu bhaliguta, na minyoi jabho jilikwaandolishila a Yeshu mmakongono. Bhakongwe bhala gubhaponwele makongono ga a Yeshu kwa umbo yabho. Kungai gubhagalambile makongono gala na gubhaapekeye mauta ga nunjila gala. **39** Bhapalishayo bhaashemile a Yeshu bhala, bhakagabhoneje genego, gubhaganishiye muntima gwabho, "Abha bhandubha kweli bhaakaliji ankulondola bha a Nnungu, ikaaliji bhamumanyi shibhali abha bhakongwe bhakwaakwayabha kuti bhakwete yambi." **40** A Yeshu gubhaabhalanjile bhapalishayo bhala, "a Shimoni, shipali shindu shingupinga kummalanjila." Nabhalabho a Shimoni bhakwaalugulilaga, "Elo, mmelekete Mmajiganya." **41** A Yeshu gubhashite, "Bhandu bhabhili bhashinkupolekanga ela kubhandu bhamo, bhamo libhalongwaga ligambo lya nshaala gwa shaka shimo na nushu, bhana ligambo lya nshaala gwa mwei gumo na nushu. **42** Bhakalepelanjeje kulipa magambo gabhonji, bhandu bhala gubaalesheelenje bhanaabhili. Lelo penepo munkumbi gwa bhene bhabhilibho, bhei shibhapunde kwaapinga bhaaleshelela magambo bhala?" **43** A Shimoni gubhajangwile, "Penepo imanyishe kuti, bhaleshelelwelwe ligambo likulungwa shibhapunde kwaapinjiya." A Yeshu gubhaabhalanjile, "Elo penepo nnjangwile ukoto." **44** Penepo gubaatendebhushile bhakongwe bhala, nikwaalugulila a Shimoni, "Nnikwaabbona abha bhakongwebha? Nne punyinjile munngwenu muno mwangamba mashi ga nabha mmakongono gangu, ikabheje abha bhakongwebha bhashinyobhya makongono gangu na minyoi jabho nimbonola na umbo yabho. **45** Mmwe mwanganyambata, ikabheje abha bhakongwebha shijinjilile nne

apano bhatendaga nyambata makongono gangu. **46** Mmwe mwangambakaya mauta muntwe, ikabheje abha bhakongwebha bhashimbakaya mauta mmakongono gangu. **47** Kwa nneyo ngunakummalanjila kupinjiya kwabho kwapunda kunalanguya kuleshelelwa kwa ilebho yabho yaigwinji. Aleshelelwe ilebho ishoko, kupinga kwakwe kushokope.” **48** Bhai a Yeshu gubhaabhalanjile bhakongwebhala, “Nneshelwelwe yambi yenu.” **49** Penepo bhatemingenenabho pashalya bhala gwaabhu yenene, “Bhenebha bhandu bhashi, bhaakombola nkali kuleshelela yambi?” **50** Nabhalabho a Yeshu gubhaabhalanjile bhakongwe bhala, “Ngulupai jenu jintapwile, nnjende kwa ulele.”

8 Gakapiteje genego a Yeshu bhashinkupita mwilambo na ijiji bhalipita lunguya Ngani ja Mmbone ja Upalume gwa Nnungu. Bhaajiganywa likumi limo na bhabhili bhala gubhalongenenabhonji. **2** Na kabili bhanabhakongwe bhana bhashoshiywenje maoka na bhalamywenje ilwele na a Yeshu bhatendagalongana nabhonji. Bhene bhanganyabho pubhalinginji, a Malia Magidalena, bhashoshiywe maoka shabha, **3** a Yowana akongobhabho a Kusha bhatumishi bhakulu bha nnyumba ja a Elode na a Shushana na bhananji bhowepe, bhene bhanabhakongwebho bhatendaga kwajangutilanga a Yeshu kwa mali gabhonji ashaayene. **4** Likundi likulungwa lya bhandunji lyashinkwaajila a Yeshu kukoposhela ilambo na ilambo. Nabhalabho gubaatanjilenje aluno lutango luno. **5** “Nkupanda ashinkwenda miya mmbeju yakwe. Pamiyaga pala mmbeju ina ikugwilaga mumpanda, bhpita mpanda gwaalibhetenje na ijuni gwiiilile. **6** Ina gwiigwilile nnindandawe, ikameleje gwiiwile pabha pakakweteje mashi. **7** Ina gwiigwilile mmiibha. Mibha ila ikakuleje guitenjele. **8** Na ina guigwilile palitaka lya mmbone, guimelile

niogoya yaigwinji." Bhakabheleketeje genego, gubhautiye lilobhe bhalinkuti, "Akwete makutujo apilikane!" **9** Bhaajiganywa bhabho a Yeshu gubaabhuhiyenje malombolelo ga lwene lutangolo. **10** Bhalabho gubhajangwile, "Mmanganya nkwenetenje shikono sha kwiiimanya indu ya nng'yo ya mu Upalume gwa a Nnungu, ikabhe nngabha bhananjibho, kwa bhanganyabho pungwaabhalanjilanga kwa ndango. Nkupinga bhalolangaga bhanashibhonanje shindu na bhapilikanangaga bhanamumanyanje." **11** Bhai gegano malombolelo ga lutangolu. Mmbeju lilobhe lya a Nnungu. **12** Nneyo peyo shikoposhele kwa mmbeju igwilile mumpanda shinalandana na bhandunji bhakulipilikananga lilobhe lila, kungai gwashe ibhilishi gwalishoshiye mmitima jabhonji, bhanakulupalilanga nitapulwa. **13** Nneyo peyo shikoposhele kwa mmbeju igwilile pa lindandawe, shinalandana na bhandunji, bhakupilikananga lilobhe lila bhanakuliposhelanga nikwiinonyela. Ikabheje, namalinga mmbeju ila, bhene bhandunjibho pabha bhangalinji nnjiga, bhanakulupalilanga kashokope na bhalingwangaga bhakaakabhanga kuwa ntima. **14** Nneyo peyo shikoposhele kwa mmbeju igwilile mmibha shinalandana na bhandunji bhakulipilikananga lilobhe lila, ikabheje bhajabulanganaga kashokope, bhanaakamulwanga na lipamba, na indu na mboka ya ndamo, bhalabhonji bhakaaogoyanga iepo nikomala. **15** Nneyo peyo shikoposhele kwa mmbeju igwilile pa litaka lya mmbone, shinalandana na bhandunji bhakulipilikananga lilobhe lila kwa ntima gwa mmbone nikunda. Bhanganyabho bhanakwiikakatimilanga mpaka niogoya iepo. **16** Bhandu bhakakoleyanga kandili nikuijunishila eu kujibhika nng'ungu. Ikabheje pabbikwa panani, nkupinga bhandu bhajinjilanga bhashibhonanje shilangaya. **17** "Pabha

shoshowe shishiyye, shipinga undukulwa na yowe ili ya nng'yo ipinga manyika kulugwinjili. **18** “Kwa nneyo mwiiteiganje na inkupilikanangayo, pabha akwete shindu shajenjesheywe, ikabheje jwangali shindu, nkali shishoko shaaganishiya akwete shila, apinga pokonyolwa.” **19** Penepo anyinabhabho na ashaapwabho a Yesu gubhaikengenenje kukwaalola, ikabheje bhangakombolanga kwaabhandishila kwa ligongo lya lugwinjili lwa bhandu. **20** A Yesu gubhabhalanjilwe kuti, anyinabhenu na ashaapwenu pubhalinginji palanga, bhanapinganga kummona. **21** Ikabheje a Yesu gubhaabhalanjilenje bhandu bhowe, “Bhakulipilikanishiyanga na kulikamulila lilobhe lya a Nnunu bhanganyabho ni a mama na ashapwanga nne.” **22** Lyubha limo a Yesu na Bhaajiganywa bhabho bhashinkukwelanga mmashua, gubhaabhalanjilenje, “Tujomboshe litanda tuishe kung'ambu.” Bhai, mwanja niguutandwibhe. **23** Bhalinginji mmashua, a Yesu gubhagonile lugono. Mbungo na mabhimbiili gamakulumakulu gugatabhile, mashi nigugatandwibhe kupakushila mmashua, nigubhajogopenje kaje, nibha atali. **24** Bhaajiganywa bhala gubhapite kukwaajumuyanga a Yesu, bhalinkutinji, “Mmakulungwa, Mmakulungwa, tunawa!” A Yesu nigubhajumwishe, nigubhajikalipile mbungo na mabhimbiili gala, nigitondwebhe, kwa jii. **25** Penepo nigubhaabhushiyenje, “Jili kwei ngulupai jenunji?” Gubhakanganigwenje na jogopa, akuno bhalibhuyananga, “Igala bhenebha bhandu bhashi, nkali mbungo na mabhimbiili bhanakwiamulisha nikwaapilikana?” **26** Gubhaikengenenje kushilambo sha Bhagelashi, shilolana na ku Galilaya kung'ambu ja litanda. **27** A Yesu pubhaulukaga kumbwani, mundu jumo nshilambo jwa shene shilambo shila, akwete maoka, gwabhaishile. Kwa mobha gamagwinji jwene

mundujo akawalaga nngubho wala akatamaga nnyumba,
ikabhe ndamo jakwe pujaaliji mmashembo ga shishila bhandu.

28 Akaabhoneje a Yeshu, gwajobhele gwaigwishiye pai
mmujo jabho akuno alibheleketa kwa utiya, "Mmwe a Yeshu
bhanabhabho a Nnungu bhakulu, mmwe nndi na nne? Shonde,
ngunajuga nnamboteshe!" **29** Ashinkubheleketa nneyo pabha
a Yeshu bhammadanjile lioka jula kuti anshoshe mundu
jula. Jwene lioka jwangali jwa mmbone jula akakabhaga
kunkamula mundu jula, nkali bhandu bhanng'ugalilanje nnyumba
nikuntabha mindondolo ja itale na pingu mmakono na
mmakongono, akakabhaga kukutulanya yoweyo, na lioka
jula atendaga kumminganjila kuanga. **30** Bhai a Yeshu
gubhammushiye, "Lina lyako gani?" Gwajangwile, "Lina
lyangu, 'Manjola'" Pabha gashinkunjilma maoka gamagwinji.

31 Ashimaoka bhala gubhaashondelesheyenje a Yeshu
bhanaabhanganjilane ku Jeanamu. (*Abyssos g12*) **32** Penepo
lyashinkupagwa likundi lya ngulubhe lilipitalya nshitumbi.
Bhai ashimaoka bhala gubhaashondelesheyenje a Yeshu
bhaaleshelelanje bhakaajinjilane ashingulubhe bhala. Na
bhalabho a Yeshu gubhaaleshelelenje. **33** Kwa nneyo ashimaoka
bhala bhakunshokanganaga mundu jula, gubhaajinjilenje
ashingulubhe, gubhaeelenje nnikote shibhutuka, nititimila
nnitanda. **34** Bhalinda bha ngulubhe bhakagabhonanjeje gowe
gakoposhele gala, gubhabhutukenje pita shumya nshilambo
mula na mmigunda. **35** Bhandunji gubhaikengenenje kulola
gakoposhele. Gubaajendelenje a Yeshu, gubhammweninji
mundu ashoshilwe na maoka jula, atemi pa makongono ga
a Yeshu, awete nngubho, ali na lunda lwakwe lwa mmbone,
gubhajogopenje. **36** Bhandu bhagawenenje pugatendekaga,

gubhaatalashiyenje bhananji, shaashite lamywa mundu akwete maoka jula. **37** Bhashilambo bha Kugelashi gwaajogopenje kwa kaje. Kwa nneyo gubhaajujilenje a Yeshu bhashoshe. Bhai a Yeshu gubhakwelile ntumbwi gubhaijabhulile. **38** Mundu ashoshiywe maoka jula, akwaashondelesheyag a Yeshu alonganenabho. Ikabheje a Yeshu gubhannajile bhalinkuti, **39** "Ubhuje kumui ukatalashiye yowe ibhakutendele a Nnungu." Bhai mundu jula gwajabhwile pita lunguya ibhantendele a Yeshu, mmbali yowe ya shilambo shila. **40** A Yeshu bhakabhujeje, gubhaposhelwe na likundi likulungwa lya bhandu, pabha bhatendaga kwaalindililanga. **41** Penepo gubhaishe bhandu bhamo bhashemwaga a Yailo bhakulungwa bha shinagogi, gubhaatindibhalile a Yeshu, gubhaajujile bhajende kunngwabho, **42** pabha nabhititi jwabho jwa yaka likumi limo na ibhili, numbe jwa jikape, paliji nnwele tome nawa. A Yeshu bhalii nkwendwa, bhandunji bhatendaga nokolananga nkwaabbandishila. **43** Bhai nnikundi lya bhandu mula bhashinkupagwa bhakongwe bhamo bhalwalaga nsholosholo yaka likumi limo na ibhili, bhashinkumaliya indu yabho yowe ku bhamitela, ikabheje jwakwapi akombwele kwaalamya. **44** Bhakongwe bhala gubhaakagwile a Yeshu pa nnyuma, gubhaakwashiye libhiniko lya nngubho jabho. Popo pepo gubhalamile shilwele shila. **45** A Yeshu gubhabhushiye, "Gani angwashiye?" Bhowe gwaajangulenje kuti jwakwapi ankawashiye. Na a Petili gubhashite, "Mmaajiganya, lugwinjili lwa bhandu lushikunngumbalila nikuntimbilila ndendende!" **46** Ikabheje a Yeshu gubhashite, "Apali mundu angwashiye, pabha njikwiipilikana mashili galinjoka." **47** Bhakongwe bhala bhakabhoneje kuti ikakomboleka kwiiya, gubhailangwiye bhalitetemela kwa jogopa, gubhaatindibhalile a Yeshu. Penepo

gubhatalashiye pa bhandu bhowe shiumilo sha kwaakwaya
a Yesu na shibhashite lamywa gwanakamope. **48** A Yesu
gubhaabhalanjile. "Mwanangu ngulupai jako jikulamiye. Ujende
kwa ulele." **49** A Yesu bhakanabhe maliya kubheleketa a
Yailo gubhapeleshelwe ntenga kukopoka kungwabho, "Mwali
jwenu awile, igala gabhuli kupunda kwaabhu ya bhaajiganya?"
50 A Yesu bhakapilikaneje genego, gubhaabhalanjile a Yailo,
"Mmwe nnajogope nkulupalilepe, shalame." **51** Bhakaisheje
kumui bhangapinga kujinjila naka mundu juna ikabhe na a
Petili na a Yowana na a Yakobho pamo na bhankwetenje
mwana jula. **52** Bhandu bhowe pubhalinginji nkunngutila
ililo. A Yesu gubhaabhalanjilenje, "Mpumulanje kuguta,
pabha mwana jwangawa ashigonape!" **53** Bhalabhonji
gubaeshilenje, pabha bhamumanyinji cuti mwana awile.
54 Ikabheje a Yesu gubhankamwile nkono, nikunshema,
"Mwanangu jumuka!" **55** Gumi gwakwe ukummujilaga, shangupe
gwanjumwishe. A Yesu gubhaalugulilenje bhampanganje shalya.
56 Bhankwetenje gubhakanganigwenje kwa kaje, ikabheje a
Yesu gubhaamulishenje bhanannugulilanje mundu jojowe gene
gatendeshe gala.

9 A Yesu gubaashemilenje pamo likumi limo na bhabhili
bhala, gubhaapelenje mashili na ukulungwa kupunda maoka
gowe na kulamya ilwele. **2** Gubaatumilenje bhajendangananje
kulunguya Upalume gwa a Nnungu na kulamya bhalwelenji. **3**
Gubaalugulilenje, "Mmwanja gwenunji nnajamulanje shindu
shoshewe, wala imbo, wala nkobha, wala shalya, wala mmbiya,
wala likoti lya tindiganya. **4** Na nyumba jojowe jishimposhelwanje,
ntamangane penepo mpaka lyubha lishinjabhulangane. **5**
Bhandu bhakamposhelanje, nshokangane shene shilambosho

na punkujabhuulanga mwikung'undanje litutuli lya mmakongono genunji, ibhe shilangulo kuti, bhashikananga ashaayene ntenga gwa Upalume gwa a Nnungu.” **6** Bhai gubhajabhuulengenenge pitalunguya Ngani ja Mmbone, shijiji na shijiji na lamya bhalwelenji kila mmbali. **7** Numbe bhakulungwa a Elode bhakapilikaneje gowe gatendeshe, gubhatengwishe, pabha bhandu bhananji bhatendaga bheleketanga kuti, “A Yowana bhashiyuka.” **8** Bhana kuti a Eliya bhashikoposhela, bhana kuti ankulondola bha bhukala bhashiyuka. **9** Ikabheje a Elode gubhashite, “Monaga a Yowana bho naainjile, lelo jwene jungupilikana ngani jakwejo gani?” Gubhakwete lilaka lya kummona. **10** Mitume bhala bhakabhuujanganeje, gubhaatalashiyenje Yesu yowe ibhatendilenje. A Yesu gubhaatolilelenje, nigubhapitenabhonji kujika mpaka shilambo sha ku Bhetishaida. **11** Ikabheje bhandunjibhala bhakamumanyanje kubhapite, gubhaakagulenje. A Yesu gubaaposhelenje, gubhajigenye ga ngani ja Upalume gwa a Nnungu, na kwaalamyanga bhandu bhapingangaga kulamywa. **12** Lyubha lilititimila, likumi limo na bhabhili bhala gubhapite kwaalugulilanga, “Mwaalajilanje bhandunji bhajendangane mwilambo na mmigunda ja tome, bhakaloleyanje shalya na mwagona, pabha putuli pano pakonde.” **13** Ikabheje a Yesu gubhaabhalanjilenje, “Mmanganya mwaapanganje shalya.” Gubhajangulenje, “Twangali shalya, ikabhe mikate nng'ano na yamaki ibhilipe. Igala tukaume shalya sha bhandu bhowebha!” **14** Pabha pepala, pubhalinginji bhanabhalume kuishila elupu nng'ano. Bhai, a Yesu gubhaabhalanjilenje bhaajiganywa bhabho, “Mwaatamikanje makundi ga bhandu makumi nng'ano nng'ano.” **15** Bhaajiganywa gwaatendilenje malinga shibhabhalanjilwenje, gubhaatamikenje

bhowe. **16** Kungai a Yesu gubhatolile mikate nng'ano na yamaki ibhili ila, gwaalolile kunani kunnungu, gubhatendile ej a kwa a Nnungu ga mikate na yamaki ila, gubhagebhenye na gubhaapelenje bhaajiganywa bhabho bhaapanganje bhandunji. **17** Gubhalilenje bhandu bhowe, mpaka kujukuta, gubhalokotenyenje ipande ya malepei, nigumbaya ikapu likumi limo na ibhili. **18** Lyubha limo a Yesu bhatendaga juga Nnungu jikape, bhaajiganywa bhabho bhalinginji tome popo. Bhai a Yesu gubhaabhushiyenje, "Igala bhandunji bhakutinji nne gani?" **19** Nigubhaajangwilenje, "Bhananji bhakutinji, mmwe a Yowana Bhabhatisha, na bhananji, bhakutinji mmwe a Eliya, na bhananji bhakutinji, mmwe ankulondola bha bhukala bhashiyuka." **20** Penepo a Yesu gubhaabhushiyenje, "Na mmanganya nkutinji bhuli, nne gani?" A Petili gubhajangwile, "Mwe a Kilishitu bha a Nnungu." **21** Penepo a Yesu gubaalimbiyenje na kwaalajiyanga bhanammalanjilanje mundu jojowe jene nganijo. **22** A Yesu gubhashite. "Mwana juka Mundu shapate mboteko yaigwinji, na shakanwe na bhanangulungwa na bhakulungwanji bhaabhisila na bhaajiganya bha shalia, na bhulagwa, ikabheje lyubha lya tatu shayushe." **23** Kungai gubhaabhalanjilenje bhandu bhowe, "Mundu jojowe apinga ngagula nne, anapinjikwa aikane nnyene, ajigale nshalabha gwakwe, angagule. **24** Pabha mundu apinga kuutapula nnyene gumi gwakwe, shaaguobhye, ikabheje apinga kuguobhya gumi gwakwe kwa ligongo lya ngu nne, shaagutapule. **25** Bhuli shiimpwae nndi mundu, kupata indu yowe ya pa shilambolyo kwa obhya gumi gwakwe, eu kwiititimiya nnyene? **26** Pabha mundu jojowe amonela oni nne ga majiganyo gangu, Mwana juka Mundu shamonele oni jwenejo, lyubha lya shajiye muukonjelo gwakwe, na gwa Atati na shilangaya sha ukonjelo

gwa ashimalaika bha kunnungu. **27** Ngunakummalanjilanga kweli, pano pepano bhapalinji bhananji bhakawanganga mpaka bhaubhonanje Upalume gwa a Nnungu.” **28** Gakaishileje mobha nane, bhakabheleketeje genego a Yeshu gubhaatolilenje a Petili, a Yowana na a Yakobho, gubhalongenenabhonji kushitumbi kukwaajuga a Nnungu. **29** Pubhaaliji nkwaajuga a Nnungu, nigubhapindikwishe kumeyo, nngubho yabho niwejela akuno ilimelemeta kwa kaje. **30** Shangupe bhandunji bhabhili a Musha na a Eliya gubhabhonekenje bhalikunguluka nabhonji. **31** Bhashinkubhonekanga bhalinginji na Ukonjelo, gubhakungulukenje ga nnganya ja bhulagwa kwabho shijipanga malila ku Yelushalemu. **32** A Petili na ashaajabhonji bhashinkugonanga lugono lwa tapatapa, ikabheje bhakajumukanjeje, gubhashibhweninji shilangaya sha Ukonjelo Gwapuya gwa a Yeshu na bhandunji bhabhili bhali bhajimi nabhonji. **33** Bhai a Musha na a Eliya bhalijabkulangana kwaaleka a Yeshu, a Petili gubaalugulile a Yeshu, “Mmakulungwa, shiipwae uwe tubhe apano! Bhai tushenje mishati jitatu, gumo gwenu, gumo gwa a Musha na gumo gwa a Eliya.” Ikabheje a Petili bhakaimanyaga ibbabheleketa. **34** A Petili bhali nkubheleketa genego, gulikoposhele liunde nikwaunishilanga, lyene liundelyo pulyaunishilangaga nigubhajogopenje kaje. **35** Lilobhe likupilikanikaga kukoposhela nniunde mula. “Jweneju ni Mwanangu juninng’agwile, mumpilikanishiyanje.” **36** Likapilikanisheje lyene lilobhelyo, a Yeshu gubhabhoneshe bhali jikape. Bhaajiganywa gwaatemingene ilili. Na gene mobha gala bhangannugulilanga mundu indu yoyowe ibhaibhwenenje ila. **37** Pamalabhi gakwe, bhalielelanga kukopoka kushitumbi na bhaajiganywa bhabho bhatatu bhala, gubhaimikene na likundi

likulungwa lya bhandu. **38** Penepo mundu jumo nnikundi mula, gwakweshiye lilobhe alinkuti, "Mmaajiganya, shonde munjangutile mwanangu jwa jikaju! **39** Anashikilwa lioka, nikuntenda ajobhele na kunngwiya shialala, akuno shiulo shilikunkopoka nkang'wa. Alipunda kumpoteka kwa kaje na wala akakunneka shangu. **40** Naajujilenje bhaajiganya bhenu bhanshoyanje, ikabheje bhangakombolanga." **41** A Yeshu gubhashite, "Mmanganya lubheleko lwangali ngulupai na lwa puganika! Shiniipililile kutama na mmanganya mpaka shakani?" Kungai gubaabhalanjile bhandu bhala, "Munnjenajo mwana jwenujo apano." **42** Mwana jula alikwiya kwa a Yeshu, lioka akunngwiyaga shialala. Ikabheje a Yeshu gubhankalipile lioka jula anshoshe, mwana jula gwalamiyiwe, gubhankamwiye kwa ainagwe. **43** Bhandu bhowe gubhakanganigwenje, kwa ukulungwa gwa mashili ga a Nnunu. Bhandunji bhala bhalinginji nkukanganigwa kwa yowe ibhaaitendile a ila, a Yeshu gubhaalugulilenje bhaajiganya bhabho, **44** "Mpilikanishiyanye gegano. Mwana juka Mundu apinga kamuywa mmakono ga bhandu." **45** Ikabheje bhalabhonji bhangagamanyanga malombolelo ga shene shibheleketosh. Pabha shashinkuiya kupinga bhanashimanyanje, na bhalabhonji gubhajogopenje kwaabhu ya malombolelo ga shene shibheleketosh. **46** Gujikoposhele mitau munkumbi gwa bhaajiganya, kuti gani jwankulungwa kupunda bhowe. **47** A Yeshu bhashinkwiimanya ng'aniyo yaliji mmitima jabhonji, bhai gubhantolile mwana jwanshoko, gubhannjimishe tome na bhayene, **48** gubhaalugulilenje, "Mundu jojowe akumposhela jwene mwana jwa nshokoju kwa lina lyangu, anamboshela nne na jojowe amboshela nne anakwaposhela bhandumile bhala. Pabha ali jwanshoko

munkumbi gwenunji, jwenejo jwankulungwa.” **49** A Yowana gubhabhelekete, “Mmakulungwa, tushikwaabbona bhandu bhamo bhalishoya maoka kwa lina lyenu, gutulinjile kwaibhilila, pabha nngabha alongani ajetu.” **50** Ikabheje a Yesu gubhaabhalanjilenje, “Nnang’ibhililanje pabha akakuntaukangajo nnjenunji.” **51** Mobha ga tolwa a Yesu kwenda kunani kunnungu gakabhandishileje, gubhatumbilile kwenda ku Yelushalemu. **52** Bhai gubhaatumilenje mitume bhalongolelanje, na bhalabhonji gwaapitengene kushilambo shimo sha Bhashamalia nkupinga bhakaalashiyanje paishila. **53** Ikabheje bhashilambo bha pepala gubhakanilenje kwaaposhela, pabha a Yesu bhaliji mmwanja kwenda ku Yelushalemu. **54** Bhai, bhaajiganywa bhabho, a Yowana na a Yakobho, bhakabhonanjeje nneila, nigubhashitenje, “Mmakulungwa, nnipinga tusheme moto kunnungu kugwatiniyanje?” **55** Ikabheje a Yesu gubhaatendeushilenje nikwaakalipilanga. **56** A Yesu na bhaajiganywa bhabho gubhapitengenenje shilambo shina. **57** Bhalikwendangana mumpanda, mundu jumo gwabhabhalanjile a Yesu, “Shininkagule kokowe kushinnjende.” **58** A Yesu gubhashite, “Nansheto akwete lishembo, na ijuni ikwete maui, ikabheje Mwana juka Mundu jwangali nkali pa pumulila.” **59** Kungai gubhannugulile mundu junia, “Ngagula.” Ikabheje jwenejo gwashite, “Mmakulungwa, nneshe oti ngaashishe atati.” **60** Ikabheje a Yesu gubhammadlanjile, “Gwalekanje bhawilenje bhashikane ashaayene, ugwe ujende ukalunguye Upalume gwa a Nnunu.” **61** Na mundu junia gwabhabhalanjile, “Mmakulungwa shininkagule, ikabheje nneshe oti ngalajile kumui.” **62** A Yesu gubhaalugulile, “Jojowe akamwile lijela nitandubha kulima,

atendebhukaga kulola nnyuma, jwenejo akapwaa mu Upalume gwa a Nnungu."

10 Gakapiteje genego Bhakulungwa gubhaagwilenje bhananji makumi shabha na bhabhili gubhaatumilene bhabhili bhabhili, bhaalongoelanje kila shijiji na kila mmbali jibhatumbilile bhayene kwenda. **2** Gubhaalugulilenje, "Maneng'eno gamagwinji, ikabheje bhaaneng'ena bhashokope. Kwa nneyo, mwaajunganje Bhakulungwa bha maneng'eneno bhatume bhaaneng'ena munngunda gwabho." **3** Nnaino nnjendangane, mmumanyanje kuti ngunakuntumanga, malinga bhana ngondolo pakati maogo. **4** Nnajigalaganje mpatila gwa ela, wala nkobha, wala ilatu, mumpanda nnammuyanje abhali mundu jojowe. **5** Nnjinjilanganaga nnyumba jojowe jila, ntandubhanje kujumushila nnei. Ulele ubhe na mmanganya ajino nyumba jino. **6** Monaga shapagwe mundu jwa ulele mwenemo, shatame nago, akapagwe shigummujilanje mwaashayene. **7** Ntamangane jene nyumbajo, nnilyanganga na papila ishibhampanganjeyo, pabha ntumishi anapinjikwa apegwe nshaala gwakwe. Nnaamanje kushoka aji nyumbaji kwenda ajila. **8** Ibhaga nng'ikanganaga pa shilambo shoshowe na bhamposhelangaga, nniyanganje ishimpegwanjeyo. **9** Mwaalamyanje bhalwelenji bha kweneko, na mwaalungushiyanje bhandunji kuti, Upalume gwa a Nnungu ummandishilenje. **10** Ikabheje nnjinjilanganaga shilambo shoshowe, bhakamposhelanje, nnjabhulanje, pushimpitangane mmipanda jabhonji mmeleketanje nnei. **11** Nkali ndutuli ja nshilambo shenunji jili mmakongono getu tunakunkung'undilanga. Ikabheje mmumanyanje kuti Upalume gwa a Nnungu ubhandishile. **12** Ngunakummalanjilanga, lyubha lya ukumu ja a Nnungu kwa shene shilambosho, shiibhe mbaya bhandunji bha shilambo sha

Shodoma. **13** “Ole mmwe a Kolashini! Ole mmwe a Bhetishaida! Pabha ilapo itendeshe kungwenunji, ikatendeshe ku Tilo na ku Shidoni, bhandunji bha yene ilambo ila, bhakaipetilenje bhukalape, kwa wala nngubho ya magunia na kwiitutulila liu.

14 Nkali nneyo lyubha lya ukumu mmanganya shimpatanje mboteko kupunda bhandu bha ku Tilo na ku Shidoni **15** Numbe mmwe a Kapalanaumu, bhuli nkupinga kwikweya kuishila kunnungu? Ninkupinga gwiya kuishila kundamo ja bhawilenje.” (**Hadēs g86**) **16** Penepo a Yeshu gubhashite, “Akumpilikanishiyanga mmanganya, anambilikanishiya nne, na akumposhelenga anamboshela nne. Na jojowe akaamboshela nne, akakwaaposhela bhandumile bhala.” **17** Kungai, makumi shabha na bhabhili bhala gubhabhujilengene bhalikwiinonyelanga, bhalinkutinji, “Mmakulungwa nkali maoka ganakutupilikana kwa lina lyenu.” **18** A Yeshu gubhaalugulilenje, “Nammweni Lishetani aligwa mbuti kumeta, kopoka kunnungu.

19 Mpilikananje, njikumpanganga amuli ja libhata majoka na ibhalabhalo, na mashili gowe gaka mmagongo, wala shakwa shoshowe shishimmenganje. **20** Ikabheje, nnainonyelanje ligongo maoka kumpilikananga, ikabhe mwiinonyelanje pabha mena genunji gashijandikwa kunnungu.” **21** Pala pepala, a Yeshu gubhangalile Mmbumu jwa Ukonjelo bhalinkuti, “Ngunakuntendala eja mmwe Atati, Mmakulungwa bha kunnungu na pa shilambolyo, pabha yene indu nshikwaiyanga bhakwetenje lunda na lumanyiyo, nikwaalangulanga bhana bhashoko. Elo Atati, pabha yenei ni ikunnonyela.” **22** Kungai gubhashite, “Atati bhashingamuya indu yowe. Jwakwa akummanyia Mwana ikabhe Atati, na wala akwaamanya Atati ikabhe Mwana na jojowe jwapinjile Mwana kunnangula yeneyo.” **23** Kungai a Yeshu

gubhaalolilenje bhaajiganya bhabho, gubhaabhalanjilenje kujika. "Mbaya meyo gakwiibhona yene inkwibhonangai! **24** Nguti, ashinkulondola bhabhagwinji na bhapalume, bhalokolilenje kwiiibhona yene inkubhonangai, ikabheje bhangaibhonanga, na kupilikana inkugapilikanangai ikabheje bhangaipilikananga."

25 Bhaajiganya bhamo bha shalia gubhajimi nikwaabhuya, nkupinga kwaalinga, "Mmaajiganya, ndende bhuli mbate gumi gwa pitipiti?" (*aiōnios g166*) **26** A Yeshu gubhaajangwile, "Ijandikwe nndi nshalia?" Nkushoma nndi mwenemo? **27** Gubhajangwile, "Mwaapinje Bhakulungwa a Nnunu bhenu, kwa ntima gwenu gowe, na kwa mbumu yenu yowe, na kwa lunda lwenu lowe, na kwa mashili genu gowe. Na kabili mumpinje nntami nnjenu malinga shinkwiipinga mmayene." **28** A Yeshu gubhaabhalanjile, "Elo, nnjangwile ukoto! Ntende nneyo shinname." **29** Ikabheje nabhalabho nkupinga kwilanguya kuti bhai manyi ibhabhushiye, gubaabhuhiye a Yeshu, "Igala ntami nnjangujo ni gani?" **30** A Yeshu gubhaajangwile, "Mundu jumo kukopoka ku Yelushalemu atendaga elela kwenda ku Yeliko. Ali mumpanda, gwaimene na bhaapokonyola, gubhanng'ulilenje nngubho yakwe, na kunkoma nikunneka agonile pa mpanda pala, tome nawa. **31** Bhabhishila bhamo gubhapitile mpanda gula, bhakammoneje gubhammembele. **32** Na nneyo peyo Bhalawi bhamo gubhapitile, bhakaisheje pepala, gubhammweni, na bhalabho gubhammembele. **33** Ikabheje Nshamalia jumo aliji mmwanja gwakwe kupitila mpanda gogo, akammoneje gwammonele shiya. **34** Gwanng'egejele, nikunng'uka ilonda kwa mauta na divai nigwaitabhiile, kungai gwankweshiye mmbunda jwakwe nikumpeleka ku nyumba jimo ja bhajeninji nikunnwaya. **35** Malabhi gakwe gwatolile mmbiya, dinali ibhili

gwabhapele bhayene nyumba bhala, alinkuti, ‘Munnwaye jwene munduju, na shoshowe shishimpundesho, pushimujepo shininnipe” **36** Kungai a Yeshu gubhabhushiye, “Penepo bhene bhatatu bhala jwei ailangwile kuti ntami nnjakwe mundu akamwilwe na bhaapokonyola bhala?” **37** Bhaajiganya bha shalia bhala gubhaajangwile, “Ammonele shiya jula.” A Yeshu gubhaajangwile, “Nnjende nkatende nneyo peyo.” **38** A Yeshu na bhaajiganywa bhabho bhalikwendangana ku Yelushalemu, gubhaikengenenje shijji shimo, penepo bhakongwe bhamo bhashemwaga a Malata, gubhaaposhele kunngwabho. **39** A Malata bhashinkukola apwabho bhashemwaga a Malia, bhenebho bhashinkutama pa makongono ga a Yeshu bhalipilikanishiya majiganyo gabho. **40** Ikabheje a Malata bhatendaga kamula indu yaigwinji. Bhai gubhaajendele a Yeshu, gubhaalugulile, “Mmakulungwa, igala nkalola kuti apwangabha bhashineshela maengo gowe? Bhai mwaabhalanjile bhanyangute.” **41** Ikabheje Bhakulungwa gubhaajangwile, “A Malata, a Malata, nnakwiibhuka na kwiiabhuya nng’indu yaigwinji. **42** Ikabheje shiipinjikwa shindu shimope. A Malia bhashiagula shindu sha mmbone kaje, wala mundu ngaapokonyola.”

11 Lyubha limo a Yeshu bhashinkutama pa jika bhalikwaajuga a Nnungu, bhakamaliyeje, nkujiganywa jwabho jumo gwabhalugulile, “Mmakulungwa ntjing’anye kwaajuga a Nnungu malinga a Yowana Bhabhatisha shibhajigenye bhaajiganywa bhabho.” **2** A Yeshu gubhaabhalanjilenje, “Punkwaajuganga a Nnungu, mmeleketanje nnei, ‘Atati nni kunnungu, lina lyenu likuywe, Upalume gwenu uishe. **3** Ntupe shalya shetu mobha gowe. **4** Ntuleshelele yambi yetu, Pabha numbe uwe tunakwaaleshelelanga bhowe bhakutulebhanga, Nnatubhishe

mmalinjilo, ikabhe ntutapule na jwangali jwa mmbone jula.”

5 Kungai gubhaalugulilenje, Gani akwete mbwiga nnjakwe, nikunnjendela pakati shilo, nikummalanjila, shonde mbwiga nnjangu unyaime mikate jitatu, 6 pabha mmbwiga nnjangu ashiika kukopoka mmwanja, na nne nangali sha kumpa. 7 Na jwalakwe ali nnyumba pemo akajangwile, unang'abhuye! Nne nnaino ng'ugele nnango. Nne na ashibhanangu tugonile, ngakombola jumuka kukuupa! 8 Nkali anajumushe nikumpa kwa ligongo lyabha mmbwiga mwine, ikabheje, kwa ligongo lya punda juga, shajumushe nikumpa shoshowe shaajuga. 9 Kwa nneyo, mmanganya nnjuganje, shimpeghanje, nnoleyanje, shimpatanje, nng'olishiyanje, shinng'ugulilwanje. 10 Pabha jojowe ajuga anapegwa, aloleya anapata, na aolishiya anaugulilwa. 11 Igala nng'inamundu jwashi mwanagwe anjugaga shamaki, shampe lijoka paala pa shamaki? 12 Eu ajugaga liji, bhampe shibhalabhal? 13 Nkali mmanganya, nninginji mmangalinginji bha mmbone, nnakwaapanganga ashibhana bhenu indu ya mmbone. Bhuli, Ainabhenunji bha kunnungu bhakapunda kwaapanganga Mbumu jwa Ukonjelo, bhene bhakwaajuganga bhala? 14 Lyubha limo a Yesu bhatendaga kunshoya lioka antendaga mundu jumo abhe bhubhu. Bhai lioka jula akanshosheje, mundu jula gwakombwele kubheleketa, lugwinjili lwa bhandu lukukanganigwaga. 15 Ikabheje bhandunji bhana gubhashitenje, “Bhanashoya maoka kwa mashili gaka Bhelishebhuli nkulungwa jwa maoka.” 16 Bhananji nkwaalinga, gubhapinjilenje bhatende ilapo, imanyishe kuti mashili gabho, gaakopoka kwa a Nnungu. 17 Ikabheje a Yesu bhai manyi ng'aniyo yabhonji, gubhaalugulilenje, “Upalume gogowe ugabhanikaga ukalonjeya, likaja lyolyowe lilekanaga

shilipalaganishe. **18** Monaga Lishetani anakwikana nnyene, upalume gwakwe shuulonjeye bhuli? Bhai ngunabheleketa nnei pabha nnanugulanga kuti, ngunashoya maoka kwa mashili gaka Bhelishebhuli? **19** Monaga nne ngushoya maoka kwa mashili gaka Bhelishebhuli, bhaakagula bhenunji bhashoyanga maoka kwa mashili gaka gani? Kwa nneyo, bhanganyabho shibhanng'ukumulanje. **20** Monaga ngushoya maoka kwa mashili ga a Nnungu, bhai mmumanyanje kuti Upalume gwa a Nnungu unng'ishilenje." **21** Mundu akwete mashili ali na ikomanilo yakwe, atamaga muulinda gwa nyumba jakwe, indu yakwe yowe shiilame. **22** Ikabheje aikaga akwete mashili ga kumpunda nikunkombola, jwenejo shampokonyole ikomanilo yakwe yowe yaikulupalilaga na kumpokonyola indu yakwe. **23** Jojowe akakwiilunda na nne, anaangana na jojowe akalopola na nne, anajaanga. **24** "Lioka jwangali jwa mmbone abhingwaga kukamundu, anapita jimajima nng'anga kuloley pa pumulila. Akapabhone anakwibhalanjila, 'Shimuje kundamo jangu.' **25** Abhujaga nikuiimana nyumba jila jipajilwe na jikonjeleywe, **26** bhai, anakwenda kwaatolanga ashimaoka bhana shabha, bhangalinginji bha mmbone kupunda jwenejo, na bhowe bhanakunnjinjilanga mundu jula. Kwa nneyo mundu jula, ali jakwe ja kumpelo, jinabha mbaya ja kundandubho jila." **27** Bhalibheleketa genego, bhakongwe bhamo nnugwinjili lwa bhandunji lula, kwa lilobhe lya utiya gubhashite, "Mbaya bhakongwe bhankwete na libhele linnjonjile." **28** Ikabheje a Yesu gubhashite, "Mbaya kaje bhene bhakulipilikananga lilobhe lya a Nnungu nikunda." **29** Lugwinjili lwa bhandu lukajenjeshesheje, a Yesu gubhaabhalanjilenje, "Alu lubheleko lwa lebha, lunapinga shilangulo. Ikabheje lukapegwa shilangulo shoshowe ikabhe shilangulo sha a Yona. **30** A Yona bhaliji shilangulo sha bhandunji

bha ku Ninawi, nneyo peyo Mwana juka Mundu shapingabha shilangulo kwa Iwene lubhelekolu. **31** Lyubha lya ukumu, a Malikia bha ku Shebha shibhakoposhele kukulukana Iwene lubhelekolu. Pabha bhenebho bhashinkukoposhela kwaataliya, kwiya pilikanishiya malobhe ga lunda ga a Shelemani, ikabheje apano apali ali jwankulungwa kupunda a Shelemani. **32** Bhandunji bha ku Ninawi shibhakoposhelanje lyubha lya ukumu, kukulukana Iwene lubhelekolu. Pabha bhandunji bha ku Ninawi bhaipetilenje kwa ligongo lya ntenga gwa a Yona, ikabheje apano apali ali nkulungwa kupunda a Yona! **33** “Jwakwa mundu akoleya kandilili nikujjunishila eu nikujjiya, ikabhe pakujibhika panani itengu nkupinga bhandunji bhaajinjilangana bhashibhonanje shilangaya. **34** Liyo lyenu ni kandili ja shiilu shenu, libhaga lyalikoto, shiilu showe shishibhe nshilangaya. Liyo lyenu likalole, shiilu shenu shishibhe nnubhindu. **35** Bhai mwiiteije, shilangaya shinkwetesho shinatendebhushe kubha lubhindu. **36** Bhai monaga shiilu shenu showe shikolaga shilangaya gwangali pakwete lubhindu, shene shiilusho shishibhe na shilangaya kwa kaje, malinga kandili shijikuti kummulishila kwa shilangaya shakwe.” **37** A Yesu bhakabheleketeje genego, Apalishayo bhamo gubaashemele shalya kunngwabho, gubhapite tama kulya. **38** Apalishayo bhala gubhakanganigwe bhakabhoneje kuti bhanalya gwangali kunabha. **39** Bhakulungwa gubaabhalanjile, “Mmanganya Ashimapalishayo nnaukanganga shikombe na shaani kua, ikabheje nkati nngumbelenje kukwetela indu na yangali ya mmbone. **40** Mmanganya mmagulumba! Bhuli, aeleye kua nngati jojo aeleye na nkati? **41** Bhai nshoyanje mbepei kwa indu inkwetenje, na yowe shiinkonjelanje.” **42** “Ikabheje ole, Mapalishayo, pabha nnakwaapanganga a

Nnungu lipungu lya kumi nkali lya maamba ga liponda, ikabheje nkakwaatendelanga bhandu ipinjikwa na ibhapinga a Nnungu. Punkupinjikwanga nshoyanje yeneyo, gwangali kuleka gana gala.” **43** “Ole Ashimapalishayo, pabha nnapinganga kutama itengu ya mmujo mmashinagogi, na komaywa pa lugwinjili. **44** Ole, pabha nshibhanganga mbuti makabhuli gangabhiwa shilangulo, bhandunji bhalilibhatanga pantundu jakwe gwangali kumumanya.” **45** Bhaajiganya bhamo bha shalia, gubhaalugulile, “Mmaajiganya, malobhe genu ganakutupetekuya nkali uwe.” **46** A Yeshu gubhaajangwile, “Na mmanganya mmaajiganya bha shalia ole, pabha nnakwaatwikanga bhandunji mishigo jatopa jikajigalika, akuno mwaashayene nkaakwayanga nkali kwa lukowe lumo kwaajangutanga. **47** Ole, pabha nnashenjelanga makabhuli ga ashinkulondola bha a Nnungu bhabhulegwenje na bhanangulungwa bhenunji. **48** Kwa nneyo nnakong'ondelanga itendi ya bhanangulungwa bhenunji, pabha bhashikwabhlulaganga ashinkulondola bha a Nnungu, na mmanganya nnashenjelanga makabhuli gabhonji. **49** Kwa nneyo, kwa Lumanyiyo Iwa a Nnungu gubhashite, ‘Shinaapeleshelanje ashinkulondola na mitume, ikabheje bhananji shibhaabhlulaganje, na bhananji shibhaapotekanje.’ **50** Kwa nneyo Iwene lubhelekolu lupingagambwa kwa ligongo lya minyai ja ashinkulondola bha a Nnungu bhowe, bhabhulegwenje kuumila ku ndandubho ja shilambolyo. **51** Kutandubhila kubhulagwa kwa a Abheli mpaka a Shakalia bhabhulegwe pakati pakati shitala na pa ukonjelo. Elo, ngunakummalanjilanga Iwene lubhelekolu shilugambwe kwa yene itendiyo. **52** “Ole gwenunji mmanganya bhaajiganya bha shalia, pabha nshishoyanga nshungulo gwa nnango gwa lumanyiyo, mwaashayene mwangajinjilanga na

bhajinjilanga bhala nshikwaibhililanga bhanajnjilanje." **53** A Yesu bhakakoposheje mwemula, ashimapalishayo na bhaajiganya bha shalia bhala gubhatandubhenje kwaashimanga na kwaatega kwa ibhuyo yaigwinji, **54** nkupinga bhapatanje mwakwaakamulila kwa malobhe gabho.

12 Gene malangago bhashinkuluimana lugwinjili lwa bhandu maelupu, mpaka kuishila kulibhatana, a Yesu gubhatandwibhe kwaalugulilanga bhaajiganywa bhabho, Mwiiteiganje na ngedule ya mapalishayo, yani ugulumba. **2** Shakwapi shoshowe shiunishilwe shikaapinga unukulwa, na shoshowe shiishiywe shipinga manyika. **3** Kwa nneyo, yowe immeleketenje palubhindu, bhandunji shibhaipilikanganje pa shilangaya na yowe imwanyintangaga nnyumba nni nng'ugelenje milango, ipinga lunguywa pa shipagala sha nyumba. **4** Ngunakunnugulilanga mwashaambwiga ajangu, nnaajogopanje bhabhulaganga shiilu bhala, ikabheje bhakaakombolanga kutenda shina kupunda shenesho. **5** Shininnangulanje gani apinjikwa kujogopwa. Munnjogopanje jwene akombola kubhulaga, na abhulagaga anakombola kunnjaa mundu ku moto gwa kujeanamu. Elo, ngnakummalanjilanga, munnjogopanje jwenejo. (**Geenna g1067**)

6 Bhuli ndyondyo nng'ano ikaushwa kwa ela ishokope? Ikabheje nkali jumo akalibhalika na a Nnungu. **7** Nkali umbo ya mmitwe jenunji a Nnungu bhai manyi pwili ilingwa. Bhai, nnajogopanje, mmanganya mmambonenji kupunda ndyondyo yaigwinji! **8** "Kweli ngnakummalanjilanga, mundu jojowe ashangunde palugwinjili, Mwana juka Mundu shankunde pa ashimalaika bha a Nnungu. **9** Ikabheje, mundu jojowe angana pa bhandu najwalakwe apinga kanwa pa ashimalaika bha a Nnungu. **10** "Jojowe abheleketa malobhe ga nyata kuka Mwana juka Mundu shaleshelelwe,

ikabheje akunkupulu Mbumu jwa Ukonjelo akaleshelelwa. **11**
“Mmanganya pushibhampelekanje mmashinagogi kuukumulwa
na bhatagwala na bhakulungwanji, nnakolanje lipamba lya shana
bhuli pushimwitapulanje eu muubheleketelo. **12** Pabha popo
pepo Mbumu jwa Ukonjelo shannjiganyanje sha bheleketa.”
13 Mundu jumo nnugwinjili lwa bhandu lula gwabhalugulile a
Yesu, “Mmaajiganya, munnugulile nkulwangu tugabhane ulishi
gubhatuleshele atati.” **14** A Yesu gubhannjangwile, “Ambwiga,
gani amishile nne kubha akimu na nkugabhanya jwenunji?”
15 Bhai a Yesu gubhaalugulilenje bhowenji, “Mwiiteiganje
na shilokoli shoshowe, pabha gumi uka mundu ukatamila
ga gwinji gwa indu yakwete.” **16** Kungai gubhaatanjilenje
lutango, “Ashinkupagwa mundu jumo tajili, atungwile yalya
munngunda gwakwe. **17** Jwene mundujo gwaganishiye muntima
gwakwe, ‘Shindende bhuli na nne nangali pagosheya yalya
yangu? **18** Shindende nnei, shimomole nngokwe yangu na
shinjenje jikulungwa, mwenemo shimeshe yalya yowe na indu
yangu. **19** Penepo shiniibheleketele shamuntima, nnaino ukwete
shibhiko sha pwaa yaka ya igwinji. Bhai pumulila, gwiilile na
gwiing'wele na kuangalila.’ **20** Ikabheje a Nnungu gubhannugulile,
‘Mmangumba mmwe, shilo sha lelo ntima gwenu upinga tolwa.
Na indu yowe imwiibhishile ila shiibhe ikeni?’” **21** A Yesu
gubhamalishiye kwa bheleketa, “Na malinga mundu akwiibhishila
indu nnyene, ikabheje kwa a Nnungu jwangali shindu.” **22**
Kwa nneyo a Yesu gubhaabhalanjilenje bhaajiganywa bhabho,
“Kwa lyene ligongolyo, nnakolanje lipamba ga shalya sha
lamila, wala ga iwalo. **23** Pabha gumi ni gwa mmbone
kupunda shalya, na shiilu ni sha mmbone kupunda iwalo. **24**
Nngalolanje makungulu, gakapanda na gakaneng'ena na wala

gangali nngokwe jojowe. Nkali nneyo a Nnungu bhanakugaliya. Mmanganya ni bhammbonenji kupunda ijuni! **25** Gani munkumbi gwenunji kwa lajilila kwakwe akombola kwijjenjesheya kapela lyubha limo lya gumi gwakwe? **26** Bhai, monaga nkakombolanga kutenda shindu shishoko malinga shenesho, kwa nndi nnajililanje na ganago? **27** Nnolanje malubha ga mukonde shigakuti bhulika. Gakapota wala gakaluka. Ikabheje ngunakummalanjilanga, nkali a Shelemani na shuma kwabho kowe bhangawashwa kwa konja malinga lilubha limo. **28** Bhai ibhaga, a Nnungu bhanakuliwasha nneyo liamba lya mukonde linkulibhonanga lelo na malabhi linaleshelwa pamoto, bhuli, mmanganya bhakanng'washanga kupunda genego? Mmanganya bha ngulupai jishoko! **29** "Bhai nnaabhushilanje ga shalya eu ga ya papila wala nnakolanje lipamba. **30** Pabha bhandu bhowe bhakakwaamanyanga a Nnungu, yeneyo peyo ni ibhaabhushilanga. Ikabheje Ainabhenunji bhamumanyi kuti mmanganya nnakwiipinganga yene induyo. **31** Ikabhe nng'abhushilanje oti Upalume gwa a Nnungu, na ina yowe shimpatanje." **32** "Nnjogopanje, mmandunji bha likundi lishoko! Pabha Ainabhenunji bhashiengwa kumpanganga Upalume gwabho. **33** Nng'ushanje indu yenunji, mmbiyayo mwaapanganje bhaalaga. Mwialashiyanje mipatila jangalala nikwiibhishila shibhiko kunnungu kuikaamala. Kweneko bhagwii bhakajinjilanga, wala mang'ong'ota gakaalibhia. **34** Pabha pushili shibhiko shenu na ntima gwenu shigubhe popo. **35** "Mmanganje tayali kwa liengo, na kandili yenunji ilikolela, **36** mmanganje malinga bhatumishi bhakwaalindililanga bhakulungwa bhabhonji bhabhuje kukopoka kundoa, nkupinga shangu bhaugulilanje pushibhaolishiyepo. **37** Mbaya bhene bhatumishi bhakulungwa bhabhonji pushibhabhuje, shibhaaimananje bhalisheyanga! Kweli

ngunakummalianjilanga, bhene bhakulungwabho shibhaibhishe ukoto kwa liengo, nikwaatamikanga bhalyanganje shalya, akuno bhalikwaatumishilanga. **38** Nkali bhabhuje pakati shilo eu kumashelo, mbaya bhene bhatumishi bhushiaimananje bhalisheyanga! **39** Mmumanyanje kuti, kaliji nnyene nyumba akagamanyi malanga ga kwiya nngwii, akasheshiye, wala akanaleshe nyumba jakwe jibhomolwe. **40** Nneila peila numbe mmanganya mmanganje muulolelo, pabha Mwana juka Mundu anakwiya malanga gunkakugalolelanga.” **41**
A Petili gubhaabhushiye a Yesu, “Mmakulungwa, lwene lutangolu ntutanjile uwepe, eu bhandu bhowe?” **42**
Bhakulungwa gubhajangwile, Bhai, igala gani ali nkulungwa jwa bhatumishi akwete lunda, Iwa kwaatenda bhakulungwa bhakwe bhammishe kubha nkulungwa jwa bhatumishi bhabho, nkupinga abhapanganje shalya malanga ga pwaa? **43** Shiibhe mbaya jwene nkulungwa jwa bhatumishijo, bhakulungwa bhakwe pushibhabhujepo bhanng’imane alitenda nneyo. **44** Kweli ngunakummalianjilanga, shibhantende nkulungwa jwa indu yabho yowe. **45** Ikabheje jwene ntumishijo aibheleketelaga sha muntima, bhakulungwa bhangu bhanakabha kubhuja, nitandubha kwaakomanga bhatumishi ajakwe, bhanabhalume na bhanabhabkongwe, nilya na ng’wa na kolelwa, **46** bhakulungwa bhakwe shibhabhujje lyubha lyangalilolela na malanga gangagamanya, shibhanngabhanye ipande ibhili, nikummika pamo na bhangakulupalikanga. **47** Ntumishi akugamanya gubhapinga bhakulungwa bhakwe, ikabhe akaatenda ibhapinga, shapanyangulwe kaje. **48** Ikabheje akakumumanya jula, atendaga ya kummulaya apanyangulwe, shapanyangulwe kashoko. Jojowe apegwilwe yaigwinji, shalongwe yaigwinji, akulupalilwe kwa

yaigwinji, shiipinjikwe yaigwinji. **49** “Njikwiya koleya moto pa shilambolyo, mbaya ukaliji ukoleywe! **50** Ikabheje njikola ubhatisho gungupinjikwa matishwe, ngunapupa ntima mpaka gwene ubhatishogo umalile! **51** Punkuganishiyanga nyile peleka ulele pa shilambolyo? Wala kashoko, nngabha ulele ikabhe malekano. **52** Na kutandubhila nnaino, bhandunji nng'ano bha likaja limo bhapinga taukangana, bhatatu kwa bhabhili, na bhabhili kwa bhatatu. **53** Ainamundu shibhantaushe mwanagwabho, na mwana shabhataushe ainagwe, anyinamundu shibhantaushe mwali jwabho, na jwalakwe mwali shabhataushe akwabhe, akwemundu shibhantaushe nkamwanagwabho na nkamwanamundu shabhataushe akwebhakwe.” **54** A Yesu gubhabhekete kabhili na lugwinjili, “Punkugabhonanga maunde galikoposhela kulititimila lyubha, shangupe nnabheleketanga, ‘Shijinye ula,’ na jinanya. **55** Nnjibhonangaga mbungo ja kwibhanda jinipuga, nnabheleketanga, ‘Kupingabhalia lyubha,’ na pwikubha nneyo peyo. **56** Mmanganya mmagulumba! Nnamanyanga kulondola kunya kwa ula eu kubhala kwa lyubha, kwa lola shilambo na kunani, bhai kwa nndi nkakujimanyanga jene miongwe jino? **57** “Kwa nndi mwaashayene nkaamuanga kutenda ya aki? **58** Monaga mmagongo nnjenu alikwenda kunshitakiya, mbaya kujuga kuleshelelwa nninginji mumpanda, nkupinga anampeleshe ku bhaukumula, na bhaukumula bhanakunkamuya kwa ashimanjola, na bhalakwe ashimanjola bhanakuntabha. **59** Kweli ngunakummalianjila nkakopoka mwenemo, mpaka nnipe mmbiya ja malishiya.”

13 Gene malangago bhandunji bhana gubhaabhalanjilenje a Yesu ga bhandunji bha ku Galilaya bhabhulegwenje na a Pilato na minyai jabhonji gujianganyishe na minyai

ja bhannyama bhabhonji bha bhishila. **2** Na bhalabho
a Yeshu gubhaabhushienje, “Punkuganishiyanga bhene
Bhagalilayabho bhashinkukolanga yambi kupunda Bhagalilaya
bhananji, nkali bhaabkulagwanje shana nneyo? **3** Nngabha
nneyo, ikabheje nkali mmanganya nkaiptanje, nneyo peyo
shintitimilanje. **4** Bhuli, bhene kumi na nane bhagwiliwenje
na nnala ku Shiloamu niwanganga bhala, punkuganishiyanga
kuti bhashinkukolanga yambi kupunda bhandunji bhowe
bhatamanganaga ku Yelushalemu? **5** Ngunakummalanjilanga
nngabha, ikabheje nkali mmanganya nkaiptanje, nneyo peyo
mmowe shintitimilanje.” **6** Kungai a Yeshu gubhaatanjilenje
aluno lutango luno, “Bhandu bhamo bhashinkukola nkongo gwa
ntini munngunda gwabho gwa mishabhibhu. Gubhapite kupinga
bhakakabhe iepo yakwe, ikabheje kuguimana gwangaogola tini
nkali jimo. **7** Bhai, gubhammalanjile ntumishi jwabho, ‘Lola! Kwa
yaka itatu natendaga kwiya kabha iepo ya gwene nkongogu,
nangapata shoshewe. Guushele! Kwa nndi unaangabhanya
litaka gwayoyo?’ **8** Ikabheje ntumishi jula gwabhajangwile,
‘Mmakulungwa, namwaka tuuleshe, niguolele liimbo na niutajile
mbolela. **9** Ibhaga pashaka uogolaga iepo, shammbone, ibhaga
lepe, bhai shiguushele.” **10** Lyubha limo lya Pumulila a Yeshu
bhatendaga jiganya nshinagogi jimo. **11** Penepo bhashinkupagwa
bhakongwe bhamo bhaaliji na shigongo kwa yaka kumi na
nane, pabha ashinkwaatama lioka jwangali jwa mmbone.
Nngongo gwabho gwashinkupinda, bhakakombolaga kujinuka
nkali kashoko. **12** A Yeshu bhakaabhoneje gubaashemile,
gubhaabhalanjile, “A mama nnamile shilwele shenu.” **13**
Gubaabhisile makono bhakongwe bhala, shangupe nngongo
gwabho guugolweshe, gubhainiye a Nnungu. **14** Ikabheje

bhakulungwa bha shinagogi gubhatumbele pabhaa Yeshu bhashikunnamya mundu Lyubha lya Pumulila. Kwa nneyo gubhalubhalanjile lugwinjili lwa bhandunji lula, “Nkwetenje mobha shita ga kamula liengo. Bhai, nnjiyangane gene mobhago kunnamiyanje ilwele yenunji, ikabheje nnajiyangane lyubha lya Pumulila.” **15** Penepo Bhakulungwa gubhajangwile, “Mmanganya mmagulumba! Munkumbi gwenunji gani akananng'ugule ng'ombe eu mbunda jwakwe nshitundu ampeleshe kung'wa mashi, lyubha lya Pumulila? **16** Nnaino, apano apali jwankongwe jwa shipinga sha a Bhulaimu apotekwaga naka lishetani kwa yaka kumi na nane. Bhuli, nngabha sha mmbone kunngopola shitabho shakwe lyubha lya Pumulila?” **17** A Yeshu bhakabheleketeje genego, ashaamagongo ajabho bhowe gubhakwetenje oni ikabheje bhananji guyaanonyelenje kwa kaje kwa ligongo lya indu ibhatendile ila. **18** A Yeshu gubhabhushiye, “Upalume gwa a Nnunu ulandana na nndi? Shiniulandanye na nndi? **19** Malinga mbeju ja aladali jili jishoko kaje jatolile mundu jumo nipanda munngunda gwakwe, gujimelile nibha nkongo. Ijuni guishenjile maui nnyambi yakwe.” **20** Kabhili gubhabhushiye, “Shiniulandanye na nndi Upalume gwa a Nnunu? **21** Malinga ngedule shibhatolile bhakongwe bhamo nianganya na utandi madebhe gabhili na nushu kungai utandi gowe guukwebhile.” **22** A Yeshu gubhapite na mwanja gwabho kuloya ku Yelushalemu bhalipita mwilambo na mwijiji, bhalipita jiganya. **23** Mundu jumo gwabhabhushiye, “Mmakulungwa, bhuli, bhandunji bhapinga tapulwanga ni bhashokope?” **24** A Yeshu gubhaalugulilenje, Ntumbilanje kaje kujinjila kupitila nnango gwa nshoko, pabha ngunakummalanjilanga, bhandu bhabhagwinji shibhalinganje kujinjila ikabheje bhakakombolanga.

25 Shigaishe mobha bhayene nyumba shibhajime niugala nnango. Mmanganya nkupinga jimangana palanga nitandubha kuolishiya nninkutinji, Mmakulungwa ntuugulile nnango. Ikabheje bhenebho shibhannjangulanje, ngakummanyanga mmanganya wala kunkoposhelenje. **26** Numbe mmanganya shintandubhanje kwaalugulila, twatendaga kulya na ng'wa pamo na mmwe na mwatendaga jiganya mwilambo yetu. **27** Ikabheje na bhalabho shibhaajangulanje, "Ngakummanyanga mmanganya wala kunkukoposhelanga, nshokangane mmanganya mmowe mmalebhanga." **28** Penepo ni pushipingapagwa shililo na kutauna meno, pushimwabthonanje a Bhulaimu na a Ishaka na a Yakobho na ashinkulondola bhowe bha a Nnunu bhalinginji mu Upalume gwa a Nnunu, ikabheje mmanganya nnokololwenje palanga! **29** Bhapeinga kwiyangana bhandunji kukoposhela mmbali yowe ya shilambolyo nitama pa shalya shaabhishilwenje mu Upalume gwa a Nnunu. **30** Nnole, bhapali bhalinginji bha kumpelo shibhabhanganje bha kundandubho na bha kundandubho shibhabhanganje bha kumpelo. **31** Gene malangapego, Mapalishayo na bhandunji bhana gubhaajendelenje a Yesu gubhaalugulinenje, "Nnjabhule apano nnjende mmbali jina, pabha bhakulungwa a Elode bhanapinga kummulaga." **32** A Yesu gubhaajangwilenje, "Nnjendangane nkaalilugulilanje lyene lyananshetolyo nneino, 'Lelo na malabhi shinjoye maoka na kwaalamyanga bhalwelenji na ntongo shimaliye liengo lyangu.'

33 Nkali nneyo, lelo na malabhi na ntongo, ngunapinjikwa nyende mwanja gwangu, pabha ikapinjikwa ankulondola bha a Nnunu bhabhulagwe kunyenje shilambo sha Yelushalemu. **34** "Ugwe Yelushalemu! Yelushalemu! Unakwabhlaganga ashinkulondola bha a Nnunu nikwaakomanga maganga bhatumilwenje

kunngwako. Palingwa pumbinjile kwaagutamilanga bhana bhako
pamo mbuti namwana jwa nnguku shakuti kwaagutamilanga
bhana bhakwe mmapapiko gakwe, ikabheje gwangapinga.
35 Nnolanje! Shinneshelwanje ushubha nshilambo shenunji.
Bhai, ngunakummalanjilanga, nkamonanga kabhili mpaka
pushimmeleketanje kuti, 'Bhakwete Mboka bhene bhakwiya kwa
lina lya Bhakulungwa."

14 Lyubha limo lya Pumulila a Yeshu bhashinkwenda kulya
shalya kumui kwa akalongolele bhamo bha Mapalishayo,
bhandunji bhalalinji penepo gubhaalolesheyenje kwa kaje. **2**
Mmujo jabho a Yeshu ashinkupagwa mundu nnwele shitaka.
3 A Yeshu gubaabhuhiyenje bhaajiganya bha shalia na
Mapalishayo, "Ilipinjikwa eu ikapinjikwa kunnamya mundu Lyubha
lya Pumulila?" **4** Ikabheje bhanganya bhala gubhatemingene
ilili. A Yeshu gubhankamwile nnwele jula gubhannamiye,
gubhanneshile aijabhlile. **5** Kungai gubaabhuhiye, "Munkumbi
gwenunji gani mwanagwe eu ng'ombe jwakwe atumbushilaga
nniiko, akananshoye pabha Lyubha lya Pumulila?" **6** Ikabheje
bhangakombolanga kwajaangula. **7** A Yeshu bhakaabhonanjeje
bhashemilwenje bhala shibhatendaga kwiagulilanga itengu
ya mmujo, gubhaalugulilenje. **8** "Ibhaga mundu anshemaga
kundoa, nnatame pa shitengu sha mmujo, inabha apali juna
ashemilwe jwa kupunda mmwe. **9** Bhanshemilenje bhala
shibhajiye kummalanjila, 'Mwaapiye abha.' Penepo nkupinga
kola oni pa bhandu bhowe nnikwendatama shitengu sha nnyuma.
10 Ikabhe nshemwaga ntame shitengu sha nnyuma, nkupinga
nnyene nyumba ajiyaga annugulile, 'Ambwiga, nnjiye mmujo
muno.' Penepo nkupinga ishimiywa na bhowe bhatemingene
pamo na mmwe. **11** Pabha, jojowe akwiikweya apinga tuluywa,

na akwiituluya apinga kweywa.” **12** Kungai gubaabhalanjile na bhashemile bhala, “Punkuteleka kalamu ibhe mui eu shilo, nnaashemanje ashaambwiga ajenu eu ashaalongo ajenu eu ashaatami ajenu bhalinginji matajilipe, na bhalabhonji bhana kwiya kunshemanga nibha nnipilwe yumwaatendelenje ila.

13 Ikabheje, punkuteleka kalamu, mwaashemanje bhaalaga, bhaalemalanga na ashinangwabha na ashinangalole, **14** na mmwe shimpate mboka, pabha bhene bhanganyabho bhangalinginji sha kunnipa. A Nnungu shibhampe upo yenu lyubha lishibhayukanje bhandunji bhakwetenje aki.” **15** Mundu jumo munkumbi gwa bhatemingene na a Yesu pa shalya gwashite, “Mbaya jwene mundu shalye kalamu mu Upalume gwa a Nnungu.” **16** A Yesu gubhannjangwile, “Bhandu bhamo bhashinkuteleka kalamu jikulungwa, gubaashemilenje bhandunji bhabhagwinji. **17** Lyubha lya kalamu likaishileje gubhantumile ntumishi jwabho akaalugulilanje bhashemilwenje bhala kuti, ‘Nnjiyangane, indu yowe ili tayali.’ **18** Ikabheje bhowe, gubhatandwibhenje kwiilugula jumo jumo. Jwa ntai gwashite, ‘Njigombola nngunda, kwa nneyo ngunapinjikwa nyende ngaulole shonde bhai, uneshe nyende.’ **19** Na junä gwashite, ‘Njigombola ng’ombe ya lima, majela nng’ano, kwa nneyo ngunakwenda kwiilinga, shonde bhai uneshe nyende.’ **20** Na junä gwashite, ‘Njilomba, kwa nneyo ngaika.’ **21** “Ntumishi jula gwabhujile nigwabhalugulile bhakulungwa bhakwe jene nganijo. Bhayene nyumba bhala gubhatumbele, gubhannugulile ntumishi jwabho, ‘Ujende shangu kumpanda njindo na mmipanda ja pa shilambo pano, ujjenabhonji nnyumba muno bhalaga, na ashinangwabha, na ashinangalole, na bhaalemalanga.’ **22** Kungai ntumishi jula gwashite,

‘Mmakulungwa, innajile ila ndendile, ikabheje mwaatama mwatangu.’ **23** Bhakulungwa bhala gubhannugulile ntumishi jula, ‘Ujende mmipanda njindo na mipanda ja pa shilambo pano ukaashishilishiyanje bhandunji bhajiyangane, nyumba jangu jigumbale. **24** Ngunakummalanjilanga mmowe kuti, jwakwapi nkali jumo munkumbi gwa bhunaashemilenje gwantai bhala shapaye shalya shangu.” **25** Penepo, likukute likulungwa lya bhandu gulilongene na a Yesu. Bhai, gubhaatendebhushilenje bhandunji gubhaalugulilenje, **26** “Mundu jojowe apinga kubha nkujiganywa jwangu ambinje, kupunda shakutikwaapinga ainagwe na akwabhe na akagwe na ashibhanagwe, na ashaapwakwe na ashaalumbugwe na nkali kupunda shakuti kwiipinga nnyene. **27** Mundu akaujigale nshalabha gwakwe ningagula akakombola kubha nkujiganywa jwangu.” **28** Pabha, gani munkumbi gwenunji apingaga kushenga nnala, akatandubha kutama nilola galama jakwe nkupinga amumanye ibhaga akwete mmbiyaya malila? **29** Inabha atandubhaga kushenga nshingi niilepela kumaliya, bhandunji shibhalolanjebho shibhanng'ekanje, **30** bhalinkutinji. Aju munduju atandwibhe kushenga, ikabheje ashilepela malishiya. **31** Eu mpalume jwashi apinga kwenda komana na upalume guna, anatandubhe kutama ni niganishiya ibhaga shakombole na ashimanjola bhakwe elupu likumi limo, kwenda komana na a mpalume bhakwete manjola elupu makumi gabhili? **32** Abhonaga akakombola, shatume ntenga kupinga ulele bhakanabhe bhandishila. **33** Bhai nneyo peyo, akapagwa nkali jumo munkumbi gwenunji apingabha nkujiganywa jwangu, akaleshe indu yowe yakwete. **34** “Nnjete ni ja mmbone, ibhaga jikanonye, jitagwe nndi jinonye kabhili? **35** Jikapwaa kwa litaka

wala kwa tenda mbolela. Ikabheje pakujijaa kwa taliya. Akwete makutujo apilikane!"

15 Lyubha limo, bhakamula koli na bhaatendanga yambi bhabhagwinji bhashinkwiyangana kukwaapilikanishiya a Yesu. **2** Mapalishayo na bhaajiganya bha shalia gubhatandubhenje kuinginika, "Mwalolanje abha bhandubha! Bhanakwaashemanga bhakwetenje yambi, na bhanalya nabhonji." **3** A Yesu gubhaatanjilenje lutango. **4** "Ibhaga, munkumbi gwenunji mundu akolaga ngondolo makumi kumi, jumo aobhaga, bhuli, akaalekanga makumi tisha na tisha bhala pakonde, nikwenda kunnoleya aobhile jula mpaka ampare? **5** Ampataga, apinga kunnjigala pashilembele alikwiinonyela. **6** Aikaga kumui, apinga kwaashemanga ashaambwiga ajakwe nikwaalugulilanga, 'Twinonyele tubhowe, pabha nimpatile ngondolo jwangu aobhile.' **7** Nneyo peyo ngunakummalanjilanga, pwii pingabha kwiiinonyela kunnungu, kwa ligongo lya kwiipeta mundu jumo akwete yambi, kupunda bhandu makumi tisha na tisha bhakwetenje aki, bhakaapinjikwanga kwiipeta." **8** "Eu nkubhonanga bhuli? Tujile jwankongwe jumo akwete ela likumi limo, aobhyaga jimo, shatende nndi? Shakoley kandili nipejila nyumba nisheimba kuloleya mpaka ajibhone. **9** Ajipataga, shabhashemanje ashaambwiga ajakwe na ashaatami ajakwe alinkuti, 'Twinonyele, pabha ela jangu jaobhile jila nijibhweni.'

10 Nneyo peyo ngunakunnugulilanga, shiikutibha a nng'angalo kwa ashimalaika bha a Nhungu, kwa ligongo lya mundu jumo akwete yambi akwiipeta." **11** A Yesu gubhapundile kubheleketa, Bhashinkupagwa bhandu bhamo bhaakwete bhashanda bhabhili. **12** Jwannung'una jula akwaabhalanjilaga ainagwe. "Atati mmbe ulishi gwangu." Na bhalabho gubhaagabhanishiyenje mali

gabho. **13** Gakapiteje mobha gashoko, jwannung'una jula gwaushiye ulishi gwakwe, gwapite kushilambo sha talika na ela yakwe ila, gwajonjenje nkulabhalabha. **14** Akamaliyeje indu yowe, gushikoposhele shibhangha shapunda nshilambo mula, gwatandwibhe kulaga. **15** Gwajujile liengo kukanshilambo jumo jwa kweneko, jwalakwe gwampeleshe kunngunda gwakwe kuliya ngulubhe. **16** Atendaga lokolila shalya sha ngulubhe, ikabhe jwakwapi mundu ampele shindu. **17** Ikabheje akalumatileje muntima gwakwe gwashite, bhatumishi bhalingwa kwa atati kula, bhalyanganga nilepela, akuno nne niliwa shibhangha? **18** Shimuje kwa atati ngaabhalanjile kuti, atati, njilebha Kunnungu na kwenu mmwe. **19** Ngapinjikwa kushemwa kabhili mwanagwenu. Nndende mbuti ntumishi jwenu. **20** Bhai gwajabhwile kubhuja kwa ainagwe. "Ikabheje ali kwaataliya, ainagwe gubhamweni, nikummonela shiya gubhammutushile kukunnyambatila akuno bhalikunnamanga. **21** Mwanamundu gwashite. Atati njikwaalebhela a Nnunu, na njikunnebhela na mmwe. Ngapinjikwa kabhili kushemwa namwanagwenu. **22** Ikabheje ainagwe gubhaalugulilenje bhatumishi bhabho, 'Shangu! Ntolanje nngubho ya mmbone munng'washanje! Munng'washanje lupete na ilatu! **23** Munng'inganje ng'ombe jwa mmbone jwa jimbala, tulye na tuangalile! **24** Pabha kwangu nne mwananguju aawile, mbena jwankoto ashinkuobha, ikabheje nnaino abhoneshe.' Gubhatandubhenje kuangalila. **25** "Gene malangago nkulugwe jula, paliji akanabhebhua kunngunda. Pabhujaga alibhandishila kumui, gwapilikene nyimbo na iindo ya ina. **26** Gwanshemile ntumishi jumo, gwammushiye, 'Shipali ndi?' **27** Ntumishi jula gwannjangwile, 'Mpwako abhujile, na ainago bhashikunng'injila ng'ombe jwa mmbone jwa jimbala,

pabha bhampatile mwana gwabho ali jwankoto.' **28** "Nshanda jwankulu jula guinshimile, gwakanile kujinjila nnyumba. Ainagwe gubhakopweshe palanga kukunshondelesheya ajinjile. **29** Ikabheje jwalakwe gwabhajangwile, 'Nhole! Yaka yowei nne njikuntumishila na nganabhekana amuli yenu wala lyubha limo. Ikabheje nkanabhembra nkali mwana jwa mmbui jumo, ng'angalale na ashaambwiga ajangu! **30** Ikabheje mwana gwenu ajonenje indu yenu na majajana, akabhujeje shangupe nshikunng'injila ng'ombe jwa mmbone jwa jimbala.' **31** Ainagwe gubhannjangwile, 'Mwanangu, ugwe puli na nne mobha gowega, na indu yowe ingwete nne yako. **32** Ikabheje tushipinjikwa kuangalila nkwinonyela pabha mpwako awile jula, mbena jwankoto, ashinkuobha, nnaino abhoneshe."

16 A Yesu gubhaalugulilenje bhaajiganywa bhabho, "Ashinkupagwa tajili jumo na nyapala jwakwe. Tajili jula ashinkulugulilwa, kuti nyapala jwabho anatapanya indu yabho. **2** Tajili jula gwanshemile, nikummuya, 'Indu yashi yako ugwe ingupilikanai? Utende malonda ga indu yangu yuposhele na yulile, pabha ukaapinjikwa kubha nyapala kabhilli.' **3** Nyapala jula gwaganishiye, 'Bhakulungwa bhangu bhanaminga liengo lya unyapala, shindende bhuli? Nangali mashili ga lima, pita juga ngunakola oni. **4** Elo, nishimanyi sha tenda nkupinga pushimingwe liengopo, bhandunji bhanjemelanje kunngwabhonji.'" **5** "Bhai, gwabhashemilenje jumo jumo, bhakwetenje magambo bhowe kubhakulungwa bhakwe, gwammushiye jwa ntai jula, 'Yukulongwa na bhakulungwa ilingwa?' **6** Jwalakwe gwajangwile, 'Nndobho 180 ya mauta ga sheituni.' Nyapala jula gwannugulile, 'Tola shipande sha ligambo lyako, shangu ujandishe nndobho makumi tisha.' **7** Na gwammushiye akwete ligambo jwa bhili, 'Ugwe

ulongwa nndi?' Jwalakwe gwajangwile, 'Magunia 1,000 ga ngano.' Nyapala jula gwannugulile, 'Tola shipande sha ligambo lyako, shangu ujandishe magunia mia nane.'" **8** Bhai tajili jula gwannumbilile nyapala jula, kwa penya kwakwe. Pabha bhandunji bha pa shilambolyo pano bhanapenyanga pubhatendanga indu na ashaajabhonji, kupunda bhandunji bha Upalume gwa a Nnungu. (*aiōn g165*) **9** Na bhalabho a Yesu gubhapundile kubheleketa, "Na nne ngunakummalanjilanga, mpanganje mbwiga na bhandunji kwa mali ga pa shilambolyo, nkupinga gamalaga, mposhelwanje kundamo ja pitipiti. (*aiōnios g166*)

10 Jojowe shakulupalilwe kwa indu yaishoko, shakulupalilwe nkali kwa indu yaikulungwa, na jojowe akaakulupalika kwa indu yaishoko, akaakulupalika nkali kwa indu yaikulungwa.

11 Bhai ibhaga, mmanganya nkakulupalikanje kwa mali ga pa shilambolyo, gani shampanganje mali ga kweli? **12** Na nkakulupalikanje kwa mali gaka mundu juna, gani shankamuyanje mali genunji mwaashayene? **13** "Jwakwapi ntumishi akombola kwaatumishilanga bhakulungwanji bhabhili, pabha shanshime jumo nikumpinga junajo, eu shanng'ishimiye jumo na junajo nikunyyegaya. Nkakombolanga kwaatumishila a Nnungu pamo na mali." **14** Ashimapalishayo bhalinginji bhaapinganga mmbiya, bhakapilikananjeje genego, gubaeshilenje nkwaanyegaya.

15 A Yesu gubhaalugulilenje, "Mmanganya nnakwitendanga nkwenenje aki pa bhandu, ikabheje a Nnungu bhajimanyi mitima jenunji, pabha shene shibhoneka sha mmbone kubhandu, a Nnungu pubhakushibhona sha bhiyabhiya. **16** "Shalia na ashinkulondola, yaapali mpaka malanga ga a Yowana Bhabhatisha. Kutandubhila penepo, ngani ja mmbone ja Upalume gwa a Nnungu jinalunguywa, na kila mundu anakwijjinjiya kwa

mashili. **17** Ikabheje ikakola ukomu kunnungu na shilambolyo kupita, kupunda nkali shipande shishoko sha Shalia kushoywa. **18** “Jojowe akunneka nkagwe nilomba juna, analabhalabha, na jojowe ankunnomba jwankongwe aleshilwe, analabhalabha.” **19** Ashinkupagwa mundu jumo tajili, awalaga nngubho ya mmbiya yaigwinji ya langi ja shambalau na ya kitani ja takata, alipoka mobha gowe. **20** Na pannango gwakwe atendaga tama nkulaga jumo, lina lyakwe Lashalo, akwete ilonda shiilu showe. **21** Lashalo atendaga lokolila malepei gaagwaga pa mesha jika tajili jula, nkali mbwa yatendaga kwiya kunnambanga ilonda yakwe! **22** Bhai nkulaga jula akuwaga, ashimalaika bha kunnungu gubhantolilenje, nikwenda kummiika pubhaliji a Bhulaimu. Na tajili na jwalakwe gwawile, nishikwa. **23** Tajili jula ali mmboteko ya punda kundamo ja bhawilenje, gwajinwile meyo, gwabhabhweni a Bhulaimu kwataliya bhali nagwe Lashalo, (**Hadēs g86**) **24** Bhai, gwabhashemile kwa utiya, “Ambuje a Bhulaimu, mmonele shiya, muntume Lashalojo kapela shikowe ashubhishe mmashi, andolishiye nnulimi lwangu, pabha ngunapotekwa kwa kaje pamoto pano.” **25** Ikabheje a Bhulaimu gubhajangwile, “Kumbushila mwanangu, kuti ugwe ushinkupoka nndamo jako, na Lashaloju ashinkulaga. Ikabheje nnaino, jwalakwe anapoka na ugwe unapotekwa kwa kaje. **26** Kupunda genego, pakatipakati jetu uwe na mmanganya, lishibhikwa liimbo likulungwa, nkupinga bhapinganga kwiya kunngwenunji kukoposhela akuno bhanakombolanje, na bhapinganga kwiya kwetu uwe kukoposhela kweneko bhanakombolanje.” **27** Tajili jula gwashite, “Bhai ambuje a Bhulaimu, shonde bhai muntume Lashalo ajende kulikaja lya atati, **28** pabha njikola ashapwanga nng'ano, akaalungushiyane nkupinga bhanaikangane kumboteko kuno.” **29** Ikabheje a

Bhulaimu gubhajangwile, "Ashapwako bhakwetenje a Musha na ashinkulondola, bhaapilikalanje bhanganyabho." **30** Ikabheje na jwalakwe gwashite kabhili, "Nngabha nneyo ambuje a Bhulaimu, ikabhe mundu ayukaga nikwaajendelanga, shibhaipetanje." **31** Na bhalabho a Bhulaimu gubhajangwile, "Ibhaga bhakaapilikilanje a Musha na ashinkulondola bha a Nnungu, bhakakundanga nkali mundu akayushile."

17 A Yeshu gubhaalugulilenje bhaajiganywa bhabho, "Indu ikwaatendanga bhandu bhatendanje yambi shiikoposhelepe. Ikabheje ole gwakwe jwene mundu akwiitenda ikoposhele jula. **2** Ikaliji mbaya atabhilwe liganga likulungwa lya yajila nnukoi nitumbushiywa mmashi, nngabha kunnebhyu jumo bhene bhabhashokobha **3** Mwiiteiganje! "Monaga mpwenu annebhelaga, munneye, aipetaga, munneshelele. **4** Na nkali annebhelaga mala shabha kwa lyubha limo, na kila mwanja alikunjiila akuno alinkuti, 'Ngunakwiipeta nneshelle' munneshelele." **5** Mitume gubhaabhalanjilenje Bhakulungwa a Yeshu, "Ntujenjesheye ngulupai." **6** A Yeshu gubhaajangwilenje. "Nkakwetenje ngulupai jishoko kapela ja malinga mmbeju ja aladali, nkakombolenje kuubhalanjila agu nkujugu, 'Tutumbuka ukaipandishile mbhaali,' ukampilikenenje." **7** "Ibhaga mundu jumo munkumbi gwenunjimo akwete ntumishi, analima eu anashunga ngondolo. Bhuli, pabhuja kukoposhela kunngunda, shammalanjile ntumishijo. 'Tenda shangu kuulye shalya'? **8** Nng'oo! Shammalanjile, 'Ndeleshela shalya, gwilume undumishile mpaka maliye kulya na ng'wa, penepo numbe ugwe shulye na ng'wa.' **9** Bhuli, mundujo shantendele eja jwene ntumishijo kwa ligongo lya maliya yowe yalajilwe? **10** Bhai na mmanganya nneyo peyo nkamulangaga yowe innajilwenje, mmeleketanje kuti, 'Uwe tubhatumishi twangali

mbwaiko, tushikamulape maengo getu.” **11** A Yeshu bhali mumpanda kwenda ku Yelushalemu bhashinkupita mumpika gwa ku Shamalia na ku Galilaya. **12** Bhalijinjila nshilambo shimo, bhandunji kumi bhamangundula bhashinkwajilanga a Yeshu, gubhajimingene kwa taliya. **13** Gubhautiyenje lilobhe bhalinkutinji, “Mmakulungwa a Yeshu, ntubhonele shiya!” **14** A Yeshu bhakaabhonanjeje gubaabhalanjilenje, “Nnjendangane nkailangulanje kubhaabhishila.” Bhai, akuno bhalikwendangana, gubhalamilenje. **15** Jumo jula akabhoneje kuti alamile, gwabhujile alikwaakuya a Nnungu kwa lilobhe lya utiya. **16** Gwatindibhele pa makongono ga a Yeshu nkutenda eja. Jwenejo paaliji Nshamalia. **17** Ikabheje a Yeshu gubhabhushiye, “Bhuli, nngabha bhandu kumi bhalamiywenje? Tisha bhala bhalinginji kwei? **18** Bhakwapinji bhandu bhananji bhabhujilengene kukwaakuya a Nnungu, ikabhe nnjenipeju?” **19** Kungai gubhammalanjile mundu jula, “Jinuka gwijjendele, ngulupai jako jikulamiye.” **20** Lyubha limo, Ashimapalishayo bhashinkwaabhuylanga a Yeshu, “Upalume gwa a Nnungu puukwiya shakani?” Gubhaajangwilenje, “Upalume gwa a Nnungu ukaika kwa bhoneka. **21** Wala bhakabheleketanga, ‘Aguno apano’ eu ‘Agula akula.’ Pabha Upalume gwa a Nnungu muuli munkumbi gwenunji.” **22** Kungai gubhaalugulilenje bhaajiganywa bhabho, “Shigaishe mobha gushinnokolilanje kapela nkalibhweninji lyubha limo lika Mwana juka Mundu, ikabheje nkalibhonanga. **23** Na bhandunji shibhammalanjilanje, ‘Nnolanje abhala akula eu, Abhano apano!’ Nnaakagulanje. **24** Pabha shiibhe malinga kumeta kwa nnjai, jinabhalula shangupe nilangaya mmbali yowe, nneyo peyo shiipingabha lyubha lya kwiya Mwana juka Mundu. **25** Ikabheje gakanabhe koposhela genego, anapinjikwa

apotekwe kwa kaje na kanwa na bhandunji bha luluno lubheleko luno.” **26** Na malinga shiyaliji mobha ga a Nuu, shiipinga kubha gene mobha gaka Mwana juka Mundu. **27** Bhandunji bhatendaga lyanganga na ng’wa, bhatendaga lombanga na lombwa, mpaka lyubha libhajinjile a Nuu shapina. Nduluko gujiishe nikwaanititimiyanga bhowe. **28** Nneyo peyo shiibhe malinga puyakoposhele mobha ga a Lutu. Bhandunji bhatendaga lyanganga na ng’wa, bhaliumanga na pinda, bhalilimanga na shenga. **29** Ikabheje lyubha libhajawile a Lutu ku Shodoma, moto na bhonga yashinkunya mbuti ula kukopoka kunnungu, nikwaatitimiyanga bhowe. **30** Na malinga pushiibhe lyubha lya kwiya Mwana juka Mundu. **31** “Lyene lyubhalyo, jojowe shabhe pasitubhili na indu ili nnyumba, anatulushe kutola indu yakwe. Nneyo peyo ali kunngunda anabhuji kumui kutola shindu shoshowe. **32** Nkumbushilanje gaaimene akongobhabho a Lutu. **33** Jojowe shapinje kwitapula nnyene shaiobhye, na shaiobhyejo shaitapule. **34** Ngunakummalanjilanga, shene shilosho bhandunji bhabhili bhagonilenje pamo, jumo shotolwe na jun shalekwe. **35** Bhanabhakongwe bhabhili bhaliyaganga pamo, jumo shatolwe na jun shalekwe.” **36** Bhandunji bhabhili shibhabhanganje mungunda, jumo shatolwe na jun shalekwe. **37** Penepo gubhaabhushiyenje, “Kwei Mmakulungwa?” A Yesu gubhaajangwilenje, “Puugonile ntui ni pugaimana matumbui.”

18 Bhai a Yesu gubhatagulile lutango lwa cuti, inaapinjikwa kwaajuga a Nnunu mobha gowe, gwangali kuwa ntima. **2** Gubhashite, “Nshilambo shimo bhashinkupagwa bhaukumula bhamo bhakaajogopaga a Nnunu na wala kujali bhandu. **3** Na nshilambo shosho, bhashinkupagwa bhakongwe bhamo bhashitenga bhatendaga kwaajendela bhene bhaukumula bhala

bhalinkuti, 'Nng'ukumule mbate aki jangu kuka mmagongo nnjangu.' **4** Gakupitaga mobha gamagwinji bhaukumula bhala bhalikana, ikabheje, kungai gubhailugulile bhayene. 'Nkali ngakwaajogopa a Nnungu na wala ngajali bhandu, **5** ikabheje pabha abha bhashitengabha bhanangoya ukomu, shinaukumulile bhapate aki jabho, bhanapunde kwiya ndotoya!" **6** Bhai Bhakulungwa a Yesu gubhashite, "Mpilikananje shibhashite bheleketa bhene bhaukumula bhangali bha mmbone bhala. **7** Bhuli, a Nnungu bhakaatendelanga aki bhaagulwenje na bhayene, bhakwaagutilanga shilo na mui? Bhuli shibhakabhe kwaajangutilanga? **8** Ngunakunnugulilanga shibhaajangutilanje shangupe. Ikabheje, bhuli pa shilambolyo shipabhe na ngulupai mobha gashaishé Mwana juka Mundu?" **9** A Yesu gubhaatanjilenje aluno lutango luno, bhene bhaibhonangaga kuti bhakwetenje aki, nikwaanyegayanga bhananji bhowe. **10** "Bhandunji bhabhili bhashinkujombokanga kwenda kwaajuga a Nnungu Kuliekalu, jumo paaliji Mpalihayo, na junu nkamula koli." **11** "Mpalihayo jula gwajimi, nikwaajuga a Nnungu shamuntima nnei, 'Mmwe a Nnungu ngunakuntendela eja pabha nne nngabha malinga bhananji, bhadokanga na bhalambilanga eu bha labhalabha. Ngunakuntendela eja pabha nne nngabha malinga aju nkamula koliju. **12** Ngunatabha pabhili kwa juma jimo, ngunashoya mbepei ya lipungu lya kumi lya indu yangu yowe ingupata." **13** "Ikabheje nkamula koli jula, ali ajimi kwataliya alijogopa nkali kujinula meyo gakwe kunnungu, ikabhe alikwiikoma pantima kwa kwibhonela shiya, gwashite, 'Mmwe a Nnungu mmonele shiya nne ngwete yambi.' **14** Ngunakummalandjilanga, Nkamula koli jula pabhujile kunngwakwe ali abhalanganishiywe aki na a Nnungu kupunda

Palishayo jula. Pabha jojowe akwiikweya shaatuluywe, na jojowe akwiituluya shaakweywe.” **15** Bhandunji gubhaapeleshelenje a Yesu bhana bhashoko nkupinga bhaabhishilanje makono na bhaajujilanje mboka. Bhaajiganywa bhabho bhakaabhonanjeje, gubhaakalipilenje. **16** Ikabheje a Yesu gubhaashemilenje bhalinkuti, “Mwaalekanje bhana bhashoko bhanyiilanje, wala nnaaibhililanje, pabha Upalume gwa a Nnungu ni gwa bhandunji malinga bhanganyabha. **17** Kweli ngunakummalanjilanga, mundu jojowe akauposhele Upalume gwa a Nnungu malinga mwana jwanshoko, akajnjila Muupalumemo.” **18** Akalongolele bhamo bha Shiyaudi bhashinkwabhuva a Yesu, “Mmajiganya mmambone, ndende bhuli mbate gumi gwa pitipiti?” (aiōnios g166)

19 A Yesu gubhaajangwile, “Pakuti nnaanjema najwa mmbone? Jwakwa ali jwa mmbone ikabhe a Nnungu jikape. **20** Gwimanyi shalia. ‘Unalabhelabhe, unabhlaje, unajibhe, unakong’ondele ya unami na gwaaiishimie ainago na akwenu.” **21** Nshanda jula gwabhalugulile, “Gene gowego nigakamwile tandubhila kuuungwendo gwangu.” **22** A Yesu bhakapilikaneje genego, gubhammalanjile, “Ushitubhilwa shindu shimo, ukaushe indu yako yowe yuukwete, na mmbiyayo gwaagabhilanje bhalaga, na ugwe shiukole shibhiko shako kunnungu, kungai ujie kuungagule.” **23** Ikabheje mundu jula akapilikaneje genego, gwainginishe kwa kaje, pabha ashinkukola mali gamagwinji. **24** A Yesu gubhannolile gubhashite, “Shiibhe ukomu kuka tajili kujinjila Muupalume gwa a Nnungu! **25** Kweli, shiikomboleshe ngamia kupeleta palilanga lya ingano, kupunda tajili kujinjila Muupalume gwa a Nnungu.” **26** Bhandunji bhala bhakapilikakananjeje genego, gubhaabhushiyenje, “Bhai igala gani shakombole tapulwa?” **27** A Yesu gubhajangwile, “Gakaakomboleka na bhandunji, kwa a

Nnungu ganakomboleka.” **28** A Petili gubhashite “Nnole uwe tushileka indu yetu yowe itukwete nikunkagula!” **29** A Yesu gubhaaluguliljenje, “Kweli ngunakkummalanjilanga, mundu jojowe aleshile nyumba eu akagwe eu akulugwe eu bhankwetenje eu bhana kwa ligongo lya Upalume gwa a Nnungu, **30** Shaposhela yaigwinji kwa kaje agano mobha gano, na gumi gwa pitipiti mobha gakwiyago.” (aiōn g165, aiōnios g166) **31** A Yesu gubhaatolilenje likumi limo na bhabhili bhala kunyenje, nigubhaabhalanjilenje, “Mpilikananje! Tunajomboka kuloya ku Yelushalemu, kweneko gowe gajandikwe na ashinkulondola gaka Mwana juka Mundu shigatimilile. **32** Pabha shakamuywe kubhandu bha ilambo ina, na bhene bhanganyabho shibhampetekuyanje, shibhantukananje na kunng'unila mata. **33** Shibhankomanje na mishapilo nikummulaga, ikabheje lyubha lya tatu shayushe.” **34** Ikabheje bhaajiganya bhabho bhangagamanyanga gene malobhego, pabha bhashinkuiywanga malombolelo gakwe, kwa nneyo bhangagamanyanga gubhabheleketaga. **35** A Yesu bhakabhandishileje ku Yeliko, mundu jumo nangalole nkujuga ashinkupagwa nnyenje mpanda alijuga. **36** Akapilikaneje lugwinjili lwa bhandu lulipita gwabhushiye, “Shipali nndi?” **37** Gubhammadlanjilenje, “A Yesu Bhanashaleti bhanapita.” **38** Jwalakwe gwakweshiye lilobhe alinkuti, “A Yesu, bhanabhabho a Daudi, mmonele shiya!” **39** Bhandunji bhalongolelenje bhala gubhankalipilenje nkupinga apumule, ikabheje jwalakwe gwapundile kweya lilobhe, “A Yesu bhanabhabho a Daudi mmonele shiya!” **40** A Yesu gubhajimi, gubhatumile bhannjiyenabhonji pubhaliji pala. Nangalole jula akabhandishileje, a Yesu gubhammushiye, **41** “Upinga nikutendele nndi?” Gwashite, “Mmakulungwa, ngunapinga nole.” **42** A Yesu

gubhannugulile, "Bhai lola! Ngulupai jako jikulamiye." **43** Na shangupe nangalole jula gwakombwele kulola, gwabhakagwile a Yesu alipita kwaakuya a Nnungu. Bhandunji bhowe bhakagabhonanjeje genego gubhainiyenje a Nnungu.

19 A Yesu gubhajinjile nshilambo sha ku Yeliko, nipita pakatipakati ja shene shilambosh. **2** Bhashinkupagwa bhandu bhamo pashilambopo bhashemwaga a Shakayo, bhakulungwa bha bhaakamula bhaaliji tajili. **3** Bhatendaga pinga bhaabhone a Yesu shibhali, ikabheje kwa ligongo lya lugwinjili lwa bhandu na pabha bhashinkubha bhabhaupi, bhangakombola kwaabhona. **4** Kwa nneyo, kwa lubhilo, gubhalongolele, gubhakwelile munkongo gwankulungwa nkupinga bhaabhone a Yesu, pabha shibhapite mpanda gogo. **5** Bhai a Yesu bhakaisheje penepo, gubhalolile kunani gubhashite, "A Shakayo, ntulushe shangu, pabha lelo shindame kunngwenu." **6** A Shakayo shangupe gubhatulwishe, gubhaaposhele kunngwabho akuno bhalikwinonyela kaje. **7** Bhandu bhowe bhakagabhonanjeje genego, gubhatandubhenje kuinginika bhalinkutinji, "Bhashikwenda tama kuka mundu akwete yambi." **8** Ikabheje a Shakayo gubhajimi mmujo, gubhaabhalanjile a Yesu, "Mmakulungwa nbole! Nne shing'abhanye mali gangu pakatipakati naapanganje bhaalaga, na ibhaga nintolele mundu shindu shoshowe kwa unami, shinimmujishiye passeshe." **9** A Yesu gubhaabhalanjile, "Lelo ntapulo ujinjile nnyumba muno, pabha jweneju nneila peila ni jwa shipinga sha a Bhulaimu. **10** Pabha Mwana juka Mundu kwaishe kuloleya na tapula bhaobhilenje." **11** Bhandu bhatendaga kwaapilikanishiyanga a Yesu, kwa nneyo gubaatanjilenje lutango luna, bhashinkutenda nneyo pabha bhatendaga bhandishila ku Yelushalemu na bhandunji pubhaganishiyangaga kuti Upalume gwa a Nnungu

unakwiya malanga gogo. **12** Gubhaalugulilenje, "Bhashinkupagwa bhandu bhamo bha shipinga sha upalume, bhashinkwenda kushilambo sha talika nkupinga bhakapegwe ukulungwa bhabhe a mpalume na bhabhuje. **13** Bhai, bhakanabhe jabhula bhashinkwaashemanga bhatumishi bhabho kumi, nikwapanganga kila mundu lipungu lya ela, bhalinkuti, 'Ntendelanje upindi mpaka pushimuje.' **14** Ikabheje bhashilambo ajabhonji bhatendaga kwaapatanga, gubhaatumilenje mitume bhakagulanje, bhakalugulanje kuti, 'Tukakwaapinga abha bhatutagwale.'" **15** "Bhakapateje upalume gubhabhujile kumui, na shangupe gubhalajile bhatumishi bhala bhashemwanje, nkupinga bhamumanye kila mundu shapatile. **16** Ntumishi jwa ntai gwaishe nigwashite, 'Mmakulungwa ela imwambелеila, ipatikene pwaida likumi limo.' **17** Na bhalabho gubhammalanjile, 'Utendile ukoto, ugwe ntumishi nnguja. Pabha ushikulupalika pa shindu shishoko, shinikupe ukulungwa gwa ilambo kumi!' **18** Ntumishi jwa bhili gwaishe, nigwashite, 'Mmakulungwa ela imwambелеila, mbatile pwaida paano.' **19** Bhakulungwa gubhammalanjile, 'Numbe ugwe shubhe nkulungwa jwa ilambo nng'ano.' **20** "Ntumishi juna gwaishe, nigwashite, 'Mmakulungwa ajino ela jenu, nashinkuiya ukoto nshigubho, **21** pabha nashinkunnjogopa mmwe mmandu mmanonopa ntima. Mmwe nnatola yangali yenu, nnaneng'ena munkapandileje.' **22** Na bhalabho gubhammalanjile, 'Ngunakuukumula kwa ligongo lya malobhe gako, ugwe ntumishi ujwangali gwa mmbone! Ibhaga gwamumanyi kuti nne namundu jwa nonopa ntima, ngunatola yangali yanngu na ngunaneng'ena mungapandileje. **23** Bhai kwa nddi unabhishe ela jangu kubhenki, na nne ngatolile na pwaida nkubhuja mwanja gwangu?" **24** Penepo

gubhaalugulilenje bhalinginji pepala bhala, "Mumpokonyolanje elajo, nkampanganje apatile pwaida ja likumi limo jula." **25** Na bhalabhonji gubhaalugulilenje, "Mmakulungwa, pakubha tayali apatile likumi limo!" **26** Na bhalabho gubhaajangwilenje, "Jojowe akwete shindu shaajenjeshewe. Ikabheje jwangali shindu jula, nkali shakwete shila shaapokonyolwe. **27** 'Nnaino, ga ashaamagongo ajangu bhakaapinganga nne kubha mpalume jwabhonji, mwajiyenabhonji apano, mwaabhlaganje pa meyo gangu." **28** A Yeshu bhakabheleketeje genego, gubhalongolele mmujo kuloya ku Yelushalemu. **29** Bhakabhandishileje ku Bhetipage na ku Bhetania, tome na shitumbi sha Misheituni, gubhaatumilenje bhabhili munkumbi gwa bhaajiganywa bhabho, **30** gubaabhalanjilenje, "Nnjendangane kushijiji shili mmujo jenunji. Pushinnjinjilangane, shimunng'imananje mwana jwa mbunda akanabhe jigala mundu, atabhilwe. Munngopolanje munnjiyenajonji apano. **31** Ibhaga mundu shammuyanje, nkunngopolelanga nndi, mummalanjilanje, 'Bhakulungwa bhanakumpinga.'" **32** Bhai, gubhapitengene, niimana malinga shibhabhalanjilwenje. **33** Bhalikunngopolanga mwana jwa mbunda jula, bhayene gubaabhuhiyenje, "Nkunngopolelanga nndi mwana jwa mbundajo?" **34** Na bhalabhonji gubhajangwilenje, "Bhakulungwa bhanakumpinga." **35** Bhai gubhaapeleshelenje Yeshu mwana jwa mbunda jula. Gubhatandikenje nngubho yabbonji panngongo gwakwe, gubaakweshiyenje a Yeshu panani jakwe. **36** A Yeshu pubhapitaga mumpanda, bhandunji gubhatandikenje nngubho yabbonji. **37** Bhakaisheje tome na ku Yelushalemu, bhalielela shitumbi sha Misheituni, lugwinjili lowe na bhaajiganywa bhabho, gubhatandubhenje kuangalila na kwainiya a Nnunu kwa utiya, kwa ligongo lya ilapo

yaigwinji ibhaibhweninji, **38** bhalinkutinji, "Bhakwete mboka A mpalume bhakwiya kwa lina lya Bhakulungwa. Ulele kunnunu na Ukonjelo kunani kajeko!" **39** Penepo Ashimapalishayo bhana bhalinginji nnikundi mula gubhaabhalanjilenje a Yesu, "Mmajiganya, mwalimbiyanje bhaajiganywa bhenu!" **40** A Yesu gubhaajangwilenje, "Ngunakummalanjilanga, bhanganyabha bhapumulangaga, maganga shigajobhele." **41** A Yesu bhakabhandishileje na kushibhona shilambo sha Yelushalemu shila, gubhashigutile **42** bhalinkuti, "Kaliji ukaimanyi ata ugwe lelo ipeleshela ulele! Ikabheje nnaino ishiiywa unaibhone. **43** Pabha ganakwiya mobha bhamagongo ajako, shibhakutimbililanje nikuibhilila mmbali yowe. **44** Shihakukandaganye ugwe na ashibhanago nkati pemo. Na bhakalekanga nkali liganga limo lijimi pa liganga lina, pabha gwangagamanya malanga ga ntapulo gwako." **45** Kungai a Yesu gubhapite ku Liekalu, gubhatandwibhe kwaabhinganjilanga palanga bhatendangaga upindi **46** bhalinkuti, "Ishijandikwa, 'Nyumba jangu shijibhe nyumba ja kwaajujila a Nnungu,' ikabheje mmanganya nshitendanga lishembo lya bhaapokonyola." **47** Mobha gowe a Yesu bhatendaga jiganya Nniekalu. Ikabheje ashikalongolele bha ashinkulondola, na bhaajiganya bha shalia na ashikalongolele bha bhandunji bhatendaga loleyanga namuna ja kwaabhlaga. **48** Ikabheje bhakamumanyangaga muutendelo, pabha bhandu bhowe bhatendaga kwaakagulilanga na kwaapilikanishiya.

20 Lyubha limo, a Yesu pubhaliji bhalijiganya bhandu Nniekalu na lunguya Ngani ja Mmbone, ashikalongolele bha bhakulungwanji bha bhaabhishila na bhaajiganya bha shalia na bhanangulungwa gubhaikengene, **2** nigubhaabhushiyenje, "Ntubhalanjile! Genega punkutenda kwa mashili gashi

na gani ampele?" 3 A Yeshu gubhaabhalanjilenje, "Numbe nne shinimmuyanje, 4 mashili ga a Yowana ga bhatisha kugakopweshele kwa a Nnungu eu kubhandu?" 5 Ikabheje bhalabhonji gubhabhalanjilenje, "Tutendaga kugakoposhele kwa a Nnungu, bhalabho shibhatubhuye, 'Pakuti mmangaakulupalilanga?' 6 Na tulugulaga kugakoposhele kubhandu, bhandunji bhowe shibhatukomanje na maganga, pabha bhowe bhanakulupalilanga kuti a Yowana pubhaaliji ankulondola." 7 Bhai, gubhajangulenje, "Tukakukumanya kugakoposhele kwei?" 8 A Yeshu gubhaabhalanjilenje, "Nkali nne ngammalanjilanga ingutenda ino ngutenda kwa mashili gakeni?" 9 A Yeshu gubaatanjilenje bhandunji aluno lutango luno, "Bhandu bhamo bhashinkulima nngunda gwa mishabhibhu, nikwaapolekanga nngunda gula bhaalimanga, kungai gubhajabhwile mwanja kwenda kushilambo sha taliya, gubhalonjeye kweneko. 10 Mobha ga maneng'eno, gubhantumile ntumishi jwabho ajende kubhaalimanga bhala, akatole ndalo ya maneng'eno ga nngunda gwa mishabhibhu. Ikabheje bhaalimanga bhala gubhankomilenje ntumishi jula, gubhamminjilenje gwabhujile gwaayoyo. 11 Bhayene nngunda bhala bhakuntumaga ntumishi junia, ikabheje nneila peila gubhankomilenje na kuntokomaya, gubhamminjilenje gwaayoyo. 12 Gubhantumile kabhili ntumishi jwatatu, najwalakwe, gubhanng'uleyenje, gubhamminjilenje munngunda mula." 13 Bhai bhayene nngunda bhala gubhaganishiye, "Shindende bhuli? 'Shinintume mwanangu jwa jika jungumpinga peju, pana shibhanng'ishimunji.' 14 Bhaalimanga bhala bhakmonanjepe, gubhabhalanjilenje, 'Jweneju ni apinga tola ulishi. Bhai tummulaje, ulishi shigubhe gwetu.' 15 Bhai, gubhankwakwatilenje

palanga nngunda gwa mishabhibhu gula, gubhammulegenje."

A Yesu gubhabhushiye. "Bhai penepo bhayene nngunda bhala shibhaatendanje nndi bhene bhaalimangabho? **16** Shihajiye nikwaabkulaganga bhaalimangabho na nngunda gwa mishabhibhugo shibhaapanganje bhaalimanga bhananji."

Bhandunji bhakapilikananje gene malobhego, gubhashitenje.

"Nngabha, Inakoposhele nneyo!" **17** Ikabheje a Yesu gubhaalolinje, gubhaalugulilenje, "Bhai, gene Majandiko ga malombolelo gakwe nndi? 'Liganga libhakanilenje bhaashenganga, Nnaino lishibha liganga likulu lya pa ndumbal' **18** Mundu jojowe agwilaga pantundu lyene ligangalyo apinga temekanga na linngwilaga mundu jojowe, lipinga kunkandaganya." **19** Bhaajiganya bha Shalia na ashikalongolele bha bhakulungwanji bha bhaabhisila gwaapinjilenje kwaakamula palapepala, pabha bhamumanyinji kuti lwene lutangolo bhatanjilwenje ni bhobho pebho. Ikabheje bhatendaga kubhajogopanga bhandu. **20** Bhai, gubhaatumilenje bhandunji bhaiatembenje bhanguja, bhakaabhuyanje a Yesu ibhuyo ya kwaatanjiya kwa malobhe gabho, nkupinga bhaakamulanje bhaapelekanje kwa ashikalongolele bha ukulungwa. **21** Bhai, bhatumilwenje bhala gubaabhushiyenje a Yesu, "Mmajiganya, tumumanyi mmwe nnabheleketa na kujiganya indu ya uguja na mwangali luagu, mmwe nnajiganya indu ya a Nnunu ipinjikwa bhandu bhatendanje. **22** Bhuli, ni alali uwe kulipa koli kwa a Kaishali eu nngabha?" **23** Ikabheje a Yesu gubhang'amwile kuti bhanakwaatejelanga, nigubhaabhalanjilenje, **24** "Nnangulanje dinali. Bhuli, aji pishaji na gajandikwe pantundu jakwega ni ga keni?" Nigubhaajangwilenje, "Ga a Kaishali."

25 A Yesu nigubhaabhalanjilenje, "Bhai, ili ya a Kaishali

mwaapanganje a Kaishali na ya a Nnungu mwaapanganje a Nnungu.” **26** Bhangakombolanga kwaakamula kwa gene gaabhelekete palugwinjili gala. Nigubhakanganigwenje majangulo gabho, gubhatemingenenje ilili. **27** Kungai Ashimashadukayo bhalugulanga kuti bhawilenje bhakayukanga, gubhaaishilenje a Yesu nikwaabhuja, **28** bhalinkutinji, “Mmajiganya, a Musha bhashinkutujandishila kuti nkulu mundu awaga nikunneka jwankongwe nshitenga gwangali kunkolela bhana, inapinjikwa mpwakwe ajinjile majumba, kupinga ankolele bhana nkulugwe. **29** Bhai, gene mobhago bhashinkupagwanga bhangwendo shabha bha nyumba jimo. Jwa lielo jula gwalombile na gwawile gwangali kuleka mwana. **30** Jwabhili jula gwajinjile majumba, na jwalakwe gwawile gwangali kukola mwana, **31** na jwatatu ni nneila peila. Nkubho gula nibha gula mpaka bhowe shabha bhala gubhawilenje gwangali kukolela bhana. **32** Kungai na jwankongwe jula gwawile. **33** Bhuli, pushibhayukanje, jwankongwejo shabhe nkagwe gani? Pabha ashinkulombwa na bhowe shabha bhala.”

34 A Yesu gubaabhalanjilenje, “Bhandunji bha gegano mobha gano bhanalombanga na lombwa, (*aiōn g165*) **35** Ikabheje bhene shibhayukanje nibhalanganishiwa nndamo ja gene mobhago, bhakalombanga wala bhakalombwanga. (*aiōn g165*)

36 Na shibhabhanganje mbuti ashimalaika bha a Nnungu na bhana bha a Nnungu bhakawanganga kabhili, pabha bhashiyuwanga. **37** Ikabheje, ga yuywa bhawilenje, nkali a Musha nneila peila bhakong'ondele Mmajandiko. Ga shitekete shakolelaga moto shila, bhanakwaashema Bhakulungwa kuti a Nnungu bha a Bhulaimu na bha a Ishaka na bha a Yakobho. **38** Bhai, bhenebho nngabha a Nnungu bha bhawilenje, ikabhe a Nnungu bha bhakotonji, pabha kwa bhenebho

bhowe bhakotonji.” **39** Bhaajiganya bhananji bha Shalia gubhashitenje, “Mmajiganya nshijangula ukoto kaje.” **40** Na bhandunji bhala bhangalinganga kwaabhuva kabhili. **41** A Yesu gubhaabhalanjilenje, “Ni kwa bhuli bhanabheleketanga kuti a Kilishitu ni bha shipinga sha a Daudi? **42** Pabha bhayene a Daudi bhanabheleketa nshitabhu sha Mbeembela, ‘BHAKULUNGWA bhashinkwaalugulila Bhakulungwa bhangu, Ntame kunkono gwangu gwa nnilo **43** Mpaka pushinaabhikanje ashaamagongo ajenunji palibhatila makongono genu.” **44** Ibhaga a Daudi bhakwaashema bhenebho, Bhakulungwa bhai, shibhabhe bhuli bhana bhabho? **45** Akuno bhandu bhowe bhalikwipilikanishiyanga a Yesu gubhaalugulilenje bhaajiganywa bhabho. **46** “Mwiiteiganje na bhaajiganya bha Shalia inakwaanonyelanga pita jimajima akuno bhali bhawalilenje majoo. Inakwaanonyelanga kukomaywa mummbala ya ushiya indu na tama mwiitengu ya mmujo mmashinagogi. **47** Kwa ugulumba, bhanakwaatolelanga bhanabhakongwe bha shitenga indu yabhonji, bhalikwiitembanganga kuti bhanguja, bhalikwaajuganga a Nnungu kwa leupya. Bhene bhanganyabho shibhaukumulwanje kupunda bhananji.”

21 A Yesu bhatendaga kwalolesheyanga matajili bhalitaganga mbepei yabhonji nshibhiko sha ekalu, **2** gubaaweni bhakongwe bhamo bhashitenga na bhaalaga bhalitumbushiya shenti ibhili. **3** Bhai, gubhashite, “Kweli ngunakummalianjilanga, bhene bhakongwe bha shitenga bhaalagabha bhashitaga yaigwinji kupunda bhowenji. **4** Pabha bhananji bhowe bhashishoyanga mbepei ya indu ipundile pa indu yabhonji ila, ikabheje abha na kulaga kwabho, bhashishoya yowe ibhakulupalilaga nkulamila.” **5** Bhaajiganywa bhabho bhatendaga kungulushilanga

ga Liekalu shilishite kelengelelwa kwa maganga ga konja na indu ishoshiywe mbepei kwa a Nnungu. Ikabheje a Yesu gubhashite, **6** “Gene gowe gunkugabhonangaga shigaishe mobha nkali liganga limo likalepeka pantundu liganga lina, gwangali kubhomolwa.” **7** Bhai, gubhaabhushiyenje, “Mmajiganya, genego shigakoposhele shakani? Na ilangulo yashi shiikoposhele kulangula genego gali tome na koposhela?” **8** A Yesu gubhaajangwilenje, “Mwiiteiganje nnatembwanga. Pabha bhabhagwinji shibhaikangane bhalikwitembanga kuti nne a Kilishitu Bhaatapula na malanga gala gabhandishile. Ikabheje mmanganya nnaakagulanje! **9** Bhai, pushimpiliikanje ga ngondo na tendebhukana, nnajogopanje, pabha yeneyo inapinjikwa ikoposhele oti, ikabheje mpelo gwa gowe, ukanabhe.” **10** Bhai gubhapundile bheleketa. “Shilambo shimo shishikomane na shilambo shina, na upalume gumo shiukomane na upalume guna. **11** Kupinga koposhela kuungumila kwa litaka kwa punda, na limbukute lya shibhangna na ilwele ya jambushiya mmbali yaigwinji. Kupingabha na indu ya jogoya na ilangulo yaikuluikulu kunnungu.” **12** “Ikabheje yene yoweyo ikanabhe koposhela shibhankamulanje nikumpotekanga na shibhampelekanje M mashinagogi na kuntabhangna mmagelesha na shimpelekwanje kwa bhakulungwa na kubhakulungwanji kwa ligongo lyangu, **13** yeneyo shiikoposhele nkupinga mwaakong'ondelanje ngani jangu. **14** Ikabheje nnakolanje lipamba mmitima jenunji kuti shimmeleketanje nndi sha kuitapula, **15** pabha shinimpanganje malobhe na lunda, gaatenda ashaamagongo ajenunji bhakakombolanga kunkananga wala kuntaukanga. **16** Bhankwetenje na ashapwenu na ashalongo ajenunji na ashambwiga ajenunji shibhankananje na mmananji

shimmulagwanje. **17** Bhandu bhowe shibhampatanje, kwa ligongo lya lina lyangu. **18** Ikabheje, nkali luumbo lumo lwa mmitwe jwenunji lukaobha. **19** Kwa kwiikakatimila kwenunji shimwitapulanje.” **20** “Pushinshibhonanje shilambo sha Yelushalemu shitimbililwe na makuga ga ashimanjola, bhai mmumanyanje kuti gabhandishile malanga ga shene shilambosho kuangabhanywa. **21** Penepo bhalinginji ku Yudea bhabhutushilanje mwitumbi, bhalinginji kunnjini bhashokangane, na bhalinginji mmigunda bhanabhujangane kunnjini. **22** Pabha gene mobhago shigabhe ga mboteko ya a Nnungu kubhandu bhabho, nkupinga gowe gajandikwe Mmajandiko gamalile. **23** Ole gwabhonji bhakwetenje ndumbo na bhajonjeyanga gene mobhago! Pabha shipingapagwa shilaje shapunda nshilambo, na nnjimwa ya a Nnungu shiyajiilanje bhene bhandunjibha. **24** Bhana shibhabhulagwanje kwa upanga, bhana shibhatolwe ubhanda mwililambo yowe na shilambo sha Yelushalemu shipinga libhatwa na bhandunji bha ilambo inape mpaka mobha gabhonji pushigatimilile. **25** “Kupingabha na ilangulo kulyubha, kumwei, na kundondwa. Ilambo ya pashilambolyo ni ipingabha nshilaje kwa ligongo lya lipamba ga nng’indo gwa mabhimibili ga bhaali. **26** Bhandunji shibhaondokanje kwa ligongo lya bhoga, bhalilolelanga indu ipinga koposhela nshilambolyo, pabha mashili ga kunnungu gapinga tikinywa. **27** Kungai, shibhammonanje Mwana juka Mundu alikwiya mmaunde, ali na mashili na ukonjelo nkulu. **28** Malanga gushigatandubhe genego kukoposhela, nnjimangane, nnjinulanje meyo genunji kunani, pabha kugombolwa kwenunji kubhandishile.” **29** Kungai gubaabhalanjilenje lutango, “Nnolanje ntini na mikongo jina jowe. **30** Punkubhonanga jiliipuka maamba, nnakumumanyanga

kuti shuku shibhandishile. **31** Nneyo peyo, pushimmonanje genego galikoposhela, shimmumanyanje kuti Upalume gwa a Nnungu ubhandishile.” **32** “Kweli ngunakummalanjilanga, alu lubheleko lwa nnainolu lukapita mpaka gene gowega gamalile. **33** Kunnungu na shilambolyo shiipite, ikabheje malobhe gangu gakapita.” **34** “Mwiiteiganje, mitima jenunji jinakwiibhuka nkupoka na kolelwa na kuabhushila ya nndamo jino. Lyene lyubhaloy linakunng’imananga shiimushila mbuti kutanjila kwa nnukonji. **35** Nneyo ni shiipinga koposhela, kubhandu bhowe bhaatamangana pa shilambolyo. **36** Bhai nsheyanje, nkwaajuga a Nnungu mobha gowe, kupinga mpatanje mashili ga kwiitapula pushigakoposhele genego na jima mmujo jika Mwana juka Mundu.” **37** Kila mui a Yesu bhatendaga jiganya Nniekalu, ikabheje shilo bhatendaga tama kushitumbi sha Misheituni. **38** Bhandu bhowe bhatendaga labhanga lyamba, kwenda ku Liekalu kukwaapilikanishiya.

22 Shikuu sha mikate jangatagwa ngedule, shishemwa pashaka, shatendaga bhandishila. **2** Ashikalongolele bha bhaabhishila na bhaajiganya bha shalia, bhatendaga loleyanga mwa kwabhlajila a Yesu, ikabhe bhatendaga kwaajogopanga bhandunji. **3** Bhai, Lishetani akwaajinjilaga a Yuda Ishikaliote, bhaliji munkumbi gwa mitume kumi na bhabhili bhala. **4** A Yuda gubhapite kunguluka na ashikalongolele bha bhaabhishila na bhakulungwanji bha manjola, shibhapinga kwaendebhuka a Yesu. **5** Nabhalabhonji guyaanonyelenje nigubhalegenenje kwaapa mmbiya. **6** A Yuda gubhakundile, gubhatemi nkuloleya malanga ga mmbone ga kwaatendebhuka a Yesu gwangali kumumanya bhandu bhabhagwinji. **7** Bhai, lyubha lya mikate jangatagwa ngedule guliishile. Lyubhaloy lya ingwa mwana jwa ngondolo jwa pashaka. **8** Kwa nneyo a Yesu gubhaatumilenje

a Petili na a Yowana, gubhaalugulilenje, "Nnjendangane nkakolokoyanje shalya tulye pashaka." **9** Gubhaabhuhiyenje, "Punkupinga tukakolokoye kwei?" **10** Gubhaalugulilenje, "Mpilikananje! Pushinnjendangane kunnjini, shinng'imikananje na jwannume jumo ajigele lulo lwa mashi. Munkagulanje mpaka nnyumba jashaajinjile. **11** Mwaalugulilanje bhayene nyumba, 'Bhaajiganya bhanakummuya, jili kwei kat ijbhapinga lila pashaka na bhaajiganywa bhabho?' **12** Na bhenebho shibhannangulanje kat ikulungwa kugolopa jikonjeleywe, nnkolokoyanje mwenemo."

13 Bhai, gubhabitengene, gubhaimenenje indu yowe malinga shibhabhalanjilwenje na a Yesu, gubhakolokoyenje shalya sha pashaka. **14** Malanga gakatimilileje, a Yesu gubhatemi pamo na mitume bhabho nkulya shalya. **15** Gubhaalugulilenje, "Njilokila kaje kulya pashakaji pamo na mmanganya nganabhe potekwa. **16** Pabha ngajilya kabhili mpaka penepo pushijimalile mu Upalume gwa a Nnungu." **17** Kungai gubhatolile shikombe sha divai, gubhatendile ej, gubhashite, "Ntolanje n nepesheyane mmowe. **18** Pabha ngunakummalanjilanga, ngang'wa kabhili divai ja shabhibhu mpaka Upalume gwa a Nnungu pushuishe."

19 Kungai, gubhatolile nkate, gubhatendile ej, gubhaugebhenye, gubhaapelenje bhalinkuti, "Sheshino shiilu shangu shipinga shoywa kwa ligongo lyenunji. Ntendanje nnei kwa ngumbushila nne." **20** Nneyo peyo bhakalyanganjeje gubhatolile shikombe, gubhashite, "Ashino shikombe shino, sha malagano ga ambi gakong'ondelwa na minyai jangu jijitika kwa ligongo lyenunji. **21** "Ikabheje, nnolanje! Andendebhuka jula pali na nne pamesha pepano. **22** Kweli Mwana juka Mundu anakwenda bhulagwa malinga shiipanjilwe, ikabheje ole, mundu andendebhuka."

23 Penepo gubhatandubhenje kubhuyana ashaayene, gani

shatende yeneyo. **24** Na kabhili nikoposhela mitau munkumbi gwabonji, kuti gani shabhe nkulungwa kupunda bhananji.

25 A Yesu gubhaabhalanjilenje, “Bhapalume bha ilambo bhanakwaatgalanga bhandu bhabhonji kwa mashili, ikabhe pubhaashemwanga ‘Bhamituka.’ **26** Ikabheje mmanganya, inabhe nneyo, ali nkulungwa jwenunji anapinjikwa abhe nshoko jwa bhowe, na ali kalongolele abhe malinga ntumishi. **27** Igala jwei ali nkulungwa, atama kulya shalya, eu akolokoya jula? Penepo nkulungwa ni atama kulya! Ikabheje nne munkumbi gwetu muno, ni malinga ntumishi.” **28** “Mmanganya ntemingene na nne mobha ga lingwa kwangu, **29** na malinga atati shibhangamwiye upalume, nneyo peyo numbe nne ngunakunkamuyanga mmanganya. **30** Nkupinga nniyanganje na papila pamesha jangu, muupalume gwangu, na shintamangane mwiitengu ya ukulungwa kugaukumula makabhila kumi na gabhili ga Ishilaeli.”

31 A Yesu gubhashite “A Shimoni, a Shimoni! Mpilikane! Lishetani anapinga ampembulanje mmanganya mbuti ngano. **32** Ikabheje nne ninnujile mmwe a Shimoni, nkupinga ngulupai jenu jinapungushe. Na mmwe pushimmujilepo mwaataganje ntima ashaapwenu.” **33** Na a Petili gubhaajangwile, “Mmakulungwa, nne apano nili tayali kwenda tabhwa kumagelesha, nkali kuwa na mmwe.” **34** A Yesu gubhaajangwile, “Ngunakummalanjila mmwe a Petili, lelo lipongo likanabhe kongobhela shinngane patatu.” **35** Kungai a Yesu gubhaabhushiyenje bhaajiganywa bhabho, “Punantumilenje gwangali nng’uko gwa ela, wala nkobha gwa ilatu, mwatubhilwenje shoshowe?” Gubhajangwilenje, “Nng’oo twanngatubhilwa.” **36** Gubaalugulilenje, “Ikabheje nnaino, jwene akwete nng’uko gwa ela jula ajigale, na akwete nkobha, nneyo peyo. Na jojowe jwangali upanga, aushe likoti

lyakwe aume gumo. **37** Ngunakummalianjilanga, ganapinjikwa gatimilile majandiko gaanugula nne cuti, ‘Bhashinkubhikwa likundi limo na bhaalebhanga,’ elo, gowe gajandikwe kunugula nne ganapinjikwa gamalile.” **38** Na bhalabhonji gubhashitenje, “Mmakulungwa, nnole, apano jipali mipanga jibhili.” Na bhalabho gubhashite, “Bhai shijipwae.” **39** Na malinga shibhayobhelele, a Yesu gubhapite kushitumbi sha Misheituni, bhaajiganywa bhabho gubhaakagwilenje. **40** Bhakaikanganeje kweneko gubhaaluguliljenje, “Mwaajuganje a Nnungu nnajinjilanga mmalinjilo.” **41** Kungai gubhaaleshilenje bhaajiganywa bhabho, gubhapite kwa taliya kashoko kwa leshela mundu liganga kuika, gubhatindibhele nkwaajuga a Nnungu **42** bhalinkuti, “Atati, ibhaga nkupinga, nnjosheye shikombe sha mbotekoshi, nkali nneyo, itendeshe malinga shinkupinga mmwe, na wala nngabha malinga shingupinga nne.” **43** Malaika kukopoka kunnungu akwaakoposhelega kukwaataga ntima. **44** Bhalimboteko ya kaje, gubhamindile kwaajuga a Nnungu, na matukuta gabho nibha mbuti mandondo ga minyai, galindolishila pai. **45** Bhakaajuganjeje a Nnungu, gubhabhujile kubhaajiganywa bhabho, gubhaaimenenje bhagonilenje lugono kwa totoshela nkuijnjika. **46** Gubaabhuhiyenje, “Pakubha nnagonanga? Nnjumukanje maajuganje a Nnungu, nnajinjilanga mmalinjilo.” **47** A Yesu bhakanabhe peya kubheleketa, likundi lya bhandunji guliiishe lililongoywa na Yuda, bha munkumbi gwa kumi na bhabhili bhala. A Yuda gubaabhandishile a Yesu nkupinga kwaalamba. **48** Ikabheje a Yesu gubaabhalanjile, “A Yuda! Bhuli, nnakuntendebhuka Mwana juka Mundu kwa kunnamba?” **49** Bhaajiganywa bhabho bhakabhonanjeje nneila gubhashitenje, “Mmakulungwa, tutole mipanga jetu twaakapanje?” **50** Na

jumo gwaleshele upanga mukantumishi jwa bhakulungwa bha bhaabhisila, gwankatile likutu lya kunnilo. **51** Penepo a Yesu gubhashite, "Bhai nnekanje!" Gubhalikwashiye likutu lila, gubhannamiye. **52** Kungai a Yesu gubhaabhalanjilenje ashikalongolele bha bhaabhisila, na ashikalongolele bha bhalinda bha liekalu, na bhanangulungwa bhajilengene kukwakamula, "Bhuli, nnshikwiyangana kungamula na mipanga na ndonga mbuti nne nankupokonyola? **53** Mobha gowe gunaliji na mmanganya nniekalu nkangamulanga nkangamulangaga. Ikabheje gegano ni malanga genunji, malanga ga upalume gwa lubhindu." **54** Bhai, gubhaakamulenje, gubhaatolilene kwendanabhonji kwa akalongolele bha bhaabhisila. A Petili gubhakagwile nnyuma kwa kwaataliya. **55** Moto gwashinkukumbanywa pakati lugwani, gwaatemingene penepo pamo, na a Petili pubhaaliji popo. **56** Ntumishi jumo jwankongwe gwabhabhwene a Petili bhatemi tome pamoto, gwabhakolondolesheye meyo, nigwashite, "Abha bhandubha nnepeila pubhaliji na a Yesu." **57** Ikabheje a Petili gubhakanile bhalinkuti, "Gwee! Nne ngakwaamanya." **58** Kashokope, mundu juna akwaabhonaga a Petili, nigwashite, "Numbe mmwe ni nkumbi gula." Ikabheje a Petili gubhajangwile "Ika mmwe, nngabha nne!" **59** Ikapiteje malanga ga shaa jimo, mundu juna gwakomelesheye, "Kweli abha bhandubha pubhaliji na a Yesu, pabha na bhalabho Bhagalilaya." **60** Ikabheje a Petili gubhashite, "Ika mmwe, ngakwiimanya inkubheleketa!" Na popo pepo, bhakanabhe maliya kubheleketa, lipongo gulikongobhele. **61** Bhakulungwa gubhatendebhwishe nikwaalola a Petili, na bhalabho a Petili gubhakumbushile gubhabhalanjilwe na Bhakulungwa, "Lipongo likanabhe kongobhela lelo, shinngane

patatu.” **62** Penepo gubhakopweshe palanga gubhagutile kwa kaje. **63** Bhandunji bhaabhikaangaga a Yesu muulinda, gubhaakomilenje na kwaalembula. **64** Gubaataabhiljenje shimbala kumeyo, nikwabuyanga, “Nnondole! Ntulugulile gani ankomile.” **65** Gubaabheleketelenje malobhe gamagwinji ga matukano. **66** Kukasheje, bhanangulungwa gubhaimenenje yani, ashikalongolele bha bhaabhisila na bhaajiganya bha shalia. A Yesu gubhapelekwe kulukumbilo. **67** Nigubhashitenje, “Ibhaga mmwe a Kilishitu ntubhalanjile?” A Yesu gubhajangwile, “Nkali nimmalanjilangaga, nkakulupalilanga, **68** nkali nimmuyanje nkanyangulanga. **69** Ikabheje kutandubhila nnaino, Mwana juka Mundu shatame kunkono nnilo gwa Bhakulungwa a Nnunu Bhakwete Mashili.” **70** Penepo bhowenji nigubhashitenje “Igala tutende mmwe bhanabhabho a Nnunu?” Na bhalabho gubhashite, “Mmanganya ninkutinji Nne ni Jwenejo.” **71** Na bhalabhonji nigubhashitenje, “Bhuli, tupinga ukong'ondelo guna? Twaashayene tupilikene bhalibheleketa pa kang'wa jabho bhayene.”

23 Bhai likundi lyowe, gubhajimengene, nikwaapeleka a Yesu kwa a Pilato. **2** Gubhatandubhenje kwaashitakiya bhalinkutinji, “Bhene bhandubha bhatendaga kwaapuganyanga bhandunji bhetu, bhalikwalimbiyang kulipa koli kwa a Kaishali na bhalikwiishema a Kilishitu na a mpalume.” **3** A Pilato gubhaabhushiye a Yesu, “Mmwe a mpalume bha Bhayaudi?” A Yesu gubhaajangwile “Mmwe ni nkubheleketa.” **4** A Pilato gubhaabhalanjilenje ashikalongolele bha bhaabhisila na lugwinjili lwa bhandu, “Ngakushibhona shibhalebhile abha bhandubha.” **5** Ikabheje na bhalabhonji gubhapundilenje kukwiya bhalinkutinji, “Bhanakwiya nnijasha kwa majiganyo gabho

nshilambo showe sha ku Yudea, kundubhila ku Galilaya, mpaka apano.” **6** A Pilato bhakapilikaneje genego gubhabhushiye, “Bhuli, abha bhandubha bha ku Galilaya?” **7** Bhakamumanyeje kuti a Yesu bhaliji mu Ukulungwa gwa a Elode, gubhaapeleshe kwa a Elode, pabha gene mobhago pubhaliji pa Yelushalemu pepala. **8** A Elode guyaanonyele bhakaabhoneje a Yesu. Pabha bhapilikene ngani jabho, kwa nneyo kwa mobha gamagwinji bhatendaga loleya kwaabhona. Na kabhili bhatendaga pinga bhaabhone bhalitenda ilangulo. **9** Bhai, a Elode gubhakabhile nkwbhuya, ikabheje a Yesu bhangaajangula shoshowe. **10** Ashikalongolele bha bhaabhishila na bhaajandika bha shalia, gubhajimingene nkukong'ondela mashitaka gabhonji kwa kakati. **11** Bhai, a Elode na ashimanjola bhabho, gubhaalembulenje a Yesu nikwatendela mbenji, kungai gubhaawashiyenje lijoo lya Upalume, gubhabhujilenabhonji kwa a Pilato. **12** A Elode na a Pilato bhukala pubhalinginji bhamagongo, kutandubhila lyene lyubhaloy gubhalinginji bhambwiga. **13** Bhai, a Pilato gubhashemile shitamo sha ashikalongolele bha bhaabhishila na ashikalongolele bhana bha bhandunji, **14** gubhaabhalanjilenje, “Nshimbeleshelanga abha bhandubha kuti, bhanaapuganya bhandu. Ngakagulileje lyene lilobheli pameyo genunji, nangashibhona shibhalebhile shilingana na mashitaka genunji. **15** Numbe nngabha nne jikape, ikabhe nkali a Elode bhangashibhona shoshowe shibhalebhile, nigubhamujishiye. Pabha abha bhandubha shakwapi shibhatendile shapinjikwa bhaukumulwe kubhulagwa. **16** Kwa nneyo shinajile bhakomwe ibhoko, kungai shinaaleshelele.” **17** Pabha bhashinkupinjikwa kwaagopolelanga nkutabhwu jumo lyubha lya shikukuu. **18** Ikabheje bhowe gwaajobhelenje gwanakamo, “Mwaabhlaje

abho, ntugopolele a Bhalabha!” **19** A Bhalabha bhashinkutabhwa kwa ligongo lya nnjasha yatendeshe pa shilambo na ligongo lya bhulaga bhandu. **20** A Pilato bhapinjile kwaaleshelela a Yesu, bhai gubhakungulwische kabhili na bhandunji, **21** ikabheje bhalabhonji gubhapundilenje jobhela, “Mwaakomele munshalabha, mwaakomele munshalabha!” **22** A Pilato gubhaabhalanjilenje gwatatu, “Bhalebhile nndi? Ngakushibhona shoshowe shibhalebhile shapinjikwa bhabhulagwe, kwa nneyo shindume bhakomwe ibhoko, naaleshelele.” **23** Ikabheje bhalabhonji gubhapundilenje kujobhela, kuti a Yesu bhanapinjikwa bhakomelwe munshalabha. Kungai, malobhe gabhonji gugapilikanishe. **24** Bhai a Pilato gubhaukumwile kuti, itendeshe malinga shibhapingangaga. **25** Gubhaaleshelele a Bhalabha bhatabhilwe kwa ligongo lya nnjasha na bhulaga bhandu. Gubhaakamwiye a Yesu kwa ashimanjola, bhaatendelanje malinga shibhapingangaga. **26** Bhalinginji nkwaapeleka, gubhaimikenenje naka mundu jumo ashemwaga Shimoni jwa ku Kilene, alikopoka kunngunda. Bhai, gubhankamwilenje, gubhantwihisenje nshalabha gula aujigale nnyuma ja a Yesu. **27** Bhandunji, makundi kwa makundi gubhaakagulenje, munkumbimo bhapalinji bhanabhakongwe bhaagutilangaga ililo. **28** A Yesu gubaatendebhushilenje, gubhashite, “Mmanganya ashinabhti bha pa Yelushalemu! Nnang’utilanje nne, ikabhe mwiigutilanje mwaashayene na ashibhana bhenu. **29** Pabha, shigaishe mobha pushimmeleketanje, mbaya ashinannii na bhakanabhe kolanga wala kujonjeya! **30** Penepo, bhandunji shibhailugululanje itumbi, ‘Ntugwilanje!’ Na ijomboya, ‘Ntuunishilanje!’ **31** Ibhaga bhandunji bhakuutendelanga nnei nkongo gwa mmii, shiibhe

bhuli kwa nkongo gwa nnjumu?" **32** Bhandunji bhana bhabhili bhaalebhanga, bhashinkupelekwanga bhabhulagwanje pamo na a Yeshu. **33** Bhakaikanganeje pashemwaga, Shihanga sha Ntwe, penepo gubhaakomelenje munshalabha a Yeshu na bhandunji bhabhili bhaalebhanga bhala, jumo kunkono nnilo, na junu kunkono nshinda. **34** A Yeshu gubhashite, "Atati mwaaleshelelanje, pabha bhakakwimanyanga ibhatendanga." Gubhagebhenenje nngubho yabho kwa tendela shikoma. **35** Bhandunji gubhajimingene bhalilosheyanga. Na bhalabhonji ashikalongolele bha Shiyaudi gubhaatendelenje mbenji bhalinkutinji, "Bhashikwatapulanga bhananji, nnaino bhaitapule bhayene, monaga bhenebha bhal a Kilishitu bha a Nnungu!" **36** Ashimanjola nneyo peyo gubhaatendelenje mbenji a Yeshu, gubhaajendelenje nikwaapa divai ja shashama bhapapile, **37** bhalinkutinji, "Monaga mmwe nni A mpalume bha Bhayaudi, mwiitapule mmayene." **38** Na pantundu nshalabha gwabho pashinkujandikwa mmbila "BHENEBA A MPALUME BHA BHAYAUDI." **39** Na nkulebha jumo akomelwe munshalabha jula, gwabhatukene alinkuti, "Bhuli, igala mmwe nngati a Kilishitu? Bhai mwiitapule mmayene, ntutapule na uwe." **40** Ikabheje nkulebha junu jula gwankalipile mwine alinkuti, "Ugwe ukakwaajogopa a Nnungu? Numbe uli na ukumu jojo. **41** Uwe tushiukumulwa kwa aki, kwa itendi yetu. Ikabheje abha bhandubha shakwapi shoshowe shibhalebhile." **42** Kungai nigwashite, "Mmwe a Yeshu! Nngumbushile pushinnjinjile mu Upalume gwenupo." **43** A Yeshu gubhannjangwile, "Kweli ngunakuubhalanjila, lelope shuubhe na nne kupladisho." **44** Puyaaliji malanga ga shaa shita ja mui, lubhindu lukutabhaga shilambo showe mpaka shaa tisha, **45** na lukulungushi lwa Nniekalu lukupapukaga

ipande ibhili. **46** A Yeshu gubhagutile kwa utiya, “Atati, mmakono genu ngunabhika mbumu yangu.” Bhakamaliyeje kubheleketa genego gubhamalile. **47** Penepo, bhakulungwa bha ashimanjola bhala bhakagabhoneje gatendeshe gala, gubhaaniye a Nnungu bhalinkuti, “Kweli abha bhandubha pubhaliji bha aki.” **48** Bhandu bhowe bhaikengene pepala kulolesheya genego, bhakagabhonanjeje gene gatendeshe gala, gubhabhujilengene kunngwabhonji, bhalikwicomanga pantima nkuinjika. **49** Ashambwiga ajabho a Yeshu, na bhanabhakongwe bhakagulangaga kukopoka ku Galilaya, gubhajimingene kwa talika bhalilolesheyanga genego. **50** Bhai bhashinkupagwa bhandu bhamo lina lyabho a Yoshepu, bhaliji bhanguja na bha aki. Pubhaliji bha lukumbi lukulu lwa Bhayaudi, **51** ikabheje bhenebho bhanganonyelwa na ukumu na itendi ya ashikalongolele ajabho. Bhenebha pubhaliji bhashilambo bha ku Alimataya shilambo sha Bhayaudi. Na bhatendaga lindilila kuika kwa Upalume gwa a Nnungu kwa nnolelo nkulu. **52** A Yoshepu gubhaajendele a Pilato, gubhajujile bhapegwe shiilu sha a Yeshu. **53** Kungai gubhatulwiye shiilu munshalabha, gubhailijilile shanda ja kitani ja mmbone, gubhabhishile nnikabhuli lyaolilwe nnindandawe likulungwa, lyaliji likanabhe shikwa mundu. **54** Pulyaaliji lyubha lya kolokoya indu ya Lyubha lya Pumulila, na pulyaaliji tome na tandubha. **55** Bhanabhakongwe bhajilengene pamo na a Yeshu kukopoka ku Galilaya, gubhaakagwiljenje a Yoshepu, gubhaliweninji likabhuli na shibhashite kwaashika a Yeshu. **56** Kungai, gubhabhujengene kumui, gubhajenjilenje mauta ga nunjila ga kwenda pakaya shiilu sha a Yeshu. Lyubha lya Pumulila, gubhapumulilenje malinga shiyalajilwe na shalia.

24 Lyambape lyubha lya Jumapili, gubhapitengenenje kulikabhuli bhali bhajigelenje mauta ga nunjila gubhajenjilenje gala. **2** Gubhaienenje liganga lya ibhila palikabhuli pala linokolelwé kunyenje likabhuli. **3** Bhakajinjilanjeje nkati, bhangashiimananga shiilu sha Bhakulungwa a Yeshu. **4** Bhalinginji nkukanganigwanga ga genego, shangupe bhandunji bhabhli bhawetenje nngubho ya ng'anyima mbuti kumeta kwa nnjai, bhajimingene pa tome. **5** Bhanabkhakongwe bhala gubhajogopenje, gubhatindibhekelenje mpaka shenyi pantaka. Penepo bhandunji bhala gubhaalugulilenje, "Kwa nndi nkwaaloleyanga bhabhakoto munkumbi gwa bhawilenje? **6** Bhakwapi apano, bhayushile. Nkumbushilanje shibhammadanjilenje pubhaliji ku Galilaya cuti, **7** inapinjikwa Mwana juka Mundu akamuywe mmakono ga bhandunji bhakwetenje yambi, bhankomelanje munshalabha na lyubha lya tatu shayushe." **8** Penepo bhanabkhakongwe bhala, gubhakumbushilenje malobhe ga a Yeshu. **9** Bhakabujanganeje kukopoka kumakabhuli, gubhapite kwaalugulilanga ashimitume kumi na jumo bhala, na bhananji gene gowego. **10** Bhene bhapelekenje jene nganijo kwa ashimitume pubhalinginji, a Malia Magidalena, a Yowana na a Malia anyinabhabho a Yakobho, na bhanabkhakongwe bhana bhubhalongenabhonji. **11** Ikabheje bhapilikenjenje bhala, bhangakulupalilanga pabha malobhe gala bhashinkubhoneka mbuti gangali mana. **12** Nkali nneyo, a Petili gubhajabhwile shibhutuka mpaka kulikabhuli. Bhakatepeje kuulumila nkati, gubhajibhwene shanda bhangashibhona shindu shina. Gubhaijabhulile akuno bhalipita kanganigwa ga yowe ikoposhele. **13** Lyubha lyolyo, bhandunji bhabhili munkumbi gwa bhaajiganywa bha a Yeshu, bhatendaga

kwendangana kushijiji shimo shishemwa Emau, mwanja gwa
maili shabha kukoposhela ku Yelushalemu. **14** Bhatendaga
kungulushilanga gowe gakoposhele gala. **15** Bhalinginji
nkukunguluka a Yesu bhayene gubhakoposhele, gubhailundile.
16 Ikabheje meyo gabhonji gashinkugubhikwa bhanaamanyanje.
17 Gubhaabhushiyenje, "Nkukungulushilanga nndi akuno
nnikwendangana?" Gubhajimingene akuno bhaiñjikenje kumeyo.
18 Jumo ashemwa Kileopashi gwabhajangwile, "Bhuli, pa
Yelushalemu mmwe jikape mmajeni nkagugamanya gakoposhele
kweneko agano mobha gano?" **19** Na bhalabho gubhabhushiye,
"Gei genego?" Bhalabhonji gubhaajangulenje, "Ngani ja a Yesu
Bhanashaleti. Bhenebho pubhaliji ankulondola, bhakwete mashili
gamakulungwa, kwa malobhe gabho na itendi yabho pa meyo
ga a Nnungu na pabhandu bhowe. **20** Ashikalongolele bha
bhaabhisila na ashikalongolele bhetu bhashinkwaakamulanga
nikwaukumula bhabhulagwe, gubhaakomelelenje munshalabha
21 Ikabheje twakulupalile kuti bhenebho shibhajigombole
Ishilaeli. Kupunda gene gowego, lelo lyubha lya tatu tandubhila
pugatendeshe. **22** Na kabhili bhanabhakongwe bhana bha
munkumbi gwetu bhashikutuimuyanga. Bhashinkwendangana
kulikabhuli lyambape, **23** bhangashiimananga shiilu shabho.
Gubhabhujengene gubhashitenje kuti bhashinkukoposhelwanga
na ashimalaika bha kunnungu bhalugulenje kuti a
Yesu bhabhakoto. **24** A Shaajetunji bhapitengene
kulikabhuli gubhakong'ondelenje ibhalugulenje bhanabhakongwe
ila, ikabheje bhangaabhonanga." **25** Kungai a Yesu
gubhaalugulilenje, "Pakubha mmanganya mmangumba nneyo
na mitima jenunji jinatopa kukulupalila gowe galugwilwe
na ashinkulondola bha a Nnungu! **26** Bhuli, a Kilishitu

bhakapinjikweje kupotekwa, na kwa nneyo bhajinjile muukonjelo gwabho?" **27** Gubhaatalashiyenje gowe gaatayaga bhenebho, Mmajandiko kutandubhila a Musha mpaka ashinkulondola bhowe bha a Nnungu. **28** Bhakabhandishilanjeje shijiji shibhajendanganaga shila, a Yeshu gubhatendile mbuti bhanapunda kwenda mmujo. **29** Ikabheje bhanganya bhala gubhaashondelesheyenje bhalinkutinji, "Ntame pano na uwe, pabha kunapilila, na shilo shinabhandishila." Bhai, gubhajinjile nnyumba, gubhateminabhonji. **30** Bhakatameje kulya nabhonji, gubhatolile nkate, gubhatendile ej a kwa a Nnungu, gubhaugebhenye, gubhaapelenje. **31** Shangu meyo gabhonji gakutandanukaga, gubhaamanyinji, ikabheje bhenebho gubaobhile pa meyo gabhonji. **32** Bhai, gubhabhalanjilenenje, "Bhuli mitima jetu jikakolelaga nkwiinonyela, pubhatutalashiyaga Majandiko mumpanda mula?" **33** Gubhajabhlengenenje gene malanga pegala, gubhabhujengene ku Yelushalemu. Gubhaaimenenje bhaajiganywa kumi na jumo bhala, na bhandunji bhatemingene pamo **34** bhalibheleketanga, "Kweli bhakulungwa bhayushile, bhaakoposhele a Shimoni." **35** Bhai, bhene bhaajiganywa bhabhili bhala gubhaalugulilenje gowe gaaimenenje mumpanda, na shibhashite kwaamanyanga a Yeshu nkugabhanya nkate. **36** Bhalinginji nkutalashiya genego a Yeshu bhayene gubhajimi pakati jabhonji, gubhaabhalanjilenje, "Ulele ubhe na mmanganya." **37** Gubhaimukenje na jogopa kujila bhakulibhonanga lioka. **38** Ikabheje a Yeshu gubhaabhalanjilenje, "Kwa ndi nnajogopanga? Kwa ndi nnakolanga lipamba mmitima jenunji? **39** Nholanje makono na makongono gangu, kuti ni nne namwene. Mmbapayanje mmonanje, pabha lioka lyangali shiilu na maupa malinga shinkumonanga shino." **40** Bhakabheleketeje

genego, Gubhaalangulenje makono na makongono gabho. **41**
Bhangakulupalilanga kwa ligongo lya kwiinonyela na kanganigwa,
a Yesu gubhaabhushiyenje, "Pepano nkwenenje shalya
shoshowe?" **42** Gubhaapelenje shipande sha shamaki jwa joka. **43**
Gubhatolile, nigubhatawine bhowe bhalikwaalolanga. **44** Kungai
gubhaalugulilenje, "Gegano ni gunamalanjilenje punaliji pamo na
mmanganya, kuti gowe gajandikwe ga nugula nne, Nshalia ja a
Musha, na Ashinkulondola, na Shabhuli ganapinjikwa gatimilile."
45 Penepo, gubhaapelenje lunda lwa kugamanya Majandiko. **46**
Gubhaalugulilenje, "Ishijandikwa, kuti a Kilishitu shibhapotekwe
na lyubha lya tatu shibhayushe. **47** Na kuti, kwiipeta na
kuleshelelwa kwa yambi shikulunguywe kupitila lina lyabho,
kuumila ku Yelushalemu. **48** Mmanganya ni mmaakong'ondela
bha genega. **49** Nnolanje, shinimpeleshelanje miadi ja Atati,
ikabheje ntamangane pano, mpaka pushinimpeleshelanje mashili
ga kopoka kunnungu." **50** Kungai gubhalongoyenje mpaka ku
Bhetania, gubhajinwile makono gabho kunani, nigubhaajujilenje
mboka. **51** Akuno bhalikwaajujilanga mboka, gubhaaleshilenje,
gubhatolilwe kunani kunnungu. **52** Gubhaatindibhalilenje,
nigubhabhujilengene ku Yelushalemu bhalikwinonyelanga
kwa kaje. **53** Gubhatemingenenje mobha gowe Nniekalu
bhalikwainiyanga a Nnunu.

Yowana

1 Kundandubhoko, ashinkupagwa Lilobhe, Lilobhejo paaliji pamo na a Nnungu, shibhaliji a Nnungu na jwalakwe Lilobhe paaliji nneyo peyo. **2** Lilobheju paaliji pamo na a Nnungu kuuumila kundandubho. **3** Indu yowe puipengenyewe kuitila Jwenejo, shakwa shindu shipengenyewe gwangali jwenejo. **4** Jwenejo shiumilo sha gumi na pugwaliji shilangaya kubhandu. **5** Shilangayasho shinalangaya pa lubhindu, wala lubhindu lwangakombola kuima shilangaya. **6** Gwakoposhele mundu jumo atumilwe na a Nnungu, lina lyakwe a Yowana, **7** jwenejo ashinkuika kukong'ondela ga shilangayasho. Nkupinga kwa ntenga gwakwe bhandu bhowe bhakulupalilanje. **8** A Yowana bhayene nngabha shene shilangayasho, ikabhe bhashinkuika kukong'ondela ga jwene aliji shilangayasho. **9** Jweneju ni shilangaya shiyene akwiya pa shilambolyo, kukwamulishilanga bhandu bhowe. **10** Shilangayajo paaliji pashilambolyo, kuitila jwenejo shilambolyo gushipengenyewe, ikabheje bhandu bha pa shilambolyo bhangammanyanga. **11** Aishe kubhandu bhakwe, ikabheje bhandu bhakwe bhangamposhelanga. **12** Ikabheje bhowe bhamposhelenje nikunkulupalila, gwabhatendilenje kubha bhana bha a Nnungu, **13** bhabhelekwenje nngabha kwa komboywa na mundu, wala mashili ga shiilu wala kwaapinga mundu, ikabhe kwaapinga a Nnungu. **14** Lilobhe gwatendeshe kubha mundu nigwatemi kunngwetu. Na uwe gutuubhweni ukonjelo gwakwe, ukonjelo guka Mwana jwa jika akoposhela kwa Atati, agumbele nema na kweli. **15** A Yowana bhabhatisha bhayene gubhaabhalanjilenje bhandu kwa lilobhe lya utiya bhalinkuti, "Jweneju junantayaga kuti, 'Akwiya nnyuma jangu jwankulungwa kumbunda nne, pabha

aapali nne nganabhe pagwa.” **16** Kwa ligongo lya punda nema jabho, uwe tubhowe tupatile mboka ja punda. **17** Pabha Shalia puijishe kupitila a Musha, nema na kweli puiishe kupitila a Yesu Kilishitu. **18** Jwakwa mundu jojowe abhabhweni a Nnungu, ikabhe Mwana jwa jikape jwa a Nnungu, ali pamo na Atati, jwenejo atulangwiye shibhali a Nnungu. **19** Gweguno ni ukong'ondelo gwa a Yowana ku bhakulungwanji bha Bhayaudi bha ku Yelushalemu, pubhaatumilenje bhakulungwanji bha bhishila na Bhalawi, bhakaabhuyanje a Yowana, “Mmwe agani?” **20** A Yowana bhangakana kwaajangulanga, gubhaabhalanjilenje gwangali nng’iyo, “Nne nngabha a Kilishitu.” **21** Penepo gubhaabhushiyenje, “Bhai, Mmwe agani? Bhuli, mmwe a Eliya?” A Yowana gubhajangwile, “Nng’ooke, nne nngabha bhene.” Gubhabhushiyenje, “Mmwe ankulondola bha a Nnungu bhala?” A Yowana gubhaajangwilenje, “Nng’ooke.” **22** Bhalabhonji gubhaabhushiyenje, “Bhai, mmwe agani? Nkwitaya bhuli mmayene? Ntubhalanjile, nkupinga tukaabhalanjilanje bhatutumilenje kukummuya bhala.” **23** A Yowana gubhaajangwilenje, malinga ankulondola bha a Nnungu a Ishaya shibhalugwile. “Nne ni lilobhe lika mundu lipilikanika kuanga. Mwaalashiyanje Bhakulungwa mpanda gwabho, ‘Nngoloyanje mushibhapite.’” **24** Bhene bhandunji bhatumilwenje na Mapalishayo bhala, **25** gubhaabhushiyenje a Yowana, “Monaga mmwe nngabha a Kilishitu na nngabha a Eliya na wala nngabha ankulondola bha a Nnungu bhala, pakuti nnabhatisha?” **26** A Yowana gubhaajangwilenje, “Nne ngunabhatisha kwa mashi, ikabheje bhapali bhamo munkumbi gwenunji bhunkanabhe kwaamanyanga. **27** Bhene bhunalugwile bhanakwiya nnyuma jangu, nne nangatopela kubha ntumishi jwabho nkali jwa gopola

mbundo ya ilatu yabho." **28** Genego kugatendeshe ku Bhetania, kung'ambo lushi lwa Yolodani kubhabhatishaga a Yowana. **29** Malabhi gakwe, a Yowana gubaabhweni a Yesu bhalinkwajiila, gubhashite, "Nnole, bhenebha Mwana Ngondolo jwa a Nnunu, bhaajigala yambi ya bhandu bha pashilambolyo! **30** Bhenebha bhunakungulushilaga nilinkuti, 'Nnyuma jangu bhanakwiya bhandu bhamo bhali bhakulungwa kumbunda nne, pabha bhaapali nne nganabhe pagwa!' **31** Nne namwene ngaamanyiji, ikabheje njikwiya bhatisha kwa mashi nkupinga bhandu bha Ishilaeli bhaamanyanje." **32** A Yowana gubhakong'ondele bhalinkuti, "Nashinkumona Mbumu jwa a Nnunu alituluka mbuti nnjubha, kukoposhela kunnunu nikwaatula. **33** Nne nganaamanye, ikabheje bhene bhandumile kubhatisha kwa mashi bhala bhanugulile, 'Mundu jushimummone alikuntula Mbumu jwa Ukonjelo, jwenejo shaabhatishe kwa Mbumu jwa Ukonjelo.'

34 Nne nigabhweni na ngunakong'ondela kuti bhenebha Bhanabhabho a Nnugu." **35** Malabhi gakwe, a Yowana pubhaaliji na bhaajiganywa bhabho bhabhili. **36** Bhakaabhoneje a Yesu bhalipita, gubhashite, "Nnolanje! Mwana Ngondolo jwa a Nnunu."

37 Bhaajiganywa bhabhili bha a Yowana bhala, bhakapilikananje gene malobhego, gubaakagwilenje a Yesu. **38** Bhai, a Yesu gubhatendebhwishe gubaabhwениji bhaajiganywa bha a Yowana bhalikwakulganga, gubaabhushiyenje, "Nkuloleyanga nndi?" Bhalabhonji gubaajangwilenje, "Alabhi, kunkutama kwei?" A Labhi, malombolelo gakwe Bhaajiganya. **39** A Yesu gubhabhaalanjilenje, "Nnjiyangananje shimpabphonanje." Bhaajiganywa bhala gubaakagwilenje gubhapabhweninji pubhatamaga, puyaliji shaa kumi ja ligulo na gubhatemi nabhonji lyene lyubhalyo. **40** Jumo jwa bhene bhaajiganywa bhabhili

bhaapilikenjenje a Yowana bhalibheleketa nikwakagula a Yesu, pubhashemwaga a Ndeleya, apwabho a Shimoni Petili. **41** A Ndeleya gubhatandwibhe kwaaloleya akulu bhabho a Shimoni, gubhaalugulile, "Twaabhweni a Mashiya" malombolelo gakwe a Kilishitu Bhaatapula. **42** Kungai gubhaapeleshe kwa a Yesu. Na bhalabho a Yesu gubhaalolile nigubhashite, "Mmwe a Shimoni bhana bhabho a Yowana. Nnaino shinshemwe a Kepa." Malombolelo gakwe Petili, yani, "Liganga." **43** Malabhi gakwe a Yesu gubhapinjile kwenda ku Galilaya. Bhai, gubhaabhwene a Pilipi gubhaabhalanjile, "Nngagule." **44** A Pilipi pubhaliji bhandu bha ku Bhetishaida shilambo shibhatamaga a Ndeleya na a Petili. **45** A Pilipi bhakaabhoneje a Natanaeli nigubhaabhalanjile, "Twaabhweni bhene bhajandikwe muitabhu ya shalia ya a Musha na ya ashinkulondola bha a Nnungu, a Yesu bhana bhabho a Yoshepu bha ku Nashaleti." **46** A Natanaeli gubhaabhushiye a Pilipi, "Bhuli, inakomboleka shindu shoshowe sha mmbone kukopoka ku Nashaleti?" A Pilipi gubhaabhalanjile, "Nnjiye kunnole." **47** A Yesu bhakaabhoneje a Natanaeli bhalikwajiila, gubhashite, "Nnolanje, bhenebha Bhaishilaeli bha kweli, bhangali ya nyata muntima gwabho." **48** A Natanaeli gubhaabhushiye, "Mmwe pummanyi nne shanabhuli?" A Yesu gubhajangwile, "Nammweni nni paina nkongo pala, nkali nkanabhe shemwa na a Pilipi." **49** Penepo a Natanaeli gubhaalugulile, "Mmajiganya, mmwe Bhanabhabho a Nnungu. Mmwe a Mpalume bha Ishilaeli!" **50** A Yesu gubhaabhalanjile, "Bhuli, nnakulupalila pabha njikummalanjila kuti namweni nni paina nkongo pala? Shinngabhone gamakulungwa kupunda genega." **51** A Yesu gubhapundile kubheleketa, "Kweli kweli ngunakummalanjilanga, shinkubhonanje kunnungu kuliuguka na ashimalaika bha a

Nnungu bhalikwelanga na tuluka kwangu nne Mwana juka Mundu."

2 Pantondo gwakwe jashinkupagwa ndowa kunjini ku Kana, shilambo sha Galilaya na anyinabhabho a Yeshu bhaapali, **2** a Yeshu na bhaajiganywa bhabho nabhalabhonji bhashinkushemwanga ku ndowajo. **3** Divai ja ndowa jikamaleje, anyinabhabho a Yeshu gubhaabhalanjile, "Bhangalinginji divai!" **4** A Yeshu gubhaajangwile, "Mama, uwe shetu ndi? Malanga gangu gakanabheika." **5** Anyinabhabho gubhaabhalanjilenje bhatumishi, "Lyolyowe lishibannugulilanje, ntendanje." **6** Penepo gashinkupagwa matende shita ga maganga, litende limo lya gumbala lulo pabhili eu patatu. Gashinkubhikwa penepo kwa nkubho gwa Bhayaudi gwa tawasha. **7** A Yeshu gubhaalugulilenje, "Nngumbayanje mashi mmatendemo." Nabhalabhonji gubhagumbeyenje tetete. **8** Kungai gubhaalugulilenje bhatumishi, "Nnaino ntekanje nkaapanganje bhakulungwa bha kalamu." **9** Bhakulungwa bha kalamu bhakapayeje divai jaliji mashi jila, bhangakumanya kujakoposhele, ikabheje bhatumishi bhateshilenje mashi bhamumanyinji. Bhakulungwa bha kalamu bhala gubhanshemile nkulomba, **10** gubhannugulile, "Bhandu bhowe bhanatandubhanga kutekanya divai ja mmbone, bhapapilangaga kwa kaje nitekanya jangali jammbone. Ikabheje mmwe nshigoya divai jammbone mpaka nnaino!" **11** Sheneshi shilangulo sha ndandubho shibhatendile a Yeshu ku Kana ja Galilaya, gubhalangwiye ukonjelo gwapuya gwabho, bhaajiganywa bhabho gubhaakulupalilenje. **12** Gakapiteje genego, a Yeshu na anyinabhabho na ashaapwabho na bhaajiganywa bhabho, gubhaelelenje kwenda ku Kapalanaumu gubhatemingenenje kweneko mobha gashoko.

13 Shikukuu sha Bhayaudi sha Pashaka shikabhandishileje, na bhalabho a Yesu gubhajombweshe kwenda ku Yelushalemu.

14 v 14 Bhai, gubhaaimenenje bhandu ku Liekalu bhaliushanga ng'ombe na ngondolo na ngunda, bhananji bhatemingenenje na mesha yabhonji bhalitindiganya mmbiya. **15** Gubhaeleye nshapilo, gubhaabhinjilenje bhandu bhowe bhakopokanje palanga ku Liekalu na ngondolo na ng'ombe yabhonji, akuno bhalipalaganya mmbiya na pindingula mesha ya bhatindiganya mmbiya, **16** gubhaabhalanjilenje bhaushangaga ngunda bhala, "Nshoyanje apano yene indui. Nnatendanje nyumba ja Atati pa ushiya indu!" **17** Bhaajiganwa bhabho gubhakumbushilenje kuti Majandiko ga Ukonjelo ganalugula, "Lilaka lya pinga nyumba jenu jitame ukoto, shilimboteshe." **18** Ashikalongolele bha Bhayaudi gubhaabhushiyenje a Yesu, "Shintende shilangulo shashi kutulanguya kuti nnapinjikwa kutenda genega?" **19** A Yesu gubhaalugulilenje, "Mbomolanje Liekaluli, nne shinilishenje kwa mobha gatatu." **20** Bhai, Bhayaudi gubhaabhushiyenje, "Liekaluli pulyashenjilwe yaka makumi nsheshe na shita. Mmwe shanabhuli shinkombole kushenga kwa mobha gatatu?" **21** Ikabheje Liekalu libhakungulushilaga a Yesu, ni shiilu shabho bhayene. **22** Bhai, a Yesu bhakayuyewe, bhaajiganwa bhabho gubhakumbushilenje kuti bhatashiye gene malobhego, gubhagakulupalilenje Majandiko ga Ukonjelo na malobhe gubhatashiye a Yesu gala. **23** A Yesu pubhaaliji ku Yelushalemu kushikukuu sha Pashaka, bhandu bhabhagwinji bhakaibhonanjeje ilangulo ibhaitendile gubhaakulupalilenje. **24** Ikabheje a Yesu bhangakulupalila, pabha bhajimanyi mitima jabhonji. **25** Na bhakapingaga mundu akomelesheyre shindu shoshowe ga bhandunji, pabha bhajimanyi mitima jabhonji.

3 Bhashinkupagwa bhakulungwa bhamo bha ashikalongolele
bha lukumbi lwa Bhayaudi, bha munkumbi gwa shikundi sha dini
ja Bhayaudi shishemwa Mapalishayo, lina lyabho a Nikodemo. **2**
Lyubha limo shilo bhashinkwaaajendela a Yeshu, gubhaalugulile,
“Mmaajiganya, tummanyi kuti mmwe mmaajiganya ntumilwe
na a Nnungu, pabha jwakwa mundu akombola kutenda yene
ilangulo inkutendai, a Nnungu bhakabhe pamo naka jwenejo.” **3**
A Yeshu gubhaajangwile, “Kweli ngunakummalanjila, mundu
akabhelekwe gwabhili, akagubhona Upalume gwa a Nnungu.”
4 A Nikodemo gubhaabhushiye, “Mundu jwa nkulungwa pa
bhelekwa gwabhili shanabhuli? Shakombole bhuli kujinjila nnipitiu
lya akwabhe nibhelekwa gwabhili!” **5** A Yeshu gubhaajangwile,
“Kweli ngunakummalanjila, mundu akabhelekwe kwa mashi na
kwa Mbumu jwa a Nnungu, akakombola kujinjila mu Upalume
gwa a Nnungu. **6** Shibhelekwe kwa shiilu ni shiilu na shibhelekwe
kwa Mbumu ni mbumu. **7** Nnaimonje pabha njibheleketa kuti,
nnapinjikwanga mmelekwanje gwabhili. **8** Mbungo jinapuga niloya
kujipinga, mpugo gwakwe gunapilikanika, ikabheje kukamanyika
kuukoposhela wala kuukwenda. Nneyo peyo puili kuka mundu
abhelekwa kwa Mbumu jwa a Nnungu.” **9** A Nikodemo
gubhaabhushiye, “Genega shigakomboleshe shanabhuli?” **10** A
Yeshu gubhaajangwile, “Mmwe mmaajiganya bha pa Ishilaeli,
bhuli, nnagamanye genega? **11** Kweli ngunakummalanjila,
uwe tunabheleketa itukwimanya nikong'ondela ituibhweni,
ikabheje mmanganya nkaakundanga ntenga gwetu. **12** Monaga
nkaakulupalipanga indu ya pa shilambolyo inimmalanjilenje,
shinkulupalilanje bhuli nimmalanjilangaga indu ya kunnungu? **13**
Jwakwa jojowe apite kunnungu, ikabhe nne Mwana juka Mundu
ngopweshe kunnungu. **14** “Malinga a Musha shibhannjinwile

kunani nnuishi ijoka jwa alaywa na shabha kuanga kula, nneyo peyo inapnjikwa nne Mwana juka Mundu nyinulwe kunani, **15**
nkupinga jojowe shakulupalile akole gumi gwa pitipiti." (*aiōnios g166*) **16** Pabha a Nnungu bhashinkwaapinganga bhandu pa shilambolyo, mpaka gubhampeleshe mwanagwabho jwa jika, nkupinga jojowe shankulupalile anaobhe, ikabhe akole gumi gwa pitipiti. (*aiōnios g166*) **17** Pabha a Nnungu bhangampeleka mwanagwabho kushilambolyo nkupinga aukumule bhandu, ikabhe kwabhatapulanje. **18** "Akunkulupalila Mwana jwa a Nnungu akaukumulwa, ikabheje akakunkulupalila jwenejo aukumwilwe, pabha jwangankulupalila Mwana jwa jika jwa a Nnungu. **19** Bhashiukumulwanga pabha, shilangaya shiishe pa shilambolyo, ikabheje bhandunji gubhajinjilenje lubhindu kupunda shilangaya, kwa ligongo lya itendi yabronji yangali ya mmbone. **20** Mundu jojowe atenda yambi shinakunshima shilangaya, na akabhandishila ku shilangaya, pabha akaapinga itendi yakwe ya yambi imanyishe. **21** Ikabheje atenda itendi ya mmbone anakwiya ku shilangaya, nkupinga imanyishe kuti itendi yakwe ni yakomboya na a Nnungu." **22** Gakapiteje genego, a Yeshu na bhaajiganywa bhabho gubhajitengenenge mmbali ja ku Yudea, gubhatermi kweneko bhalibhatisha bhandu. **23** Na bhalabho a Yowana kubhaaliji ku Ainoni, tome na ku Shalemu bhalibhatisha bhandu, pabha kweneko gashinkupagwa mashi gamagwinji. Bhandu gubhaajendelenje, na bhalabho gubhaabhatishenje. **24** Gene mobhago a Yowana pubhaliji bhakanabhe kamulwa nitabhwa. **25** Jishinkukoposhela mitau ja bhaajiganywa bha a Yowana na bhayaudi bhamo ga nkubho gwa Shiyaudi gwa tawasha. **26** Bhai bhaajiganywa bhala gubhaajendelenje a Yowana nikwaalugulila, "Mmaajiganya, mundu aaliji na mmwe

kung'ambu lushi lwa Yolodani jumwakong'ondèle ga ngani jakwe
jula, na jwalakwe nnaino anabhatisha na bhandu bhabhagwinji
bhanakunnjendelanga." 27 A Yowana gubhajangwile, "Mundu
nngakola shoshowe akapegwe na a Nnungu kukoposhela
kunnungu. 28 Numbe mwaashayene nnikong'ondelanga kuti
nantashiyenje kuti, 'Nne nngabha a Kilishitu Bhagombola,
ikabhe njitumwa nkupinga naalongolele!' 29 Jwenejo malinga
nkulomba, na nne malinga mmbwiga mwine nkulomba, ajima
nkulindilila nkulomba aishe, anakwiinonyela kwa kaje paapilikana
lilobhe lika nkulomba alikwiya. Bhai, kwa nneyo kwiiinonyela
kwangu kutimilile kwa pilikana genego. 30 Inapinjikwa bhenebho
bhapunde kukuywa, nne mujile nnyuma." 31 "Jwene aishe
koposhela kunani, ni jwankulungwa kupunda yowe, ikabheje
jwa pashilambolyo ni jwa pashilambolyope na gabheleketa
ni ga indu ya pashilambolyo. Ikabheje akwiya kukoposhela
kunnungu ni jwankulungwa kupunda yowe. 32 Jwenejo yataya
yaibhweni na kwipilikana ila, ikabheje jwakwa mundu akunda
ntenga gwakwe. 33 Ikabheje mundu jo jowe akunda ntenga
guka jwenejo, anakong'ondela kuti a Nnungu ni bhakweli. 34
Jwene atumilwe na a Nnungu anabheleketa malobhe ga a
Nnungu, pabha a Nnungu bhanakumpa mundu Mbumu jwabho
gwangali shipimilo. 35 A Nnungu bhanakumpinga Mwana na
bhashikunkamuya yowe mmakono gakwe. 36 Akunkulupalila
mwana akwete gumi gwa pitipiti, akana kunkulupalila mwana,
akakola gumi gwa pitipiti, ikabhe nnjimwa ja a Nnungu jintamile."

(aiōnios g166)

4 Ashimapalishayo gubhapilikenenje kuti a Yesu bhanapata
na bhatisha bhaajiganywa bhabhagwinji kupunda a Yowana.
2 Ikabheje a Yesu bhayene bhangabhatisha mundu ikabhe

bhabhatishangaga bhaajiganywa bhabho. **3** Bhai, a Yeshu bhakagamanyeje genego, gubhajabhwile ku Yudea kubhuja ku Galilaya, **4** gwene mwanjago bhashinkupinjikwa bhapite ja ku Shamalia. **5** Bhai, gubhaishe ku Shikali shilambo shimo sha ku Shamalia, tome na nngunda gwa a Yoshepu gubhapegwilwe na ainabhabho a Yakobho bhukala. **6** Penepo lishinkupagwa liiko lya a Yakobho, puyaliji malanga ga shaa shita ja mui, pabha a Yeshu bhashinkutotoshela ga mwanja gula, gubhatemi panyenje liiko. **7** Bhai, gubhaishe bhakongwe bhamo bha Shishamalia kuuteka mashi. A Yeshu gubhaalugulile, “None mashi gang'wa.” **8** Gene malangago bhaajiganywa bhabho kubhapatengenenje kunjini kuuma shalya. **9** Bhakongwe bhala gubhaabhalanjile a Yeshu, “Mmwe Mmayaudi na nne Bhakongwe Bhashamalia! Nkukombola bhuli kunyuga mashi gang'wa?” Bhashinkubheleketa nneyo pabha Bhayaudi na Bhashamalia bhakaanganilana. **10** A Yeshu gubhaajangwile, “Nkashimanyi shibhapinga kumpa a Nnungu, numbe gani akummalianjila, none mashi ga ng'wa, nkannujile jwenejo akampele mashi gataga gumi.” **11** Bhakongwe bhala gubhashite, “Mmakulungwa, mmwe mwangali nngabho na liikoli lishitaliya, kumpatile kwei mashi gataga gumigo? **12** Igala mmwe mmakulungwa kupunda ambuje a Yakobho? Bhenebho ni bhatupele uwe lyene liikoli, bayene na ashibhana bhabho na bhannyama bhabho bhang'welenje mashi ga lyene liikoli.” **13** A Yeshu gubhajangwile, “Jojowe shang'we mashi ga lyene liikoli shakole njota kabhili. **14** Ikabheje shang'we mashi gushinimpe nnego akakola njota kabhili. Mashi gushinimpe nnego shigaalaye nkati jakwe shinyenyei sha mashi gataga gumi gwa pitipiti.” (*aiōn g165, aiōnios g166)*

15 Bhakongwe bhala gubhaalugulile, “Mmakulungwa, none

mashigo ngunakole njota kabhili, ngunaishé kabhili apano kuteka mashi.” **16** A Yesu gubhaalugulile, “Nnjende nkaasheme ambujebhenu, nng’ishe nabho apano.” **17** Bhakongwe bhala gubhajangwile, “Nangali ambujebhangu.” A Yesu gubhaalugulile, “Ntashiye ukoto, kuti mwangali ambujebhenu. **18** Pabha mwalombilwe paano na bhunkutama nabho nnainobho nngabha ambuje bhenu bha alali. Penepo guntashiyega ga kweli.” **19** Bhakongwe bhala gubhaabhalanjile, “Mmakulungwa, nne pungubhona kuti mmwe ankulondola bha a Nnungu. **20** Bhanangulungwa bhetu bha Shishamaliya pubhaajujilangaga a Nnungu pa ashi shitumbishi, ikabheje Mmayaudi mmwe nkutinji ku Yelushalemu kula nikutupinjikwa kujujila Nnungu.” **21** A Yesu gubhaalugulile, “awile, nngulupalile nne, mobha ganakwiya nkaajuganga Atati pa shene shitumbishi, wala ku Yelushalemu kula. **22** Mmanganyanji Bhashamaliya nkakwaammanyanga bhunkwaajuganga, ikabheje Tubhayaudi uwe twaamanyi bhutukwaajuga, pabha ntapulo gwa a Nnungu shugushe kuitila ku Bhayaudi. **23** Ikabheje malanga shigaishe, numbe gaishe, gatenda bhakwaatindibhalilanga bha kweli, shibhaatindibhalilanje Atati kwa mashili gaka Mbamu na kwa kweli. Pabha Atati bhanakwaapinganga bhandunji bhaajuganga shana nneyo. **24** A Nnungu ni Mbamu, na bhandu bhakwajuganga bhenebho, bhanapinjikwanga bhaajuganje kwa komboywa naka Mbamu na kweli.” **25** Bhakongwe bhala gubhaalugulile, “Nimumanyi kuti bhanakwiya bhaagwilwe na a Nnungu bhaashemwa a Kilishitu Bhaatapula. Bhenebho bhaikaga, shibhatubhalanjile indu yowe.” **26** A Yesu gubhaabhalanjile, “Nne ngukunguluka na mmwe ni bayene.” **27** Penepo bhaajiganjwa bhabho gubhabhujilengenjenje, gubhakanganigwenje ga kwaakongana

a Yeshu bhalikunguluka na bhakongwe. Ikabheje jwakwa abhabhushiye, "Nkupinga nndi?" Eu, "Kwa nndi nnakunguluka na bhakongwe?" **28** Bhene bhakongwebho gubhaleshile lulo lwabho popo gubhapite kunjini nikwabhalanjilanga bhandunji, **29** "Twendangane nkaalolanje bhandu bhamalanjile indu yangu yowe indendile! Bhuli, nngatendeka bhenebho kubha a Kilishitu Bhaagombola?" **30** Bhai bhandunji kukopoka kunjini kula gubhaajendelenje a Yeshu. **31** Gene malanga pego bhaajiganya bhabho gubaashondelesheyenje a Yeshu bhalinkutinji, "Shonde Mmaajiganya, nnye shalya." **32** Ikabheje a Yeshu gubhaaluguliljenje, "Nne ngwete shalya shinkakushimanyanga." **33** Bhaajiganya bhabho gubhabhuyenenje, "Apali mundu abhapele shalya?" **34** A Yeshu gubhaaluguliljenje, "Shalya shangu ni kutenda ibhapinga bhandumile bhala na maliya liengo lyabho. **35** Mmanganyanji nkabheleketanga cuti, 'Jiigele miei nsheshepe, gaishe mobha ga neng'ena?' Ikabheje nne nguti, nnolanje bhandunjibha, ni malinga yalya mmigunda, iishire pa una. **36** Nkuuna analipwa, na analopolela mauno pamo nkupinga gabhe na gumi gwa pitipiti, nkupinga nkupanda na nkuuna bhowe bhainonyelanje. (aiōnios g166) **37** Kwa nneyo ashi shibheleketo sha cuti, 'Jumo anapanda na junanauna.' Ni sha kweli. **38** Nne njikunntumanga nkaunanje mauno gunkanakamulilanga liengo lya lima, bhakamwilenje liengo likulungwa bhananji, ikabheje inkwiipatanga mmanganyanji, ni kwa ligongo lya liengo lyabhonji." **39** Bhashamalia bhabhagwinji bha shene shilambo shila gubhaakulupaliljenje a Yeshu kwa ligongo lya malobhe gubhabhelekete bhakongwe bhala cuti, "Bhashinugulila indu yowe indendile." **40** Bhashamalia gubhaajendelenje a Yeshu nikwashondelesheya bhatame

nabhonji, gubhatemi kweneko mobha gabhili. **41** Bhandu bhabhagwinji kaje gubhaakulupalilene a Yeshu kwa ligongo lya malobhe gabho. **42** Gubhaalugulilenje bhakongwe bhala, “Nnaino uwe tunakulupalila nngabha kwa ligongo lya malobhe genupe, ikabheje tupilikene twashayene na tumumanyi kuti bhenebha bhapinga tapula shilambolyo.” **43** Gakapiteje mobha gabhili a Yeshu gubhajabhwile kweneko, gubhapite ku Galilaya. **44** Pabha bhayene bhalugwile gwangali nng’yo kuti, “Nkulondola jwa a Nnungu akaishimika pa shilambo shakwe.” **45** Bhai bhakaisheje ku Galilaya, Bhagalilaya bhabhagwinji gubhaaposhelenje. Pabha pubhapatengenenje ku Yelushalemu kushikukuu sha Pashaka, kweneko bhagabhweninji gowe gubhatendile a Yeshu. **46** A Yeshu gubhaishe kabhili kushilambo sha ku Kana kunkowa gwa ku Galilaya, kubhatendile mashi kubha divai. Ku Kapalanaumu bhashinkupagwa bhakulungwa bhamo bha manjola bhakwete mwana nwele ku Kapelenaumu. **47** Bhai, bhakulungwa bha manjola bhala bhakapilikaneje a Yeshu bhashiika ku Galilaya kukoposhela ku Yudea, gubhaajendele nikwaajuga bhajende ku Kapalanaumu bhakannamye mwana gwabho aliji nnwele jwa nnumbangu. **48** A Yeshu gubhaalugulile, “Nkaibhonanje ilangulo na ilapo nkakulupalilanga!” **49** Bhakulungwa bha manjola bhala a gubhaalugulile a Yeshu, “Mmakulungwa, shonde twende mwanangu akanabhewa.” **50** A Yeshu gubhaalugulile, “Njende, mwana gwenu alamile.” Bhandu bhala gubhakulupalile malobhe ga a Yeshu, gubhajabhwile. **51** Bhali mumpanda gwa kwenda kungwabho, gubhaimikene na bhatumishi bhabho, gubhaalugulilenje, “Mmakulungwa, mwana gwenu alamile”. **52** Na bhalabho gubhabhushiyenje, “Malanga gani mwana palamile” Gubhaalugulilenje, “Liyo shaa shaba ja mui, shilwele

pushinneshile." **53** Ainamundu bhala gubhakumbushile kuti pugaliji malanga gogo pege pubhalugulilwe na a Yeshu kuti, "Mwana gwenu alamile." Penepo bhenebho na ashaalongo ajabho bhowe gubaakulupalilene. **54** Sheneshi pushaliji shilangulo sha bhili shibhatendile a Yeshu bhalibhuja ku Yudea kwenda ku Galilaya.

5 Gakapiteje genego shashinkupagwa shikukuu sha Bhayaudi, na bhalabho a Yeshu gubhapite ku Yelushalemu. **2** Kwene ku Yelushalemu, tome na nnango gushemwa, Nnango gwa Ngondolo, lyashinkupagwa litanda lya mashi liishemwa Bhetishata kwa Shiebhulania, na lyashinkukola mmbuto nng'ano. **3** Nnyenje mmatimbwimo bhashinkupagwanga bhalwelenji bhabhagwinji bhatemingenenje, ashinangalole na ashinangwabha na bhalokanga ibhalo, bhalinginji nkulindilila mashi gakologanywe. **4** Pabha malaika jwa kunnungu atendaga tuluka nitimbulikanya mashi. Nnwele jojowe shalongolele tumbushila mmashi mula, shalame shilwele shoshowe shakwete. **5** Bhai, penepo ashinkupagwa nnwele jumo alwalile yaka makumi gatatu na yaka nane. **6** Numbe a Yeshu bhakammoneje jwenejo ali agonile penepo, gubhang'amwile kuti jwenejo patemi penepo mobha gamagwinji, gubhammushiye, "Bhuli ulipinga kulama?" **7** Na jwalakwe gwajangwile, "Mmakulungwa, nne nangali mundu jwandumbushiya mmashimu pugatimbulikanywa. Kila pungulinga tumbushila, mundu juna anakoposhela nimbitila." **8** A Yeshu gubhammadanjile, "Jinuka utole likai lyako ujende." **9** Shangupe mundu jula gwalamile, gwatolile likai lyakwe, gwajabhwile. Lyeneli pulyatendeshe Lyubha lya Pumulila. **10** Kwa nneyo Bhayaudi bhananji gubhannugulilenje mundu alamiywe jula, "Lelo Lyubha lya Pumulila, ikaapinjikwa

kujigala likai.” **11** Ikabheje jwenejo gwabhabhalanjilenje, “Bhene bhandu bhanamiyebho nibhanugulile, ‘Jigala likai lyako, ujende.’” **12** Bhalabhonji gubhaammushiyenje, “Jwene mundu akulugulile, ‘Jigala likai lyako, ujendejo,’ gani?” **13** Ikabheje jwenejo jwangammanyannamiye, pabha a Yeshu bhajabhwile penepo, numbe pashinkugumbala lugwinjili lwa bhandu. **14** Bhai kungai a Yeshu gubhaimene naka mundu jubhannamiye jula ku Likanisha, gubhannugulile, “Nnaino ulamile, unatende yambi kabhili, linakuukoposhela lya punda jogoya.” **15** Bhene bhandubho gubhapite gubhaalugulilenje bhakulungwa bha Bhayaudi kuti, bhanamiye bhala a Yeshu. **16** Pabha a Yeshu bhashinkutenda genego Lyubha lya Pumulila, Bhayaudi gubhatandwibhenje kwaashima. **17** Bhai a Yeshu gubhaalugulilenje, “Atati bhanakamula maengo mobha gowe, nkali nne ngunakamula maengo nneyo peyo.” **18** Kwa gene malobhego, bhakulungwanji bha Bhayaudi gubhapundilenje kuloleya shanabhuli shibhaabkulaganje a Yeshu, nngabha ga nngakunda shalia ja Lyubha lya Pumulilape, ikabhe ga bheleketa kuti a Nnuntu Ainabhabho, kwa nneyo bhanakwiilinganya na a Nnuntu. **19** A Yeshu gubhaalugulilenje, “Kweli kweli ngunakunnugulilanga, Nne namwana gwabho ngakombola tenda shindu sha jikape, ngunatenda shingushibhona Atati bhalitenda. Pabha shibhaatenda Atati, Nne shindende shosho pesho **20** Pabha Atati bhanakumpinga mwana gwabho na bhanakunnanguya kila shindu shibhatenda bhayene na kabhili shibhannanguye indu yaikulungwa kupunda yenei na mmanganya shinkanganigwanje. **21** Malinga Atati shibhakwayuyanga bhawilenje nikwapanganga gumi, nneyo peyo na Nne Mwana gwabho ngunakwwapanganga gumi bhungupinga kwaapanganga.

22 Atati bhakakunng'ukumula mundu jojowe, liengo lyowe
ly a ukumula bhambele Nne namwanagwabho, 23 nkupinga
bhandu bhowe bhang'isimiyange malinga shibhakwaisimiyanga
Atati. Bhakang'ishimiyanga Nne bhakakwaishimiyanga Atati
bhandumile. 24 "Kweli ngunakummalanjilanga, apilikana lilobhe
lyangu na kwakulupalila bhandumile bhala, akwete gumi
gwa pitipiti. Ngu akaukumulwa, ikabhe atapwilwe kushiwo na
apegwilwe gumi. (aiōnios g166) 25 Kweli ngunakunnugulilanga,
mobha ganakwiya, numbe gaishe, bhawilenje shibhapilikananje
lilobhe lyangu, na shibhapilikananjebho, shibhalamanje. 26
Malinga Atati shibhali shiumilo sha gumi, nneyo peyo bhandendile
nne Namwana gwabho kubha shiumilo sha gumi. 27 Kabhili
bhashimba mashili ga ukumula pabha nne Mwana juka
Mundu. 28 Nnakanganigwanje kwa lyeneli, pabha mobha
ganakwiya bhowe bhalinginji mmakabhuli shibhapilikananje
lilobhe lyangu. 29 Na bhalabhonji shibhayukanje, bhatendilenje
ya uguja shibhayukanje na lama na bhatendilenje yangali ya
mmbone shibhayukanje na ukumulwa." 30 "Nne ngaatenda
shindu kwa mashili gangu namwene. Nne ngunaukumula
malinga shingupilikana kopoka kwa Atati, nne ukumu jangu
ja aki. Nne ngaapinga tenda shingupinga namwene, ikabhe
shibhaapinga bhandumile bhala. 31 "Niikong'ondelaga namwene,
ukong'ondelogo jwakwa shakunde kuti gwa kweli. 32 Ikabheje
bhapolinji bhananji bhaakong'ondelanga gangu nne, munkumbi
gwabhonjimo bhapali a Yowana. Na nne nimumanyi kuti yowe
ibhakong'ondele gangu nne, ni ya kweli. 33 Mmanganyanji
nshikwaatumanga bhantenga kwa a Yowana, na bhalabho
gubhakong'ondele ga kweli. 34 Nne ngalolela kukong'ondelwa
na bhandunji, ikabheje ngunabheleketa genega nkupinga

ntapulwanje. **35** A Yowana pubhaliji malinga shenje shikolela nilangaya, na mmanganya mwainonyelenje shilangayasho kwa mobha gashoko.” **36** “Ikabheje nne ngwete ukong’ondelo gwangu namwene numbe gwankulungwa kupunda gwa a Yowana. Pabha maengo gungutenda, ni gubhambele Atati nigatende. Numbe genego ganangong’ondela kuti njitumwa na Atati. **37** Nabhalabho Atati bhandumile bhanangong’ondela. Mmanganya nkanabhe pilikananga lilibhe lyabho, wala kwaabbona kumeyo, **38** na ntenga gwabho gukatama mmitima jenunji, pabha mwangankulupalilanga jubhantumile jula. **39** Mmanganya nnaatonelanga Majandiko ga Ukonjelo nniganishiyanga kuti mwenemo, shimpatanje gumi gwa pitipiti, mbena Majandiko gogo ganangong’ondela nne! (aiōnios g166) **40** Nkali nneyo, mmanganya nkapinganga kunyiila nne nkupinga mpatanje gumi. **41** “Nne ngaloleya kuiniyuwa na bhandunji. **42** Ikabheje nimumanyi kuti mmanganyanji, kwaapinga a Nnunu kwakwa mmitima jenunji. **43** Nne pung’ishe kwa mashili ga Atati, ikabheje nkamboshelanga. Ikabhe mundu juna aikaga kwa mashili gakwe nyene, shimumposhelanje. **44** Mmanganyanji nnappinganga kulumbililwa na bhandu ajenunji, na nkaapinganga kulumbililwa na Bhenebho bhali jikape a Nnunu, igala shinkulupalilanje bhuli? **45** Nnaganishiyanje kuti nne shininnugulanje kwa Atati. A Musha bhunkwaakulupalilangabho shibhannugulanje. **46** Monaga kweli mwaakulupalilene a Musha, nkangulupalilene na nne. Pabha a Musha bhashinkujandika gangu nne. **47** Ikabheje nkakulupalilanje gubhajandishe gala, shinkulupalilanje bhuli, malobhe gungubheleketa nne?”

6 Gakapiteje genego, a Yesu gubhajombweshe litanda lya Galilaya eu guna lishemwa litanda lya Tibheliya. **2**

Lugwinjili lwa bhandu gulwaakagwile, pabha bhashikwiibhonanga ilangulo ibhatendaga ya kwaalamyanga bhalwelenji. **3** A Yeshu gubhakwelile pa shitumbi, gubhatemi na bhaajiganywa bhabho. **4** Na shikukuu sha Bhayaudi shishemwa Pashaka shashinkubhandishila. **5** Bhai, a Yeshu bhakaloleje nikulubhona lugwinjili lwa bhandu lulikwajiila, gubhaalugulile a Pilipi, "Tukaume kwei mikate bhandunjibha bhalyanganje?" **6** Bhashinkubheleketa genego nkwaalinga a Pilipi, pabha bhayene bhashimanyi shishibhatende. **7** A Pilipi gubhaajangwile, "Nkali mikate ja mmbiya yaigwinji, nngajenela kwa bhandunjibha nkali kila mundu apate shipande shishokope!" **8** Jumo munkumbi gwa bhaajiganywa bhabho ashemwaga a Ndeleya, mpwabho a Shimoni guna pubhashemwaga a Petili, akwaalugulilaga, **9** "Apano apali mwana jumo akwete mikate nng'ano ja mbungalai na yamaki ibhili, ikabheje yenei shiipwae nndi na lugwinjili lwa bhandunjilu?" **10** A Yeshu gubhashite, "Mwaatendanje bhandunji bhatamangane pai." Pashinkupagwa manyai gamagwinji penepo. Bhai, bhandu gubhatemingenenje. Bhanabhalume jika pubhalinginji elupu nng'ano. **11** A Yeshu gubhatolile mikate jila, gubhatendile eja kwa a Nnunu, gujigebhenywe ku bhandunji bhatemingenenje bhala, nneyo peyo gubhatendile kwa yamaki ila, kila mundu gwapatile mwapinjile. **12** Bhandu bhakajukutanjeje, a Yeshu gubhaalugulilenje bhaajiganywa bhabho, "Nkundikanyanje makombo galepeshe gala ganaobhe." **13** Bhai, gubhakundikenyenje ipande ya mikate ibhalepelenje bhandu bhalyangangaga bhala, gubhagumbejenje ikapu likumi limo na ibhili. **14** Bhandu bhakashibhonanjeje shene shilangulo shibhatendile a Yeshu, gubhashitenje, "Kweli bhenebha ankulondola bha a Nnunu

bhakwiya kushilambolyo.” **15** A Yeshu gubhamumanyi kuti bhandunji bhanapinganga kwaakamula nkupinga bhaatendanje a mpalume bhabhonji, gubhajabhwile kabhili, gubhapite jikape kushitumbi. **16** Likaisheje ligulo bhaajiganywa bhabho gubhaeelenje mpaka kulitanda, **17** gubhakwelilenje mmashua, nigubhatandubhenje kujomboka kwenda ku Kapalanaumu. Gene malangago kuli lubhindu, na a Yeshu bhaliji bhakanabhe ika kulitanda. **18** Kwa ligongo lya mbungo japugaga, mabhimbili gugatandwibhe nnitanda. **19** Bhaajiganywa bhala bhalij bhabpitengenenje kwaataliya mbuti maili gatatu eu nsheshe, gubaabhwениnji a Yeshu bhalij bhabbandishile mashua bhaliowa pantundu mashi, gubhajogwepenje kwa kaje. **20** A Yeshu gubhaalugulilenje, “Nnjogopanje, ni nne!” **21** Bhai gubhakundilenje kwaajigala mmashua mula, kashokope gubhaikengenenje kung’ambu kubhajendanganaga kula. **22** Pa lyamba lyakwe lugwinjili lwa bhandu bhalepekenje kung’ambo jina ja litanda, gubhang’amwilenje kuti gupali ntumbwi gumope pepala na a Yeshu bhangajinila muntumbwi pamo na bhaajiganywa bhabho, ikabhe bhaajiganywa bhala pubhaptengenenje jikape. **23** Mitumbwi jina gujishe kukopoka ku Tibheliya kubhalilenje bhandu mikate jila, a Yeshu bhakatendeje ej a kwa Bhakuungwa a Nnunu. **24** Bhai, bhandunji bhala bhakang’amulanjeje kuti a Yeshu na bhaajiganywa bhabho bhakwapinji pepala, gubhakwelilenje muntumbwi gubhaptengenenje ku Kapalanaumu kukwaaloleya. **25** Bhandunji bhala bhakaaimananjeje a Yeshu kung’ambo jabhili ja litanda gubaabhuhiyenje, “Mmaajiganya, nng’ishe shakani kwekuno?” **26** A Yeshu gubhaajangwilenje, “Kweli ngunakummalanjilanga, nnanoleyanga nngabha kwa ligongo lya kugamanya malombolelo ga ilangulo, ikabhe pabha

mwashinkulyanganga mikate nijukuta. **27** Nnaabhushilanje shalya shiangabhanika, nng'abhuhsilanje shalya shikaangabhanika shilonjeya nipeleshela gumi gwa pitipiti. Nne Mwana juka Mundu jubhankong'ondele Atati, shampanganje shene shalyasho."

(aiōnios g166) **28** Bhalabhonji gubhaabhuhsienje, "Tutende bhuli nkupinga tukombole kutenda maengo ga a Nnungu?" **29** A Yesu gubhaajangwiljenje, "Liengo libhaapinga a Nnungu ntendanje ni cuti, munkulupalilanje jubhantumile jula." **30** Penepo gubhabhaalanjilenje, "Shintende shilangulo shashi tushibhone nkupinga tunkulupalile? Shintende shindu shashi? **31** Bhanangulungwa bhetu bhalilenje mana nng'anga mula, malinga shigaalugula Majandiko ga Ukonjelo, 'Bhashinkwaaliyanga shalya sha kopoka kunnungu.'" **32** A Yesu gubhaalugulilenje, "Kweli ngunakunnugulilanga, a Musha bhangampanganga shalya kopoka kunnungu, ikabheje Atati nibhakumpanganga shalya sha kweli kopoka kunnungu. **33** Pabha shalya sha a Nnungu ni jwene atuluka kopoka kwa a Nnungu nikwapanganga gumi bhandu pashilambolyo." **34** Bhai, gubhaalugulilenje, "Mmakulungwa, ntupe uwe shene shalyasho mobha gowe." **35** A Yesu gubhaalugulilenje, "Nne ni shalya shipeleshela gumi. Anyiila nne wala akakola shibhanga, na angulupalila nne, wala akakola njota. **36** Ikabheje malinga shinammalanjilenje cuti mmweninji ikabhe mwangangulupalilanga. **37** Bhowe bhungupegwa na Atati shibhang'ishilanje, jojowe shanyiile nne, wala ngamminjila palanga. **38** Pabha njituluka kopoka kunnungu, nngabha kuutenda ingupinga nne, ikabhe kuutenda ibhapinga bhandumile bhala. **39** Na bhandumile bhala shibhapinga ni cuti, ngunannng'obhiye nkali jumo jwabhonji bhubhambele bhala, ikabhe naayuyanje bhowe lyubha lya mpelo. **40** Pabha shibhapinga Atati ni cuti,

mundu jojowe akunnola Mwana nikunkulupalila, akole gumi gwa pitipiti, numbe nne shininnuyue lyubha lya mpelo." (aiōnios g166) 41 Bhai, Bhayaudi gubhatandwibhenje kwainginishila, pabha bhashinkubheleketa kuti, "Nne shalya shitulwishe kopoka kunnungu." 42 Gubhashitenje, "Bhuli, aju nngabha Yesu mwana gwabho a Yoshepu? Twaamanyi ainagwe na akwabhe! Bhai abheleketa bhuli kuti ashituluka kopoka kunnungu?" 43 A Yesu gubhaalugulilenje, "Nnekanje kutaukangana mwaashayenenji.

44 Jwakwa mundu shang'ishile nne, akashemwe na Atati bhandumile, nne shininyuye jwene mundujo lyubha lya mpelo.

45 Ashinkulondola bha a Nnungu bhajandikenje Mmajandiko ga Ukonjelo kuti, 'Bhandu bhowe shibhajiganywanje na a Nnungu.' Mundu jojowe akwaapilkana Atati nikwijijiganya ga bhenebho, ananyiila nne. 46 Penepo nngabha kuti apali mundu abhabhweni Atati, ikabhe jwene akoposhele kwa a Nnungu, jwenejo ni abhabhweni Atati. 47 Kweli, ngunakunnugulilanga, akulupalila anapata gumi gwa pitipiti. (aiōnios g166) 48 Nne ni shalya shipeleshela gumi. 49 Bhanangulungwa bhenunji bhaliljenje mana nng'anga, ikabheje bhawilenje. 50 Ikabheje sheshino ni shalya shituluka kopoka kunnungu, nkupinga jojowe shaalye anawe."

51 "Nne ni shalya sha gumi shitulwishe kopoka kunnungu. Mundu jojowe alyaga shene shalyashi shalame pitipiti. Na shalya shishinimpanganje ni shiilu shangu shingushishoya ligongo lya gumi gwa bhandu pashilambolyo." (aiōn g165) 52 Penepo Bhayaudi gubhatandwibhenje kupwatanga ashaayenenji bhalinkutinji, "Bhaakombola bhuli bhenebha kutupa shiilu shabho tulye?"

53 A Yesu gubhaalugulilenje, "Kweli ngunakummalanjilanga, nkalyanganje shiilu shangu nne Mwana juka Mundu, na papila minyai jangu, nkakolanga gumi nkati jenunji. 54 Alya shiilu

shangu na papila minyai jangu, akwete gumi gwa pitipiti, na
nne shininnyuye lyubha lya mpelo. (aiōnios g166) 55 Pabha shiilu
shangu ni shalya sha kweli, na minyai jangu, ni sha papila sha
kweli. 56 Alya shiilu shangu na papila minyai jangu, analundana
na nne, numbe nne ngunalundana naka jwenejo. 57 Atati
bhakwete gumi bhashinkunduma, numbe nne ngunalama kwa
ligongo lyabho, nneyo peyo apingalya shiilu shangu, shalame
kwa ligongo lyangu. 58 Bhai, ashino ni shalya shitulwishe kopoka
kunnungu, nngabha malinga mana jibhalilenje bhanangulungwa
bhenunji nng'anga, ikabheje nkali nneyo bhawilenje. Ikabhe
shaalye shene shalya shino, shakole gumi gwa pitipiti."

(aiōn g165) 59 A Yesu pubhabhelekete genego bhalijiganya
nshinagogi, ku Kapalanaumu. 60 Bhai, bhabhagwinji bha
bhaajiganywa bhabho bhakapilikananjeje genego gubhashitenje,
“Aga malobhe ga ukomu, gani shakombole kugapilikanishiya?”
61 A Yesu gubhamumanyi gwangali kubhalanjilwa naka mundu
kuti bhaajiganywa bhabho bhanainginikanga ligongo lya gene
malobhego, gubaabhuhiyenje, “Bhuli lyeneli linakumpanganga
lipamba? 62 Bhai shiibhe bhuli, pushimummonanje Mwana
juka Mundu aliikwela kubhuja kwakoposhele? 63 Mbamu
jwa a Nnunu ni apeleshela gumi, shiilu jikape nngakombola
shindu. Malobhe gunimmalanjilenje ni Mbamu na gumi. 64
Nkali nneyo, bhapalinji bhananji bhakaakulupalilanga.” A Yesu
bhashinkubheleketa nneyo pabha bhamumanyi kuumila bhukala
ashigani bhakaakulupalilanga na jwene apinga kwaatendebuka.
65 Kungai gubhashite, “Kwa lyene ligongoli, nammalanjilenje
kuti, jwakwapi akombola kung'ishila akajaliwe na Atati.” 66
Ligongo lya genego, bhaakulupalila bhabho bhabhagwinji
gubaaleshilenje, ninngaakagulanga kabili. 67 Bhai, a Yesu

gubhaabhuhiyenje likumi limo na bhabhili bhala, “Bhuli,
na mmanganyanji nkupinga jabhulangana?” **68** A Shimoni

Petili gubhaajangwile, “Mmakulungwa, tujende kukeni? Mmwe
ni nkwete malobhe ga gumi gwa pitipiti. (aiōnios g166) **69**

Uwe tukulupalile na tumumanyi kuti mmwe ni Mundu jwa
ukonjelo jwa a Nnunu.” **70** A Yeshu gubhaalugulilenje, “Bhuli,
nanganng’agulanga mmanganya likumi limo na bhabhili? Nkali
nneyo, jumo munkumbi gwenunji ni Lishetani!” **71** A Yeshu
bhashinkubheleketa genego kwa ligongo lya a Yuda, bhana
bhabho a Shimoni Ishikaliote, pabha bhenebho bhapinga
kwaatendebhuka, nkali na bhalabho bhaliji munkumbi gwa likumi
limo na bhabhili bhala.

7 Gakapiteje genego, a Yeshu bhatendaga owa mmbali
ya ku Galilaya. Bhangapinga kuowela nkowa gwa ku
Yudea kwa ligongo lya ashikalongolele bha Bhayaudi
bhapingangaga kwaabhlulaganga. **2** Shikuku sha Bhayaudi,
shishemwa shikuku sha ibanda shishinkubhandishila. **3**
Bhai ashaapwabho gubhaalugulilenje, “Nnjabhule apano
nnjende ku Yudea bhaajiganywa bhenu bhagabhonanje
maengo gunkutenda. **4** Mundu apinga manyika na bhandunji,
akaatenda indu kwa nngiyo. Ibhaga nkutenda genega,
bhai, mwiiLanguye ku shilambolyo.” **5** Nkali ashaapwabho
bhangaakulupalilanga. **6** Bhai, a Yeshu gubhaalugulilenje,
“Malanga gangu gapwaa gakanabhe ika. Ikabheje kwenu
mmanganya malanga gowe ganakumpwaanga. **7** Bhandunji
pa shilambolyo bhakakunshimanga mmanganya, ikabheje
bhanashimwanga na nne pabha ngunakong’ondela kuti itendi
yabhonji yangali ya mmbone. **8** Mmanganya nnjendangananje
kushikukuuko. Nne ngajenda, pabha malanga gangu gapwaa

gakanabheika.” **9** Bhakabheleketeje genego gubhaigele ku Galilaya. **10** Ashaapwabho bhakajendanganaje kushikukuu, nabhalabho a Yeshu gubhapite, ikabheje bhangajenda kwa bhonekana kulugwinjili ikabhe kwa nng’yo. **11** Ashikalongolele bha Bhayaudi bhatendaga kwaaloleyanga kushikukuuko, gubhashitenje, “Kubhali kwei?” **12** Gashinkupagwa manong’ono gamagwinji nnugwinjili lwa bhandu ga bhenebho. Bhananji gubhashitenje, “Pubhalipa bhanguja.” Bhananji gubhashitenje, “Nng’oo! Bhanapuganya bhandu.” **13** Nkali nneyo, jwakwa mundu alinjile kubheleketa ngani jabho palugwinjili nkwaajogopanga ashikalongolele bha Bhayaudi. **14** Ikaishileje pakati shikukuu, a Yeshu nabhalabho gubhapite ku likanisha gubhatandwibhe kujiganya. **15** Bhai, Bhayaudi gubhakanganigwenje nibheleketa, “Abha bhandubha bhatapatile bhuli alu lundalu nabhalabho bhangashoma shule?” **16** Bhai a Yeshu gubhaajangwilenje, “Majiganyo gungujiganya nngabha gangu, ikabhe gabho bhandumile bhala. **17** Mundu apinga kutenda gubhapinga a Nnungu, shamumanye monaga majiganyo gangu gano gakopoka kwa a Nnungu, eu ngunakwiibheleketa namwenepe. **18** Jwene akwiibheleketa nnyene, analoleya ukonjelo gwakwe nnyene, ikabheje aloleya ukonjelo gwabho bhantumile bhala, jwenejo jwa kulupalilwa na muntima gwakwe yakwapi yangali ya mmbone. **19** Bhuli, a Musha bhangampanganga shalia? Nkali nneyo, jwakwa nkali jumo munkumbi gwenunji akamula shalia. Kwa ndi mpinga mulaganga?” **20** Bhandunji bhala gubhaajangwilenje, “Mmwe nshikola maoka! Gani apinga kummulaga?” **21** A Yeshu gubhaajangwilenje, “Shipali shindu shimo shindendile, shinkanganigwenje. **22** A Musha bhampelenje nkubho gwa jaluka. Nngabha cuti gwene nkubhogo kugwakopweshe kwa

a Musha, ikabhe kwa ashambuje. Na nnaino mmanganyanji nkali Lyubha lya Pumulila, nnakuntaganga mundu unyago.

23 Bhai ibhaga, nkali Lyubha lya Pumulila mundu anajaluka nkupinga shalia ja a Musha jinaleshwe, pakuti nnandumbalilanga kwa ligongo lya kunnamya mundu Lyubha lya Pumulila?

24 Nnaukumulanje indu kwa lola sha palangape, nshoyanje ukumu ja aki.” **25** Bhandu bhananji bha ku Yelushalemu gubhashitenje, “Bhuli, bhenebha nngabha bhubhaakwaloleyanga bhaabhlaganje bhala? **26** Nnolanje nnaino! Bhanabheleketa palugwinjili, na wala bhakakwaabhalanjilanga shindu. Bhuli ipingaga ashikalongolele bhang'amwilenje kuti kweli bhenebha a Kilishitu? **27** Ikabheje tukumanyi abha bhandubha kubhakoposhele, a Kilishitu pushibhaishe jwakwa mundu shakumanye kubhakoposhele!” **28** Bhai, a Yesu pubhaliji nkujiganya Nniekalu gubhautiye lilobhe, “Elo mmanyinji nne, na kungoposhele nkumanyinji! Nkali nneyo, nangaika kwa mashili gangu namwene, ikabhe bhandumile bhala bha kweli, mmanganyanji nkakwaamanyanga. **29** Ikabheje nne naamanyi pabha kungoposhele kunngwabho, bhenebho ni bhandumile.” **30** Bhai, bhandunji gubhapinjilenje kwaakamula, ikabheje jwakwapi mundu alinjile kwaakamula, pabha malanga gabho ga kamulwa galiji gakanabheika. **31** Bhandunji bhabhagwinji nnugwinjili mula gubaakulupalilenje, nigubhashitenje, “Igala, pushibhaishe a Kilishitu shibhatende ilangulo yaikulungwa kupunda ibhatendile bhenebhai?” **32** Ashimapalishayo gubaapilikenenje bhandunji bhalinong'onanga nkwainginika a Yesu. Bhai, Ashimapalishayo na bhakulungwanji bhaabhisila gubaatumilenje bhalinda bhaakakamulanje. **33** A Yesu gubhashite, “Puni pamo na mmanganyanji mobha gashoko, kungai shinyende kubhandumile

bhala. **34** Nkupinganoleyanga, ikabheje nkamonanga, pabha pene pushimbagwe nne pala, nkakombolanga kuika.” **35** Ashikalongolele bha Bhayaudi gubhabhuyenenje ashaayenenji, “Abha bhandubha kubhapinga kwenda kwei kwaatenda uwe tunaapate? Eti bhapinga kwaajendelanga Bhayaudi bhapwilinganishilenje ku Bhagiliki bhakaajiganyanje Bhagiliki?

36 Malombolelo gakwe nndi malobhe gubhabheleketa. ‘Nkupinga noleyanga ikabheje nkamonanga, na pushimbagwe nne mmanganyanji nkakombolanga kuika?’” **37** Lyubha lya mpelo gwa shikukuusho pulyaaliji lyubha likulu. A Yesu gubhajimi, gubhashite kwa lilobhe lya utiya, “Akwete nnjota ajiye kwangune apapile. **38** Malinga shigataya Majandiko ga Ukonjelo. ‘Angulupalila nne, nushi ya mashi ga gumi shibhutushe kopoka muntima gwakwe!’” **39** Bhashinkubheleketa genego kwa ligongo lya Mbamu jwa Ukonjelo jushibhamposhelanje bhaakulupalilenjebho. Gene malangago Mbamu jwa Ukonjelo paaliji akanabhe ika, pabha a Yesu bhaliji bhakanabhe kuywa.

40 Bhandu bhananjii nnugwinjili mula gubhapilikenje gene malobhego, gubhashitenje, “Kweli bhene bhandubha ankulondola bha a Nnungu bhakwiya bhala!” **41** Bhananjii gubhashitenje, “Abha a Kilishitu!” Ikabheje bhananjii gubhashitenje, “Bhuli, inakomboleka a Kilishitu kukopoka ku Galilaya? **42** Gakuti bhuli Majandiko ga Ukonjelo? Gakuti. ‘A Kilishitu shibhakoposhele nshipinga sha a Daudi, shibhabhelekwe ku Bheteleemu, shilambo sha a Daudi!’” **43** Bhai, gugakoposhele malekano munkumbi gwa bhandunji mula kwa ligongo lya a Yesu. **44** Bhandu bhananjii gubhapinjilenje kwaakamula ikabheje jwakwa alinjile kwaamula.

45 Kungai bhalinda bhala gubhabhujilenje kubhakulungwanji bha bhakulungwanji bhaabhibhila na Mapalishayo, nabhalabhonji

gubhaabhushiyenje, "Kwa nndi mwangajia nabhonji?" 46
Bhalinda gubhaajangwilenje, "Wala jwakwa mundu akombwele
bheleketa malinga shibhaabheleketa bhene bhandu bhala!" 47
Ashimapalishayo gubhaabhushiyenje, "Bhuli, nkali mmanganyanji
ntembilwenje? 48 Bhuli, mumweninji nkali jumo jwa
ashikalongolele bha bhandu, eu jumo jwa Mapalishayo
abhalupalile? 49 Ikabheje alu lugwinjililu bhakakujigamanya
shalia ja a Musha, bhashiloswanga na a Nnungu!" 50 Bhamo
bha munkumbi gwa Mapalishayo, a Nikodemo, bhaajendele a
Yesu mobha gapitile, gubhaalugulilenje, 51 "Bhuli, shalia jetu
jinakunng'ukumula mundu gwangatandubha kumpilikanishiya
nikugamanya gatendile?" 52 Bhalabhonji gubhaajangwilenje,
"Bhuli na mmwe kunkopweshe ku Galilaya? Ayaga, nkalole
Mmajandiko ga Ukonjelo, na mmwe shimumanye kuti ku Galilaya
kukakopoka Nkulondola jwa a Nnungu!" 53 Bhai kila mundu
gwapite kunngwakwe.

8 Ikabheje a Yesu gubhapite kushitumbi sha Misheituni. 2
Malabhi gakwe lyambape gubhapite kabhili ku likanisha. Bhandu
bhowe gubhaajendelenje, nigubhatemi kwaajiganya. 3 Bhai,
bhaajiganya bha shalia na Mapalishayo gubhaapeleshelenje
bhakongwe bhamo bhamanilwe nkulabhalabha. Gubaajimikenje
mmujo jabho. 4 Gubaabhushiyenje a Yesu, "Mmajiganya!
Bhene bhakongwebha bhashiimanilwa nkulabhalabha. 5 Kupitila
shalia, a Musha bhatulajile kuti, bhakongwe malinga bhenebha
bhakomwe maganga mpaka bhawé. Bhai, mmwe nkuti bhuli?" 6
Bhashinkubheleketanga nneyo nkwaatejela, nkupinga bhatapanje
shiumilo sha kwaalugula. Ikabheje a Yesu gubhakotime
pai, nijandika na shikowe nnitaka. 7 Bhakapundanjeje
kwaabhuya, a Yesu gubhajinwishe, gubhaalugulilenje, "Mundu

jwangali shambi munkumbi gwenunji, abhe jwantai kuleshela liganga.” **8** Kungai gubhakotime kabhili, bhalijandika nnitaka. **9** Bhakapilikananjeje nneyo, gubhatandwibhenje kujabhula jumojumo, kutandubhila bhanangulungwa. A Yesu gubhaigele jikape, na bhakongwe bhala bhajimi pala pepala. **10** A Yesu bhakajinusheje gubhaabhushiye bhakongwe bhala, “Kubhalinginji kwei bhakunshitakiyanga bhala? Bhuli, jwakwa nkali jumo akunng'ukumula?” **11** Bhakongwe bhala gubhajangwile, “Mmakulungwa, jwakwa nkali jumo!” A Yesu nabhalabho gubhaalugulile, “Nkali nne nganng'ukumula. Mwijendele, tandubhila nnaino nnatende yambi kabhili.” **12** A Yesu gubhakungulwishe na bhandunji bhala kabhili, bhalinkuti, “Nne shilangaya sha shilambolyo. Angagula nne, wala akaowa nnubhindu, ikabheje shakole shilangaya sha gumi.” **13** Bhai Ashimapalishayo gubhalugwilenje, “Mmwe nnakwikong'ondela mmayene, kwa nneyo ukong'ondelo gwenu nngabha gwa kweli.” **14** A Yesu gubhaajangwilenje, “Nkali monaga ngunakwikong'ondela namwene, ukong'ondelo gwangu gwa kweli, pabha nne nikumanyi kungoposhele na kungwenda. Ikabheje mmanganyanji nkakukumanyanga kungoposhele wala kungwenda. **15** Mmanganyanji nnaukumulanga kwa ng'aniyo ya shigundu. Ikabheje nne ngakunng'ukumula mundu. **16** Nkali ng'ukumulaga, ukumu jangu ja kweli, pabha nne puni nngabha jikape, Atati bhandumile pubhali na nne. **17** Shalia jenunji jangajandika Mmajandiko ga Ukonjelo kuti, ukong'ondelo gwa bhandu bhabhili ni gwa kweli. **18** Nne ngunakwikong'ondela namwene, na bhalabho Atati bhandumile bhanangong'ondela nneyo peyo.” **19** Penepo gubhaabhushiyenje, “Ainabhenu kubhali kwei?” A Yesu gubhajangwile, “Mmanganyanji nkaamanyanga

nne, wala Atati nkakwaamanyanga. Kaliji nkamanyinji nne, nkali Atati nkaamanyinji.” **20** A Yeshu pubhabhelekete genego bhalijiganya ku likanisha, tome na pushaaliji shibhiko. Jwakwa mundu abhakamwile, pabha malanga gabho galiji gakanabhe ika. Kungwenda Mmanganya Nkakombolanga Kuika. **21** A Yeshu gubhaalugulilenje kabhili, “Nne ngunakwijjabhulila na mmanganya shinnoleyanje, ikabheje shinng'wanganje na yambi yenunji. Kungwenda nne, mmanganyanji nkakombolanga kuika.” **22** Bhai Bhayaudi gubhabheleketenje, “Bhuli bhapinga kwiiibhulaga? Pabha bhakuti, ‘Kungwenda mmanganyanji nkakombolanga kuika?’” **23** A Yeshu gubhaalugulilenje, “Mmanganyanji mmapai pano, nne kungoposhele kunani, mmanganyanji mmapashilambolyo pano, nne nngabha jwa pashilambolyo pano. **24** Lyeneli ni ligongo lya kummalanjilanga kuti shinng'wanganje na yambi yenunji monaga nkakulupalilanje kuti ‘Nne ni Nne,’ kweli shinng'wanganje na yambi yenunji.” **25** Na bhalabhonji gubhaabhushiyenje, “Mmwe agani?” A Yeshu gubhaajangwilenje, “Ninnugulilenje kuumila kundandubho! **26** Ngwete gamagwinji ga bheleketa na kung'ukumulanga, ikabheje bhandumile bhala bha kweli, nne ngunakwaabhalanjilanga bhandunji bha pa shilambolyo indu imbilikene kopoka kwa bhenebho.” **27** Wala bhangang'amulanga kuti a Yeshu bhabheleketaga ga Atati bha kunnungu. **28** Bhai, a Yeshu gubhaalugulilenje, “Pushimunnjinulanje Mwana juka Mundu kunani, penepo shimmumanyanje kuti ‘Nne ni Nne,’ Na shoshowe shingutenda nngabha shangu namwene, ikabhe gungubheleketa gubhanyigenye Atatipe. **29** Bhandumile bhala pubhali pamo na nne, bhanganeka jikape, pabha mobha gowe ingutenda ikwaanonyela ila.” **30** Pubhabheleketaga

genego, bhandu bhabhagwinji gubhaakulupaliljenje. **31** Bhai a Yesu gubhaabhalanjilenje Bhayaudi bhaakulupalilangaga bhala, "Monaga nkamulangaga majiganyo gangu shimmanganje bhaajiganywa bhangu bha kweli. **32** Numbe shinnjimanyanje kweli, na kwelijo shijimmikanje muungwana." **33** Na bhalabhonji gubhaajangwilenje, "Uwe lubheleko lwa a Bhulaimu, wala tukanabhebha bhatumwa bhaka mundu jojowe jula. Nkulombola nndi punkulugula, 'Shimmanganje mmangwana?'" **34** A Yesu gubhaajangwilenje, "Kweli ngunakummalianjilanga, mundu jojowe atenda yambi, ntumwa jwa yambi. **35** Mobha gowe ntumwa akaabhalanganishiywa nnikaja, ikabheje mwana anatama nnikaja mobha gowe. (aiōn g165) **36** Ibhaga mwana shamppanganje ungwana, shimmanganje bhangwana bha kweli. **37** Niumanyi kuti mmanganyanji lubheleko lwa a Bhulaimu. Nkali nneyo, nnatumbililanga kumulaga kwa ligongo lyangagapinga majiganyo gangu. **38** Nne ingubheleketa iniihbweni kwa Atati ila, ikabheje mmanganyanji inkutendanga immalianjilwenje na anakulubhenunji." **39** Gubhajangwilenje, "Uwe lubheleko lwa a Bhulaimu!" A Yesu gubhaabhalanjilenje, "Kaliji mmanganyanji nkalinginji lubheleko lwa a Bhulaimu, nkatendilenje ibhatendaga a Bhulaimu. **40** Nne nimmalianjilenje ga kweli jimbipilikene kwa a Nnungu, nkali nneyo, mmanganya nnatumbililanga kumulaga. A Bhulaimu bhangatenda nneyo! **41** Mmanganya nnatendanga ibhaatenda ainabhenunji." Penepo gubhaalugulilenje, "Uwe nngabha lubheleko lwa mmaukutu! Tukwete Atati bhamope, yani a Nnungu." **42** A Yesu gubhaabhalanjilenje, "Kaliji a Nnungu bhakaliji Ainabhenunji nkambinjilenje nne, pabha kungoposhele kwa a Nnungu, na nnaino ng'ishe apano. Nangaika kwa mashili gangu namwene, ikabhe ga bhandumile

bhala. **43** Kwa nndi nkaelewanga ingubheleketa ino? Pabha nkapinganga kupilikanishiya malobhe gangu. **44** Mmanganyanji bha lubheleko luka Lishetani na inkupinganga kutenda ya shilokoli shika nng'inagwenunji. Jwenejo paaliji nkubhulaga kuumila kundandubho, wala akapingaga ya kweli, pabha jwangali kweli muntima gwakwe. Yaabheleketa ya unami, gabheleketa gali muntima gwakwe, pabha jwenejo nnami na nng'inamundu jwa unami. **45** Nne kwa ligongo lya bheleketa ga kweli, mmanganyanji nkaangulupalilanga. **46** Gani munkumbi gwenunji akong'ondela cuti nne njikola yambi? Bhai ibhaga ingubheleketa ya kweli, kwa nndi nkangulupalilanga? **47** Jwene ali jwa a Nnungu alipilikana malobhe ga a Nnungu. Ikabheje mmanganyanji nkapilikananga pabha nngabha mmandunji bha a Nnungu.” **48** Bhayaudi gubhaajangwilenje, “Bhuli, twangabheleketa kweli cuti mmwe M mashamalia, numbe nshikola maoka?” **49** A Yesu gubhajangwile, “Nne nangali maoka, ikabheje ngunakwaishimiya Atati na mmanganyanji nkang'ishimiya. **50** Nne ngaaloleya ukonjelo gwangu namwene, ikabheje bhapali bhamo bhakuuloleya, numbe bhaukumula. **51** Kweli ngunakummalanjilanga, akunda malobhe gangu akawa.” (*aiōn g165*) **52** Bhai, Bhayaudi gubhaajangwilenje, “Nnaino tung'amwile cuti mwe nkewete maoka! A Bhulaimu bhawile, nkali ashinkulondola bha a Nnungu bhawilenje, mmwe nkuti, ‘Akagulila malobhe gangu akawa!’ (*aiōn g165*)

53 Bhuli mmwe nkwiitenda mmakulungwa kupunda ambuje a Bhulaimu bhawile? Nkali ashinkulondola bha a Nnungu bhawilenje. Mmwe nkwiitenda agani?” **54** A Yesu gubhajangwile, “Niikuyaga namwene, ukonjelo gwangu nngabha shindu. Atati bhunkwaalugulanga mmanganyanji cuti ainabhenunji ni

bhaanguya. **55** Mmanganyanji nkakwaamanyanga, ikabheje nne naamanyi. Meleketaga kuti ngakwaamanya, shinambile malinga mmanganyanji. Nne naamanyi numbe ngunakamula lilobhe lyabho. **56** Ainabhenunji a Bhulaimu, bhashinkuangalila bhalibhone lyubha lyangu, numbe bhalibhweni, gubhainonyele.” **57** Bhai, Bhayaudi gubhaalugulilene, “Mmwe nkanabhe ishila yaka makumi nng’ano, mmwe mwaabhwani a Bhulaimu?” **58** A Yeshu gubhaalugulilene, “Kweli ngunakkummalanjilanga, nne naapali, a Bhulaimu bhakanabhe pagwa.” **59** Penepo gubhalokwetenje maganga nkupinga kwaakoma, ikabheje a Yeshu gubhaijubhile, gubhashoshile ku likanisha.

9 A Yeshu bhali nkupita gubhammweni mundu jumo, nangalole jwa shibhelekwa. **2** Bhai, bhaajiganywa bhabho gubhaabhushiyenje, “Mmaajiganya! Gani atendile yambi, jwene munduju eu bhankwetenje mpaka abhelekwe nangalole?” **3** A Yeshu gubhajangwile, “Lyeneli lyangakoposhela kwa ligongo lya yambi yakwe, wala yambi ya bhankwetenje, ikabhe ashibhelekwa na unangalole nkupinga mashili ga a Nnungu gabhoneshe. **4** Pabha kukanabhe pilila, tunapinjikwa kutenda maengo ga bhandumile bhala, kupililaga mundu akakombola kutenda liengo. **5** Mobha guni pashilambolyo, nne shilangaya sha shilambolyo.” **6** Bhakabheleketeje genego, gubaunile mata pai, gubhaeleye litope na mata gala, gubhampashile mmeyo nangalole jula, **7** gubhannugulile, “Jenda ukanabhe kulitanda lya Shiloamu.” Malombolelo ga Shiloamu, “Atumilwe.” Bhai, nangalole jula gwapite kunabha, kungai gwabhujile alilola. **8** Bhai, ashaatami ajakwe na bhammanyangaga kuti paliji nangalole nkujuga, gubhashitenje, “Bhuli, jweneju nngabha nkulaga atamaga na juga jula?” **9** Bhananji gubhashitenje, “Ni

juju." Bhananji gubhashitenje, "Ng'oo! Ikabhe ashilandanape." Ikabheje aliji nangalole jula nigwashite, "Ni nne!" **10** Bhai, gubhammushiyenje, "Shanabhuli meyo gako pugashite lola?" **11** Jwalakwe gwabhajangwilenje, "Bhandu bhaashemwa a Yesu bhala bhashinkualaya litope, gubhambashile mmeyo ninugulila. 'Jenda ukanabhe kulitanda lya Shiloamu.' Bhai, gumbite nabha, niginolile." **12** Gubhammushiyenje, "Bhenebho kubhali kwei?" Jwalakwe gwabhajangwilenje, "Nne ngakukumanya!" **13** Kungai mundu aliji nangalole jula gubhampelekenje kwa Ashimapalishayo. **14** Lyene lyubha libhaeleye litope a Yesu nikunnamiya mundu nangalolejo, pulyaaliji Lyubha lya Pumulila. **15** Bhai, Ashimapalishayo gubhammushiyenje jwene mundujo, "Shanabhuli pukombwele kulola?" Jwalakwe gwabhalugulilenje, "Bhashinkumbaka litope mmeyo, gunabhile nnaino ngulilola." **16** Ashimapalishayo bhananji gubhashitenje, "Bhene bhandubho bhangakoposhela kwa a Nnugu, pabha bhakaakagula shalia ja Lyubha lya Pumulila." Ikabheje bhananji gubhashitenje, "Mundu akwete yambi akombola bhuli kutenda ilangulo ya nnei?" Gugakoposhele malekano munkumbi gwabhonji. **17** Gubhammushiyenje kabhili mundu aliji nangalole jula, "Pabha bhenebho bhashikulamya meyo, ukwaataya bhuli?" Jwalakwe gwabhalugulilenje, "Bhenebho ankulondola bha a Nnungu!" **18** Ashikalongolele bha Bhayaudi bhangakulupalilanga kuti jwene mundujo bhukala paliji nangalole na nnaino analola, mpaka pubhaashemilenje bhankwetenje. **19** Bhai, gubaabhushiyenje, "Bhuli, jweneju ni mwana jwenunji junkutinji pabhelekwe ali nangalole? Shanabhuli nnaino pakombwele kulola?" **20** Bhankwetenje gubhajangwilenje, "Uwe tummanyi aju mwana gwetu na pabhelekwe ali nangalole. **21** Ikabheje shanabhuli

palolile, tukakumumanya na nkali annamiye meyojo, uwe tukakumumanya. Mummuyanje nnyene, jwenejo jwankulungwa, shataye.” **22** Bhankwetenje bhashinkubheleketa nneyo kwa ligongo lya kwaajogopanga ashikalongolele bha Bhayaudi, pabha ashikalongolelebho bhashinkulagananga kuti mundu jojowe shakunde kuti a Yeshu ni a Kilishitu abhingwe nshinagogi.

23 Lyenelyo ni ligongo lya bhankwetenje kubheleta kuti, “Jwenejo jwankulungwa, mummuyanje nnyene.” **24** Bhai, gubhanshemilenje kabhili aliji nangalole jula, gubhannugulilenje, “Ubhelekete ya kweli gwaape ukonjelo a Nnungu! Uwe tumumanyi kuti abha bhandubha bhakwete yambi.” **25** Jwenejo gwajangwile, “Monaga bhakwete yambi, nne ngaamanya. Ikabheje nishimanyi shindu shimo kuti, naliji nangalole na nnaino ngunalola.” **26** Bhai, gubhammushiyenje, “Bhakutendele nndi? Bhakulamiye shanabhuli meyo gako?” **27** Jwene mundujo gwababajangwilenje, “Nimmalanjilenje, mmanganyanji mwangapilikanishiyanga, kwa nndi nnapinganga kupilikana kabhili? Bhuli na mmanganyanji nnapinganga kubha bhaajiganywa bhabho?” **28** Bhai gubhantukenenje, bhalinkutinji, “Ugwe ni nkujiganywa jwabho, uwe tubhaajiganywa bha a Musha. **29** Uwe tumumanyi kuti a Nnungu bhashinkubheleketa na a Musha, ikabheje bhene bhandubha tukakumanya kubhakoposhele!” **30** Jwalakwe gwababajangwilenje, “Sheneshi sha kanganigwa! Mmanganyanji nkakukumanya kubhakoposhele, ikabheje bhashinamiya meyo gangu! **31** Tumumanyi kuti a Nnungu bhakwapiikanishiyanga bhandunji bhakwetenje yambi, ikabhejojowe akwaakunda na tenda gubhapinga. **32** Kuumila bhukala pa shilambolyo ikanabhe pilikanika kuti mundu ashilamya meyo gaka nangalole jwa shibhelekwa. (aiōn g165) **33** Monaga bhene

bhandubha bhangakoposhela kwa a Nnungu, bhakanakombole kutenda shoshowe!" **34** Gubhajangwilenje, "Ugwe ushibibhelekwa na lelelwa muyambi jika, utujiganye uwe?" Bhai, gubhankanilenje kushinagogi. **35** A Yeshu gubhapilikene kuti bhashikunkananga nshinagogi. Bhai, bhakammoneje gubhammushiye, "Bhuli, ugwe ulikunkulupalila Mwana juka Mundu?" **36** Jwene mundujo gwajangwile, "Mmakulungwa, nnugulile jwenejo ni gani, ninkulupalile." **37** A Yeshu gubhammalanjile, "Mumweni, akunguluka na mmwejo." **38** Bhai, jwene mundujo gwashite, "Mmakulungwa ngulikulupalila!" Gwabhatindibhalile. **39** A Yeshu gubhashite, "Nne njika kushilambolyo kuukumula, nkupinga bhakaalolanga bhalolanje, na bhaalolanga bhabhanganje ashinangalole." **40** Ashimapalishayo bhananji bhalinginji pamo na bhenebho gubhapilikenenje gene malobhego, gubaabhuhiyenje, "Bhuli, nkali uwe ashinangalole?" **41** A Yeshu gubaajangwilenje, "Monaga nkalinginji ashinangalole, nkanakolanjeje yambi, ikabheje nnaino nkutinji. 'Uwe tulilola,' bhai launo nkietenje yambi.

10 "Kweli ngunakkummalanjilanga, jojowe akajinjila nshitundu sha ngondolo kupidila pannango, ikabhe nipeleta panape, jwenejo nngwii na nkupokonyola. **2** Ikabheje apitila pa nnango, jwenejo nshunga jwa ngondolo. **3** Nkulinda nnango gwa shitundu, anakunng'ugulila nshunga na ngondolo inapilikana lilobhe lyakwe, na anakwiishema ngondolo yakwe kwa mena gabhonji, nikwilongoya palanga. **4** Aikopoyaga palanga anakwilongolela mmujo, numbe ngondolo ilikunkagula, pabha bhanakulimanya lilobhe lyakwe. **5** Ngondolo nngankagula nnjeni, ikabhe shiimmatushe, pabha ikakulimanya lilobhe lyakwe." **6** A Yeshu bhashinkwabhalanjilanga Iwene lutangolu,

ikabheje bhangashimanyanga shibhalugulilwenje. **7** Bhai a Yeshu, gubhashite kabhili, "Kweli ngunakummalanjilanga, nne nnango gwa ngondolo. **8** Bhowenji bhalongolelenje nganabheika nne, bhagwii na bhaapokonyola na yalakwe ngondolo yangaapilikanilanga. **9** Nne nnango. Ajinjila kupitila nne shatapulwe na shajinjile nikopoka na shaapate shalya. **10** Nngwii anakwiya nkupinga, kujibha, kubhulaga na kuangabhanya. Nne njikwiya nkupinga nkolanje gumi, numbe gumi gwa punda. **11** "Nne nshunga jwa mmbone. Nshunga jwa mmbone akajogopa shoya gumi gwakwe kwa ligongo lya ngondolo yakwe. **12** Mundu jwa nshaala, wala nngabha nshunga, na wala ngondolo nngabha yakwe, ammonagape liogo alikwiya, anakwiileka ngondolo nibhutuka, penepo liogo anakwiikamula na ina inapwilinganya. **13** Anab hutuka pabha jwenejo mundu jwa nshaalape akajali ga ngondolo pabha nngabha yakwe. **14** Nne nshunga jwa mmbone. Bhalinginji bhangu naamanyinji, na bhalabhonji bhalinginji bhangu bhamanyinji, **15** malinga Atati shibhamanya nne, na nne shingwamanya Atati. Nne ngunakwishoya gumi gwangu kwa ligongo lyabhonji. **16** Ngwete ngondolo ina nngabha ya shishino shitundu shino. Ngunapinjikwa ng'ishenayo nkali yeneyo, na yalakwe shiipilikane lilobhe lyangu, kungai shiibhe likundi limo na nshunga jumo. **17** "Kwa nneyo Atati bhanambinga, pabha ngunakuushoya gumi gwangu nkupinga umujile kabhili. **18** Jwakwa mundu jwa mbokonyola gumi gwangu, ngunakuushoya kwa engwa namwene. Ngwete mashili ga kuushoya na mashili ga kuutola kabhili. Nneyo ni shibhang'amulishe Atati ndende." **19** Gugakoposhele kabhili malekano munkumbi gwa Bhayaudi kwa ligongo lya gene malobhego. **20** Bhabhagwinji gubhashitenje, "Bhashikola maoka, numbe bhalwele shalubha! Kwa nndi

kwaapilikanishiya?" 21 Bhananji gubhashitenje, "Aga nngabha malobhe gaka mundu akwete maoka. Bhuli, lioka linakombola kulamya meyo gaka nangalole?" 22 Bhai ku Yelushalemu shashinkupagwa shikukuu sha kumbushila kulimbula likanisha. Gene mobhago pugaliji ga shipwepwe. 23 Na bhalabho a Yesu bhatendaga owa ku likanisha nnukumbi lwa a Shelemani. 24 Bhai, Bhayaudi gubhaatimbiljenje, gubhaabhushiyenje, "Shinnjabhuye mitima mpaka shakani? Monaga mmwe a Kilishitu, bhai ntubhalanjile." 25 A Yesu gubhaajangwilenje, "Nimmalanjilenje, ikabheje nkaakulupalilanga. Maengo gungukamula kwa lina lya Atati ganangong'ondela. 26 Ikabheje mmanganyanji nkaakulupalilanga, pabha mmanganyanji nngabha ngondolo yangu. 27 Ngondolo yangu inapilikana lilobhe lyangu, nne ngulikwiimanya, na yalakwe inaangagula. 28 Numbe nne ngunakwaapanganga gumi gwa pitipiti, wala bhakaobhangna na wala jwakwa mundu shakombole kwapokonyolanga mmakono gangu. (aiōn g165, aiōnios g166) 29 Atati bhambele yene ngondoloyo ni bhakulungwa kupunda bhowe, wala jwakwa shakombole kwaashoyanga mmakono ga Atati. 30 Nne na Atati, tubhamope." 31 Bhai Bhayaudi gubhalokwetenje maganga nkupinga bhaakomanje. 32 A Yesu gubhaabhalugulilenje, "Ninnangwiyenje maengo ga mmbone gamagwinji kopoka kwa Atati. Gei gundendile gatenda nngomanje maganga?" 33 Bhayaudi gubhaajangwilenje, "Tukakunkoma maganga kwa ligongo lya maengo ga mmbone, ikabhe kwa ligongo lya kwatukana a Nnungu! Pabha mmwe nnakwiitenda a Nnungu mbena mmandupe." 34 A Yesu gubhaajangwilenje, "Bhuli shalia jenunji jangajandika Mmajandiko ga Ukonjelo kuti a Nnungu bhaashite, 'Nne njite, mmanganyanji ashi nnungu'? 35

A Nnungu bhashinkwaashemanga ashinnungu bhapegwilenje
lilobhe lya a Nnungu, na uwe tumumanyi kuti Majandiko
ga Ukonjelo ganabheleta kweli mobha gowe. **36** Jwene
aagwilwe na Atati nikuntuma kushilambolyo, nkummalanjilanga
kuti bhuli, 'Unatukana,' pabha njibheleketa, 'Nne Mwana
jwa a Nnungu?' **37** Monaga ngakamula maengo ga Atati,
nnangulupalilanje. **38** Ikabheje monaga ngunakamula genego,
nkali ibhaga nkangulupalilanga, nkulupalilanje kapela maengo
pego, mmumanyanje na kung'amula kuti Atati mubhali nkati
jangu, na nne nkati jabho." **39** Gubhalinjilenje kwaakamula
kabhili, ikabheje gubhakolobhweshe mmakono gabhonji. **40** A
Yesu gubhapite kung'ambo lushi lwa Yolodani, kubhabhatishaga
a Yowana bhukala, gubhatemi kweneko. **41** Bhandu bhabhagwinji
gubhaajendelenje gubhashitenje, "A Yowana bhangatenda
ilangulo yoyowe. Ikabheje gowe gubhatashiye a Yowana ga
bhene bhandubha, pugaliji ga kweli." **42** Penepo bhandu
bhabhagwinji gubaakulupaliljenje a Yesu.

11 Bhai bhandu bhamo bhashemwaga a Lashalo bhatendaga
lwala, kubhatamaga ku Bhetania, shilambo shibhatamanganaga
a Malia na a Malata, ashaalumbu bhabho. **2** A Malia ni
bhene bhaapashile mauta Bhakulungwa nikwaunguta na umbo
yabho, alumbu bhabho ni a Lashalo bhaaliji bhalwele. **3**
Bhai, ashalumbu bhabho gubhaapeleshelenje ntenga a Yesu
bhalinkutinji, "Mmakulungwa, ambwiga ajenu bhalwele!" **4** A
Yesu bhakapilikaneje nneyo, gubhashite, "Shene shilweleshi
nngabha sha bhulaga, ikabhe kwa ligongo lya kwaakuya
a Nnungu, nkupinga Mwana jwa a Nnungu akuywe kwa
shenesho." **5** A Yesu bhashinkwaapinganga a Malata na
akulu bhabho na alumbu bhabhonji a Lashalo. **6** Bhai a

Yeshu bhakapilikaneje ntenga gwa kuti a Lashalo bhalwele, gubhapundile tama pala mobha gana gabhili. **7** Kungai gubhaalugulilenje bhaajiganywa bhabho, “Twendangananje kabhili ku Yudeal!” **8** Bhaajiganywa gubhaalugulilenje, “Mmaajiganya! Mobha gashokope gapitile Bhayaudi bhpagingaga kunkomanga maganga, igala nkupinga kwenda koko kabhili?” **9** A Yeshu gubhajangwile, “Bhuli malanga ga mui nngabha pugali mashaa kumi na gabhili? Bhai, mundu aowaga mui akakubhala, pabha alikushibhona shilangaya sha shilambolyoshi. **10** Ikabheje mundu aowaga nnubhindu anakubhala pabha shakwa shilangaya.” **11** A Yeshu bhakamaliyeje bheleketa gene malobhego, gubhaalugulilenje, “Ambwiga ajetu a Lashalo bhashigona, ikabheje nne shingajumuye.” **12** Bhai, bhaajiganywa bhabho gubhaalugulilenje, “Mmakulungwa, ibhaga bhashigona, shibhalame.” **13** Bhanganyanjibho pubhaganishiyangaga kuti bhanataya ga gona lugono, mbena ibhatayaga kuwa kwa a Lashalo. **14** Bhai, a Yeshu gubaabhalanjilenje gwangali nng’yo, “A Lashalo bhashiwa, **15** ikabheje nne ngunakwiinonyela kwa ligongo lyenunji, pabha ngapaaliji kweneko nkupinga nkulupalilanje. Aya twendangananje kubhali.” **16** A Tomashi bhashemwaga Bhammba gubhaalugulilenje bhaajiganywa ajabbonji, “Na uwe twendangane, tukawe pamo na bhenebho!” **17** A Yeshu bhakaisheje kweneko gubhaaimene a Lashali bhalii nnikabhuli mobha nsheshe. **18** Shilambo sha Bhetania pushaliji tome na ku Yelushalemu, kutaliya kwa maili ibhili nnei. **19** Bhayaudi bhabhagwinji bhashinkuikangana kwa a Malata na a Malia kukwaangalayanga ga wilwa na alumbu bhabhonji. **20** Bhai, a Malata bhakapilikaneje kuti a Yeshu bhanakwiya, gubhapite kukwaaposhela, ikabheje a Malia gubhaigele pamui.

21 A Malata gubhaabhalanjile a Yesu, "Mmakulungwa, nkapali apano, apwetu ngubhakawileje! **22** Ikabheje nimumanyi shoshowe shishimwaajuje a Nnungu, shibhampe." **23** A Yesu gubhaalugulile, "Apwenu shibhayushe." **24** A Malata gubhaajangwile, "Nimumanyi shibhayushe lyubha lya mpelo."

25 A Yesu gubhaabhalanjile, "Nne ni nguyuya na peleshela gumi. Angulupalila nne nkali awe, shalame, **26** na jojowe ali jwankoto ningulupalila, wala akawa. Bhuli nnikulupalila gegano?"
(aiōn g165) **27** A Malita gubhaalugulile, "Elo Mmakulungwa! Nne ngulupalile kuti mmwe a Kilishitu, Bhana bhabho a Nnungu, bhene bhakwiya pa shilambolyo." **28** Bhakamaliyeje kubheleketa genego, a Malata gubhapite kukwaashema a Malia, apwabho, gubhaabhalanjile kuntemela, "Bhaajiganya bhaishe bhanakunshema." **29** Bhenebho bhakapilikaneje nneyo, shangu gubhajinwishe, gubhaajendele a Yesu. **30** A Yesu bhaaliji bhakanabhe jinjila nshijiji, ikabhe pubhaliji pubhaakongene a Malata kukwaaposhela pala. **31** Bhai, Bhayaudi bhalinginji pamui pamo na a Malia bhalikwaangalayanga bhakaabhonanjeje bhalijabhula shangu nikopoka palanga, gubhaakagwilenje. Pubhaganishiyenje bhanakwenda guta kulikabhuli. **32** Bhai, a Malia bhakaisheje pubhaaliji a Yesu nikwaabhma, gubhatemi ulungolungo, gubhaabhalanjile, "Mmakulungwa kaliji nkapali apano, nnumbwangu akanawe!"

33 A Yesu bhakaabhoneje bhaniguta, na nkali Bhayaudi bhalinginji pamo na bhenebho bhaligutanga, guyaaapoteshe muntima. **34** Kungai gubhaabhushiyenje, "Kumwaabhishilenje kwei?" Gubhabhaalanjenje, "Mmakulungwa, nnjiye kunnole."

35 A Yesu gubhagutile kwa minyoi. **36** Bhai, Bhayaudi gubhashitenje, "Nnolanje shibhaashite kwaapinga!" **37** Ikabheje

bhananji gubhashitenje, "Bhuli, bhenebha bhannamiye nangalole, bhangakombola kwaatenda a Lashalo bhanawe?" **38** Bhai, a Yeshu guyaapoteshe kabhili muntima, gubhaishe kulikabhuli. Likabhuli liyene pulyaaliji lishembo, na lyashinkuibhwa na liganga likulungwa. **39** A Yeshu gubhashite, "Nshoyanje ligangalyo!" A Malata, alumbubhabho bhawile bhala, gubhaalugulile, "Mmakulungwa, bhananunga, pabha bhatemi mobha nsheshe nnikabhuli!" **40** A Yeshu gubhaalugulile, "Bhuli, nangammalanjila kuti nkulupalilangaga shinngubhone ukonjelo gwa a Nnungu?" **41** Bhai, gubhashoshiyenje liganga lila. A Yeshu gubhalolile kunani kunnungu, gubhashite, "Ngunatenda eja Atati, pabha nnambilikanishiya. **42** Nimumanyi kuti nnambilikanishiya mobha gowe. Ikabheje njibheleketa genego kwa ligongo lya bhandunji bhalinginji apanobha, nkupinga bhakulupalilanje kuti mmwe ni nndumile." **43** Bhakamaliyeje bheleketa genego, gubhashemile kwa lilobhe lya utiya, "A Lashalo! Nkoposhe palanga!" **44** Bhawile bhala gubhakopweshe palanga, akuno bhali bhatabhilwe shanda mmakongono na mmakono na kumeyo kuunishilwe. A Yeshu gubhaalugulilenje, "Mwaagopolanje, mwaalekanje bhajjendele." **45** Bhai, Bhayaudi bhabhagwinji bhaikengenenje kwa a Malia bhakashibhonanjeje shitendi shibhatendile a Yeshu, gubaakulupaliljenje. **46** Ikabheje bhananji gubhapitengenene kwa Ashimapalishayo kukwabhalanjilanga ga shene shibhatendile a Yeshu shila. **47** Kwa nneyo bhakulungwanji bhaabhisila na Ashimapalishayo gubhatemingenenje lukumbi, gubhashitenje, "Tutende nndi? Pabha abha bhandubha bhanatenda ilangulo yaigwinji. **48** Twaalekaga nnei pei, bhandu bhowe shibhaakulupalilanje, na Bhaloma shibhajiye angabhanyanga liekalu lyetu na shilambo

shetu!" 49 Penepo bhandu bhamo munkumbi gwabhonji bhashemwaga a Kayapa, bhaliji bhakulungwa bhaabhishila shene shakasho, gubhaaluguliljenje, "Mmanganya nkakushimanyanga shindu shoshowe! 50 Bhuli, nkaganishiyanga kuti mbaya awe mundu jumo kwa ligongo ly a bhandunji, ngalingana angabhanywa shilambo showe?" 51 Bhenebho bhangabheleketa nneyo kwaapinda bhayene, ikabhe bhenebho pubhaalijji bhakulungwa bhaabhishila shene shakasho, kwa nneyo bhashinkulondola kuti a Yesu shibhawe kwa ligongo ly a shilambo shabthonji, 52 Wala nngabha kwa ligongo lyabthonjipe, ikabhe na kwaabhi kanga pamo bhana bha a Nnunu bhapwilingenjenje, nkupinga bhabhanganje pamo. 53 Bhai, kuumila lyene lyubhalo ashikalongolele bha Bhayaudi gubhaloleyenje shanabhuli pushibhaabhu laganje a Yesu. 54 Kwa nneyo a Yesu bhangaowa kabili kulugwinjili lwa Bhayaudi, ikabhe gubhashoshile penepo, gubhapite tome na kuanga, shilambo shishemwa Epulaimu. Kweneko gubhatemi pamo na bhaajiganywa bhabho. 55 Shikuku sha Bhayaudi shishemwa Pashaka shashinkubhandishila, bhandunji bhabhagwinji bhashinkwendangananga ku Yelushalemu kukwitakaya shikanabhe ika shikukujo. 56 Bhai, pubhalinginji nkwaaloleya a Yesu. Bhakaimananeje pamo nnikanisha, gubhabhuyenjenje, "Nkubhonanga bhuli? Igala bhakaika kushikuku kuno?" 57 Bhakulungwanji bhaabhishila na Ashimapalishayo bhashinku amulishanga kuti mundu akumanya kubhali a Yesu, abhabhalanjilanje nkupinga bhaakamulanje.

12 Mobha shita jikanabhe ika Pashaka, a Yesu gubhaishe ku Bhetania kubhatamaga a Lashalo bhayushiywe bhakawejje bhala.
2 Kweneko bhashinkushemelwa shalya, kwa nneyo a Malata

bhatendaga kolokoya shalya. A Lashalo pubhaliji munkumbi gwa bhatemingenenje nkulya pamo na a Yeshu. **3** Bhai, a Malia gubhatolile nushu lita ja mauta ga nunjila ga mmbiya yaigwinji, gubhaapekeye a Yeshu mmakongono nikwaunguta na umbo yabho. Nyumba jowe jikununjilaga mauta. **4** Bhai, a Yuda Ishikaliote, bha munkumbi gwa bhaajiganywa bhabho, numbe ni bhapinga kwaatendebhuka a Yeshu, gubhashite, **5** "Kwa ndi mautaga gangaushwa kwa mmbiya dinali mamiya gatatu, nipegwa bhaalaga?" **6** Bhashinkubheleketa nneyo, nngabha kuti bhatendaga kwaabthonelanga shiya bhaalaga, ikabhe pubhaliji bhaagoya mpatila gwa mmbiya, na pabha pubhaliji bhagwii, na bhatendaga jibha mmbiya mumpatila mula. **7** Ikabheje a Yeshu gubhashite, "Mwaalekanje bhakongwebha, bhambashe kwa ligongo lya lyubha lya mashiko gangu. **8** Bhaalaga bhapalinji na mmanganya mobha gowe, ikabheje nkabhanganga na nne mobha gowe." **9** Bhayaudi bhabhagwinji gubhapilikenenje kuti a Yeshu kubhali ku Bhetania. Bhai gubhaptengenenje kweneko, nngabha ga kwaabhona a Yesupe ikabhe bhaabhonanje a Lashalo bhayushiywe na a Yeshu. **10** Bhakulungwanji bhaabhisila gubhalegenenje kwaabhlulaga a Lashalo nneyo peyo, **11** pabha kwa ligongo lya a Lashalo, Bhayaudi bhabhagwinji bhashinkwaalekanga ashikalongolele bhabhonji, nikwaakulupalila a Yeshu. **12** Malabhi gakwe, likundi likulungwa lya bhandunji bhaikengenenje kushikukuu, gubhapilikenenje kuti a Yeshu mubhali mumpanda kwiya ku Yelushalemu. **13** Bhai, gubhatemilenje maagala ga mitende, gubhapite kwaaposhelanga bhalijobhelanga, bhalinkutinji, "Bhainiye a Nnungu! Na bhene bhakwiya kwa lina lya Bhakulungwa. Bhapegwé mboka bhakulungwa bha Ishilaeli."

14 A Yeshu gubhantolile mwana jwa mbunda jumo gubhatemi pantundu jakwe, malinga shigataya Majandiko ga Ukonjelo,

15 “Unajogope shilambo sha Shayuni! Nnole, a Mpalume bhenu bhanakwiya, Bhashikwela mwana jwa mbunda!” **16** Gene malangago bhaajiganywa bhabho bhakagamanyangaga gatendekagago, ikabheje a Yeshu bhakaweje na yuka, penepo gubhakumbushilenje kuti bhashinkujandishilwa genego, na bhandunji gubhaatendelenje nneyo peyo. **17** Likundi lya bhandunji bhapalinji pamo na a Yeshu lyubha libhaayushiye a Lashalo, gubhapundilenje kwaakong'ondela. **18** Kwa nneyo lugwinjili lwa bhandunji lula gubhaaposhelenje, pabha bhowe bhapilikenenje kuti a Yeshu bhashitenda shene shilangulosho. **19** Bhai, Ashimapalishayo gubhabhalanjilenenje, “Nnilolanga? Tukakombola tenda shoshowe! Nnolanje bhandu bhowe bhanakwaakagulanga.” **20** Munkumbi gwa bhandunji bhaikengenenje ku Yelushalemu kukwaatindibhalila a Nnunu kushikukuusho, bhashinkupagwanga na Bhagiliki. **21** Bhanganyabho gubhaajendelenje a Pilipi, bha ku Bhetishaida ja ku Galilaya, gubhashitenje, “Mmakulungwa, tunapinga kwaabhma a Yeshu.” **22** Bhai, a Pilipi gubhapite kwabhalanjila a Ndeleya, kungai bhowe bhaanabhili gubhapite kwaabhalanjilanga a Yeshu. **23** A Yeshu gubhaajangwilenje, “Malanga ga kuywa Mwana juka Mundu gaishe! **24** Kweli ngunakummalianjilanga, mmbeju ja ngano jikakulilwe nnitaka niwa shijilepeshe nneyo peyo. Ikabheje jibholaga, bhai shijimele niogola iyepo yaigwinji.

25 Mundu aabhushila gumi gwakwe shaguobhye, ikabheje mundu akaabhushila gumi gwakwe pa shilambolyo pano, anakuugoya mpaka pata gumi gwa pitipiti. (*aiōnios g166*) **26** Mundu angamulila maengo, anapinjikwa angagule, popowe

pushimme nne pala, ni pushaabhe ntumishi jwangu. Mundu jojowe angamulila maengo, Atati shibhanng'ishimiye. 27 "Nnaino ntima gwangu gunamboteka, kanga melekete nndi? 'Atati nndapule na gene malangaga?' Ikabheje genega ni gung'ishile nkupinga mbitile gene malanga gano. 28 Atati, nnikuye lina lyenu." Penepo lilobhe kukoposhela kunnungu gulipilikanishe lilinkuti, "Nilikushiye na kabhili shinilikuye." 29 Lugwinjili lwa bhandunji bhajimingenenje penepo gubhapilikenenje lilobhelyo, gubhashitenje kuti jisibhalula nnjai, ikabhe bhananji gubhashitenje kuti, "Bhashikunguluka naka Malaika jwa a Nnungu!" 30 Ikabheje a Yesu gubhaalugulilenje, "Lyene lilobhelyo lyangakoposhela kwa ligongo lyangu nne, ikabhe kwa ligongo lyenu mmanganyanji. 31 Nnaino gaishe malanga ga ukumulwa shilambolyo, na nkulungwa jwa pashilambolyo pano apinga nokolelwa palanga. 32 Na nne pushinyinulwe kunani shilambo shinautilanje bhandu bhowe kwangu nne." 33 Kwa gene malobhego bhashinkulanguya shiwo shabho pushipingabha. 34 Bhai, lugwinjili lwa bhandunji bhala gubhaajangwilenje, "Uwe shalia jetu jinakutubhalanjila kuti a Kilishitu shibhatame pitipiti. Bhai nkubheleketa bhuli, kuti Mwana juka Mundu anapinjikwa kujinulwa? Mwana juka Mundujo ni gani?" (aiōn g165) 35 A Yesu gubhaalugulilenje, "Shilangaya shatangu na mmanganyanji kwa mobha gashoko. Nndekoninji pabha nkwenetenje shilangayasho nkupinga lubhindu lunanng'imananje, pabha aowa nnubhindu akakukumanya kwaaloya. 36 Bhai mobha gunkwetenje shene shilangayasho, nshikulupalalilanje nkupinga mmanganje mmandunji bha shilangaya." A Yesu bhakamaliyeje kubheleketa genego, gubhapite kwiiya kwatalika bhanaabhonanje. 37 Nkali a Yesu bhatendile yene ilangulo yoweyo pameyo gabhonji,

bhangaakulupalilanga. **38** Nkupinga gatimilile malobhe ga ankulondola bha a Nnungu a Ishaya kuti, "Mmakulungwa, gani akulupalile ntenga gwetu? Na mashili ga Bhakulungwa kugamanyishe kuka gani?" **39** Pabha bhangakulupalilanga, a Ishaya bhabhelekete kabhili, Bhakulungwa bhakuti, **40** "Bhashikukupila meyo gabhonji, Bhashinonopya mitima jabhonji, Bhanalolanje kwa mmeyo gabhonji, Bhanamumanyanje mmitima jabhonji, wala bhanandendebhushilanje, Na nne ngaalamiyenje."

41 A Ishaya bhashinkubheleketa gene malobhega pabha bhashinkuubhona ukonjelo gwa a Yesu, gubhatashiye ngani jabho. **42** Nkali nneyo ashikalongolele bhabhagwinji bha Bhayaudi gubaakulupalilene a Yesu. Ikabheje kwa ligongo lya Ashimapalishayo, bhangaibhoneyanga palugwinjili nkujogopa bhanaakanwanga nshinagogi. **43** Pabha kubhapingangaga kuiniyya na bhandunji kupunda kuiniyya na a Nnungu. **44** A Yesu gubhabhelekete kwa lilobhe lya utiya, "Mundu angulupalila nne, akaangulupalila nnepe, ikabhe anakwaakulupalila bhandumile bhala. **45** Aamona nne anakwaabhona bhandumile bhala. **46** Nne shilangaya, numbe njiika pashilambolyo nkupinga bhowe bhaangulupalilanga bhanatamangane nnubhindu. **47** Mundu apilikana malobhe gangu na anagakamule, nne nganng'ukumula, pabha nangaika kuukumula shilambolyo ikabhe kukushitapula.

48 Akakamula malobhe gangu akwete jwa kunng'ukumula, lilobhe limeleketyo, shiling'ukumule lyubha lya mpelo. **49** Nne nangabheleketa kwa mashili gangu namwene, ikabhe Atati bhandumile bhala, bhashinajila ya bheleketa na jiganya. **50** Numbe nne nimumanyi kuti amuli yabho inapeleshela gumi gwa pitipiti. Bhai nne gungubheleketa, gubhanajile Atati melekete."

(aiōnios g166)

13 Bhai shikukuu sha Pashaka shikanabhe, a Yesu bhamumanyi kuti malanga gabho ga jabhula pa shilambolyo kwenda kwa Atati gaishe. Bhashinkwaapinganga bhandu bhabho pa shilambolyo, numbe, bhashikwaapinganga mpaka kumpelo! **2** Lishetani ali abhatajile a Yuda, bhana bhabho a Shimoni Ishikaliote, ntima gwa kwaatendebhuka a Yesu, gubhatemingenenje nkulalila a Yesu na bhaajiganywa bhabho.

3 A Yesu bhali bhamumanyi kuti bhashikamuywa indu yowe na Atati, numbe kubhakoposhele kwa a Nnungu na bhanabhuja kwenda kwa a Nnungu. **4** Bhai gubhashoshile pa shalya, gubhabhishile likoti lyabho panyenje, gubhatolile litaulo, nikwiitabha nshigunu. **5** Kungai gubhatajile mashi nshibhiga, gubhatandwibhe kwaanabhiyanga makongono bhaajiganywa bhabho nikwaungutanga na litaulo libhaitabhile nshigunu lila. **6** Bhai gubhaaishile a Shimoni Petili, bhenebho gubhaalugulile a Yesu, “Mmakulungwa, mmwe nnaanabhiya mmakongono nne?” **7** A Yesu gubhajangwile, “Mmwe nnaino nkakushimanya shingutenda ikabheje shinshimanye kungai.” **8** A Petili gubhaabhalanjile, “Mmwe, wala nkanabhiya nne!” A Yesu gubhaajangwile, “Monaga ngannabhiye, mwangali shilongani na nne.” (**aiōn g165**) **9** A Shimoni Petili gubhaajangwile, “Mmakulungwa, nnabhiye nngabha makonganope, ikabhe na makono gangu nneila peila na ntwe gwangu.” **10** A Yesu gubhaabhalanjile, “Ajojile shiilu showe akapinjikwa kujoga kabhili, ikabhe kunabha makonganope, pabha shiilu showe shikonjile. Mmanganyanji nkonjilenje ikabhe nngabha mmowe.” **11** A Yesu bhashinkubheleketa “Nngabha mmowe nkonjilenje.” Pabha bhammanyi gani shabhatendebhushe. **12** A Yesu bhakamaliyeje kwaanabhiyanga

makongono, gubhawete likoti lyabho gubhatemi kabhili, nikwaabhuanya, "Bhuli, nngamanyinji gunintendelenjega? **13** Mmanganyanji punkunjemanga Mmaajiganya na Mmakulungwa, nnibheleketanga ukoto, pabha nne puni nneyo. **14** Bhai ibhaga nne nili Nankulungwa na Nkujiganya njikunnabhiyanga makongono, nneyo peyo na mmanganyanji nnapinjikwanga kunabhiyana makongono. **15** Kwa nneyo njikunnanguyanga ipinjikwa, nkupinga ntendelananje nneyo malinga shinintendelenje nne. **16** Kweli ngunakummalanjilanga, ntumwa nngabha jwankulungwa kupunda bhakulungwa bhakwe, na wala ntume nngabha nkulungwa kupunda bhantumile. **17** Nngamanyangaga genego, shiibhe shammbone ntendangaga nneyo. **18** "Ngaataya ga mmowe mmwe, pabha naamanyinji bhunaaggwilenje. Ikabheje nkupinga gatimilile Majandiko gataya. 'Aalile shalya shangu ashindundumalila.' **19** Ngunakummalanjilanga genega gakanabhe koposhela, nkupinga pushigakoposhele nkulupalilanje kuti 'Nne ni Nne.' **20** Kweli ngunakummalanjilanga. Akumposhela mundu jojowe junintumile, anaamboshela nne, na amboshela nne, anakwaaposhela bhandumile bhala." **21** A Yeshu bhakamaliyeje bheleketa genego, gubhatengwishe muntima kwa kaje, gubhakong'ondele bhalinkuti, "Kweli ngunakummalanjilanga, jumo munkumbi gwenunji apinga ndendebhuka!" **22** Bhaajiganya gubhalolenenje akuno bhalinginji na lipamba gani jubhakuntaya. **23** Jumo jwa bhaajiganya, apingwaga kaje na a Yeshu, ashinkutama tome na a Yeshu. **24** Bhai, a Shimoni Petili gubhannangwile nkono bhalinkuti, "Mwaabhuye gani jubhakuntaya?" **25** Bhai jwenejo gwabhatendebhushile a Yeshu nikwaabhuuya, "Mmakulungwa, gani?" **26** A Yeshu gubhajangwile, "Jwene, jushinimpambile ndonji nikumpajo."

Gubhagabhile ndonji, nipamba, gubhaapele a Yuda, bhana bhabho a Shimoni Ishikaliote. **27** A Yuda bhakaposheleje ndonji jila, Lishetani gwabhajinjile. Bhai a Yesu gubhaalugulile, "Shintumbilile tendasho, ntende shangu!" **28** Wala jwakwa mundu munkumbi gwa bhatemingenenje pa shalya pala amumanyi kwa nndi bhashikwaabhalanjila nneyo. **29** Pabha a Yuda pubhaaliji bhaagoya mpatila gwa mmbiya yabhonji, bhananji gubhaganishiyenje kuti a Yesu bhashikwabhaalanjila bhakaume ipinjikwa nshikukuu, eu kuti bhashikwaabhalanjila bhaakapanganje bhaalaga indu. **30** Bhai, a Yuda bhakaposheleje ndonji jila, shangu gubhakopweshe palanga. Na puyaliji shilo. **31** A Yuda bhakajabhuleje, a Yesu gubhashite, "Nnaino akuywe Mwana juka Mundu, numbe a Nnungu bhashikuywa nkati jakwe. **32** Na ibhaga a Nnungu bhakushiywe nkati ja Bhana bhabho, numbe a Nnungu shangupe, shibhankuye Mwana nkati jabho. **33** "Mmanganya ashibhanangu, shindame na mmanganyanji kwa malanga gashokope. Shinnoleyanje, ikabheje nnaino ngunakummalanjilanga malinga shinaabhalanjilenje Bhayaudi kuti, 'Kungwenda mmanganyanji nkakombolanga kuika!' **34** Ngunakumpanganga amuli ja ambi, Mpingane, malinga shinimpinjilenje mmanganyanji. **35** Mpinganaga, bhandu bhowe shibhamanyanje kuti mmanganya bhaajiganywa bhangu." **36** A Shimoni Petili gubhaabhushiye, "Mmakulungwa, kunkwenda kwei?" A Yesu gubhajangwile, "Kungwenda nkakombola kungagula nnaino, ikabheje kungai shinngagule." **37** A Petili gubhaalugulile, "Mmakulungwa, kwa nndi ngunakombole kunkagula nnaino? Nne shing'engwe nkali kuwa kwa ligongo lyenu mmwe." **38** A Yesu gubhaajangwile, "Bhuli! Kweli mmwe shinng'engwe kuwa kwa ligongo lyangu nne? Kweli

ngunakunnugulila, lipongo akanabhe kongobhela shinngane patatu!"

14 A Yeshu gubhaalugulilenje, "Nnatengukanje mmitima jenunji. Nnakwaakulupalilanga a Nnungu, nngulupalilanje na nne. **2** Kumui kwa Atati ipali ndamo yaigwinji, monaga nngabha nneyo, ngammalanjilenje. Nnaino ngunakwenda kukunnng'alashiyanga ndamo. **3** Nyendaga kung'alashiyanga ndamo, shimuje kukuntolanga, nkupinga pushimme nne, na mmanganyanji mmanganje popo. **4** Mmanganyanji nngumanyinji mpanda gwa kungwendako." **5** A Tomashi gubhabhushiye, "Mmakulungwa, tukakukumanya kunkwenda, bhai, tugumanye bhuli mpandago?" **6** A Yeshu gubhaajangwile, "Nne ni mpanda na kweli na gumi. Jwakwa akombola kwenda kwa Atati ikabhe kupitila nne. **7** Ibhaga nkamanyinji nne, nkaamanyinji Atati. Kuumila nnaino, mwaamanyinji, numbe mwaabhwениnji." **8** A Pilipi gubhaalugulile, "Mmakulungwa, shiitupwae, ntulanguye Atati." **9** A Yeshu gubhaalugulilenje, "Mobha gowega ndemi na mmanganyanji, igala mmwe a Pilipi nkanabhemanya? Amweni nne abhabhweni Atati. Nkubheleketa bhuli, 'Ntulanguye Atati?'

10 Bhuli nkaakulupalila kuti nne muni nkati ja Atati, nabhalabho Atati mubhali nkati jangu? Malobhe gungummalianjilangaga, ngaabheleketa kwa mashili gangu namwene, ikabhe Atati bhali nkati jangu, ni bhaatenda liengo lyabho. **11** Nngulupalilanje kuti nne muni nkati ja Atati, na Atati mubhali nkati jangu, ibhaga ng'oo, nkulupalilanje kwa ligongo lya maengo gungutendaga. **12** Kweli ngunakummalianjilanga, jwene angulupalila nne, na jwalakwe shaatende maengo gungukamula nne, nkali na gamakulungwa kupunda genega, pabha nne ngunakwenda kwa Atati. **13** Shoshowe shishinnjuganje kwa lina lyangu, shenesho shindende,

nkupinga Atati bhakuywe nkati jika Mwana. **14** Nnyugangaga shoshowe kwa lina lyangu, shinintendelanje.” **15** “Mmbingangaga, shinkamulanje amuli yangu. **16** Na nne shinaajuje Atati bhampanganje jwakunjangutilanga juna, nkupinga atame na mmanganyanji pitipiti. (aiōn g165) **17** Jwenejo Mbamu jwa kweli. Shilambolyo nngakombola kumposhela, pabha shikakombola kummona wala kummanyia. Ikabheje mmanganyanji mummanyinji pabha anaatama na mmanganyanji, na shaabhe nkati jenunji.” **18** “Ngannekanga ushubha, shininiilanje. **19** Gaigele mobha gashoko, shilambolyo shikamona kabhili, ikabheje mmanganyanji shimmonanje, pabha nne najwankoto na nkali mmanganyanji shimmanganje mmabhakotonji. **20** Pushiliishile lyene lyubhalo, shimmanyanje kuti nne muni nkati ja Atati, na mmanganyanji munninginji nkati jangu, na nne nkati jenunji.” **21** “Akwiiposhela amuli yangu nikwiikamula, jwenejo ni ambinga nne. Na jwalakwe ambinga nne, shaabhapinje Atati, na nne shinimpinje na shiniilanguye kuka jwene.” **22** A Yuda, nngabha a Ishikaliote bhala, gubaabhushiye, “Mmakulungwa, shiitendeshe bhuli mmwe kwiilanguya kwetu uwe na nngabha ku shilambolyo?” **23** A Yesu gubhajangwile, “Mundu ambingaga shakamule malobhe gangu, Atati shibhampinje na uwe shituishe, nitama najo. **24** Mundu akaambinga nne akakamula malobhe gangu. Lilobhe limpilikenenje nngabha lyangu nne, ikabhe lya Atati bhandumile. **25** “Nimmalanjilenje genego, shini launo na mmanganyanji shino, **26** ikabheje Nkjwangutila jula, Mbamu jwa Ukonjelo, shibhantume Atati kwa lina lyangu, shannjiganyanje indu yowe na kunkumbushiyanga gowe gunimmalanjilenje.” **27** “Ngunakunneshelanga ulele, ngunakumpanganga ulele gwangu. Ngakumpanganga malinga shilambolyo shishikuti

tenda. Nnaingjikanje mmitima jenunji wala nnatengukanje. **28**
Mwapilikenene punammalanjilenje. ‘Ngunakwijendela, kungai
shinimmujilanje kabhili.’ Nkambiljilenje, nkainonyelenje kwa
ligongo ngunakwenda kwa Atati, pabha bhenebho bhakulungwa
kumbunda nne. **29** Njikummalanjilanga genega nnaino gakanabhe
koposhela, nkupinga pushigakoposhelepo nkulupalilanje. **30**
Ngabheleketa kabhili malobhe gamagwinji na mmanganyanji,
pabha nkulungwa jwa shilambolyoshi anakwiya. Wala jwangali
sha kombola kwangu nne, **31** ikabheje shilambolyo shinapinjikwa
shimanye kuti nne ngunakwaapinga Atati, pabha ngunatenda
indu yowe malinga shibhang'amulishe Atati. Nnjimangane,
tujabhule apano!”

15 A Yesu gubhapundile kubheleketa, “Nne nshabbibhu gwa
kweli, bhaalima ni Atati. **2** Lujambi lolowe luli nkati jangu lukaogoye
iyepo, lunashelwa nishoywa, na lolowe luogola, lunaunilwa
ntonga lukonje lupunde ogola. **3** Mmanganyanji nkonjilenje kwa
ligongo lyu ntenga gunimmalanjilenje gula. **4** Ntamangane nkati
jangu, na nne nkati jenunji. Na malinga lujambi pulukaogoya iyepo
jikape, lukabhe munshabbibhu, nneyo peyo na mmanganyanji
nngakombola kuogoya iyepo nkamatangane nkati jangu.” **5**
“Nne nshabbibhu, mmanganyanji nyambi. Atama nkati jangu, na
nne ndamaga nkati jakwe, jwenejo shaogoye iyepo yaigwinji,
pabha gwangali nne nkakombolanga tenda shoshowe. **6** Mundu
jojowe akatame nkati jangu, analeshelwa palanga malinga
lujambi pululeshelwa palanga ni jumula. Nilokotwa na bhandunj
nileshelwa pamoto lutinishe. **7** Ntamanganaga nkati jangu, na
malobhe gangu gatamaga nkati jenunji, bhai, nnjuganje shoshowe
shinkupinganga na mmanganya shimpewanje. **8** Shimmanganje
bhaajiganywa bhangu, niogoya iepo yaigwinji na kwa nneyo

Atati shibhakuywe. **9** Nne ngunakumpinganga mmanganyanji malinga Atati shibhambinga nne. Ntamangane nkupingana na nne. **10** Nkamulangaga amuli yangu, shintamangane nkupingana na nne, malinga nne shingamwile amuli ya Atati na tama nkupingana kwabho. **11** Njikummalanjilanga genego nkupinga angalala kwangu kutame nilonjeya nkati jenunji, na angalala kwenunji kutimilile. **12** Amuli jangu ni ajino, mpingane, malinga shinimpinjilenje nne. **13** Kwakwa kupinga kupundile, kwa mundu kwiishoya gumi gwake kwa ligongo lya ashaambwiga ajakwe. **14** Mmanganyanji ashaambwiga ajangu ntendangaga gungung'amulishanga. **15** Nganshemanga kabili bhatumishi, pabha ntumishi akakushimanya shibhaatenda bhakulungwa bhakwe. Ikabheje mmanganyanji njikunshemanga ashaambwiga, pabha ninng'ibhulilenje gowe gumbilikene kwa Atati. **16** Nngabha mmanganyanji nng'agwilenje nne, ikabhe nne ning'agwilenje mmanganyanji nikuntumanga nnjendangane nkaogoyanje iepo na iepo yenunji ilonjeye, na bhalabho Atati bhampanganje shoshowe shinkwaajuganga kwa lina lyangu. **17** Bhai, amuli jangu jingumpanganga ni ajino, mpingane." **18** A Yesu gubhashite, "Ibhaga shilambolyo shinshimangaga mmanganyanji, nkumbushilanje cuti, shinjimile nne shikanabhe kunshimanga mmanganyanji. **19** Ibhaga nkalinginji bhandu bha shilambolyo, shilambolyo shikampinjilenje pabha bhandunji bhakwe. Ikabheje pabha mmanganyanji nngabha bha pa shilambolyo, ikabhe nne njikunng'agulanga kopoka kushilambolyo, kwa lyene ligongolyo shilambolyo shinakunshimanga. **20** Nkumbushilanje gunimmalanjilenje, ntumwa nngabha jwankulungwa kupunda bhakulungwa bhakwe. Ibhaga bhashimbotekanga nne, shibhampotekanje

na mmanganyanji, monaga bhakamulenje lilobhe lyangu, nneila peila shibhakamulanje na lilobhe lyenunji. **21** Ikabheje genego gowe shibhantendelanje kwa ligongo lya lina lyangu, pabha bhakakwamanya bhandumile bhala. **22** Monaga ngungaisheje nibheleketa nabhonji, bhakanakolanje yambi, ikabheje nnaino bhakakombolanga kwiembuya kuti bhangalinginji yambi. **23** Anjima nne, anakwaashima na Atati. **24** Monaga ngalepele tenda indu ikanabhe tendwa naka mundu juna ngubhakakwetenjeje yambi, ikabheje nnaino bhagabhweninji gundendile, na gubhanjimilenje nne na Atati. **25** Ikabheje gatimilile malobhe ga shalia yabhonji, ‘Bhashinjimanga nne gwayoyo!’ **26** “Ikabheje pashaishe nkujangutajo, jushintume kungwenunji kopoka kwa Atati, Mbumu jwa kweli, jwenejo shangong’ondele nne. **27** Na mmanganyanji shinngong’ondelanje, pabha nshibhanganga na nne kuumila kundandubho.”

16 “Njikummalanjilanga genego nkupinga nnalekanje ngulupai jenunji. **2** Bhandunji shibhankananje nnyumba yabhonji ya jujila Nnungu. Numbe ganakwiya mobha, kila mundu shammulaganje mmanganyanji, shaganishiye kuti anaashoya mbepei kwa a Nnungu. **3** Shibhantendelanje genego kwa ligongo lya nngaamanya Atati, wala nne. **4** Ikabheje njikummalanjilanga genego, nkupinga pushigaishe malanga gakwe, nkumbushilanje kuti nammalanjilenje.” “Nangammalanjilanga yene indui kuumila bhukala, pabha naliji pamo na mmanganyanji. **5** Ikabheje nnaino ngunakwenda ku bhandumile bhala, wala jwakwa nkali jumo munkumbi gwenunji amuya, ‘Nkwenda kwei?’ **6** Pabha njikummalanjilanga genego, nshiinjikanga mmitima jenunji. **7** Ikabheje, kweli ngunakummalanjilanga, mbaya nne nyabhule, pabha ngajabhule Nkujanguta jula, akanjilanga. Ikabheje,

nyendaga, bhai shinintume kungwenunji. **8** Jwenejo aikaga, shabhakong'ondelanje bhandu pa shilambolyo, ga yambi na aki na ukumu ja a Nnungu. **9** Kwa ngani ja yambi yenunji shabhakong'ondelanje, pabha bhangangulupalilanga nne, **10** kwa ngani ja aki shabhakong'ondelanje kuti nne ngwete aki, pabha ngunakwijjendela kwa Atati, wala nkamonanga kabhili, **11** na kwa ngani ja ukumu, shabhakong'ondelanje kuti nkulungwa jwa pashilambolyo pano aukumwilwe. **12** "Njikola gamagwinji ga kummalianjilanga, ikabheje nnaino shintopelwanje. **13** Ikabheje pushaishe Mbamu jwa kweli, jwenejo shannongoyanje nkwelli jowe, pabha akabheleketa kwa mashili gakwe nnyene, ikabhe shabhelekete gapilikene na kunnugulilanga gapinga koposhela. **14** Jwenejo shanguye nne pabha shantashiyanje gapatile kwangu nne gala. **15** Yowe ibhakwete Atati ni yangu, kwa nneyo nashinkubheleketa kuti, Mbamujo shantashiyanje gashaapate kwangu nne. **16** "Galepeshe mobha gashoko, mmanganyanji nkamonanga na gapitaga mobha gashoko, shimmonanje kabhili!" **17** Penepo bhaajiganywa bhabho bhananji gubhabhuyenenje, "Bhakwete malombolelo gashi pubhabheleketa, 'Galepeshe mobha gashoko mmanganyanji nkamonanga, na gapitaga mobha gashoko shimmonanje kabhili?' Kabhili bhakuti. 'Pabha ngunakwenda kwa Atati!'" **18** Bhai, gubhalinginji nkubhuyana, "Bhakwete malombolelo gashi kubheleketa, 'Galepeshe mobha gashoko?' Tukakushimanya shibhaabheleketa." **19** A Yeshu gubhamumanyi kuti bhanapinganga kwaabuya, bhai gubaaluguliljenje, "Bhuli, nnabhuyananga gumelekete gakuti, 'Galepeshe mobha gashoko mmanganyanji nkamonanga, na gapitaga mobha gashoko shimmonanje kabhili?'" **20** Kweli ngunakummalianjilanga,

mmanganyanji shinngutanje shililo, ikabheje shilambolyo shishiinonyele, shinng'injikanje, ikabheje kuinjika kwenunji shikutendebhushe kubha kwiinonyela. **21** Bhakongwe bhalipinga kola, bhanapata mboteko pabha malanga ga kola gaishile, ikabheje bhakolaga, bhakakumbushila kabhili mboteko, kwa ligongo lya kwiinonyela kubhelekwa kwa mundu pa shilambolyo.

22 Bhai, mmanganyanji nshiinjikanga nnaino, ikabheje shininjiilanje kabhili, numbe shimwinonyelanje mmitima jenunji, na kwene kwinonyelako jwakwa shampokonyolanje.” **23** “Lyene lyubhalyo nkamuyanga shoshowe. Kweli ngunakummalanjilanga, shoshowe shishimwaaajunganje Atati kwa lina lyangu, shibhampanganje. **24** Mpaka nnaino nkanabhejuganga shindu kwa lina lyangu. Nnjunganje shimpewanje nkupinga kwiinonyela kwenunji kutimilile. **25** “Njikummalanjilanga genega kwa ndango. Ikabheje malanga ganakwiya ngammalanjilanga kabhili kwa ndango, ikabhe shinimmalanjilanje ga Atati gwangali nng’iyo. **26** Gene mobhago shinnjunganje kwa lina lyangu, wala ngakummalanjilanga kuti shininjuilanje kwa Atati, **27** pabha bhayene Atati bhanakumpinganga, kwa ligongo lya mbinganga nne nikulupalila kuti kungoposhele kwa a Nnunu.

28 Nne kungopweshe kwa Atati, gung’ishe kushilambolyo na nnaino ngunakushileka shilambolyo kubhuja kwa Atati.” **29** Bhai bhaajiganywa bhabho gubhaalugulilenje, “Nnole! Nnaino nnabheleketa gwangali nng’iyo wala nkabheleketa kwa ndango.

30 Nnaino tumumanyi kuti mmwe nnakwiimanya indu yowe, wala ikapinjikwa mundu jojowe kummuya, kwa nneyo tunaakulupalila kuti kunkoposhele kwa a Nnunu.” **31** A Yesu gubhaajangwilenje, “Bhuli, nnaino nnikulupalilanga? **32** Malanga ganakwiya, numbe gaishe, mmowenji shimpwilingananje kila mundu kunngwakwe,

nne shinnekanje jikape. Mbenya, nne nngabha puni jikape, pabha Atati pubhali pamo na nne. **33** Njikummalanjilanga genego nkupinga nkolanje ulele gwa lundana na nne. Pashilambolyo nkwetenje shilaje, ikabheje mwilumanje ntima, nne nishikombwele shilambolyo!"

17 A Yeshu bhakabheleketeje genego, gubhalolile kunani kunnungu, gubhashite, "Atati, malanga gaishe! Munkuye Mwanagwenu, nkupinga na jwalakwe Mwana ankuye. **2** Pabha mwashinkumpa Mwanagwenu mashili kubhandu bhowe nkupinga bhowe bhumwampele abhapanganje gumi gwa pitipiti. (aiōnios g166) **3** Na gumi gwa pitipiti ni aguno, kummanya mmwe nni jikape a Nnunu bha kweli, na kwaamanya a Yeshu Kilishitu bhumwaatumile. (aiōnios g166) **4** Nne njikunkuya mmwe pa shilambolyo pano, maliye liengo limwaambele ndende lila. **5** Atati, nnaino nnguye, kwa ukonjelo gunaawkwete punaliji na mmwe shilambolyo shikanabhe panganywa gula. **6** "Njikulenda lina lyenu limanyishe ku bhandu bha pa shilambolyo bhummbele bhala. Pubhalinginji bhenu, gummbele nne bhabhanganje bhangu, numbe bhakundilenje lilobhe lyenu. **7** Nnaino bhamumanyinji kuti yowe immbele, kuikopweshe kunngwenu mmwe. **8** Nne naapelenje lilobhe limwaammbele lila, nabhalabhonji bhaliposhelenje, bhamumanyinji kuti kweli kungoposhele kunngwenu mmwe, na bhakulupalilenje kuti mmwe ninndumile." **9** "Nne ngunakwaajujilanga bhenebho, ngakushijujila shilambolyo, ikabhe ngunakwaajujilanga bhummbele bhala, pabha bhenu. **10** Yowe ingwete ni yenu mmwe, na yenu ni yangu na ukonjelo gwangu ubhoneshe ku bhene bhumbele bhala. **11** Na nnaino wala ngalonjeya pashilambolyo, ngunakwiya kunngwenu, ikabheje bhanganyabha launo pubhapalinji pashilambolyo. Atati

bha ukonjelo! Kwa mashili ga lina lyenu limmbele, shonde mwaapanganje ulinda nkupinga bhabhanganje shindu shimo, malinga shituli uwe. **12** Punaliji pamo na bhanganyabho, nne nashinkwaapanganga ulinda kwa mashili ga lina lyenu limmbele. Nne naabhishilenje muulinda, wala jwakwa nkali jumo jwabhonji apinga kuobha, ikabhe amanyishe kuti mwana jwa obha jula, nkupinga Majandiko ga Ukonjelo gamalile.”

13 “Bhai, nnaino ngunakwiya kunngwenu, gene malobhega njibheleketa nili pa shilambolyope pano, nkupinga bchainonyelanje mmitima jabhonji kwa ligongo lyangu. **14** Nne naapelenje lilobhe lyenu na shilambolyo gushaashimilene, pabha bhanganyabho nngabha bha pa shilambolyo, malinga shini nne nngabha jwa pa shilambolyo. **15** Ngaajuga kuti mwaashoyanje pa shilambolyo, ikabhe ngunaajuga mwaembuyanje na jwangali jwa mmbone jula.

16 Bhanganyabho nngabha bha pa shilambolyo, malinga shini nne nngabha jwa pa shilambolyo. **17** Mwaatakayanje kwa kweli jila, lilobhe lyenu ni kweli. **18** Malinga shinndumile nne ku shilambolyo na nne nnepeyo njikwaatumanga ku shilambolyo, **19** na kwa ligongo lya bhanganyabho ngunakwiishoya namwene nkupinga na bhalabhonji bhaishoyanje na kweli jila. **20** “Bhungwaajujilanga nngabha bhanganya pebho, ikabhe bhowe shibhakulupalilanje kwa ligongo lya lilobhe lyabhonji. **21** Ngunaajuga nkupinga bhowe bhabhanganje shindu shimo. Atati! Ngunaajuga bhabhanganje nkati jetu, malinga mmwe Atati shinni nkati jangu, na nne nkati jenu. Ngunaajuga bhabhanganje shindu shimo nkupinga shilambolyo shikulupalile kuti mmwe ni nndumile. **22** Nne naapelenje ukonjelo malinga gumwaambele gula, nkupinga bhabhanganje shindu shimo malinga shituli uwe. **23** Nne ndame nkati jabhonji, na mmwe nkati jangu nne, nkupinga bhamalilane

kubha shindu shimope, nkupinga shilambolyo shimanaye kuti mmwe ni nndumile, mmwe nnakwaapinganga bhanganyabho malinga shinkumbinga nne.” **24** “Atati! Shingupinga bhummbele bhala bhabhanganje pamo na nne popowe pushindame, nkupinga bhagubhonanje Ukonjelo gwangu gummbele, pabha nshinkumbinga shilambolyo shikanabhe panganywa. **25** Atati mmambone! Shilambolyo shikakummany, ikabhe nne nimmanyi, bhanganyabha bhamumanyinji kuti mmwe ni nndumile. **26** Njitenda lina lyenu limanyishe ku bhanganyabho, na shimbunde kutenda nneyo, nkupinga kumbinga kwenu, kubhe mmitima jabhonji, na nne namwene mme mmunda jabhonji.”

18 A Yeshu bhakabheleketeje genego, gubhajabhwile na bhaajiganywa bhabho gubhapite kung'ambu lushi lwa Kedoloni. Kweneko jashinkupagwa bhushitani, a Yeshu gubhajinjile mwenemo na bhaajiganywa bhabho. **2** A Yuda bhaatendebhushe a Yeshu bhapamanyi penepo, pabha a Yeshu bhatendaga kwenda kweneko papagwinji na bhaajiganywa bhabho. **3** Bhai, a Yuda gubhaishe kubhushitani kula bhali bhalongene na likundi likulungwa lya manjola na bhalinda kukoposhela kwa bhakulungwanji bhaabhishila na Ashimapalishayo, bhajigelenje yenje na ikomanilo. **4** Bhai a Yeshu bhalinkugamanya gowe gapinga kwaakoposhela, gubhakoposhele nikwaabuyanga, “Junkunoleyanga gani?” **5** Nabhalabhonji gubhaajangwilenje, “A Yeshu Bhanashaleti!” A Yeshu gubhaalugulilenje, “Nne ni nne.” A Yuda bhaatendebhwishe bhala, na bhalabho pubhaliji bhajimi nabhonji. **6** Bhai, a Yeshu bhakaalugulilanjeje kuti, “Nne ni nne” gubhanokolenenje kubhuja nnyuma gubhaagwilenje pai. **7** A Yeshu gubhaabhushiyenje kabili, “Junkunnoleyanga gani?” Gubhaajangwilenje, “A Yeshu Bhanashaleti!” **8** A

Yesu gubhaalugulilenje, "Nimmalanjilenje kuti, Nne ni nne. Bhai monaga nkunoleyanga nne, mwaalekanje bhanganyabha bhaijendanganile." **9** Bhashinkubheleketa genego nkupinga gatimilile malobhe gubhabhelekete kuti, "Bhummbele bhala nangaang'obhiya nkali jumo." **10** Bhai, a Shimoni Petili bhashinkukola upanga, gubhaguolomwele nikunkata lishikio lya kunkono nnilo, lika ntumishi jwa bhakulungwa bhaabhishila. Jwene ntumishijo pashemwaga Malikushi. **11** Bhai, a Yesu gubhaabhalanjile a Petili, "Mmujenago upanga gwenu nnigonelo lyakwe. Bhuli, ngunapapile shikombe sha mboteko shibhambele Atati?" **12** Bhai likundi lya manjola lila na nkulungwa jwabhonji jula na bhalinda bha Bhayaudi bhala gubhaakamwilenje a Yesu, gubaatabhilenje. **13** Gubhatandubhenje kwapeleka kwa a Anashi, akwebhabho a Kayapa, bhaliji Bhakulungwa Bhabhishila shene shakasho. **14** A Kayapa ni bhebhala bhaalugulilenje Bhayaudi kuti mbaya mundu jumo awe kwa ligongo lya bhandunji. **15** A Shimoni Petili na nkujiganywa junu gubhaakagwilenje a Yesu. Jwene nkujiganywajo atendaga manyika na Bhakulungwa Bhabhishila, kwa nneyo gwajinjile palukumbi lwa Bhakulungwa Bhabhishila lubhajinjile a Yesu. **16** Ikabheje a Petili pubhajimi palanga, tome na nnango. Bhai, bhaajiganywa bhana bhamanyishe na Bhakulungwa Bhabhishila bhala gubhakopweshe palanga nikunguluka na jwankongwe nninda jwa pannango, akwaajinjiyaga a Petili nkati. **17** Bhai bhakongwe bhalinda bha nnango bhala gubhaabhushiye a Petili, "Bhuli, mmwe nkumbi gumo gwa bhaajiganywa bha bhene bhandubha?" A Petili gubhashite, "Nngabha nne!" **18** Bhatumwa na bhalinda bhala bhashinkukumbanya moto gwa jota pabha jishinkupagwa mmbepo, gubhatemingene nkujota moto. Na

bhalabho a Petili gubhajimi pamo nabhonji nkujota moto. **19**
Bhai Bhakulungwa Bhabhishila gubhaabhushiye a Yesu ga
bhaajiganywa bhabho na ga majiganyo gabho. **20** A Yesu
gubhaajangwile, "Nne mobha gowe natendaga bheleketa pa
lugwinjili lwa bhandu gwangali nng'yo na papagwinji natendaga
jiganya nshinagogi na ku likanisha, pubhaimanangaga Bhayaudi
bhowe, wala nangabheleketa shoshowe kwa nng'yo. **21** Pakuti
nnaamuya nne? Mwaabhuyanje bhapilikenenje bhala nndi
inaalugulilenje. Bhanganyabho bhagamanyinji gunaalugulilenje."
22 Bhai bhakamaliyeje bheleketa nneyo, bhalinda bhamo
bhaajimi tome gubaakomile lipapa a Yesu bhalinkuti, "Mmwe
nnakwaajangula bhuli nneyo, bhakulungwa bhaabhishila?"
23 A Yesu gubhaajangwile, "Monaga njibheleketa gangali
ga mmbone, mmalanjile gwangali gwa mmbone gwakwe,
monaga gumelekete ga mmbone, shinkungomela nndi?" **24**
Bhai, a Anashi gubhaapeleshe a Yesu kwa a Kayapa
bhakulungwa bhaabhishila, bhali bhatabhwilwe. **25** A Shimon
Petili gubhajimi penepo, nkujota moto. Bhai, gubhaabhushiyenje,
"Bhuli, nkali mmwe nngabha nkumbi gumo gwa bhaajiganywa
bhabho?" Nabhalabho gubhakanile bhalinkuti, "Nngabha nne!" **26**
Ntumishi jumo jwa bhakulungwa bhaabhishila, nnongo nnjakwe
akatilwe lishikio na a Petili jula, akwaabhuuya, "Bhuli, nne
nangammona mmwe kubhushtani nni pamo na bhenebho?" **27**
A Petili gubhakanile kabhili, na shangu lipongo gwakongobhele.
28 Kungai gubhaashoshiyenje a Yesu kwa a Kayapa,
gubhaapelekenje kwa a mpalume bha Shilumi bhashemwaga
a Pilato. Puyaliji tome kumashelo, ikabheje ashaayenenji
bhangajinjilanga nnukumbi mula, nkupinga bhanakolanje yambi
nikwaibhililanga kulya Pashaka. **29** Bhai, a Pilato a Mpalume bha

Shilumi bhala, nigubhakopweshe palanga gubaabhuhiyenje,
“Bhalebhile nndi bhene bhandubha?” **30** Gubhaajangwilenje,
“Kaliji bhangalebha, ngutukaapelesheje kunngwenu mmwe.” **31**
A Pilato gubhaaluguliljenje, “Ayaga mwaatolanje mwashaayenenji
nkaaukumulanje malinga shalia jenunji.” Bhai Bhayaudi
gubhaajangwilenje, “Uwe tukapinjikwa kunng'ukumula mundu
jojowe kuwa.” **32** Ishinkutendeka nneyo nkupinga gatimilile
malobhe gubhabhelekete a Yesu bhalilanguya shiwo shashi
shishibhawe. **33** Bhai, a Pilato gubhajinjile kabhili nnukumbi lukulu
lushemwa Pulaitolio, gubhaashemile a Yesu nikwaabhuva,
“Bhuli! Mmwe Mmakulungwa bha Bhayaudi?” **34** A Yesu
gubhaajangwile, “Bhuli! Genego malobhe genu mmayene,
eu nshibhalanjilwa na bhandunji, gangu nne?” **35** A Pilato
gubhaajangwile, “Ama! Bhuli nne Nnyaudi? Bhashilambo ajenunji
na bhakulungwa bhaabhisila bhenu bhanjenabhonji kwangu
nne. Nntendile nndi?” **36** A Yesu gubhajangwile, “Upalume
gwangu nngabha gwa pa shilambolyo. Monaga upalume
gwangu ukaliji gwa pa shilambolyo pano, ashimanjola bhangu
bhakangomanilenje nkupinga ngunakamulwe na Bhayaudi.
Ikabheje upalume gwangu nngabha gwa pepano.” **37** Penepo
a Pilato gubaabhuhiye, “Bhai, Mmwe mmapalume?” A
Yesu gubhajangwile, “Mmwe mmelekete kuti, nne mpalume.
Nne njibhelekwa kwa ligongo lya genego na genego ni
bung'ishile pa shilambolyo, nkupinga ngong'ondele kweli
kubhandunji. Jojowe akwete kweli anambilikanishiya nne.”
38 A Pilato bhakwaabhuuya, “Kweli ni nndi?” A Pilato
bhakabheleketeje genego gubhaajendelenje Bhayaudi kabhili,
gubhaaluguliljenje “Nne ngakushibhona shoshowe shibhalebhile
bhenebha. **39** Ikabheje nkwenetene nnkubho gwa kuti nne

ning'ugulilanje nkutabhwa jumo mobha ga Pashaka. Bhuli,
nnapinganga ning'ugulilanje A mpalume bha Bhayaudi?" 40
Penepo gubhajobhelenje, "Ng'oo! Nngabha bhenebha ikabhe
a Bhalabha!" A Bhalabha bhashinkutabhwa kwa ligongo lya
ujambashi.

19 Bhai, a Pilato gubhaatolile a Yeshu gubaakomile mishapilo.

2 Na bhalabhonji ashimanjola nkwaalembula, gubhaeleyenje
ulemba gwa mibha, gubhaawashiyenje a Yeshu muntwe
mbuti ulemba gwa shipalume, gubhaawashiyenje na nngubho
ja langi ja shambalau. 3 Gubhaajendelenje, bhalinkutinji
"Tunakunkomaya a mpalume bha Bhayaudi!" Gubhaakomilenje
mapapa mmatukwa. 4 Kungai a Pilato gubhakopweshe kabhili
palanga, gubhaalugulilenje, "Nnolanje, ngunakwiya nabho kabhili
kwenu mmanganya mmumanyanje kuti nne, nangashibhona
shoshowe shibhalebhile." 5 Bhai, a Yeshu gubhakopweshe
palanga bhawete ulemba gwa mibha na nngubho ja langi
ja shambalau. A Pilato gubhaalugulilenje bhandunji bhala,
"Nnolanje! Abha apano." 6 Bhai, Bhakulungwa bhaabhisila
na bhalinda bhakaabhonanjeje a Yeshu gubhautienje lilobhe
bhalinkutinji, "Mwaabhambe munshalabha! Mwaabhambe
munshalabha!" A Pilato gubhaalugulilenje, "Bhai, mwaatolanje
mwaashayenenji nkaabhambanje munshalabha, pabha nne
ngakushibhona shibhalebhile." 7 Bhayaudi gubhaajangwilenje,
"Uwe tukwete shalia ja kwaukumula, pabha bhashinkwiitenda
kuti Mwana jwa a Nnungu." 8 Bhai a Pilato bhakapilikaneje gene
malobhego gubhapundile jogopa. 9 Bhai, gubhajinjile kabhili
nnukumbi lukulu lushemwa Pulaitolio, gubhaabhushiye a Yeshu,
"Mmwe kunkoposhele kwai?" Ikabheje a Yeshu bhangaajangula
shindu shoshowe. 10 Bhai a Pilato gubhaalugulile "Nkaapinga

kubheleketa na nne? Bhuli nkaakumumanya kuti nne njikola ukulungwa gwa kunngopola na gwa kummamba munshalabha?"

11 A Yeshu gubhaajangwile, "Mmwe ngunkakweteje upalume gogowe kwangu nne gwangali pegwa na a Nnunu. Kwa nneyo jwene angamwiye kwenu mmwejo, ashikola shambi shikulungwa." **12** Tandubhila penepo a Pilato gubhaloleye shanabhuli shibhaagopole, ikabheje Bhayaudi gubhajobhelenje bhalinkutinji, "Mwaagopolaga bhenebha, mmwe mwangali shilongani na a Kaishali a mpalume bhakulu bha Loma, kila mundu akwiitenda mpalume anakwaatendebhuka a Kaishali!" **13** Bhai a Pilato, bhakapilikaneje gene malobhego, gubhakopweshe nabho a Yeshu palanga, gubhatemi pashitengu sha ukumu, pashemwaga "lupenu lwa maganga" eu kwa Shiebhulania, "Gabhasha." **14** Puyaliji mui malanga ga shaa shita nnei, lyubha lya kolokoya Pashaka. A Pilato gubhaalugulilenje Bhayaudi, "Mwaalolanje! A mpalume bhenunji!" **15** Bhai, bhanganyabho gubhajobhelenje, "Mwaashoye! Mwashoye! Bhabhambwe munshalabha!" A Pilato gubhaabhushiyenje, "Bhuli naabhambe munshalabha a mpalume bhenunji?" Bhakulungwanji bhaabhisila gubhajangwilenje, "Uwe twangali a mpalume ikabhe a Kaishali!" **16** Penepo a Pilato gubhaakamwiyenje a Yeshu nkupinga bhaabhambe munshalabha, na bhalabhonji gubhaaposhelenje. Bhai, gubhaatolilenje a Yeshu. **17** Na bhalabho gubhakopweshe palanga akuno bhajigele nshalabha gwabho, kuloya mmbali pashemwaga "Shibhanga sha Ntwe" kwa Shiebhulania Goligota. **18** Penepo nipubaabhbambilene munshalabha a Yeshu na bhandu bhananji bhabhili, jumo nkono gwabho gwa nnilo, na junu nkono nshinda gwabho na a Yeshu pakati pakati. **19** Na bhalabho a Pilato gubhajandishe mmbila

panani nshalabha, jijandikwe nnei, "A YESHU BHANASHALETI, A MPALUME BHA BHAYAUDI." **20** Bhai Bhayaudi bhabhagwinji gubhashomilenje jene mmbilajo, pabha pubhaabhbambilene munshalabha a Yeshu, pupaaliji tome na shilambo. Na jene mmbilajo pujajandikwe kwa Shiebhulania na Shilatini na Shigiliki. **21** Bhai, bhakulungwanji bha bhaabhishila na Bhayaudi gubhaalugulilenje a Pilato, "Nnajandishe. 'A mpalume bha Bhayaudi,' ikabhe bhashinkubheleketa bhayene kuti, 'Nne mpalume jwa Bhayaudi.'" **22** A Pilato gubhajangwile, "Gunyandishe, nigajandishe!" **23** Ashimanjola bhala bhakaabhbambanjeje a Yeshu munshalabha, gubhatolilenje nngubho yabho, gubhagebhenyenje maungu nsheshe, malinga shibhalinginji. Gubhatolilenje na kanshu jabho, jenejo pujaliji ja lukwa. **24** Bhai, gubhalugulilenenje, "Tunajipapule, ikabhe tutende shikoma jibhe jika gani." Genego gashinkutendeka nkupinga gatimilile Majandiko ga Ukonjelo ga taya, "Bhashinkugabhananga nngubho yangu, Na nngubho jangu gubaagulenje kwa shikoma." Bhai nneyo, ni shibhatendilenje ashimanjola bhala. **25** Tome na nshalabha gwa a Yeshu bhashinkujimangana anyinabhabho, na a Malia akulu bhabho anyinabhabho akongobhabho a Kileopashi, na a Malia Magidalena. **26** Bhai, a Yeshu bhakaabhoneje anyinabhabho na nkujiganywa jubhampinjile jula ajimi patome, gubhaalugulile anyinabhabho, "A Mama! Munnole, mwanagwenu." **27** Kungai gubhaannugulile nkujiganywa jula. "Mwaalole, anyina bhenu." Kutandubhila penepo, bhaajiganywa bhala gubhaatolile anyina bhabho a Yeshu bhakatame kunngwabho. **28** Kungai, a Yeshu akuno bhalikumanya kuti gowe gamalile, nkupinga Majandiko ga Ukonjelo gatimilile, gubhashite, "Njikola njota." **29** Penepo

jashinkupagwa bhakuli jigumbeywe divai ja shashama. Bhai, gubhashubhikenje shiponji mmakuli ja divai ja shashama jila, gubhatabhilenje nnubhalabhalia lwa nkongo ushemwa ishopo, gubhaabhisihilenje pa kang'wa. **30** Bhai a Yesu bhakapapileje divai ja shashama jila, gubhashite, "Gamalile!" Kungai gubhakotime nntwe, gubhamalile. **31** Bhai pabha pulyaaliji lyubha lya kolokoya kwa Lyubha lya Pumulila. Kwa nneyo ikapinjikwaga iilu ilepeshe munshalabha Lyubha lya Pumulila, pabha lyene lyubhalyo pulyaaliji likulungwa, Bhayaudi gubhaajujilenje a Pilato bhakaatemanje makongono bhakomelenjwe munshalabha bhala nkupinga bhawanganje shangu, na iilu yabhonji ishoywe mmishalabha. **32** Bhai, ashimanjola gubhapite kuntemanga makongono mundu jwa nntai na jwa bhili, bhakomelwenje munshalabha pamo na a Yesu bhala. **33** Ikabheje bhakaishilanjeje a Yesu, gubhaaimenje bhalibhawile, kwa nneyo bhangaatemanga makongono. **34** Ikabheje linjola jumo gwabhaomile lipanga lya mmbalati, bhai gujikopweshe minyai na mashi. **35** Kwa nneyo, jwene agabhweni genego ni akong'ondela, nkupinga na mmanganyanji nkulupalilanje. Na gene gabheleketego ni ga kweli, numbe amumanyi kuti anabheleketa ga kweli. **36** Pabha genega gashinkutendeka nkupinga Majandiko ga Ukonjelo gatimilile ga taya kuti, "Lyakwa nkali liupa lyabho limo shilitemanywe." **37** Na majandiko gana gakuti, "Shibhannolanje jubhanng'omilenje lipanga jula." **38** Gakapiteje genego, a Yoshepu bha ku Alimataya, gubhaajujile a Pilato bhatole shiilu sha a Yesu. A Yoshepu pubhaliji bhaajiganywa bha a Yesu, ikabheje kwa nng'iyo, pabha bhatendaga kwaajogopanga ashikalongolele bha Shiyaudi. Bhai, a Pilato gubhajitishiye. Kwa nneyo a Yoshepu gubhapite

shoya shiilu sha a Yesu. **39** Na bhalabho a Nikodemo bhene bhaajendele a Yesu shilo gwa ntai bhala, gubhapite na a Yoshepu bhali bhajigele mauta ga nunjila, gaengenywe na manemane na lubhani kilo makumi gatatu. **40** Bhai, gubhatolilenje shiilu sha a Yesu shila, gubhailijililenje shanda shammbone sha katani bhali bhatajilenje mauta malinga pugwaliji nkubho gwa Bhayaudi nkushika. **41** Pubhabhambilwe munshalabha a Yesu pala, jashinkupagwa bhushitani na nkati jakwe lyashinkupagwa likabhuli lya ambi likanabhe shikwa mundu jojowe. **42** Pabha Bhayaudi pubhalinginji nkukolokoya ga Lyubha lya Pumulila, na likabhulilyo pulyaaliji pa tome, bhai gubaabhhishilenje a Yesu mwenemo.

20 Lyambape Jumapili kuli na lubhindu a Malia Magidalena gubhapite kulikabhuli, gubhalibhweni liganga lila lishoshiywe pannango gwa likabhuli. **2** Bhai, gubhabhujile lubhilo kubhaaliji a Shimoni Petili na bhaajiganywa bhaanonyelaga a Yesu bhala, nikwaabhalanjilanga, “Bhashikwaashoyanga Bhakulungwa nnikabhuli mula, wala tukakukumanya kubhaabhhishilenje.” **3** Bhai a Petili na nkujiganywa junu jula, gubhapitengene kulikabhuli. **4** Gubhapitengene lubhilo bhowe bhanabhili, ikabheje nkujiganywa junu jula ashinkubhutuka kwaapunda a Petili, gwalongolele kuika kulikabhuli. **5** Gwakotime kuulumila nnikabhuli, gwajibhweni shanda, ikabheje jwangajinjila nkati. **6** Bhai gubhaishe na a Shimoni Petili, gubhajinjile nnikabhuli, mwenemo gubhajibhweni shanda, **7** na shitambaa shibhailijilwe a Yesu kuntwe. Shene shitambaasho shikaliji pamo na shanda jila, ikabhe shashinkuiligwa kunyenje pa jikape. **8** Kungai bhaajiganywa bhalongolele kuika kulikabhuli bhala, na bhalabho gubhajinjile nkati, gubhalolile nigubhakulupalile. **9** Pabha bhakagamanyinjiji

Majandiko ga Ukonjelo gatayaga kuti, yashinkupinjikwa a Yesu bhawaga, bhayushe. **10** Bhai, bhaajiganywa bhala gubhabhujengenje kwenda kunngwabhonji. **11** Ikabheje a Malia Magidalena pubhajimi palanga likabhuli, bhaliguta. Akuno bhali nkuguta gubhakotime kuulumilla nnikabhuli, **12** gubhaabhwениnji ashimalaika bhabhili bhawetenje nngubho yanawe, bhali bhatemingene pubhagoneshwe a Yesu pala, jumo kugwaloshiye ntwe na junu kugaliji makongono. **13** Ashimalaika bhala, bhakwaabhuyangaga, “Mama, pakuti nnaguta?” Bhalabho gubhaajangwilenje, “Pabha bhashikwaashoyanga Bhakulungwa bhangu na wala ngakukumanya kubhaabhishilenje!” **14** Bhakabheleketeje genego gubhatendebhwishe nnyuma, gubhaabhweni a Yesu bhajimi, ikabheje bhangaamanya kuti ni a Yesu. **15** A Yesu bhakwaabhuyaga, “A Mama, kwa nndi nnaguta? Junkunnoleya gani?” A Malia bhaliganishiya kuti pana bhaalima bhushitani, gubhaalugulile, “Mmakulungwa, monaga mmwe mwaatolile, mmalanjile kumwaabhishile, ngaatole.” **16** A Yesu gubhaalugulile, “A Malia Magidalena!” Nabhalabho a Malia gubhatendebhwishe, gubhaalugulile kwa Shiebhulania, “Labhoni!” Malombolelo gakwe, “Mmaajiganya.” **17** A Yesu gubhaalugulile, “Nnangamule, pabha nganabhekewnda kwa Atati. Ikabheje nnjende kwa ashaalongo ajangu nkaabhalanjilanje, ngunakwenda kwa Atati bhali Ainabhenunji na mmanganyanji, na a Nnunu bhangu bhali na mmanganyanji a Nnunu bhenunji.” **18** Kwa nneyo a Malia Magidalena, gubhapite kwaabhalanjilanga bhaajiganywa bhala ngani ja kuti, naabhwени Bhakulungwa na kuti bhashilugulilwa gene gowego. **19** Bhai puyaliji ligulo lya Jumapili, bhaajiganywa bha a Yesu pubhalinginji pamo nnyumba, akuno bhaugelenje

milango nkajogopanga Bhayaudi. Bhai, gubhakoposhele a Yeshu gubhajimi pakati jabhonji, gubhaalugulilenje, “Ulele ubhe na mmanganyanji!” **20** Bhakabheleketeje genego, gubhaalangwiyenje makono gabho na lubhalati lwabho. Bhai, bhaajiganywa bhala gubhainonyelenje ga kwaabbona Bhakulungwa. **21** Bhai a Yeshu gubaabhanjilenje kabhili, “Ulele ubhe na mmanganyanji! Malinga nne shibhandumile Atati, na nne ngunakuntumanga mmanganyanji.” **22** Bhakabheleketeje genego, gubhaapepetelenje bhalinkuti, “Mposhelanje Mbumu jwa Ukonjelo. **23** Mwaaleshelelangaga bhandunji yambi yabonji, shibhaleshelelwanje, nkaaleshelelanje bhakaleshelelwanga.” **24** Icabheje a Tomashi bhamo munkumbi gwa bhaajiganywa likumi limo na bhabhili bhala, bhashemwaga bhammba, bhakapaliji malanga gubhaishe a Yeshu. **25** Bhai bhaajiganywa bhananji bhala gubhaalugulilenje, “Twaabhwani Bhakulungwa.” A Tomashi gubhashite, “Nne ngakulupalila kuti bhayushile, ngagabhone mabhabhule ga mishumali jibhakomelwe mmakono gabho na nyinjiye ngowe yangu mmbalati mubhaomilwe lipanga.” **26** Bhai, lyubha lya nane, bhaajiganywa bhala pubhalinginji pamo kabhili nnyumba mula, na bhalabho a Tomashi bhaapali. Milango jili jiugelwe, icabheje a Yeshu gubhaishe, gubhajimi pakati pakati jabhonji, gubhashite, “Ulele ubhe na mmanganyanji!” **27** Kungai gubhaalugulile a Tomashi, “Nnjienasho shikowe shenu ntomaye mmakono gangu, nnjenago na nkono gwenu mmishe mmbalati yangu. Nnabhe mundu jwangakulupalila, ikabhe nkulupalile!” **28** A Tomashi gubhaajangwile, “Mmakulungwa bhangu na a Nnunu bhangu!” **29** A Yeshu gubaabhalanjile, “Nkulupalile kuti nyushile, pabha mmweni. Mbaya bhaakulupalilanga gwangali kwiibhona.” **30** Bhai ipali ilangulo yaigwinji ibhatendile a Yeshu pubhaliji

na bhaajiganywa bhabho yangajandikwa nshitabhumuno. 31
Ikabheje yenei ishijandikwa Mmajandiko ga Ukonjelo kuti,
nkupinga nkulupalilanje kuti a Yesu ni a Kilishitu, Mwana jwa a
Nnungu, na nkulupalilangaga nkolanje gumi kwa mashili ga lina
lyabho.

21 Gakapiteje genego, a Yesu gubhaakoposhelenje kabhili
bhaajiganywa bhabho kunyenje litanda lya Tibheliya, puyaliji
nnei. 2 A Shimonii Petili na a Tomashi bhashemwaga
Bhammba na a Natanaeli bha ku Kana ja Galilaya na bhana
bhabhili bha a Shebhedayo na bhaajiganywa bhabho bhananji
bhabhili, bhowe pubhalinginji pamo. 3 A Shimonii Petili
gubhaalugulilenje ajabhonji, "Ngunakwenda kutanda yamaki."
Nabhalabhonji gubhaajangwilenje, "Na uwe shitunkagule."
Bhai, gubhajabhwilenje, gubhakwelilenje muntumbwi, ikabheje
shene shilosho bhangapatanga shindu. 4 Lyambape, a
Yesu gubhajimi nnyenje litanda, ikabheje bhaajiganywa
bhangaamanya kuti bhenabho a Yesu. 5 Bhai, a Yesu
gubhaabhushiyenje, "Ashibhanangu, mpatilenje shamaki jojowe?"
Gubhaajangwilenje, "Nng'oo." 6 A Yesu gubhaalugulilenje,
"Ntejelanje lyau lyenunji nkono nnilo gwa ntumbwi gwenunji
shimpatanje yamaki." Bhai gubhatejelenje lyau lyabhonji,
ikabheje gubhalepelenje kuuta kabhili kwa ligongo lya shuluka
yamaki. 7 Bhai nkujiganywa apingwaga na a Yesu jula,
gwabhabhalanjile a Petili, "Bhenebha Bhakulungwa!" A Shimonii
Petili bhakapilikaneje kuti Bhakulungwa, gubhaitabhile nngubho
jabho pabha bhakaweteje ukoto, gubhaitumbushiye mmashi.
8 Ikabheje bhaajiganywa bhananji bhala gubhabhujilengene
kunyenje litanda na ntumbwi gula, akuno bhaliutanga lyau
ligumbele yamaki, pabha yaliji tome kulitaka, pubhalinginji

malinga meta makumi kumi kukoposhela kunyenje litanda.

9 Bhai bhakaikanjeje kulitaka, gubhagubhweninji moto gwa makala na pantundu jakwe ilijokwa yamaki na nkate. **10** A Yesu gubhaalugulilenje, "Njianayonji yamaki ishoko intandilenje." **11** Bhai, a Shimonii Petili gubhakwelile muntumbwi mula, gubhautile lyau lila mpaka kulitaka, ligumbele yamaki yaikulungwa makumi kumi na nng'anoo na itatu. Nkali yashulwishe nneyoyo, lyau lila lyangapapuka. **12** A Yesu gubhaabhalanjilenje, "Nnjiyangane kunnabhukanje." Jwakwa nkali jumo alinjile kwaabhuaya, "Mmwe agani?" Pabha bhaamanyinji kuti Bhakulungwa. **13** A Yesu gubhaishe, gubhatolile nkate, gubhaapelenje, gubhatendile nnayo peyo na yamaki ila. **14** Gwenegu pugwaliji gwatatu a Yesu kwiilanguya ku bhaajiganywa bhabho bhakayusheje. **15** Kungai bhakalyanganjeje, a Yesu bhakwaabhuaya a Shimonii Petili, "A Shimonii, bhanabhabho a Yowana! Bhuli, nnimbinga nne kupunda bhanganyanjbha?" Nabhalabho gubhajangwile, "Elo, Mmakulungwa, mmumanyi kuti nne ngulikumpinga." A Yesu gubhaabhanjile, "Nniye ngondolo yangu." **16** A Yesu gubhaabhalanjile gwabhilli, "A Shimonii, bhanabhabho a Yowana! Bhuli, nnimbinga?" A Petili gubhaajangwile, "Elo, Mmakulungwa, mmumanyi kuti nne ngulikumpinga." A Yesu gubhaabhalanjile, "Nshunje ngondolo yangu." **17** A Yesu bhakwaabhuaya a Petili gwatatu, "A Shimonii, bhanabhabho a Yowana! Bhuli nnimbinga?" Penepo a Petili gubhainjishe pabha bhashinkubhuywa gwatatu kuti, "Nnimbinga?" Gubhaajangwile, "Mmakulungwa, mmwe nngamanyi gowe, mmumanyi kuti nne ngulikumpinga." A Yesu gubhaabhalanjile, "Nniye ngondolo yangu!" **18** Gubhashite, "Kweli ngunakummalanjila, pumwaliji mmashanda mwayobhelele kwiitabha nshipi gwenu nikwenda kokowe

kunkupinga. Ikabheje pushinkongopale shinngoloye makono genu, na mundu junna shantabhe nikumpeleka kunkaapinga kwenda.” **19** Kwa bheleketa nneyo, bhashinkulanguya shanabhuli a Petili pushibhawe nikwaakuya a Nnungu. Kungai gubhabhaalanjile, “Nngagule.” **20** A Petili gubhatendebhwishe, gubhaabhweni bhaajiganywa bhapinjilwe na a Yesu bhala bhalikagula. Bhene bhaajiganywabha nibhaatemi tome na a Yesu bhalilyanganga shalya, nikwaabhuja, “Mmakulungwa gani apinga kuntendebhuka?” **21** Bhai, a Petili bhakaabphoneje bhaajiganywabho, bhakwaabhuaya a Yesu, “Mmakulungwa na abha bhuli?” **22** A Yesu gubhaajangwile, “Monaga nne ngunapinga bhenebha bhanawe mpaka pushimuje, mmwe nkupinjila nndi? Mmwe nngagule nne.” **23** Bhai, jene nganijo gujishumile munkumbi gwabhonji mula, kuti bhene bhaajiganywabho bhakawa. Ikabheje a Yesu bhaangalugulila kuti bhaajiganywabho bhakawa, ikabhe, “Mbingaga bhenebha bhanawe, mmwe nkupinjila nndi?” **24** Bhenebha ni bhaajiganywa bhakong’ondele yenei nikwijandika. Na uwe tumumanyi kuti gubhabhelekete gala ga kweli. **25** Ipali indu ina yaigwinji ibhatendile a Yesu, monaga ikajandikwe yowe shimo shimo, pungunganishiya kuti, nkali shilambolyo shikanatoshe kwa itabhu yowe ikajandikwe.

Itendi

1 Apwanga a Teopili, nshitabhu shangu sha ntai najandishe indu yowe ibhatendile a Yeshu na jiganya kuumila kundandubho ja liengo lyabho, **2** mpaka lyene lyubha libhatolilwe kwenda kunani kunnungu lila. Bhakanabhe tolwa kwenda kunnungu bhashinkwaalajiyanga mitume bhubhaagwilenje bhala kwa mashili gaka Mbamu jwa Ukonjelo. **3** Kwa mobha makumi nsheshe bhakaweje, bhashinkwilangula papagwinji kubhaajiganywa bhabho. Bhatendaga kwaabhonanga a Yeshu na bhalabho bhatendaga kungulushila ga Ukulungwa gwa a Nnungu. **4** A Yeshu bhakaimaneje na bhaajiganywa bhabho gubhaamulishenje nnei, “Nnajabhlulangane pa Yelushalemu, ikabhe nnindililanje miadi ja Atati, gunammalanjilenje gala. **5** A Yowana pubhabhatishe kwa mashi, ikabheje mmanganya shimmatishwanje kwa Mbamu jwa Ukonjelo mobha gashoko gakwiyago.” **6** Bhai, mitume bhakaimananjeje pamo na a Yeshu gubhaabhushiyenje, “Bhuli Mmakulungwa, nnaino punkupinga kwaabhujishiyanga upalume bha Ishlaeli?” **7** Ikabheje a Yeshu gubhaabhalanjilenje, “Mobha na miongwe ja genego mugali mmakono ga Atati, na wala nngabha liengo lyenunji kumumanya kuti shiibhe shakani. **8** Ikabheje Mbamu jwa Ukonjelo pashantulushilanjepo shimpatanje mashili na shimmanganje mmakong'ondela bhangu nshilambo sha Yelushalemu na ku Yudea na ku Shamalia, mpaka kumpelo gwa shilambolyo.” **9** Bhakabheleketeje genego, a Yeshu gubhatolilwe kwenda kunnungu akuno bhalikwaalolesheyanga, liunde likwaunishilaga bhangaabhonanga kabhili. **10** Bhalinginji nkulolesheya kunani, bhalabho bhalikwijendela, shangupe bhandunji bhabhili bhawetenje nngubho yanawe gubhajiminngene

patome jabhonji, **11** gubhashitenje, “Mmnganya mmandunji mma ku Galilaya, pakuti nshijimangana akuno nnilolanga kunani? A Yeshu bhatolilwe kungwenunji kwenda kunnungu, shibhajiye kabhili nneyo peyo malinga shimwabhwelenji bhalikwenda kunnungu.” **12** Kungai bhantenga gubhabhujilenje ku Yelushalemu kukopoka kushitumbi shishemwa Shitumbi sha Misheituni, kutalika kwakwe mbuti mwanja gwa kilomita jimo. **13** Bhakaikanganeje kunnjini gubhakwelilenje ku golopa kukati jibhaimanangaga, pubhalinginji a Petili na a Yowana na a Yakobho na a Ndeleya na a Pilipi na a Tomashi na a Bhatolomeyo na a Matei na a Yakobho bhanabhabho a Alupayo na a Shimoni Shelote na a Yuda bhanabhabho a Yakobho. **14** Bhowe bhatendaga imananga kwa ntima gumo mobha gowe nkujuga Nnunu, bhashinkupagwanga bhanabhakongwe na a Malia anyinabhabho a Yeshu na ashaapwabho. **15** Lyubha limo a Petili bhashinkujima pa lugwinjili lwa bhaakulupalilanga bha a Yeshu, pubhalinginji bhandunji ishila makumi kumi na gabhili, **16** gubhashite, “Ashaapwanga, ishinkupinjikwa gene Majandiko ga Ukonjelo gamalile, gabhelekete Mbumu jwa Ukonjelo, kwa kang'wa ja a Daudi, ashinkulondola ga a Yuda bhaalongoelenje bhandu kukwaakamula a Yeshu. **17** Pabha a Yuda bhashinkuagulwa kubha bhantenga pamo na uwe, kwa nneyo pubhaliji munkumbi gwetu.” **18** Nng'itu gwaumilwe kwa mmbiya yapatikene kwa shitendi shabho shangali sha mmbone, gubhagwile pai, nitumbuka lipitiu na matumbo nikushuka pala. **19** Bhandu bhowe pa Yelushalemu gubhapilikenene ga nshibha gwa a Yuda, kwa nneyo gwene nng'itu gula kwa luga jabhonji pubhashemilenje Akelidama, malombolelo gakwe, “Nng'itu gwa Minyai.” **20** “Pabha, ishijandikwa nshitabhu sha Shabhuli,

‘Jaliji ndamo jabho jiyseshe liame, mundu jojowe anatame penepo.’ Na kabhili ishijandikwa. ‘Mundu juna atole shitengu shabho sha liengo.’ **21** Bhai, mundu jumo munkumbi gwa bhalonganangaga na uwe mobha gowe gutwaowaga na a Yesu tunng’agule ailunde nnikundi lyetu. **22** Puipinjikwa jwenejo abhe alonganaga na uwe kutandubhila mobha gubhabhatishaga a Yowana, mpaka lyubha libhatolilwe a Yesu kwenda kunnungu. Jwenejo shakamule liengo na uwe lyapita kong’ondela kuyuka kwa a Yesu.” **23** Penepo, gubhalugulenje mena ga bhandu bhabhili, jwantai kulugulwa Yoshepu ashemwaga Bhalishabha eu Yushitushi, na jwabhili Matiashi. **24** Kungai gubhajujilenje Nnungu bhalinkutinji, “Mmakulungwa, mmwe nnjimanyi mitima ja bhandu bhowe. Kwa nneyo ntulanguye katika bhene bhabhilibha jwei jumunng’agwile, **25** akamule liengo libhalepele a Yuda nikwenda kubhapinjile bhayene.” **26** Gubhatendilenje shikoma, gushaagwilile a Matiashi, gubhabhishilwe munkumbi gwa mitume likumi limo na jumo bhala.

2 Likaishileje lyubha lya Shikukuu sha Mauno shishemwa Pentekoshite, bhaakulupalilanga bhowe bha a Yesu bhashinkuimananga pamo. **2** Shangupe mpugo kukopoka kunani kunnungu, gwa mbuti shitutu shikugumbalaga nnyumba mubhalinginji mula. **3** Kungai, gwikoposhele indu mbuti malamba ga moto, gakugabhyanyikaga nikuntulila kila mundu. **4** Gubhagumbeywenjwe Mbumu jwa Ukonjelo, gubhatandwibhenje kubheleketa kwa luga inape malinga Mbumu shabhalongoyangaga kubheleketa. **5** Ku Yelushalemu bhashinkupagwanga Bhayaudi, bhaakulupalilanga malajilo ga a Nnungu, kukoposhela mmbali yowe ya shilambolyo. **6** Bhandunji bhala bhakapilikananjeje gwene mpugogo

gubhaloposhelenje. Bhowe gubhaimukenje pabha kila mundu ashinkwaapilikananga bhalibheleketanga kwa luga jakwe nnyene.

7 Gubhakanganigwenje na kuimonga bhalinkutinji, "Abha bhowe bhutukwaapilikananga bhalibhelekatanga nnei bha, nngabha bhashilambo bha ku Galilaya? 8 Igala itendile bhuli, pakuti tunakwaapilikananga bhalibheleketanga kwa luga yetu twaashaayene? 9 Tubhana tu Bhapati, na Bhamede, na Bhaelamia, na bhananji bhashilambo bha ku Meshopotamia, na ku Yudea, na ku Kapadokia, na ku Ponto, na ku Ashia.

10 Ku Piliglia, na ku Pampilia, na ku Mishili, na mmbali ja ku Libhiya tome na ku Kilene, ashaajetunji bhananji Bhaloma.

11 Bhaalabhu na bhandunji bhajnjilengene dini ja Shiyaudi, bhana bhakoposhelenje ku Kileté na ku Alabbia. Tubhowe tunaapilikana bhalibheleketanga kwa luga yetu indu ikulungwa ya a Nnunu." 12 Bhowe gubhakanganigwenje na tenguka akuno bhalibhuyananga, "Yenei malombololelo gakwe nndi?"

13 Ikabheje bhananji gubhatendilenje mbenji bhalinkutinji, "Bhashikolelwanga!" 14 Ikabheje a Petili gubhajimi pamo na likumi limo na jumo bhala, gubhatandwibhe kwaalugulilanga bhandunji kwa lilobhe lya utiya bhalinkuti, "Ashaapwanga, bha ku Yudea na mmowe nkutamangananga pa Yelushalemu pano, mpilikanishayanje ukoto malobhe gangu. 15 Abha bhandunjibha bhangakolelwanga malinga shinkuganishiyanga, pabha nnaino shaa tatu ja lyamba. 16 Ikabheje genega ni gubhabhelekete ankulondola bha a Nnunu a Yoweli gala, 17 'Shiibhe ku mobha ga kumpelo, a Nnunu bhakuti, ngupinga kwaagumbayanga bhandu bhowe Mbumu jwangu. Ashibhana bhenunji bhanabhalume na bhanabhakongwe shibhalondolanje, bhangwendo bhenunji shibhalanguyanje ilangulo, na bhanangulungwa bhenunji

shibhaagamilanje. **18** Elo, gene mobhago bhatumishi bhangu bhanabhalume na bhanabhakongwe, shinaagumbayanje Mbumu jwangu, nabhalabhonji shibhalondolanje. **19** Shindende ilapo kunani kunnungu, na ilangulo pa shilambolyo, shikubhe na minyai na moto na lyoi, **20** Lyubha shilitendebhushe nibha lubhindu, na mwei upinga shejela mbuti minyai, likanabhe ishila lyubha likulu lya ukonjelo lya Bhakulungwa. **21** Penepo, shaajuje kwa lina lya Bhakulungwa, shaatapulwe.' **22** "Mmashilambo bha pa Ishilaeli, mpilikananje agano malobhe gano! A Yesu Bhanashaleti bhashinkukong'ondelwa kunngwenunji kwa itendi ya ilapo, na ilangulo ibhatendaga a Nnungu kwa nkono gwabho, malinga shimmumanyinji. **23** Kutolelela na shibhapanjile bayene a Nnungu na bhamumanyi kuti, mmanganya shimwaakamulanje na kwaabhlaga kwa kwaaleshelanga bhandunji bhangali bha mmbone bhaakomelanje munshalabha. **24** Ikabheje a Nnungu gubhaayushiye, gubhatapwilwe kumboteko ya shiwo pabha ikanatendeshe shiwo shaakamule. **25** Pabha a Daudi bhabhelekete ga ngani jabho kuti, 'Naabhonaga Bhakulungwa mmujo jangu mobha gowe, pabha kubhali kunkono gwangu gwa nnilo, bhai ngatenganyika. **26** Kwa nneyo, ntima gwangu gwashinkwiinonyela, na kabhili nashinkululuta nkwiinonyela. Namwene shindame nngulupai, **27** Pabha nkaileka mbumu yangu ijende kundamo ja bhawilenje, wala nkanneka jwa Ukonjelo jwenu abhole. (**Hadēs g86**) **28** Nshinangula mipanda ja gumi, bhai shiniinonyele pabha mpali.' **29** "Ashaalongo ajangu, ngunapinga nimmalanjilanje gwangali nng'iyo gaapatile anakulubhetu a Daudi. Bhalabho bhawile na gubhashishilwe, na kabhili likabhuli lyabho launo pulili panngwetu pepano. **30** Ikabheje, a Daudi pubhaliji ankulondola bha a Nnungu,

bhamumanyi kuti a Nnungu bhaabhalanjile kwa lumbila kuti shibhannjimishe jumo nnubheleko lwabho kubha nkulungwa pandamo jabho. **31** A Daudi bhagabhweni gubhapinga tenda a Nnungu, kwa nneyo gubhabhelekete ga yuka kwa a Kilishitu bhalinkuti, ‘Bhangalekwa kundamo ja bhawilenje na wala maiti gabho gangabholo.’ (**Hadēs g86**) **32** A Nnungu bhashinkwayuya a Yesu na uwe ni tubhakong’ondela bha genego. **33** A Yesu bhakakweyweje na bhikwa kunkono nnilo gwa a Nnungu, gubhapegwilwe Mbamu jwa Ukonjelo jubhalajile jula, na nnaino bhatugumbeye shene shinkushibhonanga na kushipilikana shino. **34** Pabha a Daudi bhayene bhangakwela kwenda kunani kunnungu, nigubhashite nnei, ‘Bhakulungwa bhaalugulile Bhakulungwa bhangu, Ntame kunkono nnilo gwangu, **35** Mpaka pushinaabhikanje ashaamagongo ajenu pa libhatila makongono genu.’ **36** “Kwa nneyo, bhandu bhowe bha pa Ishilaeli bhanapinjikwanga bhamumanyanje kuti a Yesu bhumwaakomelenje munshalabha bhala, a Nnungu bhashikwaatenda kubha Bhakulungwa na a Kilishitu.” **37** Bhandu bhakapilinanjeje genego, guyapotekenje mmitima jabhonji, gubaabhushiyenje a Petili na mitume bhananji bhala. “Ashaalongo ajetu, igala tutende bhuli?” **38** A Petili gubhajangwile, “Kila mundu aipete na abhatishwe kwa lina lya a Yesu Kilishitu, malombolelo gakwe mundu aagwilwe na a Nnungu, nkupinga nneshelelwanje ilebho yenunji na shimposhelanje upo Mbamu jwa Ukonjelo alajilwe jula. **39** Pabha malagano gala pugaaliji kwa ligongo lyenu mmanganya na ashibhana bhenu, na bhowe bhaatamangana kutashe na kwa kila mundu shashemwe na Bhakulungwa a Nnungu bhetu.” **40** Na kwa malobhe gana gamagwinji,

a Petili bhakwaaleyangaga na kwaashondelesheyanga bhandunji bhalinkuti, "Mwiitapulanje na lubheleko Iwangali lwambonelu." **41** Bhabhagwinji gubhakulupaliljenje malobhe gabho, nigubhabhatishwenje. Na lyene lyubhalyo bhandunji kuishila elupu tatu gubhajenjesheshenje nnikundi mula. **42** Bhene bhowebho gubhapundilenje kujiganywa na mitume, akuno bhalitamangana shiulongo na lyanganga shalya pamo na juga Nnungu. **43** Mitume bhashinkutendanga ilapo na ilangulo yaigwinji, mpaka kila mundu shijogopele. **44** Bhaakulupalila bhowe gubhapundilenje kubha shindu shimo, akuno bhalikundikanilananga indu yabhonji. **45** Bhatendaga ushanga indu yabhonji nigabhana ela kila mundu nipegwa malinga shiyapinjikwaga. **46** Gubhapundilenje kuimana kila lyubha Nliekalu. Bhatendaga imana mmajumba gabhonji nilyanganga shalya nyumba na nyumba kwa mitima ja kwiitimalika. **47** Bhatendaga kwaakuyanga a Nnungu na pingwanga na bhandu bhowe. Kila lyubha Bhakulungwa bhatendaga jenjesheya bhandu bhatapulwangaga.

3 Lyubha limo, shaa tisha ja ligulo, malanga ga juga Nnungu, a Petili na a Yowana bhatendaga kwendangana ku Likanisha. **2** Gene mobhago bhandunji bhatendaga kunnjigalanga mundu jumo aaliji nangwabha shibhelekwele. Kila lyubha bhatendaga kummikanga nangwabha jula pa nnango gwa Likanisha ushemwa "Nnango Gwakonja," nkupinga ajuje shoshowe kubhandu bhajinjilangaga Nliekalu. **3** Akaabhonanjeje a Petili na a Yowana bhalijinjilanga Nliekalu, gwabhajujilenje bhannjangutilanje shindu shoshowe. **4** A Petili na a Yowana gubhannolilenje ku meyo, a Petili gubhashite, "Tulole oti uwe." **5** Na jwalakwe gwabhalolilenje alilolela kujangutilwa shindu. **6** Ikabheje a

Petili gubhammalanjile, "Nangali ela wala shaabhu, ikabheje shingwete nne, shinukupe. Kwa mashili ga lina lya a Yesu Kilishitu Bhanashaleti, jima ujendejende!" **7** Gubhankamwile nkono gwa kunnilo, gubhannjinwile. Popo pepo makongono na ikuuku ikukolaga mashili. **8** Shangupe gwajimi, gwatandwibhe kujendajenda. Gwalongene nabhonji kujinjila ku Likanisha aliumbaumba na kwaakuya a Nnungu. **9** Bhandunji bhowe bhapalinji pepala gubhammweninji alijimajima alikwaakuya a Nnungu. **10** Bhakammanyanjeje kuti jweneju atamaga na juga pa Nnango Gwakonja, gwa Likanisha, gubhakanganigwenje kwa kaje, bhanagamanyanje gampatile. **11** Bhandunji bhowe, bhalibhakanganigwenje, gubhatandubhenje kubhutushila kulukumbi lwashemwaga, "Lukumbi Iwa a Shelemani," pabha kweneko ni kwaliji mundu aliji nangwabha jula ali alongene na a Petili na a Yowana. **12** Bhai, a Petili bhakaabhonanjeje bhandunji bhala gubhaaluguliljenje, "Mmanganya mma Ishilaeli, kwa nndi nnakanganigwanga na genega? Pakuti nnakutukolondosheyanga meyo mbuti kwa mashili getu eu kwa uguja gwestu tuntendile akombole kujendajenda? **13** A Nnungu bha ashainabhetu a Bhulaimu na a Ishaka na a Yakobho, bhashikwaakuya bhatumishi bhabho a Yesu. Bhene bhumwaakanilenje na kwaakamuya kwa a Pilato bhabhulagwe, nkali a Pilato bhaamulishe kuti bhaleshelelwe. **14** Ikabheje mmanganyanjeji mwashinkwaakananga bhaaliji bha Ukonjelo na bhanguja, nipinga agopolwe mundu junna aaliji mmulaga bhandu. **15** Bhai, gumwaabhulegenje bhene bhalibhali shiumilo sha gumi bhala. Ikabheje a Nnungu bhakwayuyaga, na uwe ni tubhakong'ondela bha genega pugatendeshe. **16** Ngulupai jetu na mashili ga lina lya a Yesu gashinkumpa mashili na kunnamyiya aju mundu junkummonanga

na kummany, malinga mmowe shinkuti kummonangashi.

17 "Lelo ashaalongo ajangu, mmumanyinji kuti mmanganya na bhanangulungwa bhenunji mwashinkutendanga nneyo pabha nkamumanyangaga. 18 Ikabheje genega gamalile, gubhalunguyaga a Nnunu kwa malobhe ga ashinkulondola bhabho bhowe, kuti inapnjikwa a Kilishitu bhabho bhapotekwe.

19 Bhai, mwipetanje, mwabhuilanje a Nnunu bhanneshelanje ilebho yenunji, 20 ntendanje nneyo, Bhakulungwa bhampanganje kuangalala mmitima jenunji na bhampeleshelanje a Kilishitu bhubhaagwile bhayene yani a Yesu. 21 Ishipnjikwa bhenebho bhaigale kunnungu peko mpaka gaishile mobha ga alaya ukoto indu yowe, malinga shibhashite lugula a Nnunu kwa malobhe ga ashinkulondola bhabho bha Ukonjelo kuumila bhukala. (aiōn
g165) 22 Pabha a Musha bhaashite, 'Bhakulungwa a Nnunu bhenunji shibhampeleshelanje nkulondola jwabho jwa malinga nne kukoposhela munkumbi gwenunji, mumpilikanishiyanje jwenejo kwa yowe yashammalanjilanje. 23 Na jojowe shakane kumpilikanishiya jwene nkulondola jwa a Nnunujo, shabbingwe na bhandunji bha a Nnunu na bhulagwa.' 24 "Ashinkulondola bha a Nnunu bhowe, tandubhila a Shamweli na bhowe bhaakagulenje, bhatendaga lunguyanga ngani ja indu itendeka nnainoi. 25 Gene malagano gubhatendile a Nnunu kwa malobhe ga ashinkulondola bhabho gala ni genunji mmanganya, nninginji mmalagano gubhatendile a Nnunu na ashi nakulubhenunji, malinga shibhaabhalanjile a Bhulaimu, 'Nnubheleko Iwenu, bhandunji bhowe bha pashilambolyo shibhapokanje.' 26 Bhai, a Nnunu bhashikwaakuya bhatumishi bhabho a Yesu, nkupinga mmanganya ntandubhanje kupwaika, pabha bhashinkwatum

kwenu mmanganya oti, bhampeleshelanje mboka kwa kuntenda
ali jowe munkumbi gwenunji aleshe ilebho."

4 A Petili na a Yowana bhalinginji nkwaalungushiyanga bhandunji, gubhaikengenenje bhakulungwanji bha bhaabhisila na bhakulungwanji bha ulinda gwa liekalu na ashi Mashadukayo.

2 Ashi Mashadukayo na bha kulungwanji bha ulinda gubhaatumbalilene kwa kaje a Petili na a Yowana, pabha bhatendanga kwajiganyanga na kwaalungushiyanga bhandunji ga yuka kwa a Yesu ngani jitaya kuti kupali kuyuka kwa bhawilenje.

3 Bhai, gubhaakamulenje na pabha yaliji tome na pilila, gubhaabhisilenje muulinda mpaka pa malabhi gakwe. **4** Ikabheje bhabhagwinji bhapilikenenje jene nganijo gubhakulupalienje, bhaakulupalila bhanabhalume gubaishilenje tome na ishila elupu nng'ano. **5** Pa malabhi gakwe, ashikalongolele bha Shiyaudi, na bhanangulungwa na bhaajiganya bha malajilo ga a Musha gubhapegwilwe na a Nnungu, gubhaimenenje ku Yelushalemu.

6 Gubhaimenenje pamo na bhakulungwa bha bhaabhisila a Anashi, na a Kayapa, na a Yowana, na a Alekishanda, na bhananji bhalinginji bha ulongo bha bhakulungwa bha bhaabhisila. **7** Bhakaajimikanjeje bhantenga bhala mmujo jabhonji, gubhaabhushienje, "Mmanganya nshitendanga yenei kwa mashili gakeni na antumilenje gani?" **8** Penepo, a Petili bhalibhagumbelwe na Mbumu jwa Ukonjelo, gubhaalugulilene, "Mmanganya ashikalongolele na bhanangulungwa bha pa Ishilaeli! **9** Ibhaga lelo tubhuywanga ga shitendi sha mmbone shatendelwe mundu aaliji nangwabha jula shashite lamiywa, **10** bhai, mmanganya na bhandu bhowe bha pa Ishilaeli nnapinjikwanga mmumanyanje kuti, aju munduju akunnjimilanga lelo ali alamile kwa mashili ga lina lya a Yesu Kilishitu

Bhanashaleti bhumwaakomelenje munshalabha bhala, ikabheje
a Nnungu gubhaayushiye. **11** Bhenebha ni bhatashiywe
Mmajandiko ga Ukonjelo kuti. ‘Liganga limwalikanilenje
mmanganya mmashenganga, nnaino lishibha liganga likulu
lya pandumba.’ **12** Ntapulo ukaapatikana kuka mundu juna
jojowe, pabha pashilambolyo, twangapegwa lina lika mundu
juna lya kututapula.” **13** Bhanangulungwa bha lukumbi bhala,
akuno bhali bhamumanyinji kuti a Petili na a Yowana bhandupe
bhangashomanga, gubhakanganigwenje ga kwaabhonanga
bhalibheleketanga gwangali bhoga. Gubhamumanyinji kuti
pubhalinginji pamo na a Yesu. **14** Ikabheje bhakammonanjeje
mundu alamiywe jula ajimi nabhonji, bhangabheleketanga shindu.
15 Kwa nneyo, gubhaamulishenje bhakopokanje nnukumbi
mula, gubhalepekenje ashaayenenji bhalikungulukanga. **16**
Gubhabhuyenenje, “Twaatendanje nndi bhene bhandunjibha?
Pabha kila mundu atama pa Yelushalemu pano amumanyi kuti
shishitendeka shilapo na uwe tukakombola kutauka shenesho. **17**
Ikabheje nkupinga kuibhila shene shindushi shinapunde kushuma
kubhandu, twaaleyanye bhanakungulukanje na mundu jojowe
ga lina lya a Yesu.” **18** Kwa nneyo gubhaashemilenje kabhili
nkati, gubhaalimbiyenje bhanakungulukanje pa lugwinjili na wala
bhanaajiganyanje bhandu ga mashili ga a Yesu. **19** Ikabheje
a Petili na a Yowana gubhaajangwilenje. “Nng’ukumulanje
mwaashayenenji, shammbone shei, kumpilikanishiyanga
mmanganya eu kwaapilikanishiya a Nnungu? **20** Pabha uwe
tukaleka bheleketa ga ituibhweni na ituipilikene.” **21** Bhai
bhanangulungwa bha lukumbi bhala gubhaakalipilenje kwa
kaje, kungai gubhaalesheelenje. Bhangaaukumulanga pabha
bhandunji bhowe bhatendaga kwaakuyanga a Nnungu kwa

ligongo lya gakoposhele gala. **22** Mundu alamiywe jula paaliji jwa yaka ya punda makumi nsheshe. **23** A Petili na a Yowana shangupe bhakaleshelewanjeje, gubhapitengenenje kwa bhaakulupalila ajabhonji, gubhaatalashiyenje yowe ibhabhalanjilwenje na bhakulungwanji bha bhaabhisila na bhanangulungwa. **24** Bhalabhonji bhakapilikananjeje genego, gubhatemingenenje pamo nikwaajuga a Nnungu bhalinkutinji, "Mmakulungwa, mmwe mpengenyе shilambolyo na bhaali na yowe ili nkati jakwe! **25** Mmwe mwaatendile bhatumishi bhenu, ainabhetu a Daudi, bhabhelekete kwa mashili gaka Mbamu jwa Ukonjelo kuti, 'Kwa nndi bhailambo ina bhashishimwanga? Pakuti bhandunji bhanaatendanga lukumbi? **26** Bhapalume bha shilambolyo bhashikwishimilikanga, na bhatawala bhashiimana pamo nkwaakana Bhakulungwa na a Kilishitu bhabho.' **27** "Pabha, kweli a Elode na a Pontio Pilato na bhandunji bha pa Ishilaeli na bhandunji bha ilambo ina bhaimenenje pannjini pano, nkwaakana a Yeshu Bhatumishi bhenu bha Ukonjelo bhumwaagwile. **28** Elo, bhashinkuimananga nkupinga bhatendanje gene gumwatumbilile na panga bhukalago kwa mashili genu mmayene malinga shimwapinjile. **29** Ikabheje nnaino, Mmakulungwa nnole shibhakuti kutujogoyanga. Ntushimilishe tulunguye lilobhe lyenu gwangali jogopa. **30** Nngoloye nkono gwenu mwaalamyanje bhandu. Ntende ilangulo na ilapo kwa mashili ga lina lya a Yeshu Bhatumishi bhenu bha Ukonjelo." **31** Bhakamaliyanjeje kujuga Nnungu, pene pubhai menenje pala pakutenganywaga, na bhowenji gubhagumbelwenje na Mbamu jwa Ukonjelo. Bhowe gubhapundilenje kulunguya lilobhe lya a Nnungu gwangali jogopa. **32** Nkumbi gowe gwa bhaakulupalila pugwaaliji na ntima gumo na ng'anjyo yabhonji imope. Jwakwapi akwetele

shindu shakwe, ikabheje bhatendaga gabbana indu yowe ibhakwetenje. **33** Mitume bhatendaga kong'ondelanga kwa mashili kuyuka kwa Bhakulungwa a Yesu, na a Nnunu gubhaapelenje mboka yaigwinji. **34** Akapagwaga wala mundu jumo atubhilwaga na shindu, pabha bhakwetenje migunda eu nyumba bhatendaga ushanga **35** nikwaakamuyanga mitume ela ila, nigabhanya kwa kila mundu malinga shapingaga. **36** Bhashinkupagwa Bhalawi bhamo, bha ku Kipulo, lina lyabho a Yoshepu, mitume pubhaashemangaga a Bhanabha, malombolelo gakwe "Mundu ataga ntima". **37** Na bhalabho bhashinkukola nngunda, gubhaushiye, gubhatolile ela ila gubhapite kamuya kwa ashimitume.

5 Ikabheje bhandu bhamo bhashemwaga a Anania na akongobhabho a Shapila nnepeila gubhaushilenje nngunda gwabbonji. **2** Ikabheje, akuno bhaakongwe bhali bhamumanyi, Anania gubhaishiye ela ina na ina gubhapite kamuya kwa ashimitume. **3** Bhai, a Petili gubhaabhushiye, "A Anania kwa nndi nshikunda Lishetani ampuganye ntima gwenu, kumuntembe Mbamu jwa Ukonjelo kwa iya ela ina impatile kwa usha nngunda gula? **4** Nkanabhe usha nngunda gula pugwaaliji gwenu, na nkausheje elayo puyaaliji yenu ya tendela shinkupinga. Igala kwa nndi mwashinkukanishiya muntima gwenu kutenda nnei? Bhai mwangantemba mundu, ikabhe bhumwatembile a Nnunu!" **5** A Anania bhakapilikaneje genego, gubhagwile pai gubhawile. Bhandunji bhowe bhakapilikakananje ga jene nganijo gubhajogopenje kwa kaje. **6** Bhashanda gubhaikengenenje, niunishila maiti gala na gubhakopoyenje palanga, gubhapite kwaashikanga. **7** Gakapiteje malanga ga mashaa gatatu, bhaakongwe akuno bhakakugamanya

gakoposhele, gubhajinjile nnyumba mubhalinginji asha Petili mula. **8** A Petili gubhaabhalanjile, “Mmalanjile! Bhuli, aino ela ino ni yowe impatilenje kwa usha nngunda gula?” A Shapila gubhaajangwile, “Elo, ni yenei.” **9** A Petili gubhaabhalanjile, “Igala nnndi mmanganya kulagana kunninga Mbumu jwa Bhakulungwa? Nnole! Bhandunji bhapite kwashikanga ambuje bhenu, nnaino pubhalinginji pannangopo, shibhankopoyanje na mmwe palanga.” **10** Shangupe a Shapila gubhagwile pa makongono ga a Petili, gubhawile. Bhashanda bhala bhakajinjilanjeje gubhaaimenenje a Shapila bhawile, kwa nneyo gubhaakopoyenje palanga, gubhapite kwashikanga tome na ambuje bhabho. **11** Gubhakwetenje lipamba bhandunji bhowe bha a Nnunu na bhowe bhapilikenenje jene nganijo. **12** Mitume bhatendaga tendanga ilapo yaigwinji kubhandu. Bhakwaakulupalilanga a Yesu bhatendaga imananga pa lukumbi Iwa a Shelemani. **13** Mundu jojowe akaliji munkumbi gwabhonji akalingaga kwiilunda. Nkali nneyo, bhandunji bhana bhatendaga kwaalumbililanga. **14** Nkali nneyo bhandunji bhaakulupalilangaga Bhakulungwa gubhapundilenje kujenjesheka bhanabhalume na bhanabhakongwe. **15** Numbe bhandunji bhatendaga kwaapelekanga bhalwelenji mumpanda njindo bhaagonekenje muinanda bhana mmakai, nkupinga pushibhapatangane asha Petili kapela shiwilisho shaishilanje. **16** Bhandunji bhabhagwinji gubhaikengenenje kukopoka ilambo ipikene na ku Yelushalemu, bhalikwaajianabhonji bhalwelenji na bhaashikilwanga maoka na bhowe gubhalamiywenje. **17** Kungai, bhakulungwa bha bhaabhisila na bhandu bhabho bhalingiji munkumbi gwa Mashadukayo, gubhaabphonelenje lupimililo ashimitume bhala. **18** Bhai, gubhaakamwilenje mitume bhala, gubhaugalilenje nnigelesha. **19** Ikabheje shilo malaika jwa

kunnungu gwaugwile milango ja ligolesha, akwaakopoyangaga palanga gwabhabhalanjilenje, **20** “Nnjendangane ku Likanisha nkaalugulilanje bhandunji malobhe gowe ga gumi gwa ambigu.” **21** Mitume gubhakundilenje, lyambape gubhapitengene ku Likanisha, gubhatandubhenje kujiganya. Bhakulungwa bha bhaabhisila na ajabhonji bhakaikanganeje, gubhashemilenje shitamo sha lukumbi lukulu na nkumbi gowe gwa bhanangulungwa bha Shiyaudi, gubhatumilenje bhandunji kuligelesha bhakaatolanje bhantenga bhala. **22** Ikabheje bhalinda bhakaikanjeje kwekula bhangaaimananga nnigelesha mula. Gubhabhujilenje, kulugula kulukumbi kula kuti, **23** “Putuliiimene ligelesha liugelwe ukoto na bhalinda bhajimingenenje mmilango. Ikabheje tukauguleje twangang’imana mundu jojowe nkati mula.” **24** Bhakulungwa bha bhalinda bha Likanisha na bhakulungwanji bha bhaabhisila bhakapilikananjeje genego gubhakwetenje lipamba, gangashimanya shaapatilenje. **25** Gwaishe mundu jumo, gwabhaluguliljenje, “Bhandunji bhumwaugalilenje nnigelesha bhala, nnaino mubhalinginji Nliekalu bhanakwajiganyanga bhandunji.” **26** Penepo bhakulungwa bha bhalinda bha Liekalu na bhalinda bhabho gubhapitengenenje ku Liekalu, gubhaatolilenje. Ikabheje bhangaakamulanga kwa mashili, pabha bhashinkwaaajogopanga bhandunji bhanakomwanga maganga. **27** Bhai, gubhapelekenje ku lukumbi, bhakulungwa bha bhaabhisila gubhaabhushiyenje, **28** “Twangannimbiyanga kujiganya kwa lina lya bhene bhandubha? Nnaino mmanganya nshishumiyanga majiganyo genunji pa Yelushalemu powe na nnatumbililanga kutupa mmbasho ga shiwo sha bhene bhandubha.” **29** Penepo a Petili bhalu na mitume bhananji bhala, gubhajangwile, “Tunapinjikwa kwaakunda a Nnungu kupunda

bhandunji. **30** A Nnungu bha ashainabhetu bhashikwayuya a Yesu bhumwabhulegenje mmanganyanji kwa kwaakomela munshalabha. **31** Bhenebha ni bhakweshiyewe na a Nnungu mpaka kunkono nnilo gwabho, nibha Akalongolele na Bhaatapula, bhaakomboyanje Bhaishilaeli kwiiipeta, nkupinga bhaleshelewanje ilebho yabhonji. **32** Uwe tubhaakong'ondela bha genego, pamo naka Mbumu jwa Ukonjelo jubhapegwilwenje na a Nnungu bhowe bhakwaakundanga.” **33** Bhandunji bhowe bha lukumbi lula bhakapilikananjeje genego, guyaashimilenje, gubhatumbililenje kwaabhlulaganga. **34** Ikabheje a Palishayo bhamo bhashemwaga a Gamalieli bhaliji bhaajiganya bha malajilo na bhatendaga jogopeka na bhandu bhowe, gubhajimi pa lukumbi pala, gubhajujile bhantenga bhala bhakopoywanje kashoko palanga. **35** Kungai gubhaalugululilenje bhalukumbi bhala, “Mmashilambo ajanganji mma pa Ishilaeli, mwiteiganje nkanabhe tendanga shitendi shinkupinganga kwaatendanga abha bhandunjibha! **36** Bhashinkukoposhela bhandu bhamo bhukala, lina lyabho a Teuda, bhaitembile ukulungwa, na bhandunji tome na ishila mia pasheshe gubhailundilenje na bhenebho. Ikabheje gubhabhulegwe, na bhene bhaakulupalilangaga bhala gubhapwilingenje na shikundi shila shikuwaga. **37** Na kabhili, mobha ga bhalanganya bhandu gala, bhakoposhele a Yuda bha ku Galilaya. Bhashinkukola nshemyo na bhandu gubhaakagwilenje, ikabheje na bhalabho nnepeila gubhabhulegwe na bhaakulupalila bhabho gubhapwilingenje.” **38** “Bhai nnaino ngunakummalanjilanga, bhanganyabha mwaalekenje nnaatendanje shindu shoshowe! Pabha jene nganiji ibhaga jikumbwiyye na bhandunjipe, shijiwe jiylenepe. **39** Ikabheje, ibhaga kujikopweshe kwa a Nnungu,

nkaakombolanga, pabha shiibhe mbuti nkwaataukanga a Nnungu.” **40** Bhai gubhaapilikanishiyenje malobhe gabho, gubhaashemilenje mitume bhala, gubhaakomilenje ibhoko na kwaalimbiyanga kujiganya kabhili kwa lina lya a Yesu, nigubhaaleshilenje bhajabkulangane. **41** Bhai, bhantenga gubhakopokenje palanga lukumbi, akuno ili yanonyelenje kwa kaje pabha bhashipinjikwanga tokomaywa kwa ligongo lya a Yesu. **42** Gubhapundilenje kujiganya na lunguya mobha gowe ku Likanisha na mmajumba ga bhandunji Ngani ja Mmbone ja a Yesu kuti ni a Kilishitu.

6 Nkali bhaajiganywa pubhajenjeshekangaga, gugakoposhele mainginiko ga bhaajiganywa bhabheleketanga Shigiliki na bhaajiganywa Bhaebhulania. Pabha Bhayaudi bhabheleketanga Shigiliki bhashitenga bhabhonji, bhashinkulibhalilwanga kugabhilwa indu ya mobha gowe. **2** Kwa nneyo, bhantenga likumi limo na bhabhili bhala, gubhaashemilenje bha nkumbi gwa bhaajiganywa bhowe, gubhashitenje, “Nngabha mwammbone uwe tuleshe kulunguya lilobhe lya a Nnungu ga liengo lya gabhanya indu. **3** Bhai, ashalongo ajetu, nng’agulanje bhandu shabha munkumbi gwenunji, bhandunji bhanguja, bhagumbeywenje na Mbamu jwa Ukonjelo na bhakwetenje lunda, twaakamuyanje lyene liengolyo. **4** Ikabheje uwe, shitulonjeye nkujuga Nnungu na liengo lya lunguya Lilobhe lya a Nnungu.” **5** Gene malobhego guaanonyelenje bhowe. Guabhaagwilenje a Shitepano bhandu bhakwete ngulupai na gumbalwa na Mbamu jwa Ukonjelo na a Pilipi na a Polokashi na a Nikanoli na a Timona na a Palumenashi na a Nikola bha ku Antiyokiya bhailundile na dini ja Shiyaudi. **6** Gubhaabhisihilenje mmujo ja mitume, nabhalabhonji gubhaabhisihilenje makono nikwaajujilanga Nnungu. **7** Lilobhe lya

a Nnungu gulipundile jenela, na ku Yelushalemu bhaakulupalila bha a Yesu gubhapundilenje kujenjesheka na likundi likulungwa lya bhaabhisila gubhakundilenje jene ngulupaijo.

8 A Nnungu gubhaapele a Shitepano mituka jajigwinji na mashili ga tenda ilapo yaigwinji kubhandu. **9** Ikabheje gubhakoposhelenje bandu bhananji nkupinga taukangana na a Shitepano. Bhandunji bha shinagogi jashemwaga, "Shinagogi ja bhangwana", bhakoposhelenje ku Kilene na ku Alekishandilia, bhananji ku Kilikia na ku Ashia. **10** Ikabheje gubhalepelenje kwatauka, kwa ligongo lya lunda lwabho na kwa ligongo lika Mbamu jwa Ukonjelo abhalongoyaga kubheleketa. **11** Kwa nneyo gubhaajigenyenje bhandunji bhakong'ondelanje kuti, "Tushikwaapilikana a Shitepano bhalikwaapetekuya a Musha na a Nnungu." **12** Kwa nneyo niikwiyangna nnjimwa kubhandunji na kubhanangulungwa na kubhaajiganya bha Malajilo ga a Musha. Bhai gubhaakamulenje a Shitepano nigubhaapelekenje ku lukumbi. **13** Gubhaajimikenje bhaakong'ondela bha unami bhabheleketanje kuti "Bhene bhandubha bhanapundape kupatukana pa Ukonjelo pano na Shalia ja a Musha. **14** Pabha, twaapilikene bhalibheleketa kuti, a Yesu Bhanashaleti bhapinga kupaangabhanya pepano na bhapinga tindiganya ikubho ituposhele kwa a Musha." **15** Bhowenji bhatemingenenje pa lukumbi pala gubaakolondolesheyenje meyo a Shitepano, gubhaabhwениنجي kumeyo bhalibheleketa kuti, a Bhulaimu pubhaaliji ku

7 Bhai, bhakulungwa bha bhaabhisila gubhaabhuhiye a Shitepano, "Genega ga kweli?" **2** Na bhalabho a Shitepano gubhajangwile, "Ashaapwanga na ashaatati, ngunajuga mmbilikanishiyanje! Bhakulungwa a Nnungu bhashinkwaakoposhela atati a Bhulaimu pubhaaliji ku

Meshopotamia bhakanabhe kwenda tama ku Alani. **3** A Nnungu gubhaabhanjile a Bhulaimu, ‘Nnjabhule pa shilambo shenu, mwaalekanje ashaalongo ajenunji, nnjende mmbali jishininnanguye.’ **4** Kwa nneyo, a Bhulaimu gubhaamile shilambo sha Kalidayo, gubhapite tama ku Alani. Ainabhabho bhakamaleje a Nnungu gubaashoshiye kabhili gubhaishe tama mmbali jinkutamangana jino.” **5** “A Nnungu wala bhangaapa a Bhulaimu nkali shilambo shimo kubha ulishi gwabho, ikabheje bhashinkwaalajila kuti, shibhaape shene shilambo shino shibhe shabho na ashibhana bhabho, ikabhe gene mobhago a Bhulaimu bhakakweteje mwana. **6** A Nnungu gubhaabhalanjile nnei, ‘Ashibhana bhenu shibhapelekwanje kushilambo shangali shabhonji bhakabhanganje bhatumwa na bhonelwa kwa yaka mia pa sheshe. **7** Ikabheje nne shinishiukumule shene shilambo shishaatolanje ubhandasho. Kungai shinaashoyanje shene shilambosho bhajiyangane apano kubhandindibhalilanje.’ **8** Kungai gubhaapele malagano ga jaluka kubha shilangulo shabho. Kwa nneyo a Bhulaimu gubhantajile unyago mwanagwabho Ishaka lyubha lya nane lya bhelekwa kwakwe. Na a Ishaka nneila peila gubhantajile mwanagwabho Yakobho. Na a Yakobho nabhalabho gubhaatendilenje nneyo peyo ashinakulubhetu likumi limo na bhabhili bhala.” **9** “Bhanyikala bhetu gubhammonelenje lupimililo mpwabhonji Yoshepu, kwa nneyo gubhang’ushiyenje kuubhanda ku Mishili. Ikabheje a Nnungu pubhaliji pamo naka Yoshepu, **10** a Nnungu gubhantapwile mmboteko yakwe yowe, gubhampele kubha mundu jwa mituka na lunda kwa a Palao bhakulungwa bha ku Mishili, mpaka a Palao gubhammishile kubha nkulungwa jwa Mishili na nyumba jabho.” **11** “Kungai gushikoposhele

shibhanga shilambo showe sha Mishili na ku Kanani nibha shilaje shikulungwa. Ashinakulubhetu bhakakwetenjeje shalya.

12 Bhai, a Yakobho bhakapilikaneje kuti ku Mishili shishipagwa shalya, gubhaatumilenje ashinakulubhetu ku Mishili **13** Mwanja gwa bhilli, a Yoshepu bhakwitagulilaga kwa ashaakulu bhabho na a Palao gubhaamanyinji ashaakulu bhabho a Yoshepu. **14** A Yoshepu gubhatumile ntenga kwa ainabhabho a Yakobho na ashalongo ajabho bhowe, bhajiyangane ku Mishili, pubhalinginji bhandu makumi shabha na nng'ano. **15** Kwa nneyo, a Yakobho gubhapite ku Mishili na ashinakulubhetu bhananji gubhawililenje kweneko. **16** Bhai, iilu yabthonji ikujigalwaga mpaka ku Shekemu, gwiishishilwe nnikabhuli libhaumile a Bhulaimu kubhandunji bha likabhila lya Bhaamoli. **17** "Jikaishileje miongwe ja malila malagano ga a Nnungu gubhalegene na a Bhulaimu, bhandunji bhetu ku Mishili kula gubhapundilenje kujenjesheka nibha likundi likulungwa. **18** Kungai, bhakulungwa bhamo bhakaamanyiji a Yoshepu gubhatemi muupalume ku Mishili. **19** Bhene bhakulungwabho bhashinkwaatendelanga yangali ya mmbone na kwaapotekanga ashinakulubhetu, bhalikwaamulishanga bhaalekanje palanga ashinambombe nkupinga bhawanganje. **20** A Musha pubhabhelekwe gene mobhago, Musha pabhelekwe ashinkukonja. Kwa myei jitatu gwalelilwe nnyumba ja ainagwe.

21 Bhakalepelanjeje kung'iya nnyumba gubhammishilenje palanga, abhi Palao gubhannokwete, gubhannelile mbuti mwanagwabho. **22** A Musha gubhajigenywe indu yowe ya lunda Iwa Bhamishili, nibha bhandu bha manyika nkubheleketa na mwitendi. **23** "Bhakaishileje yaka makumi nsheshe gubhatumbilile kwenda kwaalolanga ashaalongo ajabhonji bha Ishilaeli shibhakuti tendelwanga. **24** Kweneko gubhammweni

Mwishilaeli jumo alibhonelwa naka Mmishili, gubhapite kunnjangutila Mwishilaeli jula nkumpindikulila yatendelwe ila, gubhammuleje Mmishili jula. **25** Bhaliganishiya kuti Bhaishilaeli ajabhonji shibhamumanyanje kuti a Nnungu bhanakwaatuma kubhaagombolanje, ikabheje bhangamumanyanga. **26** Malabhi gakwe, gubaabhwениنجি Bhaishilaeli bhabhili bhalikomananga, gubhalinjile kwaatapulanyanga bhalinkuti, ‘Mmanganya mmaulongo, kwa ndi nnabhonelana?’ **27** Ammonelaga mwine jula gwabhanokolele a Musha kunyenje alinkuti, ‘Gani ammishile mmwe kubha bhaukumula bhetu? **28** Bhuli, nkupinga mulaga malinga shimummuleje liyo Mmishili jula?’ **29** “A Musha bhakapilikaneje gene malobhego gubhabhutwishe, gubhapite tama ujeni kushilambo sha Midiani, kweneko gubhakwete bhana bhabhili bhanabhalume. **30** “Ikapiteje yaka makumi nsheshe, malaika jwa Bhakulungwa gwabhakoposhele a Musha pashitekete shakolelaga moto kuanga tome na Shitumbi sha Shinai. **31** A Musha gubhakanganigwe kwa kaje bhakagabhoneje genego, bhakaegengeleje nkupinga bhalolesheyeye, gubhapilikene lilobhe lya Bhakulungwa. **32** ‘Nne a Nnungu bha ashinakulubhenu, a Nnungu bha a Bhulaimu na a Ishaka na a Yakobho!’ A Musha gubhajogwepe niungumila na wala bhangalinga kulolesheya kabhili. **33** Bhakulungwa gubaabhalanjile. ‘Nng’ule ilatu yenu pabha punnjimi pano pa ukonjelo. **34** Gubhaalugulile, nikubhweni kubhonelwa kwa bhandu bhangu ku Mishili kula. Mbilikene shililo shabhonji, njituluka kukwaatapulanga. Bhai lelo, ngunakuntuma nnjende ku Mishili.’ **35** “A Musha pebho bhakanilwe na Bhaishilaeli bhalinkutinji, ‘Gani ammishile mmwe kubha mmakulungwa bhetu bha kutuukumula?’ Ni bhobho abhakoposhele malaika jwa kunnungu pashitekete shakolelaga

moto, a Nnungu gubhaatumile a Musha kubha akalongolele na bhaukumula. **36** “Bhenebho ni bhaashoshiyenje bhandunji ku Mishili kula kwa ilapo nshilambo sha Mishili na pa bhaali ja Shamu na nng'anga, kwa yaka makumi nsheshe. **37** A Musha ni bhaalugulilenje Bhaishilaeli. ‘Bhakulungwa a Nnungu bhenunji, shibhanng'agulilanje nkulondola jwabho jwa malinga nne kukopoka munkumbi gwa ashaalongo ajenunji, mumpilikanishiyanje jwenejo.’ **38** A Musha pubhaaliji na bhandu bha a Nnungu kuanga naka malaika jwa kunnungu abhelekete nabho kushitumbi sha Shinai jula na ashainabhetu. Bhalabho ni bhapegwilwe malobhe ga taga gumi bhatulungushiye uwe. **39** “Ikabheje ashinakulubhetu gubhakanilenje kwaapilikanila, nikwanokolelanga kunyenje mmitima jabhonji bhalilokolilanga kubhuja ku Mishili. **40** Gubaabhalanjilenje a Aluni. ‘Ntualashiye ashinnungu bha yanamu bhatulongoleyane mumpanda, pabha a Musha bhatulongolele kukopoka ku Mishili tukakwiimanya yaakoposhele!’ **41** “Penepo gubhaialashiyenje shanamu sha litumbwe lya ng'ombe, gubhatandubhenje kushibhishila mbepei akuno bhalikushiangularilanga shindu shaalaya ashaayene kwa makono gabhonji. **42** Ikabheje a Nnungu gubhaaleshilenje, nkupinga bhaitindibhalilanje indu ya kunani kuliunnde, malinga shiyajandikwe nshitabhu sha ashinkulondola bha a Nnungu, ‘Mmanganya mmandu bha pa Ishilaeli! Mwambelenje indu na mbepei, kwa yaka makumi nsheshe kuanga kula? **43** Mmanganya gunnjigelenje liema lika nnungu Moleki, na shanamu sha lutondwa luka nnungu jwenunji Lepani. Igobhi imwaieleyenje nkupinga mwitiindibhalilanje. Kwa nneyo, shinimpelekanje kuuhanda kwaataliya kupunda ku Bhabhuloni!” **44** “Kuanga kula ashinakulubhetu bhakwetenje liema lya kong'ondela ndamo ja a

Nnungu. Lyashinkualaywa na a Musha malinga shibhalugulilwe na languywa na a Nnungu. **45** Kungai ashinakulubhetu bhatendaga poshelananga liema lila mpaka mobha ga a Yoshua, pubhatolilenje shilambo, ashaayene shilambo bhakabbingwanjeje na a Nnungu. Penepo gulitemi mpaka mobha ga a Daudi. **46** A Daudi gubhatendelwe mituka na a Nnungu, gubhaajujile bhenebho bhaashenjele ndamo a Nnungu bha a Yakobho. **47** Ikabheje a Shelemani ni bhaashenjele nyumba a Nnungu. **48** "Nkali nneyo Bhakulungwa a Nnungu bhakaatama nnyumba ja shenga mundu, malinga shibhaabheleketa ankulondola bha a Nnungu, **49** Bhakulungwa bhakuti, 'Kunnungu ni shitengu shangu sha upalume, na pa shilambolyo ni pa bhishila makongono gangu. Shinnjenjelanje nyumba ja shanabhuli? Kushindame pumulila kwei? **50** Indu yowei ng'eleye nne.' **51** "Mmanganya bha mbwinya! Mitima na makutu genunji gakakwakunda a Nnungu! Punninginji malinga ashinakulubhenunji. Mobha gowe nnakuntaukanga Mbumu jwa Ukonjelo. **52** Bhuli, apali nkulondola jojowe jwa a Nnungu ashinakulubhenunji jubhangga mpotekenga? Bhashinkwaabhlaganga bhalondolenje kwiya kwa Bhakwete Unguja, mmanganya gumwaakanilenje nikwaabhlaga. **53** Mmanganya mwaposhelenje shalia jimwapegwilwenje naka malaika jwa kunnungu, ikabheje mwangakundanga." **54** Bhanangulungwa bha lukumbi bhakapilikananjeje genega, gujaapotekenje mitima, bhalikwiilumanga meno kwa shimwa. **55** Ikabheje a Shitepano akuno bhali bhagumbelwe naka Mbumu jwa Ukonjelo, gubhalolile kunani, gubhagubhweni Ukonjelo Gwa puya gwa a Nnungu na a Yesu bhajimi kunkono nnilo gwa a Nnungu. **56** Gubhashite, "Nnolanje! Ngunakukubhona kunnungu kushiunukulwa na Mwana juka Mundu ashijima

kunnilo kwa a Nnungu.” **57** Penepo, bhandunji bhowe pa lukumbi pala gubhajobhelenje akuno bhaliibhang makutu gabhonji na makono. Kungai gubhaaumbilenje kwapamo, **58** gubhaakopoyenje palanga shilambo, gubhaakomilenje maganga. Bhakong'ondelenje bhala gubhabhishilenje nngubho yabbonji muulinda guka nshanda jumo ashemwaga Shauli. **59** Gubhapundilenje kwaakoma maganga akuno a Shitepano bhalijuga Nnungu bhalinkuti, “Mmakulungwa a Yesu mposhele mbumu yangu!” **60** Gubhatindibhele, nigubhagutile kwa lilobhe likulungwa bhalinkuti. “Mmakulungwa nnaalombolanje kwa shene shilebhoshi.” Bhakabheleketeje genego gubhamalile. Na bhalabho a Shauli gubhashibhweli shitendi sha kwabhlaga a Shitepanosho, kuti sha mmbone.

8 Na bhalabho a shauli bhaapali ilikwaanonyela ga bhulagwa kwa a Shitepano. Lyene lyubhalyo bhandunji bha a Nnungu bha pa Yelushalemu gubhatandubhenje kupotekwa kwa kaje. Bhaakagula bhowe gubhapwilingenenje kwenda mwilambo ya ku Shamalia na ku Yudea, ikabhe ashimitume. **2** Bhandunji bhakwapingannga a Nnungu gubhaashishilenje a Shitepano na gubaatendelenje malilo gamakulungwa. **3** Gene mobhapego, a Shauli gubhatumbilile kwaabhlaganga bhandu bhakwaakulupalilanga a Yesu. Bhatendaga jinjila kila nyumba, nikwaakopoyanga palanga bhaakulupalila bhanabhalume na bhanabhakongwe nikwaugalilanga nnigelesha. **4** Bhaakagula bhapwilingenenje bhala gubhapitenje ako na koko bhalipita lunguyanga lilobhe lila. **5** Na a Pilipi gubhajinjile nshilambo sha Shamalia bhalipita kwalunguya a Kilishitu ku bhashilambo bha kweneko. **6** Bhandunji bhakaibhonanjeje ilapo ibhaitendaga a Pilipi, gubhapilikanishiyenje ntenga kwa ntima ndende. **7** Pabha

maoka gatendaga kwaashokangana bhandunji bhabhagwinji
akuno galijobhela. Nneila peila bhandunji bhabhagwinji
bhapolokenje ibhalo na bhaalemalanga bhatendaga lamiywanga.
8 Bhandunji bha shene shilambo shila gubhainonyelenje kwa kaje.
9 Bhai, bhashinkupagwa bhandu bhamo bhashemwaga a Shimoni
bhatenda kwiiniya kwa ikubho yabho ya shiabhi na bhandu bha
ku Shamalia bhatendaga kwaakanganigwanga. **10** Bhandunji
bhowe, bhana na bhakungulungwanji gubhaapilikanishiyenje
ukoto, gubhashitenje, "A Shimonibha bhashikola mashili ga a
Nnungu gashemwaga, 'Mashili Makulu.'" **11** Gubaakulupalilenje
kwa kaje, pabha kwa mobha gamagwinji bhatendaga tenda
ilapo kwa uabhi gwabho. **12** Ikabheje bhakakulupalilanjeje
ntenga gwa a Pilipi gwa Ngani ja Mmbone ja Ukulungwa gwa
a Nnungu na lina lya a Yeshu Kilishitu, gubhabhatishwenje,
bhanabhakongwe na bhanabhalume. **13** Nkali a Shimoni
gubhakulupalile, bhakabhatishweje gubhatendile shilongani
na a Pilipi, gubhakanganigwe ga ilapo yaatendekaga. **14**
Mitume bhalinginji ku Yelushalemu bhakapilikananjeje kuti
Bhashamalia na bhalabhonji bhaliposhelenje lilobhe lya a
Nnungu, gubaatumilenje kweneko a Petili na a Yowana.
15 Bhakaikanganjeje gubhaajujilenje a Nnungu nkupinga
bhaakulupalila bhamposhelanje Mbumu jwa Ukonjelo, **16**
pabha gene mobhago Mbumu jwa Ukonjelo paaliji akanabhe
kuntulushila mundu jojowe munkumbi gwabhonji, ikabheje
bhashinkubhatishwangape kwa lina lya Bhakulungwa a Yeshu.
17 Bhai, a Petili na a Yowana gubaabhisihilenje makono
bhaakulupalila bhala, gubhamposhelenje Mbumu jwa Ukonjelo.
18 Bhai, a Shimoni bhakabhoneje kuti mundu abhishilwaga
makono na mitume bhala, anaposhela Mbumu jwa Ukonjelo,

gubhapinjile kwaapanganga ela a Petili na a Yowana bhalinkuti,
19 “Mmbanganje na nne gene mashiligo, nkupinga nimmishilaga
mundu makono, amposhele Mbamu jwa Ukonjelo.” **20** Ikabheje
a Petili gubhaajangwile, “Nkaobhele ako na ela yenuyo,
punkuganishaya mashili ga a Nnungu gaumwa na ela! **21**
Mmwe mwangali shakamula kwa ali liengoli, pabha ntima
gwenu gwangali gwa mmbone kwa a Nnungu. **22** Kwa nneyo
mwiipete yangali ya mmbone yenui na mwaajuje Bhakulungwa
ipingaga, bhalabho shibhanneshelele ng'aniyo yenuyo. **23** Pabha
ngunakummona lushikungumbala lupimilo lwa kaje na punnipa
mmabbanda bha ilebho.” **24** A Shemoni gubhajangwile, “Shonde,
nnyujilanje ku Bhakulungwa linambate lyolyowe lya gene
gunnugwilenjego.” **25** A Petili na a Yowana bhakakong'ondelanjeje
na lunguya ga Ngani ja Bhakulungwa, gubhabhujilenje ku
Yelushalemu. Gwa mmabhuja gubhalunguyenje Ngani ja Mmbone
mwijiji yaigwinji ya ku Shamalia. **26** Malaika jwa Bhakulungwa
gwabhalugulile a Pilipi, “Mpanganishe nnjende mmbali ja
kwibhanda kupitila mpanda gwa anga ukopoka ku Yelushalemu
kwenda ku Gasha.” **27** Bhai a Pilipi gubhatandwibhe mwanja.
Gubhammweni mundu jumo jwa ku Eshiopia, nkulungwa jwa
shibhiko sha a Kandate malikia bha ku Eshiopia. Bhashinkwenda
ku Yelushalemu kukwatindibhalila a Nnungu na penepo
bhatendaga bhuja bhalibhakwelile mutuka ja kwakwatwa.
28 Bhalibhakwelile mutuka ja kwakwatwa.
29 Bhai, Mbamu jwa Ukonjelo gwabhabhalanjile a Pilipi, “Nnjende tome na mutuka jila
nkalongane najo.” **30** A Pilipi gubhabhutushile tome na mutuka
jila, gubhampilikene mundu jula alishoma shitabhu sha a Ishaya
ankulondola bha a Nnungu. A Pilipi gubaabhushiye, “Bhuli,

nnikwimanya inkushomayo?" **31** Bhandu bhala gubhajangwile, "Ngombole kwapi kwiimanya gwangali mundu jwa ndalashiya?" Penepo gubhaashemile a Pilipi bhakwele mmutuka mula bhatame nabho. **32** Na Majandiko ga Ukonjelo gubhashomaga pugaliji nnei, "Paliji mbuti ngondolo apelekwa kuingwa, eu mbuti mwana ngondolo atama ilili alimogwa mang'omba, jwangakopoya lilibhe lyakwe wala kashoko. **33** Ashinkutokomaywa na bhonelwa. Jwakwa shakombole kutagulila ga lubheleko lwakwe, pabha gumi gwakwe ushishoywa pashilambolyo." **34** Bhaeshiopia bhala bhakwaalugulilaga a Pilipi, "Nnugulile, jwene nkulondola jwa a Nnunju abheleketa ngani jiken? Gene gabheleketaga gakwe nnyene eu gaka mundu juna?" **35** Bhai, a Pilipi gubhatandwibhe na gene Majandiko ga Ukonjelogo, gubhaatalashiye Ngani ja Mmbone ja a Yesu. **36** Bhalinginji mmwanja, gubhaikenenje palitanda, mundu jula gwashite, "Apano gapali mashi, bhuli shipali shoshowe shang'ibhilila ngunabhatishwe?" **37** A Pilipi gubhashite, "Ibhaga nkulupalilaga kwa ntima gwenu gowe inatendeka kubhatishwa." Nabhalabho gubhajangwile, "Elo ngunakulupalila kuti a Yesu Kilishitu ni bhanabhabho a Nnunu." **38** Bhai gubhaamulishe mutuka jila jijime. Bhaeshiopia bhala na a Pilipi gubhapitengenenge mmashi mula, a Pilipi gubhaabhatishe. **39** Bhakakopokanganeje mmashi mula Mbumu jwa Bhakulungwa akwaanyakulaga a Pilipi. Bhaeshiopia bhala bhangaabhma kabhili a Pilipi, ikabheje gubhapite na mwanja gwabho bhalikwinonyela. **40** A Pilipi gubhaimushile bhali ku Ashoto, gubhapitile mwilambo yowe bhalilunguya Ngani ja Mmbone mpaka ku Kaishalia.

9 Gene mobhago a Shauli bhatendaga punda kujogoya bhalikwabhulaganga bhaajiganywa bha Bhakulungwa. Gubhapite

ku Bhakulungwa Bhaabhisila, **2** gubhajujile bhapegwe bhaluwa ja lumanvio nnyumba ya jujila Nnunu ya shiyaudi kwene ku Dameshiki, nkupinga bhaaimanangaga bhanabhalume eu bhanabhakongwe bhakagulanga Mpanda gwa a Yesu, bhaakamulanje bhajienabhonji ku Yelushalemu. **3** Ikabheje bhalu mumpanda tome na ika ku Dameshiki, shangupe shilangaya kopoka kunnungu shikwamulishilaga mmbali yowe. **4** Gubhagwile pai gubhapilikene lilobhe lilikwabhalanjila, "Shauli! Shauli! Pakuti unamboteka?" **5** A Shauli gubhabhushiye, "Mmakulungwa, mmwe agani?" Gubhajangwilwe, "Nne a Yesu nkumbotekajo. **6** Ikabheje nnaino ujime, ujende kunnjini kweneko shiubhalanjilwe shiupinjikwa kutenda." **7** Bhandunji bhalongenenje na a Shauli bhala, gubhajimingenenje illi, bhakakwetenjeje shabheleketa, lilobhe lila bhalipilikenenje ikabheje bhangamonanga abheleketaga. **8** A Shauli gubhajimi, bhakabhalakuleje meyo bhangashibhona shindu shoshowe, kwa nneyo bhandunji bhala gubaakamwilenje nkono nikwalongoya mpaka kunjini ku Dameshiki. **9** A Shauli gubhatemi mobha gatatu gwangali lola, gene mobhago bhangalya wala kung'wa shoshowe. **10** Bhai, ku Dameshiki kula ashinkupagwa nkujiganywa jumo ashemwaga a Anania. Bhakulungwa gubhammalanjile nng'agamii "a Anania!" A Ananiya gubhajitishe, "Nne apano, Mmakulungwa." **11** Bhakulungwa gubhaabhalanjile, "Nnjabhule nnjende kumpanda ushemwa Mpanda gwa Goloka mpaka kunyumba ja a Yuda nkaabhushishiye bhandu bha ku Tasho bhaashemwa a Shauli, nnaino bhanajuga Nnunu, **12** na bhalabho a Shauli ng'agamii bhashinkwaabbona bhandu bhashemwa a Anania bhalijinjila nnyumba nikwaabhisila makono nkupinga bhalole kabili." **13** Ikabheje a Anania gubhajangwile, "Mmakulungwa, njipilikana

kubhandu bhabhagwinji ngani jangali jambone ja bhene bhandubho, ga ibhaatendangaga bhandu bha Ukonjelo bhenu ku Yelushalemu. **14** Na bhashikwiya apano bhabhagegwe amuli kukopoka kubhakulungwanji bha bhaabhisila ja kwaakamulanga bhakunkulupalilanga mmwe a Yesu.” **15** Ikabheje Bhakulungwa gubhaabhalanjile, “Nnjendepe, pabha njikwaagula bhabhe bhatumishi bhangu, bhapite lunguya lina lyangu kubhandunji bha ilambo ina na kubhanangulungwa bhabhonji na ku bha Ishilaeli. **16** Nne namwene shinaalanguye shibhapinga potekwa kwa ligongo lya lina lyangu.” **17** Bhai, a Anania gubhapitejinjila nnyumbamo. Kungai gubhaabhisile makono a Shauli, gubhashite, “Apwanga a Shauli, Bhakulungwa a Yesu bhankoposhele mumpanda nnikwiya apano, bhashinduma nimmishile makono nkupinga nnole kabhili na nngumbaywe naka Mbumu jwa Ukonjelo.” **18** Shangupe indu mbuti ipande ikugwaga kukopoka mmeyo ga a Shauli, gubhalolile kabhili, gubhajimi gubhabhatishwe. **19** Bhakalyeje shalya gubhakwete mashili kabhili. A Shauli gubhatemi ku Dameshiki mobha gashoko na bhaajiganywa bhapalinji pepala. **20** Shangupe gubhatandwibhe kulunguya nnyumba ya jujila Nnunu kuti, a Yesu Bhanabhabho a Nnunu. **21** Bhandu bhowe bhaapilikenenje gubhakanganigwenje, gubhashitenje, “Bhuli, bhenebha nngabha bhaabhulegenje bhakwaakulupalilanga a Yesu ku Yelushalemu? Bhashinkwiya apano bhatumbilile kukwakamulanga bhene bhandunjibho nkupinga bhaapelekanje ku bhakulungwanji bha bhaabhisila!” **22** A Shauli gubhapundile kukola mashili na bhalikong'ondela kuti a Yesu ni a Kilishitu, Bhayaudi bha ku Dameshiki gubhakanganigwenje kwa kaje. **23** Gakapiteje mobha gamagwinji, Bhayaudi gubhaimenenje nkuloleya mwa kwabhlajila a Shauli.

24 Ikabheje a Shauli gubhapilikene malobhe gala. Bhandu bhatendaga kwaajubhililanga shilo na mui mmilango ja jinjilila nshilambomo, nkupinga bhaabkulaganje. **25** Ikabheje malanga ga shilo bhaajiganywa bhabho gubhaatolilenje, gubhaatuluyenje pai nshikapu shashikulungwa kupidila likumba lya lugwani. **26** A Shauli bhakaisheje ku Yelushalemu gubhalinjile kwilunda munkumbi gwa bhaajiganywa bhala ikabheje, bhowe gubhaajogopenje na jwakwa akulupalile kuti nabhalabho bhashibha bhaajiganywa.

27 Penepo a Bhanabha gubhaishe kukwaatola a Shauli, gubhaapeleshe kwa ashimitume na gubhatalashiye, a Shauli shibhashite kwaabhona Bhakulungwa nikunguluka nabho. Na kabhili gubhalugwile ga a Shauli kulunguya ku Dameshiki gwangali bhoga kwa lina lya a Yesu. **28** Bhai, a Shauli gubhatemi nabhonji, bhaliowa pa Yelushalemu powe pita lunguya lilobhe lya a Nnungu gwangali lipamba kwa lina lya a Yesu. **29** Na kabhili bhatendaga taukangana na Bhayaudi bhabheleketangaga Shigiliki, na gubhalinjilenje kwaabkulaga. **30** Bhaajiganywa bhala bhakapilikananjeje genego, gubhaatolilenje a Shauli, gubhaapelekenje ku Kaishalia, gubhaaleshilenje bhajende ku Tasho. **31** Gene mobhago bhandunji bha a Nnungu gubhatemingenenje kwa ulele, kutandubhila ku Yudea na ku Galilaya na ku Shamalia. Bhandunji bha a Nnungu gubhapundilenje kujenesheka akuno bhalishimilikwanga na bhalikwaajogopanga a Nnungu bhalitagwanga ntima naka Mbumu jwa Ukonjelo. **32** A Petili bhali nkujima jima kila mmbali gubhaishe kubhandunji bha ukonjelo bhatamanganaga ku Lida. **33** Kweneko gubhanng'imene mundu jumo ashewmaga a Ainea, jwenejo kwa yaka nng'ano na itatu akakombolaga kushoka pashinanda kwa ligongo lya poloka. **34** Bhai, a Petili gubhaabhalanjile, "A

Ainea, a Yesu Kilishitu bhanakunnamya. Njumushe, ntandishe shinanda shenu." Shangupe, a Ainea gubhajimi. **35** Bhashilambo bhowe bha ku Lida na ku Shaloni bhakaabhonanjeje a Ainea, gubhaatendebhushilenje Bhakulungwa. **36** Bhashinkupagwa bhaajiganywa bhamo bhakongwe ku Yapa bhashemwaga a Tabhita, kwa Shigiliki a Dolikashi, malombolelo gakwe, mbala. Bhene bhakongwebho bhatendaga tenda ya uguja na mobha gowe bhatendaga kwaajangutilanga bhaalaga. **37** Gene mobhago bhakulwalaga, gubhawile. Bhandunji gubhakundilenje maiti gabho, gubhagagonekenje kukati jaliji kugolopa. **38** Na pabha ku Yapa kwangatalikangana kaje na ku Lida, kwa nneyo bhaajiganywa bhakapilikananjeje kuti a Petili kubhali ku Lida, gubhaatumilenje bhantenga bhabhili bhakalugulanje kuti, "Shangu nnjiye kunngwetu." **39** Bhai, a Petili gubhajabhwile gubhalongene nabhonji. Bhakaisheje gubhapelekwe kugolopa mpaka kukati kula. Kweneko bhanabhakongwe bhabhagwinji bhashitenga gubhaatimbililenje a Petili bhaligutanga akuno bhalikwaalanguyanga magauni na nngubho ibhaalayaga a Dolikashi pubhaliji bhakoto. **40** A Petili gubaakopoyenje palanga bhandu bhowe, gubhatindibhele, gubhajuile Nnunu. Kungai gubhagatendebhushile maiti gala gubashite, "A Tabhita, nnjumushe." Nabhalabho gubhabhalakwile meyo na bhakaabhoneje a Petili gubhajinwishe nitama. **41** A Petili gubaakamwile nkono nikwaajinula, kungai gubaashemilenje bhandunji bha ukonjelo na bhashitenga bhala, gubaakamuyenje bhalu bhabhakoto. **42** Jene nganijo gujishumile mmbali yowe ya ku Yapa na bhandunji bhabhagwinji bhakwaakulupalilangaga Bhakulungwa. **43** A Petili gubhatemi mobha gashoko ku Yapa, ku bhandu bhamo bhabhamba mapende lina lyabho a Shimon.

10 Ku Kaishalia bhashinkupagwa bhandu bhamo bhashemwaga
a Koloneli, bhakulungwa bha manjola bha shikundi shimo
shashemwaga, "Shikundi sha Shiitalia." **2** Pubhaaliji bhandu
bhanguja, bhenebho na likaja lyabho bhatendaga kwaajogopanga
a Nnunu, bhatendaga kwaajangutilanga bhalaga bha Shiyaudi
na bhatendaga juga Nnunu mobha gowe. **3** Lyubha limo
malanga ga ligulo bhashinkummona malaika nng'agamii alikwajjila
nikwaalugulila, "A Koloneli!" **4** A Koloneli gubhankolondolesheye
meyo akuno bhalijogopa, gubhammalanjile, "Shipali nndi
Mmakulungwa?" Malaika jwa a Nnunu jula akwaabhalanjilaga,
"A Nnunu bhapilikene kujuga kwenu na mbepei yenu kubhalaga
wala bhakailibhala. **5** Bhai nnaino, mwaatumanje bhandu ku
Yapa bhakaashemanje bhandu bhamo bhaashemwa a Shimoni,
kwa lina lina, a Petili. **6** Bhenebho mubhali nnyumba ja a
Shimoni bhabhamba mapende, nyumba jabho pujili tome na
bhaali." **7** Malaika jwa a Nnunu abhelekete nabho akajabhuleje,
a Koloneli gubhaashemilenje bhatumishi bhabhili bha nnyumba
jabho naka linjola jumo aaliji mundu jwa kwaajogopa a Nnunu, **8**
gubhaalugulilenje gowe gakoposhele, gubhaatumilenje ku Yapa.
9 Malabhi gakwe, bhandunji bhatatu bhala bhalinginji mmwanja,
tome naika ku Yapa, a Petili gubhakwelile kunani kushipagala
sha nyumba mui kujuga Nnunu. **10** Gushaapoteshe shibhangga,
nilokolila kulya. Akuno shalya shilitelekwa gubhaondweshe
niagamilia. **11** Gubhabhakubhweni kunnungu kuugwishe na shindu
mbuti nkwamba gwa nkulungwa ultuluywa ukamwilwe mmapepe
gakwe ganansheshe. **12** Munkwambamo bhashinkupagwanga
bhannyama bha mikumbi jowe, bhannyama bha makongono
nsheshe na bhannyama bhaatambalanga pai na ijuni ya kunani.
13 Gubhapilikene lilobhe lilikwalugulila, "A Petili nnjinushe nng'inje,

ntaune!” **14** A Petili gubhajangwile, “Ntape, Mmakulungwa, nne nganabhe paya shindu shoshowe sha nyata eu shangali sha mmbone.” **15** Lilibhe lila likupilikanikaga kabhili lilikwaabhalanjila, “Nnaisheme ya nyata indu ibhaikonjeleye a Nnunu!” **16** Gene malobhego gakubhujilaga patatu, kungai nkwamba gula guukweshiyewe kubhuja kunani kunnungu. **17** A Petili bhalikanganiga ga malombolelo ga yene agamii ibhaibhwene ila, bhandunji bhatumilwenje na a Koloneli bhala, bhakajibhonanjeje nyumba ja a Shimoni, gubhapite jimangana pa nnango, **18** gubhabhushiyenje kwa utiya, “Bhuli, mwenemo bhapali bhajeni bhaashemwa a Shimoni Petili?” **19** A Petili bhalinkuganishiya ga agamii ila, Mbumu akwaalugulilaga, “Mpilikane! Bhashipagwanga bhandunji bhatatu bhanakunnoleyanga. **20** Shangu ntulushe na wala nnakole nnjishi kulongana nabhonji pabha naatumilenje nne.” **21** Bhai a Petili gubhaatulushilenje bhandunji bhala gubhaabhalanjilenje, “Junkunnoleyangajo ni nne. Nng’ikenje kutenda nndi?” **22** Gubhaajangwilenje, “Bhakulungwa bha manjola a Koloneli, bhandu bha ukonjelo, bhakwaajogopa a Nnunu na bhaakulupalika na bhayaudi bhowe bhashikutulajila. Bhashibhalanjilwa naka malaika kuti bhansheme nnjende kunngwabho bhapilikane malobhe gushimwaabhalanjile.” **23** A Petili bhakwaashemelangaga nnyumba, nibha ujeni gwabho shene shilosho. Malabhi gakwe, a Petili na bhandunji bhala gubhatandwibenje mwanja na bhandunji bhana bha ku Yapa gubhalongene nabhonji. **24** Lyubha lya bhili lyakwe gubhaikengenenje ku Kaishalia na kweneko a Koloneli bhalo na ashaalongo ajabhonji na ashaambwiga ajabho bhubhaashemilenje bhatendaga kwaalindililanga. **25** A Petili pubhajinjilaga nnyumba, a Koloneli gubhapite kwaposhela,

nigubhaatindibhalile mpaka pai. **26** Ikabheje a Petili gubhaajinwile, bhalikwalugulila, "Nnjime, pabha nne namundu nnjenu." **27** A Petili gubhapundile bheleketa na a Koloneli, bhakajinjileje nnyumba gubhaimenenje bhandunji bhabhagwinji. **28** A Petili gubhaabhalanjilenje, "Mmanganya mmumanyinji kuti Nnyaudi jojowe jula ashilimbiya na malajilo ga dini jakwe kukundikana eu kwaowelanga bhandunji bha ilambo ina. Ikabheje a Nnungu bhashineya ngunansheme jwa nyata. **29** Kwa lyene ligongolyo nkanjemanjeje nangabhika nnjishi kwiya. Bhai, ngunakummuyanga, shinjemelenje nndi?" **30** A Koloneli gubhashite, "Mobha gatatu gapitilego gene malanga pegano, shaa tisha ja ligulo, natendagajuga Nnungu kukati jangu. Shangupe, gunimmweni mundu anyimile mmujo jangu awete nngubho yamelemeta, **31** gwashite, 'A Koloneli! Kujuga kwenu na mbepei inkwapanganga bhalaga iposhelwe kwa a Nnungu. **32** Muntume mundu ku Yapa akaasheme bhandu bhamo bhashemwa Shimoni, kwa lina lina, a Petili, mubhali nnyumba ja a Shimoni bhabhamba mapende tome na bhaali.' **33** Shangupe nashinkutumila ntenga, na mwe nshitenda shambone kwiya. Nnaino putuli pano mmujo ja a Nnungu, tupilikanishiye shoshowe shibhantumile Bhakulungwa ntubhalanjilescho." **34** Penepo a Petili gubhatandwibhe kubheleketa, "Nnaino nimumanyi kuti a Nnungu bhangali luagu. **35** Ikabhe mundu jojowe jwa kila shilambo akwaajogopa a Nnungu nitenda ya mmbone, bhanakumposhela. **36** Gweguno ni ntenga gubhapeleshe a Nnungu kubhandu bha ku Ishilaeli, bhalilunguya ngani ja mmbone ja ulele ja a Yesu Kilishitu bhali Bhakulungwa bha bhowe. **37** Mmanganyanji nshimanyinji shikoposhele nshilambo sha Yudea, kutandubhila ku Galilaya ukapiteje ubhatisho

gubhalungwiye a Yowana. **38** Kabhili mmumanyinji ga a Nnungu shibhashite kwaagula a Yesu bha ku Nashaleti kwa kwaapa Mbumu jwa Ukonjelo na mashili. Na a Yesu bhatendaga kwenda mmbali yowe bhalitenda ya mmbone na lamya bhowe bhabhonelwangaga naka Lishetani, pabha a Nnungu pubhaaliji pamo na bhenebho." **39** "Uwe ni tubhaakong'ondela bha gowe gubhatendile nshilambo sha Bhayaudi na ku Yelushalemu. Gubhaabhulegenje kwa kwaakomela munshalabha. **40** Ikabheje lyubha lya tatu a Nnungu gubaayushiye na gubhailangwiye, **41** nngabha kubhandu bhowe, ikabhe kubhene bhaagwilwenje na a Nnungu bhabhanganje bhaakong'ondela bhabho, yani uwe twaalile na nng'wa nabho bhakayusheje kukopoka kubhawilenje. **42** Bhashikutulajila kulunguya Ngani ja Mmbone kubhandu bhowe na kukong'ondela kuti bhalabho ni bhaagwilwe na a Nnungu kubha bhaukumula bha bhakotonji na bhawilenje. **43** Ashinkulondola bhowe bha a Nnungu bhatashiyenje ga bhenebho kuti, kila mundu shabhakulupalile shaleshelelwe yambi yakwe yowe kwa lina lyabho." **44** A Petili bhakanabhe pumula kubheleketa, Mbumu jwa Ukonjelo gwabhatulushilenje bhowe bhapilikanishiyangaga gene malobhego. **45** Bhaakulupalilanga bha Shiyaudi bhalongenenje na a Petili kukopoka ku Yapa gubhakanganigwenje, pabha a Nnungu bhashikwaagumbayanga upo ya Mbumu jwa Ukonjelo bhandunji bhangabha Bhayaudi. **46** Pabha bhashinkwaapilikananga bhalibheleketanga luga inape bhalikwaakuyanga a Nnungu. Penepo a Petili gubhashite, **47** "Abha bhandunjibha bhamposhelenje Mbumu jwa Ukonjelo malinga shitumposhele uwe. Bhuli, apali jojowe shakombole kwaibhililanga bhanabhatishwanje mmashi?" **48** Bhai, gubhaamulishe bhabhatishwanje kwa lina lya a Yesu

Kilishitu. Gubhaajujilenje a Petili bhatame nabhonji mobha gashoko.

11 Bhai, mitume na bhakwaakulupalilanga a Yesu bha ku Yudea kula, gubhapilikenenje kuti bhandunji bhangabha Bhayaudi bhaliposhelenje Lilobhe lya a Nnungu. **2** Bhai, a Petili bhakabhujeje ku Yelushalemu bhaakulupalila bha Shiyaudi bhaapingangaga bhandunji bhangabha Bhayaudi bhajalukanje, gubhaagambilenje bhalinkutinji, **3** "Mmwe nshikwenda tama na nalya nabhonji bhandunji bhangajalukanga." **4** Penepo a Petili gubhaatalashiyenje kwa ntima ndende shiishite tandubhila bhalinkuti. **5** "Lyubha limo ngulijuga Nnungu ku Yapa, nashinkuagamila, gunishibhweli shindu mbuti nkwamba gwankulungwa ultuluywa kukopoka kunani kunnungu gukamwilwe mmapepe gakwe ganansheshe, nibhikwa tome na nne. **6** Gunolile nkati mula gunaabhwениnji bhannyama bha makongono nsheshe bha mukonde na bhannyama bhatambala pai na ijuni. **7** Kungai gumbilikene lilobhe lilimalanjila, 'A Petili, nnjinushe nng'inje na ntaune.'" **8** "Ikabheje nne gunjite, 'Nngabha nneyo Mmakulungwa, pabha shoshowe sha nyata shikanabhe pita nkang'wa jangu.' **9** Lilobhe lila kukopoka kunnungu likumalanjilaga gwa bhili lilinkuti, 'Indu ikonjeleywe na a Nnungu nnaisheme ya nyata.'" **10** Lyenelyo gulitendeshe patatu, kungai yowe gwiikweshiywe kubhuja kunani kunnungu. **11** "Shangupe bhandunji bhatatu kukopoka ku Kaishalia bhatumilwenje kunjema nne gubhajimingene mmujo ja nyumba jinatamaga jila. **12** Mbumu gwamalanjile ngunakole nnjishi, kulongana nabhonji. Bhandu shita bhananji gubhalongenenje na nne kwenda ku Kaishalia, kweneko gutujinjile nnyumba ja a Koloneli. **13** A Koloneli gubhatubhalanjile shibhashite kummona

malaika nnyumba jabho nikwaabhalanjila kuti, ‘Muntume mundu ajende ku Yapa akaasheme bhandu bhamo bhaashemwa a Shimoni kwa lina, lina a Petili. **14** Bhenebho shibhannugulile malobhe ga kuntapula mmwe na ashaalongo ajenunji bhowe.’ **15** “Ngatandubheje kubheleketa, Mbamu jwa Ukonjelo gwabhatulushilenje malinga shatutulushile uwe kundandubho kula. **16** Penepo gungumbushile malobhe gubhabhelekete Bhakulungwa gala kuti, ‘A Yowana bhashinkubhatisha kwa mashi, ikabheje mmanganyanji shimbhatishwanje kwa Mbamu jwa Ukonjelo.’ **17** Bhai, ibhaga a Nnunu bhaapelenje bhandunji bhangabha Bhayaudi upo malinga shibhatupele uwe, tukaakulupalileje Bhakulungwa a Yesu Kilishitu, bhuli, nne gani ngombole kutaukangana na a Nnunu?’ **18** Bhakapilikananjeje genego, gubhaleshilenje mitau jabhonji, gubaakushiyenje a Nnunu bhalinkutinji, “Kwa nneyo a Nnunu bhashikwaapanganga bhandunji bhangabha Bhayaudi shikono sha kwiipeta bhapatanje gumi.” **19** Kwa ligongo lya mboteko ibhapatile a Shitepano, bhaakulupalila gubhapwilingenenje. Bhananji gubhabitengenene ku Poinike na ku Kipulo na ku Antioquia ja ku Shilia akuno bhalipita lunguya ntenga gula ku Bhayaudipe. **20** Ikabheje bhaakulupalila bhananji bhakopokenje ku Kipulo na ku Kilene, bhashinkwendangana ku Antioquia gubhakungulukenje na bhandunji bhaabheleketanga Shigiliki bhalikwaalungushiyanga Ngani ja Mmbone ja Bhakulungwa a Yesu. **21** Mashili ga Bhakulungwa pugaaliji pamo na bhanganyabho na bhandunji bhabhagwinji gubhaakulupalilenje nikwaatendebhushila Bhakulungwa. **22** Jene nganijo jikupilikanikaga kubhandu bhakagulanga mpanda gwa a Yesu bha ku Yelushalemu. Kwa nneyo gubaatumilenje

a Bhanabha bhajende ku Antiokia. **23** Bhakaisheje kweneko na kuubhona ntuka gwa a Nnungu shushite poshelwa kubhandunji bhala guyaanonyele, gubaashondelesheyenje bhapundanje kwakulupalila Bhakulungwa. **24** A Bhanabha pubhaaliji bhandu bhanguja bhagumbelwe na Mbamu Jwa Ukonjelo na bhashinkukola ngulupai, kwa nneyo bhandu bhabhagwinji gubhajenjeshekenje ku Bhakulungwa. **25** Kungai a Bhanabha gubhapite ku Tasho kukwaloleya a Shauli. **26** Bhaakabhoneje, gubhajienabho ku Antiokia. Na bhanaabhili gubhatemingenenje na bhaakulupalilanga mpanda gwa a Yesu, kwa shaka shimo bhalikwaajiganyanga bhandunji bhabhagwinji. Na bhaakulupalila gubhatandwibhenje kushemwa Bhakilishitu ku Antiokiako. **27** Gene mobhapego, ashinkulondola bha a Nnungu gubhaikengenenje ku Antiokia kopoka ku Yelushalemu. **28** Bhai, bhamo bha munkumbi gwabhonji lina lyabho a Agabhushi gubhajimi na kwaakomboywa naka Mbamu gubhalondwele kuti, shipinga koposhela shibhangsha punda nshilambolyo. Shene shibhangasho shakoposhele mobha ga upalume gwa a Kilaudio. **29** Bhaajiganywa bhala gubhatumbilinenje kuti kila mundu mushakombolele apeleshe shoshowe sha kwajangutilanga Bhakilishitu bhaatamangananga ku Yudea. **30** Bhai, gubhatendilenje nneyo, gubaakamwiyenje a Bhanabha na a Shauli bhaapelekanje ku bhanangulungwa bha bhandunji bha a Nnungu.

12 Tome na gene mobhapego, a Elode gubhatandwibhe kwaabbonelanga bhandunji bhana bha a Nnungu. **2** A Elode gubaabhuleje kwa upanga a Yakobho, apwabho a Yowana. **3** Bhakabhoneje kuti Bhayaudi ishikwanonyelanga kwa shene shitendisho, gubaakamwile na a Petili. Genego

pugatendeshe mobha ga shikukuu sha mikate jangataga ngedule. **4** Bhakaakamuleje a Petili, gubhaaugalile nnigelesha, gubhaabhishe muulinda gwa ikundi nsheshe ya ashimanjola nsheshensheshe. A Elode pubhatumbilile bhaakopoye pa lugwinjili lwa bhandu shipitaga shikukuu sha Bhayaudi shashemwaga Pashaka. **5** Bhai, a Petili bhali nnigelesha, bhandunji bha a Nnungu gubhatumbililenje kwaajuga a Nnungu. **6** Shene shilosho a Elode bhakanabhe kwaakopoya a Petili kulugwinjili, a Petili gubhagonile pakatipakati ja ashimanjola bhabhili, bhalibhatabhilwe mindondolo jibhili na bhalinda bhalinginji muulinda pa nnango gwa ligelesha. **7** Shangupe malaika jwa Bhakulungwa gwajimi tome na bhenebho, shilangaya shikulangayaga nnigelesha mula. Malaika jwa a Nnungu akwaapalamulaga a Petili mmbalati alinkuti, "Nnjabhule shangu!" Pala pepala mindondolo jibhatabhilwe mmakono jila jikukutukaga na shigwilile pai. **8** Malaika jwa a Nnungu gwabhabhalanjile, "Mwitabhe nshipi gwenu, nng'wale ilatu yenu. Gubhatendile nnepeila. Malaika gwabhabhalanjile nng'wale likoti lyenu nngagule." **9** A Petili gubhankagwile palanga, ikabheje bhakumanyaga yatendwaga naka malaika jula kuti puyaliji ya kweli, pubhaganishiyaga bhanaagamilia. **10** Bhakapitanjeje shikundi sha ndandubho na sha bhili sha ulinda, gubhaikengenenje kunnango gwa itale gwa jinjilila kunnjini. Nnango gula ukwiugulaga guyene gubhakopokenje palanga. Gubhalongenenje mumpanda gumo, kashokope malaika jula akwaalekega a Petili jikape. **11** Penepo a Petili gubhang'amwile itendeshe ila gubhashite, "Nnaino nimumanyi kweli kuti Bhakulungwa bhashikuntuma malaika jwabho kwiya njoya mmakono ga a Elode na gowe gubhalolelangaga Bhayaudi."

12 Bhakagamanyeje genego gubhapite mpaka kwa a Malia anyinabhabho a Yowana bhashemwaga a Maliko. Na mwenemo bhandunji bhabhagwinji bhashinkuimananga nkujuga Nnungu.

13 A Petili gubhaolishiye pannango, ntumishi jumo jwankongwe lina lyakwe Loda gwapite pilikanishiya. **14** Mwali jula akamanyeje kuti lilobhe lila lya a Petili gwainonyele kwa kaje. Jwangaugula nnango gula, ikabhe gwabhwutwishe kukwalugulilanga kuti a Petili pubhali pannango. **15** Gubhammalanjilenje mwali jula, "Ushikola shalubha!" Ikabheje jwalakwe gwapundile kukong'ondela kuti kweli. Gubhammalanjilenje bhalinkutinji, "Jwenejo malaika jwabho." **16** A Petili gubhapundile kuolishiya. Kungai gubhaaugulilenje nnango, bhakaabhonanjeje gubhakanganigwenje. **17** A Petili gubaagolosheyenje makono nkupinga bhapumulanje, gubhatalashiye Bhakulungwa shibhashite kwashoya nnigelesha. Kungai gubhaalugulilenje bhapelekanje ntenga kwa a Yakobho na ashaapwabho bhananji, gubhajabhwile kwenda mmbali jina. **18** Kukasheje, ashimanjola gubhakwetenje lipamba lya kaje nndi yaapatile a Petili? **19** A Elode gubhaamulishe bhaloleywe, ikabheje bhangaapatanga. Kwa nneyo gubhaamulishe ashimanjola bhala bhabhuywanje na bhabhulagwanje. Kungai a Elode gubhajabhwile ku Yudea, gubhapite tama ku Kaishalia. **20** A Elode bhashinkwatumbalilanga bhandu bha ku Tilo na ku Shidoni, ikabheje bhalabhonji gubhaatumilenje bhantenga. Gubhapanjilenje mbwiga na a Bhulashito bhaliji bhakulungwa bha nyumba ja bhakulungwa. Kungai gubhaajendele a Elode kukwajuga kubhe na ulele. Pabha shilambo shabbonji kubhakulupalilangaga kupata shalya kushilambo sha bhakulungwa a Elode. **21** Lyubha libhatumbilile, a Elode bhalij bhalij ngubho yabho ya

upalume, gubhatemi pa shitengu shabho sha upalume
gubhatandwibhe kwaalungushiyanga bhandunji. 22 Bhandunji
bhala gubhajobhelenje nkwalumbilila bhalinkutinji, “Lyeneli lilobhe
lya a nnungu, nngabha lika mundu.” 23 Shangupe malaika jwa
Bhakulungwa akwaagwyaga pai a Elode kwa ligongo lyangapinga
kwaapa a Nnungu Ukulungwa gwabho. Gubhaligwilwe na mbiu,
gubhawile. 24 Lilobhe lya a Nnungu gulipundile kushuma. 25
A Bhanabha na a Shauli bhakamaliyanjeje liengo lyabhonji,
gubhabhujilenje kukopoka ku Yelushalemu, gubhaatolilenje a
Yowana bhashemwaga a Maliko gubhalongene nabhonji.

13 Likanisha lya ku Antiokia bhashinkupagwanga bhandunji
bhananji bhalinginji ashinkulondola bha a Nnungu na bhananji
bhaajiganya. Munkumbimo bhaapali a Bhanabha na a Shimoni
bhashemwa Bhanapi na a Lukio bha ku Kilene na a Manaeni
bhalelilwe pamo na bhakulungwa a Elode, pubhalinginji na a
Shauli. 2 Bhai, bhalinginji nkujuga Nnungu na tabha, Mbamu
jwa Ukonjelo gwashite, “Nng’agulilanje a Bhanabha na a
Shauli kwa liengo linaashemelenje.” 3 Bhai, bhakajuganjeje
Nnungu na kupunda tabha, gubhaabhishilenje makono,
gubhaaleshilenje bhajendangane. 4 Bhai, a Bhanabha na a Shauli
bhakatumwanjeje naka Mbamu jwa Ukonjelo, gubhaeelenje
mpaka ku Sheleukia na gwajabhula penepo gubhakwelilenje
meli mpaka ku shilambo shitimbililwe na mashi sha ku Shilia. 5
Bhakaikanganeje ku Shalamishi, gubhalunguyenje lilobhe lya
a Nnungu nnyumba ya jujila Nnungu ya Shiyaudi. A Yowana
pubhaaliji bhajangutila bhabhonji. 6 Bhakapitangananjeje pakati
shilambo shitimbililwe na mashi mpaka ku Papo, kweneko
gubhanng’imenenje nng’abhi jumo jwa Shiyaudi lina lyakwe a
Bhaa Yeshu paitembaga nkulondola jwa a Nnungu. 7 Jwene

mundujo paliji na a Shegiashi Pauli, bhakulungwa bha shilambo shitimbililwe na mashi, bhandu bha lunda. A Shegiashi Pauli gubhaashemilenje a Bhanabha na a Shauli nkupinga bhapilikane lilobhe lya a Nnunu. **8** Ikabheje a Elimo bhaabhi bhala, malinga shibhaashemangaga kwa Shigiliki, gwabhatakenje nkupinga kuibhilila bhakulungwa bha shilambo shitimbililwe na mashi bhala bhanapunda kukulupalila ukilishitu. **9** Bhai, a Shauli bhashemwaga guna a Pauli, bhali bhagumbelwe na Mbumu jwa Ukonjelo, gubhaakolondolosheye meyo bhaabhi bhala, **10** gubhashite, "Mmwe mmanami nkwatermbanga bhandu! Mwana jwa Lijoka Lishetani. Amagongo nkutauka shindu shoshowe shili sha mmbone na sha kweli, nkapinga leka kupuganya mipanda ja mmbone ja Bhakulungwa. **11** Nnaino mashili ga Bhakulungwa shigankome. Shimme nangalole na nkashibhona shilangaya sha lyubha kwa gene malangago." Shangupe indu yowe ikubhaga mbuti ndambwe na lubhindu pameyo gabho, gubhatandwibhe kwenda ako na koko bhaliloleya mundu jwa kwaakamula nkono abhalongoye. **12** Bhakulungwa bha shilambo shitimbililwe na mashi bhala bhakagabhoneje genego, gubhajinjile ukilishitu, gubhakanganigwe kwa kaje bhakapilikaneje majiganyo ga Bhakulungwa. **13** Gwajabhu ku Papo, a Pauli na ajabhonji gubhakwelilenje meli gubhaptengenenje mpaka ku Pega ku Pampilia. Ikabheje a Yowana Maliko gubhaaleshilenje nibhuja ku Yelushalemu. **14** Ikabheje bhalabhonji gubhajabhlengene ku Pega gubhaptilenje pakati shilambo, gubhaikengenenje ku Antiochia shilambo sha Pishidia. Lyubha lya Pumulila gubhajinjilenje nshinagogi, gubhatemingenenje. **15** Bhakashomanjeje shitabhu sha Shalia ja a Musha na majandiko ga Ashinkulondola bha

a Nnungu, bhakulungwanji bha shinagogi gubhantumilenje mundu akaabhalanjilanje kuti. "Ashaapwetu, ibhaga nkwenetenje malobhe ga kwataganga ntima bhandunjibha, mmeleketanje,"

16 Bhai a Pauli gubhajimi gubhagolweye nkono, nkupinga bhapumulanje gubhashite, "Bhashilambo bha pa Ishilaeli na mmowe nkwaajogopanga a Nnungu mpilikananje! **17** A Nnungu bha bhandunji bha pa Ishilaeli bhashinkwaagulanga ashinakulubhetu, nikwakuyanga kubha likabhila likulungwa pubhatamanganaga kuujeni ku shilambo sha Mishili. A Nnungs gubhaashoshiyenje kweneko kwa mashili gabho gamakulungwa.

18 Kwa yaka makumi nsheshe nng'anga gubhaipililile itendi yabhonji. **19** Bhakaabhlaganjeje bhandunji bha makabhila shabha ku Kanaani, nigubhaapelenje bhandunji bhabho yene ilamboyo kubha ulishi gwabhonji. **20** Yaka mia nsheshe na makumi nng'ano guipitile." "Kungai gubhaapelenje bhaukumulanga bhaalongoyanje mpaka mobha ga a Shamweli ankulondola bha a Nnungu. **21** Bhai gubhajujilenje bhapegwanje mpalume, a Nnungu gubhaapelenje a Shauli bhanabhabho a Kishi, bha kabhila ja a Bhenjamini, bhabhe a mpalume bhabhonji kwa yaka makumi nsheshe. **22** Bhakaashoyeje a Shauli, a Nnungs gubhaagwile a Daudi kubha bhakulungwa bhabhonji. A Nnungs gubhalangwile shibhashite engwa bhalinkuti. 'Nimmweni Daudi mwana gwabho a Yeshe, anonyela muntima gwangu, mumdu apinga tenda yowe ingupinga nne.' **23** Kukoposhela nnubheleko luka jwene mundujo, a Nnungs malinga shibhashite lajila, bhandu bha pa Ishilaeli bhashikumpeleshelanga nkugombola, yani a Yesu. **24** A Yesu bhakanabhe tandubha liengo lyabho, a Yowana bhashinkwaalongoela bhalilunguya kuti bhandunji bhowe bha pa Ishilaeli bhanaapinjikwanga

bhaipetanje na bhatishwa. **25** A Yowana bhalimaliya liengo lyabho bhabhelekete nnei. ‘Punkuganishiyanga kuti nne gani? Nne nngabha bhunkwaalolelangabho. Bhenebho bhanakwiya nnyuma jangu na nne ngapinjikwa nkali kugopola mbundo ya ilatu yabho.’” **26** “Ashaapwanga, mmanganyanji nninginji bha shipinga sha a Bhulaimu na bhandunji bhangabha Bhayaudi bhakwaajogopanga a Nnungu! Malobhe ga ntapulo gatuishile. **27** Pabha bhashilambo bha ku Yelushalemu na ashikalongolele bhabhonji bhakaamanyinjji a Yeshu, wala malobhe ga ashinkulondola bha a Nnungu gashomwaga Mobha ga Pumulila gowe. Nkali nneyo, bhashinkugatendanga malobhe ga ashinkulondola bha a Nnungu gamalile kwa kwaukumula a Yeshu bhabhulagwe. **28** Nkali bhalepelenje kushibhona shibhalebhile sha kwaatenda bhabhulagwe, Bhayaudi bhashinkwajuganga a Pilato bhaaukumule kubhulagwa.” **29** “Na bhakamaliyeje kutenda gowe gubhajandishilwe a Yeshu, gubaatuluyenje munkongo mula gubaabhihilenje nnikabhuli. **30** Ikabheje a Nnungu gubaayushiye. **31** Na kwa mobha gamagwinji gubhabhoneshe na bhandunji bhalongene nabhonji kukopoka ku Galilaya mpaka ku Yelushalemu bhanganyabho nnaino ni bhakong'ondela bhabho kubhandu bha pa Ishilaeli. **32** “Na uwe tunakunnungushiyanga Ngani ja Mmbone ja malagano ga a Nnungu jibhapegwilwenje ashinakulubhetu, **33** a Nnungu bhashikugatenda gamalile nnaino kwetu uwe uukulu gwabhonji, kwa kwaayuya a Yeshu, malinga shijjandikwe nshitabhu sha Shabhuli ja bhili, ‘Ugwe Mwanangu, Nne lelo Nanng'inago.’ **34** Na ga kwayuya kukopoka kubhawilenje, bhanawe kabhili, a Nnungu pubhashite nnei. ‘Shinikupe mboka ya Ukonjelo na ya kweli inaalajile a Daudi.’ **35** Na muna gubhashite kabhili, ‘Nkanneka

jwa Ukonjelo jwenu abhole.' **36** Pabha, a Daudi bhayene bhakamaliyeje kutenda gubhapinjile a Nnungu nnubheleko lwabho, kungai gubhawile gubhabhishilwe nnikabhuli tome na ashainabhabho na shiilu shabho shikubholaga. **37** Ikabheje bhayushiywe na a Nnungubha, shiilu shabho shangabhola."

38 "Kwa nneyo, ashaapwanga mmumanyanje cuti, kupilila a Yeshubho nnaalungushiywanga ngani ja leshelelwa yambi na kila akwaakulupalila bhenebho analeshelelwa yambi yakwe.

39 Na cuti jojowe akwaakulupalila a Yeshu anaaleshelelwa ilebho yowe, genego gakanatendeshe kwa Malajilo ga a Musha. **40** Bhai, mwiteiganje ganakumpatanga gajandikwe na ashinkulondola bha a Nnungu. **41** 'Mpilikananje mmanganyanji mmanyegaya, nkanganigwanje nng'obhanje! Pabha shindu shingutenda nnaino, mmobha genunji gano, nkashikulupalilanga nkali mundu antalashiyangaga.'" **42** A Pauli na a Bhanabha pubhakopokanganaga nshinagogi mula, bhandunji bhala bhakwaajugangaga bhajiyangananje Lyubha lina lya Pumulila, kubhaatalashiyanje kabili gene malobhego. **43** Shitamo shila shikamaleje, Bhayaudi bhabhagwinji na bhandunji bhangabha Bhayaudi bhailundilenje na dini ja Shiyaudi gubaakagulenje a Pauli na a Bhanabha. Mitume bhala gubhakungulwishe nabhonji nk wataganga ntima bhapundanje kukulupalila ntuka gwa a Nnungu. **44** Lyubha lya Pumulila lyakagwile, tome bhandunji bhowe bha pashilambo pala gubaikengenenje kupilikanishiya lilobhe lya Bhakulungwa. **45** Ikabheje Bhayaudi bhakalubhonanjeje lugwinjili lwa bhandu gubaabphonelenje lupimililo, gubhataukenje malobhe gubhabheleketaga a Pauli akuno bhalikwaatukananga. **46** Nkali nneyo, a Pauli na a Bhanabha gubhabheleketenje gwangali bhoga bhalinkutinji,

"Ishinkupinjikwa lilobhe lya a Nnungu litandubhe kunng'ishilanga, ikabheje pabha nshikulikananga nikwiibhona nkapinjikwanga kuupata gumi gwa pitipiti, bhai tunakunnekanga twaajendelanje bhandunji bhangabha Bhayaudi. (aiōnios g166) 47 Pabha tushilajilwa na Bhakulungwa kuti, 'Njikuubhika ugwe ubhe shilangaya sha bhandunji bhangabha Bhayaudi, nkupinga ubhe ntapulo gwa pa shilambolyo.'" 48 Bandunji bhangabha Bhayaudi bhakapilikananjeje genego guyaanonyelenje, gubhalikushiyenje lilobhe lya Bhakulungwa na bhatumbililwenje kuupata gumi gwa pitipiti bhala, gubhaakulupalilenje a Yeshu. (aiōnios g166) 49 Lilobhe lya Bhakulungwa gulishumile shilambo showe shila. 50 Ikabheje Bhayaudi gubhaakwishiyanje bhanabhakongwe bha manyika bhakwaajogopanga a Nnungu na ashikalongolele bha shene shilambo shila, gubhatandubhenje kwaapoteka a Pauli na a Bhanabha, nigubhaabhinjilenje nshilambo shabbonji. 51 Bhai, bhantenga gubhakung'undenje ndutuli ja mmakongono gabhonji mbuti shileyo, gubhapitengenjenje ku Ikonio. 52 Na bhaajiganywa bha ku Antiokia bhala gubhainonyelenje na gubhagumbelenjwe naka Mbumu jwa Ukonjelo.

14 Ku Ikonioko, a Pauli na a Bhanabha gubhajinjilenje nshinagogi ja Bhayaudi. Na bhakabheleketanjeje gwangali bhoga, likundi likulungwa lya Bhayaudi na Bhagiliki gubhakulupalilenje.
2 Ikabheje Bhayaudi bhananji bhakanilenje kukulupalila gubhaakwishiyanje na kwaataganga nnjimwa mmitima jabhonji bhandunji bhangabha Bhayaudi, nkupinga bhaataukanje ashaapwetubho. 3 A Pauli na a Bhanabha gubhalonjeyenje kweneko. Gubhabheleketenje kwa mashili, ngani ja Bhakulungwa na bhalabho gubhakong'ondele ntenga gubhalunguyangaga ga mboka yabho, kwa kwaakomboyanga kutenda ilangulo

na ilapo. **4** Ikabheje bhandunji bha shene shilambo shila gubhalekenenje, bhananji gubhailundilenje na Bhayaudi, bhananji na mitume. **5** Kungai, bhandunji bhananji bhangabha Bhayaudi na Bhayaudi, pamo na ashikalongolele bhabhonji, gubhatandubhenje kwaapotekanga bhantenga kwa kwaakomanga maganga. **6** Mitume bhakang'amulanjeje genego, gubhabhutushilenje ku Lishitila na ku Debhe, ilambo ya ku Likaonia na ilambo ya tome na kweneko, **7** gubhatemingenenje kweneko bhalipundanga lunguya Ngani ja Mmbone. **8** Ku Lishitilako ashinkupagwa mundu jumo aliji nangwabha shibhelekwele, jwangalinga kujendajenda. **9** Jwene mundujo atendaga kwaapilikanishiya a Pauli pubhabheleketaga. A Pauli gubhannolesheye ukoto nikummona akwete ngulupai japinga kulamiyuwa, **10** kwa lilobhe lya utiya gubhashite, "Jima kwa makongono gako!" Shangupe mundujula gwajimi, nigwatandwibhe kujimajima. **11** Lugwinjili lwa bhandu lukashibhoneje shibhatendile a Pauli, gubhatandubhenje kujobhela kwa lugha ja Shilikaonia bhalinkutinji, "Ashi Nnungu bhashikutulushilanga mbuti bhandunji!" **12** A Bhanabha gubhashemilwe a Sheu, a Pauli pabha bhalabho bhaliji bhaabheleketa, gubhashemilwe a Eme. **13** Bhakulungwa bha bhaabhishila bha nyumba jika nnungu Sheu jaliji palanga shilambo, gubhajile najo ng'ombe nannume na malubha pa nnango nkulu gwa shilambo, bhalabho na bhandunji bhala bhalipinganga shoya mbepei kwa a Pauli na a Bhanabha. **14** Ikabheje mitume a Bhanabha na a Pauli bhakapilikananjeje, gubhapapulenje nngubho yabhonji na gubhabhutushilenje kulikundi lya bhandunji kula, kwa lilobhe lya utiya bhalinkutinji, **15** "Ashaapwetu, kwa nndi nkututendanga nnei? Numbe uwe tubhandupe malinga mmanganyanji.

Tunakunnungushiyanga Ngani ja Mmbone nnekanje yangali ya mmbonei, mwaatendebhushilanje a Nnungu bhakwete gumi, bhapengenyе kunnungu na shilambolyo na bhaali na indu yowe ili nkati jakwe. **16** Bhukala a Nnungu bhashinkwaalekenga bhandu bhowe bhatendanje mwaakupinjilanga. **17** Nkali nneyo, a Nnungu bhangaleka kwiilangula kwa itendi ya mmbone ibhakuntendelangaga, bhanakumpanganga ula kukopoka kunnungu, bhanakumpanganga mauno kwa miongwe jakwe, bhanakumpanganga shalya na kuangalala mmitima.” **18** Nkali bhabheleketenje nneyo, yashinkukola ukomu kwaalimbiyanga bhanaashosheyanje mbepesi. **19** Ikabheje Bhayaudi bhananji gubhaikengenenje kukopoka ku Antiokia na ku Ikonio, gubaatendilenje bhandunji bhailundanje na bhene bhanganyabho, gubaakomilenje na maganga a Pauli, gubaakwekwetenje mpaka palanga shilambo bhaliganishiyanga kuti bhawile. **20** Ikabheje bhaajiganywa bhakaimananjeje nikwaatimbilila, gubhajumwishe, gubhabhujile kunnjini. Malabhi gakwe, gubhapite na a Bhanabha mpaka ku Debhe. **21** A Pauli na a Bhanabha bhakalunguyanjeje Ngani ja Mmbone ku Debhe na kwapatanga bhaajiganywa bhabhagwinji, gubhatandubhenje mwanja kubhuja ku Antiokia kupitila ku Shilia na ku Ikonio. **22** Gubhaashimilikenje bhaajiganywa bha yene ilamboyo na kwaataganga ntima bhatamangananje nngulupai. Gubhaalugulilenje, “Inapinjikwa uwe tubhowe tupitile nshilaje sha punda, nkupinga tujinjile mu Ukulungwa gwa a Nnungu.” **23** A Pauli na a Bhanabha bhakaagulilanjeje bhanangulungwa kwa kila likundi lya bhandunji bha a Nnungu, kungai gubhajujilenje Nnungu na tabha, gubaabhisihilenje muulinda gwa Bhakulungwa bhubhaakulupalilangaga. **24** Bhakapitilanjeje ku shilambo sha ku

Pishidia, gubhaikengenenje ku Pampilia. **25** Bhakalunguyanjeje lilobhe lila ku Pega, gubhapitengenenje ku Atalia. **26** Gwakopoka kweneko gubhakwelilene meli kubhuja ku Antiokia na kweneko gubhajujilwenje mboka ja a Nnunu kwa ligongo lya liengo libhakamulenje nimaliya lila. **27** Bhakaikangananjeje ku Antiokiako gubhatemingenenje shitamo sha bhandunji bha a Nnunu bha penepo, gubhaatashiyenje yowe ibhatendile a Nnunu pamo na bhene bhanganyabho na a Nnunu shibhashite kwaugulilanga nnango bhandunji bhangabha Bhayaudi kujinjila nngulupai. **28** Gubhalonjeyenje kweneko pamo na bhaakulupalilangaga a Yesu bhala.

15 Bhai, gubhaikengenenje bhandunji ku Antiokia kopokanga ku Yudea gubhatandubhenje kwaajiganya bhakilishitu kuti, “Ibhaga nkajalukanje malinga shiilugwilwe Mmalajilo ga a Musha nkapatulwanga.” **2** Lyene lilobhelyo lyashinkukumbuya ntau gwankulungwa. A Pauli na a Bhanabha bhakataukanganeje na bhandunji bhala, gwiamulishwe kuti, a Pauli na a Bhanabha na bhandunji bhananji bha a Nnunu bha ku Antiokia bhajendangananje ku Yelushalemu bhakabhonegananje na mitume na bhanangulungwa ga jene nganijo. **3** Bhai, bhakatumwanjeje na bhandunji bha a Nnunu, gubhapitilenje pakati shilambo sha Poinike na ku Shamalia, akuno bhalilunguyanga ngani ja bhandunji bhangabha Bhayaudi shibhashite kwaatendebhushilanga a Nnunu, jene nganijo gujaanonyelenje kwa kaje bhakilishitu bhowe. **4** Bhakaikangananjeje ku Yelushalemu gubhaposhelwenje na bhandunji bha a Nnunu na mitume na bhanangulungwa, na bhalabhonji gubhaatalashiyenje yowe ibhatendile a Nnunu pamo na bhanganyabho. **5** Icabheje bhakilishitu bhananji bha nkumbi

gwa Mapalishayo gubhajimingenenje bhalinkutinji, "Inapinjikwa bhandunji bhangabha Bhayaudi bhajalukanje nkukaguya Shalia ja a Musha." **6** Bhai, mitume na bhanangulungwa gubhatemingenenje lukumbi bhaliganishiyanje lilibhelyo. **7** Nkungulu ukalonjeyeje, a Petili gubhajimi, nigubhashite, "Ashaapwetu, mmanganyanji mmumanyinji kuti kuumila ndandubho a Nnungu bhashinkupinga kung'agula nne kukopoka munkumbi gwenuunji nunguye Ngani ja Mmbone kubhandunji bhangabha Bhayaudi, nkupinga bhapilikananje na kulupalila. **8** Na bhalabho a Nnungu bhanakujimanya mitima ja bhandunji, gubhakong'ondele kuti bhaapinjilenje, kwa kwaapanganga Mbumu jwa Ukonjelo malinga shibhatupele uwe. **9** Wala bhangaagula uwe na bhanganyabho, bhashikujitakaya mitima jabhonji kwa ngulupai. **10** Bhai nnaino, kwa nndi nnakwaalinganga a Nnungu kwa kwaatwikanga bhandunji mitenga jibhalepelenje kujigala ashainabhetu, nkali uwe twashinkulepela jigala. **11** Ikabhe putukulupila kuti shitutapulwe kwa ntuka gwa Bhakulungwa a Yeshu malinga bhanganyabho." **12** Bhai, bhandunji bhowe pa lukumbi pala, gubhatemingenenje ilili, nkwaapilikanishiyanja a Bhanabha na a Pauli bhalitalashiyanga ga ilangulo na ilapo ibhatendile a Nnungu kwa makono gabhonji kubhandunji bhangabha Bhayaudi. **13** A Bhanabha na Pauli bhakapumulanjeje kutalashiya, a Yakobho gubhatandwibhe kubheleketa bhalinkuti, "Ashaapwanga mmbilikanishiyanje! **14** A Shimoni guna bhashemwaga a Petili bhatutalashiye, bhukalago a Nnungu shibashaashite languya kwaapinganga bhandunji bhangabha Bhayaudi, gubaagwilenje bhananji munkumbi gwabhonjimo bhabhanganje bhandu bhabho. **15** Na malobhe ga ashinkulondola bha a Nnungu ganatolana na jene nganiji, malinga shijjandikwe

Mmajandiko ga Ukonjelo, **16** 'Gapitaga genega shimuje, na shinjenje kabhili ku nyumba jibhomweshe ja a Daudi, shing'alaye maame gakwe nishenga kabhili. **17** Nkupinga bhandunji bhaigelenje, na bha ilambo ina bhaashemwanga kwa lina lyangu, bhaaloleyanje Bhakulungwa. **18** Bhakulungwa bhashite, bhatendile genega gamanyishe kuumila bhukala.' (aiōn g165) **19**

"Kwa nneyo, nne ngunatenda nnei, tunaabhuyanje bhandunji bhangabha Bhayaudi bhakwaatendebhushilanga a Nnungu.

20 Ikabhe twaajandishilanje bhaluwa kuti bhanalyanganje yalya yanyata ya mbepei ya ashinnungu bha yanamu, bhaiepuyanje na labhalabha, bhanataunanje nnyama yawa shibhudu na bhanalyanganje minyai. **21** Pabha kuumila bhukala bhapalinji bhandu bhalunguyanga Malajilo ga a Musha na ganashomwa nnyumba ya jujila Nnungu kila lyubha lya pumulila."

22 Bhai, mitume na bhandunji bhowe bha a Nnungu na bhanangulungwa bhabhonji gubhaagwilenje bhandunji kukopoka munkumbi gwabhonji bhaatumanje kwenda ku Antiokia na a Pauli na a Bhanabha. Bhai, gubhaagwilenje a Yuda guna pubhashemwaga a Bhalishabha na a Shila bhowenji bhandunji bha manyika munkumbi gwa bhakilishitu. **23** Gubaakamuyenje bhaluwa jajandikwe nnei, "Uwe twaashapwenunji, mitume na bhanangulungwa, shalamu yenunji mwashaapwetu bha ilambo ina nninginji ku Antiokia na ku Shilia na ku Kilikia. **24** Tupilikene kuti bhandunji bhananji bha kopoka kunngwetu kuno bhashikumpuganyanga kwa malobhe gabhonji, nikumpanganga lipamba mmitima jenunji. Ikabheje akuno jwakwa abhatumilenje.

25 Kwa nneyo tushitama pamo nilagana twaagulanje bhandu twaatumanje bhajiyangananje kweneko na ashaambwiga ajetunji a Bhanabha na a Pauli, **26** bhandunji bhaikakatimilenje gumi

gwabhonji kwa ligongo lya liengo lya a Yeshu Kilishitu. **27**
Bhai, twaatumilenje a Yuda na a Shila shibhammadlanjilanje
kwa kang'wa yabthonji gutujandishe gano. **28** Pabha Mbumu
jwa Ukonjelo na uwe tushibhona sha mmbone tunantwikanje
mishigo ikabhe gene gapinjikwa gala. **29** Yani, nnalyanganje
nnyama ibhishilwe mbepei kuyanamu, nnapapilanje minyai
na nnalyangaanje nnyama yawa shibhudu, mwiepuyanje na
labhalabha. Shintendanje mwammbone mwiepuyangaga na
yeneyo. Mwanjangana!" **30** Mitume bhala bhakalajilwanjeje,
gubhaeelenje kuloya ku Antioquia. Kweneko gubhashemilenje
lugwinjili lwa bhakilishitu gubhaapelenje bhaluwa jila. **31**
Bhakashomanjeje bhaluwa jila, malobhe gakwe gakwaataganga
ntima niguyaanonyelenje kwa kaje. **32** Bhai a Yuda na
a Shila, pabha na bhalabhonji pubhalinginji ashinkulondola
bha a Nnungu, gubhakungulukene nabhonji kwa malobhe
gamagwinji bhalikwaataganga ntima na kwaashimilikanga. **33** Na
bhakatamanganeje kweneko kwa mobha gashoko, bhakilishitu
bha ku Antioquia bhakwalajilangaga akuno bhalikwajujilanga
ulele, kungai gubhabhujilengene kubhandunji bhaatumilenje. **34**
Ikabheje a Shila gubhabhweni shammbone bhatame koko. **35** A
Pauli na a Bhanabha gubhatemingenenje ku Antioquia kwa mobha,
bhalijiganyanga na lunguya lilobhe lya Bhakulungwa pamo na
bhandunji bhana bhabhagwinji. **36** Gakapiteje mobha gashoko,
a Pauli gubaabhalanjile a Bhanabha, "Tubhuje tukaowelanje
ashaapwetu kila shilambo shitulungwiye lilobhe lya Bhakulungwa,
tukaalolanje bhalinginji bhuli." **37** A Bhanabha gubhapinjile
bhalongane nabhonji a Yowana bhaashemwa a Maliko. **38**
Ikabheje a Pauli bhangapinga kulongana na a Maliko, pabha
ku Pampilia bhashinkwaalekenga nikana kulongana nabhonji

kuliengo lyabhonji. **39** Bhai, gubhataukengenerje kwa punda, mpaka gubhalekenenje. A Bhanabha gubhaatolile a Maliko, gubhakwelilene meli kwenda ku Shilia. **40** Ikabheje a Pauli gubhaagwile a Shila, bhakilishitu bha penepo bhakaajujilanjeje mboka ja Bhakulungwa, gubhajabhwile. **41** Gwene mwanjago gubhapitile ku Shilia na ku Kilikia, bhalipita shimilika bhandunji bha a Nnungu.

16 A Pauli gubhaishe ku shilambo sha Debhe na ku Lishitila, kweneko bhatendaga tama bhaajiganywa bhamo bhashemwa a Timoteo. Anyinabhabho nabhalabho pubhaaliji bhaakulupalila na pubahaaliji Bhayaudi, ikabheje ainabhabho pubhaaliji Bhagiliki. **2** A Timoteo bhatendaga shuma uguja ku bhakilishitu bhatamanganaga ku Lishitila na ku Ikonio. **3** A Pauli gubhapinjile bhalongane na a Timoteo, kwa nneyo gubhaatajile unyago. Bhashinkutenda nneyo kwa ligongo lya Bhayaudi bhatamanganaga jene mmbali jila bhashinkumumanyanga kuti a Timoteo ainabhabho pubhaaliji Bhagiliki. **4** Pubhapitanganaga muilambo mula, a Pauli na a Timoteo bhashinkwapanganga bhandunji malajilo gakopweshe ku Yelushalemu kwa ashimitume bha a Yesu na bhanangulungwa, gubhaakomelesheyenje bhagatolelelanje. **5** Kwa nneyo bhandunji bha yene nyumba ya jujila Nnungu ila gubhapundilenje kwiishimilika nngulupai na bhandunji bha kwilunda bhakujenjeshekangaga. **6** A Pauli na ashajabhonji gubhapitilenje mmbali ya ku Pilgia na ku Galatia, pabha Mbamu jwa Ukonjelo ashinkwaibhililanga bhanalunguyanje gwene ntengago muilambo ya ku Ashiya. **7** Bhakaikangananje mu mpika gwa shilambo sha Mishia, gubhalinjilenje kujinjila kushilambo sha ku Bhishinia, ikabheje Mbamu jwa a Yesu gwabhalimbiyenje. **8** Bhai, gubhapitilenje

ku Mishia, gubhaeelenje mpaka ku Toloa. **9** Shilo, a Pauli gubhaagamile, gubhammweni mundu jumo jwa ku Makedonia ajimi alikwaajuga “Nnjomboshe nnjiye ku bhandunji bha ku Makedonia kuntujangute.” **10** Shangupe a Pauli bhakaagamileje nneyo, twangakabha gutupanganishe kwenda ku Makedonia, tulikumumanya kuti a Nnungu bhashikutushema tukaalungushiyanje Ngani ja Mmbone. **11** Tukajabhuleje ku Toloa, gutukwelile meli kwenda ku Shamotalake na malabhi gakwe gutuishe ku Neapoli. **12** Tukajabhuleje penepo, gutuishe mpaka ku Pilipi shilambo sha ku Makedonia, shilambo shikulungwa sha Bhaloma jene mmbali jila. Gutulonjeye shene shilambosho mobha gowepe. **13** Lyubha lya Pumulila gutukopweshe palanga shilambo, gutupite nnyenje lushi nkuloleya pa jujila Nnungu, gututemi nkukunguluka na bhanabhakongwe bhaimenenje penepo. **14** Munkumbi gwa bhatupilikanishiyangaga bhala, bhashinkupagwa bhakongwe bhamo bhaajogopaga a Nnungu bhashemwaga a Lidia, bha shilambo sha ku Tiatila bhaaliji na upindi gwa nngubho ya galama. Bhakulungwa bhashinkwaugulila ntima, bhagaposhele malobhe gubhabheleketaga a Pauli. **15** Bhakabhatishweje bhenebho na bhandunji bha nnyumba jabho, gubhatushemile kungwabho bhalinkuti, “Ibhaga kweli nnjibhweninji ngulupai jangu ku Bhakulungwa, nnjangananje kumui kuntamangananje.” Gubhatushondelesheye kwa kaje. **16** Lyubha limo tulikwenda pa kwaajujila a Nnnugu, gutuimene naka mwali jumo akwete lioka lya londola. Jwene mwalijo atendaga kwaapatilanga mmbiya yaigwinji ashinangologwe kwa liengo lyakwe lya londola. **17** Bhai, mwali jula gwabhakagwile a Pauli na uwe, alijobhela alinkuti, “Abha bhandunjibha nibhaakamula maengo bha a Nnungu bha kunnungu. Bhanakungulushilanga mpanda gwa patila ntapulo!”

18 Gwatendile nneyo kwa mobha gamagwinji mpaka lyubha limo a Pauli guyaashimile, gubhatendebhwishe gubhammalanjile lioka jula, "Ngunakuamulisha kwa lina lya a Yesu Kilishitu gunshoshe aju!" Shangupe lioka jula gwanshoshile mwali jula. **19** Ashinangologwe mwali jula bhakabhonanjeje ngulupai jabhonji jaapatilangaga mmbiya jiobhile, gubhaakamwilenje a Pauli na a Shila, nikwaakwakwatilanga mpaka kubhaushiyanga indu kubhakulungwanji bha shilambo. **20** Gubhaalugwilenje ku bhaaukumulanga bhalinkutinji, "Abha bhandunjibha Bhayaudi, na bhananyatyanga shilambo shetu. **21** Bhanalunguyanga ngani ja ikubho ikaapinjikwa kuiposhela uwe wala kuikagula, pabha uwe tu Bhaloma." **22** Lugwinjili lowe lwa bhandu gulwaajendelenje kukwakomanga a Pauli na a Shila, nabhalabhonji bhaaukumulanga gubhaulilenje ngubho yabronji kwa mashili, gubhaamulishenje bhakomwanje ibhoko. **23** Bhakakomwanjeje kwa kaje gubhaugalilwenje nnigelesha, gubhannajilenje linjola jwa ligelesha kubhika ulinda gwa kajekaje. **24** Linjolajo akapateje gene malajilogi, gwabhaugaliljenje a Pauli na a Shila kati ja nkati ligelesha lila bhali bhaatabhilenje makongono na makono nnipoto. **25** Tome na pakati shilo a Pauli na a Shila bhatendaga juganga Nnungu akuno bhalijimbanga nyimbo ya kwainiya, bhaatabhwanga bhananji bhalikwaapilikanishiyanga. **26** Shangupe, litaka likutetemelaga kwa jogoya na mubhaolelenje makumba ga lijumba lya ligeleshalila mukutenganyikaga, shangupe milango jowe ja ligelesha lila jikuugukaga na mindondolo jibhatabhilwenje jila jikugopokaga. **27** Linjola jwa ulinda jula akajumusheje nikujibhona milango ja ligelesha jiugwishe, gwaganishiye kuti bhaatabhwanga bhowe bhabhutekenje, kwa nneyo gwaolomwele

upanga gwakwe nkupinga aibhulaje. **28** Ikabheje a Pauli gubhautiye lilobhe bhalinkuti, "Unaipoteshe, pabha uwe tubhowe tupali pano." **29** Gwashemiye kandili, jikaisheje linjola jula gwab hutushile nkati, gwaigwishiye pamakongono ga a Pauli na a Shila akuno alitetemela kwa jogopa. **30** Kungai gwab hako yenje palanga, nigwashite, "Ndende bhuli niitapule?" **31** Gubhannjangwilenje, "Gwaakulupalile a Yesu shiutapulwe ugwe na likaja lyako." **32** Bhai, gubhannungushiyenje lilobhe ly a Bhakulungwa jwenejo na bhandunji bhowe bha likaja lyakwe. **33** Linjola jula gwabhatolilenje malanga ga shilo pegala gwab haukengenje ilonda yabhonji, kungai jwenejo na bhandunji bha nnyumba jakwe bhowe gubhabhatishwenje gwanakamope. **34** Gwabhapelekenje a Pauli na a Shila kunngwakwe, gwabhapelenje shalya. Jwalakwe na bhandunji bha nnyumba jakwe gubhainonyelenje, pabha nnaino bhaakulupalilenje a Nnunu. **35** Kukasheje lyamba, bhau kumulanga gubaatumilenje bhakulungwanji bha manjola bhalinkutinji, "Nkaagopolanje bhandunji bhalal bhajendangane." **36** Linjola jula akwaalugulilaga a Pauli jene nganijo alinkuti. "Bhau kumulanga bhashitumanga ntenga nkupinga nngopolwanje. Bhai, nnaino nkopokangane nnjendangane kwa ulele." **37** Ikabheje a Pauli gubhannjangwile, "Bhashikutukomanga ibhoko palugwinjili gwangali kutuukumula na uwe Tubhaloma. Na kabhili bhashikutuugalilanga nnigelesha na nnaino bhanapinganga kutugopolanga kwa nng'yo! Nngabha nneyo, ikabheje bhajiyangananje ashaayene kubhatukopoyanje." **38** Bhakulungwanji bha manjola gubhapitenje kwaalugulilanga bhau kumulanga jene nganijo, bhakapilikananjeje kuti a Pauli na a Shila ni Bhaloma, gubhajogopenje. **39** Kwa nneyo, gubhapite kwaagwilanga pa makongono, bhakaakopoyanjeje palanga

gubhaajuijenje bhashokangananje pa shilambo pala. **40** A Pauli na a Shila gubhakopokenje nnigelesha, gubhapitengenenje kumui kwa a Lidia. Kweneko gubhaimenenje na bhakilishitu na bhakaataganjeje ntima gubhajabhulenje.

17 Bhakapitilanjeje ku Ampipoli na ku Apolonia, gubhapitengenenje mpaka ku Teshalonike, kweneko jashinkupagwa shinagogi ja Bhayaudi. **2** A Pauli malinga nkubho gwabho gubhailundile, gubhakungulwishe nabhonji ga Majandiko ga Ukonjelo kwa Mobha ga Pumulila gatatu gwangali pumulila. **3** Bhalilunguya na talashiya kuti yashinkupinjikwa a Yesu bhapotekwe na bhayushe kukopoka kubhawilenje. Na kuti, “A Yesu bhungunnungushiyangabho ni a Kilishitu.” **4** Bhananji munkumbi gwabhonji gubhakulupalilenje nigubhailundilenje na a Pauli na a Shila. Na Bhagiliki bhabhagwinji bhaajogopangaga a Nnungu na bhanabhakongwe bhakulungwanji, gubhailundilenje. **5** Ikabheje Bhayaudi gubhakwetenje lupimililo, gubhapolekenje bhandunji bhangalinginji bha mmbone, gubhatendilenje ulendo nigubhakumbuyenje nnjasha pa shilambo powe. Gubhapitengenenje ku nyumba ja a Yashoni bhaliganishiyanga kuti kweneko shibhaapatanje a Pauli na a Shila nkupinga bhaapelekanje ku lugwinjili lwa bhandu. **6** Ikabheje bhangaapatanga, kwa nneyo gubaakwekietenje a Yashoni na bhakilishitu bhananji mpaka ku bhakulungwanji bha shilambo, bhalijobhelanga bhalinkutinji, “Bhene bhandunjibha bhanapuganyanga shilambolyo na nnaino bhaikengenenje na kukuno. **7** A Yashoni bhashikwaphelanga kunngwabho. Bhowe bhanakananga Malajilo ga a Kaishali, bhakutinji. ‘Bhapali bhakulungwa bhana bhashemwa a Yesu.’” **8** Kwa gene malobhego, bhakulungwanji bha shilambo na

lugwinjili lwa bhandunji gubhatengukenje. **9** Gubhaatendilenje a Yashoni na ashaajabhonji bhowe bhashoyanje mmbiya, kungai gubhaaleshilenje bhajabhlangane. **10** Ikaishileje shilo, bhakilishitu bhala gubhaapelekenje a Pauli na a Shila mpaka ku Bheloya. Bhakaikanganeje kweneko gubhajinjilenje nshinagogi ja Bhayaudi. **11** Bhene bhandunjibho pubhalinginji bhanguja kupunda bha ku Teshalonike bhala. Gubhaliposhelenje lilobhe lila kwa ntima gwa mmbone, gubhakaguyenje Majandiko ga Ukonjelo kila lyubha, nkupinga bhalolanje ibhaga ibheleketwa na a Pauli na a Shila ili ya kweli. **12** Bhabhagwinji munkumbi gwabhonji mula bhakukulupalilangaga na bhanabhakongwe Bhagiliki bhakwetenje itengu na bhanabhalume bhabhagwinji. **13** Ikabheje Bhayaudi bha ku Teshalonike bhakapilikananjeje kuti a Pauli bhanalungaya lilobhe lya a Nnungu ku Bheloya, gubhapitengenje kweneko, gubhatandubhenje kutenda nnjasha na kukwiya lugwinjili lwa bhandu. **14** Shangu bhakilishitu bhala gubhaapelesheyenje a Pauli mpaka kunyenje litanda, ikabheje a Shila na a Timoteo gubhalepekenje ku Bheloya. **15** Ikabheje bhaapelesheyenje a Pauli bhala, gubhaapelekenje mpaka ku Atene. Kungai, gubhabhujilenje na ntenga kukopoka kwa a Pauli gwa kuti, a Shila na a Timoteo bhanakabhanje kwaakagula ku Atene. **16** A Pauli bhali nkwaalindililanga a Shila na a Timoteo ku Ateneko, yashinkwaashima muntima gwabho bhakaibhoneje yanamu ya ashinnungu igumbele shene shilambo shila. **17** Bhai, nshinagogi a Pauli bhatendaga kunguluka na Bhayaudi na bhandunji bhana bhaajogopangaga a Nnungu na kila lyubha bhatendaga tenda nkungulu gwa palugwinjili na bhandunji bhabhowe bhaibhoneyangaga penepo. **18** Na bhananji bhakagulangaga majiganyo ga a Epikulo na

a Ashitoiki gubhataukenje. Bhananji bhalinkutinji, "Bhapinga bheleketa nndi bhangumbabha?" Bhananji gubhashiteanje, "Paabhoneka mbuti bhanalunguya ga ashi nnungu bha shijeni." Pabha a Pauli bhatendaga lunguya ga a Yeshu na ga yuka.

19 Kwa nneyo gubhaatoliljenje a Pauli gubhaapelekenje ku lukumbi lwa ashikalongolele bha shilambo Iwashemwaga Aleopago, gubhashitenje, "Tunapinga tugamanye malombolelo ga majiganyo genu ga shijeni gunkulunguyaga. **20** Indu ina itupilikene mmakutu getu inabhoneka ya shijeni kungwetu. Tunapinga tumumanye yene indui malombolelo gakwe nndi."

21 Pabha bhandunji bha ku Atene na bhandunji bhananji bhatamanganaga kwenko bhatendaga pinganga kutagulilana na pilikanishiya ngani ja indu ya shijeni. **22** Bhai, a Pauli gubhajimi pa lukumbi lwa Aleopago, gubhashite, "Mmashilambo bha pa Atene! Pungubhona kuti mmanganyanji nnatolelelanga kwa kaje ngani ja dini, **23** pabha punapitaga ako na koko nikwibhona indu yenunji munkujilanga Nnungu, njikushibhona shitala shimo shijandishwe. 'Kwa a Nunngu bhutukakwamanya.'

Bhai, nne ngunakunnungushiyanga, ga bhene a Nnungu bhunkwaatindibhalilanga gwangali kwaamanyabho. **24** "A Nnungu, bhapengenyе shilambolyo na indu yowe ili nkati jakwe, bhashibha Bhakulungwa bha kunnungu na pa shilambolyo, bhalabho bhakatama mmajumba ga jujila Nnungu gashenjilwe na bhandunji. **25** Na wala shakwa shibhaapinga mundu abhatendele mbuti shipali shibhaaloley, pabha bhenebho ni bhakwaapanganga bhandu bhowe gumi na kwaapanganga kila shindu. **26** Na kukoposhela kuka mundu jumo a Nnungu gubhapengenyе bhandunji bha ilambo yowe nikwaatendanga bhajenelanje pa shilambolyo. Bhalibhajibhishile mióngwe na

mipika ja mmbali ya ilambo ya tama bhene bhandunjibho. 27
“Bhashinkutenda nneyo, nkupinga bhandunji bha ilambo yowe
bhaaloleyane nkali kwaapapaya papaya, iishile pakwabhabona.
Nkali nneyo, a Nnungu bhangataliya pubhali tome na uwe. 28
Malinga shabhelekete mundu jumo, ‘Pabha mututama nkati
jabho, tunajima jima, nikola gumi!’ Na malinga bhaajimba
bhenunji bhana shibhashite lugulanga. ‘Uwe twaashibhana
bhabho’ 29 Bhai ibhaga, uwe tuli twaashibhana bhabho a
Nnungu, tukaapinjikwa kuganishiya kuti Unnungu ulandana
na shaabhu, eu ela eu liganga, indu ibheywa kwa lunda lwa
bhandunji. 30 Bhai, bhukala gwa ubhelu gwa bhandunji gula
a Nnungu bhashinkutenda mbuti bhakakuubhabona. Ikabheje
nnaino, a Nnungu bhanalajila bhandunji bhowe bha kila
mmbali bhaipetanje. 31 Pabha bhabhishile lyubha limo lya
ukumula bhandunji bha pa shilambolyo gwangali kummonela
mundu, kupitila mundu jumo jubhanng’agwile. A Nnungu
bhashikong’ondela genego kwa kunnyuya jwene mundujo
kukopoka kubhawilenje!” 32 Bhai, bhakaapilikananjeje a
Pauli bhalibheleketa ngani ja yuywa bhawilenje, bhananji
gubhatendilenje mbenji, ikabheje bhananji gubhashitenje,
“Tunapinga tupilikanishiye kabili jene nganiji.” 33 A Pauli
gubhajabhwile, gubaaleshilenje pa lukumbi pala. 34 Ikabheje
bhandunji bhana gubaakagwilenje na gubhakulupalilenje.
Munkumbimo bhaapali a Dionishi bhaaliji bha munkumbi gwa
Aleopago na bhakongwe bhamo lina lyabho a Damali na
bhananji.

18 Gakapiteje genego, a Pauli gubhajabhwile ku Atene
gubhapite ku Kolinto. 2 Kweneko gubhaimenenje na Bhayaudi
bhamo lina lyabho a Akula, bhashilambo bha ku Ponto. A Akila

na akongobhabho a Pilishika, bhashinkuiakangana mobha gogo
kukopoka ku Italia, pabha a Kaishali Kilaudio bhashinkuamulisha
Bhayaudi bhowe bhajabulangane ku Lumi, a Pauli gubhapite
kwaalolanga, **3** pabha nabhalabhonji pubhalinginji mapundi
bha totanga maema malinga bhalabho, a Pauli gubhatemi
nabhonji nikamula liengo pamo. **4** Kila Lyubha lya Pumulila
bhatendaga tenda nkungulu nshinagogi, bhalilinga kwaajuganga
Bhayaudi na Bhagiliki. **5** A Shila na a Timoteo bhakaikanganeje
kukopoka ku Makedonia, a Pauli gubhapundile kulunguya
lilobhe lya a Nnunu, bhalikong'ondela ku Bhayaudi kuti a
Yeshu ni a Kilishitu. **6** Bhakaataukanjeje na kwaatukananga,
gubhakung'winde nngubho yabho bhalinkuti, "Nng'obhangaga
mwigambanje mwashaayene, nne nangali sha gambwa ga
jene nganiji. Na kutandubhila nnaino shinyende kubhandunji
bhangabha Bhayaudi." **7** Bhai, gubhajabhwile gubhapite tama
pamui pakamumdu jumo Mgiliki abhajogopaga a Nnunu lina
lyakwe Tito Yushitushi, nyumba jakwe pujaliji mpika na shinagogi.
8 Na a Kilishipashi pubhaaliji bhakulungwa bha shinagogi
gubhaakulupalile a Nnunu bhenebho na bhandunji bhowe
bha likaja lyabho. Bhakolinto bhabhagwinji bhakapilikananjeje
gwene ntengago, gubhakulupalilenje na gubhabhatishwenje.
9 Lyubha limo shilo, Bhakulungwa gubhaalugulile a Pauli
nng'agamii. "Unajogope, upunde kulunguya unapumule, **10** pabha
nne namwene puni na ugwe. Jwakwa mundu shakupoteshe
pabha pashilambo pano njikola bhandunji bhabhagwinji." **11**
Bhai, a Pauli gubhatemi kweneko shaka shimo na myei
shita bhalijiganya lilobhe lya a Nnunu. **12** Ikabheje a Galio
bhakabheje bhakulungwa bha shilambo sha Akaya, Bhayaudi
gubhaakamwilenje a Pauli gubhaapelekenje ku bhaukumula.

13 Gubhashitenje, "Tunakunnugula aju munduju ligongo lya kwakwiyangga bhandu bhaatindibhalilanje a Nnungu shamunape kuleka Shalia jetu." **14** A Pauli bhakanabhe tandubha kubheleketa, a Galio gubhaalugulilenje Bhayaudi, "Mpilikananje Mmayaudi mmwe! Jene nganiji jikaaliji ja shilebho eu ja indu yangali ya mmbone ngampilikanishiyenje. **15** Ibhaga ngani ja taukangana ga malobhe na mena na shalia jenunji, genego nnolanje mwaashayenenji. Nne ngapinga kubha nankukumula jwa genego!" **16** Bhai, gubhaabhinjilenje pa lukumbi pala. **17** Na bhowenji gubhaakamwilenje a Shoshiteneshi bhaliji bhakulungwa bha shinagogi, gubhaakomilenje pa lukumbi lwa ukumulila pala. Ikabheje a Galio bhangaimuka genego wala kashoko. **18** A Pauli gubhatemi ku Kolinto na bhakilishitu bhala kwa mobha gamagwinji. Kungai gubhaalajilenje gubhakwelile meli kwenda ku Shilia gubhalongene na a Pilishika na a Akula. Ku Kenkelea, a Pauli gubhamojile umbo yabho pabha bhashinkutabha nalili. **19** Gubhaikengenenje ku Epesho na penepo a Pauli gubhaaleshilenje penepo a Pilishika na a Akila, gubhapite nshinagogi, gubhakungulwishe na Bhayaudi. **20** Bhayaudi gubhaajujilenje a Pauli bhatame mobha gamagwinji, ikabheje bhangakunda. **21** Ikabhe gubhaalajilenje, bhalinkuti, "A Nnungu bhapingaga shinyiye kabhili." Gubhakwelile meli kwenda ku Epesho. **22** Meli jikajimeje ku Kaishalia, a Pauli gubhajomboshele ku Yelushalemu kukwaalamushilanga bhandunji bha a Nnungu, kungai gubhapite ku Antioquia. **23** Gubhatemi kweneko mobha gashoko gubhajabhwile, gubhapitile pakati shilambo sha ku Galatia na ku Pilicia bhalipita kwaashimilikanga bhakilishitu. **24** Gene mobha pegu ashinkupagwa Nnyaudi jumo lina lyakwe Apolo, jwa bhelekwa ku Alekishandilia, gwaishe ku Epesho.

Paalji mundu jwa manya kubheleketa na ashinkukola lunda
lwa kugamanya Majandiko ga Ukonjelo. **25** Ashinkujiganywa
ga mpanda gwa Bhakulungwa na ashinkukola lilaka muntima
gwakwe, gwatandwibhe kutalashiya na kujiganya ukoto ngani ja
a Yeshu, akuno alikumumanya ga ubhatisho gwa a Yowanape.

26 A Pilishika na a Akula bhakampilikananjeje alibheleketa
gwangali bhoga nshinagogi, gubhantolinenje kunngwabhonji
nigubhannjigenyenje ukoto ga mpanda gwa a Nnungu. **27** Apolo
akatumbilileje kwenda ku Akaya, bhakilishitu gubhantajilenje
ntima kwa kwaajandishilanga bhakilishitu bha ku Akaya kula
bhamposhelanje. Akaisheje kweneko, kwa mboka ja a Nungu
gwakombwele kwaajangutilanga bhakulupalilene bhala, **28**
pabha ashinkupunda kubheleketa kwa manyilila mpaka Bhayaudi
nilepela kuntauka pa lugwinjili alikong'ondela kwa Majandiko ga
Ukonjelo kuti a Yeshu ni a Kilishitu.

19 Apolo pubhaliji ku Kolinto, a Pauli gubhapite mwilambo ya
kuntundu, gubhaishe ku Epesho gubhaaimenenje bhaajiganywa
bhowepe. **2** Gubaabhuhiyenje, “Nkakulupalilaneje
mwaposhelenje Mbumu jwa Ukonjelo?” Bhalabhonji
gubhajangwilenje, “Ntape! Numbe tukanabhepilikana kuti apali
Mbumu jwa Ukonjelo.” **3** Kwa nneyo a Pauli gubaabhuhiyenje,
“Igala mwabhatishwenje ubhatisho gwashi?” Gubaajangwilenje,
“Ubhatisho gwa a Yowana.” **4** A Pauli gubhashite, “Ubhatisho gwa
a Yowana pugwaaliji gwa langula kuti bhandunji bhaipetilenje.
A Yowana bhatendaga kwaabhalanjilanga bhandunji kuti
bhankulupalilane akwiyajo, yani a Yeshu.” **5** Bhakapilikananjeje
genego, gubhabhatishwenje kwa lina lya Bhakulungwa a
Yeshu. **6** Bhai, a Pauli gubaabhisihilenje makono, Mbumu
jwa Ukonjelo akwaatulushilangaga, gubhatandwibhenje

kubheleketa luga inape na londola. **7** Pubhalinginji bhandunji bhanabhalume kuishila likumi limo na bhabhili. **8** Kwa myei jitatu a Pauli bhatendaga jinjila nshinagogi, bhalibheleketa gwangali bhoga, bhalibhuyana na bhandunji na bhalikwaakwiyanga ga Ukulungwa gwa a Nnungu. **9** Ikabheje bhananji gubhatauenje, gubhakanilenje kukulupalila, gubhatandwibhenje kubheleketa yangali ya mmbone ga mpanda gwa Bhakulungwa pa lugwinjili. Penepo a Pauli gubhajabhwile nikwalekanga, gubhaatolilenje kunyenje bhaajiganywa bhabho gubhakungulwishe nabhonji na bhuyana na bhandunji kila lyubha nnyumba jimo ja shelemala jika mundu jumo, lina lyakwe Tilanushi. **10** Gubhapundile kutenda nneyo kwa yaka ibhili mpaka bhashilambo bhowe bha ku Ashia na Bhayaudi na Bhagiliki, gubhapilikenenje lilobhe lya Bhakulungwa. **11** A Nnungu gubhatendile ilapo yapunda kupitila a Pauli. **12** Bhandunji bhatendaga tolanga itambaa ya kwiungutila matukuta na nngubho ya a Pauli, nipeleka kubhalwelenji, nilamiywanga ilwele yabbonji na bhakwetenje maoka nipata kuleshelelwa. **13** Bhayaudi bhananji bhatendaga pitangana ako na koko pita kwaashoyanga bhandunji maoka, gubhalinjilenje kulugula lina lya Bhakulungwa a Yeshu kubhandunji bha shikilwanga maoka, bhalinkutinji, "Ngunakunng'amulishanga kwa lina lya a Yeshu bhaalunguywa na a Pauli." **14** Bhashinkupagwanga bhana shabha bha a Shekewa bhakulungwa bha bhaabhisila bha Shiyaudi, mubhalinginji munkumbi gwa bhatendangaga nneyo. **15** Ikabheje lioka jula gwabhajangwilenje, "A Yeshu naamanyi na a Pauli naamanyi, ikabheje mmanganyanji ashi gani?" **16** Na mundu jwa shikilwa jula akwaaumbilangaga bhowe, gwabhapundilenje mashili. Na bhana bha a Shekewa bhala

gubhakopokengene lubhilo pa nyumba pala bhauleywenje na bhalinginji makonope. **17** Jene nganijo jikushumaga kubhandu bhowe bhatamanganaga ku Epesho, ku Bhayaudi na Bhagiliki. Bhowe gubhajogopenje. Nigubhalikushiyenje lina lya Bhakulungwa a Yeshu **18** Bhakilishitu bhabhagwinji gubhaikopoyenje pa lugwinjili kukwipeta ga yangali ya mmbone ibhaitendangaga. **19** Na bhananji bhatendangaga ya uabhi, gubhapelekenje itabhu yabhonji, guijoshilwe moto palugwinjili. Bhakabhalanganyanje galama ja itabhu ila, guiishile mamilioni ga mmbiya. **20** Kwa nneyo lilobhe lya Bhakulungwa gulipundile kushuma na kukola mashili. **21** Gakapiteje genego, a Pauli gubhatumbilile muntima gwabho kwenda ku Yelushalemu kupitila ku Makedonia na ku Akaya. Gubhashite, "Nng'ikaga kweneko ngunapinga ngakubhone ku Loma." **22** Kwa nneyo, gubhaatumilenje bhaajanguta bhabho bhabhili, a Timoteo na a Elashito, bhaalongolelanje kwenda ku Makedonia, bhalabho gubhatemi kashoko ku Ashia. **23** Gene malangago guikoposhele nnjasha jikulungwa ku Epesho kwa ligongo lya Mpanda gwa Bhakulungwa gula. **24** Ashinkupagwa mundu jumo nshipala lina lyakwe Demetulushi, liengo lyakwe pulyaaliji kualaya kwa madini ga hela nyumba yaishoko ika nnungu jwankongwe ashewaga Atemi. Lyene liengolyo lyatendaga kwapanganga pwaida bhatumishi bhakwe. **25** Demetulushi gwabhashemilenje bhakamulangaga gene maengogo na bhandunji bhananji bhakamulangaga liengo lyolyo, gwabhaluguliljenje, "Ashalume ajangu, mmumanyinji kuti mwenemu mutupatila mmbiya. **26** Na nnaino nnipilikananga na kwiibhonela mwaashayene ibhatenda a Pauli, nngabha pa Epesho pepano, ikabhe ku Ashia kowe. Bhalabho bhanakwiya na kwaatendebhuyanga bhandunji

bhabhagwinji bhakundanje kuti ialaywa kwa makono ga bhandunji nngabha ashinnungu. **27** Kwa nneyo kujogoya kwakwe nngabha ga petekuywa liengo lyetupe, ikabhe nkali nyumba jika nnungu Atemi jipinga petekuywa. Kungai upalume gwa bhene bhaatindibhalilwa pa shilambo sha Ashia na shilambolyo shiupele.” **28** Bhakapilikananjeje genego, guyaashimilenje, gubhatandwibhenje kujobhela bhalinkutinji. “Bhakulungwa ni Atemi bha ku Epesho!” **29** Shilambo showe shikugumbalaga nnjasha. Gubaakamulenje a Gayo na a Alishitako, bhandunji bha ku Makedonia, bhalinginji mwanja gumo na a Pauli, gubhaapelekenje lubhilo mpaka ku lubhala lwa ing'ando. **30** Na a Pauli bhapingaga jinjila pakati lugwinjili, ikabheje bhaajiganywa bhabho bhakwaalimbiyangaga. **31** Ashikalongoolele bhananji bha shene shilambo sha Ashia shila, bhalinginji ashaambwiga ajabho, gubhatumilnjie ntenga gwa kwaashondelesheya bhanajende kwiilangsuya kulubhala lwa ing'ando. **32** Penepo bhananji bhalijobhelenga shana nnei na bhananji shana nneyo, mpaka lugwinjili lula lukupuganikaga. Bhabhagwinji bhangashimanya shiumilo shibhaimanilenje pepala. **33** Bhandunji bhananji gubhaganishiyenje kuti shiumilo a Alekishanda, pabha Bhayaudi bhashinkwaatendanga bhajende mmujo. Bhai, a Alekishanda gubhajinwile nkono nkupinga bhandunji bhapumulanje bhalipinga bheleketa nkwiitapula pa lugwinjili lwa bhandu lula. **34** Ikabheje bhakamumanyanjeje kuti bhalabho Bhayaudi, bhowenji gubhajobhelenje gwanakamo bhalinkutinji, “Atemi bha pa Epesho ni bhakulungwa!” Gubhajobhelenje nneyo kwa mashaa gabhili. **35** Kungai bhaajandika bha shilambo gubhakombwele kwaapumuyanga, gubhaalugulilenje, “Mmashilambo bha pa Epesho, kila mundu amumanyi kuti shilambo sha Epesho shino

ni nkugoya jwa nyumba jika nnungu Atemi na nkugoya jwa shindu shigwile kukopoka kunnungu. **36** Jwakwapi mundu jwa tauka gegano. Kwa nneyo, mwitimalikanje, nnatendanje shindu shoshowe gwamba. **37** Nshikwashemanga abha bhandunjibha apano nkali shakwa shibhajibhilenje nnyumba jika nnungu wala kuntukana nnungu jwetu jwankongwe.” **38** “Bhai, ibhaga Demetulushi na bhatumishi ajakwe bhakwetenje shalugula sha bhene bhanganyanjibha, lupali lukumbi na bhanangulungwa bha shilambo bhalapalinji, bhakalugulane kweneko. **39** Na ibhaga nkuloleyanga gana, shigagumbwe pa lukumbi lwa manyika na bhashilambo. **40** Pabha gakoposhele leloga yapinjikwe tulugulwe kwa kumbuya nnjasha. Ai nnjashai yangali shiumilo na shitulepele kutaya shiumilo shammbone sha yene nnjashai.” **41** Bhakabheleketanjeje genego, gubhapwilingenye lukumbi.

20 Nnjasha ya ku Epesho ila ikapumuleje a Pauli gubhaashemilenje bhakilishitu, gubaatajilenje ntima. Kungai gubhaalajilenje, gubhajabhwile kwenda ku Makedonia. **2** Gubhapitile mmbali ya yene ilambo ila bhalikwaataganga ntima bhandunji kwa malobhe gamagwinji. Kungai gubhaishe ku Giliki, **3** Kweneko gubhatemi myei jitatu. Bhalipanganika kwenda ku Shilia, gubhang'amwile kuti Bhayaudi bhatendaga kwaatamilanga itamo ya pinga kwaapoteka, kwa nneyo gubhabhujile kupitila ku Makedonia. **4** Gubhalongene na a Shopato bha ku Bhelea, bhana bhabho a Pailashi na a Lishitilako na a Shekundo bhandunji bha ku Teshalonike na a Gayo bhandu bha ku Debhe na a Timoteo na a Tikiko na a Tolopimo bhandunji bha ku Ashia. **5** Bhene bhanganyabho bhashinkutulongolelanga nikwenda kutulinda ku Toloa. **6** Jikapiteje shikukuu ja mikate jangataga ngedule, gutukwelile meli kujabhula ku Pilipi na lyubha lya nng'ano

gutwaishilenje ku Toloa kula. Kweneko gututemi juma jimo. **7**
Lyubha lya ndandubho lya juma gutuimene nkupinga kugabhana
nkate. Pabha a Pauli bhashinkutumbilila kujabhula pa malabhi
gakwe, gubhapundile kwaalungushiyanga na kukunguluka
mpaka pakati shilo. **8** Yashinkupagwa kandili yaigwinji ilikolela
mwene nkati golopa mutwaimene mula. **9** Nshanda jumo
lina lyakwe Yutikashi ashinkutama pa lidilisha akuno a Pauli
bhalipunda lunguya, Yutiko gwatandwibhe kugweela kashoko na
kungai lugono lukuntopelaga, gwagwile pai kukopoka golopa
ja tatu. Gubhannokotenje ali awile. **10** A Pauli gubhatulwishe
pai, nikunnjapata gubhashite, “Nnakolanje lipamba pabha
gumi gwakwe gvatangu.” **11** Gubhakwelile kabhili kugolopa,
gubhagabhire nkate, gubhalile. Gubhapundile kukunguluka
nabhonji mpaka kumashelo, gubhajabhwile. **12** Bhandunji
bhala gubhampelekenje nshanda jula kumui ali jwankoto,
guyaanonyelenje kwa kaje. **13** Gutukwelile meli gutulungolele
kwenda ku Asho kweneko ni kutwatumbilile kwapashila a
Pauli. Pabha bhashinkupinga kupitila kweneko kwa mpanda
gwa pai. **14** Bhai, gubhatuimene ku Asho, gutwaapashole
mmeli, gutupite ku Mitulene. **15** Tukajabhuleje penepo pa
malabhi gakwe gutuishe ku Kio. Lyubha lya bhili gutujimishe
meli ku Shamo na malabhi gakwe gutuishe ku Mileto. **16** A
Pauli bhashinkutumbilila kupelenganya na mwanja gwangali
kupitila ku Epesho, nkupinga bhanakabhiye ku Ashiako. Pabha
bhashinkukola shanguya sha ika ku Yelushalemu itendekaga
bhakashiimane shikukuu sha Pentekoshite. **17** A Pauli bhali ku
Mileto, gubhatumile ntenga ku bhanangulungwa bha likanisha
ku Epesho nkupinga bhai mane nabhonji. **18** Bhakaikanganeje
kunngwabho, gubhaabhalanjilenje, “Mmanganyanji mmumanyinji

shinjite tama mobha gowe kutandubhila lyubha linaishe ku Ashia.

19 Ngulikwaakamulila maengo Bhakulungwa kwa kwiitimalika kowe na kwa minyoi na malinjilo gambataga kwa itamo ya Bhayaudi ya pinga mboteka. **20** Mmumanyinji kuti ngakweteje nnjishi kunnungushiyanga palugwinjili na nnyumba yenunji na kunniganyanga indu ya kunnjangutilanga. **21** Natendaga kwaaleyanga bhowenji Bhayaudi na Bhagiliki bhaipetanje kwa a Nnunu na bhaakulupalilanje Bhakulungwa bhetu a Yesu.” **22** “Bhai, nnaino mpilikananje! Kwa kunkunda Mbamu jwa Ukonjelo, nne ngunakwenda ku Yelushalemu akuno ngakumumanya gapinga mbata kweneko. **23** Ikabheje Mbamu jwa Ukonjelo anangong'ondela kuti mwilambo yowe itabho na mboteko inaninda. **24** Ikabheje, gumi gwangu ngakuubhona kubha shindu sha mmbone, ikabhe maliye mwanja na liengo libhambele Bhakulungwa a Yesu nilitende, yani kukong'ondela Ngani ja Mmbone ja ntuka gwa a Nnunu. **25** “Na lelo, nnolanje, namwene nimumanyi kuti mmanganyanji mmowe ninnungushiyenje upalume gwa a Nnunu, ngulikwenda ako na koko, nkamonanga kabili. **26** Kwa nneyo, lyubha lya lelo lino ngunakunkong'odelanga kuti, jojowe shaobhejo nne nangali shoshowe sha gambwa. **27** Pabha nangaleka wala kashoko kunnungushiyanga yowe ibhatumbilile a Nnunu.” **28** “Mwiteiganje mwashaayene, nnishunganje likundilyo Mbamu jwa Ukonjelo ashikummikanga mmanganyanji mmanganje mmalelanga. Nnishunganje likundi lya bhandunji bha a Nnunu libhaliumile kwa minyai jika mwana gwabho. **29** Nimumanyi kuti nyabkulaga ashimaogo ga jogoya shibhannjiilanganilanje na bhakalibhonelanga shiya likundilyo. **30** Nkali kukopoka munkumbi gwenunji shibhakoposhelanje

bhandunji shibhaijye bheleketanga ya puganya nkupinga
bhabhanganje bhaajiganywa na bhaakulupalilanje bhene
bhanganjabho. 31 Kwa nneyo ntamangananje shikupi lola
nkumbushilanje kuti kwa yaka itatu, shilo na mui, ngatotoshelaga
kunneya kila mundu kwa kunngutanjila. 32 "Bhai, nnaino
ngunakummikanga muulinda gwa a Nnunu na kwa lilobhe
lya ntuka gwabho, ukunshimilikanga ngunakumpanganga
mboka pamo na bhandunji bhabho bhakonjeleywenje. 33
Nne nangalokolila mmbiya wala shaabhu, wala nngubho ika
mundu jojowe. 34 Mwaashayenenji mmumanyinji kuti njikamula
maengo kwa makono gangu, nkupinga mbate indu ipinjikwa,
yangu na yashaajangunji. 35 Kwa indu yowe natendaga
kunnangulanga kuti kwa kamula maengo nneyo tunaapinjikwa
kwaajangutilanga bhakakwiikombolanga, akuno tulikumbushila
malobhe ga Bhakulungwa a Yesu bhayene shibhashite
bheleketa, 'Mbaya kulaguya, nngalingana na poshela.'"
36 Bhakamaliyeje kubheleketa genego, gubhatindibhelenje
gubhajuilenje Nnunu. 37 Bhowenji bhatendaga gutanga,
bhalikwaalajilanga na kwaajambatila a Pauli nnukoi. 38
Bhashinkuinjikanga kwa kaje kwa lilobhe libhabhelekete a Pauli
kuti bhakaabhonanga kabhili. Bhai, gubaapelesheyenje mpaka
kumeli.

21 Tukaalajilanje, gutukwelile meli gutupite mpaka ku Koshi.
Malabhi gakwe gutuishe ku Lode na gwajabhula penepo
gutupite ku Patala. 2 Kweneko gutujimene meli jajendaga ku
Poinike, gutukwelile, gutujabhwile. 3 Tukaishileje pa kushibhona
shilambo sha Kupulo, gutupitile kunkono nshinda gutuloshiye
ku Shilia. Gutujimi kushilambo sha Tilo penepo mishigo ja
mmeli mula jatendaga pinjikwa jituluywe. 4 Gutwaimenenje

bhaajiganywa bha a Yeshu kweneko, gututemi nabhonji kwa juma jimo. Bhalibheleketanga kwa mashili gaka Mbamu, gubhaalimbiyenje a Pauli bhanajende ku Yelushalemu. **5**
Ikabheje mobha getu gakamalileje gutujabhwile. Na bhandunji bhowe na ashakongo bhabhonji na ashibhana bhabhonji gubhatupelesheyenje mpaka palanga shilambo. Tukaisheje nnyenje bhaali, tubhowe gututindibhele kujuga Nnunu. **6**
Kungai gutulegene nabhonji, uwe gutukwelile meli, nabhalabhonji gubhabhujilenje kunngwabhonji. **7** Gutupite na mwanja gwetu gwajabhlula ku Tilo gutuishe ku Tolemaishi, kweneko gutwaalamushilenje ashaapwetu, gututemi nabhonji lyubha limo. **8** Malabhi gakwe gutujabhwile gutuishe ku Kaishalia. Kweneko gutupite kunngwabho a Pilipi Bhaalunguya Ngani ja Mmbone. Bhenebho ni munkumbi gwa nng'ano na bhabhili bhaagwilwenje ku Yelushalemu kula. **9** Bhashinkukola bhali nsheshe bhakanabhe lombwanga bhatendaga londolanga. **10** Tukatameje kweneko mobha gowepe, gwaishé nkulondola jumo kukopoka ku Yudea lina lyakwe Agabhushi. **11** Akatuishileje gwatolile nshipi gwa a Pauli, gwaitabhile makono na makongono, gwashite, "Mbamu jwa Ukonjelo akuti, 'Nnyene gwene nshipi guno apinga tabhwa shana nneino na Bhayaudi ku Yelushalemu na bhapinga kunkamuyanga ku bhandunji bha ilambo ina.'" **12** Bhai, tukapilikaneje genego uwe na bhandunji bhananji bha pepala gutwaashondeleshaye a Pauli bhanajende ku Yelushalemu. **13** Ikabheje a Pauli gubhajangwile, "Nkupinga tendanga nndi? Nnagutanga mmulaganje ntima? Nne ng'engwilwe nngabha ga tabhwape ku Yelushalemu, ikabheje nkali kubhulagwa kwa ligongo lya a Yeshu." **14** Tukalepeleje kwaashondeleshaya, bhai gutushite, "Libhapinga Bhakulungwa litendeshe!" **15** Gakapiteje gene mobha gala,

gututabhile mishigo jetu, gutujabhwile kwenda ku Yelushalemu. **16**
Bhaajiganywa bhananji kopoka ku Kaishalia gubhalongenenje na
uwe, gubhatupelekenje ku nyumba ja a Mnashoni kutwajendaga
ishila. A Mnashoni pubhaliji bhashilambo bha ku Kipulo na
pubhaliji bhaajiganywa tandubhila bhukala. **17** Tukaisheje
ku Yelushalemu, bhakilishitu ajetunji gubhatuposhelenje kwa
kwinonyela. **18** Malabhi gakwe a Pauli gubhapite na uwe na
bhakulungwanji bhowe bha liekalu bhapalinji kukwaabhona a
Yakobho. **19** Bhakaalamushilanjeje, a Pauli gubaatalashiyenje
yowe ibhatendile a Nnungu kubhandunji bha ilambo ina nniengo
lyabho. **20** Bhakapilikananjeje genego gubaakushiyenje a
Nnungu. Kungai gubaalugulilenje a Pauli, “Apwetu, nnilola cuti
maelupu ga Bhayaudi nnaino bhashibhanganga bhakilishitu na
bhowenji bhashitumbililanga kukamulila shalia ja a Musha. **21**
Bhabhalanjilwenje ngani jenu cuti nnakwajiganyanga Bhayaudi
bhatamanga mwilambo ina cuti bhanakagulanje Malajilo ga
a Musha wala bhanaataganje unyago ashibhana bhabhonji
na bhanakaguyanje ikubho ya Shiyaudi. **22** Igala, pushiibhe
bhuli? Pabha shibhapilikananje cuti nng'ishe.” **23** “Bhai, ntende
malinga gutupinga kummalanjila gano. Bhashipagwanga apano
bhanabhalume nsheshe bhashitabhanga nalili. **24** Mwiilunde
na bhene bhanganyabho, nkaikonjeleye nabhonji kwa a
Nnungu. Nkaalipilanje, nkupinga bhamogwanje umbo yabonji.
Penepo bhandunji bhowe shibhamumanyanje cuti ngani jenu
jibhapilikenenjejo nngabha ja kweli, ikabheje mmwe mmayene
nnitama ukoto na nnikaguya Shalia ja a Musha. **25** Ikabheje
kwa ngani ja bhandunji bha ilambo ina bhalinginji bhakilishitu,
twaajandishilanje bhaluwa kwatalashiyanga shitushite lajila,
bhanalyanganje yalya ya mbepei ya ashinnungu bha yanamu

na bhanataunanje nnyama yangainga na bhaiepuyanje na labhalabha.” **26** Bhai, pa malabhi gakwe a Pauli gubhaatolilenje bhandunji bhatabhilenje nalili bhala gubhajujile nabhonji Nnungu nkwiikonjeleya. Kungai nigubhajinjile nliekalu, kuulugula ga mpelo gwa mobha ga kwiiikonjeleya kwa a Nnungu na ga mbepei ipinga shoywa kwa kila mundu. **27** Bhai, gene mobha nng’ano na gabhili gala gali tome na malila, Bhayaudi bhakopokengene ku Ashia gubhaabhwениنجي a Pauli nniekalu. Bhai, gubhakwiyenje nnjimwa likundi lyowe lya bhandunji, nigubhaakamwilenje. **28** Gubhajobhelenje, bhalinkutinji, “Mmashileunji bha pa Ishilaeli, ntujangutanje! Jweneju ni mundu ajiganya bhandunji mmbali yowe indu ikapinjikwa na bhandunji bha shilambo sha Ishilaeli, ya kana Shalia ja a Musha na pa ukonjelo pano. Na kabhili anakwaajinjiyanga Bhagiliki nniekalu nikupanyatiya pa ukonjelo pano.” **29** Bhashinkubheleketanga nneyo, ligongo lya kummona Tolopimo mundu jwa ku Epesho alongene na a Pauli kunnjini, gubhaganishiyenje kuti a Pauli bhashikunnjinjiya nniekalu. **30** Shilambo showe gushijinjile nnjasha, gubhaikengenenje bhandunji kukopoka mmbali yowe, gubhaakamwilenje a Pauli, gubhaakwekwetenje kwakopoya nniekalu, shangupe milango ja liekalu jikuugalwaga. **31** Bhalinginji nkuloleya mwa kwabhlajila, bhakulungwa bha bhakomana ngondo bha Loma, gubhapatile ntenga kuti ku Yelushalemu kowe kushinyata. **32** Shangupe gubhaatolilenje ashimanjola na bhakulungwanji bha manjola, gubhapite lubhilo kulugwinjili lwa bhandunji kula. Na bhalabhonji bhakaabhonanjeje bhakulungwa bha bhakomana ngondo na ashimanjola bhala, gubhapumwilenje kwaakoma a Pauli. **33** Bhakulungwa bha bhakomana ngondo bhala gubhapite kwaakamula a Pauli, gubhaamulishe bhatabhwe

mindondolo jibhili. Gubhabhushiye, “Jweneju gani na atendile nndi?” **34** Nnugwinjili mula bhandunji bhatendaga jobhelanga bhananji bhalinkutinji nnei na bhananji sha munape. Kwa ligongo lya yene njobhelayo, bhakulungwa bha bhakomana ngondo bhala bhangagamanya malombolelo ga jene ngani jila. Kwa nneyo gubhaamulishenje bhandu bhabho bhaapelekanje a Pauli nnugwani. **35** A Pauli bhakaishejepe pa ngashi, penepo guipinjikwe ashimanjola bhaajigalanje a Pauli kwa ligongo lya nnjasha ya bhandunji. **36** Pabha lugwinjili lwa bhandu lwatendaga kwaakagula bhalijobhelenga, bhalinkutinji, “Mwaabhlaje!” **37** Na bhalabho a Pauli bhalijinjywaa nnugwani, gubhaajujile bhakulungwa bha bhakomana ngondo bhala bhalinkuti, “Ngunajuga nimmalanjile shindu.” Bhakulungwa bhala gubhashite, “Bhuli ulikombola Shigiliki? **38** Ugwe nngabha Mmishili agano mobha pegano apitinishe bhandu elupu nsheshe bhaashemwanga mabkulaga bhandu, alikwaalongooyanga kuanga?” **39** A Pauli gubhajangwile, “Nne Nannyaudi, kumelekwe ku Tasho nshilambo sha Kilikia, nne mundu jwa shilambo nngabha sha nyegala. Shonde nneshe melekete na bhashilambobha.” **40** Bhakulungwa bhala gubhakundile. Kwa nneyo a Pauli gubhajimi pangashi, gubhaajinulilenje nkono bhandunji bhapumulanje, bhakapumulanjeje, a Pauli gubhatandwibhe kubheleketa nabhonji kwa Shiebhulania.

22 “Ashaapwanga na asha awawa, nnaino mmbilikananje shinguti bheleketa nkxitapula!” **2** Bhakapilikananjeje bhalibheleketa Shiebhulania gubhapundilenje kupumula. Na bhalabho a Pauli gubhapundile kubheleketa. **3** “Nne Nannyaudi, kumelekwe ku Tasho shilambo sha Kilikia. Ikabheje punelwelwe pa Yelushalemu pepano na bhaajiganya bhangu a

Gamalieli. Nashinkujiganywa ukoto Shalia ja ashinakulu bhetu. Nashinkwiishoya kwa ntima gwangu gowe kwa a Nnungu malinga lelo shinninginji mmanganyanjishi. **4** Nashinkwaapotekanga mpaka kwaabhlaganga bhandunji bhakaagulanga a Yesu. Natendaga kwaakamulanga bhanabhalume na bhanabhakongwe nikwaatabhang, nikwaugalilanga nnigelesha. **5** Bhakulungwa bha bhaabhisila na bhanangulungwa bhowe bha lukumbi shibhakong'ondelanje gegano. Gumboshele bhaluwa kukopoka kunngwabhonji jibhajandishilwenje ashaapwetu Bhayaudi bhalinginji ku Dameshiki. Gumbite ku Dameshiki nkupinga ngaakamulanje bhene bhandunjibho na kwianabhonji ku Yelushalemu bhalibhatalwenje nkupinga bhaukulwanje. **6** "Bhai, punaaliji mumpanda malanga ga shaa shita ja mui tome naika ku Dameshiki, shangupe shikukoposhelaga shilangaya sha punda kukopoka ku nnungu gushinangashiye mmbali yowe. **7** Penepo gung'wile pai, gumbilikene lilobhe lilimalanjila, 'Shauli, Shauli! Kwa nndi unamboteka?' **8** Nne gumushiye, 'Mmwe Mmakulungwa agani?' Nabhalabho gubhamalanjile, 'Nne a Yesu Bhanashaleti bhunkwaapoteka.' **9** Na bhene bhalinginji pamo na nne bhala, bhashibhweninji shilangaya shila ikabheje bhangalipilikana lilobhe lika jwene abheleketaga na nne. **10** Bhai, gumushiye, 'Ndende bhuli Mmakulungwa?' Bhakulungwa bhala gubhamalanjile, 'Jima, ujende ku Dameshiki na kweneko shiubhalanjilwe yupinjikwa utende.' **11** Kwa ligongo lyapunda langaya shilangaya shila nangakombola kulola kwa nneyo gubhangamwilenje nkono ni nongoya mpaka ku Dameshiki. **12** "Kweneko ashinkupagwa mundu jumo lina lyakwe a Anania, mundu abhajogopaga a Nnungu na kunda Shalia jetu na manyika na eshimika na Bhayaudi

bhatamanganaga ku Damesiki. **13** Gubhaishe mmona, gubhajimi tome na nne, gubhashite, 'Apwanga a Shauli! Nnole kabhili.' Popo pepo gunnolile, gunaabhwени. **14** Kungai Anania gubhashite, 'Nnungu jwa ashainabhetu ashikunng'agula mmwe nkupinga mwiimanye ibhapinga na mwaamanye Bhakamula Maengo bhabho bhanguja na pilikana lilobhe likopoka nkang'wa jabho. **15** Pabha shimwaakong'ondèle kubhandu bhowe ga imwibhweni na imwipilikene. **16** Bhai, igala nkulinda nndi? Nnjime, nkabhatishwe nneshelelwe ilebho yenu kwa tenda nnayo shinnisheme lina lya Bhakulungwa.' **17** "Bhai, ngabhujeje ku Yelushalemu, nilinkujuga Nnungu nniekalu guniibhweni agamii. **18** Gunaabhweni Bhakulungwa bhalimalanjila, 'Shangu! Ujabhule pa Yelushalemu pabha bhandunjì bha pepano bhakakukundanga pushiungong'ondèle nne.' **19** Gunaajangwile, 'Mmakulungwa, bhalabhonji bhamumanyinji kuti nne natendaga pita mmashinagogi kwaakamulanga na kwaakomanga bhankulupalilangaga mmwe bhala. **20** Na kabhili pubhabhulegwe bhaakong'ondela bhenu a Shitepano, nne namwene naapali popo nguliengwa na yatendekaga ila akuno nilingamwile nngubho yabhonji bhaabhlagangaga bhala.' **21** Na Bhakulungwa gubhamalanjile, 'Jenda, shinikutume kwaatalika kubhandunjì bha ilambo ina.'" **22** Bhandunjì bhala gubhaapilikenishiyenje a Pauli mpaka penepo, ikabheje bhakabheleketeje genego, gubhatandwibhenje kujobhela bhalinkutinji, "Mwabhlaje! Mundu jwa nnei kubhulagwape." **23** Gubhapundilenje kujobhela akuno bhalleshelanga kunani nngubho yabhonji na litutuli. **24** Bhakulungwa bha bhakomana ngondo gubhaamulishe bhaapelekanje a Pauli nkati lugwani lwa manjola, gubhaabhalanjilenje bhaakomanje ibhoko nkupinga

bhamumanye shiumilo shajamililwa nneila na Bhayaudi. **25**
Ikabheje bhakaatabhanjeje nkupinga bhaakomanje ibhoko, a
Pauli gubhaabhushiye bhakulungwa bha manjola bhajimi tome,
“Bhuli, mwa mmbone mmanganya kunkoma mundu jwa ku
Loma akanabhe ukumulwa?” **26** Bhakulungwa bha manjola
bhala bhakapilikaneje nneyo, gubhaalugulile bhakulungwa
bha bhakoma ngondo bhala bhalinkuti, “Nkupinga tenda
nndi? Jwene munduju nshilambo jwa ku Loma!” **27** Bhai,
bhakulungwa bha bhakomana ngondo bhala gubhaajendele a
Pauli gubhaabhushiye, “Mmalanjile, mmwe mmashilambo sha
ku Loma?” A Pauli gubhaajangwile, “Elo.” **28** Bhakulungwa
bha bhakomana ngondo gubhashite, “Nne njipata ushilambo
gwa ku Loma kwalipila mmbiyayaigwinji.” A Pauli gubhashite,
“Ikabheje nne nanshilambo jwa ku Loma kwa bhelekwa.” **29**
Bhai, bhandunji bhapingangaga kwaabhuaya a Pauli bhala
shangupe gubhajabhlenje. Nkali bhakulungwa bha bhakomana
ngondo bhala gubhajogwepe bhakumanyeje kuti a Pauli
pubhaliji bha shilambo sha Loma na pabha bhashinkwaatabha
mindondolo. **30** Malabhi gakwe, bhakulungwa bha manjola
gubhapinje bhamumanye kuti Bhayaudi bhakwaalugulanga
bhuli a Pauli. Kwa nneyo gubaagopwele mindondolo a Pauli,
gubhaamulishenje bhakulungwanji bha bhaabhisila na bha
lukumbi bhowe bhatamangane shitamo. Kungai gubhaajimishe a
Pauli pakatipakati lukumbi.

23 A Pauli gubaakolondolesheyenje meyo bhalukumbi bhala,
kungai gubhashite, “Ashaapwanga, mpaka lelo junu njikwakagula
a Nnungu kwa tumbilila na ng’aniyo ya muntima.” **2** Penepo
Bhakulungwa bha Bhaabhisila a Anania gubhaamulishenje
bhalinginji tome na a Pauli bhala bhaakomanje lipapa

pakang'wa. **3** Bhai, a Pauli gubhaabhalanjile, "Na mmwe a Nnungu shibhankome, mmwe nni mbuti langalanga likuju nkati mbamba jika! Mmwe ntemi nkung'ukumula nne kwa kaguya shalia akuno nkakagula malajilo kwa amulisha bhandunji bhangomanje?" **4** Bhandunji bhajimingenenje tome na a Pauli bhala gubhaabhalanjilenje, "Bhuli, mmwe nnakwatukana Bhakulungwa Bhaabhisila bha a Nnungu!" **5** A Pauli gubhajangwile, "Ashapwanga nangamumanya kuti bhenebho ni Bhakulungwa Bhaabhisilla, pabha ishijandikwa kuti, 'Nnaabheleketele yangali ya mbone bhakulungwa bha bhandunji bhenu.'" **6** A Pauli bhakamumanyeje kuti nkumbi gumo gwa bhalukumbi bhala pugwaaliji gwa ashi Mashadukayo na guna gwa a Shimapalishayo. Bhai, gubhautiye lilobhe lyabho pa lukumbi pala bhalinkuti, "Ashapwanga nne Nampalishayo, mwana juka Mpalistayo, ngunaokumulwa kwa ligongo lya ngulupai ja yuka bhawilene." **7** Bhakabheleketeteje genego, ashi Mapalishayo na ashi Mashadukayo gubhataukengenenje na shitamo gushigabhanishe ikundi ibhili. **8** Pabha ashi Mashadukayo bhakutinji kwakwa kuyuka kwa bhandunji bhawilene, wala bhakwapinji ashimalaika bha a Nnungu wala ashimaoka, ikabheje ashi Mapalishayo bhanakulupalilanga yoweyo. **9** Nyenye guipundile na bhaajiganya bhananji bha Malajilo ga a Musha munkumbi gwa Mapalishayo, gubhajimingenenje kubheleketa kwa utiya bhalinkutinji, "Tukakushibhona shoshowe shibhalebhile abha bhandubha, pana mbumu eu malaika jwa a Nnungu ashikunguluka nabho." **10** Mpwai gukapundeje, bhakulungwa bha ashimanjola gubhajogwepe a Pauli bhanapopotolwa na bhandunji bhala, kwa nneyo gubhaamulishenje ashimanjola bhakaashoyanje a

Pauli kwa mashili pa lugwinjili pala, nikwajinjiya nnugwani lwa ashimanjola. **11** Pa shilo shakwe Bhakulungwa gubhaikopweye gubhajimi tome na a Pauli, gubhaabhalanjile, “Mwilume ntima pabha malinga shinshite ngong'ondela pa Yelushalemu pano, nneyo peyo nnapinjikwa kungong'ondela ku Loma.” **12** Kukasheje, Bhayaudi gubhatabhilenje shitabho kuti bhakalyanganga wala bhakapapilanga mpaka bhaaabhulaganje a Pauli. **13** Bhene bhandunji bhatabhilenje shene shitabhosho, pubhalinginji kupunda makumi nsheshe. **14** Bhai gubhapitengenenje kubhakulungwanji bha bhaabhisila na bhanangulungwa, gubhashitenje, “Uwe tushitabha shitabho kuti tunalye shoshowe mpaka twabhlaje a Pauli. **15** Kwa nneyo bhai, mmanganyanji na bhalukumbi mwaabhalanjilanje bhakulungwa bha bhakomana ngondo bhampelleshelanje a Pauli kwitembangwa kuti nnapinganga kujimanya ngani jabho ukoto. Na uwe shitwabhlaje bhakanabhe bhandishila.” **16** Ikabheje mwipwagwabho a Pauli gwapilikene jene nganijo, gwapite jinjila nnugwani lwa ashimanjola mula gwabhalugulile a Pauli jene nganijo. **17** Penepo a Pauli gubaashemile bhakulungwa bhamo bha ashimanjola gubhaabhalanjile, “Muntole aju nshandaju mumpeleshe ku bhakulungwa bha bhakomana ngondo shipali shindu shapinga kwaalugulila.” **18** Bhai, linjola jula ankutolaga nshanda jula gwampeleshe ku bhakulungwa bha bhaakomana ngondo, gwashite, “A Pauli bhatabhwilwe bhala bhashinkunnjema ninjuga nimpeleshe aju nshandaju kwenu mmwe pabha ashikola lilobhe lyapinga kunnugulila.” **19** Bhakulungwa bha bhakomana ngondo bhala gubhankamwile nkono nshanda jula, gubhapite najo kujika, gubhammushiye, “Upinga malanjila nndi?” **20** Jwalakwe gwashite, “Bhayaudi bhashilagana, malabhi bhannjuganje

mmwe mwaapeleshe a Pauli ku lukumbi bhaitembanje kuti bhalukumbi bhanapinganga bhajimanyanje ukoto ngani jabho.

21 Ikabheje mmwe nnakunde pabha bhandunji bha punda makumi nsheshe bhanakwajubhililanga. Bhashilumbilanga kuti bhakalyanganga wala papila mpaka bhaabhlaganje a Pauli. Na nnaino bhalinginji tayali pilikana nkubheleketa bhuli.” **22** Bhakulungwa bha bhakomana ngondo gubhanneshile nshanda jula aijendele gubhannajile, anammalanjile mundu jojowe kuti ashikwaabhalanjila genego. **23** Bhai, bhakulungwa bha bhakomana ngondo bhala gubaashemilenje bhakulungwanji bha manjola bhabhili gubaabhalanjilenje, “Mwaabhikanje tayali ashimanjola mmia pabhili, bhaakwelanga palashi makumi shabha na ashimanjola mmia pabhili bha mapanga, bhajendangananje ku Kaishalia ikanabhe ishila shaa tatu ja shilo. **24** Gubaabhalanjilenje bhabhikanje bhannyama tayali bha kwakweya a Pauli na bhaapelekanje kwa ulele kwa a Pelikishi, bhakulungwa bha ku Yudea.” **25** Bhakulungwa bha bhakomana ngondo bhala gubhajandishe bhaluwa nnei. **26** “Mmakulungwa a Pelikishi, shalamu! Nne a Kilaudiashi Lishiashi ngunakunjandishila. **27** “Bhayaudi bhashikunkamulanga jwene munduju na pubhalinginji tome na kummulaganga, ngapilikaneje kuti nshilambo jwa ku Loma gumbite na ashimanjola gunintapwile. **28** Nikumpeleka kulukumbi lwabhonji nkupinga nishimanye shiumilo shibhakunnugulanga jweneju. **29** Gunii manyi kuti ibhakunnugulanga ni ya mitau ja shalia jabhonji gubhapegwilwenje na a Musha, ikabheje nangashibhona shoshowe shakuntenda abhulagwe eu atabhwe. **30** Ngabhalanjilweje kuti Bhayaudi bhashilagananga kummulaga jwene munduju, shangupe ngunakumpeleshela

mmwe, njikwaalajilanga bhakunnugulangabho, bhannugulanje kwenu mmwe.” **31** Bhai, ashimanjola gubhaatolilenje a Pauli malinga shibhalajilwenje, gubhaapelekenje shilo mpaka ku Antipatili. **32** Malabhi gakwe ashimanjola mia pabhili bhakwendangana na makongono bhala, gubhabhujilenje nikwalekanga bhakwendangana na palashi bhajendangananje na a Pauli. **33** Bhakaikanjeje ku Kaishalia, gubhaapelenje bhaluwa jila a Pelikishi bhakulungwa bha shilambo nikwabhika a Pauli mmakono gabho. **34** Bhakashomeje bhaluwa jila, gubhaabhushiyenje a Pauli bhakopweshe shilambo gani. Bhakbalanjilweje kuti kubhakoposhele ku Kilikia, **35** gubhashite, “Shinimpilikane pushibhaikanje bhannugwilenjebho.” Kungai gubhalajile a Pauli babbhishwe muulinda nnyumba ja uliwali ja a Elode.

24 Gakapiteje mobha nng'ano, Bhakulungwa Bhaabhisila a Anania gubhaeelenje kukopoka ku Kaishalia na bhanangulungwa bhananji na nkubheleketa jumo lina lyakwe Tetulo. Gubhaajendelenje bhakulungwa bha shilambo bhala gubhaalugulenje ga a Pauli. **2** A Pauli gubhashemilwe na bhakulungwa a Pelikishi, a Tetulo gubhatandwibhe kwaalugula bhalinkuti. “Mmakulungwa a Pelikishi, kwa longoya kwenu ukoto, ulele unalonjeya na nnapanganya ya mmbone kubhandu bhetu. **3** Bhai, tunakuliposhela lyene lilobheli kila mmbali na kwa mobha gowe kwa kwiinonyela akuno tulipunda kuntendela ej. **4** Ikabheje, ngunantotoye kwa kubheleketeja, tunakunnjuga ntupilikanishiye kwa uguja gwenu malobhe getu. **5** Tushing'amula kuti aju munduju jwa jogoya kwa kaje. Jwalakwe anakumbuya nnjasha munkumbi gwa Bhayaudi kila mmbali pa shilambolyo na kabhili ni kalongolele nkulu jwa shikundi sha dini sha

Bhanashaleti. **6** Na kabhili ashinkulinga kulitukana liekalu, gutunkamwile.” **7** Ikabheje a Lushiani bhakulungwa bha manjola gubhaishe kutupokonyola kwa mashili ga punda mmakono getu. **8** Kungai gubhaalajilenje bhakunnugulanga jwene munduju bhajiyangane kungwenu mmwe. Monaga mpingaga mummuye mmayene shimumanye kuti yowe itukunnugulai ya kweli. **9** Na bhalabhonji Bhayaudi gubhatajilenje shionde kuti malobhe gowe ga kweli. **10** Bhai, bhakulungwa bha shilambo bhakaalanguleje nkono nkupinga bhabhelekete, a Pauli gubhashite, “Pabha nimumanyi kuti mmwe nshibha mmaukumula bha sheshino shilambo shino kwa yaka yaigwinji inanonyela melekete namwene nkwitapula. **11** Mmayene mmumanyi kuti gakanabhepita mobha likumi na gabhili tandubhila punyombweshe ku Yelushalemu kukwatindibhalila a Nnungu. **12** Abha bhandunjibha bhangamonanga nne nniekalu ngulitaukangana naka mundu jojowe. Bhangang’imananga niliikwiya bhandu kutenda nnjasha nniekalu, wala mmashinagogi, wala popowe pala nshilambomo. **13** Na wala bhakaakombolanga kong’ondela ibhanugulangai. **14** Ikabhe shingukunda kungwenu mmwe ashino. Nne ngunakwaatindibhalila a Nnungu bha ashinakulubhetu kwa kulupalila mpanda gubhakuushemanga bhanganyanjibha kuti shikundi sha dini ja unami. Ngunakulupalila yowe ijandikwe mwiitabhu ya shalia ja a Musha na itabhu ya ashinkulondola bha a Nnungu. **15** Nne ngunakwaakulupalila a Nnungu, na malinga bhanganyibha bhakwetenje ngulupai jojo, ja kuti bhanguja na bhaalebhanga, shibhayukanje. **16** Kwa nneyo mobha gowe ngunakwiobhelesheya kutenda kila shingukombola sha uguja kwa a Nnungu na ku bhandunji. **17** “Ngatameje kwataliya kwa yaka yaigwinji, gumbite ku Yelushalemu ngaajangutilanje bhashilambo

ajangunji na ngashoye mbepei. **18** Gubhang'imenenje nniekalu ngulitenda genego, nguli niikonjeleye kwa a Nnungu. Lukapaaliji lugwinjili lwa bhandu wala ya nnjasha. **19** Ikabheje bhapalinji Bhayaudi bhananji bhakopokengene ku Ashia, bhanganyabho ni bhapinjikwangaga kubha apano bhanugulanje monaga shipali shoshowe sha nugula kwenu mmwe. **20** Eu, ashaayene pebha bhalugulanje shinebhile nne shibhashibhweninji punajimi pa lukumbi lwabhonji, **21** ikabhe ngajimeje pakati jabhonji ga bheleketa shindu shimo, 'Nnang'ukumulanga lelo juno ga ligongo lya kulupalila kuti bhawilenje shibhayuywanje!" **22** Penepo a Pelikishi pabha bhajimanyi ukoto ngani ja gwene mpanda gula, gubaunishile malobhe gala bhalinkuti, "Shimaliye malobhe genuンji pushibhaishe bhakulungwa bha bhakomana ngondo a Lishiashi." **23** Kungai gubhannajile nkulungwa jwa manjola abhabhishe a Pauli muulinda, ikabheje guna bhanaaibhilile kukopoka palanga na ashaabhwiga ajabhonji wala bhanalimbiywanje kwaapa ibhapinga. **24** Gakapiteje mobha gashoko, a Pelikishi gubhaishe na akongobhabho a Dulushila bhaaliji Bhayaudi. Gubhalajile a Pauli bhashemwe, gubhaapilikanishiye bhalibheleketa ngani ja kwaakulupalila a Yeshu Kilishitu. **25** Ikabheje a Pauli bhakatandubheje kubheleketa ga uguja na gangakwebhela indu na kuti shilijiye ika lyubha lya ukumu, a Pelikishi gubhajogwepe, gubhashite, "Nnaino nnjende, mbataga malanga shininsheme." **26** Na kabhili pubhaganishiyaga kuti shibhapegwe ela na a Pauli. Kwa nneyo gubhapundile kwashemashema a Pauli kuukunguluka nabho. **27** Ikapiteje yaka ibhili, a Poshiashi Peshito gubhatolile shitengu sha upalume gwa shilambo. Na nkupinga kuikonjeleya ku Bhayaudi, gubhaaleshile a Pauli bhali bhatabhilwepe.

25 Gakapiteje mobha gatatu ga uliwali gwabho, a Peshito gubhajabhwile ku Kaishalia gubhapite ku Yelushalemu.

2 Bhakulungwanji bhaabhishila na ashikalongolele bha Bhayaudi gubhaabhalanjilenje a Peshito ngani ja a Pauli. Gubhaashondelesheyenje a Peshito **3** na kwaajuga bhaatendelanje ntuka gwa kuti, bhaamulishe a Pauli bhapelekwe ku Yelushalemu, pabha bhashinkulagananga bhaajubhililanje mumpanda nkupinga bhaabkulaganje. **4** Ikabheje a Peshito gubhajangwile, "A Pauli mubhali mmakono ga ulinda ku Kaishalia na namwene nguli tome na kwenda. **5** Mwaalekanje ashikalongolele bhenunji bhaeelanje na nne bhakaalugulanje a Pauli monaga shipali shibhalebhile." **6** A Peshito bhakatameje na bhandunji bhala kwa mobha nane eu likumi limo, gubhabhujile ku Kaishalia. Pa malabhi gakwe gubhapite tama pa shitengu sha ukumu, gubhaamulishe bhaajiyenabhonji a Pauli. **7** A Pauli bhakaisheje, Bhayaudi bhakopokengene ku Yelushalemu gubhaatimbililenje gubhatandubhenje kwaalugula ga indu yaikuluikulu yatenda nkali ashaayene nngakombola kong'ondela.

8 A Pauli nkwiitapula gubhashite, "Nne shakwapi shinebhile kwa shalia ja Bhayaudi, wala kwa liekalu wala kwa a Kaishali."

9 Ikabheje a Peshito nkupinga kwiikonjeleya ku Bhayaudi gubhaabhushiye a Pauli, "Bhuli, nnipinga kwenda ku Yelushalemu nkaukumulwe kwa malobhe gubhakunnugulangaga na nne nili popo?" **10** A Pauli gubhajangwile, "Punyimi pano pa lukumbi lwa a Kaishali, pepano ni pa ukumulwa nne. Malinga mmwe shimmumanyi ukoto, nne shakwapi shinaalebhilenje Bhayaudi. **11** Bhai, monaga shipali shinebhile sha pinjikwa mulagwe, nne ngakana kuwa. Ikabheje monaga ibhanugulangai nngabha ya kweli, jwakwapi jwangamuya nne kubhanganyabha.

Pungupinga malobhe ganguga gakamaliywe na a Kaishali.”

12 Bhai, a Peshito bhakakungulusheje na bhandunji bhabho bha lukumbi, gubhaabhalanjile a Pauli, “Nshipinga malobhe genu gajende kwa a Kaishali! Bhai, shinnjende kwa a Kaishali.” **13** Gakapiteje mobha gashoko, bhakulungwa bhana bhashemwaga Agilipa, bhaliji bhakulungwa bha shilambo shina nngabha ku Yudea na a Bhenike, gubhaikenje ku Kaishalia kukwalamushila a Peshito. **14** Gubhatemingenenje kweneko mobha gamagwinji na a Peshito gubhaabhalanjile bhakulungwa Agilipa malobhe ga a Pauli, bhalinkuti. “Ashipagwa mundu jumo pepano jubhanneshile a Pelikishi ali atabhilwe. **15** Ngajendeje ku Yelushalemu bhakulungwanji bha bhaabhisihila na bhanangulungwa bha Bhayaudi gubhanugulilenje gaka jwene mundujo bhalinyuganga ninng'ukumule apotekwe. **16** Ikabheje gunaajangwilenje kuti Bhaloma bhakakunshoyanga mundu akwete malobhe ga lugulwa, akanabhe bhonegana naka mundu annugwile jula, nkupinga najwalakwe abhelekete malobhe ga kwitapula kwa gubhannugulenjego.” **17** “Bhai, bhakaikanganeje nne nangakabhiya, ikabhe pa malabhi gakwe nne gumishile shitamo kulukumbi, gunajile mundujula bhanniye nabhonji. **18** Bhaalugulanga bhala bhakajimanganeje kubheleketa, shakwa shilebho shibhalugwilenje sha malinga shinalolelaga. **19** Ikabhe bhatendaga taukangana ga dini jabhonji na gaka mundu jumo lina lyakwe Yesu numbe amalile, ikabheje a Pauli bhakuti jwankoto. **20** Nne nangashimanya shatenda kwa gene malobhego. Bhai, gunaabhushiye a Pauli monaga shibhaphinje kwenda ku Yelushalemu bhakaukululwe kwa gene malobhego. **21** Ikabheje a Pauli gubhajujile malobhe gapeleshwe kubhakulungwa bha ku Loma, gubhataushile bhatame muulinda mpaka malobhe gabho

gamaliywe na bhakulungwa bha ku Loma. Kwa nneyo gunajile bhatame muulinda mpaka pushinaapeleshe ku bhakulungwa bha ku Loma a Kaishali.” **22** Bhai Agilipa gubhaabhalanjile a Peshito, “Nne namwene natendaga pinga nimpilikanishiye jwene mundujo,” A Peshito gubhashite, “Shumumpilikane malabhi.” **23** Kwa nneyo, malabhi gakwe, bhakulungwa bhana Agilipa bhaliji bhakulungwa bha shilambo shina nngabha ku Yudea na a Bhenike gubhaikenje kulukumbi kwa angalila na bhakulungwanji bha bhakomana ngondo na ashikalongolele bha shilambo. A Peshito gubhalajile a Pauli bhakatolwe bhajinjiywe nnukumbi. **24** A Peshito gubha shite, “Mmakulungwa Agilipa na mmowe nninginji na uwe apano! Nnikummonanga aju munduju, nkumbi gowe gwa Bhayaudi bha pepano na bha ku Yelushalemu bhashimbinganga nne naajangutilanje, bhalijobhelanga kuti akapinjikwa alame. **25** Ikabheje nne nangashibhona shilebho shaatendile shaapinjikwa bhabhulagwe. Pabha a Pauli bayene bhashipinga malobhe gabho gajende ku bhakulungwa bha ku Loma a Kaishali, gungundile kwaapeleka kwa bhenebho.” **26** “Na nne kwa malobhe gabhoga nangali malobhe gammbone ga kwaajandishila bhakulungwa bha ku Loma a Kaishali. Kwa nneyo njikwashema apano kwenu mmanganyanji na mmakulungwa Agilipa, nkupinga mwabhuyanje, mbate shakwajandishila. **27** Pabha ngunabhona ikakonja kumpeleka mundu atabhilwe gwangali taya malobhe galugwilwe jwene mundujo.”

26 Bhai, Agilipa gubhaabhalanjile a Pauli, “Nnaino mmelekete malobhe genu.” Penepo a Pauli gubhajinwile nkono gwabho gubhatandwibhe kubheleketa nkwitapula bhalinkuti. **2** “Mmakulungwa Agilipa, lelo ngunakwiibhona njikola shikono sha jima na mmwe nibheleketa malobhe ga kuitapula, kwa

ngani ja malobhe gowe gubhanugwilenje Bhayaudi. **3** Kwa nneyo mmwe mmayene muimanyi ukoto ikubho ya Bhayaudi na shibhakuti taukangana, bhai ngunakunnjuga mwiipililile kumbilikanishiya.” **4** “Bhayaudi bhowe bhamanyinji nne shinjite tama kutandubhila gwana gwangu, shinjite tama pa shilambo shangu na ku Yelushalemu. **5** Gwaumila bhukala Bhayaudi bhamanyinji nne, numbe bhapingangaga kungong'ondela bhanaakombolanga, pabha kuumila bhukala munaaliji munkumbi gwa Ashimapalishayo, nilikagulila ukoto malajilo ga dini jetu. **6** Na nnaino nyimi apano kuukumulwa ligongo lya kulupalila malajilo gubhagegwilwenje bhanangulungwa bhetu na a Nnungu. **7** Gene malaganogo ni gaakulupalilwa na makabhila likumi limo na gabhili ga bhandunji bhetu, akuno bhalitumbilanga kwaatindibhalila a Nnungu shilo na mui. Mmakulungwa, gubhanugulanga nne Bhayaudi, ni ga jene ngulupaijo! **8** Kwa nndi kwenu mmanganyanji nnakulibhonanga lilobhe lya a Nnungu lya kwaayuyanga bhawilenje linaganishiywa nngabha lya kulupalika?” **9** “Nkali nne namwene naganishiyaga cuti ngunapinjikwa ndende itendi ya kulikana lina lya a Yesu Bhanashaleti. **10** Genego nigundendile ku Yelushalemu. Punapegwilwe malajilo na bhakulungwa bha bhaabbishilanga, njinkwaatabhangaa mmagelesha bhandunji bha ukonjelo. Na pubhabhulagwangaga nne natendaga kunda. **11** Na papagwinji mmashinagogi gowe nashinkwaapotekanga nilikwashishilishiyanga bhajikananje ngulupai jabhonji. Nnjimwa yangu ishinkupunda mbuti akwete shalubha, gumbite kwaapotekanga nkali mulambo ya taliya.” **12** “Bhai kwa ligongo lyolyo pelyo, gumbite ku Dameshiki nilimbegwilwe mashili na malajilo na bhakulungwanji bhaabbishila. **13** Mmakulungwa, puyaliji mui nili mumpanda,

gunishibhweli shilangaya shapunda shilangaya sha lyubha
shilikopoka kunani kunnungu, nimulishila nne na ashaamwanja
ajangunji. **14** Gutugwile pai tubhowe, gumbilikene lilibhe
lilimalanjila kwa Shiebhulania, 'A Shauli, a Shauli! Pakuti
nnaanjima? Nkakombola mmwe kulikoma lionga na lukongono.'"

15 "Nne gumushiye, 'Mmakulungwa mwe agani?' Bhakulungwa
gubhajangwile, 'Nne a Yesu, bhunkwapoteka. **16** Ikabheje
nnjinushe nnjime kwa makongono genu, pabha njikunkoposhela
nkupinga nintende ntumishi jwangu na nkukong'ondela jwa indu
imwibhweli na indu ishininanguye. **17** Shinintapule kubhandunji
bhenu Bhaishilaeli na kubhandunji bha ilambo ina bhunguntuma
kwaajendelanga. **18** Mwaunukulanje meyo gabhonji nkupinga
bhashokangane nnubhindu bhajinjilangane nshilangaya,
bhalekanje kuntumishila Lishetani bhaatendebhushilanje a
Nnunu, nkupinga bhaleshelelwanje yambi yabbonji na
bhabhanganje munkumbi gwa bhandunji bhaagulwenje na a
Nnunu kwa ligongo lya ngulupalila nne.' **19** "Kwa nneyo, mmwe
a mpalume Agilipa, nne nangagakana gene gunigabhweli
gakopweshe kunnungugo. **20** Ikabhe gundandwibhe kulunguya
kubhandunji bha ku Damesiki na kubhandunji bha ku
Yelushalemu na nshilambo showe sha ku Yudea na kubhandunji
bha ilambo ina. Nilikwaakwiyanga bhaatendebhushilanje a
Nnunu na bhalangulanje kwa itendi kuti bhaiptilenje. **21**
Kwa lyene ligongolyo Bhayaudi gubhangamwilenje nili nniekalu
gubhalinjilenje kumulaga. **22** Ikabheje a Nnunu gubhanyangutile,
kwa nneyo mpaka lelo juno ngunaajima nilikong'ondela
kubhandunji bhakulungwanji na bhashoko. Ingutaya nne
nngabha ina, ikabhe ibhatashiyenje ashinkulondola bha a
Nnunu na a Musha kuti shiikoposhele, **23** kuti a Kilishitu

bhashinkupinjikwa bhapotekwe na kubha bha ndandubho kuyuka
kukopoka kubhawilenje, nkupinga bhalunguye kuti nnaino
shilangaya shaagombolwa bhandunji, shinakwaalangashiyanga
bhandu bhowe, Bhayaudi na bhandunji bha ilambo ina.”

24 A Pauli bhakaishileje penepo nkuibheleketela, a Peshito
gubhabhashite kwa utiya, “A Pauli! Nshikola shalubha! Kushoma
kwenu kwa punda, kunakumpuganya lunda!” **25** Ikabheje a
Pauli gubhajangwile, “Mmakulungwa a Peshito nne nangali
shalubha. Ingubheleketa ino ni ya kweli na ya lunda. **26**
Agano malobhe gano mwe mmakulungwa nngamanyi, kwa
nneyo nangali bhoga kummalanjila. Pabha genega gamanyishe
kwenu mmwe, gangali ng’iyo. **27** Mmakulungwa Agilipa,
bhuli nnikulupalila ga ashinkulondola bha a Nnungu bha
bhukala? Nimumanyi kuti nnikwaakulupalilanga.” **28** Agilipa
gubhaajangwile a Pauli, “Punkuganishiya kashokope nnei
shindende nne kubha Nkilishitu?” **29** A Pauli gubhaajangwile,
“Ngunakwaajuga a Nnungu kuti ibhe kwa malobhe gashokope
eu gamagwinji, nngabha mmwe jikape, ikabhe na bhandunji
bhowe bhaambilikananga nne lelo, ibhe nnaino eu pakaabhe,
bhabhanganje malinga nne, ikabheje nngabha na mindondolo
jino.” **30** Penepo bhakulungwa Agilipa na liwali na a Bhenike
na bhowenji bhatemingenenje pepala bhala, gubhajiminji. **31**
Bhakajabkulanganeje, gubhabhalanjilenenje, “Aju munduju
shakwapi shatendile shaapinjikwa kubhulagwa wala kutabhwa.”

32 Na bhalabho Agilipa gubhaabhalanjile a Peshito, “Aju munduju
gwangali pinga malobhe gakwe gakamaliywe kwa a Kaishali,
akagopwelwe.”

27 Bhai ikaamulishweje kuti tujende ku Italia na meli, a Pauli
na bhaatabhwanga bhananji gubhabhishilwenje muulinda gwa a

Juliashi bhaaliji bhakulungwa bha bhaakomana ngondo bha shikundi shishemwa “Shikundi sha a Kaishali Augushito.” **2**
Gutukwelile meli ja ku Adilamito jaliji tayali kujabhula mwanja pitila mbwani ya shilambo sha ku Ashia, gututandwibhe mwanja.
A Alishitako kopoka ku bhandunji bha ku Makedonia kukopoka ku Teshalonike paliji na uwe. **3** Pa malabhi gakwe gutuishe ku Shidoni na meli. A Juliashi gubhaatendele a Pauli mituka kwa kwaaleshelela bhajende kwa ashaambwiga ajabho bhakapegwe indu ibhapingaga. **4** Kujabhula penepo gutupite na mwanja, pabha mbungo jatendaga puga koposhela mmujo jetu, gutubhambalile mmbali ja ku Shilia. **5** Tukapiteje litanda likulu lya ku Kilikia na ku Pampilia, gutuishe ku Mila, shilambo sha Likia. **6** Kweneko bhakulungwa bha bhakomana ngondo bhala gubhajiimene meli jimo ja ku Alekishandilia jilipinga jabhula kwenda ku Italia, kwa nneyo gubhatukweshiye mwenemo. **7** Gutupite na mwanja gwetu mbolembole kwa mobha gamagwinji, kwa lajilila gutuishe tome na ku Nido. Pabha mbungo jatendaga kutuibhilila, gutupitile mmbali ja ku Kiletome na ku Shalimone. **8** Gutupitile nnyenje jakwe kwa lajilila gutuishe mmbali jimo jishemwa “Bhandali ja Mmbone”, tome na shilambo sha Lashea. **9** Gakapiteje mobha gamagwinji, mpaka lyubha lya tabha gulipitile. Na mwanja gwa mmashi pugwaliji gwa jogoya. Bhai, a Pauli gubhaaleshiyenje bhalinkuti, **10** “Mmashileunji, ngunakuubbhona aguno mwanja guno, upingabha gwa atali na shonanga, nngabha kwa mishigo na melipe, ikabhe nkali na gumi gwetu.” **11** Ikbheje bhakulungwa bha manjola bhala gubhapilikanishiye kaje malobhe ga bhaalongoya meli na bhayene meli nileka pilikanishiya malobhe ga a Pauli. **12** Pabha jene bhandalijo jikatemiji pammbone pa tama mobha ga shipwepwe, bhandunji

bhabhagwinji mmwanja mula gubhapinjilenje tujende na mwanja tukaishe ku Poenike monaga shiitendeshe, nitama kweneko mobha ga shipwepwe. Poenike ni bhandali ja ku Kilete jiloya kwibhanda kuliwila lyubha na kuntundu kuliwila lyubha. **13** Bhai, mbungo jammbone ja kopoka nnyuma jetu jikupundaga kupuga, gubhaganishiyenje kuti gubhatumbililenje gala shigatendeshe, gubhashoshiyenje nanga, gubhapitengenjenje na mbwani tome na mbwani ja ku Kilete. **14** Ikabheje pangakabhika, mbungo japunda ja mbuti shimbunga jishemwa "Mbungo ja kashikashi," kukopoka ku Kilete shilambo shitimbililwe na mashi. **15** Mbungo jikukomaga mmeli na pabha jikakombweleje kutaukangana najo gutujileshile jinokolwe na mbungo jila. **16** Gutupitile shangu shilambo shimo shitimbililwe na mashi shishemwa Kauda gutwikombolele kukweya ntumbwi, ikabheje kwa lajilila. **17** Bhakakweyanjeje gubhajitabhlenje meli jila kwa pishiya nngoji pai jakwe. Bhatendaga jogopanga kutitimila munng'anji nnyenje bhaali kumbwani ja ku Shiliti. Kwa nneyo gubhatuluyenje indu yaigwinji na ligubho lya tejela mbungo nikujileka meli jinokolwe na mbungo. **18** Shimbunga shikupundaga kupugakwa mashili na pa malabhi gakwe tukujailaga mmashi mishigo ja mmeli jila. **19** Lyubha lya tatu, gubhajailenje indu yaigwinji na ya kamulila maengo ya mmeli mula kwa makono gabhonji ashaayene. **20** Kwa mobha gamagwinji twangalibhona lyubha wala ndondwa, shimbunga gushipundile kupuga, mpaka gutuwile ntima ga tapulwa. **21** Na bhakatamanjeje mobha gamagwinji gwangali kulya shalya, a Pauli gubhajimi pakati jabhonji, gubhashite, "Mmakulungwanji, kaliji nkambilikanishiyenje ninngajabhula ku Kilete kula. Tukanalaje nneino na tukanapate ashi shonangashi. **22** Ikabheje nnaino ngunakunnjuganga, nkolanje ntima, pabha

jakwa nkali mundu jumo munkumbi gwenunji shawe, ikabhe melipe shijiangabhanishe. **23** Pabha shilo sha lelo malaika jwa a Nnungu, a Nnnungu bhandendile nne kubha najwabho na bhungwatindibhalila ashinkujima tome na nne, **24** gwamalanjile. ‘Pauli unajogope! Unapinjikwa ujime kwa a Kaishali na kabhili a Nnungu kwa uguja gwabho bhashikupa bhandunji bhowe bhalongenenje na ugwe jwakwapi shawe.’ **25** Kwa nneyo mmashileunji nng'angalanje! Pabha ngunakwaakulupalila a Nnungu kuti ibhamalanjile ila shiibhe nneyo peyo. **26** Ikabheje mbungo shijitunokole nnyenje shilambo shitimbililwe na mashi shino.” **27** Shilo sha lyubha lya likumi limo na nsheshe jikapujeje mbungo, tulinokolelwa akuno na kukuno nnitanda likulu lya Adilia. Tome na pakati shilo bhatumishi bha mmeli mula gubhabhweninji mbuti tunabhandishila litaka. **28** Kwa nneyo gubhatolilenje nngoji nitabhila shindu shatopa, nilinga mashi mugapelile, nibhona kutaliya kwa makono makumi nsheshe. Bhakajendangananjeje kashoko gubhalinjilenje kabhili gubhapatilenje shindu sha makono makumi gatatu. **29** Kwa jogopa kutitimila mmaganga gamakulungwa, gubhatuluyenje nanga nsheshe ya kunyuma ja meli, gubhajujilenje kushe shangu. **30** Bhatumishi bha mmeli mula gubhapinjilenje kutoloka, bhalituluyanga ntumbwi gwa kwitapulila mmashi, kwitembanga mbuti bhakwenda tuluyanga nanga ja mmujo. **31** Ikabheje a Pauli gubaabhalanjile bhakulungwa bha manjola na ashimanjola bhabho, “Bhanganyanjibha bhakatamanje nkati meli nkatapulwanga.” **32** Bhai ashimanjola bhala gubaikitenje migoji jatabhilwe muntumbwi jila, gubauleshilenje utolwe na mashi. **33** Tome na kumashelo, a Pauli gubaashondelesheyenje bhowenji bhalanganje shalya, bhalinkuti, “Lelo lyubha lya

likumi limo na nsheshe nninginji nkulolela gwangali kulya shoshowe. **34** Bhai, ngunakunshondelesheyanga nnianganje shalya shishintapulanje. Pabha nkali luumbo lwa mu ntwe ukamundu jojowe lukaobha." **35** A Pauli bhakamaliyeje kubheleketa genego gubhatolile nkate, gubhatendile ej a kwa a Nnungu bhowe bhalikwaabhonanga, gubhagabhile gubhatandwibhe kulya. **36** Penepo gubhatagwilwenje ntima na bhowenji gubhalilenje shalya ashaayene. **37** Na mmeli mula putwaaliji tubhandu mmia pa bhili na makumi shabha na shita. **38** Bhakalyanganje nijukuta, gubhapunguyenje nshigo gwa meli kwa jaa ngano mmashi. **39** Kukasheje, bhatumishi bha mmeli mula bhangashimanyanga shilambo shila, ikabhe gubhalibhweninji litingo limo nnyenje bhaali, gubhabhalanjilenenje bhajimikanje meli kweneko, monaga shiikomboleshe. **40** Kwa nneyo gubhakutulenje nanga nikwiileka nnitanda likulu na kabhili gubhagopolenje migoji ja tabhila nkongo gwa longosheya meli, gubhatabhilenje ligubho lina lya tejela mbungo nkupinga meli jijende shammujo, gubhaloshiyenje kunyenje bhaali. **41** Ikabheje gubaikengenenje pugaimana mabhutuka gabhili ga bhaali, meli gujitimile. Mmujo ja meli mukutitimilaga nnitaka gujitemi gwangali kutenganyika. Kunyuma meli kukutandubhaga kutemeka ipande ligongo lya komwa na mabhimbili. **42** Ashimanjola gubhapinjilenje kwaabhlaganga bhatabhwa bhowe, nkujogopa bhanajojelelanga mpaka kunyenje bhaali nitolokanga. **43** Ikabheje bhakulungwa bha manjola bhala bhashinkutumbilila kwaatapula a Pauli, gubhaalimbiyenje bhanatendanje gubhatumbilenje gala. Gubhatumile bhaakombolanga kujojelela, bhatandubhanje kutumbushila mmashi bhajojelelanje mpaka kulitaka, **44** bhananji

bhakagulanje bhaikamulilanje mmbao eu mwipande ina ya meli.

Shana nneyo tubhowe gutuishe kulitaka tubhabhakoto.

28 Tukaisheje ulele kulitaka, gutumumanyi cuti shilambo shitimbililwe mashi shila pushashemwaga Melita. **2** Bhashilambo bha kweneko gubhatutendelenje mituka ja kaje. Pabha ula jatendeganya na twashinkukola mmbepo, gubhakumbenjenje moto gubhatushemelenje tubhowe. **3** A Pauli gubhalokwete neng'ene nshigo gumo gubhakwiile pamoto. Bhai, penepo kwa ligongo lya lyoto lya moto gula gwakopweshe lijoka jwa luma nneng'ene mula akwaanyembelaga a Pauli munkono. **4** Bhashilambo bha pepala bhakabhonanjeje lijoka alikwaakwela a Pauli, gubhabhalanjilenenje, "Ipingaga aju munduju ashibhulaga mundu nkali alamile gwangali kuwa mmashi, nnungu jwetu jwankongwe ashemwa Aki akanneka alame!" **5** Ikabheje a Pauli gubhampukunyishiye pamoto lijoka jwa luma jula na wala jwangaaluma nkali kashoko. **6** Bhandunji bhala gubhalinginji nkulolela cuti nkono gula shiguimbe eu a Pauli shibhagwe niwa popo. Bhakalolelanjeje paakabha nibhona wala shakwapi shikwakoposhela a Pauli, gubhatindigenjenje ng'aniyo yabbonji gubhashitenje cuti, jweneju nnungu. **7** Tome na pepala jashinkupagwa migunda ja bhakulungwa bha shene shilambo shatimbililwe na mashisho lina lyabho pubhashemwaga a Pabhuliashi. Gubhatushemile kunngwabho kwa ntima gwa umbwiga, gututemi ujeni mobha gatatu. **8** Ainabhabho a Pabhuliashi bhashinkusheluka na guluma, bhalo bhagonile pa shinanda. A Pauli gubhapite kwalola na gubhajujile Nnungu, gubaabhisihile makono gubhaalamiye. **9** Gakatendesheje genego, bhalwelenji bhowe nnepeila pa shilambo pala gubhaaishilenje a Pauli na gubhalamiyenje. **10**

Nabhalabhonji gubhatujogopenje kwa kaje, tukapanganisheje
kujabhula, gubhapashilenje indu yaigwinji itwaipinjile. **11**
Jikapiteje myei jitatu gututandwibhe mwanja gwetu na meli
jimo ja ku Alekishandilia jishemwa, "Ashinnungu bha Mmba."
Pujaliji kweneko mióngwe jowe ja shipwepwe. **12** Gutuishe
shilambo sha ku Shilakusha gututemi mobha gatatu. **13**
Tukajabhluleje penepo gututimbilile gutuishe ku Legio. Likapiteje
lyubha limo, mbungo ja kushi jikutandubhaga kupuga na
gakapiteje mobha gatatu gutuishe kubhandali ja Potioli. **14**
Kweneko gutwaimenenje bhakilishitu ajetunji gubhatujujilenje
tutame nabhonji juma jimo. Gutuishe ku Loma shana nneyo.
15 Bhakilishitu ajetunji bha ku Loma bhakapilikananjeje kuti
tushiika, gubhaikengenje kukutuposhela kumbwani ja Apio
na Kunyumba Itatu ya Bhajeninji. A Pauli bhakaabhonanjeje
gubhatendile eja kwa a Nnungu, gubhatagwilwe ntima. **16**
Tukaisheje ku Loma a Pauli gubhaleshelelwe kutama kujika
muulinda uka linjola jumo. **17** Gakapiteje mobha gatatu a
Pauli gubhaashemilenje ashikalongolele bha Shiyaudi bha
shene shilambosho. Bhakaimananjeje gubhaabhalanjilenje,
"Ashapwanga, shakwa shindendile na wala tauka ikubho ya
ashinakulubhetu, nashinkukamulwa ku Yelushalemu kula na
kamuywa mmakono ga Bhaloma. **18** Bhakamuyanjeje nibhona
kuti shakwa shinebhile, gubhapinjilenje kung'opola bhanekanje.
19 Ikabheje Bhayaudi bhananji gubhakanilenje, gunyujile
malobhe gangu gakamaliywe na bhakulungwa bha ku Loma a
Kaishali, nkali ngakweteje malobhe gogowe ga kwaalugulanga
bhashilambo ajangunji. **20** Bhai, kwa ligongo lya genego,
njikunshemanga kunnolanje na tukungulushe, pabha njitabhwa
ajino mindololo jino ligongo lya malagano ga a Nnungu ku bha

Ishilaeli gala.” **21** Bhalabhonji gubhaalugulilenje, “Uwe tukanabhe poshela ntenga eu bhaluwa ja ngani jenu kopoka ku Yudea, wala jwakwa nkilishitu jojowe aishe apano kutubhalanjila lilobhe lyolyowe linnebhile mmwe. **22** Ikabheje tunapinga tupilikane shinkuganishiya mmwe, pabha uwe tumumanyi cuti mmbali yowe gwene nkumbigo unalugulwa mwangali mwambone.”

23 Bhakalagananjeje lyubha lya imana, gubhaikengenenje bhandunji bhabhagwinji nnyumba jibhatamaga. Tandubhila lyamba mpaka ligulo a Pauli gubhaatalashiyenje ga Ukulungwa gwa a Nnungu, bhalilinga kwaatendanga bhakundanje ngani ja a Yeshu kwa talashiya shalia ja a Musha na ashinkulondola bha a Nnungu. **24** Bhananji gubhakundilenje malobhe gala, ikabheje bhananji bhangakulupalilanga. **25** Bhai, gubhajabhulengene akuno bhalibhalekenenje ng’aniyo ga malobhe ga a Pauli ga cuti, mbena Mbumu jwa Ukonjelo abhelekete mwa mmbone na ashinakulubhenunji kwa kang’wa ja ankulondola bha a Nnungu a Ishaya, **26** bhalinkuti, “Jenda kubhandunjibha ukaabhalanjilanje. Kupilikana shimpilkananje, ikabheje nkamumanyanga, Kulola shinnolanje, ikabheje nkaibhonanga. **27** Pabha mitima ja bhene bhandunjibha jisitopa, bhashiibhang makutu gabhonji meyo gabhonji bhashikupilanga. Gwangali nneyo, bhakalolilenje na meyo gabhonji, bhakapilikenenje na makutu gabhonji. Bhakaelewenje mmitima jabhonji, bhakaandendebhushilenje, bhashite Bhakulungwa, ngaalamiyenje.” **28** Kungai a Pauli gubhashite, “Bhai, mmumanyanje cuti ntenga gwa a Nnungu gwa ngani ja ntapulo upelekwe ku bhandu bha ilambo ina. Bhalabhonji shibhapilikilanje!” **29** Bhakabheleketeje genego, Bhayaudi gubhajabhulenje, bhalipita taukangana ashaayenenji.

30 A Pauli gubhatemi ku Loma yaka ibhili nnyumba jibhapeshe

bhayene kwalipila mbiya, bhatendaga kwaposhelelanga bhowe
bhaowelangaga. **31** Bhatenda lunguya ga Ukulungwa gwa a
Nnungu na jiganya ngani ja Bhakulungwa a Yesu Kilishitu
gwangali bhoga na jwakwa mundu abhalimbiyaga.

Bhaloma

1 Nne Pauli ntumwa jwa a Yeshu Kilishitu, njemilwe na a Nnungu kubha ntume jwa lunguya Ngani ja Mmbone. **2** Jene Ngani ja Mmboneji, jishinkulajilwa na a Nnungu bhukala, kupidila ashinkulondola bhabho Mmajandiko ga Ukonjelo. **3** Ngani ja Bhana bhabho, Bhakulungwa bhetu a Yeshu Kilishitu, bhabhelekwe shigundu nnukolo lwa a Daudi, **4** na Mmbumu ya ukonjelo gwabho bhashinkuagulwa kubha Mwana jwa a Nnungu, kwa kuyuka kwabho bhakaweje, yani a Yeshu Kilishitu Bhakulungwa bhetu. **5** Kupitila kwa bhenebho, uwe tushipegwa nema na utume, nkupinga bhandu bha ilambo yowe twaalongoyanje nkukulupalila na nkukunda lina lyabho kwa ligongo lya ukonjelo gwabho. **6** Na mmanganyanji nneila peila, nninginji munkumbi gwa bhashemilwenje na a Yeshu Kilishitu, kubha bhandunji bhabho. **7** Ngunakunnjandishilanga mmowe nninginji ku Loma, nkupingwangwa na a Nnungu na nshemilwenje mmanganje bha ukonjelo. Ngunakunnjujilanga nema na ulele, kwa Atati a Nnungu na Bhakulungwa bhetu a Yeshu Kilishitu. **8** Ngunatandubha kwa kwaatendela eja a Nnungu bhangu, kupidila a Yeshu Kilishitu kwa ligongo lyenunji mmowe, pabha ngulupai yenunji inalunguywa nshilambolyo. **9** A Nnungu bhungwatumishila kwa ntima gwangu gowe, nkulunguya Ngani ja Mmbone ja Bhana bhabho, ni bhakong'ondela bhangu shinguti kunkumbushilanga mobha gowe. **10** Ngunatenda nneyo mobha gowe, nkujuga Nnungu kwangu kuti, a Nnungu bhapingaga bhambe malanga, nyiye kunngwenunji agano mobha gano. **11** Pabha ngunalokolila kwa kaje kummonanga, nimpanganje shiukilo sha mmbumu, nkupinga nshimilikwanje. **12** Kwa nneyo shitutagane ntima, kila mundu kwa ngulupai

jika mwine, ngulupai jenu mmanganyanji, na ngulupai jangu nne. **13** Ashaalongo ajangunji ngunapinga mmumanyanje kuti, papagwinji nashinkutumbilila kunng'owelanga, ikabheje mpaka nnaino a Nnungu bhashing'ibhilila. Pungupinga na kweneko naapatanje bhandunji bhakwaakulupalilanga a Yesu Kilishitu, malinga shinaapatilenje mwiilambo ili nngabha ya Bhayaudi. **14** Njikola ligambo muntima kwa ligongo lya Bhayunani na bhangalinji Bhayunani. Njikola ligambo ku bhakwetenje lunda na bhangalinji lunda. **15** Kwa nneyo nne njengwa kulunguya Ngani ja Mmbone, nkali kungwenunji nninginji ku Loma. **16** Nne ngakujibhonela oni Ngani ja Mmbone, pabha jenejo, ni mashili ga a Nnungu gapeleshela ntapulo kubhandu bhowe bhaakulupalilanga, kutandubhila ku Bhayaudi na mpaka ku Bhagiliki. **17** Pabha Ngani ja Mmbone jinalanguya a Nnungu shibhakuti kwaapanganga bhandunji aki. Lyeneli linatendeka kaje kwa ngulupai, malinga shiishite jandikwa, "Akwete aki shaatame kwa ngulupai." **18** Kukoposhela kunnunu, a Nnungu bhashilangula nnjimwa jabho ku bhandunji bhakakwaakagulanga a Nnungu, bhaakananga ya kweli kwa itendi yabthonji yangali ya mmbone. **19** Pabha indu yowe imanyika kuti ya a Nnungu bhai manyinji, pabha bhayene a Nnungu bhalangwiye indu yabho. **20** Indu yaishiywe kuumila bhukala gwa panganywa shilambolyo, nnaino inabhoneka nimanyika, yani liengo lyabho na mashili gabho ga pitipiti na Unnunu gwabho, kupinga bhanakolanje sha bheleketa! (*aüdios g126*) **21** Nkali bhakaamanyanjeje a Nnungu, bhangaakuyanga na wala kwaatendela eja, malinga shiipinjikwa, ikabheje ng'aniyo yabthonji ishipuganyika, na mitima jabthonji jangali lunda jishikwaablikanga nnubhindu. **22** Bhanakwitembanga kuti bhashikolanga lunda,

mbena bhangumba. **23** Bhaleshilenje kwaatindibhalila a Nnungu bha ukonjelo na bha pitipiti, nikuitindibhalila yanamu ili malinga bhandu bhaawanganga, eu mbuti ijuni, eu bhannyama, na bhaatambalanga pai. **24** Kwa lyene ligongolyo, a Nnungu gubhaaleshilenje bhakagulanje ilokoli ya nyata ya mmitima jabhonji, na tendelana indu ya nyata nkulabhalabha, nikwiitokomaya iilu yabhonji. **25** Bhanatindiganyanga indu ya kweli ya a Nnungu nkupinga bhakagulanje ya unami. Bhalitindibhalilanga shiumbe, kuleka kwaatindibhalila bhayene Ashipanganya, bhapinjikwa lumbililwa pitipiti! Amina. (*aiōn g165*)

26 Kwa nneyo, a Nnungu bhashikwalekanga bhanaishimiyanganje nikagulila ilokoli ya nyata. Nkali bhanabhakongwe, bhashilekanga itendi ya shibhelekwe ya shiilu shabhonji, nitenda sha munape. **27** Nneyo peyo, na bhanabhalume gubhaaleshilenje kwaalokolilanga ashaakongo bhabhonji, nilokolilana ashaayenenji. Bhanabhalume gubhatendilenje indu ya nyata, gubaishemelenje ukumu ashaayenenji, kwa ligongo lya itendi yabhonji yangali ya mmbone. **28** Malinga shibhakanilenje kubha na a Nnungu nng'aniyo yabhonji yangali ya mmbone, a Nnungu gubhaaleshilenje bhaikagulanje ng'aniyo yabhonji, bhatendanje yangali ya mmbone. **29** Bhashigumbalilwanga na kila gwangali gwa mmbone, kukwetela, na joloka, na lupimililo, na bhulaga, na mipwai, na unami, na ng'aniyo yangali ya mmbone, na bha lung'wenyi. **30** Kabhili, bhaalambililanga na bhakwaashimanga a Nnungu, na bhakwetenje nngomo, na bhakwetenje mbwinya na kwiipuna, bhaakumbuyanga itendi ya ambi ya nyata, na bhakwaapilikanishiyanga bhaakwetenje. **31** Na bhene bhangalinji lunda, na bhakaajalinji malagano, na bhakakwaapinganga ashaalongo ajabhonji, wala bhangalinginji

shiya. **32** Bhalikumumanya kuti shalia ja a Nnungu jinaataya kuti, bhandunji bhatendanga nneyo bhanapinjikwanga kuwa. Nkali nneyo, nngabha bhanatendanga genego ashayenenjipe, ikabheje bhene bhatendanga yeneyo bhala bhanakwaalumbilanga.

2 Kwa nneyo, monaga nkwiitemba kwaukumula bhananji, nkakola sha kwiibheleketela. Nnakwiukumula mmayene, pabha numbe mmwe inkutenda yoyo peyo. **2** Na uwe tumumanyi kuti ukumu ja a Nnungu ni ja kweli, kwa bhatendanga indu malinga yeneyo. **3** Ikabheje mmwe anamundupe, nkwaaukumulanga bhaatendanga indu malinga yeneyo, akuno mmayene nnitenda yoyo. Bhuli, punkuganishiya kuti shimwiembuye na ukumu ja a Nnungu? **4** Eu nnakuunyegaya uguja gwa a Nnungu, na kwiitimalika na kwiipililila kwabho, gwangali kumumanya kuti uguja gwabho unakunnongoya mwiiipete? **5** Ikabheje kwa ligongo lya mitau na nonopa kwa ntima gwenu, nnakwiigosheya nnjimwa, lyubha lya nnjimwa ja a Nnungu, na ukumu jabho ja aki. **6** Pabha lyene lyubhalo, a Nnungu bhapinga kwiya kwaalipanga bhandunji bhowe malinga ibhatendangaga. **7** Bhene bhaatendanga ya uguja gwangali kutotoshela, bhanaloleyanga kukopoka kwa a Nnungu, ukonjelo na ishimika na gumi gwangali angabhanika, na shibhapegwanje gumi gwa pitipiti. (*aiōnios g166*)
8 Ikabheje bhananji bhaakwetelanga na bhaakananga indu ya aki bhala, nikagulila yangali ya mmbone, shibhajibhonanje nnjimwa ja a Nnungu. **9** Mboteko na shilaje shiimpate mundu jojowe atenda yangali ya mmbone, kutandubhila Bhayaudi na Bhagiliki.
10 Ikabheje, ukonjelo na ishma na ulele, shibhapegwanje bhandunji bhaatendanga indu ya aki bhala, kutandubhila Bhayaudi na Bhagiliki. **11** Pabha a Nnungu bhangali luagu.
12 Bhowe bhatendilenje yambi gwangali kujimanya shalia

ja a Musha, shibhapotekwanje nngabha kwa ligongo lya shalia, na bhowe bhatendilenje yambi akuno bhalikujimanyanga shalia ja a Musha, shibhaukumulwanje kwa tolelela shalia ja a Musha pejo. **13** Na nngabha bhakujipilikananga shalia ni bhakwete aki kwa a Nnungu, ikabheje bhaakundanga shalia bhala, nibhaakolanga aki. **14** Bhandunji bha ilambo ina bhangalinginji shalia, pubhaatendanga indu ya shalia kwa ng'aniyo ya muntima gwabhonji bhanabhanganga bhandunji bha shalia, nkali bhanakolanje shalia. **15** Bhanalanguyanga malajilo ga shalia jijandishwe mmitima jabhonji, ng'aniyo yabhonji ilikwakong'ondelanga na ilikwalonganga na guna ilikwaabheleketelanga ashaayenenji. **16** Yeneyo ni ipinga koposhela, lyubha lya ukumu ja a Nnungu, pushibhaukumule indu ya nng'iyio kupitila a Yesu Kilishitu, malinga shijikuti taya Ngani ja Mmbone jingulunguyaji. **17** Pabha mmwe nkwiishema mmayene Mmayaudi, nnakulupalila shalia, na nnakwiiniya kuti bha a Nnungu. **18** Mmwe nnikuimanya ibhapinga a Nnungu, na kunda indu ya mmbone, pabha nshijiganywa na shalia. **19** Mmwe punkwiiganishiya kuti mmayene akalongolele bha ashinangalole, na kabhili mmwe shilangaya sha bhandu bhalinginji nnubhindu, **20** mmajiganya bha mabhelu na bhana bhashoko, pabha kwa shalia, mwiimanyi ukoto indu ya lumanyio na kweli. **21** Bhai mmwe nkwaajiganyanga bhananji, kwa nndi nkakwijiganya mmayene? Mmwe nkwaalimbiyanga bhananji bhanajibhanje, akuno mmayene nnijibha. **22** Mmwe nkulunguya kuti, "Mundu analabhelabhe" akuno mmayene nnilabhalabha. Inakunshima yanamu ya ashinnungu, mbena nnijibha indu ya mmajumba gabhonji. **23** Nnikwiiniya kuti nkewete shalia ja a Nnungu, nkakumumanya kuti kuleka kamula shalia, nnakwanyegaya

a Nnungu? **24** Malinga Majandiko ga Ukonjelo shigalugula, "Bhandunji bha ilambo ina, bhashikulitukananga lina lya a Nnungu, kwa ligongo lyenunji." **25** Pabha kujaluka kunapwaa punkukamulila shalia ja a Musha, ikabheje nkakamulile shalia ja a Musha, shimme mbuti mmalenje. **26** Bhai monaga mundu jwangajaluka anakamulila shalia ja a Musha, bhuli na ulenje gwakwe akaganishiywa kuti ajalwishe? **27** Na jwene jwa nngabha munkubho gwa jaluka, ikabhe anakamulila shalia ja a Musha, bhuli akanng'ukumula mmwe nni munkubho gwa jaluka, na akuno nkakamulila shalia ja a Musha? **28** Pabha jwenejo, nngabha Nnyaudi kwa bhoneka palanga, na kujaluka nngabha kwa nshiilupe. **29** Ikabhe jwenejo ni Nnyaudi, ali Nnyaudi jwa nkati, na kujaluka kwakwe kwa muntima kwa Mbamu jwa Ukonjelo, nngabha kwa mmajandiko ga shalia. Mundu jwa nneyo, kuiniyya kwakwe nngabha kubhandunji ikabhe kwa a Nnungu.

3 Bhai, Nnyaudi akwete nndi sha kwaapundanga bhananji?
Na kujaluka kupwaa nndi? **2** Elo! Kulipwaa kwa kila shindu.
Pabha Bhayaudi ni bhatainji kupegwa ntenga gwa a Nnungu.
3 Bhai igala shiibhe bhuli monaga bhananji munkumbi gwabbonji bhangakulupalilanga? Bhuli ungakulupalila gwabbonji shigupuganye kukulupalika kwa a Nnungu? **4** Ng'oo, wala kashoko! A Nnungu ni bhakulupalika, na kila mundu nname, malinga shigalugula Majandiko ga Ukonjelo kuti, "Mmwe a Nnungu, kila punkubheleketa, malobhe genu gabhoneshe kubha ga aki, na nkuukumula, mmwe ukumu jenu, jibhoneshe kuti ja kweli." **5** Ikabheje, monaga yambi yetu inalanguya kuti a Nnungu bhanatenda kwa aki, bhai tulugule nndi? Bhuli, tujile a Nnungu bhakaatenda aki pubhaalangula nnjimwa jabho

kwetu uwe? (Penepo ngunabheleketa shigundu). **6** Ng'oo, wala kashoko! Pabha ikaliji nneyo, a Nnungu bhakashiukumwile bhuli shilambolyo? **7** Pana shinnugule kuti, "Ibhaga unami gwangu, ni ulanguya kuti a Nnungu ni bhaakulupalika na ni bha ukonjelo, bhai pakuti ngunaukumulwa kuti njikola yambi?" **8** Bhananji bhanakutulambilanga, bhalinkutinji, eti uwe tunakupulu kuti, tutende yambi nkupinga ga mmbone gaishe. Tumumanyi kuti, bhakutulambilangabho shibhapatanje ukumu ja aki. **9** Igala tujile bhuli? Bhuli, uwe Bhayaudi tubha mmbone kupunda bhananji? Ng'oo! Wala kashoko. Pabha tulangwiye kuti Bhayaudi na Bhagiliki, bhowe ni bhatumwa bha yambi. **10** Malinga shigalugula Majandiko ga Ukonjelo, "Jwakwapi nkali jumo akwete aki! **11** Jwakwapi mundu akwete lumanyio, Wala akwaaloleya a Nnungu. **12** Bhowe bhashiobhang, Bhowe bhashilebhanga, Jwakwa atenda ya mmbone, Jwakwapi nkali jumo. **13** Malobhe kopoka nkang'wa yabhonji ga nyata, mbuti makabhuli gangakulilwa, Ilimi yabhonji ishigumbala unami, Kang'wa yabhonji inakopoka malobhe ga ushunu mbuti gwa lijoka. **14** Kang'wa yabhonji ishigumbala malosho na malobhe ga poteka. **15** Bhanabhushilanga kuubhulaga. **16** Popowe pubhakwendangana, bhanabhanganga shiumilo sha angabhanya na mboteko. **17** Wala mpanda gwa ulele bhakakuumanyanga. **18** Pameyo gabhonji kwakwa kwaajogopa a Nnungu." **19** Bhai tumumanyi kuti shalia ja a Musha, ni kwa ligongo lya bhandunji bhaakulupalilanga shalia, nkupinga bhanakolanje shindu shoshowe sha bheleketela, na shilambolyo showe pushili pai ja ukumu ja a Nnungu. **20** Pabha jwakwa mundu jojowe shaapate aki kwa a Nnungu, kwa ligongo lya kamula shalia ja a Musha, pabha liengo lya shalia, ni kulanguyape

kuti, mundu ashitenda shambi. **21** Ikabheje nnaino, aki ja a Nnungu jimanyishe, nngabha kwa kagulila shalia, malinga shiyalajilwe mmajandiko ga a Musha na ga ashinkulondola bha a Nnungu. **22** Jene aki ja a Nnungu pujikwiya kwa kwaakulupalila a Yesu Kilishitu. A Nnungu bhanatenda nneyo ku bhowe bhaakulupalilanga, pabha lwakwa luagu. **23** Pabha bhandunji bhowe bhashitendanga yambi, nitubhilwa na ukonjelo gwa a Nnungu. **24** Ikabheje bhanabhalanganishiywanga aki gwayoyo kwa nema ja a Nnungu, nkulundana a Yesu Kilishitu bhakwaagombolanga. **25** A Nnungu bhashinkwaashoya a Kilishitu bhabhe mbepei ja gombola yambi ya bhandunji. Kupitila ngulupai ja mminyai jabho. A Nnungu bhashinkutenda nneyo nkupinga bhalanguye aki jabho, pabha bhashinkuleshelela yambi ya bhukala gwangali kwiiukumula. **26** Bhalanguye aki jabho agano mobha gano, nkupinga bhabhe bhakwete aki na kummalanganishiya aki akwaakulupalila a Yesu. **27** Bhai, kuli kwei kwiiiniya? Kwakwa! Kwa nndi? Bhuli kwa kamula shalia? Ng'oo! Ikabhe kwa ligongo tunakulupalila. **28** Bhai penepo tunabhona kuti mundu anabhalanganishiywa aki kwa ngulupai yakwe, wala nngabha kwa itendi ya shalia ja a Musha. **29** Eu bhuli, a Nnungu ni a Nnungu bha Bhayaudipe? Nngabha a Nnungu bha ilambo ina? Elo, nneila peila ni a Nnungu bha ilambo ina. **30** A Nnungu ni bhamo, bhapinga kwabhalanganishiyanga aki Bhayaudi, kwa ngulupai jabhonji, na bhandunji bhangajalukanga, kwa ngulupai jabhonji. **31** Bhai bhuli? Tunakujijaa shalia ja a Musha kwa ngulupaijo? Ng'oo wala kashoko! Ikabhe kupunda nneyo tunaakagula shalia ja a Mushajo.

4 Igala tujile bhuli ga ainabhetu a Bhulaimu? **2** Pabha monaga a Bhulaimu bhashinkupegwaa aki kwa ligongo lya itendi

yabho, bhai, bhakwete shindu sha kwiiniya, ikabheje nngabha kwa a Nnungu. **3** Pabha Majandiko ga Ukonjelo gakuti “A Bhulaimu bhashinkwaakulupalila a Nnungu, kwa nneyo a Nnungu gubhaapele aki.” **4** Ikabheje ntumishi anapegwa nshaala, nshaala gula ukabha nema, ikabhe mbuti ligambo kwa liengo lyakamwile. **5** Ikabheje mundu akakwiikulupalila itendi yakwe nnyene, ikabhe anakwaakulupalila a Nnungu, bhakwaaleshelelanga bhalebhilenje, bhai a Nnungu bhanajali ngulupai jika jwene mundujo, nikumpa aki. **6** Malinga a Daudi shibhataya, mbaya jwene mundu apegwa aki kwa a Nnungu, gwangali kutolelela itendi yakwe. **7** “Mbaya bhaleshelelwenje yambi yabhonji Na bhaunishilwenje yambi yabhonji. **8** Mbaya jwene mundujo, Bhakulungwa bhakakwiitolelela yambi yakwe.” **9** Bhai, bhuli yene mbayayo, ku bhajalukenjepe eu nkali bhangajalukanga? Pabha tukuti, a Bhulaimu bhashinkupegwa aki kwa ligongo lya ngulupai yabho. **10** Bhuli, a Bhulaimu pubhagegwilwe aki bhali bhajalwishe eu bhakanabhe jaluka? Nngabha bhali bhajalwishe, ikabhe bhakanabhe jaluka. **11** A Bhulaimu pubhajalwishe kungai, na kwene jalukako, pukwaliji shilangulo na lulembo lwa kundwa kwabho na a Nnungu cuti, bhakwete aki kwa ligongo lya ngulupai jabho, jibhakwete bhakanabhe jaluka. Kwa nneyo, a Bhulaimu bhashibha ainamundu bha bhandu bhowe bhakwaakulupalilanga a Nnungu, nkali bhangajalukanga, gubhagegwilwenje aki. **12** Nneyo peyo bhenebho ni ainamundu bha bhandunji bhajalukenje, ikabheje nngabha kwa jaluka, ila kwa ligongo lya kagula ngulupai ja ainabhetu a Bhulaimu, jibhaakwete bhakanabhe jaluka. **13** Pabha a Nnungu bhashinkwaalajila a Bhulaimu na lubheleko lwabho cuti, shibhagegwanje shilambolyo. Bhashinkutenda nneyo nngabha kwa shalia ja a Musha, ikabhe kwa ligongo lya

kulupalila kwabho, gubhapegwilwe aki. **14** Monaga bhapinga pegwanga ibhalugwile a Nnungu, ni bhaakamulilanga shalia ja a Musha bhala, bhai, ngulupai yetu yangali shindu na malagano ga a Nnungu nngabha shindu. **15** Pabha shalia ja a Musha jinapeleshela nnjimwa ja a Nnungu, ikabheje jikapagwe shalia, bhai kwakwa kulebha. **16** Kwa nneyo, malagano ga a Nnungu pugapatikana kwa ngulupai, shigaishe kwa nema ja a Nnungu, nkupinga gabhe ku bhandunji bhowe, nngabha ku bhaakulupalilanga shalia ja a Mushape, ikabhe ku bhakwetenje ngulupai malinga a Bhulaimu. Bhenebho ni atati bhetu, uwe tubhowe. **17** Malinga shigalugula Majandiko ga Ukonjelo kuti, "Njikummika mme atati bha ilambo yaigwinji." Gene malaganogo ni ga kweli, kwa a Nnungu bhakulupalilwe na a Bhulaimu, a Nnungu bhakwaayuyanga bhawilenje, na kwa lilibhe lyabho, indu ikapaliji inapagwa. **18** A Bhulaimu bhatendaga lolela indu yangakulupalika, kwa nneyo nibha atati bha ilambo yaigwinji, malinga shigalugula Majandiko ga Ukonjelo kuti, "Lubheleko lwenu shilushulushe mbuti ndondwa." **19** Pubhaliji bhakongopa bha yaka makumi kumi, ikabheje ngulupai jabho jangapuganyika, bhalinkumumanya kuti shiilu shabho shikongopele numbe shiiwilile na akongobhabho a Shala, lipitiu lyaho liiwilile. **20** Ikabheje a Bhulaimu bhakakweteje lipamba na malagano ga a Nnungu gala, ikabhe bhashinkukola mashili kwa ngulupai yabho, nikwaakuya a Nnungu. **21** Gubhamumani kuti a Nnungu bhanakombola tenda gene gubhalajiyego. **22** Kwa nneyo a Nnungu gubhaapele aki. **23** Malobhe gakuti, "Bhashipegwa aki" nngabha kwa ligongo lyabhope, **24** ikabhe nkali kwetu uwe, tukwaakulupalila a Nnungu, bhaayushiye a Yesu Bhakulungwa

bhetu, bhakaweje. **25** Bhabhulegwe kwa ligongo lya yambi yetu, gubhayushile nkupinga tupate aki.

5 Bhai, pabha tupegwilwe aki kwa ngulupai, tukole ulele kwa a Nnungu, gutuposhele ku Bhakulungwa bhetu a Yesu Kilishitu. **2** Kwa ngulupai jetu, bhenebho bhashikutupa nema ja a Nnunu jitutama najo nnaino jino. Bhai, tunakwiipunila kulolela kwetu ukonjelo gwa a Nnunu. **3** Wala nngabha genegope, ikabhe tunaangalala nkali nshilaje, tulikumumanya kuti liengo lya shilaje, inapeleshela kwiipililila. **4** Na liengo lya kwiipililila, kunapeleshela kulolela, na kwalakwe kunapeleshela kukulupalila. **5** Kwa nneyo kulolelako kukatutokomaya, pabha kупinga kwa a Nnunu kushibhikwa nigumbala mmitima jetu na Mbamu jwa Ukonjelo jutupegwilwe. **6** Pabha putwaliji twangali mashili, malanga gayene gakaishileje, a Kilishitu gubhawile kwa ligongo lya bhakwetenje yambi. **7** Pabha inakomala mundu kuwa, kwa ligongo lika mundu akwete aki, ikabheje ilikomboleka mundu kulinga kuwa kwa ligongo lika mundu jwa mmbone. **8** Ikabheje a Nnunu bhayene bhanakutulanguya shibhakuti kutupinga uwe, pabha a Kilishitu bhashinkuwa kwa ligongo lyetu, putwaliji na yambi. **9** Bhai nnaino pabha tubhishilwe munkumbi gwa bhandu bhakwete aki kwa kuwa kwabho a Kilishitu, shibhatutapule mu nnjimwa ja a Nnunu. **10** Putwaliji mmagongo na a Nnunu, gubhatupatanishe kwa shiwo shika Mwana gwabho. Na punda penepo, nnaino tushipatanishwa na bhenebho, shibhatutapule kwa gumi gwabho. **11** Na nngabha genegope, ikabhe tunakwiinonyela nkulundana na a Nnunu, kupitila Bhakulungwa bhetu a Yesu Kilishitu, bhatupatanishe na a Nnnugu. **12** Monaga kwa ligongo lika mundu jumo shambi shashinkukoposhela nshilambolyo na shambisho nikumbuya shiwo, na shiwo gushaaishilenje bhandu bhowe,

pabha bhowe bhashilebhanga. **13** Pabha jikanabhe ika shalia ja a Musha, yambi yaapali pa shilambolyo, ikabheje yambi ikaatolelelwa, jikapagwe shalia. **14** Ikabheje tandubhila mobha ga a Adamu mpaka a Musha, shiwo shishitagwala nkali ku bhangalebhanga malinga shibhalebhile a Adamu. A Adamu bhaliji shilanda sha bhene bhapinga kwiyabho. **15** Ikabheje shilebho sha a Adamu shikalandanywa na nema ja a Nnungu. Pabha nkali yambi ika mundu jumo shanshikubha shiumilo shawa bhandu bhabhagwinjinji, bhai kwa nema jika mundu jumo, yani a Yesu Kilishitu a Nnungu bhashipunda kwaapanganga bhandunji bhowe, nema na upo yabho. **16** Gushipagwa ungalandana gwa upo ya a Nnungu, na shambi shika mundu jumo jula. Pabha akalebheje mundu jumo jula, a Nnungu gubhaukumwile mboteko. Ikabheje bhakalebhanjeje bhandunji bhabhagwinji, a Nnungu gubhaapelenje upo yabho nikwaapanganga aki. **17** Kweli, kwa shambi shika mundu jumo, kuwa kushitagwala kwa ligongo lika mundu jumojo, ikabheje imanyishe ukoto kuti shatendile mundu juna, yani a Yesu Kilishitu, shishipunda kaje. Bhowe bhaaposhelanga nema na upo ja tendwa bhakwete aki, shibhatagwalanje mugumi kupitila mundu jumo a Yesu Kilishitu. **18** Bhai, malinga kwa shambi shika mundu jumo bhandu bhowe bhashiukumulwanga, nneyo peyo kwa shitendi sha aki shika mundu juna yani a Yesu Kilishitu, shishikwapanganga bhandu bhowe aki na gumi. **19** Na ibhaga kulebha kuka mundu jumo, bhandu bhabhagwinjinji bhashibhonekanga na yambi, nneyo peyo kukunda kuka mundu juna, yani a Yesu Kilishitu, bhandu bhabhagwinjinji kushikwaatendanga bhapatanje aki. **20** Ikabheje shalia ja a Musha jikaisheje na shambi shikupundaga, na shambi shikapundeje, na nema gujipundile kujenjesheka. **21** Malinga

yambi puitegwela kwa shiwo, nnepeyo na nema jinatagwala
kwa aki, nipeleshela gumi gwa pitipiti, kupitila a Yeshu Kilishitu
Bhakulungwa bhetu. (aiōnios g166)

6 Bhai tujile bhuli? Tupunde kutenda yambi, nkupinga nema ja a Nnungu jipunde jenjesheka? **2** Ng'oo, wala kashoko! Uwe ga yambi iilu yetu iiwilile, shitupunde bhuli kabili kutama na yambi? **3** Eu, nkakumumanyanga cuti uwe tubhatishwe na lundana na a Yeshu Kilishitu, nneila peila tushilundanywa nshiwo shabho? **4** Bhai putwabhatishwe twashinkulundana nabho, gutushishilwe pamo na bhenebho, nkupinga malinga a Kilishitu pubhayushiywe kwa ukonjelo gwa Atati, nneyo peyo na uwe tutame nndamo ja ambi. **5** Pabha, malinga shitulundene nabho nkuwa malinga bhenebho, nneyo peyo shitulundane nabho kwa yuka, malinga bhenebho. **6** Tumumanyi cuti nkubho gwetu gwa bhukala gwa tenda yambi, gwashinkukomelwa munshalabha pamo na bhenebho, nkupinga tunapunde kubha bhatumwa bha yambi, nkupinga maisha getu ga bhukala ga shambi gapele. **7** Pabha aiwilile ga yambi, ashitendwa nngwana niembuywa na yambi. **8** Bhai monaga tuwile pamo na a Kilishitu, tunakulupalila cuti, shitutame pamo na bhenebho. **9** Pabha tumumanyi cuti a Kilishitu bhakayusheje, bhakawa kabili. **10** Pabha kuwa kwabho kula, bhashinkuwila yambi kamope, na nnaino tama kwabho, bhanatama pamo na a Nnungu. **11** Nneyo peyo na mmanganyanji mwiibhikanje mbuti bhaiwililenje bhakaatendanga yambi, ikabhe bhabhakotonji kwa lundana na a Nnungu kupitila a Yeshu Kilishitu. **12** Bhai yambi inatagwale iilu yenunji ya wai, mpaka nikagula ilokoli yakwe. **13** Wala nnalekanje iilu yenunji kutenda yambi, ikabhe mwiishoyanje kwa a Nnungu malinga bhandu bhayushilenje, mwiishoyanje kwa a

Nnungu kwa itendi ya aki. **14** Numbe yambi ikantagwalanga kabhili, pabha munninginji nngabha nkulongoywa na shalia ja a Musha, ikabhe kwa nema ja a Nnungu. **15** Bhai, tujile bhuli? Tutende yambi pabha tukaukululwa na shalia ja a Musha, ikabhe kwa nema? Ng'oo! **16** Bhuli nkakumumanyanga kuti, punkwiibhikanga malinga utumwa kuka mundu nikunkunda, mmangangaga bhatumwa bha yambi mpelo gwake ni kuwa, mmangangaga bhatumwa bha kwaakunda a Nnungu, mpelo gwakwe aki. **17** Ikabheje bhatendelwe ej a Nnungu, nkali mwalinginji bhatumwa bha yambi, nshikundanga kwa mitima jenunji jowe majiganyo gumwajigenywenje. **18** Gunngombolwenje kopoka kuutumwa gwa yambi, nibhanganga bhatumwa bha aki. **19** Ngunabheleketa shigundu kwa ligongo lya ungashimilika gwenunji. Malinga shimwaishoshiyenje ibhalo yenunji muitendi ya utumwa na ya nyata na yambi gumwinyatiyenje, nneyo peyo, nnaino mwiishoyanje ibhalo yenunji muutumwa gwa tenda aki muukonjelo. **20** Pumwalinginji bhatumwa bha yambi, aki jikantagwalangaga. **21** Mwapatilenjeje ndi, kwa itendi yenunji ya bhukala inkwiibhonelanga oni nnaino? Pabha mpelo gwa yeneyo kuwa. **22** Ikabheje nnaino, nngombolwenje kopoka kuutumwa gwa yambi, nitendwa bhatumwa bha a Nnungu, nkwenetenje pwaida ja ukonjelo, na mpelo gwakwe gumi gwa pitipiti. (aiōnios g166) **23** Pabha nshaala gwa yambi kuwa, ikabheje upo ibhashoya a Nnungu, gumi gwa pitipiti nkulundana na a Yeshu Kilishitu, Bhakulungwa bhetu. (aiōnios g166)

7 Ashaapwanga, ngunabheleketa na mmanganyangi nkujimanyanga shalia ja a Musha, nkakumumanyanga kuti shalia jinakuntagwala mundu ali jwankoto? **2** Tujile malinga bhakongwe bhalombilwe, bhanatabhwa na shalia mobha gowe ga gumi

gwa ambuje bhabho, ikabheje ambuje mundu bhala bhawaga, shalia jikakwaatabha kabhili bhakongwebho. **3** Bhai monaga ambuje mundu bhali bhabhakoto, nilombwa na bhalume bhana, gwenego utwai, ikabheje bhalumebho bhawaga, bhakaatabhwa na shalia. Nkali bhalombwaga na bhalume bhana pangali utwai.

4 Na malinga mmanganyanji ashaapwanga, nkali mmanganyanji nshikujwilanga shalia, kwa shiilu sha a Kilishitu nkupinga mmanganje bha bhene bhayushile bhala, nkupinga twaatendele a Nnungu indu ya mmbone. **5** Pabha, putwaliji nndamo ja kagulila indu ya nshiilu, ilokoli ya yambi guipundile kwa ligongo lya shalia, ilitenda liengo mwiiilu yetu nikutupeleshela ku shiwo.

6 Ikabheje nnaino tugopwelwe nshalia, tuiwilile yatutabhaga ila, nkupinga tukombole ndamo ja ambi ja tumishila ya Mbamu, nngabha malinga bhukala putwatumishilaga shalia jijandishwe.

7 Bhai, tujile bhuli? Shaliaji ni yambi? Ng'oo! Pabha gwangali shalia nganaimanye yambi shili bhuli, nganakumanye kulokolila kaliji shalia jikanalugule, "Nnalokolile yangali ya mmbone." **8** Ikabheje yambi guikwete mashili ligongo lya amuli, gushitendile kila ilokoli nkati jangu. Pabha yambi gwangali shalia, iwile.

9 Numbe nne punaliji najwankoto gwangali shalia, ikabhe jikaishejepe shalia jila, yambi guiyushile na nne gung'wile. **10** Nne gumweni kuti, shalia jatumbilile kupeleshela gumi jila, jishipeleshela shiwo. **11** Pabha yambi shikakoleje mashili kwa ligongo lya shalia jila, gushindembile nimulaga. **12** Bhai shalia ja a Musha ni ja ukonjelo, na amuli jila, ni ja ukonjelo, na ja mmbone, na ja aki. **13** Bhai bhuli! Gene gali ga mmbone gala, nne nigabhone ga shiwo? Ng'oo! Ikabheje nkupinga shambi shibhoneshe ukoto kuti ni yambi, shialaya shiwo nkati jangu, kwa pitila lya mmbone lila, nkupinga kwa amuli jila, yambi

ipunde nyata kaje. **14** Pabha tumumanyi kuti shalia ja a Musha shiumilo shakwe ni indu ikopoka Mmbumu jwa a Nnungu, ikabheje nne namundu jwa kagulila indu ya nshiilu, njiushwa muutumwa gwa yambi. **15** Pabha ngakushimanya shingutenda, shingupinga tenda shila, ngaatenda, ikabhe shingaapinga shila ni shingutenda. **16** Bhai monaga ngunakunda kuti shingutenda nngabha sha mmbone malinga shinatumbilile tenda, penepo ngunakunda kuti, shalia jila ni jammbone. **17** Bhai, nngabha nne namwene ngutenda shenesho, ikabhe yambi itama nkati jangu. **18** Pabha nimumanyi kuti, nkati jangu yani nshiilu shangu, shikaatama shindu sha mmbone. Numbe kupinga kutenda indu ya mmbone ngulipinga, ikabheje kutenda ngunalepela. **19** Pabha shene sha mmbone shingushipinga, ngaatenda, ikabheje shene shangali sha mmbone shingakushipinga ni shingutenda. **20** Bhai monaga shingakushipinga shila ni shingutenda, nngabha nne namwene ngutenda, ikabhe ni yambi itemi nkati jangu ila. **21** Bhai nijimanyi jene kweliji, pungupinga tenda shindu sha mmbone, shipali sha nyata shinguagula tenda. **22** Pabha ngunakwiinonyela shalia ja a Nnungu muntima gwangu. **23** Ikabheje nshiilu shangu ngunakujibhona shalia jina jinakomana na shalia ja lunda lwangu, nindenda ntumwa jwa shalia ja yambi, itemi nshiilu shangu jila. **24** Nankulaga nangali malanga nne! Gani shandapule na shiilu sha shiwoshi? **25** Ngunakwaatendela eja a Nnungu, pabha ngunatapulwa na a Yesu Kilishitu bhakulungwa bhetu! Bhai kwa nneyo nne namwene kwa lunda lwangu ngunatumishila shalia ja a Nnungu, ikabhe kwa shiilu shangu ngunatumishila shalia ja yambi.

8 Bhai nnaino kwakwa kuukumulwa mboteko kwa bhandu bhalundenerje na a Yesu Kilishitu. **2** Pabha kweli jika Mbumu

jwa gumi guli nkati ja a Yeshu Kilishitu jishing'embuya na mashili ga yambi na shiwo. **3** Annungu bhashitenda ikomboleshe, ikakombolekaga kwa shalia ila, kwa ligongo lya ungakola mashili gwa shiilu. Bhai a Nnungu gubhantumile Mwana gwabho bhayene, ali na shiilu malinga sha bhaatendanga yambi. Kwa nneyo gubhaiukumwile mboteko yambi nshiilu shakwe. **4** A Nnungu gubhatendile nnei nkupinga indu yowe ya mmbone ipinjikwa na shalia itimilile nkati jetu, uwe tukaakagulila ilokoli yangali ya mmbone ya nshiilu, ikabhe ya Mbumu. **5** Pabha bhandunji bhaakagulilanga ilokoli yangali ya mmbone ipinjikwa na shiilu, ibhaganishiyanga ilokoli yangali ya mmbone ipinjikwa na shiilu, ikabheje bhaakagulilanga indu ipinjikwa naka Mbamu jwa Ukonjelo, ibhaganishiyanga indu ipinjikwa naka Mbamujo. **6** Pabha ndumbililo ya shiilu inapeleshela shiwo, ikabhe ndumbililo ika Mbamu jwa Ukonjelo, inapeleshela gumi na ulele. **7** Na ndumbililo ya shiilu ni kubhika magongo na a Nnungu, pabha shikapinga kukunda shalia ja a Nnungu, na wala shikakombola kukunda shalajo. **8** Bhene bhaakagulilanga ilokoli ya nshiilu, nngakombola kwaanonyeya a Nnungu. **9** Monaga Mbamu jwa a Nnungu anatama nkati jenunji, mmanganya nkaakagulilanga ilokoli yangali ya mmbone ipinjikwa na shiilu, ikabhe shinkagulilanje ya mmbone ipinjikwa naka Mbamu. Ikabheje mundu jwangali Mbamu jwa a Kilishitu, jwenejo nngabha jwabho. **10** Ikabheje a Kilishitu bhabhaga nkati jenunji, shiilu shenunji shinawa kwa ligongo lya yambi, ikabhe mbamu jwenunji jwankoto kwa ligongo lya aki. **11** Na monaga Mbamu jwa a Nnungu abhayushiye a Kilishitu bhakaweje, shaiyuye na iilu yenunji ili yawa, kwa mashili gaka Mbamu jwabho atama nkati jenunji. **12** Bhai monaga ni nneyo, ashaalongo ajangu

tukwete ligambo, ikabheje nngabha lya tenda indu ya nshiilu. **13**
Ibhaga, ntamanganaga nkukagulila indu yangali ya mmbone
ya nshiilu, kweli shinng'wanganje, ikabheje muibhulagangaga
indu yangali ya mmbone ya nshiilu kwa Mbamu jwa Ukonjelo,
shinnamanje. **14** Pabha bhowe bhaalongoywanga naka Mbamu
jwa a Nnungu, bhenebho ni bhana bha a Nnungu. **15** Pabha
mwangaposhelanga mbamu jwa utumwa akuntendanga nkolanje
bhoga, ikabheje mposhelenje Mbamu akuntendanga mmanganje
bhana bha a Nnungu, na kwa mashili gaka jwenejo, uwe
tunakwaashema a Nnungu, "Atati." **16** Numbe Mbamu jwa a
Nnungu nnyene anakong'ondela pamo na mitima jetu, kuti
uwe ni bhana bha a Nnungu. **17** Ibhaga uwe ni bhana bha
a Nnungu, bhai uwe ni tubhalishi bha a Nnungu bhaalishinji
pamo na a Kilishitu. Tunabha tubhalishi putupata mboteko
pamo na bhenebho, nkupinga nneila peila, tukuywe pamo
na bhenebho. **18** Shingubhona nne, mboteko yetu ya nnaino
nngabha shindu, kupunda ukonjelo upinga bhoneka kwetu uwe.
19 Na nkali indu yowe ipengenywe, inalinda kwa lilaka lya kaje,
kumanyika kwa bhana bha a Nnungu. **20** Indu yowe ipengenywe
gwijionaishe, nngabha kwa pinga iyene, ikabhe kwa pinga
kwabho bhayene bhaibhishile kwa ngulupai, **21** mbena indu
ipengenywe na yalakwe shiitapulwe, nishoywa muutumwa gwa
angabhanika, ijinjile muungwana uli na ukonjelo gwa bhana bha
a Nnungu. **22** Pabha tumumanyi kuti mpaka nnaino, indu yowe
ipengenywe inabhubhulila pamo malinga mboteko ya nkukola
mwana. **23** Numbe nngabha indu ipengenywe peyo, ikabhe
nkali uwe tupatile Mbamu jwa Ukonjelo, ali nnimbu jwa upo
ibhapinga kutupa a Nnungu, numbe tunabhubhulila mmunda jetu,
tulilolela kutendwa bhana bha a Nnungu, yani na kugombolwa

kwa iilu yetu. 24 Pabha tushitapulwa nkupinga tutame nkukulupalila, ikabheje shutwashilolelaga shila shibhonekaga, penepo kwakwapi kuloleta kabhili. Pabha gani akushilolela shindu sha kushibhona? 25 Ikabhe putukushilolela shindu shitukakushibhona, tunakushilinda kwa kwiipililila. 26 Nneyo peyo na Mbumu jwa Ukonjelo anakutujangutila muungakombola gwestu, pabha tukaamanya kujuga malinga shiikupinjikwa, ikabheje Mbumu jwa Ukonjelo nnyene anakutujujila kwa bhubhula kwa ngakomboleka kutaya. 27 Na bhene bhaulumila mmitima, bhai manyi ng'aniyo ika Mbumu, pabha anakwaajujilanga bhandunji bha ukonjelo, malinga shibhaapinga a Nnungu. 28 Na uwe tumumanyi kuti, indu yowe inatenda liengo pamo kwa pwaida ja bhakwaapinganga a Nnungu, yani bhashemilwenje kwa tumbilila kwabho, nkwaapanganga ya mmbone. 29 Pabha bhene bhanganyabho bhamanyikenje na a Nnungu kuumila ndandubho, bhashinkwaagulanga bhalandanywanje naka Mwana gwabho, nkupinga abhe lielo munkumbi gwa bhana bhabhagwinji. 30 Na bhene bhubhaagwilenje kuumila kundandubho, gubhaashemilenje, na bhene bhashemilwenjebho, gubhabhalanganishiwenje aki, na bhabhalanganishiwenje akibho, nigubaakushiyenje. 31 Igala tubhelekete nndi? Monaga a Nnungu bhabhaga na uwe, gani shaakombole kututauka? 32 Ibhaga a Nnungu bhanganneshelila nkali Mwana gwabho bhayene, ikabhe gubhanshoshiye kwa ligongo lya tubhowe uwe, bhai shibhalepele bhuli nkali kutupa shoshowe shina pamo naka jwenejo? 33 Gani shabhashitakiyanje bhaagwilwenje na a Nnungu? A Nnungu bhayene bhaabhalanganishiwenje aki. 34 Gani shabhaukumulanje mboteko? Jwakwa, a Yesu Kilishitu ni bhawile, na bhayushile, numbe kubhali kunkono nnilo gwa

a Nnungu, numbe bhanakutujujila. **35** Gani shatulekanye na pingana kwetu na a Kilishitu? Nndi, shilaje eu mboteko eu shibhanga eu ukunu eu ya jogoya eu upanga? **36** Malinga shigalugula Majandiko ga Ukonjelo kuti, "Kwa ligongo lyenu tunabhalagwa na shiwo, mobha gowe. Tunaatendwa mbuti ngondolo ya ingwa." **37** Ikabheje na yene indu yoweyo uwe tunakombola kwa kaje, kwa mashili ga bhene bhatupinjile bhala. **38** Pabha nimumanyi kaje kuti, wala shiwo, na wala gumi, na wala ashimalaika eu ashimaoka, na wala indu ipali, na wala indu shiipagwe, na wala mashili gogowe, **39** gali kunani, na wala gali pai, na wala shindu shipengenywe shoshowe, shishikombole kutushoya nkupingwa na a Nnungu, kupitila kwa a Yesu Kilishitu Bhakulungwa bhetu.

9 Ngunabheleketa kweli nkulundana na a Kilishitu na wala nngabha unami, ng'aniyo yangu ya muntima nkulongoywa naka Mbumu jwa Ukonjelo inangong'ondela, **2** kuti njiinjika kaje na mboteko yangali mpelo muntima gwangu. **3** Ikaliji mbaya nne kuloshwa na lekanya na a Kilishitu, monaga shiyaapwaanje ashaalongo ajangu bha shipinga shangu. **4** Ni Bhaishilaeli bhaagwilwenje na a Nnungu kubha bhana bhabho, gubhagegwilwenje ukonjelo, na miadi, na shalia, na lilanga lya tindibhalila, na malagano ga a Nnungu. **5** Bhanganyabho ni uukulu gwa ashaambuje, ni kubhabhelekwe a Kilishitu shigundu. A Nnungu bhaatagwala indu yowe, bhakuywe pitipiti. Amina.

(aiōn g165) **6** Nngabha kuti miadi ja a Nnungu jangamalila. Pabha nngabha Bhaishilaeli bhowe bhaagwilwenje na a Nnungu. **7** Wala nngabha bhowe bhabhelekwenje kwa a Bhulaimu kuti ni bhana bhabho, ikabhe malinga Majandiko ga Ukonjelo shigalugula, "Bhana bhenu shibhakoposhelanje kwa a Ishaka."

8 Yani nngabha bhabhelekwenjepe ni bhalinginji bhana bha a Nnungu, ikabhe bhabhelekwenje kwa ligongo lya miadi ja a Nnungu, ni bhalinginji bhana bhabho. **9** Pabha miadi jiyene jikuti nnei, "Malinga malanga gano shimuje, na a Shala shibhakole mwana jwannume." **10** Na nngabha nneyo pe, ikabhe nkali na bhalabho a Lebhaka, gubhakwete bhammba kubhashileu bhamo, a Ishaka anakulu bhetu. **11** Ikabheje bhana bhala bhakanabhe bhelewanga na wala bhakanabhe kombolanga kushimanya sha mmbone eu shanyata, bhai nkupinga luagu lwa bhayene a Nnungu lubhoneshe, **12** nngabha kwa ligongo lya itendi, ikabhe kwa tumbilila kwabho bhayene, a Lebhaka gubhabhalanjilwe kuti, jwa nkulu shantumishile jwa nnung'una.

13 Malinga Majandiko ga Ukonjelo shigalugula, "Njikumpinga Yakobho, ikabhe Eshau njikunkana." **14** Bhai tubhelekete nndi? A Nnungu bhakaakagula aki? Ng'oo! **15** Pabha kungai a Nnungu bhaabhalanjile a Musha, "Shinimmonele shiya jungumpinga kummonela shiya, na shininnjangutile jungumpinga kunnjangutila."

16 Bhai monaga nneyo, nngabha kwa pinga wala kwa tumbila kuka mundu, ikabhe kwa shiya sha a Nnungu. **17** Pabha Majandiko ga Ukonjelo kwa ngani ja a Palao gakuti, "Njikumpa upalume nkupinga kwenu mmwe, nanguye mashili gangu na lina lyangu lishume nshilambolyo." **18** Bhai monaga nneyo, jubhapinga kummonela shiya, bhanakummonela shiya na jubhapinga kunnonopya ntima, bhanakunnonopya. **19** Pana shimmuye, "Pakuti bhanakutugamba tubhandu? Gani akombola kuibhilila ibhapinga a Nnungu." **20** Ikabheje mmwe anamundu, mmwe agani nkwaatauka a Nnungu? Bhuli shindu shipengenyewe kukombola kummalanjila jwene ashipengenyeye, "Kwa nndi kumbanganya nnei?" **21** Eu bhuli, nkugumba akaengwa kwa

lilongo lyakwe kugumba shoshowe, kugumba shindu shimo sha
ishima na shina sha kawaida? **22** Bhai shipali nndi? A Nnunu
bhashinkupinga kulangula kutumbala kwabho na mashili gabho,
kwa nneyo bhashinkwaapilililanga kaje bhalinginji ndumbililo ya
tumbala kwabho, bhapinjikwenje kuangabhanywa. **23** Numbe
bhashinkupinga kulanguya ukonjelo gwabho gwangwinji kwetu
uwe, tuli ndumbililo ya shiya shabho, bhatubhishile kuumila
bhukala tuposhele ukonjelo gwabho. **24** Ni uwe bhatushemile,
nngabha bha munkumbi gwa Bhayaudipe, ikabhe nkali bhandunji
bha ilambo ina. **25** Malinga shibhaalugula nshitabhu sha
a Osheya kuti, "Bhene bhalinginji nngabha bhandu bhangu
Shinaashemanje, 'Bhandu bhangu!' Na aliji jwangapingwa na
nne Shaashemwe, 'Apingwa na nne!' **26** Na shiibhe pene
pubhabhalanjilwenje, 'Mmanganyanji nngabha bhandu bhangu'
Penepo shibhashemwanje, 'Bhana bha a Nnunu bhakwete
gumi'" **27** Numbe a Ishaya ga bha Ishilaeli bhanakweya lilibhe
bhalinkuti, "Nkali bhana bha bha Ishilaeli bhashulukanje malinga
nng'anji gwa ku bhaali, bhapeinga tapulwanga ni bhashokope. **28**
Pabha Bhakulungwa shibhatende ukumu jabho pashilambolyo
jitimilile kwa kaje shangupe." **29** Numbe malinga a Ishaya
shibhalongolele bheleketa kuti, "Kaliji Bhakulungwa bha bhandu
bhowe pa shilambolyo bhakanatuleshele bhana, tukaliji malinga
bhandunji bha shilambo sha Shodoma tukalingenywe na
bhandunji bha shilambo sha Gomola." **30** Bhai tubhelekete
nndi? Kuti bhandunji bha ilambo ina bhangaloleyanga kukola
aki, bhatapilene aki kwa ngulupai. **31** Ikabheje bha Ishilaeli
bhaloleyangaga aki kwa shalia, bhangajipatanga. **32** Kwa nndi?
Pabha bhangakagulilanga kwa ngulupai, ikabhe kwa kamulila
shalia ja a Musha, kwa nneyo gubaikubhelenje nniganga ly

kubhala lila. **33** Malinga shigalugula Majandiko ga Ukonjelo kuti, "Nnole ngunabhika ku Shayuni liganga lya kwiikubhala, Liganga likulu lya gwiya bhandu. Ikabheje jojowe shaabhakulupalile akatokomala."

10 Ashaalongo ajangu, shingupinga nne muntima gwangu na kujuga kwangu kwa a Nnungu Bhaishilaeli, bhatapulwanje. **2** Pabha ngunakong'ondela kuti bhanatumbilanga nkwaatumishila a Nnungu, ikabhe gwangali lunda. **3** Pabha bhakakumumanyanga a Nnungu shibhakuti kwaapanganga bhandunji aki, bhalilinganga kwiitolela aki jabhonji malinga shibhaapinganga ashaayenenji, akuno bhalikananga kukagula aki ja a Nnungu. **4** Pabha a Kilishitu ni kutimilila kwa shalia, nkupinga jojowe shaabhakulupalile akole aki. **5** Pabha a Musha bhashinkujandika ga aki jipatikana kwa shalia "Mundu akunda shalia, shaatame kwa genego." **6** Ikabheje ga aki jipatikana kwa ngulupai jinataya kuti, "Nnabhelekete muntima gwenu kuti, 'Gani shakwele mpaka kunnungu kupinga kwaatuluya a Kilishitu pai kubhatutapule? **7** Wala nnaibhuye, gani shaajende pai kukwaatola a Kilishitu kukopoka ku Jeanamu nikwiya nabho kunani kubhatutapule?'" (*Abyssos g12*) **8** Ikabheje Majandiko gakuti bhuli? "Lilobhe lya a Nnungu lila pulili tome na mmwe. Mulili nkang'wa jenu na muntima gwenu." Lyene lilobhelyo, ni lilobhe lya ngulupai litulunguya lila. **9** Pabha nkundaga kwa kang'wa jenu kuti a Yesu ni Bhakulungwa, na kulupalila muntima gwenu kuti a Nnungu bhashinkwaayuya, shintapulwe. **10** Pabha mundu anakulupalila muntima, nipata aki, na kwa kang'wa jakwe mundu anakunda nitapulwa. **11** Pabha Majandiko ga Ukonjelo ganataya kuti, "Jojowe akwaakulupalila akatokomaywa." **12** Pabha kwakwapi kupembula kuti, a Bhayaudi eu Bhagiliki, pabha a Yesu ni Bhakulungwa bha bhowe, bhashikola ntuka ku

bhowe bhakwaajuganga. **13** Pabha jojowe shaajuje kujangutilwa na Bhakulungwa, shaatapulwe. **14** Bhai shibhaajuganje bhuli bhene bhakakwaakulupalilanga? Numbe shibhaakulupalilanje bhuli bhubhangaapilikananga? Na kabhili shibhapilikananje bhuli gwangali nkulunguya? **15** Numbe bhalunguyanje bhuli gwangali pelekwa? Malinga shigalugula Majandiko ga Ukonjelo cuti, "Nnole shiikuti konja kwiya kwabhonji bhaalunguyanga Ngani ja Mmbone." **16** Ikabheje nngabha bhowe bhakundilenje. Pabha nkali a Ishaya bhakuti, "Mmwe Mmakulungwa, gani akundile ngani jetu?" **17** Bhai ngulupai shiumilo shakwe ni kupilikana, kwa ngani ja lilibhe lya a Kilishitu. **18** Ikabheje ngunabhuya, bhuli, bhangapilikananga? Elo, bhapilikenenje, "Lilibhe lyabhonji lipilikanishe ku shilambolyo, Na malobhe gabhonji gaishe mpaka ku mpelo gwa shilambolyo." **19** Kabhili ngunabhuya, bhuli bha Ishilaeli bhangamanyanga? Gwa ntai a Musha bhashite, "Shinintendanje nkolanje lupimilo ku bhandunji bhalinginji nngabha bhashilambo. Shininntendanje nkolanje nnjimwa ku bhashilambo bhangumba." **20** Numbe a Ishaya gwangali bhoga bhabhelekete, "Nabhoneshe ku bhandunji bhanganoleyanga, Nailangwiye ku bhandunji bhangamushishiyanga." **21** Ikabheje ga Ishilaeli bhanabheleketa, "Mui gowe naagolosheyenje makono gangu bhandunji bhangakundanga na bha mitau."

11 Bhai ngunabhuya, bhuli a Nnungu bhashikwaakananga bhandunji bhabho? Nng'oo! Pabha nkali nne namwene na Ng'ishilaeli, jwa lukolo lwa a Bhulaimu, kabhila ja a Bhenjamini. **2** A Nnungu bhangaakananga bhandunji bhabho bhubhaagulenje kuumila bhukala. Eu nkakugamanyanga Majandiko shigabheleketa ga a Eliya? Shibhashite kwaalugulanga Ishilaeli kwa a Nnungu cuti, **3** "Mmakulungwa,

bhashikwaabkulaganga ashinkulondola bhenu nibhomola itala
yenu. Nepeshe nne jikape, numbe bhapinga mulaganga!" 4 Bhuli
a Nnungu bhaajangwileje nndi? "Njikwilepesheya bhandunji
elupu shabha bhangatindibhalilanga shanamu sha nnungu
ashemwa Bhaali." 5 Bhai nneyo peyo nkali agano mobha gano,
bhapalinji bhalepekenje bhaagwilwenje kwa nema. 6 Bhai ibhaga
bhaagwilwenje kwa nema, nngabha bhaagwilwenje kwa itendi,
na ibhaga bhaagwilwenje kwa itendi, nngabha bhaagwilwenje
kwa nema. 7 Igala nndi? Shindu shibhaloleyangaga Ishilaeli
shila bhangashipatanga. Bhashipatilenje ni bhaagwilwenje
bhala, ikabheje bhananji ninonopeywa mitima. 8 Malinga
Majandiko shigalugula, "A Nnungu bhashikwaanonopeyanga
mitima jabhonji, Na meyo gabhonji ganalole Na wala makutu
gabhonji ganapilikane mpaka lelo." 9 Na a Daudi gubhashite,
"Kalamu yabhonji ibhe lukonji lwyka kwaatanjiyanga muyanyata,
Na shindu sha kwiikubhala, bhagwanganje ni ukumulwa mboteko.
10 Meyo gabhonji gatagwe lubhindu Bhanalolanje. Migongo
jabhonji jipinde mobha gowe!" 11 Bhai ngunabhuya kabhili, bhuli,
Bhayaudi bhashinkwiikubhalanga nigwanganga kaje? Ng'oo!
Ikabheje kwa lebha kwabhonji, ntapulo uishe ku bhandu bha
ilambo ina, nkupinga ashaayene bhakolanje lupimilo. 12 Bhai
monaga kulebha kwa Bhayaudi kushibha utajili kushilambolyo
na kulebha kwabhonji kushibha utajili ku bhandu bhananji
bha ilambo ina, bhuli aki jabhonji nngabha shijibhe utajili gwa
punda? 13 Bhai, ngunabheleketa na mmanganyanji nninginji
nngabha Bhayaudi. Pabha nne ntume jwa bhandunji bha ilambo
ina, numbe nne ngunakwiiniya ga liengo lyangu, 14 nkupinga
naatendanje ashaalongo ajangu bhammonelanje lupimililo
mmanganyanji naatapulanje bhananji munkumbi gwabhonji. 15

Bhai monaga kukanwa kwabhonji kushilundanya bhandunji na a Nnungu, bhuli kuposhelwa kwabhonji shikubhe nndi, ikabhe gumi ku bhawilenje? **16** Monaga nnimbu ubhaga gwa ukonjelo, bhai, gakagulago shigabhe ga ukonjelo na litepo libhaga lya ukonjelo na nyambi shiibhe nneyo peyo. **17** Nyambi ina ya misheituni ishelilwe, nipandishila nyambi ya nsheituni nng'itu. Bhai, mmanganyanji nninginji nngabha Bhayaudi, ni lujambi lwa nsheituni nng'itu. Nnaino nnakwiikonjanga utwenje gwa litepo lya nsheituni gwa nshitalu. **18** Nnainyegayanje nyambi ishelilwe ila, eu monaga nkupuna, bhai nkumbushile kuti nngabha mmwe nkujigala litepo, ikabheje litepo ni likunnijigala mmwe. **19** Pana shimmelekete kuti, "Nyambi ila yashinkushelwa nkupinga mbandishilwe nne." **20** Elo! Yashinkushelwa kwa ligongo lya ungakulupalila, ikabheje mmwe nshipandishilwa kwa ligongo lya ngulupai yenu, nnailumbilile ikabhe nnjogope. **21** Pabha monaga a Nnungu bhangaaleshelelanga Bhayaudi bhalinginji malinga nyambi iyene, bhuli punkuganishiya shibhammonele shiya mmwe? **22** Nnole uguja gwa a Nnungu na shibhakuti kalipa kwa bhaagwanganga, ikabheje bhanguja kwenu mmwe, monaga shinnonjeye muuguja gwabho. Bhai ikabhe nneyo, numbe mmwe shinshelwe. **23** Nabhalabhonji Bhayaudi bhalekangaga ungakulupalila gwabhonji, shibhapandishilwanje kabhili. Pabha a Nnungu bhanakombola kwapandishilanga kabhili. **24** Monaga mmanganyanji mwashinkushelwanga kopoka munsheituni nng'itu, gumpandishilwenje munsheituni gwa nshitalu, bhai pangali ukomu ashaayenenji bhashelilwenje, nipandishilwa kabhili munkongo gwabhonji. **25** Ashaalongo ajangu, nne ngunapinga nshimanyanje ashino shinjubhi shino, nkupinga nnaibhonanje kuti nshikolanga nngomo. Kunonopa kwa mitima ja Ishilaeli

pukwaaliji nngabha kwa lonjeya, mpaka bhandunji bha ilambo ina pushibhaamanyanje a Nnungu. **26** Penepo Ishilaeli bhowe shibhatapulwanje, malinga Majandiko ga Ukonjelo shigataya kuti, "Nkugombola shaishe kopoka ku Shayuni, Shaalushoye lubheleko Iwa a Yakobho muilebho yabho. **27** Gegano ni malagano gangu na bhene bhanganyabho pushinaaleshelelange yambi yabbonji." **28** Bhai kwa ligongo lya Ngani ja Mmbone bhashibhanganga bhamagongo ajenunji, ikabheje ga agulwa kwabhonji bhaapingwanga na a Nnungu kwa ligongo lya asha nakulu bhabhonji bha bhukala. **29** Pabha a Nnungu bhakatendebhuka kwa upo yabho wala nshemo gwabho. **30** Pabha malinga mmanganyanji bhukala shumwaaleshilenje a Nnungu, ikabheje nnaino bhashikummonelanga shiya kwa ligongo lya lebha kwa Bhaishilaeli. **31** Nneyo peyo na Bhaishilaeli bhashilebhanga nkupinga kubhonelwa shiya kwenunji, na bhalabhonji bhabhonelwanje shiya. **32** Pabha a Nnungu bhashikwaatabhanga bhandu bhowe muilebho yabbonji, nkupinga bhaabhonelanje shiya bhowe. (eleēsē g1653) **33** Nnole, shiushite punda upalume gwa lunda na lumanyio Iwa a Nnungu! Ukumu yabho jwakwa jwa kombola kwiimanya, wala mipango jabho jwakwa akujimanya! **34** Pabha gani aimanyi ng'aniyo ya Bhakulungwa? Eu gani abhapele lunda? **35** Eu gani shakombole kwaapa shindu bhenebho, Nkupinga abhujishiywe kabili shenesho? **36** Pabha indu yowe kuikopweshe kwa Bhenebho, puili na Bhenebho, na kwa ligongo lya Bhenebho. Kuiniywa kubhe na bhenebho pitipiti. Amina. (aiōn g165)

12 Kwa nneyo, ashaalongo ajangunji, ngunakunshondelesheyanga kwa ligongo lya shiya sha a Nnungu, ntamangananje mbuti mbepei ya a Nnungu, ikwete

ukonjelo na ikwaanonyela a Nnungu, kweneko ni kutindibhalila
kwenunji kukwete mana. **2** Wala nnakagulilanje ikubho ya
pashilambolyo, ikabhe ntendebhuywanje ndumbililo yenunji ibhe
ya ambi, nkupinga mmanyanje ukoto indu ibhapinga a Nnungu,
indu ya mmbone ya kwaanonyeya na ya kamilika. (aiōn g165) **3**

Kwa nema jimbegwilwe na a Nnungu, ngunakummalianjilanga
mmowe cuti, anapagwe mundu akwiiganishiya nkulungwa
kupunda shaapinjikwa, ikabhe akole ng'aniyo ya kweli ilundana
na shipimilo sha ngulupai kila mundu shapegwilwe na a
Nnungu. **4** Pabha, malinga nshiilu ishipagwa ibhalo yaigwinji,
na yowe ikatenda liengo limo, **5** nneyo peyo na uwe nkali
tuli tubhabhagwinji, tushibha shiilu shimo nkulundana na a
Kilishitu na shibhalo sha kila mundu shishilundana na shibhalo
shika nnjakwe. **6** Bhai, tushipegwa kila mundu na shipaji
shakwe kwa nema. Apegwilwe shipaji sha londola, alondole
malinga shijili ngulupai jakwe. **7** Apegwilwe shipaji sha utumishi,
atumishe. Apegwilwe kujiganya, ajiganye. **8** Apegwilwe kutaga
ntima ataje ntima. Apegwilwe ntuka alaguye kwa ntima gowe.
Nkulongoya na alongoye ukoto. Na akwete shipaji sha bhonela
shiya, atende nneyo kwa angalala. **9** Kupingana kunabhe
na ugulumba. Muishimanje yangali ya mmbone, nkamulilanje
ya mmbone. **10** Nng'ishimiyananje mwaashayenenji malinga
bha ulongo shibhakuti ishimiyana. **11** Ntumbilanje, nnakolanje
ukata mmitima jenunji, nkwaatendela liengo Bhakulungwa. **12**
Nng'angalalanje nnikulupalilanga, na nshilaje mwiipilililanje, na
nnilonjeyanga nkujuga Nnungu. **13** Mwaajangutilanje bhandunji
bha ukonjelo bhalinginji nshilaje. Nnikwaposhelanga bhajeninji
kwa ntuka. **14** Mwaajujilanje mboka kwa a Nnungu bhowe
bhakunshimanga, mwaajujilanje mboka na wala nnaaloshanje.

15 Nng'angalalanje pamo na bhaangalalanga, na nngutanje pamo na bhaagutanga. **16** Ntamangane pamo kwa ulele. Nnaipunanje, ikabheje mwaapinganje nkali bhandu bha nyegala. Nnaipunilanje lunda Iwenunji. **17** Nnampindikulilanje mundu yangali ya mmbone kwa ligongo lya yangali ya mmbone yantendilenje. Ntendaanje ya mmbone ku bhandu bhowe. **18** Kila puikomboleka, ntamangananje kwa ulele na bhandunji bhowe. **19** Ashaalongo ajangu, nnapindikulilanje, ikabheje nnekanje bhajipatanje nnjimwa ja a Nnungu, pabha Mmajandiko ga Ukonjelo, Bhakulungwa bhakuti, "Kupindikulila ni kwangu nne, nne shimbindikulile." **20** Punda penepo Majandiko gakuti, "Mpwai nnjenu akolaga shibhanga, mumpe shalya, na akolaga nnjota, mumpe mashi, pabha punkutenda nneyo nnakumpalila makala ga moto pa ntwe gwakwe." **21** Yangali ya mmbone inankombole, ikabheje mwiiikombole kwa tenda ya mmbone.

13 Kila mundu aukunde upalume utagwala gula, pabha gwakwa upalume gogowe ukabhikwa na a Nnungu, na ukulungwa gogowe upali gula ushibhikwa na a Nnungu. **2** Kwa nneyo akuntauka kalongolele anatauka ya kupinga a Nnungu, numbe bhaatendanga nneyo shibhaukumulwanje. **3** Pabha bhakwetenje ukulungwa bhakakwaa jogoyanga bhatendanga ya mmbone, ikabhe bhatendanga itendi yangali ya mmbone. Bhai bhuli nnipinga nnaajogope bhakwete ukulungwa? Ntende ya mmbone, penepo shibhannumbilile. **4** Pabha bhenebho ni bhatumishi bha a Nnungu kwa ligongo lya kuntendela mmwe ya mmbone. Ikabheje, ntendaga yangali ya mmbone, penepo shumwaajogope, pabha bhashikola mashili ga ukumula. Bhenebho bhanakwatumishila a Nnungu kwa kwaaukumulanga mboteko bhatendanga yangali ya mmbone. **5** Kwa nneyo inapinjikwa kwaakundanga bhakwetenje

ukulungwa gogowe, nngabha kwa ligongo lya jogopa ukumu ja mboteko, ikabhe kwa ligongo lya ng'aniyo ya muntima. 6 Kwa ligongo lyolyo nnalipanga koli, pabha bhanganyabho ni bhakamula liengo bha a Nnunu na mubhalonjeyanga nniengo lyolyo. 7 Mumpanganje kila mundu malinga shiikupinjikwa. Nkamula koli, apegwe koli. Nkulonga upambi, apegwe upambi. Apinjikwa kuishimiwa, aishimiwe. Apinjikwa kukuywa, akuywe. 8 Nnakolanje ligambo kuka mundu jojowe, ikabhe ligambo lya pinganape, pabha akumpinga nnjakwe anakamula shalia ja Musha. 9 Pabha yene amulii, "Unalabhelabhe eu Unabhlaje eu Unalokolile," na amuli ina yowe, inamalila kwa kamula amuli jimo, "Gumpinje ntami nnjako malinga shukwiipinga gwamwene." 10 Pabha gumpingaga ntami nnjako, ukantendela yangali ya mmbone. Bhai, kupingana ni kutimilila kwa shalia. 11 Mmumanyanje kuti malanga ga jumuka gaishe, na nnaino malanga ga ntapulo gwetu gabhandishile kwa kaje, kupunda mobha gutwatandwibhe kulupalila. 12 Shilo shikakabha mala, na mui unabhandishila, bhai tuileshe itendi ya nnubhindu, niwala ikomanilo ya nshilangaya. 13 Malinga shiikupinjikwa tenda mui, tutame kwa tungamana, nngabha kwa doka, kolelwa, kwetela, labhalabha, mipwai na lupimililo. 14 Ikabhe nnundananje na Bhakulungwa a Yesu Kilishitu mbuti shiwalo shenunji, wala nnaganishiyanje ga ilokoli ya nshilu ikumpinganga ntendanje yambi.

14 Mumposhelanje Nkilishitu akaakulupalila ukoto, nnaiibukanje nkutaukangana ga ng'aniyo yakwe. 2 Mundu junu kwa ngulupai jakwe, analya indu yowe, na junu kwa ngulupai jakwe jikanabhe komala, analya lipondape. 3 Mundu alya indu yowe anannyegaye mundu akalya indu yowe, wala

jwene akaapinga kulya shindu shina, ananng'ukumule alya
indu yowe, pabha a Nnungu bhannjitishiye. **4** Ugwe gani
ukunng'ukumula ntumishi juka mundu juna? Ajimaga eu agwaga,
genego ga Bhakulungwa bhakwe. Numbe shajime, pabha
Bhakulungwa shibhannjimishe. **5** Mundu juna paganishiya
kuti, lipali lyubha lya mmbone lya tindibhalila punda mobha
gana, na juna paganishiya kuti, mobha gowe ganalingana.
Bhai kila mundu akagule lunda lwakwe. **6** Aganishiya kuti
lyubha lina lya mmbone kaje, anatenda nneyo kwa ligongo lya
kwaakuya Bhakulungwa, na jwene alya kila shalya, analya kwa
kwaakuya Bhakulungwa, pabha anakwaatendela ej a Nnungu.
Na jwalakwe akalya shalya shina anatenda nneyo kwa ligongo
lya kwaakuya Bhakulungwa, na jwalakwe anakwaatendela ej a
Nnungu. **7** Pabha jwakwa mundu munkumbi gwetu alama
kwa pinga nnyene, wala jwakwa awa kwapinga nnyene. **8**
Monaga tunalama, tulama kwa ligongo lya Bhakulungwa, eu
tuwaga, tunawa kwa ligongo lya Bhakulungwa. Bhai, monaga
tulamaga eu tuwaga, uwe tubhabho Bhakulungwa. **9** Kwa lyene
ligongoli, a Kilishitu bhashinkuwa na yuka, nkupinga bhabhe
Bhakulungwa bha bhakotonji na bha bhawilenje. **10** Kwa nndi
mmwe nnakwaukumula apwenu? Eu numbe mmwe kwa nndi
nnakwanyegaya apwenu? Pabha uwe tubhowe shitujime mmujo
ja shitengu sha ukumu sha a Nnungu. **11** Pabha Mmajandiko
Bhakulungwa bhakuti, “Malinga shingulama shino, bhakuti
Bhakulungwa, kila mundu shandindibhalile ulungolungo, na kila
mundu shakunde kuti nne ni a Nnungu.” **12** Kwa nneyo, kila
mundu munkumbi gwetu, shailugule nnyene kwa a Nnungu.
13 Bhai tunaukumulane, ikabhe tutumbilile kuleka indu ya
kunnebhya mmpwetu. **14** Kwa lundana kwangu na Bhakulungwa

a Yeshu, kunandenda nimumanye kuti, shakwa shalya shili sha nyata tandubhilepe, ikabheje mundu ashibhonaga shalya shina kuti sha nyata, bhai, kuka jwenejo shene shalyasho sha nyata.

15 Monaga shimummulaye mmpwenu kunjika kwa ligongo lya shalya shinkulya, bhai, nshileka kупingana. Shalya shenu shinabhe shiumilo sha kunng'obhya mundu, jubhanng'wilile a Kilishitu. **16** Bhai nnakundanje shindu shinkushibhonanga sha mmbone shinyegaywe. **17** Kulya na papila nngabha shindu Muupalume gwa a Nnungu, ikabhe ga aki na ulele na angalala kutupegwa naka Mbumu jwa Ukonjelo ni shipinjikwa muupalume gwa a Nnungu. **18** Pabha akwaatumishila a Kilishitu shana nneyo, anakwaanonyeya a Nnungu na anakundwa na bhandunji. **19** Bhai ibhaga nneyo, tukagulile indu ipeleshela ulele na ya tagana ntima. **20** Bhai nnaangabhanye ngulupai jibhabhishile a Nnungu kuka mundu ga shalya. Ikabheje nngabha ya mmbone, mundu jojowe kulya shalya shikuntenda mundu nnjakwe alebhe alyaga shene shalyasho. **21** Mbaya leka kulya nnyama wala ng'wa divai eu tenda shindu shoshowe, sha kunnebhyia mpwenu. **22** Bhai, shoshowe shinkukulupalila kwa a Nnungu bhenu, nntende shenesho. Mbaya jwene mundu akawiukumula nnyene, kwa shindu shakushibhona kuti sha aki. **23** Ikabheje mundu akola lipamba, alyaga shalya akuno aliganishiya kuti shangali sha mmbone, anatenda shambi pabha jwangalya kwa kulupalila ngulupai jakwe. Na shindu shoshowe shitendeka gwangali ngulupai, ni yambi.

15 Uwe twiishimilishe nngulupai, tunapinjikwa kwaajangutilanga bhangalinginji mashili nngulupai, na wala tunaikonjeleye twaashayene. **2** Kila mundu munkumbi gwetu anapinjikwa antendele uguja ntami nnjakwe, nkupinga ashimilishe nngulupai.

3 Pabha, a Kilishitu bhangaikonjeleya bhayene, ikabhe malinga shigataya Majandiko, “Matukano gowe gubhantukenenje mmwe gashinkumbata na nne.” **4** Pabha gowe gajandikwe bhukala, gashinkujandikwa nkupinga kutujiganya uwe. Genego gashinkujandikwa na Mmajandiko ga Ukonjelogo nkupinga tupate sha kulupalila na kututaga ntima putukwiipililila nkulindilila miadi ja a Nnungu jitimilile. **5** A Nnungu bhakutupa kwiipililila na tagwa ntima bhampanganje shikono, nkolanje ntima gumo nkwaakagula a Kilishitu Yesu, **6** nkupinga mmowe kwa ntima gumo na kwa lilobhe limo, mwaakuyanje a Nnungu, Atati bha Bhakulungwa bhetu a Yeshu Kilishitu. **7** Bhai, mposhelanje mwaashayenenji, malinga a Kilishitu shibhamposhelenje mmanganyanji, nkupinga a Nnungu bhakuywe. **8** Pabha ngunakummalanjilanga kuti, a Kilishitu bhashinkwaatumishilanga bhajalukenje, nkupinga bhalanguye ukweli gwa a Nnungu, na timiliya miadi jibhaapelenje ashaambuje bhukala, **9** nkupinga na bhandu bha ilambo ina bhaakuyanje a Nnungu kwa shiya shabho. Malinga Majandiko ga Ukonjelo shigalugula, “Kwa nneyo shininng’iniye munkumbi gwa bhandu bhangabha Bhayaudi. Shinyimbe nkuiniya lina lyenu.” **10** Kabhili Majandiko gakuti, “Mwiinonyelanje mmandunji bha ilambo ina, mwiinonyelanje pamo na bhandu bhabho.” **11** Kabhili gakuti, “Bhandu bhowe bhangabha Bhayaudi, mwaainiyanje Bhakulungwa, mmanganya mmandunji bhowe, mwaainiyanje.” **12** Kabhili a Ishaya bhakuti, “Shakoposhele mwana nshipinga sha a Yeshe jwalakwe shabhatagwalanje bhandunji bhangabha Bhayaudi, na bhalabhonji shibhankulupalilanje.” **13** Bhai, a Nnungu bhal shiumilo sha ngulupai bhampanganje kuangalala na ulele nkukulupalila kwenunji. Mpundanje kola ngulupai kwa mashili gaka Mbumu jwa Ukonjelo. **14** Ashaapwanga, nne

namwene nimumanyi kuti mmanganya nshikolanga uguja kaje,
na lumanyio lowe, na nnakombolanga kuleyana mwaashayenenji.

15 Ikabheje ngunakunnjandishilanga kwa makangala indu ina
mmaluwa muno, ninkumbushiyanje kabhili, kwa ligongo lya
nema jibhambele a Nnungu, **16** nkupinga mme ntumishi jwa a
Kilishitu Yesu ku bhandu bhangabha Bhayaudi. Liengo lyangu
lya ukubhishila nkulunguya Ngani ja Mmbone, nkupinga bhandu
bhangabha Bhayaudi bhabhanganje mbuti indu ya mbepei
iposhelwa na a Nnungu, itakaywa naka Mbamu jwa Ukonjelo. **17**
Bhai kwa lundana kwangu na a Kilishitu, ngunakwiipunila liengo
lyangu kwa a Nnungu. **18** Pabha ngalinga bheleketa shindu
shina shoshowe, ikabhe shibhatendile a Kilishitu Yesu nniengo
lyangu, nkupinga bhandu bhangabha Bhayaudi bhaakundanje
a Nnungu. Kwa imelekete na indendile, **19** kwa mashili
ga ilangulo na ilapo, na kwa mashili gaka Mbamu jwa a
Nnungu. Kutandubhila ku Yelushalemu na mmbali ya tome na
kweneko, mpaka ku lliliko, njilunguya Ngani ja Mmbone ja a
Kilishitu. **20** Kutumbilila kwangu mobha gowe, nunguye Ngani
ja Mmbone popowe pakanabhe lunguywa lina lya a Kilishitu,
nkupinga ngunalunguye mwalungwiye mundu juna. **21** Malinga
Majandiko ga Ukonjelo shigalugula, “Bhandu bhakanabhe
lungushiywanga ngani jabho, shibhabhonanje, na bhakanabhe
pilikananga bhala, shibhamanyanje.” **22** Kwa lyene ligongolyo
nashinkuibhililwa papagwinji ngunaisque kungwenunji. **23** Ikabheje
nnaino pabha maliye liengo aino mmbali ino, na kwa yaka
yaigwinji njikola lilaka lya ika kungwenunji, **24** ngunganishiya
tenda nneyo nnaino, pushimbite gwa kwenda ku Ishipania.
Shimbite kunnolanga na ndamaga pamo na mmanganya kwa
mobha gashoko nnyangutilanje kwa mwanja gwangu. **25** Ikabheje

nnaino ngunakwenda ku Yelushalemu kukwatumishilanga bhandunji bha ukonjelo. **26** Pabha ishikwaanonyelanga makanisha ga ku Makedonia na ku Akaya, kwaajangutilanga bhaalaga bha ukonjelo bhalinginji ku Yelushalemuko. **27** Ashaayenenji bhashiengwanga tenda nneyo, ikabheje lyene liengolyo kweli lyabhonji, pabha bhanalongwanga. Ibhaga, bhandu bhangabha Bhayaudi bhashikundikanywanga mmboka ya Bhayaudi, bhanapinjikwanga nabhalabhonji kwaatumishilanga Bhayaudi kwa indu yabhonji. **28** Bhai maliyaga lyene liengolyo, nikwaakamuyanga nyangutilo imbatile kwa ligongo lyabhonji, shinimpitilanje pushinyende ku Ishipania. **29** Na nne nimumanyi kuti pushing'ishe kunngwenunji, shing'ishe na mboka yaigwinji ya a Kilishitu. **30** Bhai, ashaapwanga, ngunakunshondelesheyanga kwa lina lya Bhakulungwa bhetu a Yesu Kilishitu na kupinga kutupegwa naka Mbumu, nnundanje na nne nkunyujila kwa a Nnungu, **31** kuti ndapulwe okmmakono ga bhakaakulupalilanga bhalinginji ku Yudea, na liengo lyangu ku Yelushalemuko liposhelwe na bhandunji bha ukonjelo bhalinginji kweneko, **32** nkupinga a Nnungu bhapingaga ng'ishe kungwenunji kwa angalala, numbe nne mbumulile pamo na mmanganyanji. **33** A Nnungu bha ulele, bhabhe pamo na mmanganyanji mmowe!

Amina!

16 Ngunapinga mwaamanyanje alumbu bhetu a Poebha, bhatumishi bha likanisha lya ku Kenkelea. **2** Mwaaposhelanje kwa ligongo lya Bhakulungwa malinga shiikupinjikwa kubhandunji bha ukonjelo. Mwaajangutilanje kwa shoshowe shibhapinga kunnjuganga, pabha na bhalabho bhashikwaajangutilanga bhandu bhabhagwinji pamo na nne. **3** Mwaashalimianje a Pilishika na a Akula, bhatumishi ajangunji bha a Kilishitu Yesu.

4 Bhene bhanganyabho bhapingaga bhulagwanga kwa ligongo lyangu nne. Ngunakwaatendelanga eja, nngabha nne jikape, ikabhe na makanisha gowe ga bhandu bha ilambo ina. 5 Na kabhili, shalamu ku bhandunji bha likanisha bhaiamananga nnyumba jabhonji. Shalamu ambwiga ajangu a Epainito, bhalibha ndandubho kwaakulupalila a Kilishitu, nshilambo sha Ashia.

6 Shalamu shabho a Malia bhatumbile kamula liengo kwa ligongo lyenu mmanganya. 7 Shalamu kwa a Ndoloniko na a Yonashi, ashaalongo ajangunji bhatabhilwenje pamo na nne, bhandunji bha manyika munkumbi gwa ashimitume bha a Yesu, bhalinginji Bhakilishitu nne nganabhe kubha Nankilishitu. 8 Shalamu kwa a Ampiliato, ambwiga ajangu nkulundana na Bhakulungwa. 9 Shalamu kwa a Alubhanushi, bhatumishi ajangu bha a Kilishitu, shalamu ambwiga ajangu a Shitaku. 10 Shalamu kwa a Apelishi, kulupalika kwabho kwa a Yesu kumanyishe. Shalamu bhowenji bhalinginji nnyumba ja Alishitobhula. 11 Shalamu alongo ajangu a Elodiana, shalamu bhandunji bhowe bha nnyumba ja a Nakishiushi, bhakwaakulupalilanga Bhakulungwa. 12 Shalamu shabbonji a Tulupina na a Tuluposha bhanabhakongwe bhaakamulanga liengo lya Bhakulungwa. Shalamu jabho ambwiga ajangu a Pelishishi, na bhalabho bhakongwe bhakamwile liengo kwa tumbila kwa ligongo lya Bhakulungwa. 13 Shalamu shabho a Lupo, bhakamula liengo kwa tumbila na anyinabhabho numbe nne bhungwaashema mama. 14 Shalamu shabbonji Ashinkilito na a Pilegoni na a Eme na a Patulobhashi na a Ema na ashaapwetu bhalinginji pamo na bhene bhanganyabho. 15 Shalamu yabhonji a Pilologo na a Julia na a Neliashi na alumbu bhabho, na a Olimpa na bhandunji bha ukonjelo bhalinginji pamo na bhene bhanganyabho. 16

Nshalimiananje kwa ukonjelo. Shalamu shenunji kukopoka ku bhandu bha makanisha gowe ga a Kilishitu. **17** Ashaalongo ajangunji, ngunakunshondelesheyanga mwiiteiganje na bhene bhakumbuyanga ya malekano nikwaabkulayanga bhananji kulebha, nileka majiganyo gunnjigenywenje. Mwiepuyanje na bhene bhandunjibho, **18** pabha bhandunji bha nneyo bhakakwatumishilanga Bhakulungwa bhetu a Kilishitu, ikabhe mapitiu gabhonji ashaayene. Kwa malobhe gabhonji ga nong'aya na kwiikonjeleya bhanapuganya mitima ja bhandunji bhakakushimanya shindu. **19** Bhandu bhowe bhapilikenenje ga kunda kwenunji, kwa nneyo nnanonyelanga. Ikabheje pungupinga nkolanje lunda kwa indu ya mmbone na nnaputukanje kwa indu yangali ya mmbone. **20** Na a Nnungu bha ulele shangupe shibhamponde Lishetani pamakongono genunji. Nema ja Bhakulungwa bhetu a Yesu Kilishitu jibhe na mmanganya. **21** A Timoteo bhatumishi ajangu bhanakunnamushilanga. Na a Lukio na a Yashoni na a Shoshipateli ashaalongo ajangunji, bhanakunnamushilanga. **22** Na nne a Tetio, ngujandika jene bhaluwa jino, ngunakunnamushilanga kwa lina lya Bhakulungwa. **23** A Gayo, bhayene mui bhamboshele na bhandu bhowe bha likanisha bhaiamananga nnyumba jabho, bhanakunnamushilanga. A Elashito, bhaagoya mmbiya bha shilambo na a Kwatushi bhanakunshalimianga. **24** Nema ja Bhakulungwa bhetu a Yesu Kilishitu jibhe na mmowenji. Amina. **25** Bhai, nnaino bhakuywe a Nnungu! Bhalabho bhanakombola kunshimilikanga Nngani ja Mmbone ja a Yesu Kilishitu jinungwiye jila, malinga shiishite manyika indu ya nng'yo, ikamanyikaga pitipiti, (*aiōnios g166*) **26** ikabheje nnaino imanyishe kwa majandiko ga ashinkulondola bha a Nnungu, kwa amuli ja a Nnungu bha pitipiti, nkupinga

bhandu bha ilambo yowe bhakulupalilanje na kunda. (aiōnios
g166) 27 Bhai, a Nnungu bhakwete lunda jikape, bhakuywe pitipiti
kupitila a Yesu Kilishitu. Amina. (aiōn g165)

1 Bhakolinto

1 Nne a Pauli njemilwe kubha ntume jwa a Yeshu Kilishitu kwa pinga kwabho a Nnungu, na Bhakilishitu ajangu a Shoshiteneshi ngunakunnjandishilanga, **2** mmanganya likanisha lya a Nnungu nninginji ku Kolinto. Nninginji bha ukonjelo nkulundana na a Kilishitu Yeshu, nshemilwenje mmanganje bhandu bha a Nnungu pamo na bhandu bhowe bhakwaajuganga Bhakulungwa bhetu a Yeshu Kilishitu bhalibhakulungwa bhabhonji na bhetu. **3** Tunakumpinjilanga nema na ulele kopoka kwa Atati a Nnungu, na Bhakulungwa bhetu a Yeshu Kilishitu. **4** Ngunakwaatendela ejia a Nnungu mobha gowe kwa ligongo lyenunji, pabha bhashikumpanganga nema jabho pitila a Yeshu Kilishitu. **5** Pabha, kwa lundana na a Yeshu Kilishitu nshishulushilwanga kwa kila shindu. Nshikolanga shikono sha lumanyio lowe na kombola kubheleketa. **6** Malinga ukong'ondelo gwa a Kilishitu shiushite malila mmitima jenunji, **7** wala nkatubhilwanga shipaji shoshowe, nnilolelanga kubhonekana kwabho Bhakulungwa bhetu a Yeshu Kilishitu. **8** Bhenebho shibhanshimilikanje mmanganya mpaka kumpelo, nnabhonekanje nshilebhanga lyubha lya kwiya Bhakulungwa bhetu a Yeshu Kilishitu lila. **9** A Nnungu bha kulupalika, bhashinkunshemanga mmanganya mmanganje shindu shimo na bhana bhabho a Yeshu Kilishitu Bhakulungwa bhetu. **10** Ashaalongo, ngunakunshondelesheyanga kwa lina lya Bhakulungwa bhetu a Yeshu Kilishitu kuti, gunkubheleketa gabhe gamo, kunapagwe kugabhanyika munkumbi gwenunji, ikabhe nkolanje ng'aniyo imo na ndumbililo imo. **11** Pabha ashaalongo ajangu, njilugulilwa ga ngani jenunji na bhandunji bha ulongo gwa a Koloe kuti, gushipagwa mpwai munkumbi gwenunji. **12** Bhai, shingupinga bheleketa ni sheshino, kila

mundu anabheleketa mwakwe. Juna akuti, "Nne jwa a Pauli," na juna kuti, "Nne jwa a Apolo," na juna kuti, "Nne jwa a Kepa", na juna akuti, "Nne jwa a Kilishitu." **13** Bhuli, a Kilishitu bhashigabhanyika? Bhuli, a Pauli ni bhakomelwe munshalabha kwa ligongo lyenunji? Eu bhuli, mwashinkubhatishwanga kwa lina lya a Pauli? **14** Ngunakwaatendela ej a Nnungu, pabha nangammatisha mundu jojowe munkumbi gwenunji ikabhe a Kilishipashi na a Gayo pe. **15** Kwa nneyo jwakwa shaabhelekete kuti ashibhatishwa kwa lina lyangu. **16** Elo, naabhatishenje a Shitepana na bha likaja lyabho, punda bhanganyabho, kwali monaga nammatishe mundu juna. **17** A Kilishitu bhanganduma kubhatisha, ikabhe nunguye Ngani ja Mmbone. Na kwene lunguyako kunakulupalile lunda lwa shigundu, nkupinga kuwa kwa a Kilishitu munshalabha kunapetekuywe. **18** Pabha ntenga gwa kuwa kwa a Yeshu munshalabha kwa bhaobhanga ni ungumba, ikabheje kwetu uwe tuli muntapulo gwa gwene ntenga go, ni mashili ga a Nnungu. **19** Pabha ishijandikwa, "Shing'angabhanye lunda lwabhonji, na lumanyio lwa bhaashomanga shinilukane."

20 Bhai, luli kwei lunda lwa bhakwetenje lunda? Bhalinginji kwei bhaajiganya bha shalia ja a Musha? Ali kwei jwa mitau jwa gene mobha gano? A Nnungu bhashikulutenda lunda lwa bhandu bha pashilambolyo ubhelu. (*aiōn g165*) **21**

Pabha kwa lunda lwa a Nnungu, bhandu bhakwetenje lunda bhakakombolanga kwaamanya a Nnungu. Pabha a Nnungu bhashinkupinga kwaatapulanga bhakwaakulupalilanga, kwa shene shibhakushibhonanga bhakwetenje lunda kuti ungumba, yani ntenga gutulunguya. **22** Pabha Bhayaudi bhanapinganga ilangulo na Bhagiliki bhanaloleyanga lunda. **23** Ikabheje uwe tunakwaalunguya a Kilishitu bhapotekwe munshalabha. Ku

Bhayaudi ndabhila na kubhandu bha ilambo ina ungumba,
24 ikabheje kwa bhaagwilwenje na a Nnungu Bhayaudi na
Bhagiliki, a Kilishitu ni mashili na lunda lwa a Nnungu.
25 Pabha ubhonekana ungumba gwa a Nnungu ushikola
lunda kupunda lwa bhandu, kubhoneka kunyegala kwa a
Nnungu, kushikola mashili kupunda mashili ga bhandu. 26
Ashaapwanga, nkumbushilanje mobha gumwashemilwenje
na a Nnungu, bhakwetenje lunda bhakashulukenjeje nkali
kwa lunda lwa shigundu, bhabhagwinji bhakamanyikenjeje
na wala bhakakwetenjeje indu. 27 Ikabheje a Nnungu
bhashinkuiagula indu ya shibhelu, nkupinga bhaapetekuyanje
bhakwetenje lunda, na bhashinkuiagula indu ya nyegaywa
nkupinga kwaapetekuyanga bhandu bhakwetenje mashili. 28
A Nnungu bhashinkuagula indu ya nyegala yangali mashili ya
pashilambolyo, numbe indu ya nyegala yabhonekaga mbuti
ikapaliji, nkupinga bhaipetekuye indu ibhoneka ya mmbone ku
bhandunji. 29 Bhai, jwakwa mundu shaipunile shoshowe kwa a
Nnungu. 30 A Nnungu bhayene bhashikunnundanyanga na a
Kilishitu Yesu. A Nnungu bhashikwaatenda a Kilishitu bhabhe
lunda lwetu na aki jetu, na pitila bhenebho uwe tunalundana na
a Nnungu kubha bhandu bhabho bha ukonjelo, na bhawetenje
aki na bhagombolwenje. 31 Bhai, malinga shijandikwe, "Apinga
kwiipuna, bhai, aipunile liengo lya Bhakulungwa."

2 Bhakilishitu ajangunji, nne punaishe kunngwenunji
kukunnungushiyanga, nangannungushayanga ya nng'yo ga
ntenga gwa a Nnungu, kwa talashiya ukoto wala kwa lunda
lwa shigundu. 2 Punaliji kunngwenunji nashinkutumbilila
ngunalunguye shindu shoshowe, ikabhe mwaamanyanje a Yesu
Kilishitu, bhakomelwe munshalabha. 3 Punaliji kunngwenunji

ngakweteje mashili, nguliungumila na lipamba lya kaje. 4
Malobhe gangu na kulunguya kwangu kukaliji kwa lunda na
tekeya, ikabhe kwa ilangulo na mashili gaka Mbamu jwa Ukonjelo.
5 Nashinkutenda genego nkupinga ngulupai jenunji jinatamile
ga lunda luka mundu, ikabhe mmashili ga a Nnungu. 6 Nkali
nneyo, tunabheleketa kwa lunda kwa bhene bhaishimilikenje
nngulupai bhala, ikabheje lwene lundalo nngabha lwa pa
shilambolyo pano, wala nngabha lwa bhakulunhwanji bha
pa shilambolyo bhalinginji munkumbi gwa bhaobhang. (aiōn
g165) 7 Lunda lutubheleketa lwa shinjubhi sha a Nnungu,
ni lunda lwaishiwe, kuumila kupanganywa shilambolyo, kwa
ligongo lya ukojelo gewtu. (aiōn g165) 8 Lwene lundalo
bhatagwala bha pashilambolyo bhakakulumanyanga, pabha
kaliji bhakalumanyinji, ngubhakaakomelenje munshalabha,
Bhakulungwa bha Ukonjelo. (aiōn g165) 9 Ikabheje malinga
shijandikwe, "Indu ikanabhe bhoneka na mundu wala kwiipilikana,
indu ikanabhe ganishiywa na mundu, genego a Nnungu ni
gubhaabhishilenje bhandu bhakwaapinganga bhala." 10 Genego
gubhatulangwiye a Nnungu kwa Mbamu jwabho. Pabha Mbamu
analoleya indu yowe nkali indu ya injubhi ya a Nnungu. 11
Gani akwiimanya indu ili mmbumu juka mundu ikabhe mbumu
juka mundu nnyene? Nneyo peyo indu ya a Nnungu jwakwa
akwiimanya ikabhe Mbamu jwa a Nnungu. 12 Ikabheje uwe
twangaposhela mbumu jwa pashilambolyo, ikabhe Mbamu
akopoka kwa a Nnungu nkupinga atukomboye kugamanya
gowe gubhatulagushiye a Nnungu. 13 Bhai, uwe tunajiganya,
nngabha kwa malobhe gutujigenywe na lunda lwa bhandunji,
ikabhe kwa malobhe gutujigenywe naka Mbamu, tulijiganya
indu ya muntima kwa bhakwetenje jwene Mbamujo. 14 Mundu

jwa lunda lwa shibhelekwe, akakwiiposhela indu ika Mbamu jwa a Nnungu. Kuka jwenejo inabhoneka mbuti ungumba wala akakwiimanya, pabha pugamanyika kwa jangutilwa naka Mbamu jwa Ukonjelo. **15** Ikabheje mundu akwete jwene Mbamujo anakombola kuukumula gowe, na nnyene akaukumulwa naka mundu juna. **16** Majandiko gakuti, "Gani akombola kulumanya lunda lwa Bhakulungwa? Gani shaabhelekete nabho?" Ikabheje uwe tushikola lunda lwa a Kilishitu.

3 Bhakilishitu ajangunji, nne punaliji na mmanganya nangammeleketelanga mbuti bhandu bha mmbumu. Ikabheje mbuti bhandu bha pashilambolyo, malinga ashinambombe nndamo ja shi Kilishitu. **2** Nashinkumpanganga mabhele, nngabha shalya shanonopa, pabha nkashilepelenje. Nkali nnaino nkashikombolanga. **3** Numbe mmanganyanji launo nnakagulilanga indu ya pa shilambolyo. Pabha kungwenunji lushipagwa lupimililo na mpwai, bhuli mmanganya nngabha malinga bhandunji bha pa shilambolyo? Nnatamangana kwa kagulila nkubho gwa bhandunji bha pashilambolyo. **4** Mundu jumo munkumbi gwenunji pabheleketa kuti nne jwa a Pauli na juna kuti nne jwa a Apolo, bhuli, yeneyo ikalangula kuti nnatamangana malinga bhandu bha pa shilambolyo? **5** A Apolo ni agani? Na a Pauli ni agani? Uwe bhatumishipe twampeleshelenje mmanganya ngulupai. Kila mundu munkumbi gwetu anatenda malinga shapegwilwe na Bhakulungwa. **6** Nne nashinkupanda mmbeju, a Apolo gubhajitilile mashi, ikabheje bhameshiye mmbeju a Nnungu. **7** Kwa nneyo, jwa mmbone nngabha apandile mmbeju jula eu ajitilile mashi, ikabhe bha mmbone a Nnungu bhameshiye mmbeju. **8** Apandile jula eu ajitilile mashi bhowe bhanalingananga, ikabheje kila mundu

shaposhele upo yakwe kwa liengo lyatendile. **9** Pabha uwe na mmanganyanji, tubhowe tubhakamula liengo lya a Nnungu pamo, na mmanganya ni malinga nngunda gwabho na nyumba jabho. **10** Kwa jangutilwa na nema jimbegwilwe na a Nnungu, malinga nkushenga akwete lunda, aolile nshingi gwa nyumba na mundu junna gwaishe shenga pa ntundu jakwe. Ikabheje kila mundu alolesheyeye shakuti shenga panani jakwe. **11** Jwakwa mundu junna shaolele maimbo ga shenga, paolelwe pala, yani a Yesu Kilishitu. **12** Ibhaga mundu shaashenje panani jakwe, kwa shaabhu eu maganga ga ela eu maganga ga bhei jikuklungwa, na junna shaashenjele nkali mikongo eu maamba eu manyai. **13** Ikabheje, lyubha lya ukumu liengo lya kila mundu shilibhoneshe mobha gushibhaishe a Kilishitu. Pabha, lyene lyubhaloy a Nnungu shibhapime kushimilika kwa kila liengo. **14** Monaga shashenjile mundu shibhonekaga kulonjeya, bhai shaposhele upo. **15** Ikabheje shashenjile mundu shitinikaga, bhai, akapegwa upo, ikabheje nnyene shatapulwe mbuti akolobhweshe pa moto. **16** Bhuli, nkakwimanyanga kuti mmanganya ni likanisha, na kuti Mbamu jwa a Nnungu anatama mmunda jenunji? **17** Bhai, mundu aangabhanyaga likanisha lya a Nnungulyo, a Nnungu shibhanng'angabhanaye jwene mundujo, pabha likanisha lya a Nnungu, ni lya Ukonjelo na lyene likanisha lya a Nnungulyo, ni mmanganyanji. **18** Nnaitembanje! Mundu jojowe munkumbi gwenunji aiganishiyaga kuti ashikola lunda malinga lwa pa shilambolyo, mbaya aiputuye nkupinga akole lunda lwa kweli.

(aiōn g165) **19** Pabha lunda lwa pa shilambolyo pano ni ungumba kwa a Nnungu. Na Majandiko ga Ukonjelo gakuti, "A Nnungu bhanakwaakamulanga bhakwetenje lunda, nkupenya kwabhonji."

20 Kabhili Majandiko gakuti, "Bhakulungwa bhamumanyi ng'anjiyo

ya bhakwetenje lunda kuti ikapwaa.” **21** Bhai mundu anaipunile bhandu. Pabha indu yowe yenunji. **22** Ibhaga a Pauli, eu a Apolo, eu a Kepa, eu shilambolyo, eu gumi na kuwa, eu indu ipali, nnaino na ikwiya, yowe ni yenunji, **23** ikabheje mmanganya ni bha a Kilishitu na bhalabho a Kilishitu ni bha a Nnungu.

4 Bhandunji bhatubhonanje uwe kuti bhatumishi bha a Kilishitu tukamwiye injubhi ya a Nnungu. **2** Shipingwa penepo ntumishi akamwiye jula akulupalilwe. **3** Kwangu nne kumaliya kwa malobhe gangu na mmwe eu na bhandu bhana nngabha shindu. Kwangu nne nngabha shindu kuukumulwa na mmanganya eu na maakama jojowe ja bhandunji, na wala namwene ngakwiukumula. **4** Nntima gwangu ukakushibhona shindu shoshowe sha jangula, ikabheje shenesho shikandenda nne ngunakole sha gambwa, ikabhe bhamaliya malobhe gangu nne Bhakulungwa. **5** Bhai, nnamaliyanje malobhe malanga gakte gakanabhe ika, nnekanje mpaka pushibhaishe Bhakulungwa. Bhenebho bhapinga unukula indu yowe itendwa kwa shinjubhi, na languya ili mmitima ja bhandunji. Penepo kila mundu shalumbililwe na a Nnungu. **6** Bhakilishitu ajangunji, gene gundashiyego njilandanya ga a Apolo na nne kwenu mmanganyanji, nkupinga mwijiganyanje kugamanya malombolelo ga shibheleketo sha kuti, “Nnapundanje gajandikwego.” Anapagwe mundu akwiipunila mundu jumo na kunnyegaya junu. **7** Gani ampele mmwe ukulungwa kupunda bhananji? Shindu shashi shinkwete, gwangali kupegwa na a Nnungu? Monaga nshiipegwa shinkwiipuna nndi mbuti mwaangapegwa? **8** Ayaga! Nkwetenje indu ya togolela! Igala nkwenenje shipato shikulungwa! Mpatilenje upalume gwangali uwe! Elo, mbaya nkalinginji bhapalume, nkupinga na uwe tutagwale pamo na mmanganyanji. **9** Pungubhona a Nnungu

bhashikutubhika uwe mitume tubhe tubhanndu bha kumpelo,
pabha tushibhikwa tubhe mbuti bhandu bha bhulagwa pa
lugwinjili, tulolwe na bhandu bha shilambolyo na ashimalaika.

10 Uwe tubhangumba kwa ligongo lya a Kilishitu, ikabheje
mmanganya nshikolanga lunda nkulundana na a Kilishitu!
Uwe twangali mashili, mmanganya nshikolanga. Mmanganya
nnaishimiwanga, ikabheje uwe tukaishimiwa. **11** Mpaka agano
malanga gano, uwe tushikola nnjota na shibhanga twangali
nngubho, tunapotekwa na twangali ndamo. **12** Tunaabhuka
mmaengo twaashayene. Pututukanwa, tunakwajujilanga mboka,
tupotekwaga tunakwiipililila, **13** tulambililwaga, tunajangula
kwa ishma. Mpaka nnaino putuli mbuti indu ya nunga na
ya nyata pashilambolyo. **14** Ngaajandika gegano nkupinga
nintokomayanje, ikabhe kwa ligongo lya kunneyanga mbuti
ashibhanangu bhungumpinganga. **15** Pabha nkali nkietenje
bhaajiganya bhabhagwinji nndamo ja Shikilishitu, ikabheje
ainabhenunji bhamope, pabha nne ninkietenje nkulundana
na a Kilishitu kwa lunguya Ngani ja Mmbone. **16** Kwa nneyo,
ngunakunshondelesheyanga nngagulanje nne shinguti tenda. **17**
Kwa nneyo njikwaatuma a Timoteo kunngwenunji, bhanangu
bhungwaaptinga, bhaakulupalika nkulundana na Bhakulungwa.
Shibhankumbushiyanje shingutama nne nkulundana na a
Kilishitu, na majiganyo gangu mmakanisha gowe. **18**
Bhananji munkumbi gwenunji bhatandwibhenje kwiipunanga
bhaliganishiyanga kuti ngaika kabhili kweneko. **19** Ikabheje,
Bhakulungwa bhapingaga shing'ishe kunngwenunji, penepo
shinole namwene, nngabha kwa pilikanape malobhe gabhonji,
ikabhe na kugamanya mashili gabhonji. **20** Pabha upalume
gwa a Nnunu nngabha ga malobhepe, ikabhe mashili. **21**

Nkupinganga nndi? Ng'ishe na imbo eu ng'ishe na ntima gwa
pingana na kwiitimalika?

5 Jipali ngani jishumile kuti munkumbi gwenunji kushipagwa labhalabha, kabili kwene labhalabhako kukanabhe pagwa nkali kubhandu bhakakwaamanya a Nnungu. Njilugulilwa kuti mundu ashikwaatola bhakongwe bha ainagwe! **2** Na mmanganya nnakwiipunanga, mbaya nkainjikenje nikumminga munkumbi gwenunji atendile yeneyojo. **3** Nkali nili kwataliya na mmanganya, ntima gwangu puguli pamo na mmanganya, mbuti namwene nili popo, bhai ninng'ukumwile kwa mashili ga lina a Yeshu atendile yangali ya mmbonejo. **4** Malanga gunkumananga pamo kwa lina lya Bhakulungwa a Yeshu, na ntima gwangu puukubha na mmanganyanji, bhai, kwa mashili ga Bhakulungwa bhetu a Yeshu, **5** munshoyanje jwene mundujo na munkamuyanje kuka Lishetani, nkupinga shiilu shakwe sha ilebho shiangabhanywe na nnyene atapulwe lyubha lishibhaishe Bhakulungwa. **6** Kwiipuna kwenunji kukapwaa! Bhuli, nkakwiimanya kuti ngedule jishoko jinaumuya lidonji lyowe lya utandi? Na yalakwe yambi pwikujenela nneyo peyo. **7** Mwitakayanje, nkajaanje ngedule yani yambi ya bhukala ila, nkupinga mmanganje mwangalinginji yambi, pabha a Kilishitu bhali Pashaka jetu bhashishoywa kubha mbepei. **8** Bhai, tulye Pashaka jetu jangali ngedule ja bhukala yani indu yangali ya mmbone na ya nyata, ikabhe kwa nkate gwangataga ngedule, yani kwa indu ya mmbone na ya kweli. **9** Nannjandishilenje mimaluwa jangu kuti nnakundikananje na bhandunji bha labhalabha. **10** Ngabheleketa kuti nnakundikananje na bha labhalabha na bha shienga na bha unami na bha kulupalilanga yanamu. Pabha nkupinga kwaab hutukanga bhowebho, nkapinjikwenje

kushoka pa shilambolyo pano. **11** Shinannjandishilenje ni kuti, nnakundikananje naka mundu akwiishema Nkilishitu, alabhalabha na akwete shienga, na akwiitindibhalila yanamu, na atukana bhandu, na akolelwa ukana na apokonyola indu. Na kupunda penepo, nnakundanje nkali kutama nilyanajo shalya mundu jwa nneyo. **12** Bhai, nngabha gangu nne kumaliya malobhe ga bhandu bhalinginji nngabha Bhakilishitu. Pabha a Nnungu shibhamaliye. Numbe mmanganya nkapinjikwanga kumaliya malobhe ga bhalinginji munkumbi gwenunji? **13** Ikabheje bhalinginji nngabha Bhakilishitubho a Nnungu shibhaukumule, mmanganya mumminganje munkumbi gwenunji, jwangali jwa mmbonejo!

6 Akombola bhuli mundu munkumbi gwenunji kunnugula Nkilishitu nnjakwe kubhaukumula bhakakwaamanyanga a Nnungu, nileka kwenda kubhandunji bha ukonjelo? **2** Bhuli, nkakumumanyanga kuti bhandunj bha ukonjelo shibhaukumulanje malobhe pa shilambolyo? Bhai, ibhaga malobhe ga pa shilambolyo shigaukumulwe na mmanganya, pakuti nkaukumulanga nkali malobhe gamashoko? **3** Bhuli, nkakumumanyanga kuti tupinga kwaukumulanga ashimalaika na nngabha ga ukumula malobhe ga pa shilambolyope? **4** Punkupwatanga ga indu ya mobha gowe, bhuli, nnakwaashemanga bhandu bhakakwaamanyanga a Nnungu kubhammalishiyanje malobhe? **5** Mmanganya nkolanje oni! Nkupinga lugulanga kuti jwakwa munkumbi gwenunji akwete lunda lwa maliya malobhe genunji? **6** Ikabhe nnapelekananga mwaashayenenji, ku bhamaliya malobhe bhakakwaakulupalilanga a Nnungu. **7** Kwa kweli kwene lugulanangako, kunalanguya kuti mmitima jenunji

nnepelenje! Nngabha mbaya kwiipililila kutendelwa yangali ya mmbone? Nngabha mbaya kupokonyolwa indu yenunji yowe? **8** Ikabheje mmanganya ni nkupokonyolanga, na mbenya genego nigunkwaatendelanga nkali ashaalongo ajenunji! **9** Eu bhuli, nkakumumanyanga kuti bhandu bhangalinginji bha mmbone bhakalishinji Upalume gwa a Nnungu? Nnaitembanje! Bhandu bhaalabhalabhangna na bhaatindibhalilanga yanamu na bhanabhalume mashoga na bhaagonana ashaayenenji kwa ashaayenenji, yani bhanabhalume kwa bhanabhalume, na bhanabhakongwe kwa bhanabhakongwe, **10** bhagwii na bha shienga na bha kolelwanga na bha lung'wenyi na bha pokonyolanga indu, bhene bhowebho bhakajnjilanga mu Upalume gwa a Nnungu. **11** Bhananji pumwalinginji nneyo peyo, ikabheje nnaino nshitakaywanga nikola aki kwa Nnungu, nkulundana na Bhakulungwa a Yeshu Kilishitu naka Mbumu jwa a Nnungu bhetu. **12** Mundu munkumbi gwenunji shaabhelekete, "Kwangu nne indu yowe alali." Elo, ikabheje nngabha yowe ipwaa. Indu yowe inapwaa ikabheje ngapinga shindu shoshowe shindagwale. **13** Juna akuti, "Shalya kwa lipitiu na lipitiu kwa shalya." Elo, ikabheje a Nnungu shibhaiangabanye yowe inaabili. Shiilu shika mundu nngabha sha tendela ya labhalabha, ikabhe sha kwaakamulila maengo Bhakulungwa, na Bhakulungwa ni bhayene shene shiilusho. **14** Bhai, a Nnungu bhaayushiye Bhakulungwa bhakaweje, shibhatuyuye na uwe kwa mashili gabho. **15** Bhuli, nkakumumanyanga kuti, iilu yenunji ni ibhalo ya shiilu sha a Kilishitu? Bhuli, punkuganishiyanga ngunakombola tola ibhalo ya shiilu sha a Kilishitu, nilundanya na shiilu shika lijajana? Ng'oo! **16** Pabha, malinga shinkumumanyanga, kuti alundana naka lijajana anabha shiilu shimo naka jwenejo?

Pabha ishijandikwa, "Bhowe bhanaabhili shibhabhanganje shiilu shimo." **17** Ikabheje alundene na Bhakulungwa anabha ntima gumo na bhenebho. **18** Mwiepuyanje na labhalabha. Yambi ina yowe mundu anatenda palanga shiilu, ikabheje alabhalabha jula anatenda shambi nshiilu shakwe nnyene **19** Bhuli, nkakwimanyanga kuti iilu yenunji liekalu lika Mbamu jwa Ukonjelo atama mmunda jenunji, jumpegwilwenje na a Nnungu? Bhai, iiluyo nngabha yenunji. **20** Pabha nshiumwanga kwa bhei jikulungwa, kwa nneyo iilu yenunji yaakuye a Nnungu.

7 Bhai, nnaino kwa gene gunnyandishilenje gala, mbaya mundu anaganishiye ga gona na jwankongwe. **2** Ikabheje kwa ligongo lya kwiepuya na labhalabha, bhai, kila jwannume akole nkagwe, na kila jwankongwe akole mmbujegwe. **3** Jwannume antendele nkagwe malinga shiikupinjikwa, naka jwankongwe nneyo peyo, antendele mmbujegwe malinga shiikupinjikwa. **4** Jwankongwe jwangali lilobhe kwa shiilu shakwe, ikabhe ambujegwe, nneyo peyo jwannume jwangali lilobhe kwa shiilu shakwe, ikabhe akagwe. **5** Nnannjime nnjenu shili shakwe, ikabhe ntendanje nneyo kwa patana kwa malanga gashoko, nkupinga mpatanje malanga ga kwaajuga a Nnungu. Kungai nkamatangananje pamo kabibili, nkupinga Lishetani ananninganje kwa ligongo lya ungakola mashili gwenunji. **6** Ngunabheleketa gegano nng'agularje mwaashayene, nngabha amuli. **7** Punapingaga bhandu bhowe bhabhanganje malinga nne, ikabheje kila mundu ashikola shapegwilwe kopoka kwa a Nnungu, juna ashi na juna ashila. **8** Bhai, bhakanabhe lombanga bhala na bhashitenga, mbaya bhatamangananje gwangali kulomba malinga nne. **9** Nkali nneyo, ibhaga mundu akakombole kwiipililila, bhai alombe, pabha mbaya lomba nngabha ga lokolila kwa punda.

10 Bhalombilenje bhala ngunakwaapanganga amuli, ikabheje nngabha nne, ikabhe Bhakulungwa, jwankongwe anallekane naka mbujegwe, **11** ikabheje alekanaga, bhai, analombwe eu aelewane na ambujegwe. Na jwannume anampe talaka nkagwe.

12 Kubhananji bhala, nne, nngabha Bhakulungwa, nguti nnei, ibhaga apali jwannume nkilishitu, akwete jwankongwe akanabhe kulupalila, na jwalakwe jwankongwejo akundile tama nabho, anaaleshe. **13** Na jwankongwe Nkilishitu akwete jwannume akanabhe kulupalila, na jwannumejo akundile tama nabho, anaaleshe ambujegwe. **14** Pabha jwannume jwangakulupalila jula anaposhelwa na a Nnungu kwa lundana kwakwe naka nkagwe, nneyo peyo kuka jwankongwe. Ikanabhe nneyo, ashibhana bhenunji bhakanatakaywanje, ikabheje nnaino paalinginji bha ukonjelo. **15** Nkali nneyo, ibhaga akaakulupalila jula anapinga kunneka nnjakwe ali Nkilishitu, bhai anneshe. Penepo Nkilishitu jwannume eu jwankongwe akatabhwa. Pabha a Nnungu bhashikunshemanga mmanganya ntamangananje kwa ulele. **16** Igala nkumumanya bhuli, mmwe mmandonya Mmakilishitu ibhaga shumwaatapule ambuje bhenu kwa punda kutama nabho? Eu mmwe mmashileu, nkumumanya bhuli, ibhaga shumwaatapule akongo bhenu kwa punda kutama nabho? **17** Ikabheje kila mundu atame malinga shapanjilwe na Bhakulungwa na shashemilwe na a Nnungu. Ngunalajila gegano ku makanisha gowe. **18** Ibhaga mundu ashemilwe ali ajalwishe, bhai, anaitembe kuti jwangajaluka, ibhaga ashemilwe jwangajaluka, bhai, anajalushe.

19 Pabha, kujaluka na gwangajaluka nngabha shindu, ikabhe shili sha mmbone kukunda amuli ya a Nnungu. **20** Bhai, kila mundu atame malinga shaaliji akanabhe shemwa na a Nnungu. **21** Bhuli, mmwe pumwashemilwe nni bhatumwa? Elo,

inampoteshe, ikabheje mpataga shikono sha pata ungwana, nnakane. **22** Pabha jwene ashemilwe na Bhakulungwa ali ntumwa, jwenejo anabha nngwana ku Bhakulungwa. Nneyo peyo ashemilwe ali nngwana, anabha ntumwa jwa a Kilishitu. **23** Mmowe nshiumwanga kwa bhei jikulungwa, kwa nneyo nnabhanganje bhatumwa bhaka mundu. **24** Ashaalongo ajangu, kila mundu atame na a Nnungu malinga shaaliji malanga gashemilwe. **25** Ga bhanabhakongwe bhangalombwanga, nangali amuli ja kopoka ku Bhakulungwa, ikabheje nne shinjoye miungu kwa nema ja kulupalikwa jibhambele Bhakulungwa. **26** Shingushibhona nne, kwa shilaje shitemi nnaino, mbaya mundu atame malinga shali. **27** Ibhaga nnobile, bhai, nnapinje lekana na akongo bhenu. Ibhaga mwangalomba, bhai, nnapinje lomba. **28** Ikabheje nnombaga nkatenda shambi, najwalakwe jwankongwe nneyo peyo, alombwaga akaatenda shambi. Bhalombene shibhapatanje shilaje pa shilambolyo pano, ikabheje nne pungupinga, mmanganyanji ganampatanje genego. **29** Bhakilishitu ajangunji, shingupinga bheleketa ni kuti, mobha galepeshe gashokope. Kwa nneyo, kutandubhila nnaino bhalombilenje bhala, bhanaibhushilanje ga ilombani yabhonji. **30** Bhaagutanga bhala, bhabhanganje mbuti bhakagutanga, na bhaangalalanga bhala, bhabhanganje mbuti bhakaangalalanga, na bhaumanga bhala, bhabhanganje mbuti bhangalinginji shindu, **31** na bhakwetenje indu ya tenda ya pashilambolyo bhala, bhabhanganje mbuti bhangalinginji sha tenda. Pabha shilambolyo shino, shinapita. **32** Pungupinga mmanganyanji nnakolanje lipamba. Mundu jwangalomba anakamula liengo lya Bhakulungwa, nkwaanonyeya Bhakulungwa. **33** Ikabheje alombile jula, anakamula liengo aliabhusila ya pa shilambolyo,

nkupinga abhanonyeye akagwe, **34** jwalakwe anaabhushila indu ibhili. Jwankongwe nshitenga eu mwali, anakamula indu ya Bhakulungwa nkupinga abhe jwa ukonjelo. Ikabheje alombilwe jula, anaabhushila ya pa shilambolyo nkupinga kwaanonyeya ambujegwe. **35** Ngunabheleketa gegano gampwaanje mmanganyanji, wala nngabha kung'ibhililanga. Pungupinga ntamangananje ukoto, nkwaakamulila maengo Bhakulungwa, kwa ntima gumo na ng'aniyo imo. **36** Ibhaga mundu jwa shileu abhonaga kuti akakuntendela ukoto muntemela mwine, na shilokoli shimpundaga, atende malinga shaapinga bhatolane, penepo akaatenda shambi. **37** Ikabheje jwanumye aengwaga muntima gwakwe nngalomba, na akombolaga kwiipililila ilokoli yakwe, bhai, akannombe mwalijo shammbonepe. **38** Kwa nneyo akunnomba mwalijo anatenda ukoto, na jwalakwe akana lomba anapunda tenda ukoto. **39** Jwankongwe alombilwe, ashitabhwa na shalia kwa mobha gowe ambujegwe bhali bhakoto. Ikabheje ambujegwe bhawaga, akatabhwa na shalia, apingaga kulombwa kabhili, alombwe naka jojowe jwakumpinga, ikabheje ibhe Shikilishitu. **40** Ikabheje pungubhona nne, mbaya atame malinga shaaliji. Genego malobhe gangu, na nne punguganishiya kuti, ngwete Mbumu jwa a Nnungu.

8 Kwa nneyo, ga yalya ishoshiywe mbepei ku yanamu, tumumanyi kuti uwe tubhowe tushikola lumanyio, ikabheje lumanyio lunatenda bhandu bhaipunanje, ikabhe kupingana kunakwaataganga bhandu ntima. **2** Aganishiya kuti anakushimanya shindu, kwa kweli akakushimanya shoshowe malinga shaapinjikwa kumanya. **3** Ikabheje mundu akwaapinga a Nnungu, a Nnungu bhammanyi jwene mundujo. **4** Kwa nneyo ga yalya ishoshiywe mbepei ku yanamu, tumumanyi kuti shanamu

nngabha a Nnungu bha kweli, ikabheje a Nnungu bha kweli ni bhamope. **5** Nkali monaga ipali ishemwa ashinnungu, pa shilambolyo eu kunnungu, na malinga shibhalinginji ashinnungu na bhakulungwanji bhabhagwinji, **6** ikabheje kwetu uwe, bhapali a Nnungu bhamope, Atati, bhapengenye indu yowe na kwa mashili ga bhenebho uwe tunalama. Tunakulupalila kuti bhapali Bhakulungwa bhamope a Yesu Kilishitu pitila bhenebho a nnungu gubhapengenye indu yowe, ni bhakutupa gumi. **7** Ikabheje nngabha kila mundu anakwimanya yenei. Pabha bhapalinji bhananji bhayobhelelenje yanamu, mpaka nnaino pubhalyanganga yene yalyayo pubhaganishiyanga kuti ishishoywa mbepei ku yanamu. Pabha bhangashimilikanga mmitima jabhonji, pubhakwibhonanga bhanalebhanga. **8** Ikabheje shalya shikakutubhika tome na a Nnungu. Tukalye shakwa shitutubhila, na tulyaga shakwa shitujenjeshewa. **9** Ikabheje mwiteiganje, aki jenunji jinaatendanje bhangashimilikanga nngulupai bhatendanje yambi. **10** Pabha, mundu akanabhe shimilika nngulupai, ammonaga mmwe nkewete lumanyio nnilya yene yalyayo nniekalu lya yanamu, bhuli, akatagwa ntima gwa lya indu ishoshiywe mbepei ku yanamu? **11** Kwa nneyo, nnongo nnjenu jwangashimilika nngulupajo jubhannng'wilile a Kilishitu, shaaobhe kwa ligongo lya lumanyio lwenu. **12** Mwaalebhelangaga ashaalongo ajenunji nikwaulayanga mmitima jabhonji, penepo nnakwaalebhelanga a Kilishitu. **13** Kwa nneyo, ibhaga shalya shinabha shiumilo sha kuntenda nnongo nnjangu atende shambi, bhai ngalya nnyama kabhili, nkupinga ngunannebhiye nnongo nnjangu. (aiōn g165)

9 Bhuli, nne nngabha nanngwana? Bhuli, nne nngabha ntume?
Bhuli, nne nangaabbona a Yesu Bhakulungwa bhetu? Bhuli,

mmanganya kulundana kwenunji na Bhakulungwa nngabha
kwa ligongo lya liengo lyangu? **2** Ibhaga nne nngabha ntume
kubhandunji bhana, ikabheje kwenu mmanganya nne ntume.
Mmanganya ni ukong'ondelo gwa utume gwangu nkulundana
kwenunji na a Kilishitu. **3** Kwa bhene bhannugulanga bhala
shingwiibheleketela ni nnei. **4** Bhuli, twangali aki ja pegwa
shalya na ya papila kwa liengo lyetu? **5** Bhuli, twangali aki ja
longana naka jwankongwe Nkilishitu, malinga shibhatendanga
mitume bhana, ashaalongo ajabhonji Bhakulungwa na nkali a
Kepa? **6** Eu bhuli, nne na a Bhanabha ni tupingwa kamula
liengo nkwiilosheya indu yetu? **7** Bhuli, linjola gani akwiilipila
nnyene nniengo lyakwe? Gani apanda mishabhibhu analye iepo
yakwe? Gani ashunga likundi anapapile mabhele ga likundi
lyakwe? **8** Bhuli, ngunabheleketa genega shigundupe? Bhuli,
najalakwe shalia jikalugula nneyo peyo? **9** Ishijandikwa nshalia
ja a Musha, "Nnantabhe kang'wa ng'ombe alikubhata yalya."
Bhuli, penepo a Nnunu gubhabheleketaga ga ng'ombe? **10**
Bhuli, a Nnunu bhakatuganishiyaga uwe pubhabhelekete
nneyo? Elo, genega gashinkujandikwa kwa ligongo lyetu, pabha
alima, na auna jula, bhowe bhakwetenje aki ja pata upambi
gwa mauno. **11** Monaga uwe tupandile mmbeju ja muntima
munkumbi gwenunji, bhuli, ikabha sha mmbone uwe tupataga
indu ya pashilambolyo kopoka kwenu mmanganyaji? **12**
Ibhaga ashimitume bhananji bhakwetenje aki ja jangutilwa na
mmanganyaji, bhuli, uwe twangali aki kupunda bhanganyabho?
Ikabheje uwe tushikujileka jene akijo, ikabhe twashinkwiipililila
nkupinga tunajibhishile shigwegwe shoshowe Ngani ja Mmbone
ja a Kilishitu. **13** Mmanganya mmumanyinji kuti, bhaakamulanga
liengo nniekalu bhanapatanga yalya nniekalu, na bhatendanga

liengo lya bhishila mbepei pa shitala, bhanapatanga lipungu lya mbepeyo. **14** Nneyo peyo Bhakulungwa bhashiamulisha kuti, bhaalunguyanga Ngani ja Mmbone bhapatanje ya lamila Nngani ja Mmbonemo. **15** Ikabheje, nne nangalonga yene akiyo wala jimo. Na wala ngajandika gegano nkupinga mbate yene akiyo, pabha kwangu nne, mbaya niiwile ikabheje nngabha mundu amone kuti ngunakwiiniya payoyo. **16** Ibhaga ngulunguya Ngani ja Mmbone, lyenelyo nngabha lya kwiipunila, pabha njipegwa amuli. Numbe ole gwangu, monaga ngalunguye Ngani ja Mmbone! **17** Ibhaga ngakamwile lyene liengoli kwa engwa kwangu, bhai ngalolele kulipwa, ikabheje ngaakamula kwa engwa kwangu, ikabhe ngunapinjikwa kukamula lyene liengoli. **18** Bhai nshaala gwangu nndi? Nshaala gwangu ni nema ja lunguya Ngani ja Mmbone, gwangali kulonga aki yangu ya nkulunguya. **19** Kwa nneyo, nkali nne nili nngabha nantumwa juka mundu jojowe, njikwiitenda nantumwa juka kila mundu, nkupinga naapatanje bhandu bhabhagwinji. **20** Ku Bhayaudi nashinkutama mbuti Nanyaudi, nkupinga naapatanje Bhayaudi. Nguti, ku bhandu bha shalia, nashinkwiitenda mbuti mundu jwa shalia, nkali nili nngabha mundu jwa shalia, nkupinga naapatanje bhandu bha shalia. **21** Kubhalinginji na shalia, nashinkutama mbuti nangali shalia, nkupinga naapatanje bhangalinginji na shalia. Nngabha kuti nangali shalia ja a Nnunu, ikabhe ngwete shalia ja a Kilishitu. **22** Ku bhangalinginji mashili nngulupai, nashinkwiitenda mbuti nangali mashili, nkupinga naapatanje bhangalinginji mashilibho. Nashinkwiitenda kila shindu kubhowe, nkupinga kila mushiibhele, naatapulanje bhananji, munkumbi gwabhonji. **23** Ngunatenda yowei ga ligongo lya Ngani ja Mmbone, nkupinga mbate mboka yakwe.

24 Bhuli, nkakumumanyanga kuti pa lubhanja lwa ing'ando, bhowe bhanab hutukanga lubhilo, ikabheje apata upo jumope? Mmutukanje nneyo nkupinga mpatanje upo. 25 Na kila abhutuka lubhilo, anakwiobhelesheya nileka yowe, bhanatendanga nneyo nkupinga bhapatanje shilemba shiangabhanika, ikabhe uwe tupate shilemba shangaangabhanika. 26 Nneyo peyo numbe nne ngunab hutuka lubhilo, nkupinga ngombole, ngunakoma ubha nngabha mbuti akoma ubha pangali shindu. 27 Ikabhe ngunakushiobhelesheya shiilu shangu ya ukomu, inabhe naalungushiyangaga bhananji, namwene nikanwa.

10 Bhakilishitu ajangunji, ngunapinga mmumanyanje kuti, ashaambuje bhashinkuunishilwanga na liunde, bhowe gubhajombokenje bhaali Janashe jila mwamujumu. 2 Bhowe gubhabhatishwenje bhabhanganje bha a Musha nniunde na mmashi mula 3 Bhowenji gubhalilenje shalya sha mmbumu, 4 nneyo peyo gubhang'welenje mashi gubhapegwilwenje na a Nnunu, kopoka nniganga likulu lyaakagwilenje lila, na lyene liganga likulu lila, ni a Kilishitu bhayene. 5 Nkali nneyo, bhabhagwinji bhangaanonyeyanga a Nnunu, nigubhawilenje nng'anga mula. 6 Bhai, gene gowego pugaliji mbuti shilanda kwetu uwe, nkutuleya tunalokolile ya nyata malinga shibhalokolilenje bhanganyabho. 7 Nnaitindibhalilanje yanamu malinga shibhatendilenje bhananji, malinga shigalugula Majandiko, "Bhandunji gubhatemingenenje nkulya na ng'wa, kungai gubhajimingenenje niina." 8 Wala tunalabhalabhe malinga shibhatendilenje bhananjibho, gubhawilenje lyubha limo bhandunji elupu ishilini na itatu. 9 Wala tunaalinje Kilishitu malinga shibhaalinjilenje bhananji, gubhabhulegwenje na majoka. 10 Wala nnainginikanje malinga shibhatendilenje

bhananji, gubhabhulegwenje naka malaika jwa shonanga! **11**

Bhai, gene gaakoposhelenje bhanganyabho ni shilanda ku bhananji, na yashinkujandikwa nkupinga kutuleya uwe tuli kumpelo gwa mobha. (aiōn g165) **12** Kwa nneyo, akwiiganishiya kuti ashijima ukoto, aiteije anagwe. **13** Yowe inkulingwanga ni ibhalingwangaga bhandu mobha gowe. A Nnungu ni bhaakulupalika, na bhalabho bhakannekanga nningwanje punda mashili genunji, ikabhe pamo na lingwako, shibhampanganje mashili ga kwipililila na nnango gwa koposhela. **14** Kwa nneyo, ashaalongo ajangunji, mwiepuyanje na kutindibhalila yanamu. **15** Ngunabheleketa na mmanganya, mmandunji nkietenje lunda, nnolanje mwaashayene ingubheleketa ino. **16** Bhuli, putukwaatendela eja a Nnungu ga shikombe sha mboka, tukalundanywa na minyai ja a Kilishitu? Na putugabhana nkate gula tukalundanywa na shiilu sha a Kilishitu? **17** Pabha nkatego ni gumo, nkali uwe tushulwisheyo ni shiilu shimo, pabha tubhowe tunagabhana nkate gumo. **18** Mwaaganishiyanje Ishilaeli bhaalyanganga pa shitala bhala, bhanalundana na a Nnungu kwa shitala shila. **19** Bhai, melekete nndi? Kuti shalya shishoshiwe mbepei ku yanamu, ni shammbone kupunda shalya shina? Na yanamuyo bhuli, ni shindu shammbone? **20** Ng'oo, ikabheje indu ibhashoyanga mbepei bhanakwishoyanga kwa maoka, nngabha kwa a Nnungu. Numbe nne ngapinga mmanganya nnkundikanywanje na mashetani. **21** Nkang'welanga shikombe sha Bhakulungwa na popo pepo ning'wela shikombe sha maoka, na nkalyanganga shalya sha Bhakulungwa popo pepo nilya shalya sha maoka. **22** Eu bhuli, tukakwaatenda Bhakulungwa bhabhe na lupimililo? Punkuganishiyanga tushikola mashili kwaapunda bhenebho? **23** Indu yowe alali, ikabheje

nngabha yowe ya mmbone. Indu yowe alali, ikabheje nngabha yowe ipwaa. **24** Mundu analoleye pwaida jakwe nnyene, ikabhe ja ashaajakwenji. **25** Nnianganje yowe iushwa kumbwani gwangali bhuya, kwa ligongo lya ng'aniyo, **26** pabha Majandiko gakuti, "Shilambolyo na yowe ipali, ni yabho a Nnungu." **27** Monaga anshemalangaga shalya mundu akaakulupalila na mmanganya nkundilenje kwenda, nnianganje indu yowe ishibhampanganje gwangali bhuya, kwa ligongo lya ng'aniyo. **28** Ikabheje mundu annugulilangaga, "Shene shalyashi shishishoywa mbepei ku yanamu," nnalyanganje, kwa ligongo lya bhene bhannugulilenje na kwa ligongo lya ng'aniyo. **29** Ngunabheleketa ga ng'aniyo ya muntima, nngabha yenunji, ikabhe kwa ligongo lya bhannugulilenje bhala. Kwa nndi ng'aniyo yangu ya muntima iukumulwe kwa ng'aniyo ya muntima ika mundu juna? **30** Ibhaga nne ngunalya shalyasho akuno nilikwaatendela eja a Nnungu, kwa nndi mundu ang'ambe kwa ligongo lya shalya shinaatendele eja a Nnungu? **31** Bhai, shoshowe shinkulyanganga, eu kung'wa, eu shoshowe shinkutendanga, ntendanje kwa ukonjelo gwa a Nnungu. **32** Nnaalebhyanje Bhayaudi eu Bhagiliki wala likanisha lya a Nnungu. **33** Malinga nne shinguti kwaanonyeyanga bhandu bhowe nng'indu yowe, gwangali loleya pwaida jangu namwene, ikabhe nkupinga bhananji bhatapulwanje.

11 Nngaguyanje, malinga shingwaakaguya nne a Kilishitu.
2 Ngunakunng'iniyanga pabha nnangumbushilanga nng'indu yowe, na nnakamulanga majiganyo gunimpelenje gala. **3** Ikabheje ngunapinga mmumanyanje kuti, a Kilishitu bhashikola mashili kwa kila jwannume, na jwannume ashikola mashili kuka jwankongwe, na a Nnungu bhashikola mashili kwa a Kilishitu **4** Bhai, kila jwannume pa juga Nnungu, eu pa lunguya ntenga gwa

a Nnungu, akuno aunishile ntwe gwakwe, anakwaanyegaya
a Kilishitu. **5** Ikabhe kila jwankongwe pa juga Nnungu eu pa
lunguya ntenga gwa a Nnungu gwangali unishila ntwe gwakwe,
anakwaanyegaya ambujegwe, anabha malinga jwankongwe
amojile umbo yakwe. **6** Jwankongwe akaunishile ntwe gwakwe,
mbaya amoje umbo yakwe. Ikabheje oni kuka jwankongwe
kumoga umbo yakwe, bhai, mbaya aunishile ntwe gwakwe. **7**
Ikapwaa jwannume kuunishila ntwe gwakwe pa juga Nnungu,
pabha jwannume ashibha shilangulo na ukonjelo gwa a Nnungu,
ikabheje jwankongwe ashibha shilangulo sha ukonjelo guka
mmbujegwe. **8** Pabha jwannume jwangapanganywa kopoka
kuka jwankongwe, ikabhe jwankongwe apengenywe, kopoka
kuka jwannume. **9** Jwannume jwangapanganywa kwa ligongo
lika jwankongwe, ikabhe jwankongwe ashipanganywa kwa
ligongo lika jwannume. **10** Kwa lyene ligongolyo jwankongwe
anapinjikwa aunishile ntwe gwakwe, ibhe shilangulo sha
mashili ga ambujegwe na ashimalaika. **11** Nkali nneyo, kwa
a Nnungu jwankongwe gwangali jwa shileu nngabha shindu,
nneyo peyo jwannume gwangali jwankongwe nngabha shindu.
12 Pabha malinga jwankongwe shapengenywe kopoka kuka
jwannume shila, nneyo peyo jwannume anabhelekwa naka
jwankongwe, ikabheje indu yowe kuikopoka kwa a Nnungu. **13**
Nng'ukumulanje mwaashayenenji. Bhuli, ilikonja jwankongwe
kwaajuga a Nnungu gwangali unishila ntwe gwakwe? **14**
Bhuli shashite bhelekwa jwannume, ikalanguya kuti jwannume
alangaga umbo anakwiitokomaya? **15** Ikabheje jwankongwe
akolaga umbo yaigwinji inakumpa uknjelo. Pabha ashipegwa
umbo yaigwinji inng'unishile. **16** Ikabheje monaga apali mundu
apinga kola mitau ga lyeneli, bhai amumanye kuti uwe twangali

nkubho guna, wala makanisha ga a Nnungu gangali nkubho guna.

17 Pungunnajilanga gene malajilo gano, ngakunnumbililanga wala kashoko, pabha maimano genunji gangali pwaida. **18** Pabha ngunapilikana kuti punkuimananga nnikanisha ganapagwa malekano, numbe nne genego pungubhona pana ni ga kweli, **19** pabha inapinjikwa gapagwe malekano munkumbi gwenunji, nkupinga bhamanyikanje bhalinginji bha a Nnungu. **20** Kweli nnaimananga, ikabheje nngabha kwa ligongo lya shalya sha Bhakulungwa! **21** Pabha punkulyanganga kila mundu anapinga alongolele kulya shalya shakwe, kwa nneyo juna ali na shibhanga, juna akolelwe. **22** Bhuli, mwangalinginji nyumba yenunji ya lila na ng'wela? Eu nnakulinyegayanga likanisha lya a Nnungu na kwaatokomayanga bhangalinginji na shindubho? Ninnugulilanje nndi? Ninnumbililanje? Ng'oo! Ngannumbililanga kwa genego. **23** Pabha nne nashinkuposhela kopoka ku Bhakulungwa malajilo gunammalanjilenje kuti, shilo shibhatendebhwishwe bhakulungwa a Yeshu, bhashinkutola nkate, **24** bhakatendeje eja kwa a Nnungu gubhagabhile, nigubhashite, "Sheshino shiilu shangu shishoywa kwa ligongo lyenunji ntendanje nnei nkungumbushila nne." **25** Nneyo peyo bhakalyeje gubhatolile shikombe gubhashite, "Shene shikombe shino ni malagano ga ambi na a Nnungu gakong'ondelwa kwa minyai jangu, ntendanje nnei kila pushimpapilanje, nkungumbushila nne."

26 Pabha kila punkulyanganga gwene nkate guno, na ng'wa shene shikombe shino, nnalunguyanga kuwa kwa Bhakulungwa mpaka pushibhaishe. **27** Kwa nneyo kila alya shalya eu papila shikombe sha Bhakulungwa mwiikaapinjikwa nikwaatokomaya, shaalebhe kwa ligongo lya shiilu na minyai ja Bhakulungwa. **28** Ikabheje kila mundu atandubhe kwiibhuya nnyene, kungai

alyeje nkate na apapile shikombesho. **29** Pabha, alya na papila gwangali kugamanya malombolelo ga shiilu sha Bhakulungwa, anakwiukumula nnyene kwa lya na papila. **30** Kwa lyene ligongolyo, bhabhagwinji munkumbi gwenunji bhakaang'andanga, na bhalwelenji, na bhana bhawilenje. **31** Monaga tukaiganishiye twaashayene, tukanaukumulwe. **32** Ikabhe putuukumulwa na Bhakulungwa, tunajiganywa kwiitimalika, nkupinga tunaukumulwe mboteko pamo na bhandu bha pa shilambolyo. **33** Kwa nneyo, ashaalongo ajangu, punkuimananga nkupinga kulya shalya sha Bhakulungwa, nnindananje. **34** Mundu akolaga shibhanga alye kunngwakwe, kuimana kwenunji kunaukumulwe. Gana galepeshego, shinyie kummalanjilanga pushing'ishe.

12 Ashaalongo ajangu, ga kalama kopoka kuka Mbamu jwa Ukonjelo, ngunapinga mmumanyanje ukoto. **2** Mmumanyinji kuti, nkanabhe tapulwanga mwashinkpuganywanga, nikwiikaguya yanamu ikabheleketa. **3** Bhai ngunakummalanjilanga kuti, mundu jojowe alongoywa naka Mbamu jwa Ukonjelo akakombola bheleketa, "A Yeshu bhashilosha," nkali bheleketa "A Yeshu ni Bhakulungwa," ikabhe kwa Mmbumu jwa Ukonjelo. **4** Bhai ishipagwa kalama ya namuna yaigwinji, ikabheje ashoya ni Mbamu jumope jula. **5** Na kabhili gapali maengo gamagwinji ga tenda, ikabheje Bhakulungwa bhamope bhala. **6** Numbe ishipagwa namuna yaigwinji ya kamula maengo, ikabheje a Nnungu ni bhamope, bhaatenda maengo gowe ku bhandu bhowe. **7** Ikabheje kila mundu anapegwa nng'ibhulo naka Mbamu kwa pwaida ja bhowe. **8** Pabha mundu jumo anapegwa lilobhe lya lunda, na junu lumanyio, malinga shaapinga Mbamujo. **9** Mbamu jojo anakumpa junu ngulupai, na junu kalama ya lamya. **10** Junu anapegwa mashili ga itendi ya ilapo, na junu kalama ja

londola, na junu anakombola kuapulanya kalama ika Mbamu na ili nngabha ika Mbamu, na junu bheleketa ibheleketo ya ambi, na junu kulombola ibheleketo ya ambiyo. **11** Gowego maengo gaka Mbamu jumo pejo, akumpa kila mundu kalama ilekanila malinga shaapinga nnyene. **12** Malinga pushili shiilu shimo shishikola ibhalo yaigwinji, nkali ibhalo ishulwishey shiilu ni shimo, nneyo peyo shibhali a Kilishitu. **13** Pabha uwe tubhaga Bhayaudi eu Bhagiliki eu bhatumwa eu bhangwana, tubhowe tushibhatishwa naka Mbamu jumo pejo, nkupinga tubhe shiilu shimo, na tubhowe tushipegwa Mbamu jumo pejo. **14** Bhai, shiilu shangali shibhalo shimo, ikabhe ibhalo yaigwinji. **15** Monaga lukongono lubheleketaga, "Pabha nne nngabha nkono, bhai nne nngabha jwa shiilu," Bhuli! Kwa lyene ligongolyo ngulukanabhe lwa shiilu? Ng'oo! **16** Monaga likutu likabhelekete, "Pabha nne nngabha liyo, nne nngabha jwa shiilu," bhuli, kwa bheleketa nneyo, ngulikanabhe lya shiilu? Ng'oo! **17** Monaga shiilu showe shikaliji liyo, kukapali kupilikana? Monaga shiilu showe shikaliji likutu, tukanushiye shanabhuli? **18** Ikabheje, a Nnungu bhashikwiibhi ka nshiilu ibhalo ya lekanila malinga shibhapinjile. **19** Monaga yowe ikaliji shibhalo shimo, shiilu shikapali kwai? **20** Bhai nnaino shiilu ni shimo, ikabheje ibhalo yaigwinji. **21** Bhai, liyo likaulugulila nkono "Ngakuupinga ugwe," wala ntwe ukakugalugulila makongono "Ngakumpinganga mmanganya." **22** Nkali nneyo, inabhoneka kuti, ibhalo ya shiilu iganishiywa yangali ya mmbone, mbena ni ya mmbone kaje. **23** Na ibhalo ya shiilu ituganishiya yangali ishima ila, ni itukwigoya kwa kaje, ibhalo ya shiilu ikabhonekana kuti ya mmbone, inagoywa kwa kaje, **24** pabha ibhalo yetu ina ili ya mmbone ikagoywa kwa kaje. A Nnungu bhayene, bhashikushilundanya shiilu ukoto na

kushikuya shibhalo shangali sha mmbone shila, **25** nkupinga ganapagwe malekano nshiilu, ikabhe ibhalo yowe ikulupalilane. **26** Monaga shibhalo shimo shiulalaga, ibhalo yowe shiipotekwe. Shibhalo shimo shikuywaga ibhalo yowe shiangalale. **27** Bhai, mmanganya mmowe shiilu shimo sha a Kilishitu, kila jumo jwenunji ni shibhalo sha shiilusho. **28** A Nnungu bhashibhika nnikanisha, bhantai mitume, bhabhili, ashinkulondola bha a Nnungu, bhatatu, bhaajiganya na bhananji, bha tenda ilapo na bha bhalamyanga bhalwelenji na bhana bhajangutilanga, na bhana ashikalongolele na bhana bha bheleketanga shibheleketo shijeni. **29** Bhuli bhowe ashimitume? Bhowe ashinkulondola bha a Nnungu? Bhowe bhaajiganya? Bhowe bhaatendanga ilapo? **30** Bhuli bhowe bhaalamyanga? Bhuli, bhowe bhabheleketanga shibheleketo shijeni? Bhuli, bhowe bhalombolanga shibheleketo shijeni? **31** Bhai nkolanje shilokoli sha kola kalama ya punda. Numbe nne shininnanguyanje mpanda gwa mmbone, kupunda jowe.

13 Nkali meleketaga ibheleketo yowe ya bhandunji na ya ashimalaika, monaga nepelaga kupingana na bhandu, nne njibha mbuti lidebhe lyangali shindu eu kengele. **2** Kabhili, ngolaga kalama ja londola na lunguya ntenga gwa a Nnungu, na kwiiimanya indu ya nng'yo na ya lunda na kola ngulupai ja malila, nkali kombola kuamiya itumbi, ikabheje nepelaga pingana na bhandunji, nne nngabha shindu. **3** Ndolaga indu yangu yowe nikwaapanganga bhaalaga, nkali niishoyaga shiilu shangu shijokwe moto, nepelaga pingana na bhandu, shakwa sha mbwaila. **4** Apingana na bhandu, anakwiipililila, na anakola uguja, na jwangali lupimililo, na akakwiipuna na wala jwangali miinjili. **5** Apingana na bhandu, anakwiitimalika na akaloleya pwaida jakwe

nnyene, wala akatumbala na akakwiibhika muntima yangali ya mmbone, **6** akaangalila yangali ya mmbone, ikabhe anaangalila ili ya kweli. **7** Apingana na bhandu akaatotoshela, akaaleka kulupalila na anakwiipililila yowe. **8** Kupingana na bhandu, kwangali mpelo. Monaga kupagwaga kulunguya ntenga gwa a Nnnugu, shikupele, kupagwaga kubheleketa shibheleketo sha ambi, shikupele, nkali lupagwaga lumanyio, shikupite. **9** Pabha indu itukwiimanya na londola ishokope. **10** Ikabheje malanga gushigaishe gatimilile gala, gowe gangatimilila shigapele. **11** Punaliji mwana jwanshoko nashinkubheleketa malinga mwana, nashinkumanya malinga mwana, natendaga ganishiya malinga mwana. Ikabheje ngakuleje, indu yowe ya shigwana njileka. **12** Pabha itukwiibhona nnaino, ni mbuti shiwili nshioo tukawiibhona ukoto, ikabheje gene malangago shitwiibhone ukoto. Nnaino ingwiimanya ishokope, ikabheje kungai shiniimanye yowe ukoto, malinga a Nnungu shibhaamanya nne. **13** Bhai nnaino ilonjeya itatu, ngulupai na kukulupalila na pingana, ikabheje shikulungwa kaje ni kupingana.

14 Ntumbililanje kwiipata iloi ya pingana, na nnokolilanje kwiipata iloi ika Mbamu, ikabheje shipundile, shilo sha ukulondola gwa a Nnungu. **2** Pabha mundu abheleketa shibheleketo shijeni, akabheleketa na bhandu, ikabhe anabheleketa na a Nnungu. Pabha anabheleketa indu ya nng'yo, kwa mashili gaka Mbamu. **3** Ikabheje akwete shilo sha ukulondola gwa a Nnungu, anabheleketa na bhandu nkwaashimilikanga na nkwaataganga ntima na kwaatondobhyanga. **4** Abheleketa shibheleketo shijeni, anakwiishimilikha nnyene. Ikabheje alondola anashimilika likanisha. **5** Bhai, ngunapinga mmanganya mmowe mmeleketanje shibheleketo shijeni, ikabheje shipundile kaje

mmanganje ashinkulondola bha a Nnungu, pabha mundu alondola, anakumpunda abheleketa shibheleketo shijeni jula, ikabhe ataye malombolelo gakwe nkupinga alishimilishe likanisha.

6 Ashaapwanga ng'ikaga kunngwenunji nibheleketa shibheleketo shijeni, shiimpwailanje indi? Gwangali kuntashiyanga nng'ibhulo gubhambele a Nnungu eu lumanyio, eu ntenga gwa a Nnungu, eu majiganyo? **7** Nkali indu yangali gumi iona, malinga lipenga eu shingwaya, bhuli, mundu shaamumanye bhuli, shigombwa monaga ikaone kwa tindana? **8** Pabha, lipenga ligombwaga gwangali manyika ukoto, gani shaajende kungondo?

9 Na nneyo peyo na mmanganya, monaga mmeleketangaga malobhe gangamanyika, gani shagamanye gunkubheleketanga? Malobhe genunji shigaobhe payoyo. **10** Ipali ibheleketi yaigwinji pashilambolyo, na shakwa shibheleketi shangali malombolelo.

11 Ikabheje nne, ngagamanye malombolelo ga bheleketa mundu jwa shibheleketi shijeni, nne shimme nannjeni kuka jwenejo, na jwalakwe shaabhe nnjeni kwangu nne. **12** Na mmanganya nneyo peyo, pabha nshikolanga lilaka lya kola iloi ika Mbamu, ntumbililanje kwiipata nkupinga nnishimilikanje likanisha. **13** Kwa nneyo, jojowe akombola bheleketa shibheleketi shijeni, ajuje kukombola kugamanya malombolelo gakwe. **14** Pabha nyugaga kwa shibheleketi shijeni, kujuga kwangu kunabha kwa mmunda, ikabheje lunda lwangu lukaaposhela shindu.

15 Bhai, ndende bhuli? Shinyuje mmbumu na kwa lunda lwangu, kabhili shinyimbe kwa mmbumu na kwa lunda. **16** Mwainiyaga a Nnungu sha mmbumupe, mundu ali munkumbi gwenu shajitishiye bhuli "Amina", kwaatenda kwenu ej, monaga akashimanye shinkubheleketa? **17** Pabha kutenda kwenu ej, kweli shikubhe kwa mmbone, ikabheje junajo ikampwaa. **18**

Nne ngunaatenda eja kwa a Nnungu pabha ngunakombola bheleketa shibheleketo shijeni, kupunda mmanganya mmowe.

19 Ikabheje nnikanisha ngunapinga bheleketa malobhe nng'ano ga manyika, nkupinga naajiganyanje bhananji, kupunda malobhe elupu ga shibheleketo shijeni. **20** Ashaapwanga nnakolanje na ng'aniyo ya shigwana, ikabheje kwa yangali ya mmbone mmanganje mbuti bhana, ikabhe nkuganishiya kwenunji nkulanje.

21 Ishijandikwa nshalia ja a Musha, "Bhakulungwa bhakuti. 'Shimelekete na bhene bhandunjibha, kupitila bhaabheleketa tanga shibheleketo shijeni, na kwa kang'wa ya bhajeninji'" nkali nneyo bhakambilikananga. **22** Bhai kwa nneyo, kalama ja bheleketa shibheleketo shijeni ni shilangulo, nngabha kwa bhandu bhakwetenje ngulupai, ikabhe kwa bhangakulupalilanga bhala, ikabheje shiloj shja ukulondola gwa a Nnungu, ni kwa ligongo lya bhandu bhakulupaliljenje, na nngabha kwa bhangakulupalilanga.

23 Bhai, ibhaga likanisha lyowe bhaimanangaga pamo, na bhowe bhabheleketanje kwa shibheleketo shijeni, monaga bhaikanganaga bhandu bhakaelewanga eu bhakanabhe kulupalilanga, bhuli, bhakabhelekatanga cuti nshikolanga shalubha? **24** Ikabheje, bhowe bhalondolangaga, na aikaga mundu akaelewa eu jwangakulupalila, yowe yashaipilikane shiinkong'ondele gwangali gwa mmbone gwakwe na shiinng'ukumule. **25** Injubhi ya muntima gwakwe shiimanyishe, na jwalakwe shaabhatindibhalile a Nnungu alinkuti, "Kweli a Nnungu bhalu na mmanganya." **26** Bhai, ashaalongo ajangu, tubhelekete ndi? Bhai punkuimananga pamo, jumo ajimbe lwimbo, na junu ajiganye, na junu akole nng'ibhulo, na junu akwete kalama ja bheleketa shibheleketo shijeni, abhelekete, na junu atalashiye malombolelo gakwe. Nkupinga yowe itendeshe

kwa ligongo lya kulishimilika likanisha. **27** Bhapagwangaga bhandu bhakombolanga bheleketa kwa shibheleketo shijeni, bhabheleketanje bhandu bhabhili eu bhatatu, numbe jumojumo, na apagwe mundu shatalashiye malombolelo gakwe. **28** Ikabheje akapagwe nkutalashiya malombolelo gakwe, bhai, abheleketa kwa shibheleketo shijenijo apumule nkanishamo, abhelekete sha muntima na a Nnungu bhakwe. **29** Ga bhakwetenje kalama ja londola, bhabheleketanje bhabhili eu bhatatu, bhana bhalashiyanje gabhelekewego. **30** Ibhaga mundu munkumbi gwa bhatemingene bhala, apataga nng'ibhulo na a Nnungu, bhai abheleketaga jula apumule. **31** Pabha mmowe nnakombolanga kulunguya nntenga gwa a Nnungu jumo jumo, nkupinga mwijiganyanje na tagwa ntima. **32** Kalama ja londola, jjimililwe naka nkulondola. **33** Pabha a Nnungu nngabha a Nnungu bha mpwai, ikabhe bha ulele malinga shiili kubhandunji bha ukonjelo. **34** Malinga shiili nkubho, mmakanisha gowe ga bhandu bha a Nnungu, bhanabhakongwe bhanabheleketanje, ikabhe bhakundanje, malinga shijilugula Shalia ja a Musha. **35** Ibhaga bhapingangaga kubhuya, bhakaabhuyanje ashaambuje bhabhonji kumui. Pabha anatokomala jwankongwe abheleketa nnikanisha. **36** Bhuli, punkuganishiyanga lilobhe lya a Nnungu kulikopweshe kunngwenunji? Eu kuti linng'ishilenje mmanganyanje? **37** Mundu aibhonaga kuti nkulondola jwa a Nnungu, eu ashikola shilo shika Mbamu, bhai amumanye kuti gene gungunnjandishilanga gano ni amuli ja Bhakulungwa. **38** Ikabheje apagwaga mundu akaapinga pilikana, bhai, jwenejo nnampilikanilane. **39** Bhai, ashaalongo ajangu, nkolanje lilaka lya londola, ikabhe nnaibhililanje mundu kubheleketa shibheleketo shijeni. **40** Ikabheje indu yowe itendeshe ukoto na kupanjilila.

15 Ashaalongo ajangunji, nnaino ngunapinga ninkumbushiyanje ga Ngani ja Mmbone jinannungushiyenje jila, na mmanganya gunnjiposhelenje nikwiishimilika najo. **2** Kwa pitila jenejo nnatapulwanga, ibhaga nngabhidhikangaga mmitima guninnungushiyenje, na ibhaga kulupalila kwenunji kukabhe kwayoyo. **3** Nne nashinkumpanganga ntenga gwa mana gunaposhele gula, kuti a Kilishitu bhashinkuwa kwa ligongo lya yambi yetu, malinga shigalugula Majandiko ga Ukonjelo. **4** Na kabhili bhashinkushikwa, na lyubha lya tatu gubhayushiywe, malinga Majandiko ga Ukonjelo shigalugula. **5** Na kabhili nammalanjilenje kuti, gubhaakoposhele a Kepa, na kungai likumi limo na bhabhili bhala. **6** Gakapiteje genego gubhaakoposhelenje bhandu mmia nng'ano gwanakamo, mpaka pungujandika pano bhananji bhabhakotonji, ikabheje bhananji bhawilenje. **7** Kungai gubhaakoposhele a Yakobho na ashimitume bhowe. **8** Bhakaakoposhelanjeje bhowe, gubhangoposhele na nne, naliji malinga mwana abhelekwe mobha gakanabhe malila. **9** Pabha nne najwakumpelo munkumbi gwa ashimitume, na wala ngapinjikwa kushemwa ntume, pabha nashinkulishima likanisha lya a Nnunu. **10** Ikabheje kwa nema ja a Nnunu, njibha ntume malinga shini shino, nema jabho kwangu nne jangabha jayoyo. Nne njitenda liengo kupunda bhowe, nngabha nne, ikabhe nema ja a Nnunu jitenda liengo na nne. **11** Ikabheje nkali nneyo, ibhe bhanganyabho, eu nne, jejino ni ngani jitulunguya na ni jinkukulupalilanga. **12** Pabha, nnaino inalunguywa kuti a Kilishitu bhashiyuka bhakaweje, ashaajenunji bhana bhaakombolanga bhuli kubheleketa kuti bhawilenje bhakayukanga? **13** Bhai, monaga bhawilenje bhakayukanga, nabhalabho a Kilishitu bhangayuka, **14**

na monaga a Kilishitu bhangayuka, bhai kulunguya kwetu
kwayoyo na ngulupai jenunji jayoyo. **15** Punda gowego, uwe
tunabhoneka tubhakong'ondela bha unami kwa a Nnungu, pabha
tushikong'ondela kuti, a Nnungu bhashinkwaayuya a Kilishitu,
ibhaga kweli bhawilenje bhakayukanga, bhai bhangaayuya. **16**
Pabha ibhaga kweli bhawilenje bhakayukanga, bhai nabhalabho
a Kilishitu bhangayuka. **17** Monaga a Kilishitu bhangayuka, bhai
ngulupai jenunji jayoyo, launo nninginji na yambi yenunji. **18**
Punda genego bhowe bhawilenje bhalibhalundenenje na a
Kilishitu, bhaobhilenje. **19** Ibhaga twaakulupalile a Kilishitu kwa
jene ndamo jinope, bhai uwe tubhandu bha bhonelwashiya,
kupunda bhandu bhowe pa shilambolyo. **20** Ikabheje ni kweli
kuti, a Kilishitu bhayushile bhakaweje, ni bha ntai kuyuka kwa
bhawilenje. **21** Pabha, malinga shiwo shishiika pashilambolyo
kupitila mundu, nneyo peyo na ga yuka bhawilenje, gashiika
kupitila mundu juna. **22** Malinga bhandu shibhawanganga
nilundana na a Adamu, nneyo peyo bhowe shibhayuywanje
nilundana na a Kilishitu. **23** Ikabheje kila mundu shaayuywe
namuna jakwe, bha ntai kuyuywa ni a Kilishitu, nikwiya bhowe
bhalinginji bha a Kilishitu, mobha gushibhaaishe. **24** Penepo
shiguishe mpelo, a Kilishitu pushibhaakamuye Atati a Nnungu
upalume gwabho, bhapeyaga kila upalume na ukulungwa na
kila mashili. **25** Pabha a Kilishitu bhanapinjikwa bhatagwale,
mpaka a Nnungu pushibhaabhiikanje ashaamagongo ajabho
pa makongono gabho. **26** Mmagongo nnjabho shaapeywe
kumpelo, shaabhe shiwo. **27** Pabha Majandiko ganalugula,
“A Nnungu bhashikwiibhika indu yowe pamakongono gabho.”
Ikabheje Majandiko pugaalugula kuti, “Indu yowe shibhailibhatile
nkwiitagwala,” penepo a Nnungu bhakwa muindumo, pabha

bhenebho ni bhakwiibhika indu yowe pai jabho a Kilishitu. **28**
Ikabheje indu yowe ibhikwaga pai ja ukulungwa gwa a Kilishitu,
penepo Mwana nnyene shaabhikwe pai ja ukulungwa gwa a
Nnungu, nkupinga a Nnungu bhatagwale indu yowe. **29** Bhai,
ibhaga kuyuka kwakwa, bhuli, bhandunji bhaabhatishwanga
kwa ligongo lya bhawilenje bhala, shibhatendanje nndi? Ibhaga
bhawilenje bhakayukanga, kwa nndi kubhatishwa kwa ligongo
lya bhawilenje? **30** Uwe kwa nndi tunakwiibhika mwaajogoya
mobha gowe? **31** Ashaalongo ajangu, nne mobhaga nguti,
ngunakwiibhika nshiwo! Shingwiipunila kwenu mmanganyanji,
ni lundana kwenunji na a Kilishitu Yeshu Bhakulungwa bhetu,
inandenda nunguye gegano. **32** Ibhaga tumbilila kwangu kukaliji
kwa shigundupe, bhai, kukomana kwangu na makoko ga
munng'itu, yani bhandunji bha ku Epesho bhala, kumbwaile
nndi? Monaga bhawilenje bhakayukanga, bhai, "Tulye na papila,
pabha malabhi shituwe." **33** Nnatembwanje, mikungulu jangali ja
mmbone jinakumpuganya mundu. **34** Nkolanje lunda kabhili
malinga shinkupinjkwanga, nnatendanje yambi. Pabha bhananji
bhakakwaamanyanga a Nnungu ukoto. Ngunabheleketa gegano,
nkolanje oni! **35** Ikabheje mundu shaabhuye, "Bhaayukanga bhuli
bhawilenje? Shihayukanje na shiilu shashi?" **36** Mmwe libhelu!
Shinkupanda shikamela shikatandubhe kuwa. **37** Inkupanda
mmbeju, pana mmbeju ja mpunga, eu jina na nngabha litepo
lyowe. **38** A Nnungu bhanakuipa litepo, malinga shibhaapinga
bhayene, kila mmbeju na litepo lyakwe. **39** Iilu ikalingana.
Bhandunji bhashikolanga iilu yabhonji, na bhannyama yabhonji,
na ijuni nneyo peyo iilu yabhonji, na yamaki nneyo peyo.
40 Ipali iilu ya kunnungu, na iilu ya pa shilambolyo, kukonja
kwa iilu ya kunnungu ni kuna, na kukonja kwa iilu ya pa

shilambolyo kuna. **41** Kupali kukonja kwa lyubha, na kukonja kwa mwei, na kukonja kwa ndondwa, nkali ndondwa inalekanila kwa konja. **42** Nneyo peyo, pushiibhe ga yuka bhawilenje, malinga mmbeju, shiilu shinashikwa pai niangabhanika, ikabheje shinayuywa nibha shiilu sha ngaangabhanika. **43** Shiilu sha gundu pushishikwa shinanyegala, pushiyuywa shili na ukonjelo, na pushishikwa shangali mashili, ikabheje pushiyuywa shili na mashili. **44** Pushishikwa ni shiilu sha shibhelekwe, ikabheje pushiyuywa ni shiilu sha mbumu. Shipali shiilu sha shibhelekwe, na nneila peila shipali shiilu sha mbumu. **45** Pabha Majandiko ganataya, "Mundu jwa ntai a Adamu, apengenyewe ni pegwa gumi", ikabheje Adamu jwa kumpelo, ni Mbamu akwaapanganga bhandu gumi. **46** Ikabheje shilongolela nngabha shiilu sha Mbamu, ikabhe shiilu sha shibhelekwe, kungai nikwiya shiilu sha mbumu shila. **47** Adamu jwa ntai papengenyewe kwa lilongo, paaliji jwa pa litaka, Adamu jwa bhili kwakopweshe kunnungu. **48** Bhandunji bha pa shilambolyo, bhanalandana na mundu apengenyewe na lilongo jula, na bhalinginji bha kunnungu bhala, bhanalandana na akopweshe kunnungu jula. **49** Malinga shitulendene naka jwene apengenyewe na lilongo jula, nneyo peyo shitulandane naka jwene akopweshe kunnungu jula. **50** Bhai, ashaalongo ajangunji, nne nguti nnei, iilu yetu ipengenyewe kwa nnyama na minyai ikaulishi Upalume gwa a Nnungu, wala shiangabhanika, shikalishi shangaangabhanika. **51** Mpilikananje, ngunakummalanjilanga shinjubhi, nngabha kuti tubhowe tupingawa, ikabhe tubhowe shitutindiganywe, **52** shangupe, malanga ga mmbila ja kumpelo, mbuti kukapila kwa meyo. Pabha mbalapala shijione, bhawilenje shibhayukanje na bhanaangabhanyikanje kabhili, na uwe shitutindiganywe. **53**

Pabha inapinjikwa kila shiangabhanyika shinaangabhanyishe, yani shiilu shawa, shinawe. **54** Bhai, shiilu sha angabhanyika shino shibhaga sha ngaangabhanyika, yani shiilu shawa shila, shibhaga nngabha shawa, penepo shigatimilile Majandiko ga Ukonjelo ga kuti, "Shiwo shilepele na shipeshiywe." **55** "Shiwo, mashili gako gali kwei?" "Kupoteka kwako kuli kwei?" (**Hadēs g86**) **56** Shiwo shinakola mashili ga bhulaga, kwa ligongo lya yambi, na yambi inakola mashili kwa ligongo lya Shalia ja a Musha. **57** Ikabheje tunatenda eja kwa a Nnungu bhakututenda tukombole, kupitila ku Bhakulungwa bhetu a Yeshu Kilishitu. **58** Bhai, ashaalongo ajangunji nkupingwanga, nnjimangananje nninginji mwiishimilikenje ukoto. Mpundanje kamula liengo lya Bhakulungwa, nnikumumanyanga kuti, liengo lyenunji ku Bhakulungwa nngabha lya yoyo.

16 Nnaino, ga mishango ku bhandunji bha ukonjelo bha ku Yelushalemu, ntendanje malinga shinajiye ku makanisha ga Shilambo sha ku Galatia. **2** Lyubha lya Jumapili kila mundu munkumbi gwenunji, agoye mmbiya malinga shapatile, nkupinga pushing'ishep nnaishumbuyanje kushoya mishango kabhili. **3** Mobha gushing'ishe kungwenunji, shinaatumanje bhushimwaagulanje munkumbi gwenunji bhala, bhapelekanje bhaluwa na mishango jenunji ku Yelushalemu. **4** Ipingwaga na nne nyende, bhai shinyende na bhanganyabho. **5** Shing'ishe kungwenunji mbitilaga ku Shalambo sha Makedonia, pabha mbinga pitila kweneko. **6** Pana shindame kunngwenunji kashoko, eu shindame na mmanganya mobha gowe ga shipwepwe, nkupinga nnyangutilanje mmwanja gwangu kokowe kushinyende. **7** Ngapinga pita kungwenunji shangu, nipelenganya na mwanja. Pabha ngunaganishiya kulonjeya na mmanganya,

Bhakulungwa bhapingaga. **8** Ikabheje shindame ku Epesho mpaka lyubha lya shikukuu ja Pentekoshite. **9** Pabha njipata lilanga lya kamula liengo lyangu, ikabhe bhandaukanga ni bhabhagwinji. **10** Ibhaga a Timoteo shibhaishe kunngwenunji, mwaaposhelanje ukoto, bhanakole lipamba mobha gushibhatame kungwenunji, pabha bhanaatenda liengo lya Bhakulungwa malinga nne. **11** Kwa nneyo mundu jojowe anaanyegaye, ikabhe mwaajangutilanje bhajende mwanja gwabho kwa ulele, nkupinga bhakabhuje, pabha nne na Bhakilishitu ajangunji tunakwaalinda. **12** Ga a Apolo apwetu, njikwaashondelesheya kaje, bhaisque kungwenunji na ashaapwetu, ikabheje bhakaapinga kuika nnaino, ikabhe shibhaishe pushibhapate malangapo. **13** Nnaiibhukanje, nnjimangananje mwishimilikenje nngulupai na nkolanje makangala na mashili. **14** Kila shindu shinkutendanga ntendanje kwa pingana. **15** Ashaalongo ajangunji, mwaamanyinji ashaalongo ajabho a Shitepana kuti, bhanganyabho ni bhantai poshela ngulupai ja Shikilishitu ku Akaya, na bhashinkuengwanga kwaakamulilanga liengo bhandunji bha ukonjelo. Ngunakunshondeleyanya ashaalongo ajangu, **16** mwaakundanje na nkaguyanje ukulongoya gwa bhandunji malinga bhanganyabho, na kila akamula liengo na bhanganyabho. **17** Numbe nne ngunaangalala ga ika kwabhonji a Shitepana na a Potonatushi na a Kaiko, pabha bhashimbanganga indu yatubhile kopoka kunngwenunji ila. **18** Pabha bhashinkuangalayanga ntima gwangu na mitima jenunji. Kwa nneyo inapwaa kwaakumbushilanga bhandunji malinga bhanganyabha. **19** Makanisha gowe ga ku Ashia ganakunnamushilanga. A Akula na a Pilishika pamo na bhandu bhowe bha a Nnungu bhalinginji nnyumba jabhonji,

bhanakunnamushilanga nkulundana kwenunji na Bhakulungwa.

20 Bhakilishitu ajetunji bhowe bhanakunnamushilanga. Na mmowe nnamushilanjanje nkupingana kwa ukonjelo. **21** Nne a Pauli ngunakunnamushilanga, nilijandika kwa nkono gwangu namwene. **22** Jojowe akakwaapinga Bhakulungwa aloshwe, Nnjiye Mmakulungwa! **23** Nema ja Bhakulungwa a Yesu jibhe na mmanganya. **24** Kupinga kwangu nne kubhe na mmnganya nkulundana na a Kilishitu Yesu.

2 Bhakolinto

1 Ajino bhaluwa jino kujikopoka kwangu nne, a Pauli ntume jwa a Yesu a Kilishitu na apwanga a Timoteo, kwa engwa kwabho a Nnungu. Ngunakunjandishilanga mmanganya mmandunji bha a Nnungu nninginji ku Kolinto na bhandu bhowe bha ukonjelo mmbali yowe ya ku Akaya. **2** Nema na ulele kopoka kwa a Nnungu ainabhetu na Bhakulungwa a Yesu Kilishitu ibhe na mmanganya. **3** Bhakuywe a Nnungu ainabhabho Bhakulungwa bhetu a Yesu Kilishitu, Atati bhakwete shiya na a Nnungu bhakutupa kuangalala. **4** A Nnungu bhakutuangularaya nkulaga mwetu, nkupinga na uwe twaangularanje bhananji nkulaga kwabhonji kwa nng'angalo gogo gutuposhela kopoka kwa bhenebho. **5** Elo, malinga shitupunda kupata mboteko nkwaakamulila liengo a Kilishitu, a Nnungu shibhapunda kutuangularaya kupidila a Kilishitu. **6** Ibhaga tunalaga, ni kwa ligongo lya nng'angalo na ntapulo gwenunji. Putuangularala nkupinga kunng'angalayanga mmanganyanji na kuntaganga ntima kwa mboteko yenunji, mwiipilililanje malinga uwe. **7** Na ngulupai itukwete kwa ligongo lyenunji ishimilishe, pabha tumumanyi kuti nnalaganga malinga uwe, nneyo peyo shinng'angalalanje malinga uwe. **8** Ashaalongo, tunapinga kummalanjilanga shitushite laga ku nkowa gwa ku Ashia kula, shilajesho shashinkututopela kwa kaje mpaka gutuwile mitima kuti tukalama. **9** Elo, mmitima jetu putwaliji mbuti bhandu bhaukumwilwenje kubhulagwa, nkupinga tunaikulupalile twaashayene, ikabhe twaakulupalile a Nnungu bhakwaayuyanga bhandu bhawilenje. **10** Bhenebho bhatutapwile nshilaje shikulungwa shapingaga kutubhulaga shila, na bhanapunda kututapula. Tunakwakulupalila kuti shibhatutapule kabhili. **11** Mmanganya nnakutujangutilanga

kwa kutujujila. Nkupinga bhandu bhabhagwinji bhatendanje ej a kwa a Nnungu ga ligongo lya mboka itupata kwa jujilwa na bhandu bhabhagwinji. **12** Shitukwiiniya shindu shimo, mitima jetu jinakutukong'ondelala kuti tunatama pa shilambolyo pano na kajekaje munkumbi gwenunji, kwa kwiitimalika kutupegwilwe na a Nnungu. Twangalongojwa na lunda lwetu ikabhe kwa nema ja a Nnungu. **13** Tunakunjandishilanga indu ishinkombolanje shoma na kwiimanya. Ngunakulupalila kuti shimwimanyanje ukoto, **14** pabha nnaino mmumanyinji kashoko. Bhai, tumumanyi kuti lyubha lya kwiya a Yeshu shumwiiniyanje kwa ligongo lyetu malinga shitukwiiniya uwe kwa ligongo lyenunji. **15** Ngulikulupalila kumanya na kulupalila kwenunji, gundumbilile ndandubhe kuika kunngwenunji nkupinga mpwaikanje pabhili. **16** Natumbilile mbitile kungwenunji gwa kwenda na gwa nkubhuja kunkoa gwa Makedonia, nkupinga nnyangutilanje ga mwanja gwangu gwa kwenda ku Yudea. **17** Bhuli, punkuganishiyanga kuti naliji mundu jwa pindikukapindikuka? Eu, punkuganishiyanga njitumbilila kwa lunda lwangupe? Kuti ngunabheleketa "Elo" na "Nngabha" gwanakamo? **18** A Nnungu bha kweli jika, bhai, shitummalanjilenje shila nngabha shindu sha "Elo" na "Nngabha" **19** Pabha a Kilishitu bhanabhabho a Nnungu, bhutunnungushiyenje nne na a Shilibhanushi na a Timoteo, bhakaliji bha "Elo" na "Nngabha." Ikabhe mobha gowe bhenebho ni "Elo" ja a Nnungu. **20** Pabha malagano gowe ga a Nnungu gali mwa a Kilishitu ni ga "Elo" kwa lyene ligongolyo, "Amina" jetu pujilugulwa kwa lina lya a Yeshu nkwaakuya a Nnungu. **21** Bhai a Nnungu bhayene bhanakutushimilika uwe pamo na mmanganya nkulundana na a Kilishitu. Na kutuagula, **22** bhenebho gubhatupele Mbamu jwabho mmitima jetu abhe lulembo kuti uwe tubhabho na

abhe ngamulo ja indu yowe ibhatubhishile. 23 A Nnungu ni bhakong'ondela bhangu ngaabheleketa unami, gundumbilile ngunaishé kabhili ku Kolinto ngunakummulayanga kuinjika kwa malobhe ga kalipa. 24 Tukaapinga kunshishilishiyanga ga indu inkukulupalilanga, pabha mwiishimilikenje nngulupai jenunji. Ikabhe uwe tubhaajangutila bha angalala kwenunji.

2 Bhai, njitumbilila ngunanng'owelanje kabhili ngunakummulayanga kuinjika. 2 Pabha nimmulayangaga kuinjika, bhai, gani shaang'angalaye? Ikabhe mmanganya bhunimuleyenje kuinjika. 3 Nannjandishilenje nneyo, nkupinga pushing'ishepo ngunainjishe ga bhene bhapinjikwangaga kung'angalaya. Nne nimumanyi kuti inonyelaga na mmanganya shiinnonyelanje. 4 Punannjandishilenje pala munaliji nshilaje shikulungwa muntima na minyoi jilitunguka, nngabha kuti nng'injikanje, ikabhe mmumanyanje shinguti kumpinjiyanga. 5 Na nnaino apali mundu ammuleye nnjakwe kuinjika, jwangamulaya kuinjika nnepe, ikabheje mmowenji mmwe, numbe ngunapunde bheleketa. 6 Ukumu jimumpelenje mmandu bhabhagwinji jinakumpwaa. 7 Bhai mbaya munneshelelanje jwene mundujo, na muntaganje ntima nkupinga anainjishe niwa ntima. 8 Kwa nneyo ngunakunshondelesheyanga, munnanguyanje kuti nnakumpinganga kwa kaje. 9 Shinatumbilile kunnjandishilanga mbhaluwa mula, nkupinga nole monaga shinkundanje indu yowe. 10 Munneshelelangaga mundu shindu shoshowe, numbe nne ninneshellele, monaga shipali kweli shindu shoshowe sha leshelela, ngunakunneshelela pa meyo ga a Kilishitu kwa ligongo lyenunji, 11 nkupinga Lishetani anatupunde, pabha tugumanyi ugulumba gwakwe. 12 Ngaisheje kushilambo sha ku Toloa kuulunguya Ngani ja Mmbone ja a Kilishitu,

Bhakulungwa bhashinkutenda ngombole kukamula liengo ukoto.

13 Ikabheje nashinkutenguka pabha nangaabhona ajetu a Tito.

Gunaalajilenje bhandunji bha penepo nigumbite ku Makedonia.

14 Ikabheje, bhatendelwe eja a Nnungu bhakututenda mobha gowe tukombole kutama nkulundana na a Kilishitu. Numbe nibhakututenda tujeneye Ngani ja a Kilishitu mbuti indu ya nunjila mmbali yowe. **15** Pabha uwe mbuti nunjila kwa lubhani lwa a Kilishitu kwa a Nnungu, munkumbi gwa bhowe bhaatapulwanga na bhaobhanga. **16** Kwa bhaobhanga bhala kwene kunnunjilako kwa shiwo, ikabheje kubhaatapulwanga kwene kununjilako kunataga gumi. Bhai, gani shapwae kwa lyene liengolyo? **17** Uwe nngabha malinga bhatendelanga upindi ntenga gwa a Nnungu, ikabhe tunalunguya kwa ntima gwa uguja pa meyo ga a Nnungu, malinga bhandu tutumilwe na a Nnungu, tulundene na a Kilishitu.

3 Bhuli, tunatandubha kwiiniya kabhili twaashayene? Bhuli, tunapinga bhaluwa ja lumanyio malinga shiikupinjikwa ku bhandu bhananji pubhakwiyananga kunngwenunji eu kopoka kunngwenunji? **2** Mmwe mwaashayene ni bhaluwa jetu, bhaluwa jijandishwe mmitima jetu, na jinamanyika na shomwa na bhandu bhowe. **3** Mmanyikenje kuti mmanganya bhaluwa ja a Kilishitu kukopoka mmakono getu. Bhaluwa jijandishwe nngabha na wino, ikabhe kwa Mbamu jwa a Nnungu bhali bhakwete gumi, nngabha jijandishwe nshipande sha liganga, ikabhe mmitima ja bhandu. **4** Tunakombola bheleketa genego gwangali bhoga pa meyo ga a Nnungu, ligongo lya ngulupai itukwete kwa a Nnungu kwa gene gubhatendile a Yeshu Kilishitu gala. **5** Nngabha tunakombola tenda shindu shoshowe kwa mashili getu, ikabhe mashili getu kugakopoka kwa a Nnungu. **6** Pabha bhenebho bhatutendile

uwe kulunguya malagano ga ambi, nngabha malagano ga Shalia
jjandikwe, ikabhe malagano gaka Mbamu jwa a Nnungu. Pabha
Shalia jinabhalaga, ikabhe Mbamu anataga gumi. **7** Shalia
jashinkujandikwa mwiipande ya maganga. Ikabhe mpelo gwakwe
shiwo, ukonjelo gwabho gwashinkupunda mpaka bha Ishlaeli
bhashinkulepelanga kwaalola a Musha kumeyo, ligongo lya
ng'anyima kwabho. Kung'anyima kwabho kwangalonjeya. Bhai,
ibhaga Shalia jipeleshela kuwa jatendeshe kwa ukonjelo gwa
nneyo, **8** bhuli, liengo lika Mbamu jwa a Nnungu likapunda
kukola ukonjelo? **9** Bhai, ibhaga gwashinkupagwa ukonjelo
nniengo lya ukumula ukoto, penepo liengo lipeleshela uguja
shilibhe na ukonjelo gwa puya. **10** Ukonjelo gwalongolele
gula ushipela, pabha nnaino shikwete ukonjelo gwa puya,
shishe. **11** Ibhaga shene shaliji sha pitape shashinkukola
ukonjelo, lyakwa lipamba kuti sha pitipiti shila shipinga kola
ukonjelo gwa puya. **12** Na pabha shitukulupalila ni sheneshi,
uwe tunabheleketa kwa mashili. **13** Uwe tukatenda malinga a
Musha bhaiunishile nngubho kumeyo, nkupinga bha Ishlaeli
bhanakubhonanje kung'anyima kwabho kulipela. **14** Ikabhe
lunda lwabhonji lwashinkupuganyika. Mpaka lelo Bhaishilaeli
pubhaashomanga itabhu ya Malagano ga Bhukala, shitabhosho
shikanabhe shoka. Pushishoka mundu alundanaga na a Kilishitu.
15 Elo, mpaka lelo kila pubhaashomanga itabhu ya a Musha,
lunda lwabhonji lunapuganyika. **16** Ikabheje, malanga gogowe
mundu pakwatendebhushila Bhakulungwa a Yesu, shitabhosho
shinashoywa. **17** Bhai, "Bhakulungwa" ni Mbamu na popowe pali
Mbamu jwa Bhakulungwa penepo pa ungwana. **18** Bhai, uwe
tubhowe twangaunishilwa kumeyo, tunalangula ukonjelo gwa
Bhakulungwa mbuti kung'anyima kwa shioo, shitutindiganywe

tulandane na Bhakulungwa, tulishoka ukonjelo kwenda ukonjelo guna, numbe gwa puya. Lyene liengolyo lika Mbumu jwa Bhakulungwa.

4 Bhai, a Nnungu kwa shiya shabho, bhashikutupa liengo lino, kwa nneyo tukawa ntima. **2** Tushileka indu yowe ya tokomaya na ya nng'yo. Tukatama kabhili muunami, eu nkulipuganya lilobhe lya a Nnungu, ikabhe kwa lunguya ya kweli gwangali nng'yo, tunakwaalanguyanga bhandunji bhamumanyanje mmitima jabhonji kuti tunatenda ibhapinga a Nnungu. **3** Pabha, monaga Ngani ja Mmbone jitulunguyaji jishikwiya, bhai jishikwiya ku bhaobhangha. **4** Bhalabhonji bhakaakulupalilanga pabha Lishetani, nnungu jwa shilambolyo ashikwaapuganyanga lunda lwabhonji bhanashibhonanje shilangaya sha Ngani ja Mmbone ja Ukonjelo gwa a Kilishitu, bhalo malinga shibhali a Nnungu. (aiōn g165) **5** Pabha tukakwilunguya twaashayene, ikabhe bhutukwalunguya a Kilishitu kuti Bhakulungwa na uwe tubhatumishi bhenunji kwa ligongo lya a Kilishitu. **6** Pabha a Nnungu bhabhelekete, "Shilangaya shilangaye nnubhindu," bhai bhenebho shibhalangaye mitima jetu, na kutupa shilangaya sha kuumanya ukonjelo gwa a Nnungu gulangaya kumeyo kwa a Kilishitu. **7** Ikabheje, uwe tuli na shene shibhikosho, putuli mbuti indu ya lilongo ibhishilwe indu ya muntima, nkupinga imanyishe kuti mashili gamakulungwa ni ga a Nnungu na nngabha getu. **8** Mobha gowe tunalaga, ikabheje tukaamaliywa. Tunakola lipamba, ikabheje tukawa ntima, **9** tunalaga, ikabheje tukalekwa gwangali jangutilwa. Nkali bhatugalabhuyanje pai tukaabhlagwa. **10** Mobha gowe tunaowa na shiwo sha a Yeshu mwiiilu yetu, nkupinga gumi gwabho gubhoneshe mwiiilu yetu. **11** Elo, pututama pano shiwo shinakutukagula ligongo

lya kwaakamulila liengo a Kilishitu, nkupinga gumi gwabho gubhoneshe mwiilu yetu yawa ino. **12** Malombolelo gakwe ni kuti, uwe tukaajogopa nkali kuwa, nkupinga mmanganyanji mpatanje gumi gwa pitipiti. **13** Ishijandikwa Mmajandiko ga Ukonjelo, "Nne ngulupalile, kwa nneyo ngunabheleketa." Numbe uwe nneyo peyo, tubhaga na ntima gogo pego gwa ngulupai, tunakulupalila na kwa lyene ligongolyo tunabheleketa. **14**

Tumumanyi kuti a Nnungu bhaayushiye Bhakulungwa a Yesu bhala, shibhatuyuye na uwe pamo na a Yesu na kutubhika pa makongono gabho, pamo na mmanganya. **15** Gowego ni kwa ligongo lyenunji, nkupinga nema ja a Nnungu pushijipunde ku bhandu bhabhagwinji, kutenda eja kupunde na a Nnungu bhakuywe. **16** Kwa lyene ligongolyo tukawa ntima, nkali iilu yetu itutikaga, ikabhe mmitima jetu munabha mwaambi mobha gowe.

17 Pabha shilaje shetu nngabha sha punda, numbe sha malanga gashokope, ikabheje shinakutupa ukonjelo gwa puya kaje gwa pitipiti guli gwa mmbone kupunda shilaje shino. (**aiōnios g166**)

18 Kwa nneyo tunalolele indu ibhoneka, ikabhe ikabhoneka. Pabha ibhoneka ikalonjeya, ikabheje ikabhoneka ila, ni ya pitipiti.

(**aiōnios g166**)

5 Pabha tumumanyi kuti iilu yetu ya pashilambolyo ino malinga liema, liangabhanwaga jipali nyumba jina jikopoka kwa a Nnungu jangashengwa na makono gaka mundu, shijibhe ja pitipiti.

(**aiōnios g166**) **2** Pabha mwiilu muno tunabhubhula, tulilokolila kupegwa iilu yetu ya ambi ili kunnungu. **3** Pabha tuwashwaga iilu ya kunnungu, tukabhoneka mbuti mbumu gwangali shiilu. **4** Tuli nshiilu sha pashilambolyo shino, tunabhubhula kwa topelwa, nngabha kuti tunapinga kuleka shiilu shawa shino, ikabheje tupegwe shiilu shikawa, nkupinga gumi gwa pitipiti utindiganye

shii lu shetu shawa shila. **5** A Nnungu bhayene bhashikututendela yene mbindikuloi, gubhatupele Mbumu jwabho abhe ngamulo ja indu yowe ibhatubhishile. **6** Bhai, mobha gowe tunakulupalila, numbe tumumanyi kuti tutamaga na yene iilu ino mobha gowe, tunatalikangana na Bhakulungwa. **7** Pabha tunatama kwa ngulupai na nngabha kwa lola. **8** Elo, uwe twiishimilishe numbe tunabhabna mbaya kushileka shii lu shino, nitama na Bhakulungwa. **9** Kwa nneyo shindu sha mmbone kupunda yowe, ni kutenda ibhapinga a Nnungu, tubhaga nshiilu sha pa shilambolyo, eu tubhaga nshiilu sha kweneko. **10** Tubhowe tunapinjikwa kujima pa shitengu sha ukumu sha a Kilishitu, nkupinga kila mundu aposhele malinga shatendaga mobha ga gumi gwakwe, gabhe ga uguja eu gangali ga mmbone. **11** Bhai, tumumanyi kuti inapinjikwa kwaajogopa Bhakulungwa, penepo tunakwaakwiyanga bhandunji, ikabheje a Nnungu bhajimanyi mitima jetu na nne ngunakulupalila kuti na mmanganyanji ntumanyinji ukoto. **12** Pabha tukakwiiniya kungwenunji, ikabhe tunakumpanganga ligongo lya kwiiniya, nkupinga nkolanje sha kwajangulanga bhakwiiniyanga ga ibhakwibhonanga, kupunda ili mmitima jabbonji. **13** Ibhaga tuuhoneka tukwete shalubha, genego ni kwa ligongo lya kwaanonyeya a Nnungu, eu ibhaga tukwete lunda genego ni kwa ligongo lyenunji. **14** Pabha kipinga kwabho a Kilishitu kunakutulongoya uwe tukulupalile kuti, mundu jumo ashinkuwa kwa ligongo lya bhowe, bhai bhowe bhawilenje pamo na jwenejo. **15** Bhashinkuwa kwa ligongo lya bhowe, nkupinga bhabhakotonji bhanaikulupalilanje ashaayenenji, ikabheje kwa bhene bhawile na yuywa kwa ligongo lyabbonji. **16** Bhai, tandubhila nnaino, tukakunnola mundu kwa lunda lwa shigundu. Nkali uwe twaabhwani a

Kilishitu shigundu, ikabheje nnaino tukakwaabhona shana nneyo. **17** Bhai ibhaga mundu alundenaga na a Kilishitu anabha mundu jwa ambi, ga bhukala gapitile nnaino gaishe ga ambi. **18** Yowe kuikopoka kwa a Nnungu, bhatupatanishe uwe na bhenebho kwa shiwo sha a Kilishitu, gubhatupele liengo lya kwaapatanishanga bhananji na a Nnungu. **19** Ntenga gwetu ni kuti, a Nnungu bhashinkwiipatanisha na bhandunji bha shilambolyo kwa shiwo sha a Yesu, gwangali kuitolelela ilebho ya bhandunji, gubhatupele liengo lya kwaapatanishanga bhandunji na bhenebho. **20** Kwa nneyo, uwe tubhantenga bha a Kilishitu. Na a Nnungu bhayene bhanakunshemanga mmanganyanji kupitila uwe. Kwa nneyo, tunakunnjuganga kwa lina lya a Yesu mpatananje na a Nnungu. **21** A Kilishitu bhakakweteje ilebho, ikabheje a Nnungu gubhaatendile bhaijigale ilebho yetu, nkupinga uwe nkulundana na a Kilishitu tukole aki kwa a Nnungu.

6 Bhai uwe tubhaga tubhakamula liengo pamo na a Nnungu, tunakunshondelesheyanga nnaposhelanje nema ja a Nnungu pa yoyo. **2** Pabha a Nnungu Mmajandiko ga Ukonjelo bhakuti, "Malanga ga pwaa nampilikanishiye, malanga ga ntapulo nannjangutile." Bhai nnole, nnaino ni malanga ga pwaa, na lyubha lya ntapulo ni lelo. **3** Tukaapinga kubha shigwegwe kuka mundu jojowe, wala kwaatendanga bhandunji bhatugambanje nniengo lyetu. **4** Ikabheje, kwa kila shindu tulanguye kuti tubhatumishi bha a Nnungu, tulikwiipililila mmobha ga laga na mmboteko na nshilaje. **5** Nkukomwa na Nkutabhwa na nkutendelwa pujo, na tokoteka maengo, tushisheya na laga shibhangga. **6** Tuilanguye kuti tubhatumishi bha a Nnungu kwa mitima ja takata, na kwa lumanyio na kwa kwipililila na kwa

uguja, kwa Mbumu jwa Ukonjelo, na nkupingana kwa kweli, 7 na nkulunguya ntenga gwa kweli, na kwa mashili ga a Nnungu. Ikomaniilo yetu ya komanilana na ya kwiitapulila ni itendi ya aki. 8 Nkuishimiwa eu kwa nyegaywa, kwa gambwa eu kwa lumbililwa. Tuliganishiwa mbuti tubhanami, mbenza itubheleketa ya kweli. 9 Tunabhoneka mbuti tukamanyika mbenza tunamanyika na bhowe, tulibhoneka mbuti bhawilenje, mbenza tubhabhakoto, tulikomwa ikabheje tukaabhulagwa. 10 Mbuti tushiinjika ikabheje tunaangalala mobha gowe. Mbuti twangali indu, mbenza tunakwapanganga bhandu bhabhagwinji indu, tunabhoneka mbuti twangali shindu shoshowe, mbenza tukwete indu yowe. 11 Mmanganya Bhakolinto, tunabheleketa na mmanganyanji kopoka mmitima jetu. 12 Uwe twangaleka kumpinganga mmanganyanji, ikabheje mmanganyanji nshikananga kutupinga uwe. 13 Bhai, nnaino ngunabheleketa na mmanganyanji mbuti ashibhanangu, bhai ntupinganje malinga shitukumpinganga. 14 Nnapangananje mbwiga na bhandunji bhakakwakulupalilanga a Kilishitu. Bhuli, aki na yangali ya mmbone inapatana? Shilangaya na lubhindu inatama pamo? 15 Bhuli a Kilishitu bhanapatana naka Lishetani? Eu akulupalila anapatana na akaakulupalila? 16 Likanisha jipatana bhuli na kuitindibhalila yanamu? Pabha uwe likanisha bhali bhakoto. Malinga shibhashite bheleketa a Nnungu bhayene, “Shindame mmitima jabhonji, na tama munkumbi gwabhonji. Shime Nnungu jwabhonji, na bhalabhonji shibhabhanganje bhandunji bhangu.” 17 Kwa nneyo Bhakulungwa bhakuti, “Nshokangananje munkumbi gwabhonji nnabbandikane nabhonji. Nnakwayanje shindu sha nyata, na nne shinimposhelanje. 18 Nne shime na ng'inagwenunji, na mmanganya shimmanganje ashibhanangu bhanabhalume na

bhanabhakongwe, bhanabheleketa Bhakulungwa Bhakwete Mashili."

7 Bhai, ashaambwiga ajangunji, ibhaga tupegwilwe jene miadi joweji, twiitakaye na yowe inyatiya shiilu na mbumu, tubhe na ukonjelo na tutame kwa kwaishimiya a Nnungu. **2** Tunakunnjuganga ntuposhelanje mmitima jenunji! Tukanabhe kunnebhela mundu jojowe, wala tukanabhe kumpokonyola mundu wala kumpuganya mundu jojowe. **3** Ngaabheleketa gegano nkupinga ninng'ukumulanje mmanganya. Malinga shinjite bheleketa, mmanganya munninginji mmitima jetu, nkali kwa wa eu kwa lama pamo na mmanganya. **4** Ngunakunkulupalilanga mmanganya, nshilaje shetu nnandaganga ntima na nnang'angalayaga kwa kaje. **5** Nkali tukaisheje ku Makedonia twangapumulila. Ikabhe twashinkulaga mmbali yowe, palanga mipwai na mmitima lipamba. **6** Ikabheje a Nnungu, bhakwaataganga ntima bhawilenje ntima, bhashinkututaga ntima kwa kwiya kwabho a Tito. **7** Nngabha kwa ika kwabhope a Tito, ikabheje shinshite kwaataganga ntima. Bhatubhalanjile shinkuti lokolilanga kumona, na shinshite injikanga na shinkutumbililanga kunyanguta. Lyenelyo linandenda ng'angalale kaje. **8** Bhai, ibhaga mwainjikenje ga bhaluwa jangu, ngakwigamba. Nkali nneyo naigambile kashoko pabha namumanyi cuti mwashinkuinjikanga kashoko ga bhaluwa jila. **9** Ikabheje nnaino ngunakwinonyela, nngabha pabha nshiinjikanga, ikabhe mwashinkuinjikanga mpaka nikwiipeta. Pabha mwashinkuinjikanga malinga shibhapinjile a Nnungu na kwa lyene ligongolyo twangampotekanga kwa shoshowe. **10** Pabha kuinjika kubhaapinga a Nnungu kunakuntendebhya mundu ntima nikumpa ntapulo, kwa nneyo lyakwa ligongo ly

kwiigamba. Ikabheje kuinjika malinga kwa bhandunji bha pa shilambolyo, kunabhulaga. **11** Nnolanje shikoposhele nkuinjika kwenunji malinga shibhapinjile a Nnungu, nshibhanganga bhandu bha tumbila, na kulanguya kuti mwangalebhanga, na bha kunda. Nnaimukanga, na kupotekwa mitima, na nnalokolilanga kumona, na nnapingana, na nnapinganga kuukumula kwa aki. Kwa gene gowego nnangwiyenje kuti shakwa shinnebhilenje. **12** Bhai, ibhaga najandishe, nngabha kwa ligongo lika jwene alebhilejo eu alebhelwejo. Ikabhe nashinkutumbilila jandika imanyishe kwa a Nnungu shinkuti kwiishoyanga kwa ligongo lyetu uwe. **13** Kwa gene gowega tushitagwa ntima. Kupunda kutagwa ntima kwetu, twashinkuangalala kwa ligongo lya angalala kwa a Tito kwa shimwashite kwaangalayanga ntima mmowenji. **14** Nne njikunnumbililanga kubhenebho, kwa lyenelyo mwangandokomayanga. Tushikunnugulilanga kweli mobha gowe na kwene kunnumbililanga kwa ligongo lya a Tito ishibha ya kweli jika. **15** Kumpinganga kwabho kunapunda pubhakumbushila kukunda kwenunji mmowe shimwashite kwaaposhelanga kwa ishma ja kaje. **16** Ngunakwinonyela pabha inatendeka kunkulupalilanga mmanganya kwa indu yowe.

8 Ashaalongo ajetu, tunapinga mmumanyanje ga nema ja a Nnungu jibhaapelenje makanisha ga ku Makedonia. **2** Nkali bhashinkulingwanga kwa mboteko yaigwinji, ikabheje kuangalala kwabhonji kwashinkupunda, nipeleshela kukola ntuka nankali nkulaga kwabhonji. **3** Ngunakong'ondela kuti bhashinkukolanga ntuka kupunda ibhakwetenje nkali bhakakwetenjeje indu yaigwinji, kwa engwa bhashinkushoyanga indu yabhonji malinga shibhakombwelenje. **4** Bhashinkutujuganga bhabhanganje bhatumishi na uwe ga kwaajangutanga bhandunji bha ukonjelo

bha ku Yudea. **5** Bhashinkutendanga kupunda shitwaganishiye! Bhashinkutandubhanga kwiishoya ku Bhakulumgwa, kungai bhashinkwiishoyanga kwetu uwe malinga shibhapinjile bhayene a Nnungu. **6** Kwa nneyo, twashinkwashondelesheya a Tito pabha ni bhakumbwiye, bhannjangutilanje nkolanje ntima gwa ntuka, nkumalishiya lyene liengolyo. **7** Ikabheje mmanganya malinga shinkwetenje indu yaigwinji, nkwetenje ngulupai na kombola bheleketa na lumanyio na tumbila kowe kwa tenda ya mmbone na kutupinga kwenunji. Kwa nneyo, tunalolela mmanganje na uguja nkwiishoya kwenunji. **8** Ngakunng'amulishanga, ikabhe ngunapinga nimumanye kupingana kwenunji monaga kuli kwa kweli, kwa linganya na kupingana kwa bhananji. **9** Pabha mmanganya nnjimanyinji nema ja Bhakulungwa bhetu a Yesu Kilishitu, shibhaitendile bhaalaga kwa ligongo lyenunji, ikabhe bhakwete indu, nkupinga mmanganya nkolanje indu kwa laga kwabho. **10** Bhai kwa lyeneli, ngunakunnugulilanga, inapwaa nnaino ntendanje gumwatandwibhenje kutenda masheyo gala. Mmanganyanji pumwalinginji bhantai kushoya, na kola lilaka lya tenda nneyo. **11** Bhai, mmaliyanje liengolyo, malinga shimwatumbililenje. Na kwa lilaka lila pelila mmaliyanje liengolyo kwa shoya malinga munkukombolelanga kushoya. **12** Pabha mundu akolaga ntima gwa shoya, a Nnungu bhanaposhela shoshowe shakwete mundu, na nngabha shatubhilwe. **13** Tukaatumbilila kuti mmanganya mpundanje kulaga, nkupinga bhananji bhapokanje, ikabheje ilingane. **14** Ikabhe nnaino, gwinji gwa indu inkwetenje, ujangutile bhaalaga, nkupinga na bhalabhonji pushibhakolanje ya punda, kubhannjangutilanje mmanganyanji, nkupinga nningane. **15** Malinga shijjandikwe Mmajandiko ga Ukonjelo, "Alopwele yaigwinji jwangali sha punda,

na alopwele ishoko jwangatubhilwa.” **16** Ikabheje ngunatenda eja kwa a Nnunu, bhaapele a Tito shilokoli muntima gwabho sha kunnjangutilanga mmanganyanji, malinga nne. **17** Nngabha kuti bhashinkukundape kujuga kwetu, ikabhe bhashinkukola lilaka likulungwa lya jangutila mpaka gubhajabhwile kwiya kweneko kwa engwa bhayene. **18** Pamo na bhenebho, tunakuntuma mpwetu jumo ainjywa na makanisha gowe nniengo lya kwiya Ngani ja Mmbone jilunguywe. **19** Nngabha nneyope, ikabhe bhashiagulwa na makanisha bhalongane na uwe mmwanja gwa kamilisha liengo lya shoya kwa ntima gwa ntuka, litutenda kwa ukonjelo gwa Bhakulungwa. **20** Tunapinga kwiembuya tunagambwe na bhandunji, ga indu yaigwinji itugoyai. **21** Pabha tunatumbilila tenda ya aki, nngabha pa meyo ga Bhakulungwape, ikabheje nkali kubhandunji. **22** Bhai, pamo na ashaapwangabho, tunakuntuma mpwetu juna jutunninjile papagwinji na ashilangula kuti ashikola lilaka lya tumika, numbe anakunkulupalilanga kwa kaje. **23** Numbe a Tito ni ajangu nne, tunatenda liengo kwa ligongo lyenunji, na ga ashaapwetu bhananji bhakwiyangana na a Tito, ni bhantenga bha makanisha, bhanatendanga liengo kwa ukonjelo gwa a Kilishitu. **24** Bhai, nnanguyanje kumakanisha kuti nnakwaapinganga gwangali ugulumba, nkupinga makanisha gabhonji gabhone kuti kunkulupalilanga kwetu kutukwiiniya, ni kwa kweli.

9 Ga liengo lyenunji lya kwaapeleshelanga indu bhandunji bha ukonjelo bha ku Yudea ngakulibhona ligongo lya kunnjandishilanga kabhili. **2** Nimumanyi shinshite kolanga ntima gwa jangutila, na naitapile ga lyenelyo ku bhandunji bha ku Makedonia nilinkuti, “Ashaalongo ajetu bha ku Akaya bhatandubhenje kushoya kuumila masheyo.” Kwa nneyo,

kutenda kwenunji kushikwaakwiyanga bhandu bhabhagwinji
bhapundanje kushoya. 3 Bhai, njikwatumanga ashaalongo
ajetubho, nkupinga kuitapa kwetu kunabhe malobhe jika,
ikabhe kubhoneshe kutumbilila kwenunji nkujangutila malinga
shinjite bheleketa. 4 Inabhe cuti bhandunji bha ku Makedonia
pushibhaikangananje na nne nikunng'imananga nkanabhe
bhanganga tayali, shituiye kola oni kupunda oni jishinkolanje
mwaashayene, pabha twankulupalilene kwa kaje. 5 Kwa
nneyo, njibhona inapinjikwa twaajuganje ashaalongo ajetubha,
bhalongolelanje kwiya kunngwenunji, nkupinga bhabhikanje
tayali indu ya jangutila, inkupinga shoyanga kwa engwa kwenunji.
Yenei ibhaga tayali, shiilanguye cuti nshishoyanga kwa engwa
na nngabha kwa shishilishiwa. 6 Nkumbushilanje cuti, apanda
ishoko ashaune ishoko, apanda yaigwinji ashaune yaigwinji.
7 Bhai, kila mundu ashoye malinga shaengwilwe muntima na
nngabha kwa injika eu kwa shishilishiwa, pabha a Nnungu
bhanakumpinga mundu ashoya kwa angalala. 8 Na a Nnungu
bhanakombola kumpanganga indu ya punda inkupinganga,
nkupinga mobha gowe nkolanje indu inkwiipinganga, mpundanje
kujangutila maengo gowe ga mmbone. 9 Malinga shigalugula
Majandiko ga Ukonjelo, "Bhenebho bhashilaguya kwa punda,
bhashikwaapanganga bhaalaga. Aki jabho jinalonjeya pitipiti."
(aiōn g165) 10 A Nnungu ni bhakumpa mmbuju nkupanda na
nkate kubha shalya, shibhampanganje mmbuju inkupinganga na
kwiitenda imele nikumpanganga mauno gamagwinji nkupinga
ntima gwenunji gwa ntuka upunde. 11 Kwa nneyo shimmanganje
matajili kwa indu yowe, nkupinga mobha gowe bhandunji
bhaatendelanje eja a Nnungu, kwa ligongo lya ntuka gwenunji. 12
Pabha liengo lya shoya linkutendangali nngabha kwa jangutilape

bhandunji bha ukonjelo, ikabheje bhandunji bhabhagwinji shibhapundanje kutenda eja kwa a Nnungu. **13** Kwa ligongo lya ukong'ondelo gwa lyene liengoli, bhandu shibhaakuyanje a Nnungu kwa ligongo lya kunda kwenunji, na kong'ondela ga Ngani ja Mmbone ja a Kilishitu, na ntuka gunkwaatendelanga bhanganyabho na bhandu bhowe. **14** Kwa nneyo shibhannujilanje kwa a Nnungu, kwa ntima gwa kumpinganga, kwa ligongo lya nema jimepegwilwelenje na a Nnungu. **15** Tutende eja kwa a Nnungu kwa ligongo lya upo yabho yangali sha landanya!

10 Bhai, nne a Pauli namwene ngunakunshondelesheyanga kwa tungamana na uguja malinga gwa a Kilishitu, nne nili jwa kwiitimalika pungubha na mmanganya, ikabheje na jwa makangala ga bheleketa, pungubha kwa talika na mmanganya **2** Ngunakunnjuganga nnamulayanje melekete kwa makangala pushing'ishepo, pabha nimumanyi cuti shindende nneyo ku bhandunji bhakutuganishiyanga cuti tunaakaguya ikubho ya pa shilambolyo. **3** Nankali tutama pa shilambolyo, ikabheje tukaakomana ngondo malinga shibhakomananga bhandunji bha pa shilambolyo. **4** Pabha, ikomanilo ya nngondo jetu nngabha malinga ikomanilo ya pa shilambolyo, ikabhe ishikola mashili ga a Nnungu ga kombola kuangabhanya mashili ga bhamagongo. Tunaangabhanya ng'aniyo ya unami, **5** na angabhanya ng'aniyo yowe ya kwiiniya, ibhishilwe nkupinga kutauka lumanyiyo lwa a Nnungu, tulikwiitenda ng'aniyo yowe yaakunde a Kilishitu. **6** Na shitubhe tayali kuukumula shitendi shoshowe sha tauka, kukunda kwenunji kukamilikaga. **7** Mmanganyanji nnalolanga indu kwa palangape. Bhuli, apali mundu jojowe aganishiya cuti jwenejo jwa a Kilishitu? Bhai, atuganishiye na uwe cuti tubha a Kilishitu malinga shali

jwenejo. **8** Bhai, nkali niitapaga kashoko kwa ligongo lya mashili gutupegwilwe na Bhakulungwa, ga kunshimilikanga nngulupai na nngabha ga kunng'angabhanyanga, kwa nneyo ngakola oni.

9 Ngapinga nnganishiyanje kuti ngunapinga kunnjogoyanga kwa bhaluwa yangu. **10** Pabha bhananji bhakutinji, "Bhaluwa ya a Pauli inakalipa na ishikola malobhe ga topa, ikabhe bhayene bhabhaga na uwe bhakakola makangala, nkali malobhe gabho gakakola mashili." **11** Mundu jwa nneyo amumanye kuti, itujandika mmaluwa tubhaga kwatalika, yoyo peyo itutenda putuika kunngwenunji. **12** Kwa kweli tukalinga kwiibhika eu kwilinganya na bhandunji bhakwiiniyanga ashaayenenji. Ikabheje bhakwiipimanga na kwilinganya ashayenenji kwa ashayenenji ni bhangumba. **13** Nkali nneyo, uwe tukakwiiniya kwa punda, ikabhe kwiiniya kwetu shikubhe nniengo libhatupele a Nnungu, kwa liengo litutenda mpaka kunng'ishilanga mmanganyanji.

14 Twangaiinya kwa punda, pabha putwaishe kungwenunji kulunguya Ngani ja Mmbone ja a Kilishitu, twangapunda mipika.

15 Bhai, tukakwiiniya kwa liengo libhatendilenje bhananji, ikabhe tunaakulupalila kuti ngulupai jenunji shijipunde, na liengo lyetu shilipunde kujenjesheka munkumbi gwenunji, gwangali pelenganya mipika jitubhishilwe na a Nnungu. **16** Penepo shitulunguye Ngani ja Mmbone mwilambo ina, kwa nneyo shitiwiiniye kwa ligongo lya liengo lyetu na nngabha libhatendilenje bhananji. **17** Ikabheje, malinga shigakuti lugula Majandiko ga Ukonjelo, "Jwene apinga kwiiniya, aiiniye kwa ligongo lya Bhakulungwa." **18** Pabha mundu apingwa, nngabha akwiilumbilila nnyene, ikabhe alumbililwa na Bhakulungwa.

11 Na mbaya mwiipilililanje kashoko ga ungumba gwangu! Elo, mwiipilililanje. **2** Njikola lupimililo genu mmanganyanji, malinga

Iwa a Nnuntu, pabha mmanganya punninginji mbuti mwali akanabhe kummanyia jwannume, junintomele kuka jwannume jumo, ni a Kilishitu. **3** Ikabheje ngunajogopa, inabha malinga lijoka jula, kwa unami gwakwe ashinkwaatema a Awa kwa lunda lwakwe, ng'aniyo yenunji inapuganywe nileka kulupalika na kwiishoya kwenunji kwa a Kilishitu. **4** Pabha aikaga mundu juna nilunguya ngani ja a Yesu bhanape, bhutukanakwaalunguya uwe, mmanganyanji nnakumposhelanga, na punda genego, nnakunkundanga mbumu juna eu Ngani ja Mmbone jina jikalandana na jimposhelenje kopoka kwetu uwe! **5** Ikabheje ngaganishiya kuti nne najwanshoko punda bhene bhashemwanga kwali, "Mitume bhakulu." **6** Nkali ngaakombola bheleketa ukotoyo, ikabheje ngwete lumanyio, lyeneli tulangwiye kunngwenunji gwangali nng'iyio mmbali yowe na mobha gowe. **7** Nne nashinkunnungushiyanga Ngani ja Mmbone ja a Nnuntu gwangali kulipwa, nashinkwiituluya nkupinga ninkweyanje mmanganyanji. Bhuli nashinkulebha? **8** Punatendaga liengo kungwenunji, natendaga pegwa indu na bhandunji bhana, eu melekete kuti, nashinkupokonyola indu yabbonji ninnjangutilanje mmanganyanji. **9** Punaliji na mmanganya nangannolela mundu jojowe ga shindu shoshowe, pabha Bhakilishitu ajetunji bhakopokenje ku Makedonia bhambelenje kila shindu shinapinjile. Nashinkwiteiga ngunannolele mundu kwa shoshowe na ngunapunda tenda nneyo. **10** Malinga shijili kweli ja a Kilishitu muntima gwangu, jwakwapi mundu shang'ibhilile mmbali yowe ya ku Akaya, ga kwiiniya kwangu. **11** Kwa nndi ngunabheleketa nneyo? Kuti kwa ligongo ngakumpinganga? Nngabha, a Nnuntu bhamumanyi kuti ngulikumpinganga! **12** Na shimbunde kutenda malinga shingutenda nnaino shino, nkupinga naibhililanje

bhene bhaaloleyanga kwiiniya, kuti bhanatendanga liengo malinga uwe. **13** Pabha, bhanganyabho ashimitume bha unami, bhakamula liengo bhanami, bhalikwiitembanga mbuti ashimitume bha kweli bha a Kilishitu. **14** Wala nngabha ga lapa, pabha nkali Lishetani nnyene anakwitemba mbuti malaika jwa shilangaya! **15** Kwa nneyo nngabha ga lapa, ibhaga bhatumishi bhakwe bhanakwiitendanga mbuti bhatumishi bhanguja pa meyo ga a Nnungu. Kumpelo shibhaukumulwanje kwa itendi yabhonji. **16** Kabhili nguti, mundu anang'anishiye kuti nanngumba. Ikabheje ntendangaga nneyo, bhai, nndolelelanje mbuti nanngumba nkupinga ngole sha kwiiniya kapela kashoko. **17** Shingubheleketa nnainoshi nngabha shibhapinga Bhakulungwa, ikabheje ga kwiiniyaga ngunabheleketa mbuti nngumba. **18** Pabha bhabhagwinjinji bhanakwiiniyanga kwa gene gubhatendilenje pa shilambolyo, numbe nne shiniiniye. **19** Mmanganya nkakwaapatanga bhangumba, pabha nshikolanga lunda! **20** Nnakupilililanga nkali mundu ammikanje utumwa, eu akunnjibhangwa, eu akunng'amulishanga, eu akunnyegayanga eu akunkomanga mapapa kumeyo! **21** Ngunakola oni kubheleketa kuti kwa genego twashinkwiinyegaya. Ikabheje malinga bhandunji bhana shibhalinganga kwiiniya ga shindu shoshowe, ngunabheleketa mbuti nngumba, numbe nne shiniiniye. **22** Bhuli, bhanganyabho Bhaebhulania? Nkali nne Muebhulania. Bhuli, bhanganyabho Bhaishilaeli? Nkali nne Mwishilaeli. Bhanganyabho lubheleko Iwa a Bhulaimu? Nkali nne lubheleko Iwa a Bhulaimu. **23** Bhalabhonji bhatumishi bha a Kilishitu? Shimelekete mbuti ngwete shalubha. Nkali nne nantumishi jwa a Kilishitu numbe kupunda bhanganyabho, nne njitenda liengo likulungwa, njitabhwa papagwinji, na njikomwa papagwinji, na

papagwinji punaliji tome nawa. 24 Ku Bhayaudi nashinkukomwa paano, ndomondo makumi gatatu na tisha shalepeshe shimope iishile makumi nsheshe. 25 Nashinkukomwa imbo patatu na Bhaloma, na kamo nashinkukomwa maganga. Patatu meli jashinkundemeshela mbhaali, kamo natemi mmashi ga bhaali shilo na mui. 26 Papagwinji mmwanja gwangu njiimikana na ya jogoya, ya ndanje ya mashi, na ya jogoya ya bhaapokonyola, na ya jogoya kopoka ku bhashilambo ajangunji, na ya kopoka ku bhandunji bha ilambo ina, na ya jogoya ya mwiiilambo, na ya mukonde, na ya mbhaali, na ya a Bhakilishitu ajetunji bha unami. 27 Nashinkulaga mmaengo ga topa, njisheya papagwinji. Njilaga shibhangna na nnjota, papagwinji natendaga tama gwangali kulya, njilaga mmbepo gwangali nngubho. 28 Na kupunda genego, mobha gowe ngunatopelwa na ng'aniyo ya liengo lya mmakanisha gowe. 29 Apagwaga mundu jwangali mashili na nne ngakola mashili, nneyo peyo mundu alebhaga, nne inamboteka. 30 Mbinjikwaga kwiiniya, bhai, shiniiniye kwa ungakola mashili gwangu. 31 A Nnunu, Ainabhabho Bhakulungwa bhetu a Yesu, lina lyabho likuywe pitipiti, bhenebho bhamumanyi ngaabheleketa unami. (aiōn g165) 32 Punaliji ku Dameshiki, bhakulungwa bhamo bha a mpalume Aleta, bhashinkubhika ulinda pa shilambo nkupinga ngamulwe. 33 Ikabheje, nashinkutuluywa palanga nshikapu shikulungwa, kupidila pa lilanga lya nnikumba gunaatolweshe.

12 Bhai ngunapinga kwiiniya, nkali ikapwae! Ikabheje nnaino ngunapinga bheleketa ga mabhono na maibhulo gumbatile kopoka ku Bhakulungwa. 2 Nimmanyi mundu jumo abhakulupalile a Yesu, yaka likumi limo na nsheshe ipitile, ashinkutolwa mpaka kunnungu kwataliya kaje. Ibhaga kweneko apiteje kwa shiilu

eu kwa mbumu nne ngakumumanya, a Nnungu bhamumanyi.

3 Numbe nne ngunabhujila kubheleketa kuti, jwene mundujo monaga apite kwa shiilu eu kwa mbumu, nne ngakumumanya, ikabheje a Nnungu bhamumanyi. **4** Ashinkutolwa mpaka kupaladisho, kweneko ashinkupilikana indu ya nng'yo ikapinjikwa mundu kutagulila. **5** Bhai, mbinga kwiiniya gaka mundu malinga jwenejo, ikabheje ngaiiniya gangu namwene, ikabhe kwa ungakola mashili gwangu. **6** Nkali ngapinjile kwiiniya nganabhe nangumba, pabha ngabhelekete ya kweli jika. Ikabheje ngaiiniya, nkupinga mundu anang'anishiye punda shinguti tenda na bheleketa. **7** Ikabheje nkupinga ngunaiiniye kwa gwene nng'ibhulo nkulugo, nashinkupega shindu sha poteka mbuti mibha nshiiilu shangu kubha mbuti muntenga juka Lishetani amboteshe, nkupinga ngunapunde kwiiniya. **8** Kwa ligongo lya shene shindusho, nashinkwashondelesheya Bhakulungwa patatu nkupinga bhanjosheye shene shindusho. **9** Ikabheje gubhanugulile, "Nema jangu shijimpwae, pabha mashili gangu ganamalila muungakola mashili." Bhai, ngunaengwa kwiiniya ga ungakola mashili gwangu, nkupinga mashili ga a Kilishitu gatame na nne. **10** Kwa nneyo ngunaengwa na ungakola mashili gwangu, na matukano, na shilaje na mboteko kwa ligongo lya a Kilishitu, pabha pungakola mashili, penepo ni pungubha na mashili. **11** Njibha mbuti nangumba, ikabheje mmanganyanji nshindendanga mme nneyo. Mmanganyanji mwapinjikwenje kung'iniya nne. Pabha, ningabhe shindu shoshowe, nne nngabha najwanshoko punda bhene bhakwiishemanga "Mitume bhakulu."

12 Itendi ya ilangulo na ilapo yashinkutendeka munkumbi gwenunji, ilanguya kuti nne ntume kwa kwiikakatimila kwa punda.

13 Bhuli, shindu shashi shintubhilwenje kupunda makanisha

gana, ikabhe nne nangantotoyanga nkupinga nnyangutilanje?
Shonde nneshelanje kwa shinebhilesho! **14** Nnaino puni tayali
kunng'owelanga gwatatu na ngantopelanga. Pabha shingupinga
nngabha indu yenunji, ikabhe ngumpinganga mmanganyanji.
Pabha, bhana bhakakwaabhibhilanga shibhiko bhaakwetenje,
ikabhe bhaakwetenje ni bhakwaabhibhilanga shibhiko ashibhana
bhabhonji. **15** Nne njiengwa kushoya yowe ingwete nkali
kwiishoya namwene, nkupinga kunnjangutilanga mmanganyanji.
Nkali ngumpinjiyangayo, mmanganya nnambinganga kashokope.
16 Bhai, nkundanje kuti nangantopelanga. Ikabheje bhandunji
bhana shibhaganishiyanye kuti, pabha njikola lunda nimpatilenje
kwa kuntekeyanga. **17** Bhuli, nne nantekeyenje indu
yenunji kubhantenga bhunaatumilenje kunngwenunji? **18** Nne
nashinkwaashondelesheya a Tito, gunaatumile kungwenunji
naka mpwetu juna. Bhuli, a Tito bhantekyenje? Bhuli,
nkakumumanya kuti uwe tunalongoywa na ng'aniyo imo na
itendi yetu imo? **19** Pana nnaganishiyanga kuti tunabheleketa
nkwiitapula kungwenunji! Ikabheje, tunabheleketa genego pa
meyo ga a Nnunu, tuli tulundene na a Kilishitu. Gene gowe
gututendaga ashaapwetu, nkupinga kunshimilikanga. **20** Pabha
ngunajogopa, pana pushing'ishe kunngwenunji ngang'imanaanga
malinga shingupinga, na mmanganya nkamonanga malinga
shinkupinganga. Ngunajogopa ngunakunng'imanaanga nninginji
na mpwai, na lupimililo, na nnjimwa na kulambililana, na
lung'wenyi na matukano, na kuiipuna na nnjasha munkumbi
gwenunji. **21** Ngunajogopa pushing'ishe mwanja gunago, a
Nnunu bhangu shibhandende niitimalishe, shiniigutanjile kwa
ligongo lya bhabhagwinji bhalebhilenje, ikabheje bhangaipetanga

kwa ya nyata yabhonji na labhalabha kwabhonji na ilokoli
yabhonji yangali ya mmbone ibhatendilenje.

13 Gweguno mwanja gwangu gwa tatu gushing'ishe kungwenunji Malinga Majandiko ga Ukonjelo shigaabheleketa. “Ngani jojowe pujimala kwa ukong'ondelo gwa bhandu bhabhili eu bhatatu.” **2** Nannuguliljenje, malinga mwanja gwangu gwa bhili, ngunakunnugulilanga kabhili nili kwataliya, bhatendilenje ilebho bhukala na bhananji bhowe, pushing'ishepo ngaabhonelanga shiya. **3** Shindende nneyo pabha mmanganyaji nnapinganga ukong'ondelo, kuti a Yeshu bhanabheleketa na mmanganyaji kupitila nne. Kwenu mmanganya a Kilishitu nngabha kuti bhangali mashili, ikabhe shibhalanguye mashili gabho munkumbi gwenunji. **4** Pabha pubhakomelwe munshalabha bhakakweteje mashili, ikabheje nnaino bhanaatama kwa mashili ga a Nnungu. Numbe na uwe twangali mashili nkulundana na bhenebho, ikabheje tunatama nabho kwa mashili ga a Nnungu, nkupinga tutende liengo munkumbi gwenunji. **5** Mwiibhuyanje mwaashayenenji monaga mwiishimilikenje nngulupai. Mwiibhuyanje mwaashayenenji. Bhuli, nkakumumanya kuti a Yeshu Kilishitu mubhali mmitima jenunji? Monaga nngabha, bhai nnepelenje. **6** Ikabheje ngunakulupalila kuti mmanganya mmumanyinji kuti uwe twangalepela. **7** Tunakwaajuga a Nnungu nnatendanje shangali sha mmbone shoshowe, nngabha tubhoneshe kuti tushikombola, ikabhe mmanganya ntendanje ya mmbone nkali tubhoneshe mbuti tushilepela. **8** Pabha tukatenda shoshowe sha tauka ya kweli, ikabhe tunapunda shumiya ya kweli. **9** Tunakwiinonyela mmanganya punkukolanga mashili nkali uwe tukakole mashili, kwa nneyo tunakunnujilanga nkamilikanje. **10**

Ligongo lya kunnjandishilanga jene bhaluwa jino nili kwatalika, ni nkupinga pushing'ishe kungwenunji nnandendanje ngalipe kwa mashili gubhambele Bhakulungwa, elo, mashili ga kuntaganga ntima na nngabha ga kummulaganga ntima. **11** Kwa nneyo, ashaalongo ajangunji, nne mwanja! Nkamulanje malajilo gangu, na ntumbililanje kwiishimilika, na ntagane ntima, nkolanje ng'aniyo imo, na ntamangane kwa ulele, na a Nnungu bhakumpinganga na bha ulele, bhabhe na mmanganyanji. **12** Nnamushilanjanje kwa shalamu ja ukonjelo. **13** Bhandunji bhowe bha a Nnungu bhanakunnamushilanga kwa nema ja a Yesu Kilishitu. **14** Nema ja Bhakulungwa a Yesu Kilishitu, na kupinga kwa a Nnungu na kulundana naka Mbumu jwa Ukonjelo, ibhe na mmanganyanji mmowe.

Bhagalatia

1 Nne a Pauli ntume, nangatumwa na bhandunji, ikabhe na a Yesu Kilishitu na Atati a Nnungu, bhaayushiye a Yesu bhakaweje, **2** na ashaalongo bhowe bhalinginji pamo na nne tunakunjumushilanga mmanganyanji bha makanisha ga ku Galatia. **3** Tunakunnujilanga nema na ulele kwa Atati a Nnungu na ku Bhakulungwa bhetu a Yesu Kilishitu. **4** A Yesu bhashinkwiishoya bhayene, kwa ligongo lya ilebho yetu nkupinga bhatutapule na ya nyata ya nshilambolyo mututama muno, malinga shibhapinjile Ainabhetu bhetu a Nnungu. (aiōn g165) **5** Ukonjelo gowe ubhe na bhenebho pitipiti, nneyo peyo. (aiōn g165)

6 Ngunakunkanganigwanga, pabha shangupe nnakwalekanga bhene bhanshemilenje kwa mboka ya a Kilishitu, nitendebhushila ngani ja mmbone jina pe. **7** Numbe nngabha jipali ngani ja mmbone jina, ikabhe bhapali bhandunji bhakumpuganyanga nkupinga bhajipuganyanje Ngani ja Mmbone ja a Kilishitu. **8** Ikabheje, nkali ibhaga jwa munkumbi gwetu eu malaika jwa kunnungu, shannungushiyanje ngani jojowe jikalandana na jene jitunnungushiyanje uwe, aloshwe na a Nnungu. **9** Malinga shitwammalanjilenje, tunabhujila kabhili nnaino, mundu jojowe akunnungushiyanga ngani jina jojowe jikalandana na jene jintupilikenenje uwe, aloshwe! **10** Bhai nnaino nguloleya kupingwa na bhandunji eu na a Nnungu? Eu ngupinga kwiikonjeleya ku bhandunji? Kaliji nneyo, nne nganabhe ntumishi jwa a Kilishitu. **11** Ashaalongo ajangunji pungupinga mmanyanje kuti, ngani jininnungushiyanje jangakopoka kubhandunji. **12** Pabha nangaposhela wala kujiganywa naka mundu, ikabhe a Yesu Kilishitu bhayene ni bhang'ibhulile. **13** Na mwapilikenenje ngani jangu ga punaliji bhukala mundu jwa dini ja Shiyaudi, kuti

natendaga shimwa na likanisha lya a Nnungu kwa kaje, kuishila pa pinga kwaamaliyanga. **14** Kwa nneyo njinkwiishimilika na dini ja Shiyaudi kwa kaje, kupunda ashaambwana ajangunji bhowe, nikagulila malajilo ga ashaambuje kwa kaje. **15** Ikabheje nne nganabhe bhelekwa, a Nnungu bhashinkung'agula kwa nema jabho kwa pinga kwabho. **16** Bhakatumbilileje kung'ibhulila ga Bhanabhabho, nkupinga naalungushiyanje bhandu bhangalinginji Bhayaudi ga ngani jabho. Kwa nneyo nangabhuya kuka mundu jojowe, **17** wala nangajomboka kwenda ku Yelushalemu kubhalinginji mitume bha ntai bhaagwilwenje nne nganabhe agulwa, ikabhe gunijjendele ku Alabhia, kungai gumujile kabhili ku Dameshiki. **18** Ikapiteje yaka itatu, gunyombweshe kwenda ku Yelushalemu kuumanyigana na a Kepa, gundemi kunngwabho mobha likumi limo na nng'ano. **19** Ikabheje nangammona ntume juna, ikabhe a Yakobho, apwabho Bhakulungwa bhetu. **20** Gene gungunjandishilanga gano a Nnungu bhagamanyi kuti nngabha ga unami. **21** Kungai gumbite ilambo ya ku Shilia na ku Kilikia. **22** Ikabheje gene mobhago nne ngamanyikanaga munkumbi gwa bhakilishitu bha ku Yudea. **23** Ikabhe, pabha bhapilikenenje kuti, "Bhene bhandu bhatupotekaga bhukala, nnaino bhanalunguya ngulupai jila jibhalingaga kujibhulaga bhukala jila." **24** Gubhaalumbililenje a Nnungu, ga ligongo lyangu nne.

2 Ikapiteje yaka likumi limo na nsheshe, gunyombweshe kabhili kwenda ku Yelushalemu gunongene na a Bhanabha na a Tito.
2 Bhai njinkwenda kweneko pabha njinkupegwa nng'ibhulo na a Nnungu. Njinkupinjikwa kutandubha kwaabhalanjilanga ashikalongolele bha likanisha lya a Nnungu pa jika. Gunaatendilenje bhamanyanje inalunguyaga kubhandu bha

ilambo ina, nashinkutenda nneyo nkupinga liengo lyangu linatendile na lingutenda nnaino linabhe lya yoyo. **3** Na a Tito Bhagiliki bhalongene na nne bhangashishilihiwa kujaluka nkali bhaliji Bhagiliki. **4** Ikabheje bhapalinji ashaapwetu bha kwitembanga, bhalundilenje na uwe kwa nng'yo, bhatumbililenje kwaataga unyago. Bhene bhandunjibho bhashinkwiijinjiyang a nkupinga kunushishiya bhamumanyanje shitukuti tama kwa ungwana tukalundaneje na a Yeshu Kilishitu, kupinga bhatubhikanje muutumwa. **5** Uwe twangapinga kulundana na bhene bhandunjibho wala kashoko, nkupinga Ngani ja Mmbone ja kweli jinkulupalilene, jitame mmitima jenunji mobha gowe. **6** Bhai nkali bhebhala bhalugwilwenje kuti bhakulungwanji, nne ngwibhonela kuti bhangalinginji shindu, pabha ukumu ja a Nnunu jikalola gundu gwa palanga, kwa nneyo nne nguti nnei, bhaalumbililwangabho bhakanyenesheya shindu. **7** Ikabhe gubhamumanyinji kuti njipegwa Ngani ja Mmbone kubhandunji bhangajalukanga, malinga a Petili shibhapegwilwe Ngani ja Mmbone Kubhayaudi. **8** Pabha bhene bhaakombweye a Petili kwaalungushiyanga Bhayaudi, ni bhangombweye nkali nne kulunguya kubhandunji bha ilambo ina. **9** Bhai a Yakobho na a Kepa na a Yowana ashikalongolele bhakulu, bhakumumanyanje kuti a Nnunu bhashimba nema, gubhatupelenje nkono nne na a Bhanabha kulanguya kuti bhanakutupinjilanga liengo lya mmbone, nkupinga uwe tukalunguye kubhandunji bha ilambo ina na bhanganyabho ku Bhayaudi. **10** Ikabheje gubhatushondelesheyenje shindu shimo, kuti, tunaalibhalanje bhaalaga. Bhai shene shindusho nne nashinkutumbilila kushikamula kwa kaje. **11** Ikabheje a Kepa bhakaisheje ku Antioquia ja Kushilia nashinkwatauka

palugwinjili pabha bhashinkuobha kaje. **12** Pabha bhakanabhe ikangananga bhandunji bhalajilwenje na a Yakobho, a Petili bhatendaga lya na bhandunji bhalinginji ngabha Bhayaudi. Ikabheje bhakaikangananjeje, a Petili gubhaleshile kulya nabhonji nkujogopa Bhayaudi bhakoposhelenje kwa a Yakobho. **13** Bhai nkali Bhayaudi bhananji bhala gubhailundilenje na a Petili, na nkali a Bhanabha na bhalabho gubhaijijiye muugulumba gwabhonji. **14** Nne ngabhoneje itendi yabhonji nngabha ya malinga shiikupinjikwa nkwelli ya Ngani ja Mmbone, gunaabhalanjile a Kepa pa bhandu bhowe kuti, "Monaga mwe Mmayaudi nkutama mwiikubho ya bhandunji bhangajalukanga, na mbuti nngabha Nnyaudi, pakuti nnakwakwikwilishiyanga bhalinginji nngabha Bhayaudi kukagulila ikubho ya Shiyaudi?" **15** Uwe tuli Bhayaudi kwa bhelekwa, nngabha bhandu bha ilambo ina bhalebhilenje! **16** Akuno tulikumumanya kuti mundu akabhoneka akwete aki kwa a Nnungu, kwa itendi ya shalia ja a Musha, ikabhe kwa ligongo lya kwaakulupalila a Yesu Kilishitu. Uwe tushikwakulupalila a Yesu Kilishitu, nkupinga tukole aki kwa ligongo lya ngulupai ya a Kilishitu, na nngabha kwa itendi ya shalia ja a Musha, pabha kwa itendi ya shalia ja a Musha jwakwa mundu shakole aki. **17** Monaga uwe twaashayene tunaloleya kupegwa aki kwa lundana na a Yesu, inabhoneka tushilebha malinga bhandu bhananji bhatendanga yambi, bhuli, lyeneli linalangula kuti a Kilishitu bhashibha shiumilo sha yambi? Nng'oope! **18** Pabha mujilaga kabhili gene gunagaengebhenye gala, bhai penepo ngunakwilanguya kuti namwene nankulebha. **19** Pabha nne ibhaga kwa kagulila shalia ja a Musha, najiwilile nkupinga ndame kwa ligongo lya a Nnungu, njiwa pamo na a Kilishitu. **20** Njikomelwa munshalabha pamo na a Yesu Kilishitu, ikabheje

najwankoto. Wala nngabha nne kabhili, ikabhe a Yesu bhali mmunda jangu ni bhabhakoto na gumi gungwete nnaino guno, mumbatile nkwaakulupalila Bhanabhabho a Nnungu, bhambinjile, nikwiishoya mbepei kwa ligongo lyangu nne. **21** Ngapetekuya nema ja a Nnungu, ibhaga aki jinapatikana kwa Shalia ja a Musha, bhai kuwa kwa a Yesu Kilishitu kwa yoyo.

3 Mmanganyanji Bhaghatalia mmangumba! Gani ampugenyenje? Mmanganyanji mwabhalanjilwenje indu yowe gwangali nng'yo, itaya kuti a Yesu Kilishitu bhashinkukomelwa munshalabha. **2** Ngunapinga mmalanjilanje shindu shimo. Bhuli, Mbamu jwa a Nnungu mwashinkumposhelanga kwa kagulila Shalia ja a Musha? Eu kwa ngulupai ya nkupilikana Ngani ja Mmbone? **3** Bhuli mmanganyanji mwangalinginji lunda nnei? Pumwatandubhenje mwashinkulongoywanga naka Mbamu jwa a Nnungu, nnaino nnapinganga maliya kwa mashili genunji? **4** Bhuli, indu yowe yankoposhelenje ila ibhe yayoyope? Nnganong'a! **5** Igala a Nnungu bhakumpanganga Mbamu jwabho na ilangulo ibhoneka punkukamulanga liengo, bhuli bhanatenda nneyo kwa itendi ya Shalia ja a Musha? Eu kwa ngulupai ya nkupilikana Ngani ja Mmbone? **6** Bhai malinga a Bhulaimu shibhabhoneshe kuti bhakwete aki kwa ligongo lya kwaakulupalila a Nnungu. **7** Bhai nnaino, mmumanyanje kuti, "Bhakwetenje aki, ni bhalinginji bhana bha a Bhulaimu." **8** Numbe Majandiko ga a Nnungu galugwile koposhela bhukala kuti, "Bhalinginji nngabha Bhayaudi, shibhapegwanje aki na a Nnungu kwa ligongo lya ngulupai yabbonji." Pabha a Nnungu bhukala bhaabhalanjile a Bhulaimu Ngani ja Mmbone kuti, "Kwa ligongo lyenu mmwe a Nnungu shibhaapanganje mboka bhandu bhalilambolyo yowe." **9** Kwa nneyo bhowe bhalinginji na ngulupai

bhanapegwanga mboka pamo na a Bhulaimu bhandu bhakwete ngulupai. **10** Pabha bhowe bhaakulupalilanga kukagulila Shalia ja a Musha mubhalinginji mmalosho. Pabha ishijandikwa kuti, "Ashilosha mundu jojowe akakagulila Shalia yowe ya a Musha ijandikwe nshitabhu sha Shalia." **11** Ilimanyikana kuti mundu akapegwga aki na a Nnungu kwa Shalia ja a Musha. Pabha Majandiko gakuti, "Akwete ngulupai shaatame kwa ngulupai." **12** Ikabheje Shalia ja a Musha jikakuntenda mundu akole ngulupai, ikabhe Majandiko gakuti, "Akugakagulila genego shaatame kwa genego." **13** A Kilishitu bhashikututapula nkuloshwa na Shalia ja a Musha, bhashinkuloshwa kwa ligongo lyetu uwe, pabha ishijandikwa, "Jojowe akomelwa munkongo ashilosha."

14 Lyeneli lishinkutendeka nkupinga mboka ibhapegwilwe a Bhulaimu yaishilanje bhandu bhananji bhalininginji nngabha Bhayaudi kwa kwakulupalila a Yesu Kilishitu, nkupinga tuposhele malagano ga a Nnungu ga Mbumu jwa Mmbone kwa ngulupai. **15** Ashaalongo ajangunji Mmakilishitu, shintintashiyanje lutango Iwangali ukomu. Malinga mundu abhika malagano nikong'ondela, jwakwa mundu jwa tauka eu kujenjesheya shindu.

16 Bhai a Nnungu bhashinkwapa miadi jabho a Bhulaimu na lubheleko Iwabho. Majandiko gakataya, "Na bha ibheleko yabho," nkupinga kulanguya kuti yaigwinji, ikabhe ganataya ga "lubheleko," yani "Jumo" malombolelo gakwe a Kilishitu. **17** Shingulugula ni ashino, a Nnungu bhashinkubhika Shalia ja Musha nikong'ondela. Shalia ja a Musha jikakombola kulekanya Malagano ga a Nnungu na a Bhulaimu, ikapiteje yaka miya pasheshe na makumi gatatu. **18** Pabha upo ya a Nnungu ibhaga kwa Shalia, bhai nngabha kabili kwa miadi. Ikabheje a Nnungu bhashinkwapa upo a Bhulaimu kwa miadi. **19** Bhai

shalia ni nndi? Jashinkubhikwa nkupinga kulanguya ilebho, mpaka pushaishe jwa lubheleko lwa a Bhulaimu jubhammishile miadi jila. Shalia pujaishe na malaika kupidila kuka mundu mbuti muntenga. **20** Bhai kwa nneyo nkupatanisha akapinjikwa, monaga shindu shiyene sha upande gumo, na a Nnungu ni bhamo. **21** "Bhai, bhuli shalia ja a Musha jinataukangana na miadi ja a Nnungu? Nng'oope! Monaga jikapali Shalia ja kombola kwaapanganga bhandunji gumi, bhai tukakwete aki kwa Shalia ja a Musha. **22** Ikabheje majandiko ga a Nnungu ganalugula kuti, shilambolyo showe mushili mmashili ga yambi, nkupinga bhowe shibhaakulupalilanje a Yeshu Kilishitu, bhapegwanje miadi jibhabhishile a Nnungu." **23** "Ikabheje tukanabhepegwa ngulupai, mutwaliji mmashili ga Shalia ja a Musha, tutabhilwe nkulindilila pushijiishe jene ngulupajjo. **24** Kwa nneyo Shalia ja a Musha jatendaga kutulela mpaka pushibhaishe a Yeshu Kilishitu, nkupinga tupegwe aki kupidila ngulupai yetu. **25** Kwa nneyo pakubha ngulupai jishe, uwe twanngabha kabhili nkulelwa na Shalia." **26** "Pabha mmowenji nshibhanganga bhana bha a Nnungu kwa ngulupai, kwa lundana na a Yeshu Kilishitu. **27** Pabha mmowenji mmatishwenje na lundana na a Kilishitu mbuti nshikawalanga a Kilishitu. **28** Kwa nneyo shakwa shakuti nne na Nnyaudi eu Ngiliki eu ntumwa eu nngabha ntumwa wala jwannume eu jwankongwe, pabha mmowenji mmamo kwa a Yeshu Kilishitu. **29** Bhai monaga mmanganyanji mmandunji bha a Kilishitu, nshibhanganga mmalubheleko lwa a Bhulaimu, kwa nneyo shimposhelanje malinga miadi jibhalugwile a Nnungu."

4 Ikabheje nne nguti nnei, alishi abhaga akanabhe kula, pakwibhela malinga ntumwa, nkali ali nnyene indu yowe. **2** Ikabhe bhaagoyanga indu ika mwana na kunnela, mpaka pushigaishile

mobha gabhishilwe na ainagwe. **3** Na uwe puyaliji nneyo peyo, putwaliji malinga bhana, nibha bhatumwa mmashili ga ikubho ya bhandunji bha pa shilambolyo. **4** Ikabheje gakaishileje mobha gubhapanjile a Nnungu, gubhantumile Mwana gwabho, abhelekwe na jwankongwe, gwatemi kwa Shalia ja a Musha, **5** nkupinga abhagombolanje bhene bhalinginji mmashili ga Shalia ja a Musha na uwe tubhe tubhana bha a Nnungu. **6** Kwa nneyo mmanganyanji nnaino pabha nshibhanganga bhana bha a Nnungu, bhai a Nnungu bhashikuntuma Mbamu juka Mwana gwabho mmitima jetu, Mbamu ashema alinkuti, "Abha" Malombolelo gakwe, "Atati". **7** Bhai monaga nneyo, mmwe nngabha mmatumwa kabhili, ikabhe mmana. Bhai ibhaga mmana, shimpushele yowe a Nnungu ibhaabhishilenje ashibhana bhabho. **8** Pabha bhukalago nkaamanyangaga a Nnungu, kwa nneyo mwashinkwaakamulilanga liengo ashimaoka bhalinginji nngabha a Nnungu bha kweli. **9** Bhai pabha nnaino mwamanyinji a Nnungu, eu tujile nnimanyikanga na a Nnungu, igala nkukombolanga bhuli kugabhuila kabhili majiganyo gangali ga mmbone nkupinga mmanganje bhatumwa kabhili? **10** Nnakagulilanga mobha na miei na malanga na yaka. **11** Nguna kwijijogopela kuti liengo lininkamuliljenje linabha lyayoyo! **12** Ashaalongo ajangunji nguna kunshondelesheyanga mmanganje malinga nne gwangali kamulila shalia ya Shiyaudi kabhili, pabha na nne puni malinga mmanganyanji kwa nngatama nshalia ya Shiyaudi. Mwangandendelanga shindu shoshowe sha nyata. **13** Ikabhe mmumanyinji kuti gwantai nannungushiyenje Ngani ja Mmbone akuno nililwala. **14** Mwashinkulingwanga kwa ligongo lya Iwala kwangu, nkali nneyo mwanganyegayanga wala kungana, ikabhe nshinkumboshelanga malinga malaika jwa a

Nnungu, eu malinga a Yeshu Kilishitu bhayene. **15** Shikoposhele nndi shantendilenje nnekanje nkali kuangalala kwenunnji? Pabha nne nguti nnei, gegala mobha gala kaliji nkaishoshiyenje nitenda indu kwa ligongo lyangu nne, nkakombolenje nkali kumba meyo genunji. **16** Bhuli, nnaino njibha nampwai nnjenunji ga bheleketa ya kweli? **17** Bhene bhananji bhanakwiitemba kumpinganga, nngabha kwa kumpinjilanga ya mmbone. Ikabhe bhanaapinganga kunnekanya na nne, nkupinga mwaatendelanje liengo bhene bhanganyabho. **18** Ni shammbone mobha gowe kutenda ya mmbone, wala nngabha mobha gungubha na mmanganyanjipe. **19** Ashibhanangu, inamboteka malinga bhakongwe bhakwete shitumbo, nneyo peyo shingupotekwa kwa ligongo lyenunji mpaka pushinnandananje na a Kilishitu mmitima jenunji. **20** Kaliji nnaino ngaaliji na mmanganyanji, nkamweninji shinguti bheleketa! Pabha ngunakola lipamba kwa ligongo lyenunji! **21** Nnugulilanje mmanganyanji Mmagalatia, nkupinganga kagulila Shalia ja a Musha, bhuli, nkapilikana shijilugula Shalajao? **22** Pabha ishijandikwa kuti, a Bhulaimu bhashinkukola bhana bhabhili, jumo abhelekwe na bhakongwe bhaliji bhatumwa bhabho, na jwabhili abhelekwe na akongobhabho. **23** Mwana abhelekwe na bhakongwe bhaliji bhatumwa bhala, pabhelekwe nngabha kwa miadi jojowe ja a Nnungu, ikabhe mwana abhelekwe na akongobhabho, pabhelekwe kwa miadi na a Nnungu. **24** Genega gashibha nnandanyo, pabha bhene bhanabhakongwe bhabhilibha bhashibhanganga malinga malagano gabhili, limo kukoposhela kushitumbi sha Shinai, litepo lya a Ajili libhelekwele muutumwa. **25** Pabha a Ajili pubhali malinga shitumbi sha ku Shinai sha ku Alabchia, gushilandana na ku Yelushalemu ja nnaino, pabha Shinai muuli muutumwa pamo na ashibhanagwe. **26** Kwa

nneyo Yelushalemu ja kunani ja ungwana, numbe ni anyina bhetu.

27 Pabha ishijandikwa, "Mwinonyele mwe anannii, nkaabheleka bhana, nng'utiye lilobhe mwe nkanabhe kola shitumbo, pabha bhana bha bhakongwe bhaleshilwe, bhabhagwinjinji, kupunda bhakwete bhalume." **28** Bhai ashaalongo ajangunji, na uwe ni bhana a Nnungu kwa ligongo ja miadi malinga ja a Ishaka. **29** Ikabheje ni malinga gene mobha gala, mwana abhelekwe na bhatumwa shanshimile jwene abhelekwe kwa Mbumu jwa a Nnungu, nneyo peyo shiili nnaino. **30** Bhai majandiko gakuti bhuli? Gakuti "Mwaabbinganje bhakongwe bhatumwa naka mwana gwabho, pabha mwana jwa bhatumwa akaapata ulishi pamo naka mwana abhelekwe na bhakongwe bhangwana." **31** Kwa nneyo ashaalongo ajangu, uwe nngabha bhana bha bhakongwe bhatumwa, ikabheje bhana bha bhakongwe bhangwana.

5 A Kilishitu bhashikutugombola kopoka muutumwa nkupinga tubhe tubhangwana kaje. Bhai nnjimangane ukoto nnaibhikanje kabhili muutumwa. **2** Mpilikananje, nne a Pauli ngunakunnugulilanga kuti, nkali nnjalukangaga nngabha kuti a Kilishitu shibhannjangutilanje shindu. **3** Kabhili nguti nnei, mundu jojowe apingaga kujaluka papinjikwa kukagulila Shalia jowe ja a Musha. **4** Bhai monaga nnapinganga mmonekanje mmambonenji nkukagulila Shalia ja a Musha, bhai penepo nshikwiembuyanga na a Kilishitu, numbe gwangali nema ja a Nnungu. **5** Pabha uwe tunakulupalila kupegwa aki jetu kwa ngulupai ya Mmbumu jwa a Nnungu. **6** Pabha kujaluka na ungajaluka nkulundana na a Yesu Kilishitu, kukajenjesheya shindu, ikabhe shindu sha mmbone ni kukola ngulupai jiikamula liengo nkupingana. **7** Pakuti mwatendaga kagulilanga ukoto! Bhai gani ang'ibhililenje nnakundanje ya kweli. **8** Bhantendilenje

nneyo, nngabha a Nnungu bhanshemilenje. **9** Gene majiganyo ga unamiga ni malinga ngedule shishoko shikombola kushashamiya utandi gwanngwinji! **10** Nne ngunakulupalila kuti nkulundana na Bhakulungwa bhetu, nkailundanga na ng'aniyo ina ikalandana na yangu. Ikabhe jwene akunshumbuyangajo, shaukumulwe nkali abhe gani. **11** Kwa nneyo ashaalongo ajangunji, ibhaga ntenga gungunnungushiyanga gunataya indu ya jaluka, bhai, kwa nndi ngunashumbuywa? Monaga nneyo, ntenga gungulunguya ga ligongo lya nshalabha gwa a Yesu ukankole shigwegwe. **12** Bhakunshumbuyangabho mbaya bhakaiunilenje ntonga ashayenenji. **13** Mmanganyanji ashaalongo ajangunji, kunshemwilwenje kuungwana. Ikabheje gwene ungwanago unabhe shiumilo sha mundu kukagulila indu yapinga nyene, ikabhe nnjangutane kwa pingana. **14** Pabha shalia yowe ya a Musha ishikamulilwa na lilobhe limo, numbe alino. "Mumpinje nnongo nnjenu malinga shinkwiipinga mmayene."

15 Ikabheje nnumanangaga na taunana malinga bhannyama, mwiteiganje nnabhalagananga mwashaayenenji! **16** Bhai nguti nnei, itendi yenunji ilongoywe naka Mbamu jwa a Nnungu, penepo nkakagulilanga ilokoli ya shiilu. **17** Pabha ilokoli ya shiilu inakanana naka Mbamu jwa a Nnungu, najwalakwe Mbamu anakanana na ilokoli ya shiilu, pabha yenei inakanana, nikuntendanga nnakombolanje tenda inkupinganga.

18 Ikabheje nnongoywangaga naka Mbamu jwa a Nnungu, bhai nkalongoywanga kabhili na Shalia ja a Musha. **19** Bhai itendi ya shiilu ilimanyika numbe ni aino, kulabhalabha na jajaatika na kwetela, **20** kutindibhalila yanamu na uwabhi na lupimililo na mpwai na shilokoli na nnjimwa na shienga na mitau na lekana **21** shipepo na nnjimwa na kushumiya indu

ya unami na kukolelwa na kudoka na itendi ina ilandana na yeneyo. Kwa yeneyo ngunakummalanjilanga shangupe, malinga shinammalanjilenje kuti, bhandu bhatendanga itendi ya nneyo, bhakajinjilanga muupalume gwa a Nnungu. **22** Ikabheje shiepo shika Mbamu jwa a Nnungu ni, kupingana na kuangalala na ulele na kwiiluma ntima na uguja na ntuka na kulupalika, **23** kwitimalika na kwiiluma ntima. Kupunda genega, jakwa Shalia ja a Musha jikanana na genega. **24** Na bhalinginji na a Yesu Kilishitu bhashilimbiyanga iilu yabhonji inakunde ng'aniyo yangali ya mmbone na ilokoli ya nyata. **25** Tutamaga nkulongoywa na Mbamu jwa a Nnungu, na tukamule genego gutulongoywa naka Mbamu jwa a Nnungu. **26** Bhai tunaipune akuno tulitandubhana na bhonelana.

6 Ashaalongo ajangu, nnjenunji alebhaga, mmanganya nkulongoywanga naka Mbamu munnjangutilanje analerbhe kabhili, ikabheje ntendanje nneyo kwa kwitimalika akuno nnikwiiteiganga, nngakabha na mmanganyanji nnalingwanga. **2** Nnjangutanane nshilaje shenunji, pabha kwa tenda nneyo shinkamulanje shalia ja a Kilishitu. **3** Pabha mundu aibhonaga kuti jwa mmbone, mbena nngabha jwa mmbone, anakwiitemba muntima gwakwe nnyene. **4** Ikabheje mundu ailole ndamo yakwe nnyene. Kwa nneyo. Abhaga jwa mmbone, bhai, penepo aiiniye muntima gwakwe nnyene, na nngabha kwa kwiilinganya na ashaajakwenji. **5** Pabha kila mundu shakaitagulile nnyene kwa a Nnungu. **6** Bhai ajiganywa malobhe ga a Nnungu, anapinjikwa kwaagabhila mboka yashaipate, bhaajiganya bhakwe. **7** Nnatembwanje, a Nnungu bhakatendelwa mbenji, pabha shoshowe sha panda mundu, shaneng'ene shosho. **8** Pabha jojowe apanda indu ilokolilwa na shiilu, shaneng'ene kuangabhanika, ikabhe jwene

shapande ili Mmbumu jwa a Nnungu, shaneng'ene gumi gwa pitipiti. (aiōnios g166) **9** Bhai, tunatotoshele kutenda indu ya mmbone, pabha tukawe ntima shituneng'ene mobha gakwe gaishilaga. **10** Kwa nneyo, mobha gowe putukola shindu twaajangutilanje bhandu bhowe, na kaje ashaalogo ajetunji bha ngulupai imo na uwe. **11** Nnolanje shinjite jandika kwa kuya majandiko kwa makono gangu namwene. **12** Bhowe bhapinganga bhabhonekanje bhammbone, kwa indu ya nshiilu ni bhakunshishilishiyanga nnjalukanje. Bhanatendanga nneyo nkupinga bhanashimwanje kwa ligongo lya nshalabha gwa a Kilishitu. **13** Pabha nkali ashaayenenji bhajalukenjebho, bhakakagulilanga Shalia ja a Musha, ikabhe bhanapinganga mmanganyanji nnjalukanje, nkupinga bhaishumiyanje ga jaluka kwenunji. **14** Ikabheje nne, ngakwiiniya kwa shoshowe, ikabhe ga nshalabha gwa Bhakulungwa bhetu a Yesu Kilishitu, pabha kwa ligongo lya gwene nshalabhago, shilambolyo shishiwa kwa ligongo lyangu, na nne njija kwa ligongo lya shilambolyo. **15** Pabha kujaluka eu ungajaluka nngabha shindu shammbone, shili shammbone, ni mundu kubha jwa ambi. **16** Nguna kwaapinjilanga ulele bhowe bhaakagulilanga genego, ulele na shiya sha a Nnungu bhapatanje Bhaishilaeli bha a Nnungu. **17** Bhai, tandubhila nnaino mundu jojowe anang'abhuye, pabha nshiilu shangu njijandika lulembo lwa a Yesu. **18** Ashalongo ajangunji, nema ja Bhakulungwa bhetu a Yesu Kilishitu jitame mmitima jenunji. Amina.

Bhaepheso

1 Nne a Pauli ntume jwa a Yesu Kilishitu, kwa pinga kwabho a Nnungu, ngunakunnjandishilanga mmandunji bha ukonjelo nninginji ku Epesho, nkwaakulupalilanga a Yesu Kilishitu.

2 Ngunakumpinjilanga nema na ulele gwa Atati a Nnungu na ku Bhakulungwa a Yesu Kilishitu. **3** Bhalumbililwe a Nnungu, Atati bha Bhakulungwa bhetu a Yesu Kilishitu! Pabha nkulundana na a Kilishitu, bhashikutupa mboka ya kila namuna ya muntima ikopoka kunnungu. **4** Malinga shibhatuagwile tubandu bha ukonjelo kwa lundana kwetu na a Kilishitu, shilambolyo shikanabhe panganya, nkupinga tubhe tubhaukonjelo, na tunakole sha gambwa pa meyo gabho kwa nonyelwa na pinga kwabho bhayene. **5** A Nnungu bhashinkutandubha kutuagula, nkupinga tubhe ashibhana bhabho kupitila a Yesu Kilishitu, malinga shibhapinjile na kuengwa kwabho bhayene. **6** Bhai twainiye a Nnungu kwa ligongo lya ukonjelo gwa nema jabho, jibhatupele kupitila kuka mwanagwabho jubhampinjile! **7** Pabha kupitila shiwo sha a Kilishitu uwe tushigombolwa, yani yambi yetu ishileshelwa. Malinga shigushitebha ukulungwa gwa nema jabho. **8** Bhashinkutushulushiya yeneyo kwa lumanyio lowe na lunda lwabho. **9** A Nnungu gubhatendile tuimanye ya nng'ijo kwa pinga kwabho, malinga shibhatumbilile bhayene kutenda, kupitila kwa a Kilishitu. **10** Yani kubhika ukulungwa pushigamalile mobha gakwe, na kuibhika indu yowe pamo, ya kunnungu na ya pashilambolyo pa mashili ga a Kilishitu. **11** A Nnungu bhashipinga kila shindu shibhapinjile shitendeshe, bhenebho bhashikutuagula nkulundana kwetu na a Kilishitu nkupinga tubhe tubhandu bhabho. **12** Bhai uwe Tubhayaudi, tulongolele kwaakulupalila a Kilishitu, tunapinjikwa kwainiya a

Nnungu kwa ukonjelo gwabho! **13** Na mmanganyanji mmandunji bha ilambo ina, mwapilikenenje ntenga gwa kweli gwa Ngani ja Mmbone, malobhe ga mmbone ga ntapulo gwenunji, gumwaakulupalilenje a Kilishitu na bhalabho a Nnungu nkupinga languya kuti mmanganyanji ni bhabho, gubhampelenje Mbumu jwa a Ukonjelo jwa miadi. **14** Jwene Mbumujo ni ngamulo ya poshela gowe gubhalajile a Nnungu kubhandu bhabho, nkupinga kwagombolanga bhowe bhalinginji bhabho. Tuguiniye ukonjelo gwabho! **15** Kwa nneyo ngapilikaneje ga ngulupai jenunji ku Bhakulungwa a Yesu na kwaapinganga kwenunji bhandunji bha ukonjelo, **16** bhai, na nne ngalibhala kwaatendela ej a Nnungu kwa ligongo lyenunji, ngunakunkumbushilanga nkujuga kwangu, **17** nkupinga a Nnungu bha Bhakulungwa bhetu a Yesu Kilishitu, Atati bha ukonjelo, bhampanganje ntima gwa lumanyio na munng'ibhulo gwa kwaamanya bhenebho. **18** Ng'aniyo ya mmitima jenunji ibhe na shilangaya, nkumanyanje ukoto kushemwa kwenunji nkwaakulupalila bhenebho, shikushitebha na gwinji gwa ulishi gwa ukonjelo gwa bhandu bha a Nnungu, **19** numbe nngumanyanje ukulu gwa ukonjelo na mashili shigushitebha kwa ligongo lyetu tukwaakulupalila, malinga shiili itendi itendeka kwa mashili gabho, **20** gubhatendile kwa a Yesu Kilishitu pubhaayushiye nikwaabhika ku nkono gwabho gwa nnilo kunnungu. **21** A Yesu bhanatagwala numbe ni bhakulungwa kupunda bhapalme bhowe bhatagwalanga kunani na mashili gowe na mena gowe, nngabha ga pa shilambolyo pepano na nkali ku shilambolyo shikwiya. (aiōn g165) **22** A Nnungu gubhabhishile indu yowe kwa mashili gabho, nikwaabhika bhabhe bhakulungwa bha indu yowe kwa ligongo lya bhandu

bha a Nnungu. **23** Likanisha ni shii lu sha a Kilishitu na lyenelyo ni kutimilila kwa a Kilishitu bhaatenda indu yowe itimilile.

2 Mmanganyanji mwashinkuwanganga kwa ligongo lya yambi yenunji. **2** Yeneyo imwatendangaga bhukala nkukagulila ikubho ya pa shilambolyo pano, nnikunkagulilanga nkulungwa jwa mashili ga maoka ga kumaunde, lioka atagwala bhandunji bhakakwaakundanga a Nnungu. (aiōn g165) **3** Numbe nkali tubhowe uwe, bhukalago putwaaliji malinga bhanganyabho, tulitenda indu ilokolilwa na shii lu, tulikagulila ilokoli ya lunda na shii lu, nibha bhana bha nnjmwa ja a Nnungu malinga bhananji. **4** Ikabheje a Nnungu bhashikola shiya sha kaje na bhanakutupinga kwa punda, **5** nkali putwaliji tuwile muilebho yetu, gubhatuyushiye pamo na a Yesu Kilishitu, yani, tushitapulwa kwa nema ja a Nnungu. **6** Nkulundana kwetu na a Yesu Kilishitu tushiyuya pamo na bhenebho, nkupinga tukatagwale na bhenebho muupalume gwabho. **7** Nkupinga kwa mobha gakwiyago, bhalanguye nema jabho gwangali mpelo kwa uguja gwabho gubhakutupa uwe nkulundana na a Yesu Kilishitu. (aiōn g165) **8** Pabha tushigombolwa kwa nema ja a Nnungu kwa ngulupai. Genega gangatendeka kwa tumbilila kwenunji, ikabhe kwa nema ja a Nnungu. **9** Numbe nngabha kwa itendi yenunji mwashayenenji, mundu anakole shakwiiniya. **10** Pabha uwe iumbe ya a Nnungu, kwa lundana kwetu na a Yesu Kilishitu, bhashinkutupanganya nkupinga tutende ya mmbone, ibhatubhishile a Nnungu kuumila bhukala tuitende. **11** Kwa ligongo lya genego, nkumbushilanje kuti mmanganyanji bhukalago, pumwalinginji bhandu bha ilambo ina, pumwashemwangaga bhalenje, na Bhayaudi pubhashemwangaga bhajalukene, yani kujaluka kwa nshi ilu kutendeshe kwa makono ga bhandunji. **12**

Gene mobha gala nkalinginji tome na a Kilishitu, pumwalinginji kwataliya na nkumbi gwa Ishilaeli, bhajeninji bhangalinginji malagano ga malajilo gala. Mwaibheelenje bhandu bhangalinji sha kulupalila shoshowe, bhandu bhakakwaamanyanga a Nnungu. **13** Mmanganyanji mwatalikengenenje na a Nnungu, nnaino nshilundanywanga kwa minyai jabho a Kilishitu. **14** Pabha a Kilishitu bhayene bhashikutupeleshela ulele, ni kututenda tubhe shindu shimo Bhayaudi na bhangabha Bhayaudi. Kwa shiilu shabho gubhabhomwele likumba lyatugebhenye nibhoneka mbuti bhamagongo. **15** Gubhashoshiye shalia ja a Musha na amuli yakwe na ibagu yakwe, nkupinga bhaatamikanje pamo bhene bhalinginji makundi gabhili kwa nneyo gubhatendile ulele. **16** Kwa shiwo shabho munshalabha, a Kilishitu gubaatamikenje pamo, makabhila gabhili nibha shindu shimo nikwaabhujanabhonji kwa a Nnungu. **17** Bhai, a Kilishitu gubhaishe kuulunguya Ngani ja Mmbone ja ulele kwenu mmanganyanji mwalinginji bhandu bha ilambo ina nkaabbandishilenjeje a Nnungu, ulele gubhe na Bhayaudi bhalinginji tome na a Nnungu. **18** Pabha kwa ligongo lya bhenebho, uwe tubhowe Bhayaudi na bhangabha Bhayaudi tunakombola kwaabbandishila Atati, Mmbumu jumo. **19** Bhai, kuumila nnaino, mmanganyanji nngabha mmajeninji eu bhapitanga mpanda, ikabhe mmashilambo pamo na bhandunji bha ukonjelo, bhandu bha likaja lya a Nnungu. **20** Punninginji malinga nyumba jishenjilwe ukoto na mitume na ashinkulondola bha a Nnungu na a Yesu Kilishitu bhayene ni liganga likulu lya pandumba. **21** Nkulundana na Bhenebho nyumba jowe jinakamulana nibha mbuti liekalu lya ukonjelo lya Bhakulungwa. **22** Nkulundana na a Yesu Kilishitu, na

mmanganyanji nnashimilikwanga pamo na bhananji, mmanganje ndamo ja a Nnungu kuitila Mbumu jwabho.

3 Kwa ligongo lya genego, nne a Pauli, nankutabhwa jwa a Yesu Kilishitu kwa ligongo lyenu mmanganyanji nninginji bhandu bha ilambo ina. **2** Nimumanyi kuti mpilikenenje kuti a Nnungu, kwa nema jabho bhashinkungamuya lyene liengoli ndende kwa ligongo lyenunji, **3** kuti njinkuibhulilwa yene ya ng'iyoyo, malinga shinongolele jandika kwa malobhe gashoko. **4** Na nshomangaga genego, shimmumanyanje shinguti kwiiimanya indu ya nng'yo ya a Yesu Kilishitu. **5** Gwene nng'iyogo bhangalugulilwanga bhandunji bha ibheleko ina, ikabhe nnaino bhashiibhulwanga mitume na bhaalondolanga bha ukonjelo bha a Nnungu kwa Mbumu jwabho, **6** kuti bhandu bha ilambo ina ni bhalishi pamo na uwe, bha ulishi gumo na shiilu shimo na bha ulongo gumo na uwe kwa malagano gabho kuitila a Yesu Kilishitu kwa Ngani ja Mmbone. **7** Njitendwa ntumishi jwa Ngani ja Mmbone, kwa ntuka gubhambele a Nnungu kwa mashili gabho. **8** Nne ni jwanshoko kupunda bhandunji bhowe bha ukonjelo, ikabheje njipegwa ntuka gwabho, nkupinga kwaalungushiyanga bhandunji bha ilambo ina, gwinji gwa indu yabho a Kilishitu shigushitepunda. **9** Naatendanje bhandunji bhowe bhajimanyanje ngani ja nng'yo ja gwene ukulungwa. A Nnungu bhapengenye indu yowe bhashinkuiya kuumila bhukala, (aiōn g165) **10** nkupinga nnaino, kuitila likanisha, lunda lowe lwa a Nnungu, lumanyishe kubhowe bhakwetenje mashili bha pa shilambolyo bha kunnungu. **11** Malinga shibhapanjile bhayene, nng'aniyo yabho kuumila bhukala na ya pitipiti kuitila a Yesu Kilishitu Bhakulungwa bhetu. (aiōn g165) **12** Kwa lundana kwetu na a Kilishitu na nkwaakulupalila, tunakombola kwaajendela a Nnungu kwa

makangala na ungwana. **13** Bhai nnawanganje ntima ga mboteko yangu ingupata kwa ligongo lyenunji, pabha yenei ni kwa ukunjelo gwenunji. **14** Kwa ligongo lya genego ngunakwaatindibhalila kwa malungo Atati, **15** pabha bhenebho kwa lina lyabho, ulongo gowe gwa pa shilambolyo na gwa kunnungu unalugulwa, **16** Ngunakwaajuga a Nnungu kwa gwinji gwa ukunjelo gwabho, bhampanganje mashili ga kwiishimilika mmunda kwa Mbamu jwabho. **17** A Kilishitu bhatame mmitima jenunji kwa ngulupai. Ngunakwaajuga nkolanje nnjiga nkupingana, **18** nkupinga mmanganyanji na bhandu bhowe bha ukunjelo nkumanyanje kupinga kwabho a Kilishitu, shiukujenela kwa uleu na uupi, shanga na kujendeya, nngumbaywanje kwa kaje utimililo gowe gwa a Nnungu. **19** Na nkumanyanje kupinga kwabho a Kilishitu kupunda lunda lowe shikushitebha, nngumbaywajwe kwa kaje kutimilila kowe kwa a Nnungu. **20** Bhai, bhalumbililwe bhenebho bhaakombola tenda indu yowe ya kanganigwa, ipunda indu yowe itujuga eu itukwiganishiya, shigali mashili ga kamula maengo nkati jetu, **21** numbe bhalumbililwe nnikanisha na kwa a Yesu Kilishitu, ibheleko yowe pitipiti na pitipiti! Amina. (aiōn g165)

4 Kwa nneyo, nne nankutabhwa kwa ligongo lya kwaatumishila Bhakulungwa, ngunakunshondelesheyanga, itendi yenunji ilingane na nshemo gunshemelwenje. **2** Mobha gowe mwiiitalikanje, nnakolanje nnjimwa na mwiielmanje ntima na pingana. **3** Nntumbilanje kugoya shilongani shika Mbamu na lundana kwa ulele. **4** Shipali shiilu shimo na Mbamu jwa a Nnungu jumo, malinga kulupalila kunshemelwenje na a Nnugu shikuli kumo. **5** Bhakulungwa bhamo, ngulupai imo, na ubhatisho gumo. **6** Bhapali a Nnungu bhamo ni Atati bha bhowenji, bhalibhakulungwa bha yowe na bhaatenda gowe

na kwa kila shindu. **7** Ikabheje kila mundu munkumbi gwestu
ashipegwa nema malinga shashite pimilwa na a Kilishitu. **8**
Malinga Majandiko ga Ukonjelo shigalugula, "Pubhanyakwilwe
kunani kunnungu, bhashinkutola bhaatabhwa bhabhagwinji,
nikwapanganga bhandunji ipaji." **9** Bhai, gene malobhe
gakuti, "Bhashinkunyakulwa kunani," Malombolelo gakwe nndi?
Ibhaga nngabha kuti, bhashinkutandubha kutuluka pai pa
shilambolyo? **10** Bhai, bhene bhatulwishes pa shilambolyo, ni
bhabho bhanyakwilwe kwenda kunnungu kunani kaje, nkupinga
bhashigumbaye shilambolyo. **11** Kwa nneyo gubhaatendilenje
bhananji babbhanganje, mitume na bhananji bhaalondola bha
a Nnunu na bhananji bhaalunguya na bhananji bhaashunga
na bhaajiganya. **12** Bhashinkutenda nneyo ligongo lya
kwashimilikanga bhandunji bha ukonjelo, nkupinga liengo
litendeshe, nkupinga shiilu sha a Kilishitu shikule, **13** nkali
uwe tubhowe pushituishile shilongani shimo sha nngulupai
na kummanyia kaje Mwana jwa a Nnunu, nkali kuishimilika
na ishila timilika malinga a Yesu Kilishitu bhayene. **14**
Nkupinga tunabhe kabhili mbuti bhana bhashoko, tulipelekwa
na pepeluywa akuno na kukuno na mbungo ja majiganyo ga
bhandunji bha unami nkupinga kwaapuganyanga bhananji kwa
unami. **15** Ikabheje tulugulilanaga ya kweli kwa ntima gwa
pingana, shitukule kwa kila shindu malinga shiili kwa a Kilishitu
bhali kalongolele, **16** tulundanaga na bhenebho shiilu showe
shinakmulana shilitagwa mashili nkujangutilwa na ibhalo ina.
Bhai, kila shibhalo shikmulaga liengo lyakwe, shiilu showe
shinakula nkupingana. **17** Bhai, kwa lina lya Bhakulungwa,
ngunakunneyanga nnatamangane malinga bhandunji bha
ilambo ina, bhaatamangana nng'aniyo yangali ya mmbone,

18 na lunda lwabhonji lushigumbala lubhindu, kwa nneyo bhashitalikangananga na gumi gwa a Nnungu, kwa ligongo lya ungumba guli mmitima jabhonji na mitau jabhonji. **19** Bhashipuganikanga mitima jabhonji na wala oni, bhalipunda kwiiibhikanga nnukukwetela na bhatendanje indu ya nyata. **20** Ikabheje mmanganyanji mwangaijiganya nneyo ga a Kilishitu.

21 Ibhaga mwapilikenerje ukoto ngani jabho, na jiganywa ga kweli ga a Yeshu, **22** bhai nnekanje itendi yenunji ya bhukala, yani gundu gwa bhukala guangabhanyika kwa kwiiagulila ilokoli itemba. **23** Kwa nneyo ntendwanje mmaambi nng'aniyo ya mmitima jenunji. **24** Nng'walanje gundu gwaambi, upengenyewe shi Nnungu kwa aki na ukonjelo gwa kweli. **25** Bhai nnekanje unami, mmeleketanje ya kweli kila mundu naka mundu mwine, pabha kila mundu anakunkulupalila mwine. **26** Nnalebhanje kwa ligongo lya nnjimwa, lyubha linatitimile nnjimwa ikanabhe kunshokanga. **27** Wala nnanng'ugulilanje Lishetani nnango. **28** Nngwii anajibhe kabhili, ikabhe, akamule liengo lyambone kwa mashili gakwe nnyene, nkupinga akole shindu sha kunngabhila nkulaga. **29** Lilobhe lyolyowe lyangali lya mmbone linakoposhe nkang'wa yenunji, ikabhe lilobhe lyambone lya kumpwaa nkulaga, nkupinga lyaapanganje nema bhakulipikananga. **30** Wala nnammulayanje kuinjika Mbumu jwa Ukonjelo, pabha jwenejo ni lulembo lwa a Nnungu lunnembwilwenje lubhe shilangulo shenunji mpaka lyubha lya gombolwa. **31** Bhai, nnekanje magongo na nnjimwa na tumbala na njobhela na matukano, nkali yangali ya mmbone inapilikanishe kwenu mmanganya. **32** Nkolanje ntima gwa mmbone na gwa bhonelana shiya, nneshelelanje mmashayenenji, kila mundu anneshelenele nnjakwe malinga a Nnungu shibhanneshelenje mmanganyanji kupitila a Kilishitu.

5 Kwa nneyo, mwalandanje a Nnungu pabha mmanganyanji
nshibhanganga bhana bhapingwanga na bhenebho, **2**
Nntamangane kwa pingana malinga shibhampinjilenje a Kilishitu,
kwa ligongo lyetu bhashinkwishoya bhayene mbuti mbepei
inunjila ikwanonyela a Nnungu. **3** Pabha mmanganyanji
nshibhanganga bhandu bha ukonjelo, bhai ya labhalabha na
ya nyata eu ya shienga inapilikanishe munkumbi gwenunji.
4 Na kabhili malobhe ga oni eu ibheleketo ya shingumba na
mitau, yeneyo ikampwaanga, ikabhe malobhe ga kwatendela
eja a Nnungu genego shigampwaanje. **5** Mmumanyanje kuti
jwakwa alabhalabha eu atenda ya nyata, eu akwetela, mundu
jwa kwetela indu analandana naka mundu akwiitindibhalila
yanamu, akakola ulishi mu muupalume gwa a Yesu Kilishitu
na a Nnungu. **6** Nnakundanje tembwa naka mundu kwa
malobhe gangali mana, pabha kwa yene ilebhoyo, nnjimwa ja
Nnungu jinakwajilanga bhandu bhowe bhakakaakundanga a
Nnungu. **7** Bhai, nnatendanje shilongani na bhanganyabho.
8 Pabha bhukala mmanganyanji pumwalinginji nnubhindh Iwa
yambi, ikabhe nnaino nshibhsnganga nshilangaya sha lumanyio
nkulundana na Bhakulungwa. Ntamangananje mbuti bhana
bha shilangaya, **9** pabha ikoposhela nshilangaya ni ntima gwa
mmbone na aki na kweli, **10** nkagulilanje yeneyo ni ikwanonyela
Bhakulungwa. **11** Wala nnatendanje shilongani na itendi ikapwaa
ya nnubhindh, ikabhe nnaiyanje, **12** Pabha itendekwa kwa
nng'yo nkali kuitaya inabha oni. **13** Ikabheje yowe itendwa pa
shilangaya, inabhoneka, **14** pabha shilangaya ni shitenda indu
ibhoneshe. Kwa nneyo tukuti, "Nnjumushe mmwe muubhelu gwa
yambi, nkole lumanyio Iwa kwaamanya a Nnungu, na bhalabho
a Kilishitu shibhannangashiye." **15** Bhai mwilosheyanje

shinkuti tamangananga. Nnatamangananje mbuti mabhelu, ikabhe malinga bhakwetenje lunda, **16** Ntendelanje ukoto malanga, pabha mobha ga nnaino gano ga ya nyata. **17** Kwa nneyo, nnabhanganje mabhelu, ikabhe mwimanyanje indu ikwanonyela Bhakulungwa. **18** Kabhili nnakolelwanje ukana, pabha shigumpuganyanje, ikabhe nngumbaywanje Mbumu jwa a Nnungu, **19** mmeleketanje malobhe ga shabhuli na nyimbo ya muntima, akuno nnijimbanga na kwaangalila Bhakulungwa mmitima jenunji; **20** Nnikwatendelanga eja a Nnungu Atati, mobha gowe kwa ligongo lya indu yowe, kwa lina lya Bhakulungwa bhetu a Yeshu Kilishitu. **21** Kila mundu ankunde nnjakwe kwa ligongo lya a Yeshu Kilishitu. **22** Bhanabhakongwe, bhaakundanje ashimbuje bhabhonji malinga shitukwaakunda Bhakulungwa bhetu a Yeshu. **23** Pabha jwannume ni kalongolele juka nkagwe, malinga a Kilishitu nabhalabho shibhali a kalongolele bha likanisha, nabhalabho a Kilishitu ni Bhaatapula bha likanisha lili shiilu shabho. **24** Ikabheje malinga likanisha shilikwaakunda a Kilishitu, nneyo peyo na bhanabhakongwe bhaakundanje ashimbuje bhabhonji kwa indu yowe. **25** Numbe mmanganyanje mmanabhalume, mwaapinganje ashaakongo bhenunji, malinga na bhalabho a Kilishitu shibhalipinjile likanisha, nikwiishoya mbepei kwa ligongo lyakwe. **26** Bhashinkutenda nneyo nkupinga kwa lilobhe lyabho, bhalikonjeleye likanisha kwa ligongo lya a Nnungu kwa mashi na lilobhe, **27** nkupinga bhalipate likanisha likwete ukonjelo, lyangali lilembwani, wala ngwinyai yoyowe, ikabhe libhe lya ukonjelo. **28** Bhai, bhanabhalume bhanaapinjikwanga kwaapinganga ashaakongo bhabhonji malinga iilu yabhonji ashayenenji. Pabha akumpinga nkagwe, anakwiipinga nnyene. **29** Jwakwapi mundu

akushishima shii lu shakwe, ikabhe anakushiliya na kushigoya na kushiwasha. Mbuti nabhalabho a Kilishitu shibhakuti kulitendela likanisha. **30** pabha uwe ni ibhalo ya shii lu shabho. **31** Kwa lyene ligongolyo, jwannume shabhalekanje ainagwe na akwabhe, nilundana naka nkagwe na bhene bhabhilibho shibhabhanganje shii lu shimo. **32** Upali nng'yo kwa gene malobhego, ikabhe nne ngunabheleketa ga ngani ja a Kilishitu na likanisha. **33** Kwa nneyo kila jwannume ampinje nkagwe malinga shiikupinjikwa na wala jwankongwe analeshe kunkunda mmbujegwe kwa indu yowe.

6 Mmanganyanji mmana, malinga Bhakilishitu nnapinjikwanga mwaakundanje bhankwetenje, pabha yeneyo ni ya mmbone. **7** Gwaishimiye ainago na akwenu, pabha jeneji ni amuli jilongolela kubha na malagano gakuti, **8** "Mpate mboka na tama mobha gamagwinji pa shilambolyo." **9** Na mmanganyanji ashainamundu, nnataandubhanganje ashibhana bhenu, ikabhe mwalelanje kwa ishma na mmajiganyo ga shi Kilishitu. **10** Na mmanganyanji mmatumwa, mwaakundanje bhakulungwa bhenunji bha pa shilambolyo pano, kwa kwaajogopanga na ungu mila, ntendanje nneyo kwa ntima gwa uguja, mbuti nnakwakamulilanga liengo a Kilishitu. **11** Wala nngabha malinga utumwa gwa kwilanguya mmonekanje mbuti bhandu bhakwiikonjeleyanga ku bhandunji, ikabhe malinga bhatumwa bha a Kilishitu nnikamulanga maengo ga kwaanonyela a Nnunu kwa ntima gowe. **12** Kwa ntima gwa mmbone malinga kwaakamulila liengo Bhakulungwa a Yesu na nngabha bhandunji. **13** Mmumanyanje kuti kila mundu atenda ya mmbone abhe ntumwa eu nngwana, shapate upo na Bhakulungwa. **14** Na mmanganyanji mmakulungwanji, mwaatendelanje bhatumwa

bhenunji gogo pego, nnekanje kwaajogoyanga. Mmumanyanje kuti na mmanganyanji malinga bhanganyanjibho, mmowe Bhakulungwa bhenunji kubhali kunnungu, na bhenebho bhangali luagu. **10** Kungai, ngunakumpinganga mpundanje kwiishimilika nkulundana na Bhakulungwa na kwa jangutilwa na mashili gabho makulu. **11** Nng'walanje ikomanilo yowe ya a Nnunu, nkupinga mwuikananje ila ika Lishetani. **12** Pabha komana kwetu nngabha na bhandunji bha pa shilambolyo, ikabhe na ashimaoka bhaatamangana kunnungu pamo na bhakulungwanji na ukulungwa gwa pa shilambolyo sha lubhindu shino. (aiōn g165)

13 Kwa lyene ligongolyo nng'walanje ikomanilo yowe ya a Nnunu malinga linjola akwenda ku ngondo, nkupinga liishilaga lyubha lya yangali ya mmbone, nkomananje naka mmagongo nnjenunji, genego gamalilaga, mwiishimilikanje. **14** Bhai, nnjimangananje tayali, akuno nninginji mwitabhilenje nshipi gwa kweli mwigunu yenunji, na pa ntima nng'walanje nkogo gwa aki, **15** na lilaka lya lunguya Ngani ja Mmbone ja ulele, libhe mbuti ilatu mmakongono genunji, **16** pamo na gene gowego, ngulupai ibhe shindu sha kwiibhila pugaika maonga gowe ga moto gaka Lishetani jula. **17** Numbe mposhelanje ntapulo malinga kopiya muntwe na lilobhe lya a Nnunu mbuti upanga gunkupegwanga naka Mbamu jwa Ukonjelo. **18** Nnjuganje Nnunu mobha gowe, nnijangutilwanga naka Mbamu. Nsheyanje gwangali totoshela nkujuga kwa ligongo lya bhandunji bhowe bha ukonjelo. **19** Nnyujilanje na nne, nkupinga pungubheleketa ga a Nnunu, mbate shindu sha bheleketa, naalungushiyanye bhandunji kwa mashili, ya nng'iyo ya Ngani ja Mmbone. **20** Nne ntume, kwa ligongo lya jene Ngani ja Mmbonejo nkali ndabhwile ino. Bhai nnjuganje nkupinga ngole mashili nkulunguya malinga shingupinjikwa. **21** Bhai, nkupinga

na mmanganyanji mmumanyanje puni bhuli, a Tikiko, apwanga bhaapingwa bhakamula liengo bhaakulupalika nkulundana na Bhakulungwa, shibhammalanjilanje indu yangu yowe nkupinga mmumanyanje ingutenda. **22** Ngunakwatuma kungwenunji nkupinga bhammadlanjilanje getu uwe na bhantaganje ntima. **23** Ashaalongo ajangu Mmakilishitu, ngunakumpinjilanga ulele na pingana na ngulupai ikopoka kwa a Nnungu Atati na ku Bhakulungwa a Yesu Kilishitu. **24** Ngunakwapinjilanga nema bhowe bhakwaapinganga Bhakulungwa bhetu a Yesu Kilishitu kwa pinga kwangali mpelo.

Bhapilipi

1 Nne a Pauli na a Timoteo, bhatumishi bha a Yeshu Kilishitu, tunakunnjandishilanga mmanganya bhandu bha ukonjelo bha ku Pilipi nnundenenje na a Kilishitu, pamo na ashikalongolele na bhatumishi bha likanisha. **2** Nema na ulele ikopoka kwa Atati a Nnungu na ku Bhakulungwa bhetu a Yeshu Kilishitu ibhe na mmanganyanji. **3** Ngunakwaatendela ej a Nnungu bhangu kila pungunkumbushilanga. **4** Kila pungunnujilanga mmowe, ngunajuga kwa angalala, **5** kwa ligongo lya nyangutila kwenunji nkulunguya Ngani ja Mmbone, kuumila lyubha lya tandubha lila, mpaka lelo. **6** Na nne ngunakulupalila kuti a Nnungu bhatandwibhe liengo lya mmbone mmitima jenunji, shibhapunde tenda na maliya mpaka lyubha lya bhuja a Yeshu Kilishitu. **7** Nneyo peyo, ngunaapinjikwa kunnganishiyanga mmanganyanji mmowe, pabha munninginji muntima gwangu. Numbe nshinyangutilanga na nkali nnaino ndabhlwe ino, na ata punaaliji nganabhe tabhwa, nnema jibhambele a Nnungu jila, ja bheleketela na kong'ondela Ngani ja Mmbone. **8** A Nnungu ni bhaakong'ondela bhangu, shinguti lokolila kummonanga malinga a Yeshu Kilishitu shibhampinjilenje kwa kaje. **9** Kujuga kwangu ni akuno, kuti, kupinga kwenunji kupunde jenjesheka kwa kaje nnunda na nnumanyiyo lowe, **10** nkupinga nng'agulanje indu ya mmbone. Penepo shimmanganje na mitima ja mmbone, gwangali gambwa shoshowe mpaka lyubha lya bhuja a Kilishitu. **11** Akuno nngumbeywenje indu ya mmbone, ishibhampanganje a Yeshu Kilishitu bhayene, kwa ligongo lya ukonjelo na iniywa kwa a Nnungu. **12** Bhai ashaalongo ajangunji, ngunapinga mmumanyanje kuti, gowe gambatile gala gashinkunyangutila nkujeneya Ngani ja Mmbone. **13** Kwa

lyene ligongolyo, bhalinda bhowe na bhandunji bhana bhowe
apano bhamumanyinji kuti, kutabhwu kwangu ni kwa ligongo
lya kwaatumishila a Kilishitu. **14** Bhai, kwa ligongo lya tabhwa
kwangu, kushikwaatendanga ashaalongo ajangunji bhabhagwinji
bhaakulupalilanje Bhakulungwa, mpaka nitumbililanga kulunguya
ntenga gwa a Nnungu gwangali bhoga. **15** Kweli, bhananji
bhanalunguyanga ngani ja a Kilishitu kwa ligongo lya lupimililo
na nngomo, ikabheje bhananji kwa ndumbililo ya mmbone. **16**
Bhakwetenje ndumbililo ya mmbone, bhanatendanga nneyo kwa
ntima gwa pinga, numbe bhamumanyinji kuti njitabhwa, pabha a
Nnungu bhashimba liengo lya bheleketela Ngani ja Mmbone. **17**
Ikabhe bhananji bhanakwalunguyanga a Kilishitu kwa nngomo
na wala nngabha kwa ntima gwa uguja, bhaliganishiyanga kuti,
shibhanyenjesheyanye mboteko nkutabhwa kwangu. **18** Igala
nndi! Nne ngunaangalala ibhaga bhandu bhanakwalunguyanga
a Kilishitu momowe mula, ibhe kwa ndumbililo ya mmbone eu
yangali ya mmbone. Kwa lyene ligongo lyo nne shing'angalale,
na shimbunde kuangalala, **19** pabha nimumanyi kuti kwa juga
kwenunji na kwa jangutilwa naka Mbamu jwa a Yesu Kilishitu,
gambatile gala shigapindikushe nibha ntapulo gwangu. **20**
Pungulanishiya na kulupalila kwangu kuti, ngatokamala nkutenda
liengo lyangu, ikabhe shingole makangala mobha gowe, na
kaje agano mobha gano, nkupinga kwa nkulama kwangu eu
nkuwa kwangu naape a Kilishitu kuishimika. **21** Pabha kwangu
nne, kulama ni a Kilishitu na kuwa ni pwaida. **22** Bhai monaga
kwa lama kwangu shingombole tenda liengo likwete pwaida,
bhai ng'agule nndi? Nne ngakushimanya! **23** Ngunalongwa indu
ibhili, ngunalokolila nijileshe ajino ndamo jino nijjendele ngatame
na a Kilishitu, pabha lyeneli ni lya mmbone kaje, **24** ikabheje

nonjeyaga kulama, ni sha mmbone kwenu mmanganyanji. **25**
Kwa kugamanya genega, nimumanyi kuti shimbunde kulama,
nonjeye na mmanganyanji, nkupinga mpundanje kwiishimilika na
angalala nngulupai. **26** Bhai shimwipunilanje nne, nkulundana na
a Kilishitu Yesu, pushimme na mmanganyanji kabhili. **27** Bhai
shindu shikulungwa, ndamo jenunji jibhe malinga shiipinjikwa
na Ngani ja Mmbone ja a Kilishitu, nkupinga ng'ikaga eu
ngaishe, mbilikane kuti nnakwiishimilika ukoto kwa ntima
gumo, na lundana nkukomana ngondo pamo, kwa ligongo ly
ngulupai ga Ngani ja Mmbone. **28** Nnaajogopanje ashaamagongo
ajenunji, nkolanje makangala, yeneyo shiibhe shilangulo
ukoto, kuti bhanganyanjibho shibhalepelanje na mmanganyanji
shinkombolanje, pabha a Nnunu bhayene shibhankomboyanje.
29 Pabha mmanganyanji nshipewanga nema ja kwaakamulila
liengo a Kilishitu, nngabha kwa kwaakulupalilape, ikabhe na
potekwa kwa ligongo lyabho. **30** Kwa nneyo nnongananje na
nne nkukomana ngondo. Ngondo jinjibhweninji nilikomana, na
launo ngunakomana, malinga shinkupilikananga.

2 Ibhaga, ndamo jenunji mwa a Kilishitu jilikumpanganga
mashili, ibhaga kupali kuangalala kokowe nkupingana na
Bhenebho, ibhaga kupali kulundana kokowe naka Mbamu
jwa Ukonjelo, na ibhaga gupali uguja gogowe na bhonelana
shiya. **2** Bhai, nkamilishanje kuangalala kwangu kwa kola
ng'aniyo imo, kipingana kumo, na ntima gumo, na tumbilila
kumo. **3** Nnatendarje shindu shoshowe kwa taukangana
eu kwa kwiipuna, ikabhe mwiitimalikanje mwaashayenenji,
kila mundu annganishiye nnjakwe kuti jwa mmbone kupunda
nnylene. **4** Mundu analoleye pwaida jakwe nnyene, ikabhe na
pwaida ja ashaajakwenji. **5** Nkolanje ng'aniyo mmitima jenunji

malinga ibhaakwete a Yesu Kilishitu. **6** Bhenebho kuumila kundandubho pubhaliji malinga a Nnungu, ikabheje kubha malinga a Nnungu, bhangatolelela kuti shindu shangakomboleka kuleka. **7** Ikabhe, kwa engwa kwabho bhayene, gubhaleshile yowe ibhakwete, gubhaitendile mbuti ntumwa, nibha malinga mundu. **8** Bhakabhonesheje malinga mundu, nikwiinyegaya na kunda mpaka kuwa, elo, kuwa munshalabha. **9** Kwa nneyo, na Bhalabho a Nnungu gubhaakweshiye kunani kaje, gubhaapele lina likulungwa kupunda mena gowe. **10** Nkupinga kwa lina lya ambi libhapegwilwe a Yesu, indu yowe ya kunnungu, na ya pa shilambolyo, na ya pai litaka, yaatindibhalile, **11** na kila mundu alumbe kuti, bhene bhaashemwa a Yesu Kilishitu ni Bhakulungwa, kwa ukonjelo gwa Atati a Nnungu. **12** Bhai ashaambwiga ajangunji, malinga shimwambilikanganaga mobha gowe punaliji na mmanganyanji, bhai nkali nnaino shini kwataliya shino, mpundanje kumbilikanila. Ntendanje liengo kwa ligongo lya kamilisha ntapulo gwenunji, kwa jogopa na ungumila. **13** Pabha a Nnungu ni bhaatenda liengo mmitima jenunji, nkunkomboyanga nkupinga ntendanje indu ibhapinga Bhayene. **14** Ntendanje indu yowe gwangali inginika na wala mitau, **15** nkupinga nnakolanje shilebho na mmanganje bha ndamo ja mmbone. Nkupinga mmanganje bhana bha mmbone bha a Nnungu bhangalinginji ila munkumbi gwa bhandu bhangalinginji bha mmbone na bhaobhilenje bha pa shilambolyo pano. Mmanganje shilangaya malinga shiikulangaya ndondwa kuliunde, **16** nnikwaalungushiyanga malobhe ga gumi. Na penepo nne shingole ligongo lya kwiiipuna lyubha lya kwiya a Kilishitu, shiimanyishe kuti liengo lyangu na tumbila kwangu nngabha kwayoyo. **17** Nkali gumi

gwangu ushoywaga nibha mbepei, pamo na ngulupai jenunji
jili mbepei kwa a Nnungu, bhai, ngunakuinonyela na angalila
na mmanganyanji mmowe. **18** Nneyo peyo, na mmanganyanji
nnapinjikwanga kwinonyela na angalila pamo na nne. **19**
Nkwaakulupalila Bhakulungwa a Yeshu, shinaatume a Timoteo
bhajiye kunngwenunji agano mobha pegano, nkupinga nndaganje
ntima pushimbilikane genu mmanganyanjipo. **20** Pabha nangali
mundu junu akwete ntima gumo na nne malinga bhenebho,
shibhajiye kunnolanga na kunnjangutilanga. **21** Bhananji bhowe
ibhaloleyanga ibhapinganga ashaayenenji, wala nngabha ya
a Yeshu Kilishitu. **22** Ikabheje mmanganyanji mwaamanyinji
a Timoteo shibhashite bhoneka, kuti bhashikamula liengo lya
lunguya Ngani ja Mmbone na nne, mbuti mwana naka nng'inagwe.
23 Bhai ngunakulupalila kwaatuma bhenebho kunngwenunji,
pene pushiniimanye ishindendelweyo. **24** Numbe namwene
nkwaakulupalila Bhakulungwa shinyie kunngwenunjiko nngabha
pa kabha. **25** Bhai ngunaganishiya kwaatuma kabhili apwanga
a Epapulodito kunngwenunji, bhakamula liengo na nne,
bhakomana ngondo ajangu, numbe ni bhantenga bhenunji na
bhanyangutile nne kwa indu inapinjile. **26** Pabha bhashikola
lilaka lya kwiya kunnolanga mmowe, ikabheje bhashiinjika
malinga shimpilikenenje kuti bhatendaga Iwala. **27** Kweli
bhashinkulwala kwa tome na kuwa, ikabheje a Nnungu
gubhaabhonele shiya, na nngabha bhenebhope, ikabheje na
nne gubhamonele shiya nkupinga ngunapunde injika, nkuinjika.
28 Kwa nneyo, ngunatumbilila kwa kaje kwaatuma kunngwenunji,
nkupinga pushimwaabhonanje kabhilipo nng'angalalanje, na
nne lipamba lyangu linjoshe. **29** Bhai, mwaaposhelanje kwa
angalala nkulundana na Bhakulungwa, na bhandunji bha nneyo

mwaishimiyanje, **30** pabha kwa ligongo lya liengo lya a Kilishitu pubhaliji tome na kuwa ni jogoya ndamo jabho, nkupinga bhanyangutile nne pumwalepelenje mmanganyanji, pabha mwalinginjiji kwa taliya.

3 Bhai ashaalongo ajangunji, nng'angalalanje nkulundana na Bhakulungwa. Nne ikandotoya kunjandishilanga indu ila pe ila, pabha shiimpwaanje mmanganyanji. **2** Mwiiteiganje na bhandunji bhaatendanga yangali ya mmbone, bhandunji bha malinga mbwa, bhaakomelesheyanga ga kwaapotekanga bhandunji, gwangali ligongo. **3** Pabha tujalwishe ukoto ni uwe, tukwaatindibhalila a Nnunu kwa Mbumu jwabho na kwipuna ga lundana na a Yeshu Kilishitu. Wala tukaakulupalila ga nshiilu. **4** Nkali nne mbingaga, ngunakombola kukulupalila ya nshiilu. Monaga apali mundu akwete ligongo lya kulupalila ya nshiilu, nne njipunda. **5** Nne punajalwishe lyubha lya nane ngabhelekweje, nne ni jwa a Ishilaeli kabhila ja a Bhenjamini, Nanng'ebhulania jwa Bhaebhulania, ga kagulila shalia ja a Musha, nne Nampalishayo, **6** natendaga tumbila kwa kaje mpaka nikulipoteka likanisha, na kwa ngani ja uguja gwa kagulila shalia ja a Musha, ngakweteje shilebho. **7** Ikabheje kwa indu inaganishiyaga ya mbwaa nne, njikwibhona nngabha shindu kupunda kwaapinga a Kilishitu. **8** Elo, nngabha genegope, ikabhe indu yowe ngunakwibhona nngabha shindu, kwa ligongo lya mmbone lya kwaamanya a Kilishitu Yeshu, Bhakulungwa bhangu. Kwa ligongo lya Bhenebho njileka kila shindu, nikwiibhona mbuti mai, nkupinga naapate a Kilishitu, **9** nilundana nabho kaje. Nne ngunakole aki jipatikana kwa kunda shalia. Ikabheje nnaino njikola aki pungwaakulupalila a Kilishitu, aki jikopoka kwa a Nnunu kwa ligongo lya ngulupai. **10** Shingupinga

naamanye a Kilishitu na kugabhabona mashili ga yuka kwabho, na kundikanywa mmboteko yabho nililandanywa nshivo shabho, **11** numbe nne ngulikulupalila kuti ng'waga shinyuywe. **12** Nngabha kuti njimaliya eu njitimilila, ng'oo! Ikabhe ngunatumbila ga mwanja nkupinga mbate shene shiindenda ngamulwe na a Yesu Kilishitu. **13** Mwashaalongo ajangunji, ngaganishiya kuti mbatile shenesho, ikabheje shingutenda shimo, ngunalibhala gapitile gala, nitumbilila gali mmujo. **14** Bhai, ngunatumbila na mwanja kuloya kundumbilile, nkupinga mbate upo injemelwe na a Nnungu kopoka ku nnungu, kupitila a Yesu Kilishitu. **15** Bhai, uwe tubhowe tukomele mmitima, uwe tugaranishiye genego, na ibhaga nnganishiyangaga muna, bhai a Nnungu shibhannanguyanje genego. **16** Bhai apano putuishile pano tunaleshelele, ikabheje tupunde kwenda mmujo. **17** Ashaalongo ajangunji, nngaguyanje ingutenda nne, na mwaalolanje bhene bhaakaguyanga gutunnjigenyenje gala. **18** Nammalanjilenje genego papagwinji, nnaino ngunakummalanjlanga akuno nilikopoka minyoi kuti, bhandu bhabhagwinji bhanatamangana mbuti bha magongo, bha shiwo sha a Kilishitu munshalabha. **19** Mpelo gwabhonji ni kuobha, na nnungu jwabhonji ni ilokoli ya shiilu, na bhanakwiipunilanga ya tokomala, ibhaganishiyanga ya pa shilambolyope. **20** Ikabheje uwe ushilambo gwetu kuuli kunnungu, koposhela kweneko tunakwaalolela kwa lilaka, Bhaatapula na Bhakulungwa bhetu a Yesu Kilishitu. **21** Bhaapingga tindiganya iilu yetu yangali mashili ino, nkupinga ilandane na shiilu shabho sha ukonjelo, kwa gene mashiligo shibhaibhishe indu yowe, ibhe muukulungwa gwabho.

4 Bhai ashaalongo ajangunji bhungumpinganga, ngunalokolila kummonanga kabhili, mmanganyanji nninginji kuangalala

kwangu, na shilemba shangu, bhai nnapinjikwanga kwiishimilika nkulundana na Bhakulungwa, mmanganya ashaambwiga ajangu. 2 Ngunakwaashondelesheyanga a Eudiya na a Shintike kuti bhaelewananje nkulundana na Bhakulungwa. 3 Na mmwe apwanga, ngunakumpinga mwaajangutilanje bhene bhanabhakongwebho, pabha bhashitendanga liengo lya lunguya Ngani ja Mmbone pamo na nne, na a Kelementi na bhatumishi ajanganji bhowe, bhene bhajandikwenje mena gabhonji nshitabhu sha gumi. 4 Bhai, nng'angalalanje nkulundana na Bhakulungwa mobha gowe, kabili nguti, nng'angalalanje! 5 Kwiitimalika kwenunji kumanyishe na bhandu bhowe. Bhakulungwa bhalilome na bhuja. 6 Shindu shoshowe shinampanganje lipamba, ikabhe kwa kila shindu kwa juga na tenda ejia kwa a Nnunu, na itupinga imanyishe na a Nnunu. 7 Na ulele gwa a Nnunu upita lunda lowe, shigunngoyanje mitima jenunji na ndumbililo yenunji, nkulundana na a Kilishitu Yeshu. 8 Kungai, ashaalongo ajanganji, yoyowe ili ya kweli, na yoyowe ili ya ishma, na yoyowe ili ya aki, na yoyowe ili ya mmbone, na yoyowe ili ya konja, na yoyowe ya iniywa ukoto, na upagwaga uguja gogowe, nnganishiyanje yeneyo. 9 Ntendanje gowe gumwijigenyenje na poshela kopoka kwangu nne, gumpilikenenje nilibheleketa na kugabhabna ntendanje genego. Na Bhalabho a Nnunu bha ulele shibhabhe na mmanganya. 10 Nkulundana na Bhakulungwa njiangalala kaje kubhona kuti, kungai nnangumbushilanga kabili, kweli mwangumbushilangaga, ikabheje nkapatangaga malanga ga tenda shindu. 11 Ngaabheleketa nneyo kwa ligongo lya pinga indu, pabha njikwiijiganya togolela na indu ingwete. 12 Nikumanyi kumalilwa na kushulushilwa. Njikwiyobhelesheya kutogolela kwa kila shindu, nkujukuta eu nkutotoka, kushulushilwa eu kumalilwa.

13 Ngunakombola kutenda gowe, kupitila kwa a Kilishitu bhamba mashili. **14** Nkali nneyo mwashinkutendanga ya mmbone kwa nyangutila nshilaje shangu. **15** Mmanganyanji Bhapilipi mmumanyinji mwaashayenenji cuti, punatandwibhe lunguya Ngani ja Mmbone ngajabhuleje ku Makedonia, mmanganyanji jikape ni likanisha lya lundene na nne, nkushoya na nkuposhela indu. **16** Pabha nkali punaliji ku Teshalonike mwambelenje indu inapingaga, wala nngabha kamo. **17** Nngabha cuti ngunapingape kuposhela indu yenunji, ikabhe shingupinga kujenjesheka kwa indu ya mmbone intendilenje. **18** Ikabheje, indu yaigwinji numbe ya punda, imwaakamuyenje a Epapulodito kubhambeyo, mboshele. Yene upoi pwili mbuti mbepei ya nunjila, mbepei iposhelwa na ikwanonyela a Nnungu. **19** Bhai a Nnungu bhungwatumishila kwa utajili gwabho shibhampanganje kila shinkupinganga, kwa Ukonjelo gwa a Kilishitu Yesu. **20** Ukonjelo ubhe kwa Atati a Nnungu bhetu, pitipiti. Amina. (**aiōn g165**) **21** Mwaalamushilanje bhandunji bhowe bha ukonjelo bhalinginji bha a Kilishitu Yesu. Ashaalongo bhalinginji na nne apano bhanakunnjumushilanga. **22** Bhandunji bhowe bha ukonjelo bhanakunnjumushilanga, bhalinginji nnyumba ja a Kaishali. **23** Nema ja Bhakulungwa a Yesu Kilishitu, jibhe na mmanganya.

Bhakoloshai

1 Jene bhaluwa jino kujikopoka kwangu nne a Pauli ntume na apwetu a Timoteo. Njishemwa na a Nnungu kwa pinga kwabho kubha ntume jwa a Yesu Kilishitu. **2** Tunakunjandishilanga mmandunji bha ukonjelo nninginji ku Koloshai, mmakulupalikanga nnundenenje na a Kilishitu. Nema na ulele ibhakutupa a Atati a Nnungu, ibhe na mmanganyanji. **3** Kila putukunnujilanga, tunakwaatendela eja a Nnungu, Aina bhabho Bhakulungwa bhetu a Yesu Kilishitu. **4** Pabha tushipilikana ngani ja ngulupai yenunji nkulundana na a Yesu Kilishitu, na nkwaapinganga bhandu bhowe bha ukonjelo. **5** Kwa ligongo lya ngulupalilo ya indu immishilwenje kunnungu, numbe ngani jakwe mwapilikenenje bhukala kwa lilibhe lya kweli limwalungushiwenje, yani, Ngani ja Mmbone. **6** Ngani ja Mmbone jinapunda peleshela mboka na shuma pashilambolyo, malinga shiili kunngwenunji kutandubhila lyubha limwapilikenenje na kujimanya nema ja a Nnungu shijili ja kweli. **7** Malinga shinnjigenywenje ga nema ja a Nnungu na a Epapula, bhatumishi ajetu bha a Kilishitu bhaakulupalika, kwa ligongo lyenu mmanganyanji. **8** Bhenebho bhatubhalanjile ga pinga kwenunji kumpatilenje naka Mbamu. **9** Kwa lyene ligongolyo, numbe uwe tukapilikaneje tukaaleka kunnujilanga kwa a Nnungu, nkupinga bhampanganje lunda na lumanyio lwa muntima. **10** Penepo shinkombolanje tama malinga shibhapinga Bhakulungwa a Nnungu, nitenda yowe ikwaanonyela, ndamo jenunji shijipunde peleshela mboka ya kila namuna kwa itendi ya mmbone na shimpundanje kwaamanya a Nnungu. **11** A Nnungu bhampanganje mashili kwa kombola kwabho kwa ukonjelo, nkupinga mwiipilililanje kwa kila shindu na kwiluma na angalala. **12** Mwaatendelanje eja Atati a Nnungu, bhantendilenje

nkombolanje poshela miadi ja indu ibhaabhishilenje bhandunji bha ukonjelo, muupalume gwabho gwa shilangaya. **13** Na bhenebho bhashinkututapula mmashili ga lubhindu, nikutushoya na kutujinjiya muupalume uka mwana gwabho jubhakumpinga. **14** Kwa bhenebho tunagombolwa, nileshelwelwa yambi yetu. **15** Na a Kilishitu ni shilanda shibhoneka, sha a Nnungu bhakaabhoneka, nantando jwa indu yowe ipengenyewe. **16** Pabha indu yowe ishipanganywa kupitila Bhenebho, kila shindu sha kunnungu na sha pa shilambolyo, indu ibhoneka na ikaabhoneka, ibhaga ashinanndenga, na majini na ashimaoka bhowe. Yowe puiipengenyewe na Bhenebho na kwa ligongo lyabho. **17** Bhenebho bhaapali indu yowe ikanabhe pagwa, yowe inatama ukoto kwa lundana na bhenebho. **18** Bhenebho ni akalongolele bha likanisha, malinga ntwe shiukuti longolela shiilu, numbe bhenebho ni shiumilo sha gumi gwa shene shiilusho. Bhenebho ni nantando bha gumi, bhantai kuyuka bhakaweje, nkupinga bhabhe bha ntai kwa indu yowe. **19** Pabha a Nnungu bhashipinga kutimilila kwabho kowe kutame mubhanabhabho a Yesu. **20** Na kwa bhana bhabho, a Nnungu bhayene bhashilundanywa na indu yowe, kwa shiwo sha a Yesu munshalabha, a Nnungu gubhatendile ulele na indu yowe, ibhe ya pa shilambolyo eu ya kunnungu. **21** Mmanganyanji bhukala mwashinkutalikangana na a Nnungu nibha magongo, kwa ligongo lya ng'aniyo yenunji na itendi yenunji ya nyata. **22** Ikabheje nnaino, kwa shiwo shika mwana gwabho atemi pa shilambolyo pano, a Nnungu bhashikunnundanyanga, nkupinga bhammikanje pamo na bhenebho, nninginji bha ukonjelo na bhammbonenji na wala sha gambwa, **23** ikabheje nnapinjikwanga kwiishimilika ukoto nngulupai, wala nnakundanje kutendebhuywa nikunshoyanga

nngulupai impatilenje pumwapilikenenje Ngani ja Mmbone. Nne a Pauli ni ntumishi jwa jene Ngani ja Mmbone, jilungwiwe pa shilambolyojo. **24** Nnaino ngunaangalila kupotekwa kwangu kwa ligongo lyenunji, pabha ngunagumbashiya pashiilu shangu indu itubhile mmboteko ya a Kilishitu kwa ligongo lya likanisha, lili shiilu shabho. **25** Nne njibha ntumishi jwa likanisha malinga shibhapanje a Nnungu kumba, kwa pwaida jenunji. Nunguye lilobhe lyabho gwangali leka shindu, **26** indu ya nng'yo ibhaishiywenje bhandu bhowe kuumila bhukala, ikabheje nnaino bhashikwaibhulilanga bhandunji bhabho bha ukonjelo.

(aiōn g165) **27** A Nnungu bhashinkupinga kwaibhulilanga bhanganyabho ga ukonjelo nkulu gwa gwene nng'iyogo, kubbandunji bhalinginji nngabha Bhayaudi. Nng'yo gwene ni a Kilishitu, bhalo mmitima jenunji. Na lyenelyo linalangula kuti shinkundikanywanje muukonjelo gwa a Nnungu. **28** Kwa lyene ligongolyo, tunakwalunguya a Kilishitu kubbandu bhowe, kwaaleyanga na kwaajiganyanga bhandu bhowe kwa lunda lowe, nkupinga tunnjiyenajo kila mundu kwa a Nnungu ali aishimilishe nkulundana na a Kilishitu. **29** Kwa ligongo lyolyo, nne ngunalajilila tenda liengo, kwa mashili gungupegwa na a Kilishitu gakamula liengo muntima gwangu.

2 Ngunapinga mmumanyanje, shinguti lajilila kutenda liengo kwa ligongo lyenunji, na kwa ligongo lya bhandunji bha ku Laodikia na kwa ligongo lya bhowe bhakanabhe monanga mmeyo bhala. **2** Ngunatenda nnei nkupinga bhatagwanje ntima na bhalundananje nkupingana, bhaumanyanje utajili gowe gwa kuimanya ukoto indu ya kweli. Nkupinga bhai manyanje kaje ya nng'yo gwa a Nnungu, yani a Kilishitu bayene. **3** Kwa bhenebho ishikwiya ibhiko yowe ya lunda na lumanyio. **4**

Bhai, ngunakummalanjilanga genega, nkupinga mundu jojowe
ananntembanje kwa malobhe ga unami, nkali ganonye. **5**
Pabha, nkali nkamonanje kwa meyo, ikabheje kwa muntima
puni na mmanganyanji, nguliangalala nkummonanga shinkuti
tamangana ukoto, na kwiishimilika nngulupai jenunji nkulundana
na a Kilishitu. **6** Bhai, shimwaaposhelenje a Yeshu Kilishitu
kubha Bhakulungwa bhenunji, bhai ntamangananje nneyo peyo
nkulundana nabho. **7** Ntamangananje ukoto nkulundana na
bhenebho na shengwa panani jabho, na kwiishimilika nngulupai
malinga shinnijenyenje, na mpundanje kutenda eja. **8** Bhai
mwiiiteiganje, mundu anantembanje kwa lumanyio lwakwe lwa
unami, lwa poshela kubhandu na majiganyo ga pa shilambolyo,
gali nngabha ga a Kilishitu! **9** Pabha kukamilika kowe kwa a
Nnunu, kwabhoneshe mwa a Kilishitu nshiiilu shabho, **10** na
mmanganyanji nshipewanga gumi gwa nng'ilimila nkulundana
na bhenebho, bhali bhakulungwa bha mashili na ukulungwa
gowe. **11** Nkulundana na a Kilishitu mmanganyanji nnjalwikenje,
numbe nngabha kwa tagwa na bhandu, ikabheje na a Kilishitu
bhayene, nkugombolwa kopoka kushiilu shangali mashili. **12**
Pabha, nkabhatishwanjeje mwashinkushikwanga pamo na a
Kilishitu, na yuywa pamo na bhenebho kwa kulupalila mashili
ga a Nnunu, bhaayushiye a Kilishitu bhakaweje. **13** Na
mmanganyanji pumwalinginji nng'wilenje, kwa ligongo lya yambi
yenunji na gwangajaluka gwenunji. Ikabheje nnaino a Nnunu
bhashikumpanganga gumi pamo na a Kilishitu, nikutuleshelela
yambi yetu yowe, **14** gubhaputile malobhe gajandikwe ga
kutulugula, na ukumu jakwe nikujishoya jinapagwe kabhili, kwa
kujikomela munshalabha. **15** Gubhaapokonyolenje ukulungwa
na mashili gabhonji bhakulungwanji na bhakwetenje mashili ga

kumaoka, nikwatokomayanga palugwinjili akuno bhaliangalala pa lugwinjili lwa bhandu pa nshalabha gwa a Yesu. **16**
Kwa nneyo, bhai, mundu ananng'ukumulanje kwa ligongo lya shalya, eu ya papila, eu kwa ligongo lya shikukuu, eu ga mwei gwa ambi, eu ga lyubha lya pumulila. **17** Pabha yeneyo ni ilanda ya indu ikwiya, ikabhe shindu ukoto, ni a Kilishitu. **18**
Mundu jojowe ananng'ukumulanje, alikwiitemba kwitimalika akuno ali kwaatindibhalila ashimalaika. Mundu malinga jwenejo anakagulila agamii yakwe, alikwiitapa kwa lunda lwake lwa shigundu, **19** jwene mundujo ashikwaaleka a Kilishitu bhalintwe gwa shiilusho. Nkulongoywa na a Kilishitu, shiilu showe shinaliywa na lundanywa pamo kwa ibhalo na minanga jakwe, penepo shiilu shinakula, malinga shibhapinga a Nnungu. **20**
Bhai, ibhaga mmanganyanji mwashinkuwanganga pamo na a Kilishitu na gombolwa mmashili ga bhaatagwala bha pa shilambolyo, bhai, kwa nnodi tama kabibili mbuti bhandu bha pa shilambolyo, nnibhishilwanga ibhagu? **21** "Eti nnakamulanje ashi, eu nnapayanje ashi, eu nnakwayanje ashi!" **22** Gene gowego ni ga indu ya angabhanika, gali malajilo na majiganyo ga bhandunjipe. **23** Yeneyo puibhoneka mbuti ya lunda kwa namuna ja tindibhalila jimwiibhishilenje mwashaayenenji, nkwiitimalika na nkushipoteka shiilu na ilokoli yakwe, ikabheje ikapwaa shindu nkulekaya ilokoli ya shiilu.

3 Bhai monaga nnyushiywenje pamo na a Kilishitu, mwiloleyanje indu ya kunani kubhali a Kilishitu, numbe bhashitama kunkono nnilo gwa a Nnungu. **2** Mwiganishayanje indu ya kunani, nngabha indu ya pa shilambolyo pano. **3** Pabha mwawilenje, na gumi gwenuunji ushiiywa pamo na a Kilishitu kwa a Nnungu.
4 Pushibhabhoneshe a Kilishitu bhalil gumi gwtetu, penepo

shimmonekanje pamo na bhenebho, muukonjelo. **5** Bhai, ibhalo yenunji inalame nkulokolila indu ya pashilambolyo, malinga kulabhalabha na indu ya nyata na ilokoli ya nyata na ng'aniyo yangali ya mmbone, pabha kutenda yeneyo ni malinga kutindibhalila yanamu. **6** Kwa ligongo lya genego, nnjimwa ja a Nnungu jinakwiya. **7** Nkali mmanganyanji bhukala mwatemingenenje nndamo ja tenda yene induyo. **8** Ikabheje nnaino mmanganyanji nnapinjikwanga kuileka yoweyo, nnjimwa, na ilokoli, na ilebho na kulosha na matukano, ganakoposhe nkang'wa yenunji. **9** Nhabhalanjilananje ya unami, pabha nng'uliljenje gundu gwa bhukala na itendi yakwe yowe, **10** nng'wetenje gundu gwa ambi. Upunda alaywa ukoto nkwaalanda a Nnungu, nkupinga nkolanje lunda lwa kwaamanya bhayene bhaapanganya. **11** Penepo shakwa sha lugula kabhili cuti abha, Bhayaudi eu Bhagiliki eu ajalwishe na jwanganjaluka, nngumba wala jwampenye, ntumwa wala nngwana, ikabhe a Kilishitu ni yowe, na kwa kila shindu. **12** Bhai pabha nshibhanganga bhandu nng'agwilwenje na a Nnungu, bha ukonjelo nkupingwanga, ntolanje ntima gwa shiya na uguja na kwiitimalika na shinunu na kwiiluma. **13** Nnaukumulane nneshelelananje, mundu akolaga shiumilo sha kunnugula nnjakwe, bhai mbaya anneshelale malinga Bhakulungwa shibhanneshelelenje mmanganyanji. **14** Kupunda gene gowego, ntamangananje nkupingana, pabha kupingana kunalundanya indu yowe nibha shindu shimo sha nng'ilimila. **15** Na ulele gwa a Kilishitu gunnongoyanje mitima jenunji, pabha genego ni gunshemelwenje kubha shiilu shimo. Na mmanganje bhandunji bhatendanga ej. **16** Malobhe ga ngani ja a Kilishitu gagumbale mmitima jenunji, akuno nnijiganyananga na leyana kwa lunda lowe, nnikwaajimbilanga a Nnungu nyimbo

ya mbeembela na nyimbo ya muntima, akuno nnitendanga
eja mmitima jenunji. **17** Shoshowe shinkukamulanga kwa
lilobhe eu itendi, yowe ntendanje kwa lina lya Bhakulungwa
a Yesu, na kwaatendela eja Atati a Nnungu kwa lina lya
a Yesu. **18** Mmandonyanji mwaapilikanilanje ashimbuje
bhenunji, nneyo ni shibhapinga Bhakulungwa. **19** Mmanabhalume
nnombilenje, mwaapinganje ashakongo bhenunji, nnakolanje
nngomo. **20** Bhana, mwaapilikanilanje bhankwetenje kwa
kila shindu, pabha genego ni gubhapinga Bhakulungwa.
21 Na mmanganyanji ashaaina mundu, nnaatandubhanje
ashibhana bhenunji, bhanawanganga mitima. **22** Bhatumwa,
mwaapilikanilanje bhakulungwa bhenunji bha pa shilambolyo
pano, kwa kila shindu na nngabha kwa jimililwape nkupinga
muikonjeleyanje pa meyo gabhonji, ikabheje ntendanje nneyo
kwa ntima gwa mmbone, akuno nnikwaajogopanga a Nnungu. **23**
Shoshowe shinkukamulanga, ntendanje kwa ntima gowe mbuti
nkwaatendelanga Bhakulungwa na wala nngabha mundu. **24**
Mmumanyanje kuti shimposhelanje upo ya ulishi ibhammishilenje
Bhakulungwa. Pabha nnakwaatumishilanga Bhakulungwa a
Kilishitu. **25** Pabha atenda yangali ya mmbone shalipwe yangali
ya mmbone malinga shatendile, pabha kwa a Nnungu kwangali
bhonelwaa.

4 Bhakulungwanji bha bhatumwa, mwaatendelanje bhatumwa
bhenunji aki na uguja, nnikumumanyanga kuti, nkali
mmanganyanji nkwetenje Bhakulungwa kunnungu. **2** Nnonjeyanje
kaje nkujuga nnaiibukanje, na mwaatendelanje eja a Nnungu.
3 Ntujujilanje na uwe, nkupinga a Nnungu bhatupe malanga
ga lunguya lilobhe lyabho, tushumye indu ya nng'yo ya a
Kilishitu, numbe kwa ligongo lya yeneyo, nne njitabhwa. **4** Kwa

nneyo nnyujilanje kupinga ngombole kulunguya ga indu ya
nng'iyo malinga shingupinjikwa. **5** Ntamangananje kwa lunda
na bhandunji bhangalinginji ngulupai jimo na mmanganyanji,
nnikugakamulilanga liengo ukoto, malanga gumpegwilwenje.
6 Mobha gowe malobhe genunji ganapinjikwa gabhe ga
mboka, na ga pwaa, nkupinga mmumanyanje namuna ja
kunnjangula kila mundu. **7** A Tikiko, apwetu bha mmbone,
bhatumishi bha kulupalika na ajangu nniengo lya Bhakulungwa,
shibhantashiyanje ngani jangu nne jowe. **8** Njikwaatuma
kweneko kwa ligongo lya genego, nkupinga nngamanyanje
getu uwe, na bhantaganje ntima. **9** Bhanakwiya pamo na a
Oneshimushi apwetu bha mmbone na bha kulupalika, numbe ni
bhashilambo ajenunji. Bhene bhanganyabho shibhantalashiyanje
indu yowe itendeka kunngwetu kuno. **10** A Alishitako bhatabhilwe
pamo na nne, bhanakunnjumushilanga, pamo na a Maliko
aibhani bhabho a Bhanabha, bhumwaposhelenje malajilo ga
bhenebho, bhaikaga kweneko mwaaposhelanje. **11** Na a Yoshua
bhaashemwa a Yushitushi, nneila peila bhanakunnjumushilanga,
bhene bhanganya pebha ni bhalinginji Bhayaudi, munkumbi
gwa bhaakamulanga maengo pamo na nne, kwa ligongo
lya upalume gwa a Nnungu, na bhashindaganga ntima kwa
kaje. **12** A Epapula bhashilambo ajenunji na bhatumishi
bha a Yesu Kilishitu bhanakunnjumushilanga, mobha gowe
bhanakunjilanga gwangali totoshela, nkupinga ntamangananje
kwa kamilika, na nkombolanje kwa kaje kutenda yowe ipinjikwa
na a Nnungu. **13** Bhai ngunakong'ondela kuti bhanakamula liengo
kwa tumbila, kwa ligongo lyenu mmanganyanji, na lya bhalinginji
ku Laodikia na bhalinginji ku Ilapolishi. **14** Ambwiga ajetu a
Luka a dakitali bhala, na a Dema bhanakunnjumushilanga. **15**

Mwaajumushilanje ashaapwetu bha ku Laodikia na a Nimpa na bhandunji bha likanisha bhaimananga nnyumba jabho. **16** Jene bhaluwa jino jishomwaga na mmanganyanji, mwaapanganje na bha likanisha lya ku Laodikia bhajishomanje, na mmanganyanji nshomanje bhaluwa ja kopoka ku Laodikia. **17** Mwaabhalanjilanje a Alikipo, bhatende ukoto nkukamilisha liengo libhapegwilwe na Bhakulungwa. **18** Nne a Pauli, ngujandika shene shalamu shino kwa nkono gwangu. Nkumbushilanje kuti muni nkutabhwa. Nema ya a Nnunu ibhe na mmanganyanji.

1 Bhateshalonike

1 Ajino bhaluwa jino kujikopoka kwangu nne a Pauli, na a Shilibhanushi, na a Timoteo. Tunakunnjandishilanga nninginji ku likanisha lya bha Teshalonike, bhandunji bha Atati a Nnungu na Bhakulungwa a Yesu Kilishitu. Tunakumpinjilanga nema na ulele. **2** Tunakwaatendela ej a Nnungu mobha gowe, kwa ligongo lyenunji mmowe na kunkumbushilanga kila putukwaajuga a Nnungu. **3** Tunakumbushila shinkuti languyanga ngulupai jenunji kwa pinga, na shinkuti lajililanga tenda liengo kwa tumbilila na kulupalila, na shinshite kwiishimilikanga ku Bhakulungwa bhetu a Yesu Kilishitu. **4** Ashaalongo, tumumanyi kuti a Nnungu bhanakumpinganga na bhashikunng'agulanga mmanganje bhandu bhabho, **5** pabha putwannungushiyenje Ngani ja Mmbone jila nngabha kwa malobhepe, ikabhe kwa mashili na kwa Mbamu jwa Ukonjelo, tulikumumanya kuti ntengago ni gwa kweli. Mmumanyinji shitwaashite tama na mmanganyanji, nkupinga mpwaikanje. **6** Mmanganya mwashinkukaguyanga itwatendaga uwe na ibhatendaga Bhakulungwa. Nkali mwapotekwenje kwa kaje, mwashinkuuposhelanga ntenga kwa angalala kukopoka kuka Mbamu jwa Ukonjelo. **7** Kwa nneyo mmanganya nshibhanganga shilangulo sha kagulwa na bhandunji bhowe, bhaakulupalilanga bha ku Makedonia na bha ku Akaya. **8** Pabha, koposhela kwenu mmanganyanji, ntenga gwa Bhakulungwa ushumile, nngabha ku Makedonia na ku Akayape, ikabhe ngulupai jenunji kwa a Nnungu jishishuma mmbali yowe. Numbe twangali sha bheleketa kabhili. **9** Pabha ashaayenenji bhanatalashiyanga ga mwanja gwetu kunngwenunji, shimwatuposhelenje na shimwashite kuilekanga yanamu, nikwaatendebhushila a Nnungu bhali na gumi na bha kweli, **10** nikwaalinda Bhanabhabho

kopoka kunnungu, yani a Yeshu. Bhayushiyewe na a Nnungu, bhakututapula na nnjimwa jikwiya ja a Nnungu.

2 Ashaalongo, mwashaayenenji mmumanyinji kuti kunng'owelanga kwetu kukaliji kwa yoyo. **2** Mmumanyinji shitwashite potekwa na tukanwa ku Pilipi kula tukanabheika kungwenunji. Nkali twaiimene ndabhila, a Nnungu bhashinkutupa makangala ga kunnungushiyanga Ngani ja Mmbone. **3** Shindu shitukunneyanga mmanganya nngabha sha puganya eu shanyata na wala tukapinga kuntemba mundu jojowe. **4** Uwe tunabheleketa malinga shibhapinga a Nnungu, pabha bhashikutubhona tunapwaa, gubhatupele liengo lya lunguya Ngani ja Mmboneji. Tukaapinga kwaanonyeyanga bhandunji, ikabheje a Nnungu bhakujimanya mitima jetu mpaka nkati. **5** Pabha malinga shimmumanyinji, uwe twangantekeya mundu jojowe, wala twangalokolila kupata indu kwa nng'iyo, a Nnungu ni bhaakong'ondela bhetu! **6** Twangaloleya ukonjelo kwa bhandunji, wala na mmanganyanji, wala na mundu jojowe, **7** nkali twaaliji mitume bha a Kilishitu, twangalonga shindu kunngwenunji. Ikabheje twashinkwiitimalika mbuti nyinamundu anilela ashibhanagwe. **8** Twashinkumpinganga mpaka muntima mmanganyanji, gutupinjile nngabha kuntalashiyangape ga Ngani ja Mmbone ja a Nnungu, ikabhe na kwiiishoya twaashayene. Pabha munninginji mmitima jetu. **9** Ashaalongo, nnikumbushilanga shitwashite tenda maengo ga ukomu na ga totoya. Akuno tulikunnungushiyanga Ngani ja Mmbone ja a Nnungu, twashinkutenda liengo mui na shilo, nkupinga tunabhe nshigo kuka mundu jojowe munkumbi gwenunji. **10** Mmanganya ni mmaakong'ondela bhetu, nneila peila na a Nnungu bhanakong'ondela, kuti twashinkutama munkumbi gwenunji

nkwetenje aki, kwa ukonjelo na uguja na gwangali kugambwa. **11**
Mmumanyinji kuti twashinkunneya kila mundu mbuti ainamundu
shibhaaleya bhana bhabho, **12** tushikuntaganga ntima, nkupinga
mmanganje na ndamo malinga shibhaapinga a Nnungu
bhanshemilenje nnjinjilanje muupalume na muukonjelo gwabho.
13 Kwa lyene ligongolyo tunakwaatendela ej a Nnungu mobha
gowe, pabha putwannungushiyanje ntenga gwa a Nnungu
mmanganya mwashinkuupilikanishiyanga niposhela, nngabha
malinga ntenga uka mundu, ikabhe malinga kweli ntenga gwa a
Nnungu. Na gwene ntenga gula, ni utenda liengo mmitima jenunji
mmanganyanji nkukulupalilanga. **14** Mmanganya ashaalongo,
yashinkumpatanga indu malinga yaapatilenje bha ku makanisha
ga a Nnungu ku Yudea kula, indu yaapatilenje bhandunji
bhalinginji bha a Yesu. Mmanganyanji mwashinkupotekwanga
na bhashilambo ajenunji, malinga bhanganyabho shibhashite
potekwanga na Bhayaudi ajabhonji, **15** bhaabhulegenje
Bhakulungwa a Yesu na ashinkulondola bha a Nnungu,
gubhatupotekenje na uwe. Bhanakwaashimanga a Nnungu
na bhanashimwanga na bhandu bhowe! **16** Gubhalinjilenje
kutuibhilila tunaalungushiyanje bhandunji bha ilambo ina
ntenga gwa kwaatapulanga. Kwa nneyo gubhatendilenje ilebho
yabhonji imalile. Kungai nnjimwa ja a Nnungu jaishilenje. **17**
Ikabheje ashaalongo, kulekana kwetu pukwaliji nngabha kwa
lonjeya, numbe pukwaliji kwa shiilu, na nngabha kwa muntima.
Uwe gutulokolile mmitima jetu kummonanga kabhili. **18** Kwa
nneyo gututumbilile kunng'owelanga kabhili. Nne a Pauli,
nashinkupinga ning'owelannje papagwinji, ikabheje Lishetani
ashinkutuibhilila. **19** Bhuli, shitwiipunile nndi pushitujijejjima
mmujo ja Bhakulungwa a Yesu mobha gushibhaishe? Ikabhe

mmanganyanji nninginji ngulupai jetu, na angalala kwetu. **20** Elo,
mmanganyanji ni ukonjelo gwetu na angalala kwetu.

3 Kungai gutulepele kwiipiliila kabhili, gututumbilile kulepeka ku Atene jika jwetu, **2** nigutuntumile mpwetu Timoteo, nkamula liengo jwa a Nnungu nkulunguya Ngani ja Mmbone ja a Kilishitu. Twashinkuntuma nkupinga anshimilikanje na kuntaganga ntima nngulupai jenunji, **3** nkupinga mundu anapuganywe nngulupai jakwe kwa ligongo lya mbotekoyo. Mmanganya mmumanyinji kuti tushibhishilwa mboteko. **4** Pabha, putwaliji pamo na mmanganyanji twammalanjilenje kuti shitupotekwe, malinga shimmumanyinji kuti ikoposhele. **5** Kwa nneyo ngalepeleje kwiipiliila kabhili, gunintumile Timoteo kungwenunji, nkupinga nijimaye ngani ja ngulupai jenunji. Inabhe nkulinga, anninjilenje nkupinga liengo lyowe litutendile kunngwenunji lila, libhe lya yoyo. **6** Ikabheje nnaino, a Timoteo bhaishe kopoka kunngwenunji na bhatupeleshele ngani ja mmbone, ja ngulupai na pinga kwenunji. Bhashikutubhalanjila kuti nnakutukumbushilanga mobha gowe na nnalokolilanga kutubhona malinga shitulokolila uwe kummonanga. **7** Bhai, ga ngani ja ngulupai jenunji jishikututaga ntima nshilaje na potekwa kwetu kowe, **8** nnaino tunatama ukoto, ibhaga mmanganya mwiishimilikenje nkulundana na Bhakulungwa. **9** Na nnaino kanga twaatendele bhuli eja a Nnungu bhetu, kwa ligongo lyenunji! Tunakwaatendela eja kwa nng'angalo gutukwete kwa a Nnungu bhetu, kwa ligongo lyenunji. **10** Shilo na mui tunapunda kwaajuga a Nnungu kwa ntima gwetu gowe, nkupinga tubhonegane na mmanganya nkupinga tugumbashiye shitubhile nngulupai jenunji. **11** Tunakwaajuga Atati a Nnungu na Bhakulungwa bhetu a Yesu bhatulongoye kuika kunngwenunji. **12** Bhakulungwa bhankomboyanje ga pingana na

punda kwaapinganga bhandu bhowe, malinga uwe shitukuti kumpinganga mmanganyanji. **13** Kwa nneyo bhashimilishe mitima jenunji jibhe jangali sha gambwa, muukonjelo pa meyo ga a Nnungu Aina bhetu, mobha ga ika Bhakulungwa bhetu a Yesu pamo na bha ukonjelo bhabho bhowe.

4 Kungai bhakilishitu ajangunji, tunakunshondelesheyanga na kunnjuganga kwa lina lya Bhakulungwa a Yesu, malinga shimwiijigenyenje kopoka kwetu uwe kutama nkwaanonyeya a Nnungu, na malinga shinkutamanganashi, nnapinjikwanga mpundanje kutenda nneyo. **2** Pabha nnikumbushilanga malajilo gutwampelenje gala, kwa mashili ga Bhakulungwa a Yesu. **3** A Nnungu bhanapinga mmanganya mmanganje bha ukonjelo nnikwiembuyanga na labhalabha. **4** Kila jwannume amanye kwiigoya nnyene atame kwa ukonjelo na ishma, **5** nngabha kwa ilokoli yangali ya mmbone malinga shibhatendanga bhandunji bhakakwaamanyanga a Nnungu. **6** Bhai kwa gene malobhe gano, mundu jojowe ananneebhele nnjakwe eu kuntekeya kwa ligongo lya ilokoli yakwe. Twammalanjilenje genego na kunneyanga kuti Bhakulungwa shibhaaukumulanje bhatendanga genego. **7** Pabha a Nnungu bhangatushema nkupinga tutende ya nyata, ikabhe tutame muukonjelo. **8** Bhai, kwa nneyo akana gene majiganjogo, akakunkana mundu, ikabhe anakwaakana a Nnungu bhayene, bhakumpanganga Mbumu jwabho jwa Ukonjelo. **9** Ga pingana, bhakilishitu ajetunji nkwenetenje ngulupai, tukannjandishilanga pabha mwaashayene nnjigenyenje na a Nnungu ga pingana. **10** Pabha nnatendanga nneyo kwa bhakilishitu ajetunji bhowe bhalinginji ku Makedonia. Bhai, tunakunnjuganga mpundanje tenda nneyo. **11** Nntamangananje kwa kwitimalika, kila mundu atende indu yakwe nyene na tenda liengo malinga

shitwannajilenje. **12** Kwa tenda nneyo shinnumbililwanje na bhandunji bhangabha Bhakilishitu, wala nkaloelanga kujangutilwa indu naka mundu jojowe. **13** Ikabheje bhakilishitu ajetunji, tukaapinga nnamumanyanje ga bhandu bhawilenje, nkupinga nnainjikanga malinga bhandunji bhana bhangalinginji na ngulupai. **14** Pabha uwe tunakulupalila kuti a Yesu bhashinkuwa niyuka, nneyo peyo tunakulupalila kuti a Nnungu kupitila a Yesu, bhowe bhawilenje bhalikwaakulupalilanga a Yesu, a Nnungu shibhaajianabhonji pamo na a Yesu. **15** Pabha kwa tolelela na majiganyo ga Bhakulungwa ni kuti, tubhabhakoto uwe, shitulepeshe mpaka malanga gushibhaishe Bhakulungwa, kweli tukaalongolelanya bhawilenje bhala. **16** Pabha Bhakulungwa bhayene shibhatulushe kopoka kunnungu na lilobhe lya utiya, na akuno lilobhe lya utiya lika malaika nkulu lilipilikanika, na akuno mbalapala ja a Nnungu jilipilikanika, na bhawilenje bhalikwakulupalilanga a Yesu bhala, shibhabhanganje bha ntai kuyuywa. **17** Kungai uwe tuli tubhabhakoto shitunyakulwe pamo na bhanganyabho kukwaposhela Bhakulungwa kunani. Kwa nneyo shitutame nabho mobha gowe. **18** Bhai, ntagananje ntima kwa gene malobhega.

5 Ikabheje bhakilishitu ajetunji, tukapinga kunnjandishilanga ga malanga na mobha pugapinga koposhela genego. **2** Pabha mmanganyanji mwashaayenenji mmumanyinji kuti lyubha lya Bhakulungwa shiliishe mbuti sha kwiya nngwii shilo. **3** Bhandu bhalinkutinji, “Ulele na ushalama,” penepo ni pushiukoposhele mpaulo shangupe! Mbuti poteka kwa shitumbo nkwiigopola, wala jwakwapi shatoloshe. **4** Ikabheje mmanganyanji bhakilishitu ajetunji, nkamatangananga nnubhindu kuti lyene lyubhalyo linng’imananje mbuti ngwii. **5** Pabha mmowe

mmwe nshibhanganga nshilangaya, bhandunji bha mui. Uwe nngabha tubhandu bha shilo wala bha lubhindu. **6** Bhai, tunagone lugono malinga bhananji, ikabhe tushey na tunapunde. **7** Pabha bhaagonanga lugono pubhagonanga shilo, na bhakolelwanga, pubhakolelwanga shilo. **8** Ikabheje uwe tuli bha kushilangaya tunapunde. Mitima jetu tujibhishe muulinda kwa ngulupai na pingana, na kukulupalila kwetu ga ntapulo, kubhe mbuti kopiya ja shitale. **9** Pabha a Nnungu bhangatuagula tupotekwe na nnjimwa jabho, ikabhe tutapulwe na Bhakulungwa bhetu a Yesu Kilishitu, **10** bhabhulegwe kwa ligongo lyetu, nkupinga tutame nabho pamo ibhe tubhabhakoto eu tuwile. **11** Kwa nneyo, ntagananje ntima na jangutana mwaashayenenji malinga shinkutendangasho. **12** Bhai ashaalongo, tunakunnjuganga mwaishimunji bhatumbilanga kutenda liengo munkumbi gwenunji, nikunnongoyanga kwa a Kilishitu, na kunneyanga bhala. **13** Mwaishimunji na kwapinganga kwa ligongo lya liengo libhatendanga. Mmanganje na ulele munkumbi gwenunji. **14** Ashaalongo tunakunshondelesheyanga, mwaaleyanye bhandunji bhakata, mwaataganje ntima bhawilenje ntima, na kwaajangutilanga bhangalinginji mashili, mwilumanje ntima na bhandu bhowe. **15** Nnolanje, mundu jojowe anannipe nnjakwe yangali ya mmbone, ikabhe ntendelananje uguja mwaashayenenji na kubhandu bhowe. **16** Nng'angalalanje mobha gowe, **17** nnjuganje gwangali totoshela, **18** na ntendanje ejia kwa kila shindu. Pabha genego ni gubhapinga a Nnungu kungwenunji, nkulundana na a Yesu Kilishitu. **19** Nnanng'ibhililanje Mbumu jwa Ukonjelo, **20** nnanyegayanje malobhe ga ashinkulondola, **21** nkagulilanje kila shindu, na bhika muntima shili sha mmbone, **22** mwiepuyanje na yangali ya mmbone yowe. **23** A Nnungu bhayene bhakutupa ulele bhantakayanje kwa kaje mitima jenunji,

na ng'aniyo yenunji, na iilu yenunji mmikwanje ukoto, nnakolanje sha gambwa malanga gushibhaishe Bhakulungwa bhetu a Yesu Kilishitu. **24** Bhene bhakunshemanga bhala shibhatende genego, pabha ni bhaakulupalika. **25** Bhakilishitu ajetunji, ntujujilanje na uwe. **26** Mwaalamushilanje Bhakilishitu ajetunji bhowe, nkupingana kwa ukonjelo. **27** Ngunakunkwiyanga kwa lina lya Bhakulungwa, mwaashomelanje jene bhaluwa jino Bhakilishitu ajetunji bhowe. **28** Nema ja Bhakulungwa bhetu a Yesu Kilishitu, jibhe na mmanganyanji.

2 Bhateshalonike

1 Ajino bhaluwa jino kujikopoka kwangu nne a Pauli, na a Shilibhanushi na a Timoteo tunakunnjandishilanga mmanganyanji mma kulikanisha lya ku Teshalonike nninginji bhandu bha a Nnungu Ainabhetu, na Bhakulungwa a Yesu Kilishitu. 2 Tunakumpinjilanga nema na ulele kukopoka kwa a Nnungu Ainabhetu, na kwa Bhakulungwa a Yesu Kilishitu. 3 Ashaalongo, tunapinjikwa kwaatendela ej a Nnungu mobha gowe kwa ligongo lyenunji. Inapwaa tutende nneyo pabha ngulupai jenunji jinapunda kula, na pingana kwenunji kunajenjesheka. 4 Pabha uwe tunakwiipunila mmanganyanji, nninginji bha makanisha ga a Nnungu. Tunakwiipuna shinkuti pundanga kulupalila na kuikakatimila na mboteko inkwiipatanga. 5 Gene gowego ganakomelesheya kuti ukumu ja a Nnungu ni ja aki, kwa nneyo mmanganyanji nnapinjikwanga kuupata Upalume gwabho, kwa ligongo lya mboteko inkupatanga. 6 A Nnungu ni bha aki, shibhaalipanje mboteko bhene bhakumpotekanga mmanganyanji bhala, 7 na shibhantendanje mpumulilanje na uwe mmanganyanji nkupotekwanga. Genego shigatendeshe malanga gushibhakoposhele Bhakulungwa a Yesu kukopoka kunnungu, na ashimalaika Bhabho bhakwetenje mashili, 8 na lilamba lya moto, kwaaukululanga bhene bhakwaakananga a Nnungu, na bhakaakundanga Ngani ja Mbone ja Bhakulungwa bhetu a Yesu. 9 Mboteko yabhonji, shiibhe kuangabhanywa pitipiti na bhakalubhonanga lubhombo lwa Bhakulungwa na Ukonjelo gwa mashili Gabho, (aiōnios g166) 10 lyubha lishibhaishe kuuposhela ukonjelo kukopoka kwa bhandu bhabho bha ukonjelo na iniywa na bhandu bhakwaakulupalilanga. Na mmanganya shimmanganje munkumbi gwabhonji, pabha nshikulupalilanga

ntenga gutwampeleshenje gula. **11** Kwa nneyo mobha gowe tunakunnujilaga nkupinga a Nnungu bhankomboyanje kutama malinga shibhanshemilenje. Tunakwaajuga, kwa kombola kwabho Bhaitende ndumbililo yenunji ya tenda uguja, na liengo lyenunji lya ngulupai litimilile. **12** Kwa nneyo, lina lya Bhakulungwa bhetu a Yeshu shilipate ishima kukopoka kungwenunji na mmanganya shimpatanje ishima kukopoka kwa bhenebho, kwa nema ja a Nnungu bhetu na ja Bhakulungwa a Yeshu Kilishitu.

2 Bhai, ga kwiya kwabho Bhakulungwa bhetu a Yeshu Kilishitu na imana kwetu nkupinga tutame nabho, ashaalongo tunakunshondelesheyanga, **2** nnapuganywanje na wala nnakolanje lipamba eu kwaapilikanishianga bhaabheleketanga kuti lyubha lya Bhakulungwa liishe. Nnapuganywanje kwa londola, eu kwa lunguya, eu kwa bhaluwa jiiganishiywa kuti kujikopweshe kwetu uwe. **3** Nnakundanje kutembwa naka mundu jojowe kwa shoshowe shila, pabha lyene lyubhalyo likaika mpaka ukoposhele Ungakunda Gwankulungwa na jwene Nkutemba jula akoposhele, na mpelo gwakwe kuobha. **4** Pabha anakwikuya nnyene kwa indu yowe ishemwa na bhandunji kuti nnungu, eu kila shindu shitindibhalilwa. Shajinjile nkali Nniekalu lya a Nnungu, nikwiitenda kuti jwalakwe Nnungu. **5** Bhuli, nkakumbushilanga kuti nashinkummalanjilanga gene gowega mobha punaliji na mmanganya? **6** Ikabheje shipali shindu shikunng'ibhilila nnaino, mmanganya nshimanyinji shene shindusho. Bhai, jwene jwangali jwa mmbone jula, shalangulwe malanga gakwe gaishilaga. **7** Nkali nneyo, Jwangali jwa Mmbonejo aiishiye, anakamula liengo nnaino, ikabheje akabhoneka mpaka pushashoywe aibhilila jula. **8** Penepo Jwangali jwa Mmbone jula pushakoposhele, ikabheje Bhakulungwa a Yeshu pushibhaisque shibhammulaje

kwa mbumu ya nkang'wa jabho, kwa ukonjelo gwa kwiya kwabho.

9 Jwangali jwa Mmbone shaishe na mashili gaka Lishetani na tenda ilapo ya unami, **10** na kwaatembanga bhowe bhalinginji munkumbi gwa bhaobhanga. Bhanganyabho shibhaobhanje, pabha bhangakundanga nkupinga bhatapulwanje. **11** Kwa nneyo a Nnungu bhanakwaalekanga bhaobhanje, bhaukulupalilanje unami. **12** Nkupinga bhaukululwanje bhowe bhaakakulipalilanga, ikabhe inakwaanonyelanga ilebho. **13** Ikabheje tunaapinjikwa kwaatendela ej a Nnungu mobha gowe kwa ligongo lyenunji, mmanganya nkupingwanga na Bhakulungwa. Pabha a Nnungu bhashinkunng'agulanga kuumila kundandubho nkupinga ntapulwanje kwa mashili gaka Mbamu, mmanganje bhandu bhabho bha ukonjelo, kwa ngulupai yenunji. **14** A Nnungu bhashinkunshemelanga yenei kupitila Ngani ja Mmbone jitwannungushiyanje, mposhelanje upo yenunji Muukonjelo gwa Bhakulungwa bhetu a Yesu Kilishitu. **15** Bhai, ashaalongo, muishimilikanje ukoto na kugabhika mmitima jenunji, majiganyo gutunnjigenyenje kwa lunguya kwetu, na kwa bhaluwa yetu. **16** Tunakwaajuga Bhakulungwa bhetu a Yesu Kilishitu na a Nnungu ainabhetu bhakutupinga, na kwa nema jabho gubhatupele kuangalala pitipiti na kulupalila kuli kwa mmbone, (*aiōnios g166*)

17 bhaangalalaye mitima jenunji na kunshimilikanga nkupinga nkombolanje mobha gowe tenda na bheleketa gali ga mmbone.

3 Kumpelo, ashaalongo, ntujujilanje nkupinga ntenga gwa Bhakulungwa upunde jenela na poshelwa kwa ishma malinga shiishitebha kunngwenunji. **2** Nnjunganje nkupinga bhatutapule na bhandunji bhangalinginji bha mmbone na bhaatendanga ikaapinjikwa, pabha nngabha bhowe bhaakulupalilanga gwene ntenga guno. **3** Ikabheje Bhakulungwa nibhaakulupalikwa.

Bhenebho shibhanshimilikanje na kunnindililanga Lishetani anakumpuganyanga. 4 Numbe uwe tukulupalile ku Bhakulungwa, kuti mmanganyanji nnatendanga na shinntendanje itunnugulilenje ila. 5 Bhakulungwa bhajilongoye mitima jenunji nkwaapinga a Nnungu, na nkwiiluma kutupegwa na a Kilishitu. 6 Ashaalongo, tunakunnajilanga kwa lina lya Bhakulungwa bhetu a Yeshu Kilishitu, mwiiiteiganje na Bhakilishitu bhakata, na bhakaakagulanga malajilo gutumpelenje. 7 Mmanganyanji mwaashayene mmumanyinji shinkuti pinjikwanga kaguya itutenda. Uwe putwaliji na mmanganya tukaliji tubhakata, 8 twangalya shalya gwayoyo kuka mundu jojowe. Twashinkukamula liengo kwa tumbilila shilo na mui nkupinga tunantopele mundu munkumbi gwenunji. 9 Twashinkutenda nneyo nngabha kuti tukapinjikwaga kujangutilwa, ikabhe nkupinga nkaguyanje itutenda. 10 Putwaliji pamo na mmanganya twannajiljenje kuti, "Mundu jojowe akaapinga kamula liengo, analye shalya." 11 Tunabheleketa genego pabha tushipilikana kuti bhapalinji bhakata munkumbi gwenunji bhakapinganga kukamula shoshowe, ikabhe kujinjilila malobhe ga bhandunji bhana. 12 Kwa lina lya Bhakulungwa bhetu a Yeshu Kilishitu tunakunnajilanga na kwaaleyanga bhene bhandunjibho bhaitimalikanje na kamula maengo nkupinga bhakolanje indu yabhonji. 13 Ikabheje mmanganyanji ashaalongo, nnatotoshelanje tenda uguja. 14 Pana kweneko apali mundu akakuukunda ntenga gutukumpeleshelanga mmaluwa muno. Ibhaga nneyo, bhai, mwiiiteiganje na jwene mundujo wala nnakungulushe nabho nkupinga akole oni. 15 Ikabheje nnantendelanje mbuti mmagongo nnjenunji, ikabhe munneyanje mbuti nnongo nnjenunji. 16 Bhakulungwa bhayene bhali shiumilo sha ulele, bhampanganje

ulele mobha gowe. Bhakulungwa bhabhe na mmanganya mmowe. **17** Kwa nkono gwangu namwene ngunajandika nnei, shalamu kopoka kwa a Pauli! Nhei ni shinguti kong'ondela bhaluwa yowe. **18** Tunakumpinjilanga mmowe nema ja Bhakulungwa bhetu a Yeshu Kilishitu.

1 Timoteo

1 Nne Pauli ntume jwa a Yesu Kilishitu, kwa pinga kwabho a Nnungu Bhaatapula na a Yesu bhali ngulupalilo yetu. 2 Ngunakunnjandishila mmwe a Timoteo mmanangu bha kweli nngulupai. Ngunakunnjujila nema na shiya na ulele, kukopoka kwa Atati a Nnungu, na a Yesu Kilishitu Bhakulungwa bhetu. 3 Ngunaapinga ntame ku Epesho, malinga shinanshondelesheyen punajendaga ku Makedonia, nkupinga mwaalimbiyanje bhandunji bhaajiganyanga majiganyo ga unami, 4 wala bhanakagulilanje ndango yangali malombolelo, na nndondonga gwa mena ga bhanyikala, gwangali mpelo, ikumbuya mitau na wala ikakwaajangutilanga bhandunji nngulupai. 5 Kwa nneyo, shitumbililwe kwa gene malajiloga, nikwaakwiyanga bhandunji bhapingananje, kwa ntima gwa mmbone, na ng'aniyo ya muntima ili ya mmbone, na ngulupai yangali ugulumba. 6 Bhandu bhananji bhashipuganikanga ni tendebhushila malobhe gangali ga mmbone. 7 Bhanapinganga kubha bhaajiganya bha malajilo ga a Musha, ikabheje bhakakugamanyanga malobhe gubhaabheleketanga, wala ibhakong'odelanga. 8 Tumumanyi kuti shalia ja a Musha ni ja mmbone, ibhaga mundu shaakagulile kwa aki. 9 Ikabheje tukumbushile kuti, shalia jangablikwa kwa ligongo lya bhandunji bhanguja, ikabhe kwa ligongo lya bhandunji bhaatendanga yangali ya mmbone, na bhakaakundanga, na bhakakwaishimiyang a Nnungu, na bhakwetenje yambi, na bhandunji bhanyatiyanga indu ya ukonjelo pa shilambolyo, na bhandunji bhakwaabhlaganga bhaakwetenje, eu bhaabhlaganga bhabhowe bhala, 10 shalia jishiblikwa kwa ligongo lya bha labhalabha, na bhaagonana ashaayene, yani, bhanabhalume kwa bhanabhalume, na bhanabhakongwe

kwa bhanabhakongwe, bhandunji bhaajibhangga bhandu, na bhandunji bha unami, na bhandunji bhaalumbilanga kwa unami, na bhaatendanga shindu shoshowe shikana malajilo ga kweli. **11** Gene majiganyogo mugaabhoneka, Nngani ja Mmbone ja a Nnungu bha ukonjelo na bha mboka, jimbegwilwe nunguye. **12** Ngunakwaatendela ej a Yesu Kilishitu bhambele mashili ga kamula liengo lyangu. Ngunakwaatendela ej a pabha bhashimona nne kuti najwaakulupalilwa, gubhang'agwile naatendele liengo lyabho, **13** nkali bhukala gula, natendaga kwaatukana na kwaashima, na kwaatendela nngomo. Ikabheje a Nnungu gubhamonele shiya, pabha ngakweteje ngulupai na ngashimanya shingutenda. **14** Ikabheje Bhakulungwa bhetu bhashinkumba nema ja punda, gubhambele ngulupai na pingana, nkulundana na a Yesu Kilishitu. **15** Ni lilobhe lya kulupalika kaje, na linapinjikwa liposhelwe kuti, a Yesu Kilishitu bhashinkwiya pa shilambolyo kukwaatapulanga bhakwetenje ilebho. Na nne, ni napundile kulebha punda bhowenji, **16** ikabheje a Nnungu gubhamonele shiya nkupinga a Kilishitu bhalanguye kwiipililila kwabho kowe mwangu nne naaliji nankulebha kupunda bhowe, nkupinga nne mme jwa langulwa ku bhandunji bhowe, shibhajiye kwaakulupalilanga na poshela gumi gwa pitipiti. (*aiōnios g166*) **17** Kwa bhenebho bhali a Mpalume bha pitipiti, bhakawa na bhakaabhoneka, bhene bhali a Nnungu jikape, kwa bhenebho jibhe ishima, na ukonjelo pitipiti! Amina. (*aiōn g165*) **18** Mwanangu Timoteo, ngunakupa gene malajilo gano, malinga malobhe gunabhalanjilwe bhukala na ashinkulondola bha a Nnungu. Ugatende gene malobhego gabhe shikomanilo shako nkukomana ukoto ngondo jako. **19** Ukole ngulupai na ng'aniyo ya mmbone. Bhandunji bhana gubaikanilenje ng'aniyo yabbonji,

niobhiya ngulupai yabbonji. 20 Munkumbi gwabhonji bhapalinji, a Imeneyo na a Alekishanda, bhene bhunimpele Lishetani, nkupinga bhaajiganywanje bhanaatukananje a Nnungu kabhili.

2 Bhai sha ntai kaje, nnjunganje na tenda eja kwa a Nnungu, kwa ligongo lya bhandunji bhowe, 2 kwa ligongo lya bhapalume, na bhowe bhakwetenje ukulungwa, nkupinga tutame ndamo ja ulele pamo na kwaakuya a Nnugnu, na ndamo ja ukonjelo na gundu.
3 Shene shindushi ni sha mmbone, shikwaanonyela a Nnungu, bhaatapula bhetu, 4 bhaapinga bhandu bhowe bhatapulwanje, na kuimanya indu ya kweli. 5 Pabha bhapali a Nnungu bhamope, na bhapali bhaalundanya bhamo, bhaalundanya bhandu na a Nnungu, ni mundu, a Yeshu Kilishitu, 6 bhene bhaishoshiye bhayene kwaatapulanga bhandu bhowe. Gwenego pugwaaliji ukong'ondelo, gakaishileje malanga gakwe ga pwaa, kuti a Nnungu bhanapinga kwaatapulanga bhandu bhowe. 7 Kwa lyene ligongolyo, njibhikwa kubha ntume, na nkulunguya, na nkujiganya, ku bhandu bhangabha Bhayaudi, ga ntenga gwa ngulupai na kweli. Ngunabheleketa kweli nngabha unami.
8 Bhai, shingupinga nne, popowe punkuimananga nkujuga, ngunaapinga bhanabhalume bhaajunganje a Nnungu, akuno bhajinwilenje makono gamatakaywe, bhalijuganga gwangali nnjimwa wala mitau. 9 Nneyo peyo, bhanabhakongwe bhawalanje nngubho ya mmbone, na ya shigundu, na ya langula kwiitimalika ntima, na nngabha kwiikelengelela kwa tibha umbo, wala kwa shaabhu na lulu, eu nngubho ya galama. 10 Ikabheje kwa itendi ya mmbone, malinga shibhaapinjikwanga bhanabhakongwe bhakwaajogopanga a Nnungu. 11 Bhanabhakongwe bhajiganyanje kwa kwiitimalika, akuno bhalikundanga yowe. 12 Nne nguti, jwankongwe

anannjiganye wala kuntagwala jwannume, ikabhe aitimalishe.

13 Pabha a Adamu ni bhatandwibhe kupanganywa, kungai a Awa. **14** Na wala a Adamu bhangatembwa, ikabhe bhakongwe ni bhatembilwe, gubhajinjile muilebho. **15** Ikabheje, bhakongwe shibhatapulwe kwa bheleka bhana, ibhaga shibhalonjeye nngulupai na nkupingana, na ukonjelo, na ntima gwa kwiitimalika.

3 Ni kweli kuti, mundu apinga kubha kalongolele jwa likanisha, anapinga liengo lya mmbone. **2** Bhai inapinjikwa kalongolele abhe mundu anakole ilebho ku bhandunji, na analombe matala, na abhe jwa kwiluma na jwa ishimika, na jwa lunda, na jwa mituka na akombola kujiganya, **3** nngabha mundu jwa kolelwa na nngomo, ikabhe abhe jwa kwitimalika na jwangali mitau, na anabhe mundu jwa kunnonyela mbiya, **4** mundu akombola kulongoya ukoto bhandu bha likaja lyakwe, na akombola kwaatendanga bhaanagwe bhampilikananje na bhakolanje ishma. **5** Pabha monaga mundu akakombola kwaalongoyanga ukoto bhandu bha likaja lyakwe, shakombole bhuli kulilongoya likanisha lya a Nnunu? **6** Na kabili mundu akanabhe kwiishimilika ukoto nngulupai, anaagulwe kubha kalongolele, nngakabha anakwiipuna niukumulwa malinga shatendilwe Lishetani. **7** Abhe mundu jwa shuma uguja kubhandunji bha kunyenje, nkupinga anagambwe nitanjila nniyau lika Lishetani. **8** Nneyo peyo na mashemashi nnikanisha bhabhanganje bhandunji bha ishimika, na bhanabhanganje bha malobhe malobhe, na bhanabhanganje bha kolelwa, na bhapinganga mmbiya ya tokomaya, **9** bhabhanganje bhaakagulilanga ngulupai ya kweli. **10** Kwa nneyo bhatandubhanje kulingwa, kungai bhatendanje liengo lya jangutila nnikanisha, bhabhonekangaga kuti bhangalinji itendi ya nyata. **11** Nneyo peyo na ashaakongo bhabhonji,

bhabhanganje bhaishimikanga, bhanabhanganje bha lung'wenyi, bhabhanganje bhakwiitimalika, na bhaakulupalikanga kwa kila shindu. **12** Mashemashi bhanalombanje matala, numbe bhakombolanje kulongoya ashibhana bhabhonji na makaja gabhonji ukoto. **13** Pabha bhatendanga liengo ukoto nnikanisha, bhanapatanga kushimilika ukoto, nikola mashili ga bheleketa kwa makangala, ga ngulupai yabhonji nkulundana na a Yesu Kilishitu. **14** Ngunakunnjandishila gegano, akuno nguliganishiya cuti ngakabha kwiya kweneko. **15** Ikabheje monaga ngabhaga kwiya, bhai mmumanyanje shiikupinjikwa bhandu kutama nnikaja lya a Nnungu, yani nnikanisha lya a Nnungu bhakwete gumi, bhalilipoto, na nshingi gwa kweli. **16** Bhai, pangali lipamba lyolyowe ga shinjubhi shikulu sha dini jetu, A Kilishitu bhakoposhele kwa shiilu sha shigundu, gubhakong'ondelwe naka Mbamu jwa Ukonjelo cuti bhakwete aki, gubhabhoneshe na ashimalaika. Gubhalungwiye ku bhandu bha ilambo ina. Gubhakulupalilwe pa shilambolyo, nigubhanyakwilwe kunani muukonjelo.

4 Bhai Mbamu anabheleketa gwangali nng'iyo, cuti mobha ga kumpelo bhananji shibhalekanje ngulupai, nikagulila mitima ja unami na majiganyo ga ashimaoka. **2** Gene majiganyogo kugakopoka ku bhandunji bhanami na ugulumba, ng'aniyo ya mmitima jabhonji iangabhanyishe mbuti itiniyiwe na moto. **3** Bhalikwaalimbiyanga bhandunji bhanalombanje na bhanalyanganje yalya ina. Ikabheje a Nnungu bhashinkwiipanganya yene yalyayo, nkupinga bhakwetenje ngulupai na kuimanya ya kweli bhala, bhaiposhelanje nikwaatendela eja. **4** Pabha indu yowe ibhapengeny a Nnungu ni ya mmbone, wala shakwa sha kanwa, monaga shiposhelwaga kwa tenda eja, **5** pabha shishitakaya kwa lilobhe lya a Nnungu

na kwa juga. **6** Monaga shimwaakumbushiyanje ashaalongo ajenunji genego, shimme ntumishi jwa mmbone jwa a Yesu Kilishitu na nnelilwe kwa malobhe ga kweli ga ngulupai, na majiganyo ga mmbone gunkagulile. **7** Ikabheje mwiileshe ndango ya bhukala yangabha ya dini ya bhanabhakongwe bhakongopa, mwiiyobhelesheye ndamo ja kwaajogopa a Nnungu. **8** Pabha kushiyobhelesheya shiilu kwa ing'ando, kunapwaa kashoko, ikabheje kuiyobhelesheya kwaajogopa a Nnungu, kunapwaa kwa indu yowe, pabha tunabhikwa mmiadi ja pata gumi gwa nnaino, na gwa mobha gakwiyago. **9** Shene shibheleketosho ni sha kulupalika na shinapinjikwa shiposhelwe kwa kaje. **10** Pabha tunakwiabhuva na tumbila kwa ligongo lya genego, tunakwaakulupalila a Nnungu bhakwete gumi, bhaatapula bha bhandu bhowe, na kaje kwa bhaakulupalilanga bhala. **11** Bhai mwaalajilanje na mwaajiganyanje gene malobhego. **12** Mundu jojowe anannyegaye ga ushanda gwenu, ikabheje mme mmandu bha kagulwa kwa bhaakulupalilanga, muibheleketi na muitendi, na nkupingana, na nngulupai, na nkuikonjeleya. **13** Nnatotoshele kwaashomelanga bhandu Majandiko na lunguya, na kujiganya mpaka pushing'ishe. **14** Nnaleshe kutendela liengo shiloi shimposhele kwa bhishilwa makono na bhanangulungwa, na kwa malobhe ga ukulondola shila. **15** Ntumbile kutenda genego, nkupinga kwiiigongolela kwenu kumanyishe na bhandu bhowe. **16** Muiteije mmayene na majiganyo genu, nnaleshe tenda genego, pabha ntendaga genego shimwiitapule mmayene, na bhakumpilikanishiyangabho.

5 Nnaakalipile bhakongopa, ikabhe mwaaleye mbuti ainabhenu. Na bhashanda mwaatendelanje mbuti ashaapwenu, **2** bhanabhakongwe bhakongopa, mbuti anyinabhenu, na bhalil

mbuti ashaalumbu bhenu, nkuikonjeleya mowe. **3** Mwaalelanje bhanabhakongwe bhalinginji bhashitenga bha kweli. **4** Ikabheje bhashitenga bhakwete bhana eu bhaukulu, bhana eu bhaukulubho, bhaijiganyanje kutenda ipinjikwa na dini kwa ashaalongo ajabhonji nkwaalelanga bhaakwetenje, pabha genego ni ga pingwa na a Nnungu. **5** Bhai bhakongwe bhalil bhashitenga kweli, bhangali mundu jwa kwaajangutila, bhenebho bhashibhika ngulupai yabho kwa a Nnungu, na bhanalonjeya nkwaatindibhalila na nkwaajuga shilo na mui. **6** Ikabheje nshitenga akagulila ilokoli yangali ya mmbone jwenejo awile, nkali alonjeye. **7** Mwaalajilanje genego, nkupinga bhanagambwanje. **8** Ikabheje mundu jojowe alepela kulela ashaalongo ajakwe, yani bhandu bha nnikaja lyakwe, jwenejo ajikanile ngulupai, numbe jwangali jwa mmbone kupunda mundu jwangali ngulupai. **9** Bhakongwe bhashitenga bhanajandikwe munkumbi gwa bhashitenga bhakaishile yaka makumi shita, numbe bhabhe bhakongwe bhalombilwe na kamope, **10** na bhalumbililwe itendi ya mmbone, nkulela bhana bhabho ukoto na nkuposhela bhajeninji, na nkwaatendelanga ya mituka bhandunji bha ukonjelo na nkujangutila bhandunji bhalaga, na nkutumbilila kutenda ya mmbone. **11** Ikabheje bhashitenga bhalinginji bhalil, nnaajandikanje, pabha shilokoli sha nshiilu shipundaga, shibhalekanje kwaapinga a Kilishitu, nilombwa kabhili, **12** penepo shibhaukumulwanje kuti bhashilekanga ngulupai jabhonji ja ntai. **13** Numbe pamo na genego, bhashitenga bha nneyo paatandubha ukata, na kukonangona mmajumba ga bhandunji, na nngabha ukatape, ikabheje na lungw'enyi, na kwijijinjiya mmalobhe ga bhananji, akuno bhalibheleketanga ikapinjikwa bheleketa. **14** Bhai nne punguganishiya, bhashitenga

bhakanabhe kongopalanga, bhalombwanje na bhakolanje bhana na bhagoyanje nyumba yabhonji, nkupinga ashaamagongo ajetu bhanakolanje sha kutugamba. **15** Pabha, bhashitenga bhananji bhaobhilenje nikunkagula Lishetani. **16** Ikabheje bhakongwe Bhakilishitu, bhakolaga alongo ajabho bhashitenga, bhanapinjikwa kwaajangutila, nngabha kulileshela likanisha lyene liengolyo, nkupinga likanisha likole liengo lya kwaalelanga bhashitenga bhapundilenje kulaga. **17** Bhanangulungwa bhatendanga liengo ukoto nnikanisha, inapinjikwa bhalipwanje pabhili, na kaje bhene bhatendanga liengo lya lunguya na jiganya bhala. **18** Pabha Majandiko ga Ukonjelo ganalugula, "Nnatabhe kangw'a ng'ombe alilibhata yalya nkukubhata." Kabhili, "Nkamula liengo anapinjikwa kupata nshaala gwakwe."

19 Nnakunde malobhe ga kwaashitakiya bhanangulungwa bha likanisha, gwangali bhaakong'ondela bhabhili eu bhatatu. **20** Bhene bhatendanga ilebho, mwaaleyanye palugwinjili, nkupinga bhananji bhajogopanje. **21** Ngunakunnajila pa meyo ga a Nnunu na a Yesu Kilishitu na ashimalaika bha ukonjelo, nkamule gene malajilogi gwangali luagu wala kummika mundu pa ligaa. **22** Nnatende shangu kummishila mundu makono. Wala nnaijinjiye muilebho ya bhananji, mwiiteije nnainyatiye. **23** Tandubhila nnaino nnangw'e mashipe, ikabheje na divai kashoko, kwa ligongo lya matumbo genu gakumpoteka na ilwele inkulwala lwala. **24** Yambi ya bhandunji bhana inabhoneka gwangali nng'iyo na inalongolela kuukumu, ikabheje yambi ya bhananji pabhoneka kungai. **25** Nneyo peyo na itendi ya mmbone, inabhoneka gwangali nng'iyo na nkali gakamanyikago gakaishika.

6 Bhatumwa bhowe bhanapinjikwanga kwaishimunji bhakulungwa bhabhonji, nkupinga lina lya a Nnunu na

majiganyo getu ganatukanwe. **2** Bhatumwa bhalinginji
bhakulungwa bhabhonji Bhakilishitu, bhanaanyegayanje pabha
ni ashaalongo ajabhonji. Ikabhe, mbaya bhaatumishilanje ukoto,
pabha apwaika kwa liengo lyabhonji, ni Nkilishitu nnjabhonji.
Nnapinjikwa nnjiganye na nnunguye genega **3** Mundu jojowe
ajiganya majiganyo gana ga kanana na gegano, na akaakunda
malobhe ga gumi ga Bhakulungwa bhetu a Yeshu Kilishitu,
wala majiganyo ga dini ja kweli, **4** jwenejo anakwiipuna na
wala akakushimanya shoshowe, ikabhe jwenejo ashikola
shalubha sha pinga mitau, na malobhe ga nngomo ga kumbuya
lupimililo, na mpwai na matukano na nnjimwa, **5** na mitau jangali
mpelo jikoposhela kubhandu bhaangabhanikenje lunda, na
bhangalinginji ya kweli. Bhaganishiyanga cuti dini mpanda
gwa patila utajili. **6** Ikabheje dini ja kweli jinakumpa mundu
kupwaika kaje, atogoleлага na yakwete. **7** Pabha pa shilambolyo
twangaika na shindu, na tukajabhula na shindu. **8** Kwa nneyo
tukolaga shalya na nngubho, tutogolele na yeneyo. **9** Ikabheje
bhapinganga shipato shikulungwa pagwila mmalinjilo, nitanjila
nniyau lya ilokoli ya indu yaigwinji, ya nyata na ya mboteko
ikwaajinjiyang bhandunji nkuobha na nkuangabhanika. **10**
Pabha shiumilo shikulungwa sha indu yowe ya nyata, ni
kupinjiya ela. Na bhananji nkupinjiya ela bhashilekanga
nngulupai, nikwijjweka mmboteko ya punda. **11** Ikabheje mmwe,
mmandu bha a Nnungu, muiembuye na genego. Nkagulile aki,
na kwaatindibhalila a Nnungu, na ngulupai, na pingana, na
kwiipililila na kwiitimalika. **12** Nkomane ukoto ngondo ja ngulupai,
na mpate gumi gwa pitipiti gunshemelwe gula, gumwapatile
nkakundeje pa bhaakong'ondela bhabhagwinji. (aiōnios g166) **13**
Ngunakunnajila pa meyo ga a Nnungu bhakwiipa gumi indu

yowe, na a Yeshu Kilishitu, bhakong'ondele ukoto pa meyo ga a Pontio Pilato, **14** kuti nkamule malajilo genu kwa kunda na kulupalika, mpaka lyubha lishibhaishe Bhakulungwa bhetu a Yeshu Kilishitu. **15** Na kuika kwabho shikubhe mobha ga pwaa, gabhishilwe na a Nnungu Bhaatagwala jikape, Bhakulungwa bha bhakulungwanji. **16** Ni bhenebho jikape bhakawa, bhatama pashilangaya shikabhandishilwa naka mundu. Wala jwakwapi mundu abhabhweni eu akombola kwaabhona. Bhenebho ni bha ishimiywa, na bhakwete mashili ga tagwala pitipiti! Amina. (aiōnios g166) **17** Mwaalajilanje bhandunji bhakwetenje utajili pa shilambolyo pano, bhanaipunanje na bhanaikulupalilanje indu ibhakwetenje ikaakulupalika, ikabhe bhaakulupalilanje a Nnungu, bhakutupa indu yowe kwa ntuka gwabho nkupinga tuinonyele. (aiōn g165) **18** Mwaalajilanje bhatendanje uguja, bhapundanje kutenda ya mmbone, na bhakolanje ntuka akuno bhaliegwanga kugabhana indu yabhonji na bhananji. **19** Kwaatenda nneyo, shibhaibhishilanje shibhiko sha mmbone kwa mobha gakwiyago. Nkupinga bhapatanje gumi gwa kweli. **20** Mmwe a Timoteo, nngoye shimmishilwesho. Mwiembuye na nkungulu gwangali gwa mmbone, na mitau ja ungumba ga shene shishemwa lumanyio, mbena unami. **21** Pabha bhananji bhaitapilenje kuti bhakwetenje lumanyio, bhashilekanga ngulupai. Ngunakumpinjilanga nema ja a Nnungu.

2 Timoteo

1 Nne a Pauli, kwa pinga kwabho a Nnungu, njemilwe kubha ntume jwa a Yesu Kilishitu, nkupinga nunguye ga gumi gubhalajile a Nnungu tupegwe, nkulundana na a Yesu Kilishitu, **2** ngunakunnjandishila mmwe mmanangu a Timoteo bhungumpinga. Ngunakumpinjila mboka, na shiya, na ulele ikoposhela kwa Atati a Nnungu, na a Yesu Kilishitu Bhakulungwa bhetu. **3** Ngunakwaatendela ej a Nnungu bhungwatendela liengo kwa ntima gwa mmbone malinga shibhatendangaga ashaambuje bhukala, ngunakwaatendela ej a kila pungukumbushila mmwe mobha gowe, nkujuga kwangu shilo na mui. **4** Pungukumbushila minyoi jenu, ngunalokolila kummona nkupinga kuangalala kwangu kupunde. **5** Ngunakumbushila ngulupai jenu ja kweli, ngulupai jatandubhile kwa anakulu bhenu a Loishi na anyinabhenu a Eunike. Kwa nneyo ngunakulupalila kuti, jipali nkali kwenu mmwe. **6** Kwa nneyo ngunakunkumbushiya kuti nkwiye shipaji sha a Nnungu, shimposhele punammishile makono. **7** Pabha a Nnungu bhangatupa Mbumu jwa bhoga, ikabhe Mbumu jwa mashili, na jwa pingana, na jwa kwiitimalika. **8** Bhai nnakole oni kong'ondela ga Bhakulungwa bhetu, nkali kungolela oni nne ndabhlwe kwa ligongo lyabho. Ikabheje mme pamo na nne mmboteko kwa ligongo lya Ngani ja Mmbone, malinga shinkupegwa mashili na a Nnungu. **9** Bhene bhatutapwile nikutushema tubhe tubhandu bhabho bha ukonjelo, nngabha kwa ligongo lya itendi yetu, ikabhe kwa ligongo lya pinga kwabho na nema jabho bhayene. Jene nemaji twashinkupegwa nkulundana na a Yesu Kilishitu kuumila bhukalago. (aiōnios g166) **10** Kwa nneyo, jene nemaji nnaino jishiibhulwa bhakayuyweje bhaatapula bhetu a Yesu Kilishitu. Bhenebho bhashikugapeya mashili ga

shiwo, nipeleshela gumi gwa pitipiti kwa Ngani ja Mmbone.

11 Kwa ligongo lya jene Ngani ja Mmboneji, nne njagulwa kubha nkulunguya, na ntume na nkujiganya. **12** Kwa ligongo lya genego, nne ngunapotekwa, nkali nneyo ngakola oni, pabha naamanyi bhene bhungwaakulupalila bhala, numbe nimumanyi kuti shibhashibhishile ulinda shene shibhambele shila, mpaka kuishila lyubha lya mpelo. **13** Nkamulile ukoto majiganyo ga kweli guninnjigenye gala, na ngulupai na nkupingana kwa nkulundana na a Yesu Kilishitu. **14** Kwa Mbumu jwa Ukonjelo atama nkati jetu, nshibhishile ulinda shene shindu sha mmbone shimegwilwe shila. **15** Malinga shimmumanyi kuti bhandu bhowe bha ku Ashia, bhaneshilenje, munkumbi gwabhonji bhaapali a Pigelo na a Elimogene. **16** Bhakulungwa bhaabhonelanje shiya bha ulongo bha a Oneshipolashi, pabha bhatendaga ndaga ntima wala bhakakolaga oni ga tabhwa kwangu. **17** Ikabhe bhakaishje ku Loma, gubhatumbile kunoleya, mpaka gubhamweni. **18** Bhakulungwa a Yesu bhaabhonele shiya sha a Nnunu lyene lyubhaloy! Na mmwe mmumanyi indu yaigwinji ibhandendele ku Epesho kula.

2 Bhai ugwe mwanangu, ukole mashili kwa nema jitupegwa nkulundana na a Yesu Kilishitu. **2** Na majiganyo gumpilikene ngulijiganya pa bhaakong'ondela bhabhagwinji, numbe mmwe mwaajiganyanje bhandunji bhaakulupalika, bhaakombolanga kwaajiganyanga bhananji. **3** Gwiilunde mmboteko pamo na nne, malinga nkomanan ngondo jwa mmbone jwa a Yesu Kilishitu. **4** Linjola pabha nkomanan ngondo akakwiibhuka nkukamula maengo gana, pabha shaapinga ni kwaanonyeya bhakulungwa bha likundi lyakwe. **5** Nneyo peyo mundu apwatanila upo mwiiing'ando, akapegwa upo ya kombola monaga jwangakaguva

ikubho ya nng'andogo. **6** Mundu atumbila kulima, ni apinjikwa abhe jwantai kupata shipeta sha mauno. **7** Nnganishiye kaje malobhe gungummalanjila gano, pabha Bhakulungwa shibhampe lumanyio lwa kugamanya gowe. **8** Mwaakumbushile a Yesu Kilishitu bhayushiyewe bhakaweje, bha shipinga sha a Daudi, malinga shijitaya Ngani ja Mmbone jingulunguya jino. **9** Kwa lyene ligongolyo ngunapotekwa nitabhwa mbuti nkulebha, ikabheje lilobhe lya a Nnungu likatabhwa. **10** Kwa nneyo ngunakwiipililila gowe, kwa ligongo lya bhandunji bhaagwilwenje na a Nnungu, nkupinga na bhalabhonji bhapatanje ntapulo nkulundana na a Yesu Kilishitu, na ukonjelo gwa pitipiti. (*aiōnios g166*) **11** Na malobhe ga kulupalika gakuti, "Monaga tuwile pamo na bhenebho, nneyo peyo shitulame pamo na bhenebho. **12** Monaga shituipililile, shitutagwale pamo na bhenebho. Na ibhaga shitwaakane bhenebho, na bhalabho shibhatukane uwe. **13** Nkali tubhe bhangakulupalilanga, bhenebho ni bhaakulupalikape, pabha ikaakomboleka kwiikana bhayene." **14** Bhai, mwaakumbushiyanje bhandu gene malobhego, na mwaaleyanye pa meyo ga a Nnungu, bhanakolanje malobhe ga mitau, pabha gangali mana, ikabhe ganapuganya bhaapilikananga. **15** Ntumbile kwilanguya kwa a Nnungu kuti mmaakulupalika, ntumishi jwangali oni, nnilunguya kwa aki ntenga gwa kweli gwa a Nnungu. **16** Mwiembuye na nkungulu gwangali mana na gwa shingumba, pabha ganakwaashoyanga bhandunji nngulupai niileka kwaajogopa a Nnungu. **17** Majiganyo gabhonji ganajambushiya malinga libhanga shilijenela nshiiyu, munkumbi gwabhonji bhapalinji a Imenayo na a Piletushi. **18** Bhanganyabho bhapuganikenje niileka ya kweli, bhalinkutinji kuyuywa kwa bhandunji kuitile, nipuganya ngulupai ya bhandu bhabhagwinji. **19** Ikabheje a

Nnungu bhabhishile ishi ya nyumba, ishimilishwe kwa olela ukoto, na gene malobhe gano, gashijandikwa pantundu yene ishii, "Bhakulungwa bhaamanyi bhandunji bhabho," na kabhili, "Kila ashema lina lya Bhakulungwa, aleshe ilebho." **20** Nnyumba jikulungwa ikaapagwa indu ya shaabhu na ela pe, ikabhe na indu ya mikongo na ya lilongo, ina ya tendela maengo gamashoko ina ya maengo gamakulungwa. **21** Bhai mundu aikonjeleyaga niileka ilebho, shaabhe mundu jwa maengo gamakulungwa, sha ukonjelo shibhishilwe na bhayene nyumba, shaapwae kwa kila liengo lya mmbone. **22** Mwiembuye na ilokoli ya ushanda, nkagulile uguja na ngulupai na kупingana na ulele, pamo na bhene bhakwaajuganga Bhakulungwa kwa ntima gwa mmbone. **23** Mwiembuye na mitau ja shingumba na jangali mana, pabha mmumanyi kuti yeneyo inakumbuya mipwai. **24** Numbe ntumishi jwa Bhakulungwa akapinjikwa kubha jwa mipwai, ikabhe jwa kwiitimalika kubhandu bhowe, akombola kujiganya na kwiipililila. **25** Anapinjikwa kwaaleyanga kwa kwiitimalika bhakuntaukanga, pana a Nnungu shibhaajalianje kwiipeta nikagula ya kweli. **26** Nkupinga lunda lwabhonji lwaabhujilanje kabhili nikolobhoka nniyu lika Lishetani, lyabhatanjiyenje nkupinga bhatendanje yapinga jwenejo.

3 Ikabheje nnapinjikwa mmumanye kuti mobha ga kumpelo shigabhe ga atali. **2** Pabha, bhandunji shibhabhanganje bhakwiipinganga ashayenenji, na bhapinganga mmbiya, na bhakwiiniyanga, na bha mbwinya, na bhaatukananga, na bhakakwaakundanga bhaakwetenje, na bhakaapinganga kutenda eja, na bhangalinginji bha mmbone. **3** Shibhakoposhelanje bhandunji bhakakwaapinganga ashaalongo ajabhonji, na bhakaapinganga kumaliya mipwai, na bhalambililanga,

na bhakakwiitimalikanga, na bha kolanga nngomo, na bhakaapinganga kutenda ya mmbone, **4** bhaatendebhukana, na bhamitau, na bhakwiipunanga, na bhapinganga ya manong'a, kupunda kwaapinga a Nnungu. **5** Bhalinginji mbuti bhakwaatindibhalilanga a Nnungu, ikabheje bhalikananga mashili ga a Nnungu, mwiembuye na bhene bhanganyabho. **6** Pabha munkumbi gwabhonji bhapalinji bhaowelanga mmajumba ga bhandu, nikwaatekeyanga bhanabhakongwe bhangalinginji lunda, bhakwetenje mishigo ja ilebho na ilokoli yaigwinji, **7** bhene bhanabhakongwebho bhalikwiijjiganyanga mobha gowe, ikabheje bhakakolanga lunda Iwa kuimanya indu ya kweli. **8** Ni malinga a Yaneshi na a Yambuleshi bhaataukenje a Musha, nneyo peyo na bhene bhaataukanga indu ya mmbone, bhandu bhaangabhanikenje lunda Iwabhonji, bhakanilwenje nngulupai. **9** Ikabheje bhakapundanga kutenda nneyo, pabha ubhelu gwabhonji shigumanyishe na bhandu bhowe, malinga puyaliji kwa a Yane na a Yambule. **10** Ikabheje mmwe nkagwile majiganyo na ndamo jangu, na ng'aniyo na ngulupai yangu, na kwiitimalika kwangu, na kупingana na kwiipililila kwangu, **11** ga mboteko na laga. Yani ku Antiokia, na ku Ikonio, na ku Lishitila, na gowe ga jogoya gunaipililile! Ikabheje Bhakulungwa gubhandapwile mowemo. **12** Bhai, bhowe bhaapinganga kutama nkwaakulupalila a Kilishitu Yeshu, shibhapotekwanje. **13** Bhandu bha ilebho, na bha unami shibhapundanje kutenda ilebho, bhalitembanga na tembwanga. **14** Ikabheje, mmwe ntame mmajiganyo gunnjigenywe nikugaposhela ukoto gala, pabha mwaamanyinji bhannjigenyenje bhala. **15** Numbe kuumila pumwaliji mmashoko mwagamanyi Majandiko ga Ukonjelo, ga kumpa ng'aniyo ya lunda ya kuntapula kwa ngulupai ya

nkulundana na a Yeshu Kilishitu. **16** Majandiko gowe gajandikwe nkulongoywa na Mbumu jwa a Nnungu, ganapwaa nkujiganya na nkuleya bhandu muilebho yabhonji, na kwaalongooyanga, nikwaapanganga aki, **17** nkupinga mundu jwa a Nnungu atimilile, na aengwe kutenda maengo gowe ga mmbone.

4 Ngunakunnajila pa meyo ga a Nnungu na a Yeshu Kilishitu, bhaapinga kwaukumulanga bhandunji bhabhakoto na bhawilenje, pene pushibhaishe mu upalume gwabho. **2** Nnunguye lyene lilobheli, na nnjime ukoto mobha gowe, gapwaa na ganngapwaa, na nkalipile, na nnimbiye, na mwaaleyanye bhandu nnikwaajiganya kwiitimalika. **3** Pabha shigaishe mobha gushibhakananje majiganyo ga kweli ga gumi, ikabheje shibhakagulilanje ng'aniyo yabhonji, nikwiigumbashiya bhaajiganya bhabhonji bhabhagwinji, nkupinga bhapilikinanje indu ikwaanonyelanga. **4** Numbe shibhakananje kupilikanishiya malobhe ga kweli, nitendebhushila ndango ya unami. **5** Ikabheje mmwe ntame nkwiitimalika na indu yowe, mwipiililile mmboteko, nkamule liengo lya lunguya Ngani ja Mmbone, mmalishiye liengo lyenu. **6** Pabha, nnaino nne ngunashoywa mbuti mbepei, malanga gangu gawa gaishile. **7** Njikomana ngondo ja mmbone ja ngulupai, mwanja nigumaliye, na njikamulila ukoto ngulupai. **8** Nnaino, njibhishilwa shilemba sha aki shishibhambe Bhakulungwa lyene lyubhalyo, numbe ngabha nne pe nne, ikabheje na bhandu bhowe nkwaapinga bhanalolelanga kuika kwabho. **9** Ntende shangu kwiya akuno. **10** Pabha a Dema ga pinga indu ya pa shilambolyo, bhashineka gubhapite ku Teshalonike, na a Keleshike gubhapite ku Galatia, na a Tito bhapite ku Dalimatia. (aiōn g165) **11** Bhali na nne apano, ni a Luka jikape. Mwaaloleyeye a Maliko, nnjiye nabho, pabha

bhananyanguta mmaengo. **12** A Tikiko naatumile ku Epesho. **13** Pushinnjiyepo nnyigalile likoti lyangu lineshile kwa a Kalipashi bha ku Toloa, nnyigalile na itabhu, na kaje ya mapende ila. **14** A Alekishanda bha yana itale bhala, bhashindendela ya nyata yaigwinji, Bhakulungwa shibhaalipe kwa itendi yabho. **15** Na mmwe mwiiteije na bhenebho, pabha bhashinkutauka kwa puya malobhe getu. **16** Punaibheleketelaga malobhe ga kwiitapula gwa ntai, jwakwa mundu ajimi na nne kunyangutila, ikabhe bhowe bhashinkunekanga, nne ngunakwaajujilanga kwa a Nnungu bhalleshelewanje, na bhanabhonekanje kulebha kwa genego! **17** Ikabheje Bhakulungwa gubhajimi na nne, nigubhambele mashili, nkupinga nunguye ntenga gula ukoto, nkali ku bhandu bha ilambo ina, na nne gundapwilwe nshiwo, mbuti ngutapulwa nkang'wa ja imba. **18** Bhakulungwa shibhandapule na indu yowe ya nyata, shibhandole ng'ishe ku Upalume gwabho gwa ku nnungu. Ukonjelo ni gwabho pitipiti! Amina. (*aiōn g165*) **19** Mwaalamushilanje a Pilishika na a Akula na bhandunji bha munngwabho a Oneshipolashi. **20** A Elashito kubhatama ku Kolinto, na a Tolopimo kunaaleshile ku Mileto, bhalwele. **21** Ntende shangu kwiya akuno, gakanabhe ishila mobha ga mmbepo. A Ebhulo bhanakunnamushilanga, na a Pudenishi na a Linushi, na a Kilaudia, na Bhakilishitu bhowe. **22** Bhakulungwa bhatame muntima gwenu. Nema jitame na mmanganyanji mmowe.

Tito

1 Nne Pauli, ntumwa jwa a Nnungu na ntume jwa a Yesu Kilishitu, njitumwa kwa ligongo lya bhanndunji bhaagwilwenje na a Nnungu, kwaalongoyanga ku ngulupai na kweli na namuna ja mmbone ja tama malinga shibhaapinga a Nnungu. **2** Na kwa nneyo, ngulupai yabhonji yaapeleshelanje nnolelo gwa gumi gwa pitipiti gubhalajile a Nnungu, kuumila bhukala shilambolyo shikanabhe panganywa, na bhenebho bhakabheleketa ya unami. (aiōnios g166) **3** Gubhagatendile malobhe gabho gamanyishe kwa malanga gubhapanjile, kwa ntenga gubhangamwiye, niinajila nunguye kwa mashili gabho bhayene a Nnungu bhaatapula bhetu. **4** Jene bhaluwa jino, ngunakukujandishila ugwe Tito mwanangu jwa kweli nngulupai jikutulundanya pamo. Nema na ulele kukopoka kwa Atati a Nnungu na kwa a Yesu Kilishitu Bhaatapula bhetu, ibhe na ugwe. **5** Nashinkukuleka ku Kilete shilambo shitimbililwe na mashi, nkupinga umalishiye maengo galepeshe, na kwaabhikanga bhanangulungwa mmakanisha, kila shilambo malinga shinakulajile. **6** Nkulungwa jwa likanisha anabhe mundu jwa gambwa. Alombe jwankongwe jumo, anabhe mundu jwa matala, na ashibhana bhabho bhabhanganje Bhakilishitu ukoto, wala bhanakolanje sha gambwa kwa itendi ya shonanga na ungakunda. **7** Pabha nkulungwa jwa likanisha anapinjikwa abhe mundu jwangali sha gambwa, pabha jwenejo ni mundu ajimilila liengo lya a Nnungu, anabhe mundu jwa mbwinya, eu jwa nngomo, eu jwa kolelwa, na wala anabhe jwa mipwai, na anabhe mundu jwangajogopa tokomala ga mmbiya, **8** ikabhe abhe mundu jwa poshela bhajeninji na bhapita mpanda, na apinga ya uguja, na abhe mundu jwa lunda na jwa pinga ya aki, na abhe mundu jwa ukonjelo na kwiluma. **9** Anapinjikwa abhe mundu

jwa kamulila ukoto lilobhe ly a ngulupai malinga shajigenywe, nkupinga akombole kwaataganga ntima bhandu kwa majiganyo ga kweli, na abhapeyanje bhandu bhaataukanga. **10** Pabha bhapalinji bhandunji bhabhagwinji bhakaakananga, bhakwetenje malobhe gangali mana, bhanaminji, kajekaje bhaatolelelanga ga jaluka kubha shiumilo sha ukilishitu. **11** Inaapinjikwa kwaapeyanga bhene bhanganyabho bhanakolanje sha bheleketa, pabha bhanakwaapuganyanga bhandunji bha likaja lyowe, bhalijiganyanga indu ikapinjikwa, nkupinga bhaipatilanje mmbiya kwa tekeya bhandu. **12** Na mundu jumo akwiitemba nkulondola ashibheleketa kuti, "Bhandunji bha ku Kilete bhanami mobha gowe, bhannyama bha jogoya, na bhandunji bha kongolela kulya, na bhandunji bha ukata." **13** Gene malobhego ga kweli. Kwa nneyo mwaakalipilanje kwa kaje, nkupinga bhaishimilikanje nngulupai ya kweli. **14** Bhanapilikanishiyanje ndango ya unami ya Bhayaudi, wala malajilo ga bhandunji bhaakananga indu ya kweli. **15** Kila shindu shinakonja kwa mundu akonjile, ikabheje shakwa sha konja kubhandu bhanyatilenje mitima, na bhanyatilenje lumanyio na ng'aniyo yabbonji ya muntima. **16** Bhandunji bhakuitendanga kuti bhanakwaamanyanga a Nnungu, ikabheje kwa itendi yabbonji bhanakwaakananga, bhandunji bhaatendanga ya nnjimwa, bhaatendebhukenje a Nnungu, na wala bhakapwaanga kwa itendi yoyowe ili ya mmbone.

2 Ikabheje ugwe ujiganye majiganyo ga kweli. **2** Gwaajiganyanje bhanangulungwa bhailumanje, na kutungamana na bhakolanje lunda. Bhakolanje ngulupai ya kweli, na pingana na kwiluma ntima. **3** Nneyo peyo na bhanangulungwa bhanabhakongwe bhatamangane ukoto na mitima ja ukonjelo, bhanaalambililanje bhandu, na bhanakolelwanje ukana, ikabhe bhajiganyanje

indu ya mmbone. 4 Nkupinga bhakombolanje kujiganya bhalo
bhalombilwenje bhaapinganje ashimbuje bhabhonji na ashibhana
bhabhonji, 5 bhakolanje lunda, bhaikonjeleyanje, na bhagoyanje
nyumba yabhonji, bhabhanganje bha mmbone, na bhakundanje
ibhabhalanjilwanga na ashimbuje bhabhonji, nkupinga lilobhe
lya a Nnungu linatukanishe. 6 Nneyo peyo, gwaakwiyanje
bhashanda bhakolanje lunda. 7 Ugwe gunnyene ulanguye
mpanda kwa itendi ya mmbone, akuno ulilanguya ishma
na ya kweli, mmajiganyo gako, 8 malobhe gako gagoloshe,
nkupinga mundu jwa mitau akole oni, pabha akakola malobhe
ga nyata ga kutubheleketa. 9 Mwaajiganyanje bhatumwa
bhaakundanje bhakulungwa bhabhonji, bhalikwaanonyeyanga
mmaengo gowe, bhanapinganje ya taukangana, 10 wala
kwaajibhilanga indu yabhonji, ikabhe bhalanguyanje kukulupalika,
pabha kwa tenda nneyo, majiganyo ga a Nnungu bhaatapula
bheto, gamanyishe kuti ga mmbone. 11 Pabha nema ja a
Nnungu jitapula, jiunukwilwe ku bhandu bhowe. 12 Numbe
jinakutujiganya kukana ilebho na ilokoli ya pa shilambolyo,
tutame nkwiiluma, na nkupinga ya aki na kutama malimga
shibhapinga a Nnungu, nshilambolyo sha nnaino shino, (aiōn
g165) 13 akuno tulilindilila nnolelo gwa mboka ipinga unukulwa
kwa ukonjelo gwa a Nnungu bhetu Bhakulu, na a Yesu Kilishitu
bhaatapula bhetu. 14 Bhenebho bhaishoshiye bhayene kwa
ligongo lyetu uwe, nkupinga bhatugombole na ilebho yowe, na
kwaakonjeleyanga bhandunji bhabhanganje bhandu bhabho, ni
bhene bhaatumbilanga kutenda itendi ya mmbone. 15 Bhai ugwe
ujiganye gene malobhe gano, gwaataganje ntima bhandunji
kutenda ya mmbone, na kwakalipilanga kwa mashili gowe,
anapagwe mundu jojowe jwa kukunyegaya.

3 Mwaakumbushiyanje bhandunji bhaitetelesheyanye
kubhakulungwanji na bhaatagwalanga na kukunda
ibhabhalanjilwanga, kutenda yowe ili ya mmbone. **2**
Bhanammeleketelanje ya nyata mundu jojowe, na
bhanabhanganje bha mipwai, bhabhanganje bhanguja,
bhalilanguyanga kwiitimalika kwa kaje, kubhandu bhowe. **3**
Pabha na uwe bhukala putwaaliji mabhelu, bhandunji bha
kwaatendebhukanga a Nnungu na puganyika, akuno tulitolwa na
ilokoli, na itendi yaigwinji ya kwiiikonja yangali mana, tulitama
muilebho na nnupimililo na nkubheleketana na nkubhengana. **4**
Ikabheje a Nnungu Bhaatapula bhetu bhakalanguleje uguja
na nonyelwa kwabho ku bhandu, gubhatutapwile, **5** Nngabha
kwa itendi ya aki itwatendile, ikabhe kwa ligongo lya shiya
shabho, gubhatubheleshe gwa bhili nikutubhika nndamo ja
ambi kwa kutukonjeleya kwa Mbamu jwa Ukonjelo. **6** Pabha
bhashinkutugumbashiya Mbamu jwa Ukonjole, kupitila a Yesu
Kilishitu Bhaatapula bhetu, **7** nkupinga kwa nema jabho
tubhalanganishiwe kubha bhanguja na bhalishi bha gumi gwa
pitipiti, malinga shitukulupalila. (*aiōnios g166*) **8** Lyeneli ni lilobhe
lya kulupalika. Shingupinga gene malobhe gano, ubhelekete
kwa komelesheya, nkupinga bhene bhaakulupalilene a Nnungu
bhala, bhalonjeyanje nkutenda ya mmbone, genego ni ga
mmbone na ganapwaa kwa kila mundu. **9** Ikabheje mwiepuye
na mitau ja shingumba, na mipwai na kutaukangana ga ashigani
bha nnubheleko Iwetu na ga shalia ja a Musha. Pabha yene
induyo ikapwaa, numbe yangali mana. **10** Mundu alekanya
bhandu munnneyaga pabhili, nibhujila kabhili, munkane. **11**
Pabha mmumanyi kuti mundu jwa nneyo apuganishe, na itendi
yakwe ya yambi inng'ukumwile nnyene. **12** Pushinaatume a

Atemashi eu a Tikiko, ntende shangu kwiya imana na nne ku Nikapoli, pabha malanga ga shipwepwe njitumbilila ngatame kweneko. **13** Ntende kila mushinkombole, mwaajangutilanje mmwanja gwabhonji a Shena bha lumanyio lwa shalia, na a Apolo bhanatubhilwanje shindu shoshowe. **14** Bhandunji bhetu bhaijiganyanje kulonjeya muitendi ya uguja, nkupinga bhaajangutilanje Bhakilishitu kwa indu ipinjikwa, kwa nneyo, ndamo jabhonji jibhe japwaa. **15** Bhandunji bhowe bhalinginji apamo na nne bhanakunnamushilanga. Mwaalamushilanje bhakutupinganga nngulupaibho. Nema jibhe na mmanganyanji mmowe.

Pilimoni

1 Nne Pauli nankutabhwa kwa ligongo lya a Yesu Kilishitu, na alongo ajetu a Timoteo, tunakunjandishila mmwe a Pilimoni nkupingwa na uwe na mmakamula liengo ajetu, **2** na alumbu bhetu a Apiya, na a Alikipo linjola nnjetu nngulupai na likanisha liimananga nnyumba jabho. **3** Nema na ulele kopoka kwa Atati a Nnungu na Bhakulungwa a Yesu Kilishitu, ibhe na mmanganyanji. **4** Ngunakwaatendela eja a Nnungu bhangu mobha gowe, pungunkumbushila mwe a Pilimoni nkujuga kwangu, **5** pabha ngulipilikana shinkuti kwaakulupalila a Yesu Bhakulungwa bhetu na shinkuti kwaapinganga bha ukonjelo bhowe bha a Nnungu. **6** Ngunakwaajuga a Nnungu kuti, ngulupai jimuilundile na uwe jinkomboye kubha na lumanyio lwa kushimanya kila shindu sha mmbone shitukwete, nkulundana kwetu na a Kilishitu. **7** Pabha kwa kwaapinganga kwenu bhandu, kushing'angalaya kaje na njitagwa ntima kwa ligongo lyenu mwe mmakilishitu ajangu, numbe nshikuijangalaya mitima ja bhandunji bha ukonjelo. **8** Kwa nneyo, ikabhe ngwete makangala ga kunnajila mmwe ntende indu inkupinjikwa tenda pabha nkulundana kwangu na a Kilishitu, **9** ikabheje kwa ligongo lya nonyelana ngunakunjuga, malinga nne Pauli shingongopele shino, na numbe nnaino nankutabhwa kwa ligongo lya a Yesu Kilishitu. **10** Bhai ngunakunnjuga kwa ligongo lika mwanangu Oneshimushi, junimpatile nngulupai nili nkutabhwa. **11** Bhukala jwenejo akampwaaga, ikabheje nnaino shampwae mmwe na nkali nne. **12** Lelo ngunakummuja najo kwenu mmwe, jwenejo ni malinga ntima gwangu namwene. **13** Napinjile atame na nne nkupinga anyangutile maengo penu mmwe, pepano pundabhilwe kwa ligongo lya Ngani ja Mmbone pano. **14** Ikabheje ngapinga

kutenda shoshowe gwangali kumpilikana mmwe, nkupinga
uguja gwenu unabhe gwa shishilishiya, ikabhe ubhe gwa
pinga mmayene. **15** Pana mwashinkulekana naka Oneshimo
mobha gashoko, nkupinga abhujaga, atame na mmwe mobha
gowe. (aiōnios g166) **16** Bhai nnaino jwenejo nngabha ntumwape,
ikabhe jwa mmbone kupunda ntumwa, ni nnongo nnjetu,
nne ananonyela kaje, numbe mmwe shapunde kunnonyela,
jweneju nnjetu na nnongo nnjetu nkulundana na Bhakulungwa.
17 Kwa nneyo malinga shinkumona nne kuti nannjenu, bhai
mumposhele jwenejo mbuti nkumboshela nne. **18** Monaga
annebhele shoshowe eu nnakunnonga shoshowe, bhai shenesho
nnonje nne. **19** Nne Pauli ngujandika jene bhaluwa jino kwa
nkono gwangu namwene, nguti shinipe. Ngakunkumbushiya kuti
ngunalongwa ga maisha genu. **20** Elo apwanga, ngunapinga
mbwaishe kwenu mmwe kultipila Bhakulungwa, nng'angalaye
ntima gwangu nkulundana na a Kilishitu. **21** Ngunakunnjandishila
pabha nikumanyi kukunda kwenu, nimumanyi kuti shintende nkali
kupunda guninnjandishilego. **22** Punda genego, mmishile ukoto
pa ishila, pabha ngunakulupalila kuti, kwa nyujilanga kwenunji, a
Nnungu shibhambe shikono sha bhuja kweneko. **23** A Epapula,
bhaatabhwa pamo na nne kwa ligongo lya kwaatumishila a
Yeshu Kilishitu, bhanakunnamushilanga. **24** Na a Maliko, na a
Alishitako, na a Dema, na a Luka bhaakamula maengo ajangunji
bhanakunnamushilanga. **25** Nema ja Bhakulungwa a Yeshu
Kilishitu jitame mmitima jenunji.

Bhaebhulania

1 Bhukala a Nnungu bhatendaga bheleketa na ashaambuje yetu, kupitila ashinkulondola bhabho papagwinji na kwa namuna yaigwinji, **2** ikabheje agano mobha ga kumpelo gano, a Nnungu bhanabheleketa na uwe kupitila Bhanabhabho. Bhubhaabhisile kubha bhalishi bha indu yowe, na kupitila bhenebho bhashipanganya shilambolyo. (*aiōn g165*) **3** Bhenebho ni nnga'nyimo gwa ukonjelo gwa a Nnungu, nnandanyo gwa a Nnungu bhayene, gubhabhisile indu yowe kwa lilobhe lyabho likwete mashili, bhakamaliyeje kwaaleshelelanga bhandunji yambi, gubhatemi kunkono nnilo gwa Bhakulungwa a Nnungu kunnungu. **4** Mwana ni nkulungwa kupunda ashimalaika, malinga ukulungwa gwa lina lyabho libhapegwilwe na a Nnungu kupunda mena gabhonji. **5** Pabha a Nnungu bhangannugulila nkali kamo, malaika jwabho jumo, "Ugwe ni Mwanangu, Nne lelo nannginago." Wala bhangabheleketa kuka malaika jojowe kuti, "Nne shimme nanng'inagwe, Na jwalakwe shabhe mwanangu." **6** Ikabheje a Nnungu pubhaatumile bhanabhabho, lyelo lyabho bhalinkuti, "Ashimalaika bhowe bha a Nnungu bhaatindibhalilanje." **7** Ikabheje ga ashimalaika bhakuti, Bhashikwaatendanga ashimalaika bhabho bhatumshi, kubha mbungo na lilamba lya moto. **8** Ikabheje gaka Mwana, a Nnungu bhakuti, "Upalume gwenu, mmwe a Nnungu unalonjeya pitipiti! Mmwe nnatagwala kwa aki. (*aiōn g165*) **9** Mmwe nnaapinga aki na nkaapinga ya ilebho. Kwa nneyo a Nnungu, a Nnungu bhenu, bhashikumpa ukulungwa kupunda ajenunji, Kwa kunng'agula kubha a mpalume bha nng'angalo." **10** Kabhili a Nnungu bhakuti, "Mmakulungwa, mmwe mpengenye shilambolyo kundandubho, Na kunnungu ni mmwe pemmwemwe mpengenye.

11 Yowe shiipite, ikabheje mmwe nnalonjeya. Na yowe shiilale mbuti nngubho. **12** Nkupinga kwiipindanya mbuti likoti, na ipinga tindiganywa mbuti iwalo. Ikabheje mmwe shinnespeshe shimwaliji, Na gumi gwenu ukakola mpelo.” **13** Bhuli apali malaika jubhakunnugulilaga a Nnungu kuti, “Utame kunkono nnilo gwangu, mpaka pushinaabhikanje ashaamagongo ajako pai jako?” **14** Igala ashi malaikabha ni nndi? Bhalabhonji ni ashi mbumu bhakwatumishilanga a Nnungu na bhaatumwanga na bhenebho kwa ligongo lya kwaajangutilanga bhalishi bha ntapulo.

2 Kwa nneyo, tunapinjikwa kugabhika muntima gowe gutupilikene, nkupinga tunaobhye. **2** Ntenga gwa shalia gwalungwiye na ashimalaika gwamanyishe kuti gwa kweli, mundu jojowe jwangaubhika muntima eu kuukunda ashinkuukumulwa kwa aki, **3** bhai, uwe shitulame bhuli tukaujali ntapulo nkulu malinga gwenegu gwalungwiye kundandubho na Bhakulungwa bhayene, na kungai bhapilikenenje bhala gubhakong'ondelenje kwetu uwe? **4** A Nnungu na bhalabho bhalikong'ondela kwa ilangulo na ilapo, bhalikwaapanganga bhandu shukilo ika Mbamu jwa Ukonjelo malinga shibhaphinjile bhayene. **5** A Nnungu bhangaabhikanga ashimalaika bhatagwalanje shilambolyo shikwiya, shilambo shitukungulushila. **6** Kabhili ishilugulwa Mmajandiko, “Mundu shindu shashi, mpaka munnganishiye, Mwana juka mundu ni shindu shashi mpaka munnjali? **7** Kwa malanga gashoko mwashinkuntenda kubha jwa pai kupunda malaika, Nshikuntabha shilemba sha ukonjelo na ishma, **8** Nshikumpa indu yowe aitagwale.” Inalugulwa kuti a Nnungu bhashinkummika mundu atagwale indu yowe, yani gwangali leka nkali shindu shimo. Nkali

nneyo, nnaino tukakummona mundu alitagwala indu yowe. **9**
Ikabheje tulikwaabhma a Yeshu bhabhishilwe pai kwa malanga
gashoko kupunda ashimalaika, nkupinga kwa nema ja a Nnungu
bhawe, kwa ligongo lya bhandu bhowe. Nnaino bhashipegw
ukonjelo na ishima kwa ligongo lya shiwo shabho. **10** Kwa
nneyo ishinkupingwa na a Nnungu, bhapengenyе indu yowe,
kwaakamilisha a Yeshu kubha bhaatapula kupidila mboteko.
Bhashinkutenda nneyo nkupinga bhaapelekanje bhana bha
a Nnungu bhabhagwinji bhaguposhelanje ukonjelo gwa a
Nnungu. Pabha a Yeshu ni bhaalongoya bhandu kuntapulo.
11 Pabha a Yeshu bhakwaatendanga bhandunji kubha bha
ukonjelo na bhatakaywanga, nnaino bhowe Ainabhabhonji
bhamope. Bhai a Yeshu, bhakaakola oni kwaashemanga
ashaapwabho. **12** Bhalinkuti, “Mmwe a Nnungu, shinunguye
lina lyenu kwa ashaapwanga. Ngupinga jimba nkunng’iniya
pa maimano gabhonji.” **13** Kabhili bhakuti, “Ngupinga bhika
ngulupai kwa a Nnungu.” Na kabhili, “Nne puni apano na
bhana bhumbegwilwe na a Nnungu.” **14** Bhai pabha bhene
bhanabho ni bhandunji, bhakwetenje shiilu na minyai, kwa
nneyo a Yeshu gubhautolile shiilu na minyai nibha mundu.
Nkupinga kwa shiwo shabho bhampokonyole Lishetani mashili
ga shiwo, **15** na bhowe bhalinginji muutumwa gwa lipamba
lya shiwo nipatanga kuleshelelwa. **16** Pabha bhangajiya
kwaajangutilanga ashimalaika, ikabhe lubheleko lwa a Bhulaimu.
17 Kwa nneyo bhashinkupinjikwa kubha malinga ashaapwabho,
nkupinga bhabhe Bhakulungwa Bhaabhishila bhakwete shiya
na bha kulupalika nniengo lyabho kwa a Nnungu, na kwa
kwiihoya kwabho kubha mbepei, yambi ya bhandunji ileshelelwe.

18 Na pabha bhayene bhashinkupotekwa pubhalingwaga,
bhanakombola kwaajangutilanga bhene bhaalingwanga bhala.

3 Kwa nneyo mmaakulupalila ajangunji, mmandunji bha ukonjelo
nshemilwenje, na a Nnungu, nibha bhandunji bhabho malinga
uve mwaaganishiyanye a Yesu ni a Ntume na Bhakulungwa
Bhaabhisila bhutukwaalunguya. **2** Bhashinkubha bhaakulupalika
kwa a Nnungu bhaabhisile bhatende liengo lila, malinga a
Musha shibhashite kulupalika nnyumba jowe ja a Nnungu. **3** A
Yesu bhanapinjikwa kuishimika kupunda a Musha, malinga
nkushenga nyumba anaishimika kupunda nyumba jiyene.
4 Pabha kila nyumba pukishengwa naka mundu, ikabheje
a Nnungu ni bhaashenga bhapengenye indu yowe. **5** A
Musha bhashinkukulupalika nnyumba jowe ja a Nnungu,
bhalibheleketa ga indu ipinga kwiya lugulwa. **6** Ikabheje
a Kilishitu bhanakulupalika nnyumba ja a Nnungu malinga
Mwana akwete ukulungwa. Uwe twaashayene ni nyumba
jabho, tupundaga kola makangala na tama nkwaakulupalila
a Kilishitu. **7** Kwa nneyo, malinga shaabheleketa Mbumu
jwa Ukonjelo, "Monaga lelo mpilikanangaga lilobhe lyangu, **8**
nnanonopanje mitima jenunji, mbuti shibhatendilenje ashinakulu
bhenunji pubhaakanilenje a Nnungu lyubha lya lingwa, kuanga
kula. **9** Kwekula ashinakulu bhenunji bhashinkuninganga, Nkali
bhaibhweninji itendi yangu yaka makumi nsheshe! **10** Kwa lyene
ligongolyo nashinkulutumbalila lwene lubhelekololo gunjite, 'Mobha
gowe bhanapuganyikanga, Bhakaakagulanga mipanda Jangu.'

11 Bhai, nkutumbala gunumbile, 'Bhakajinjilanga pa shipumuli
shangu.'" **12** Bhai ashaalongo ajangunji, mwiteiganje anapagwe
munkumbi gwenunji jojowe jwa ntima gwangali gwa mmbone
na ukaakulupalila, ukwaabhbambala a Nnungu bhakwete gumi.

13 Ikabheje kutagana ntima mobha gowe, kila pwiikushemwa "Lelo", nkupinga mundu jojowe munkumbi gwenunji anatembwé na yambi nibha jwa mitau. **14** Pabha uwe tubhowe tunalundana na a Kilishitu ibhaga tubhikaga mmitima ngulupai jitukwete mpaka kumpelo. **15** Majandiko ga ukonjelo gakuti, "Monaga mpilikanangaga llobhe lyabho lelo, Nnanonopanje mitima jenunji. Malinga shimwatendilenje mobha gumwaakanilenje a Nnunu." **16** Igala ashigani bhalongoywenje llobhe lya a Nnunu nikwaakana? Nngabha bhowe bhalongoywenje na a Musha kopoka ku Mishili? **17** Na kabhili, ni ashigani bhaatumbeyenje a Nnunu yaka makumi nsheshe? Nngabha bhowe bhalebhilenje niwanganga nng'anga bhala? **18** Kabhili, ashigani bhubhalumbile cuti, "Bhakajinjilanga pa shipumuli shangu," ikabhe bhalebhilenje bhala? **19** Bhai, tubhwene kuti bhangajinjilanga pa shipumuli kwa ligongo lya ungakulupalila gwabhonji.

4 Bhai, pabha jipali miadi ja jinjila pa shipumuli, tuipwelele nkupinga anapagwe mundu munkumbi ghetu shalepele kujinjila. **2** Numbe uwe tulungushiyewe Ngani ja Mmbone, malinga bhanganyabho. Ikabheje lyene llobhelyo lyangaapwailanga, pabha bhangaliposhelanga nikulikulupalila. **3** Ikabheje uwe pabha tukulupalile shitujinjile pa shipumuli pala, malinga shibhalugwile a Nnunu bhalinkuti, "Malinga shinatumbele, nilumbila, 'Bhakajinjilanga pa shipumuli shangu.'" A Nnunu bhabhelekete genego, ikabheje liengo lyabho lyamalile kuumila pubhapengenyé shilambolyo. **4** Pabha Majandiko gana ganataya ga lyubha lya shabha, a Nnunu bhashinkupumulila lyubha lya shabha, gubhaleshile maengo gabho gowe. **5** Malinga shiilugwilwe, "Bhakajinjilanga pa shipumuli shangu." **6** Bhai, pabha miadi ja jinjila pa shipumuli jatangu, bhalalinji shibhajinjilanje

penepo. Ikabheje bhatandubhenje kulungushiywa Ngani ja Mmbone bhala, bhangajinjilanga kwa ligongo lya ungakunda gwabhonji. 7 Kungai a Nnungu bhashikulibhika lyubha lina bhalinkuti "Lelo," bhabhelekete kupidila a Daudi kwa malobhe galugwilwe bhukala, "Monaga mpilikanangaga lilobhe lyangu lelo, nnanonopanje mitima." 8 Bhai monaga a Yoshua bhaapelekenje bhandunji kushipumuli, a Nnungu bhakanabhelekete kabhili ga lyubha lina. 9 Bhai, kwa nneyo, launo kupali kupumulila kwa bhandu bha a Nnungu. 10 Pabha jojowe ajinjila pa shipumuli sha a Nnungu, anapumulila maengo gakwe malinga shibhapumulile a Nnungu. 11 Bhai, ntumbilanje kuika pa shipumulipo, nkupinga anapagwe jojowe munkumbi gwenunji jwangakunda, malinga shibhatendilenje bhanganyabho nng'anga. 12 Pabha lilobhe lya a Nnungu lishikola gumi na kabhili lishikola mashili, numbe linakombola kamula maengo popowe, kupunda upanga utema akuno na kukuno. Linapelenganya mpaka gabhanya ntima na mbumu na ibhalo na utita guli nkati. Lyene lilobhelyo linakwiimanya ndumbililo na ng'aniyo ya muntima. 13 Shakwa shikwete gumi shiishika kwa a Nnungu, indu yowe inamanyika kwa a Nnungu, shitujiye kwaatalashiya itutendile. 14 Bhai, pabha tukwete Bhakulungwa kaje Bhaabhisila bhajinjile kunnungu, a Yesu Bhanabhabho a Nnungu, twiishimilishe nngulupai jetu jitukong'ondela. 15 Pabha Bhakulungwa bhetu Bhaabhisila bhanakutubhonela shiya ga ungakola mashili gwetu, pabha bhayene bhalinjilwe kwa indu yowe malinga uwe, ikabheje bhangatenda yambi. 16 Kwa nneyo, tuubhandishile gwangali bhoga upalume gwa nema gwa a Nnungu bhakwete shiya, nkupinga bhatubhonele shiya na bhatupe nema ja kutujangutila mobha ga ngakola mashili.

5 Pabha kila nkulungwa jwa bhishila anaagulwa kopoka munkumbi gwa bhandunji, nibhikwa abhatumishile a Nnungu kwa ligongo lya bhandunji, nkupinga ashoye mbepei na yukilo kwa a Nnungu kwa ligongo lya yambi. **2** Pabha bhayene bhangali mashili, shibhaabhonelanje shiya bhene bhakakuumanyanga, na bhaalekanga mpanda gwa a Nnungu. **3** Kwa lyene ligongolyo, bhanapinjikwa kushoya mbepei nngabha kwa yambi ya bhandunjipe, ikabhe na kwa yambi yabho bhayene. **4** Jwakwa mundu akwiipa nnyene jene ishimaji, ikabhe anaagulwa na a Nnungu kubha Nkulungwa jwa Bhishila malinga shibhaaliji a Aluni. **5** Nneyo peyo na bhalabho a Kilishitu, bhangalipa ishma bhayene kubha bhakulungwa bhaabhishila, ikabhe a Nnungu ni bhaabhalanjile, "Mmwe mmanangu, Nne lelo njibha nanng'inagwenu." **6** Kabhili bhabhelekete Mmajandiko gana, "Mmwe ni mmabhibhila pitipiti, malinga a Melikishedeki." **(aiōn g165)** **7** Mobha gubhaaliji a Yesu pa shilambolyo pano, bhatendaga juga na shondelesheya bhalikuigutanjila kwa minyoi kwa a Nnungu, bhenebho bhanakombola kwaatapula nshiw. A Nnungu nigubhaapilikanile pabha bhatendaga kuitimalika na kwaishimiya. **8** Nkali bhaaliji bhanabhabho a Nnungu, bhashinkuijjiganya kukunda kwa mboteko ibhapatile ila. **9** Bhakakamilishweje, nibha shiumilo sha ntapulo gwa pitipiti kwa bhandu bhowe bhakwaakundanga, **(aiōnios g166)** **10** na bhalabho a Nnungu gubaabhibhile kubha bhakulungwa bhaabhibhila malinga a Melikishedeki. **11** Tushikola malobhe gamagwinji gataya ngani jabho, ikabheje inakola ukomu kuntashiyanga, pabha nnakolanga nnjishi kupilikanishiya. **12** Pabha agano mobha gano mmanganyanji nkalinginji bhaajiganya, ikabheje nnapinganga kujiganywa numbe majiganyo ga kundandubho

ga lilobhe lya a Nnungu. Nnapinjikwanga kulya shalya sha topela, ikabheje mmanganya nnapapilanga mabhele. **13**
Pabha jojowe alamila mabhele jwenejo ni mwana jwanshoko, akakugamanya majiganyo ga aki. **14** Ikabheje shalya sha topela ni kwa bhakulungwanji, lunda lwabhonji luobhelele kwa itendi nkwiimanya ya mmbone na yangali ya mmbone.

6 Bhai kwa nneyo, tushoshe kumajiganyo ga kundandubho ga a Kilishitu, tujende mmujo nkwiijiganya ga ngulupai jetu tukamilishe, tunabhujile kabhili mmajiganyo ga kundandubho, ga leka yangali ya mmbone nikwaakulupalila a Nnungu, **2** nkali majiganyo ga namuna ya ubhatisho, na ga bhishila bhandu makono, na ga yuka bhawilenje, na ga ukumu ja pitipiti. (*aiōnios g166*) **3** A Nnungu bhapingaga, genego shitutende. **4** Pabha bhandunji bhalangashiyenje nipaya shukilo sha kunnungu, nilundana naka Mbumu jwa Ukonjelo, **5** nipaya kunong'a kwa lilobhe lya a Nnungu, na mashili ga shilambolyo shikwiya, (*aiōn g165*) **6** kungai niileka ngulupai yabhonji, ikakomboleka kwaatendanga bhaipetanje kabhili. Bhatendanga nneyo, ni mbuti bhanakwaakomelanga munshalabha kabhili Bhanabhabho a Nnungu, na kwaatokomaya pa bhandu. **7** Litaka linyelwa ula papagwinji nimeya yalya, ni pwaida ja bhaalima na lyene litakalyo linapegwa mboka na a Nnungu. **8** Ikabheje limeyaga mibha na likonde likapwaa, lyene litakalyo pulibha tome na loshwa na mpelo gwakwe kujokwa moto. **9** Ikabheje ashaambwiga ajangunji, nkali tuubheleketa nneii, twangali lipamba kwenu mmanganyanji, tumumanyi kuti nnikaguyanga itendi ili ya mmbone nkatapulwanjeje. **10** Pabha a Nnungu ni bha aki, bhenebho bhakalibhala liengo linkutendanga na kuinga kwenunji kunnanguyenje kwa lina lyabho pabha nnakwaajangutilanga

bhandunji bha ukonjelo na launo nnakwaajangutilanga. **11** Na uwe putupinga kila mundu atumbile nneyo peyo mpaka kumpelo, nkupinga yene inkukulupalilangayo imalile. **12** Bhai nnakolanje ukata, ikabhe mmanganje malinga bhene bhaakulupalilanga nikuikakatimila, niilishi miadi ja a Nnungu. **13** Pabha a Nnungu pubhaapele a Bhulaimu miadi, bhashinkulumbila kwa lina lyabho bhayene, pabha jwakwa ali nkulungwa kupunda a Nnungu jwa kunnumbila, **14** bhalinkuti, "Kweli shinimpe mboka na lubheleko lwalugwinji." **15** A Bhulaimu bhakalindilileje kwa kuikakatimila nigubhapatile miadi ja a Nnungu jila. **16** Pabha bhandunji pubhaalumbilanga bhanakwaalugulanga bhali bhakulungwa kupunda ashaayenenji, nkukong'ondela gabheleketwe kupinga peya mitau. **17** Na bhalabho a Nnungu pabha bhashinkupinga kulangula kubhandu ga miadi jabho, kuti bhakatendebhuka mmalobhe gabho, gubhakong'ondele kwa lumbila. **18** Bhai ipali indu ibhili, miadi na lumbila, ikakomboleka tendebhuka pabha a Nnungu bhakaabheleketa unami. Kwa nneyo uwe twaabbutushile, tunatagwa ntima tupunde kamulila ngulupai itubhishilwe. **19** Jene ngulupajji jinakutupa mashili malinga nanga shijikuti kuujimika ntumbwi. Jene ngulupajji jinapelenganya lukungushi lwa pa nnango mpaka pa ukonjelo kaje. **20** A Yesu bhayene bhashilongolela jinjila mwenemo kwa ligongo lyetu na bhaashibha, Bhakulungwa Bhaabhishila pitipiti, malinga shibhaaliji a Melikishedeki. (aiōn g165)

7 A Melikishedeki pubhaliji a mpalume bha ku Shalemu na bhaabhishila bha a Nnungu Bhakulu. A Bhulaimu bhali nkubhuja kungondo kubhakombwele kwaakomanga bhapalume nsheshe, gubhaimene na a Melekishedeki na a Melkshedeki gubhaajujiile mboka a Bhulaimu. **2** A Bhulaimu na bhalabho

gubhaapele lipungu limo lya kumi lya indu yowe ibhapatile ku ngondo. Malombolelo ga ntai ga lina lyabho lya Melikishedeki ni "A mpalume bha aki," kabili a mpalume bha ku Shalemu, malombolelo gakwe "A mpalume bha Ulele." 3 Aina bhabho na anyinabhabho bhakaalugulwanga, nkali shipinga shabho shikaamanyika na wala ikaamanyika shakani pubhabhelekwe na pubhawile. Bhanalandana na Bhana Bhabho a Nnungu, pabha bhalabho ni bhaabhisila pitipiti. 4 Bhai, nnolanje bhene bhandubho shibhashitebha bhakulungwa, mpaka aina bhetu a Bhulaimu nikwaapa lipungu lya kumi lya indu yowe ibhapatile kungondo. 5 Bhai bhana bha a Lawi bhalinginji bhaabhisila, bhanaamulishwnga na shalia kutola lipungu lya kumi kukopoka kwa ashaapwabhonji Bhaishilaeli, nkali bhalinginji bha nnubheleko Iwa a Bhulaimu. 6 Ikabheje a Melikishedekibho bhakaliji bha nnubheleko Iwa a Lawi, nkali nneyo bhashinkuposhela lipungu lya kumi kukopoka kwa a Bhulaimu, gubaajujile mboka bhene bhapegwilwe miadi na a Nnungu bhala. 7 Wala pangali lipamba kuti ali nshoko ni ajujilwa mboka naka nkulungwa. 8 Bhene bhaabhisila bhaaposhelanga lipungu lya kumi ni bhandunji na bhanaawanganga, ikabheje a Melikishedeki bhaaposhela lipungu lya kumi, inalugulwa kuti bhakawa. 9 Bhai tujile kuti, a Bhulaimu pubhashoshiye lipungu lya kumi lya mali gabho, kwa nneyo nkali a Lawi na bhalabho bhashoshiye lipungu lya kumi kupitila kwa a Bhulaimu. 10 Pabha a Lawi bhakanabhe bhelekwa, mubhaliji nsiiilu sha ainabhabho a Bhulaimu, mobha a Melikishedeki pubhaimene nabho. 11 Bhai ibhaga kukamilika kwatendaga patikana kwa liengo lya bhishila lya Bhalawi, pabha kwa tolelela genego shalia jashinkubhikwa ku Bhaishilaeli, ikanapinjikwe kabili

bhaisque bhaabhisila bhana bha malinga a Melikishedeki, nngabha bhaabhisila kopoka kwa a Aluni? **12** Pabha ubhishila unatindiganywa, bhai na shalia shijitindiganywe. **13** Bhene bhaabhisila bhaabheleketelwa genega, pubhaliji bha kabhila jina na wala jwakwa nkali mundu jumo jwa kabhila jabho atendile liengo lya ubhishila pa shitala. **14** Inamanyika kuti Bhakulungwa bhetu kubhakoposhele ku likabhila lya a Yuda, na kwa lyene likabhilalyo a Musha bhakabheleketeje shindu shoshowe ga ubhishila. **15** Kabhili, genego gamanyishe kaje, bhakoposhelaga bhaabhisila bhana bha malinga a Melikishedeki. **16** Bhenebha bhangabhiwa kubha bhaabhisila kwa shalia ja ashinakulu bhabho, ikabhe kwa mashili ga gumi ukaangabhanyika. **17** Pabha Majandiko ganaataya, “Mmwe mmabhisila pitipiti, Malinga a Melikishedeki.” (aiōn g165) **18** Bhai amuli ja bhukala jila jishilekwa pabha jikakweteje mashili na jangapwaa, **19** pabha shalia ja a Musha jangatimiliya shindu. Ikabheje nnaino tupegwilwe nnolelo gwa pwaa ukutukomboya kwaabbandishila a Nnungu. **20** Na pabha, lyelila lyatendaga tendeka nkutolelela kulumbila kwa a Nnungu. Bhene bhaabhisila bhananji bha nnubheleko lwa a Lawi bhatendaga bhikwanga nniengo lya ubhishila gwangali kulumbila. **21** Ikabheje a Yesu bhashinkutendwa bhaabhisila kwa lumbila, malanga a Nnungu gubhashite, “Bhakulungwa bhashilumbila, wala bhakatindiganya ibhatumbilile, ‘Mmwe mmabhisila pitipiti.’” (aiōn g165) **22** Bhai, kwa ligongo lya kwene lumbilako, a Yesu bhashibha bha ngamulo bha malagano ga mmbone kaje. **23** Kabhili, bhaabhisila bhananjibho bhashinkushulukanga pabha bhatendaga wanganga, ninngalonjeya nniengo lyabhonji. **24** Ikabheje a Yesu nngabha malinga bhanganyabho, bhenebho ni bha pitipiti na ubhishila gwabho ukapela. (aiōn g165) **25**

Kwa nneyo, bhenebho bhanakombola kwaatapulanga kaje bhakwaajendelanga a Nnungu kupidila bhenebho, pabha bhenebho bhanaalonjeya pitipiti nkupinga bhaajujilanje kwa a Nnungu. **26** Bhai, yashinkupwaa uwe tubhe na Bhakulungwa Bhabhishila malinga bhenebho, bha ukonjelo bhangali sha gambwa, bhangali shilebho shoshowe, bhabhishilwe kwa taliya na ilebho, ninyakulwa kunani kunnungu. **27** Bhenebho bhakaapinjikwa kushoya mbepei mobha gowe kwa ligongo lya yambi malinga bhaabhishila bhananji, kutandubhila ga yambi yabho bhayene, kungai ga yambi ya bhandunji bhana. Bhenebho bhashinkushoya mbepei ya yambi ya bhandu bhowe gwanakamo, pubhaishoshiye bhayene kuwa munshalabha. **28** Pabha shalia ja a Musha jinakwaabhihikanga bhandunji bhaanyegala kubha bhakulungwanji bhaabhishila, ikabheje kwa lilobhe lya lumbila litendilwe kungai shalia, lishikunng'agula Mwana gwabho a Nnungu ali jwa ntimilile kubha nkulungwa jwa bhaabhishila. (aiōn
g165)

8 Shipundile kwa gutubheleketago ni kuti, tukwete Bhakulungwa Bhaabhishila, bhaatama kunkono nnilo gwa Upalume gwa ukonjelo gwa a Nnungu kunnungu. **2** Bhenebho bhanakamula liengo lya ubhishila pa ukonjelo, yani nniema liene lya a Nnungu libhishilwe na Bhakulungwa na nngabha naka mundu. **3** Kila bhakulungwa bhaabhishila bhanabhikwa nkupinga bhashoye mbepei na shukilo kwa a Nnungu, kwa nneyo bhakulungwa bhetu bhaabhishila bhanaapinjikwa bhakole shindu sha shoya. **4** Monaga bhenebho bhakaaliji bha pa shilambolyo pano, ngubhakaliji bhaabhishila, pabha tayali bhapalinji bhaabhishila bhananji bhaashoyanga mbepei malinga shiishite lajiywa na shalia. **5** Bhanaatendanga liengo pa ukonjelo, pali mbuti shiwili

sha gaatendeka kunnungu. Pabha a Musha pubhaaliji tome na alaya liema lila, a Nnunu gubhaabhalanjile, "Nng'alaye indu yowe malinga shinnangwilwe kushitumbi kula." 6 Ikabheje nnaino a Yeshu bhashipegwa liengo lya bhishila lili lya mmbone kupunda liengo lya bhaabhisila bhala, malinga bhenebho bhashibha bhaapatanisha bha malagano ga mmbone kaje kupunda malagano ga bhukala gala. Malagano gakwete miadi ja a Nnunu jili ja mmbone kaje. 7 Kaliji malagano ga ntai gakanakole shitubhile, gakanapinjikwe malagano ga bhili. 8 Ikabheje a Nnunu gubhaibhwene ilebho kubhandu bhabho nigubhashite, "Ganakwiya mobha, Pushindende malagano ga ambi na bhandunji bha Ishilaeli, na bha Yuda. 9 Gene malaganogo gakabha malinga gunatendile na ashinakulu bhabhonji, Lyubha linaakamulenje nkono nikwaashoyanga ku Mishili. Pabha bhangatolelelanga malagano gangu, Na nne gunaaleshilenje, bhakuti Bhakulungwa. 10 Gegano ni malagano gushindende na bhandunji bha Ishilaeli, Mobha gakwiyago, Shimishe shalia yangu nng'aniyo yabthonji, Na jandika mmitima jabthonji. Na nne shime a Nnunu bhabhonji Na bhalabhonji shibhabhanganje bhandunji bhangu. 11 Jwakwapi ashannjiganye nshilambo nnjakwe, eu ashannugulile mpwakwe, 'Gwaamanye Bhakulungwa.' Pabha bhowe, shibhamanyanje nne. Kutandubhila jwanshoko, mpaka jwankulungwa. 12 Pabha shinaaleshelelange ilebho yabthonji, Na ngakumbushila kabhili yambi yabthonji." 13 Kwa lugula ga malagano ga ambi, a Nnunu bhashinkutenda malagano ga ntai gala gabhe ga makongopa, na shoshowe shikongopala shikakabha kumala ninngabhoneka.

9 Bhai, malagano ga ntai gashinkukola ikubho yakwe ya kwaajuga a Nnunu, na liema lya ukonjelo lya pa shilambolyo.

2 Pabha liema lyashinkualaywa, kati ja kungoposhelo
pujashemwaga pa Ukonjelo. Mwenemo pashinkupagwa
pabhishilwe kandili, na mesha, na mikate ja ukonjelo. 3
Kunyuma ukungushi, jashinkupagwa kati jina jashemwaga pa
Ukonjelo gwa Puya. 4 Mwenemo mwashinkupagwa shitala sha
shaabhu sha tutumishiya lubhani na lishanduku lya malagano,
lipashilwe shaabhu mmbali yowe. Nkati lyene lishandukulyo,
lyashinkupagwa shibhiga shipashilwe shaabhu shatajilwe mana
na ntindisho gwa a Aluni gwa ipuka na ibhao ibhili ya maganga
yajandikwe malagano. 5 Panani lishandukulyo yashinkupagwa
igobhi ibhili ya malaika ya ukonjelo gwa a Nnungu, mapapiko
gabhonji galibhika nng'wili pa leshelela yambi. Ikabheje nnaino
nngabha malanga ga talashiya genego kwa kaje. 6 Bhai nnei
ni shiyashite pangwa indu yowe, bhaabhisila bhatendaga
jinjilangana kila lyubha nniema lya palanga kuutenda ikubho
yabhonji ya kwaajuga a Nnungu, 7 Ikabheje bhakulungwa
bhaabhisila jikape bhajinjilaga nniema lya bhili, kamo kwa
shaka. Bhatendaga pinjikwa kupeleka minyai ja bhannyama,
jibhashoyaga kwa ligongo lya yambi yabho bhayene, na yambi
ya bhandunji ibhatendilenje gwangali kumumanya. 8 Kwa nneyo,
Mbumu jwa Ukonjelo atendaga langula kuti mpanda gwa jinjila
pa Ukonjelo Gwa puya, gwaaliji ukanaabhe ugulwa mobha gowe
ga lonjeya kwa liema lya ntai. 9 Genego gashinkubha shilanda
sha mobha ga nnaino gano, shilanguya kuti mbepei na yukilo,
ikakuntenda mundu atindibhalila akamilishe muntima. 10 Yene
yoweyo ni shalia ya nshiilu, ga yalya, na ya papila, na namuna
ja nabha. Yeneyo yashinkuamulishwa kukagulwa mpaka mobha
a Nnungu pushibhaalaye indu yowe gwa ambi. 11 Ikabheje a
Kilishitu gubhaisque, bhali bhakulungwa bhaabhisila bha indu ya

mmbone iishe nnaino. Bhenebho gubhapite nniema lyam kamilika lyangaalaywa kwa makono ga bhandu, yani nngabha liema lyam pa shilambolyo pano. **12** Bhashinkujinjila pa Ukonjelo kaje kamope gubhapeleshe minyai, nngabha ja mmbui na ng'ombe, ikabhe minyai jabho bhayene, nkupinga tugombolwe piti piti kwa bhei jikulungwa. (*aiōnios g166*) **13** Bhandu bhalebhilenje bhashinkutakaywanga kwa mishiywa minyai ja ng'ombe na mmbui, na liu lya litumbwe lya ng'ombe lya likolo lyalitiniye. **14** Bhai kwa minyai ja a Kilishitu indu yaikulungwa ikatendeka? Kwa mashili gaka Mbumu jwa pitipiti, a Kilishitu bhashinkwiishoya bhayene kubha mbepei ja ukonjelo kwa a Nnungu. Minyai jabho shijitutakaye ng'aniyo yetu ya muntima, ipeleshela shiwo, nkupinga twaatumishile a Nnungu bhakwete gumi. (*aiōnios g166*) **15** Kwa nneyo a Kilishitu ni bhaalundanya bha malagano ga ambi, na bhene bhashemilwenje na a Nnungu, shibhaposhelanje ulishi gwa pitipiti gubhabhishilwenje na a Nnungu. Shiwo shabho shinakwaagombolanga bhandunji na yambi yabthonji ibhatendilenje mobha ga malagano ga bhukala. (*aiōnios g166*) **16** Malajilo ga ulishi pugaakagulwa mpaka imanyishe kuti ajandishe jula awile. **17** Malajilo ga ulishi gakakola mashili mpaka awe alajile, pabha malajilo ga ulishi gakakola malombolelo ibhaga alajile ali jwankoto. **18** Pabha nkali malagano ga ntai gakanatendeshe gwangali jitika minyai. **19** A Musha pubhatandubhaga kulunguya ku bhandu bhowe, amuli yowe ya shalia, nitolaga minyai ja litumbwe lya ng'ombe na mmbui na mashi, na maamba ga nkongo gwa ishopo na mabhetya ganashe ga ngondolo, gubhamishiye nsabitabhu sha malajilo shila, na ku bhandunji bhowe. **20** A Musha bhalinkuti, “Jejino ni minyai ja malagano gunng'amulishwenje na a Nnungu.” **21** Nneyo peyo a Musha

gubhamishiye minyai jila nniema na indu itumika nkwaajuga a Nnungu **22** Elo, kwa tolelela shalia tome indu yowe inatakaywa kwa minyai, gwangali jitika minyai yambi ikaaleshelelwa. **23** Yene indui puyaaliji malinga shilanda sha indu ya kunnungu, yashinkutakaywa kwa shana nneyo. Ikabheje indu ya kunnungu inaapinjikwa kutakaywa na mbepei ya mmbone kupunda yeneyo.

24 Pabha a Kilishitu bhangajinjila pa Ukonjelo pashenjilwe na bhandunji, paliji shilanda sha kweli. Ikabhe bhashinkujinjila kunnungu kuyene, nnaino kubhali kwa a Nnungu, kwa ligongo lyetu uwe. **25** Bhakulungwa bhaabhbishila bha Bhayaudi, bhanajinjila pa Ukonjelo kila shaka bhali bhajigele minyai jika nnyama. Ikabheje a Kilishitu bhangajinjila mwenemo nkupinga bhaishoye bhayene mbepei papagwinji, **26** pabha ikaliji nneyo, a Kilishitu bhakapotekwe papagwinji kuumila kupanganywa kwa shilambolyo. Ikabheje nnaino, mobha pugabhandishila kumpelo, bhenebho bhashinkukoposhela kamope pubhaishoshiye bhayene kubha mbepei ja leshelela yambi. (aiōn g165) **27** Bhai malinga shiikubha, mundu anawa kamope na awaga anaukumulwa na a Nnungu. **28** Nneyo peyo, a Kilishitu na bhalabho bhashinkwiishoya bhayene kubha mbepei kamope, kwa ligongo lya leshelela ilebho ya bhandu bhabhagwinji. Pushibhaishe gwa bhili nngabha kuleshelela ilebho, ikabheje kukwaatapulanga bhene bhakwaalindanga kwa amu bhala.

10 Bhai, pabha shalia ja a Musha pujaaliji shiwili sha indu ya mmbone shiijiye koposhela na nngabha indu iyene, mbepei ila peila ya Shalia ishoywa kila shaka, ikakombola kwaakamilishanga nkwaatindibhalila a Nnungu. **2** Monaga bhandunji bhakwaatindibhalilanga a Nnungu bhakalinginji kweli bhaleshelelwenje yambi yabhonji, bhakanaibhonanje

kuti bhashilebhanga, na mbepei yowe ikapelile. **3** Ikabheje yene mbepeiyi inakumbushiya bhandu ga yambi yabhonji kila shaka. **4** Bhai, minyai ja ng'ombe lilume na mbui jikaashoya yambi. **5** Kwa nneyo a Kilishitu pubhaishe pa shilambolyo, bhashinkwaalugulila a Nnungu, "Mwangapinga mbepei, ikabhe nshing'alashiya shiilu. **6** Mbepei ya tiniyuwa pa moto eu ya leshelela yambi yangannonyela. **7** Penepo gunjite, 'Puni apano, mmwe a Nnungu, kutenda inkupinga malinga shiishite jandikwa gangu nne nshitabhu.'" **8** Kundandubho a Kilishitu bhaashite, "Yangannonyela wala mwangaipinga mbepei, na bhannyama bha tiniyuwa pa moto wala mbepei ya shoya yambi." Nkutolelela shijapingaga shalia. **9** Kungai gubhashite, "Puni apano, mmwe a Nnungu njikwiya kuutenda inkupinga." Kwa nneyo a Nnungu gubhaleshile malagano ga bhukala, nkupinga bhabhishe ukoto ga ambi. **10** Na pabha a Yesu Kilishitu bhashinkutenda ibhaapinga a Nnungu, uwe tunaaleshelelwa yambi kwa mbepei ya shiilu shabho, shibhashishoshiye gwanakamope. **11** Lyubha kwa lyubha kila bhaabhishe bhanashoya mbepei kila lyubha, mbepei ikakombola shoya yambi. **12** Ikabheje a Kilishitu bhashinkushoya mbepei jimo ja lonjeya mobha gowe, kungai gubhatemi kunkono nnilo gwa a Nnungu, **13** bhanaalinda ashaamagongo ajabho bhabhikwanje pa makongono gabho. **14** Bhai, kwa mbepei jabho jimo, bhashikwaatendanga bhaatakaywanga bhala, kukamilika pitipiti. **15** Na jwalakwe Mbumu jwa Ukonjelo anakong'ondela, alinkuti, **16** "Gegano malagano gushindende na bhanganyabho, Shimishe shalia jangu mmitima jabhonji, mmobha gakwiya na jandika nnunda lwabhonji." **17** Gubhajenjesheye bhalinkuti, "Yambi yabhonji ngaikumbushila kabili, wala itendi yabhonji yangali ya mmbone." **18** Bhai, yambi ileshelelwaga, mbepei ya

leshelela yambi ikaapinjikwa kabhili. **19** Bhai, ashaapwanga, kwa minyai ja a Yeshu tunaapegwa makangala ga jinjila pa Ukonjelo.

20 Kwa kwiishoya shiilu shabho bhayene kubha mbepei, a Yeshu bhashikutuugulila mpanda gwa ambi, mpanda gwa ambi ukutulongoya ku gumi, yani lipashiya lila. **21** Pabha, tushikola bhakulungwa bhaabhishila bhakwete mashili nnyumba ja a Nnungu, **22** twaabbandishile a Nnungu kwa ntima gwa kulupalila gwangali lipamba, na mitima jikonjeleywe ga ng'aniyo ya nyata na iilu ikundilwe na mashi ga mmbone. **23** Tukamulile ukoto nnolelo gwetu gutukong'ondela, pabha a Nnungu bhabhishile miadibho, ni bhaakulupalika. **24** Tulolane nitagana ntima twaashayene, na punda pingana, na tenda ya mmbone. **25** Tunaleshe nkubho gwa imana pamo gula, malinga shibhaatendanga bhananji. Ikabheje tunapinjikwa jangutana, pabha lyubha lya ukumu ja Bhakulungwa linabbandishila. **26** Pabha tupundaga tenda yambi melepe, tukajimanyeje kweli, jakwapi mbepei jina shijishoywe ja kombola kuleshelela yambi, **27** ikabheje shiilepeka ni kulolela ukumu ja a Nnungu na moto gwaatiitimiyanje bhakakwaakundanga.

28 Mundu jojowe akaakunda shalia, anaatitimiya gwangali kummonnela shiya, bhapagwangaga bhaakong'ondela bhabhili eu bhatatu. **29** Bhuli, mundu akunnyegaya Mwana jwa a Nnungu na nyegaya minyai ja malagano ga a Nnungu janneshelele yambi, mundu akuntukana Mbamu jwa nema, akapinjikwa kutitimiya kwa kaje? **30** Pabha twaamanyi bhene bhabhelekete, kuti, "Kupindikulila ni liengo lyangu, nne shimbindikulile." Kabhili kuti, "Bhakulungwa shibhaaukumulanje bhandu bhabho." **31** Kuukumulwa na a Nnungu bhali shiumilo sha gumi, ni shindu sha jogoya kwa kaje! **32** Nkumbushilanje yakoposhele kundandubho pumwalangashiywenje shilangaya

sha a Nnungu. Nkali mwapotekwenje kwa kaje, mmanganya mwashinkwiikakatimilanga. **33** Guna mwashinkutukanwanga na nyegaywa pa lugwinjili, guna mwashinkukundanga kulundana na bhene bhapotekwenje bhala. **34** Mwashinkuabphonelanga shiya bhatabhilwenje, nipokonyolwa indu yenunji akuno nniangalalanga, pabha mwamumanyinji cuti, nshikolanga indu ina ya mmbone kaje na ya lonjeya pitipiti. **35** Bhai, nnalekanje makangala genunji, pabha shimpatanje yukilo yaikulungwa. **36** Nnapinjikwanga muikakatimilanje, nkupinga ntendanje ibhaapinga a Nnungu, na poshela shibhalajile shila. **37** Malinga shigataya Majandiko cuti, Palepeshe pashokope, na bhakwiya bhala, shibhaish, wala bhakakabha. **38** Ikabheje mundu jwangu akwete aki, shatame kwa kulupalila, ikabheje abhujilaga nnyuma, nne nganonyelwa najo. **39** Bhai, uwe twangabha munkumbi gwa bhaabhujilanga nnyuma, ikabheje putuli na bhaakulupalilanga na tapulwa.

11 Bhai ngulupai ni kutolelela cuti kweli ga indu ilolelwa, ni kukulupalila indu ikabhoneka. **2** Pabha, kwa ligongo lya ngulupai jabhonji ashinakulu bhetu bhashinkukong'ondelwanga ukoto na a Nnungu. **3** Kwa ngulupai tunakumumanya cuti shilambolyo shashinkupanganywa kwa amuli ja a Nnungu. Indu ibhoneka yashinkupanganywa kopoka kuindu ikabhoneka. **(aiōn g165) 4** Kwa ngulupai, a Abheli bhashinkushoya mbepei ya mmbone kwa a Nnungu kupunda a Kaini. Kwa ligongo lya ngulupai jabho gubhakwete aki kwa a Nnungu, pabha a Nnungu bhayene bhanonyelwe na mbepei yabho. Kwa jene ngulupaijo nkali a Abheli bhawileyo, launo ngulupai jabho jinabha shindu sha mmbone sha kaguya. **5** Kwa ngulupai, a Eneko bhashinkutolwa na a Nnungu kujabhula pashilambolyo gwangali kuwa. Bhangabhoneka kabhili pabha a Nnungu bhashinkwaatola

kwenda kunnungu. A Eneko bhakanabhe tolwa na a Nnunu
bhatendaga nonyelwa nabho. **6** Ikabheje, gwangali ngulupai
ikatendeka kwaanonyeya a Nnunu, pabha akwaajendela a
Nnunu anapinjikwa akulupalile kuti Bhenebho bhapali na kuti
bhanakwaapanganga shukilo bhene bhakwaaloleyanga bhala. **7**
Kwa ngulupai a Nuu bhashinkukunda kuleywa na a Nnunu ga
ipinga koposhela, bhalibhakanabhe kuibhona. Kwa kwaakunda a
Nnunu, a Nuu gubhaeleye shapina nkupinga kuitapula bayene
na ashaalongo ajabho. Kwa ligongo lya ngulupai ja a Nuu,
a Nnunu gubhashiukumwile shilambolyo ga lebha. **8** Kwa
ngulupai, a Bhulaimu bhashinkukunda pubhashemilwe na a
Nnunu bhajende kushilambo shibhalajilwe kupegwa kwa miadi
shibhe ulishi gwabho. Gubhaleshile shilambo shabho, bhalibh
bhakakukumanya kubhakwenda. **9** Kwa ngulupai bhashinkutama
mbuti bhajeni nshilambo sha miadi ja a Nnunu, gubhatemi
mmakambi, malinga shibhatendilenje a Ishaka na a Yakobho
kungai, bhalinginji bhalishi bha mmiadi jila na a Nnunu. **10**
Pabha a Bhulaimu bhatendaga lolela kushibhona shilambo
shishenjilwe kwa majumba ga shimilika, shilambo shikumbwiwe
na shengwa na a Nnunu. **11** Kwa ngulupai, a Bhulaimu
nkali bhaaliji bhakongopa, na a Shala nkali bhaaliji nannii na
bhakongopa gubhapegwilwe mashili ga jukuta shitumbo nikola
mwana, pabha bhakulupalile kuti a Nnunu shibhakamilishe
miadi jabho. **12** Kwa nneyo, kwa ligongo lika mundu jumo aaliji
nkulolela kuwa, gubhabhelekwenje bhandu bhabhagwinji malinga
ndondwa ya kuliunde na malinga nng'anji gwa nnyenje bhaali
ukakomboleka kubhalanganywa. **13** Bhene bhandunji bhowebha
gubhawilene nngulupai gwangali kuposhela indu ya miadi ja
a Nnunu ila, ikabheje bhaibhweninji kwa taliya nikuiangalila,

niikunda kuti pubhalinginji bhajeninji na bhapita mpanda pa shilambolyo. **14** Bhandu bhabheleketanga nnei, bhanalangulanga kuti mubhalinginji nkuloleya shilambo shabhonji. **15** Monaga bhakaganishiyenje ga shilambo shabhonji shibhashileshilenje bhukala, bhakapatilenje muubhujilo kweneko. **16** Ikabheje bhanapinganga shilambo shili sha mmbone kaje, yani shilambo sha kunnungu. Kwa nneyo a Nnungu bhakaakola oni kushemwa a Nnungu bhabhonji, pabha bhaeleye shilambo sha bhene bhanganyabho, yani kunnungu. **17** Kwa ngulupai, a Bhulaimu bhakalingweje na a Nnungu, bhashinkunshoya Ishaka abhe mbepei. A Bhulaimu bhashinkukunda kunshoya mwanagwabho jwa jika abhe mbepei, jubhapegwilwe na a Nnungu kwa miadi. **18** Nkali a Nnungu bhaabhalanjile, kupitila kwa a Ishaka shinkole lubheleko shilushemwe lwenu. **19** A Bhulaimu bhaganishiye kuti a Nnungu bhanakombola kunnyuya mundu awile, kwa nneyo ni malinga bhashikumpata kabhili Ishaka akaweje. **20** Kwa ngulupai a Ishaka bhashinkwaapanganga mboka a Yakobho na a Eshau nndamo ja mobha ga kwiya. **21** Kwa ngulupai a Yakobho pubhaaliji tome na kuwa, bhashinkumpa mboka kila mwana jwa a Yoshepu nigubhaatindibhalile a Nnungu bhali bhajegamile ntindisho gwabho. **22** Kwa ngulupai a Yoshepu pubhaaliji tome na kuwa, bhabhelekete ga mobha gushibhashokangane Ishilaeli ku Mishili, nigubhalajile ga maupa gabho bhawaga. **23** Kwa ngulupai, bhangwetenje Musha bhashinkunng'iyanga myei jitatu akabhelekweje, pabha bhashinkummonanga mwana jwa konja, wala bhakajogopenjeje amuli ja a mpalume. **24** Kwa ngulupai, Musha akakuleje, ashinkukana kushemwa mwana jwa abhi Palao. **25** A Musha gubhaagwile na mbaya kutama maisha ga bhonelwam pamo na bhandunji bha a Nnungu, na nngabha

kunonyelwa na maisha gakaalonjeya ga tenda yambi. **26**
Bhashinkukunda kupotekwa malinga shibhapinga potekwa a
Kilishitu, ni shindu sha mana kupunda utajili gowe gwa shilambo
sha Mishili, pabha bhatendaga lolela kupegwa shukilo. **27**
Kwa ngulupai, a Musha bhashinkujabhula ku Mishili gwangali
jogopa nnjimwa ja a mpalume, bhashikwiikakatimila pabha
bhaabhweni a Nnungu bhakaabhoneka bhala. **28** Kwa ngulupai
bhashinkukumbuya shikukuu ja pashaka nipakaya minyai pa
nnango, nkupinga malaika nkubhulaga, anaabhlaganje bhana
bhanabhalume bha lielo bha Bhaishilaeli. **29** Kwa ngulupai,
Bhaishilaeli bhashinkujombokanga bhaali ja Shamu mbuti
pantaka nnjumu, ikabheje Bhamishili bhakalinganjeje kutenda
nneyo, gubhatitimilenje mmashi. **30** Kwa ngulupai, makumba
ga Yeliko gashinkugwa, Bhaishilaeli bhakagatimbililanjeje
kwa mobha shabha. **31** Kwa ngulupai, a Laabhu bhaliji
lijajana, bhangabkulagwa pamo na bhaakanilenje a Nnungu
bhala, pabha bhashinkwaaposhelanga bhanushishiya kwa
ulele. **32** Igala mbunde bheleketa nndi? Nne ngapinga
kutalashiya ga ngani ja a Gidioni, na a Bhalaka, na a
Shanshoni, na a Yeputa, na a Daudi, na a Shamweli na
ashinkulondola bha a Nnungu, **33** bhanganyabho kwa ngulupai,
bhashinkukombolanga kupoonyola ilambo ya bhapalume, na
bhashinkutendanga indu kwa aki, niipegwa ya miadi ja a Nnungu,
bhashinkutabhanga kang'wa ya imba, **34** bhashinkuimanga
malamba ga moto, bhashinkutapulwanga nkubhulagwa na
upanga, bhakakwetenjeje mashili, ikabheje gubhapegwilwenje
mashili, bhashinkukolanga makangala nngondo nikugakombola
makundi ga bhajeninji bhakomana ngondo. **35** Kwa ngulupai,
bhanabhabkongwe bhashinkuposhelanga bhandunji bhabhonji

bhawilenje niyuywa. Ikabheje bhananji bhashinkupotekwanga
niikana kugopolwa, nkupinga bhapatanje kuyuywa nibha nndamo
jili jammbone kaje. **36** Bhananji bhashinkunyegaywanga nikomwa
ndomondo, nitabhwa mindondolo niugalilwa mmagelesha.
37 Bhananji bhashinkubhulagwanga kwa komwa maganga,
bhananji bhashinkugabhanywanga ipande na mishumeno,
kubhulagwa na upanga, bhatendaga konangonanga bhali
bhawetenje mapende ga ngondolo na mbui, bhalinginji
nshilaje, bhalipotekwanga na tendelwa yangali ya mmbone. **38**
Shilambolyo shikapwaileje kubha na bhandunji bha mmbonebha
malinga bhanganyabho. Bhatendaga konangonanga nng'anga
na mwitumbi, bhalitamangana mmashembo na mmaimbo. **39** Na
bhene bhandunji bhowebho, bhashinkukong'ondelwanga ukoto
na a Nnungu ga ngulupai jabhonji, ikabheje bhangaposhelanga
ya miadi ja a Nnungu ila mpaka kungai. **40** Pabha a Nnungu
bhashinkulongolela kutubhishila indu ya mmbone kaje, nkupinga
bhanganyabho bhanakamilishwanje gwangali uwe.

12 Pabha numbe uwe tushitimbililwa na likundi likulungwa
lya bhaakong'ondela malinga nnei, bhai tuleshe indu yowe
ikutuibuya, na shambi shikutukamuliya shila, na tubhutushe
kwa kwiikakatimila nkubhingayana kutubhishilwe na a Nnungu. **2**
Bhai twaalole a Yesu bhakumbwiye na bhaakamilisha ngulupai
jetu, bhalabho kwa ligongo lya kuangalala kubhabhishilwe,
gubhaipililile kuwa munshalabha gwangali kola oni, na nnaino
bhatemi kunkono nnilo gwa shitengu sha upalume gwa a
Nnungu. **3** Kwa nneyo munnganishiyanje jwene aipililile
kukanwa na bhakwetenje yambi, nkupinga nnatotoshelanje
niwa ntima. **4** Nkulajilila ga leka yambi, nkanabhe ishilanga
pa bhulagwa. **5** Na kupunda nneyo, nshilibhalanga malobhe

ga taga ntima ga a Nnungu, gubhammalanjilenje mbuti bhana bhabho, kuti, Mwanangu, unanyegaye malajilo ga Bhakulungwa. Wala unawe ntima pubhakuukalipila, **6** pabha Bhakulungwa jubhakumpinga jula, bhanakunkalipila na kila akunda kubha mwana gwabho bhanakunkoma. **7** Mwiipilililanje nkuundwa, pabha a Nnungu bhanakuntendelanga malinga ashibhana bhabho. Apali mwana akakomwa na ainagwe? **8** Ibhaga nkaundwanga na a Nnungu malinga ashibhana bhabho shibhakuti undwanga, bhai mmanganyanji nngabha bhana bha kweli bha a Nnungu, ikabhe bhana bha alamu. **9** Na ibhaga ashaatati bha shigundu, bhalikutuundanga nikwaishimunji, penepo inalangula kuti, inapinjikwa kwaishimu kaje, Aina bhetu bha mmbumu, nkupinga tulame **10** Ashainabhetu bha shigundu, bhatuundanje kwa mobha gashoko, malinga shibhabhweninji ashaayenenji kuti sha mmbone. Ikabheje a Nnungu bhanakutuunda kwa pwaida jetu, nkupinga bhatukundikanye muukonjelo gwabho. **11** Kuundwa kokowe kukanong'a, pukuutendeka kunapoteka, ikabheje kungai kunapeleshela aki na ulele kwa bhajigenyenje bhala. **12** Bhai, nngoloyanje makono genunji gangali mashiligo, na malungo genunji galegeleshego. **13** Nng'alayanje mwa pita makongono genunji, nkupinga akwete shilema anagwe, ikabheje alame. **14** Nnoleyanje kutama kwa ulele na kila mundu, na ukonjelo pabha jwakwa mundu shaabhabhone Bhakulungwa gwangali kubha na ukonjelo. **15** Mwiiteiganje, nkupinga anapagwe nkali jumo jwa pelela nema ja a Nnungu, wala anapagwe jwabha shiumilo sha ya nyata, niabhuya bhandu na jambushiya bhabhagwinji. **16** Anapagwe jwa labhalabha eu jwangaajogopa a Nnungu, malinga a Eshau bhaushiye ulishi gwabho gwa lielo, kwa shalya sha kamope. **17** Malinga

shimmumanyinji, bhalajilile numbe kwa minyoi bhapate mboka kopoka kwa ainabhabho, ikabheje bhangakombola kwiiipeta, pabha bhashinkushelewa. **18** Mmanganyanji nkanabhe ishilanga kushitumbi sha komboleka kukwaya, malinga shibhaishilenje Bhaishilaeli kushitumbi sha Shinai. Shitumbi shashinkukolela moto, nitabha lubhindu, na nnindimo na shimbunga. **19** Na nneila peila jashinkupilikanika mbalapala na lindimila kwa malobhe, na Bhaishilaeli bhakapilikananjeje, gubhajujilenje bhanabhalanjilwanje kabili lilobhe lyolyowe, **20** pabha bhangakombolanga kwiiikakatimila amuli ibhapegwilwenje, “Jojowe nkali abhe nnyama, shaakwaye shene shitumbisho, shaabhlagwe kwa komwa maganga.” **21** Gene gowego pugabhoneshe gashinkujogoya kaje, nkali a Musha gubhashite, “Ngunajogopa na ngunatetemela.” **22** Ikabheje mmanganyanji nng'ikengenenje kushitumbi sha Shayuni, ku shilambo sha a Nnungu bhakwete gumi, Yelushalemu ja kunnugu, kulugwinjili lwa malaika, **23** maimano ga lugwinjili lwa nng'angalo gwa bha lielo lya a Nnungu bhajandikwenje mena gabhonji kunnungu. Na kabili nshiikangana tome na a Nnungu, bhalibhaukumula bha bhandu bhowe, na bhandunji bhakwetenje aki na bhakamilikenje. **24** Nng'ikengenenje kwa a Yeshu bhaalundanya bha malagano ga ambi, na kwa minyai jabho, jibheleketa ngani ja mmbone kupunda minyai ja a Abheli jila. **25** Bhai, mwiiteiganje nnakunkananga abheleketa na mmanganyanji jula. Ibhaga bhene bhakanilenje kumpilikanishiya alikwaaleyanga pa shilambolyo pano bhangatapulwanga, uwe shitukombole bhuli kutapulwa ibhaga shitukane kumpilikanishiya jwene akutuleya kukopoka kunnungu? **26** Gene malanga gala, lilobhe lyabho lyashinkutenda shilambolyo kuungumila, na nnaino bhashilajila, Shing'ungumiye

kabhili kamo, nngabha shilambolyope, ikabheje nneila peila na kunnungu. **27** Lyene lilobhe lya kuti, "Kabhili kamo" linaalangula kuti, indu yowe ipengenywe ikomboleka ungumiywa, ipinga ungumiywa niobha, nkupinga yangakomboleka ungumiywa ilonjeye. **28** Bhai uwe, tutende eja, pabha tunaaposhela upalume gwangatenganyika. Tutende eja na kwaatindibhalila a Nnungu, nkwaanonyeya, na kwaishimu na kwaajogopa, **29** pabha a Nnungu bhetu ni malinga moto utitimiya.

13 Mpundanje kупingana malinga bhandu bha likaja limo. **2** Nnalibhalanje kупoshela bhajeninji, pabha kwa tenda nneyo bhananji bhaaposhelenje ashimalaika gwangali kumumanya. **3** Mwaakumbushilanje bhatabhilwenjebho, mwiibhonanje mbuti nntabhilwenje pamo na bhanganyabho, na mwaakumbushilanje bhaapotekwanga, mwiibhonanje mbuti nkupotekwanga malinga bhanganyabho. **4** Ndoa jiishimiwe na bhandu bhowe, inapagwe ya labhalabha, mundu na nkagwe bhanatendebhukane, pabha a Nnungu shibhaaukumulanje bhowe bha labhalabha na bha utwai. **5** Nnabhanganje bhandunji bha pinjiya mmbiya, ikabheje ntogolelanje na inkwetenje, pabha a Nnungu bhayene bhashite, "Nganneka wala nkatubhilwa." **6** Kwa nneyo tunakola mashili ga bheleketa kuti, Bhakulungwa ni bhaajangutila bhangu, ngajogopa shindu. Mundu shandende nndi? **7** Mwaakumbushilanje ashikalongolele bhenunji, bhannungushiyenje lilobhe lya a Nnungu. Nnolesheyanye shibhashite tamangana ukoto, nkaguyanje ya mmbone ibhatendangaga. **8** A Yesu Kilishitu ni bhala pebhala, liyo na lelo na pitipiti. (aiōn g165) **9** Nnapuganywanje na majiganyo gana gogowe, pabha mitima jenunji jinapinjikwa jikole mashili kwa nema ja a Nnungu, na wala nngabha nkukagulila ikubho ya nkulya yalya. Yene ikubhoyo, yangaapwaanga

shindu bhene bhaakagulilanga bhala. **10** Uwe tukwete shitala,
na bhaabhisila bha Shiyaudi bhaatumishilanga pa Ukonjelo
bhakapinjikwanga kulya indu ishoywa mbepei ya pa shitala shetu.
11 Bhakulungwa Bhabhishila, bhanapeleka minyai ja bhannyama
pa Ukonjelo Kaje, nkupinga shoya jibhe mbepei ja leshelelwa
yambi, ikabheje bhannyama bhawilenje bhala bhanatiniywanga
na moto palanga likambi. **12** Kwa lyene ligongolyo na bhalabho
a Yeshu, nkupinga bhandunji bhatakatanje kwa minyai jabho
bhayene, bhashinkupotekwa nibhulagwa kunyenje shilambo. **13**
Bhai twaajendele kunyenje shilambo kula, tukunde kunyegaywa,
malinga bhalabho shibhakundile kunyegaywa. **14** Pa shilambolyo
pano twangali shilambo sha lonjeya, ikabheje tunalolela shilambo
shikwiyasho. **15** Bhai kupitila a Yeshu, twaape a Nnungu mbepei
ya kwaainiya kwa kang'wa yetu mobha gowe, nkukong'ondela kuti
tulikulupalile lina lyabho. **16** Na nnalibhalanje kutenda ya uguja
na jangutana, pabha yenei ni mbepei ikwaanonyela a Nnungu.
17 Mwaakundanje ashikalongolele bhenunji, na nkaguyanje amuli
yabhonji pabha bhanganyabho bhanasheyanga kwa ligongo lya
mitima jenunji, malinga bhandunji bhapinga bhalanganga kwa a
Nnungu ga imwatendangaga. Nkupinga bhatendanje nneyo kwa
nonyelwa nngabha kwa injika, pabha bhatendangaga kwa injika
ikampwailanga shindu. **18** Ntujujilanje na uwe, pabha tukulupalile
kuti ndumbililo yetu ya mmbone, na tunapinga kutenda ya
mmbone kwa indu yowe. **19** Ngunakunshondelesheyanga
nnuyujilanje, nkupinga a Nnungu bhamujenabho kunngwenunji
shangu. **20** A Nnungu bha ulele, bhaayushiye Bhakulungwa
bhetu a Yeshu, bhalibhashunga bhakulu bha ngondolo, kwa
ligongo lya minyai jabho jibhika malagano ga pitipiti. (aiōnios g166)
21 Bhanshimilikanje nkutenda yowe ili ya mmbone, nkupinga

nkombolanje kutenda ibhapinga, nabhalabho bhatende ibhapinga mmitima jetu, kupilila a Yeshu Kilishitu. Ukonjelo ubhe na bhenebho pitipiti. Amina. (aiōn g165) 22 Bhai, ashaapwanga ngunakunshondelesheyanga mposhelanje gene maleyo ga kuntaganga ntima pabha bhaluwa jino njijandika shiupikaya. 23 Ngunaa pinga mmumanyanje kuti apwetu a Timoteo bhagopwelwe kujela. Bhaikaga apano shangu, shing'ishe nabho pushinyiye kunngwenunjiko. 24 Shalamu jabhonji ashikalongolele bhenunji bhowe, na bhandunji bha ukonjelo. Ashaapwetu bha ku Italia bhanakunnamushilanga. 25 Tunakumpinjilanga mmowe, nema ja a Nnungu.

Yakobho

1 Nne Yakobho nili ntumwa jwa a Nnungu na jwa Bhakulungwa a Yesu Kilishitu ngunakunnjandishilanga mmandunji bha makabhila likumi limo na gabhili mpwilinganishilenje nshilambolyo, shalamu jenunji. **2** Mmaakulupalilanga ajangunji nng'angalalanjepe punkulingwanga kwa mboteko ya kila namuna, **3** pabha mmumanyinji cuti kulingwa kwa ngulupai jenunji kunapeleshela kwiipililila. **4** Kwiipililila kwenunji kumpanganje kushimilika na kutimilila nngulupai gwangali tubhilwa shindu shoshowe. **5** Ikabheje mundu munkumbi gwenunji atubhilwaga na ng'aniyo ya lunda, abhajuje a Nnungu bhakwaapanganga bhandu bhowe kwa ntima gwa ntuka wala bhakaatumbala, najwalakwe shaapegwe. **6** Ikabheje ajuje alikulupalila gwangali lipamba ly a jangulwa, pabha akwete lipamba anabha mbuti libhimbili ly a mashi ga bhaali linokolwa na mbungo akuno na kukuno. **7** Pabha mundu jwa nneyo anakulupalile cuti shaapate shindu koposhela kwa Bhakulungwa. **8** Mundu jwa ng'aniyo ibhili akakamula shindu shimo muitendi yakwe yowe. **9** Bhaakulupalilanga bhaalaga, bhaangalalanje pabha a Nnungu bhanakwaishimunji bhowe. **10** Na matajili bhaangalalanje pubhatuluywanga na a Nnungu, pabha nabhalabhonji shibhaobhanje malinga lilubha ly a mukonde shilijumula niobha. **11** Pabha lyubha libhalaga, linajumuya maamba na malubha gakwe ganawa na konja kwakwe kowe kunapela. Nneyo peyo na nkali mundu ashulushilwe indu shaapele nniengo lyakwe pemo. **12** Mbaya mundu akwiiluma ntima alilingwa, pabha akombolaga shaapegwe upo ya gumi shibhalajile Bhakulungwa ku bhandu bhakwaapinganga. **13** Monaga mundu alingwaga, analugule cuti, "A Nnungu bhananinga." Pabha a Nnungu bhakaalingwa na ilebho, na

bhenebho bhakakunninga mundu. **14** Ikabheje kila mundu analingwa, kwa nonyelwa na tembwa na ilokoli yakwe nnyene. **15** Kwa nneyo shilokoli shipundaga shinabheleka shambi na shambi shikomalaga shinabheleka shiwo. **16** Bhaakulupalilanga ajangunji nkupingwanga, nnatembwanje! **17** Kila shammbone shinkupegwaa, na shoshowe shitimilile, kushikoposhela kunnungu, kwa Atati bhapeleshe shilangaya. Bhenebho bhakatendebhuka, numbe bhangali nkubho gwa tendebhukatendebhuka. **18** Kwa pinga kwabho bhayeneuwe, nigubhatubhishile nndamo ja ambi kwa lilobhe lyabho lya kweli, nkupinga tubhe nnimbu gwa indu yabho ipengenyewe. **19** Bhaakulupalilanga ajangunji bhungumpinganga, nngamanyanje gegano. Bhai mundu abhe jwa minda kupilikanishiya na nngabha jwa minda kubheleketa na anabhe jwa tumbala shangu. **20** Pabha mundu akwete nnjimwa, nngakombola kwaanonyeya a Nnungu. **21** Kwa nneyo mwiilekanje kwa taliya indu yowe ya nyata na itendi yangali ya mmbone, mposhelanje lilobhe libhishilwe mmitima jenunji, likombola kuntapulanga mitima jenunji. **22** Ikabheje ntendelanje liengo malobhe ga Nnungu na nngabha kupilikanilape, akuno nnikwiitembanga mmitima jenunji. **23** Pabha mundu apilikana lilobhe gwangali tendela liengo, jwenejo pabha mbuti mundu akwiilola ku meyo kwake nshiyoo. **24** Pabha ailolaga nijabhula, shangupe analibhala shikuli kumeyo kwakwe. **25** Ikabheje mundu akujilola ukoto shalia jikamilishe, jikwaapanganga bhandunji ungwana nikujikagulila gwangali kulibhala shapilikene na tenda malinga shiikupinjikwa, bhai jwenejo itendi yakwe shiipate mboka ya a Nnungu. **26** Ibhaga mundu aiganishiyaga kuti anakagulila dini, ikabheje akakombola kuluibhilila lulimi lwakwe ukoto, jwene mundujo dini jakwe jikapwaa. **27** Mundu akwete dini ja mmbone

jibhoneka jangali ya nyata kwa a Tati a Nnungu ni ajuno, akwaajangutilanga bhanabhalekwa na bhashitenga nshilaje shabbonji na akwiiepuya na ya nyata ya pa shilambolyo pano.

2 Bhaakulupalila ajangunji, nkwaakulupalilanga Bhakulungwa bhetu a Yesu Kilishitu, Bhakulungwa bha ukonjelo nnakolanje luagu ku bhandu. **2** Monaga mundu ajinjilaga nnyumba ja kwaajujila a Nnungu, ali awete lupete lwa shaabhu na nngubho ya konja na kabhili ajinjilaga mundu nkulaga awete manyangui, **3** ibhaga mumposhelangaga ukoto awete ngubho ya konja nninkutinji, "Mmwe kuntame pa mmbone pano," na nkulaga jula nikummalanjila, "Ugwe ukajime apala" eu, "Kuutame pai tome na makongono gangu," **4** bhuli, Iwenelo nngabha luagu, na kwa gwene utendego, ng'aniyo yenunji nngabha impelenje kutenda ukumu jangali ja mmbone? **5** Bhaakulupalilanga ajangunji bhungumpinganga, mpilikananje! Bhuli, a Nnungu bhangaaagulanga bhaalaga bha pa shilambolyo pano bhakolanje shipato shikulungwa nngulupai, na bhaoposhelanje upalume gwa a Nnungu gubhaalajilenje bhakwaapinganga? **6** Ikabheje mmanganyanji nnakwanyegayanga bhaalaga! Bhuli matajili bhakakummonelanga nikumpelekanga ku bhaukumula? **7** Bhuli nngabha bhobho pebho bhakulukananga lina lya mmbone lya a Yesu Kilishitu limpegwilwenje? **8** Nkamulilangaga shalia ja upalume gwa a Nnungu malinga shijibhoneka Mmajandiko ga ukonjelo cuti, "Mumpinje ntami nnjenu malinga shinkwiipinga mmayene," shintendanje ya mmbone. **9** Ikabheje ntendangaga luagu mmumanyanje cuti nnatendanga shambi, na shalia jinakunng'ukumulanga cuti nshilebhanga. **10** Pabha mundu jojowe akamulila shalia yowe, alekaga jimo, bhai penepo alebhile kwa yowe. **11** Pabha bhene bhalugwile cuti, "Nhalabhelabhe," ni

bhobho pebho bhalugwile kuti, "Nnabhlaje." Kwa nneyo nkali nkalabhelabhe, ikabhe nshibhulaga, penepo nnebhile shalia.

12 Bhai, mmeleketanje na tenda malinga bhandu bhapinga ukumulwanga na shalia jikwaapanganga bhandu ungwana.

13 Pabha ukumu ja a Nnungu jikakummonela shiya mundu jwangali shiya kuka mwine. Ikabheje shiya sha a Nnungu shinapunda ukumu. **14** Bhaakulupalila ajangunji, ipwaa nndi mundu abheleketaga kuti akwete ngulupai, ikabheje gwangali kwaakunda a Nnungu? Bhuli jene ngulupaijo shijikombole kuntapula? **15** Ibhaga nnongo nnjenu jwangali nngubho eu shalya, **16** shiipwae nndi mundu jwa munkumbi gwenunji annugulilaga kuti, "Jenda kwa ulele, ukajote moto na jukuta," gwangali kumpa indu yatubhilwe, shiipwae nndi? **17** Nneyo peyo na ngulupai gwangali kwaakunda a Nnungu, jiwile. **18** Ikabheje mundu junshaabhelekete, "Mmwe nkwete ngulupai na nne ngwete itendi!" Ayaga, nnanguye ngulupai yenu gwangali itendi, na nne shininnanguye ngulupai yangu kwa itendi. **19** Mmwe nnikulupalila kuti a Nnungu ni bhamo, bhai ni sha mmbone! Ikabheje nkali mashetani galikulupalila na ungumila na jogopa.

20 Mmwe mmajinga, nnapinga nnangulwe kuti, ngulupai gwangali itendi jiwile? **21** Bhuli, atati a Bhulaimu bhangashemwa bhakwete aki kwa shitendi shabho, pene pubhanshoshiye mwana gwabho Ishaka pa shitala pala? **22** Nnilola, kuti ngulupai jishinkutenda liengo pamo na shitendi shabho, na ngulupai jila gujitimilile kwa itendi ila. **23** Kwa nneyo gugatimilile Majandiko ga kuti, "A Bhulaimu bhashinkwaakulupalila a Nnungu, na ngulupai yabho guyaatendile kukola aki, kwa nneyo gubhashemilwe ambwiga ajabho a Nnungu." **24** Bhai nnilolanga kuti mundu anapegwa aki, kwa ligongo lya itendi yakwe na nngabha kwa ngulupaipe.

25 Nneyo peyo puyaliji kwa a Laabhu lijajana bhala, bhuli bhangapegwa aki kwa shitendi shabho, pene pubhaaposhelenje bhaanushishiya nikwaatolosheyanga kwa mpanda guna? 26 Kwa nneyo malinga shiilu gwangali mbumu shiwile, nneyo peyo na ngulupai gwangali itendi jiwile.

3 Bhaakulupalilanga ajangunji, nnabhanganje bhaajiganya bhabhagwinji. Nnikumumanyanga kuti uwe tuli bhaajiganya ukumu jetu shijibhe jikulungwa kupunda bhananji. 2 Pabha uwe tubhowe tunaakubhala nng'indu yaigwinji. Ibhaga apali mundu akaakubhala nkubheleketa, jwenejo atimilile na alikombola kwii longoya. 3 Nnolanje putukuntabha migoji ja kunnongoya palashi, nkupinga akunde putukuntendebhya aloye kutupinga. 4 Na nnolanje ntumbwi nkali ubhe gwankulungwa, ikabheje unatendebhuya na ushukani nshokope, niloya kokowe kwaapinga nkulongoya, nkali jipuje mbungo jikulungwa. 5 Nneyo peyo nkali lulimi shibhalo shishoko sha nshiilu, ikabheje lunakwiipuna kwa kaje. Nnolanje moto nshokope unakombola kutiniya nng'itu gwankulungwa. 6 Na lulimi ni mbuti moto. Lushigumbala ilebho munkumbi gwa ibhalo yowe ya shiilu, na yeneyo ni inyatiya shiilu showe. Lulimi lunakoleyta moto gwangali mpelo gwa ku Jeanamu. (**Geenna g1067**) 7 Pabha mundu anakombola kulanga bhannyama bhowe, na ijuni na bhannnyama bhaatambalanga na yamaki. 8 Ikabheje jwakwa mundu akombola kululanga lulimi. Lulimi lwa ilebho lukaatondobha, lushigumbala ushungu gwa bhulaga. 9 Kwa lulimi lwetu tunakwaainiya Bhakulungwa na Atati a Nnungu, na kwa lulimi pelo tunakwaaloshanga bhandunji, bhapengenywenje kwa landana na bhayene a Nnungu. 10 Lulimi pelo lunajujila mboka na lunalosha. Bhaakulupalila ajangunji yeneyo inalimbiywa. 11

Bhuli shinjweshwe shimo shinakombola kukopoya mashi ga ima na mashi ga lalama? **12** Bhaakulupalila ajangunji, bhuli nkongo gwa ntini unakombola kuogoya iyepo ya shaituni, eu nshabbibhu kuogoya tini? Bhai ni nneyo peyo shinjweshwe shimo nngakombola kukopoya mashi ga lalama na mashi ga ima. **13** Gani munkumbi gwenunji akwete lunda na lumanyio? Bhai alanguye liengo lyakwe kwa itendi ya mmbone nkwiitimalika kwa lunda. **14** Ikabheje monaga mmitima jenunji igumbele ya ikidi na shojo, bhai nnailumbililanje akuno nnibheleketanga unami. **15** Lunda lwa nneyo lukaakoposhela kunnungu, ikabhe lwa shibhelekwe na lwa ikubho ya bhandunji na ya mashetani. **16** Pabha popowe pakwete ikidi na shojo ni pali na mipwilingano na kila itendi ya nyata. **17** Ikabheje lunda lukopoka kunani kunnungu, ni lwa mmbone numbe ni lwa ulele, na lwa kwiiitimalika na lwa kwapilikanishiyanga bhandunji, ni lugumbele shiya na lulongoya bhandu ku itendi ya mmbone na ya uguja Iwangali luagu na wala ugulumba. **18** Aki ni iyepo ya mmbeju ipandilwe kwa ulele na bhandu bhapinganga ulele.

4 Ngondo na mipwai munkumbi gwenunji kujikoposhela kwei? Twajilaga muilokoli yenunji ikumbuya ngondo nkati jenunji. **2** Nnappinganga indu inkanakolanga, kwa nneyo nnatumbililanga kubhulaga nnilokolilanga kuipata yene induyo, ikabhe nkakwiipatanga. Nnapwatanga na komana nkupinga mwapokonyolanje yene induyo. Nkapatanga shindu shinkupinganga pabha nkaajuganga shenesho kwa a Nnungu. **3** Numbe nkali nnjugangaga nkaapatanga, pabha nnajuganga kwa ndumbililo ya nyata nkupinga nkamilishanje ilokoli yenunji ya nyata. **4** Mmanganyanji nkakulupalikanga, bhuli nkakumumanyanga kuti kupanga mbwiga na shilambolyo

ni kubhika umagongo na a Nnungu? Bhai jojowe apanga mbwiga na shilambolyo anakwiibhika kubha mmagongo jwa a Nnungu. **5** Eu punkuganishiyanga kuti Majandiko ga Mmbone ganabheleketa unami pugataya kuti, “Mbumu jwa Mmbone jubhammishile a Nnungu atama nkati jetu anakutulokolila kwa kutubhonela lupimililo lwa kaje. **6** Ikabheje anakutupa mboka ja kaje, malinga Majandiko shigalugula kuti, a Nnungu bhakakwaapinganga bhakwaataukanga na bhakwiikuyanga ikabheje bhakwiitimalikanga bhanakwaapanganga mboka.” **7** Bhai mwaakundanje a Nnungu, munkananje Lishetani penepo shammutukanje. **8** Mwaabbandishilanje a Nnungu na bhalabho shibhammadishilanje mmanganyanji. Nnabhanje makono genuンji mmanganyanji nnebhilenje na ntipitiyanje mitima jenunji nkwenenje ng'aniyo ibhili ya pinga kukamula kwa pamo. **9** Nng'inginikanje nkwiipeta kwa ililo na nguto. Kueka kwenunji kutendebhushe nibha kuguta, na kwinonyela kwenunji nibha kuinjika. **10** Mwiitimalikanje ku Bhakulungwa, penepo shibhankuyanje. **11** Bhaakulupalila ajanganji, nnabheleketanjanje, akummeleketa nnjakwe eu kunng'ukumula, penepo anakujibheleketa na kijiukumula shalia. Kwa nneyo ujiukumulaga shalia, bhai penepo ni ukakujikunda, ikabhe unabha mundu nkuukumula. **12** A Nnungu jikape nibhabhishile shalia, na bhaukumula ni bhobho pebho jikape, bhaakombola kutapula na kutitimiya. Bhai ugwe gani ukunng'ukumula mundu nnjako? **13** Bhai, mpilikanilanje mmanganyanji nkulugulanga kuti, “Lelo eu malabhi shitujende ashila shilambo shila tukatame shaka tukatende upindi nkupinga tupate mbwaiko.” **14** Ikabheje ukakugamanya gapinga koposhela malabhi. Kulama kuli kwei? Pabha mmanganyanji

malinga ndambwepe, jibhoneka malanga gashokope, kungai jilitandanuka. **15** Punkupinjikwanga mmeleketanje kuti, "A Nnungu bhpdingaga shitulame, nitenda ashino na shishila." **16** Ikabheje nnaino nnakwiiniyanga na kwiipuna, kwiiniya na kwiipuna kwa nneyo, kwangali kwa mmbone. **17** Bhai mundu akakushikamula shindu sha mmbone akuno alikushimanya, penepo kuka jwenejo analebha.

5 Bhai, nnaino mmanganyanji matajili nngutanje shililo kwa ligongo lya shilaje sha ogoya shipinga kunnjiilanga. **2** Utajili gwenunji ubholile na nngubho yenunji iligwilwe na mang'ong'ota. **3** Shaabhu na ela yenunji ibhishile nkubha, na gwene nkubhago, shigunkong'ondelanje na shiguntaunanje iilu yenunji mbuti moto. Agano mobha ga kumpelo na mmanganyanji launo nnapunjilangape indu. **4** Nnolanje bhandunji bhakamulangaga maengo mmigunda jenunji bhunkanakwaalipanga, ililo ya bhaunanga inapilikanika, numbe yaishile Bhakulungwa a Nnungu. **5** Mobha gowe nshitamangana pa shilambolyo nkupoka na indu ya nong'a, nikwijimbaya kwiibhika ukoto kwa lyubha lya ingwa. **6** Nshikwaukumulanga na kwaabkulaganga bhandunji bhangali ilebho, na wala bhakakombolanga kupwata na mmanganyanji. **7** Kwa nneyo bhaakulupalila ajangunji, mwiiikakatimilanje mpaka pushibhaishe Bhakulungwa. Nnolanje mundu nkulima pa lindilila yalimile itendeshe, anakwikakatimila mpaka pushijiishe ula ja nduluko na janula. **8** Nneyo peyo na nkali mmanganyanji nnapinjikwanga kutama nnikwiikakatimilanga na nnikwiishimilikanga na kwiiluma mitima jenunji, pabha Bhakulungwa bhabhandishile kuika. **9** Bhaakulupalila ajangunji nnainginishilane, nnaukumulwanga na a Nnungu. Nnolanje bhaukumula bhalo tome na ika. **10** Bhaakulupalila ajangunji,

mpingangaga kumumanya namna ja kwipiililila na mboteko,
nkumbushilanje shibhaashite tendanga ashinkulondola bha
a Nnungu bhalunguyenje kwa lina lya Bhakulungwa. **11**
Tunabheleketa kuti, mbaya bhene bhaipilililenje bhala pabha
bhapatilenje mboka. Mpilikenenje ga kwipiililila kwa a Ayubhu,
na nshimanyinji shibhatendelwe na Bhakulungwa a Nnungu
kumpelo, pabha bhashikola shiya sha kaje na uguja. **12** Kupunda
gowego, bhaakulupalila ajangunji nnalumbilanje kwa a Nnungu
eu kwa litaka, wala kwa shindu shina shoshowe. Ikabheje
nnjangulanje, “Elo” monaga shindusho sha jangula elo, na
“Nng’ooke” monaga shindusho sha jangula ng’ooke. Penepo
nkaukumulwanga na a Nnungu. **13** Bhuli, mundu njenunji mwali
nshilaje? Bhai ajuje Nnungu. Bhuli, anaangalala? Bhai ajimbe
nyimbo ya lumbilila. **14** Bhuli, mundu munkumbi gwenunji nnwele?
Bhai penepo mwaashemanje bhanangulungwa bha likanisha,
bhannujilanje na kumpaka mauta kwa lina lya Bhakulungwa.
15 Kwa nneyo ibhaga kujuga kwabhonji kwa a Nnungu ni
kwa ngulupai shikunnamiyen nnwele jula, numbe Bhakulungwa
shibhannjinule, na monaga akwete ilebho, shibhanneshelele.
16 Bhai nkolangaga ilebho nng’ungamilenanje mwashayenenji
na nnujilanjanje nkupinga nnameiywanje. Malomboshelo gaka
mundu akwete aki gashikola mashili ga kaje numbe ganapwaa
kwa kaje. **17** A Eliya pubhaaliji bhandu malinga uwe, gubhaajujile
a Nnungu kwa tumbila kuti ula jinanye, gujileshile kunya kwa
yaka itatu na miei shita. **18** Gubhaajujile a Nnungu kabhilli,
ula gujinyele kukoposhela kunnungu, litaka gulimeshiye mitipo
jakwe. **19** Bhaakulupalila ajangunji, monaga mundu munkumbi
gwenunji aobhiywaga na itendi yangali ya mmbone, na juna
annjendelaga nikuntendebhushiya kuitendi ya mmbone kabhilli,

20 mmumanyanje kuti jwene anshoshiye njakwe kumpanda
gwa obha, shantapule nshiwo jwene mundu aobhile, na yambi
yaigwinji shiileshelelwe.

1 Petili

1 Nne a Petili, ntume jwa a Yesu Kilishitu, ngunakunnjandishilanga mmanganya nng'agulwenje na Atati a Nnungu, bhajeninji nshilambolyo mmutushilenje ku nkao gwa ku Ponto na ku nkao gwa ku Galatia na ku Kapadokia na ku Ashia na ku Bhishinia. **2** Atati a Nnungu bhashinkutumbilila kunng'agulanga mmanganya kuumila bhukalago na mwashinkutakaywanga nagwe Mbamu, kupinga mwaakundanje a Yesu Kilishitu na nkonjeleywanje na minyai jabho. Ngunakunnujilanga nnjeshewanje mboka na ulele. **3** Bhalumbililwe a Nnungu Atati bha Bhakulungwa bhetu a Yesu Kilishitu! Kwa shiya shabho shikulungwa bhashikututenda tupate gumi gwa ambi kwa kwaayuya a Yesu Kilishitu kukopoka bhakaweje. Bhatupele ngulupai ya kweli, **4** kwa nneyo tunalindilila ulishi gubhaabhisihlenje a Nnungu bhandunji bhabho. A Nnungu bhashikummishilanga gwene ulishigo kunnungu na kweneko ukabholo, ukaangabhanika na wala ukajumula. **5** Yeneyo shiibhe yenunji mmanganya kwa ngulupai nnatamangana muulinda gwa mashili ga a Nnungu mpaka muupatanje ntapulo upinga langulwa kumpelo gwa yaka. **6** Nng'angalalanje kwa genego, ikabheje kwa malanga gashoko ga nnaino gano, nkaangalala ukoto kwa ligongo lya mboteko ya malinjilo gamagwinji, **7** malinjilo nkupinga nkong'ondelanje ngulupai yenunji. Shaabhu nkali jiangabhanikayo jinalingwa pa moto, na malinga ngulupai jenunji jili ja mana kupunda shaabhu, jinapinjikwa jilingwe jimanyishe gwa mmbone gwakwe. Penepo shinnumbililwanje na kuywa na ishimika lyubha lisibhabhoneshe a Yesu Kilishitu. **8** Nkali nkanabhe kwabhonangayo, mmanganyanji nnakwaakulupalilanga nkali nkakwaabhonanga nnainoyo. Kwa

nneyo nnakwiinonyelenga kwa kaje numbe kwangatendeka kutalashiywa, **9** pabha nnapatanga ntapulo gwa mitima jenunji na shitumbililwe nngulupai jenunji. **10** Ashinkulondola bha a Nnungu bhashinkuloleyanga na kagulila ga gwene ntapulogo, gubhalondolenje ga mboka jipinga kunng'ishilanga mmanganya. **11** Gubhalinjilenje kuloleya malanga na miongwe gugapinga koposhela genego. Yani malanga galugwile Mbamu jwa a Kilishitu aliji nkati jabhonji, alilondola ga mboteko ipinga kwaapata a Kilishitu na ukonjelo upinga kagula gapitaga genego. **12** A Nnungu bhashikwaunukulilanga bhamumanyanje cuti pubhabheleketangaga gene gumpilikenenje mmanganya kukopoka kwa ashintume. Bhene bhannungushiyenje Ngani ja Mmbone kwa mashili gaka Mbamu jwa Ukonjelo atumilwe kukopoka kunnungu. Lyene liengolyo likaliji kwa ligongo lyabhonji ashaayene, ikabhe kwa ligongo lyenu mmanganya. Genego nkali ashimalaika bha a Nnungu bhatendaga pinganga bhagabhonanje. **13** Kwa nneyo, bhai, mwishimilikanje na nsheyanje. Nnolelanje nema jinkupinga poshelanga pushibhaishe a Yeshu Kilishitu. **14** Nkundanje ga a Nnungu, nnakaguyanje kutenda yangali ya mmbone imwatendangaga bhukala pumwalinginji mabhelu. **15** Ikabhe malinga bhayene bhanshemilenje shibhali bha ukonjelo, nnapinjikwanga mmanganje mma ukonjelo. **16** Pabha ishijandikwa, "Mmanganje mma ukonjelo, pabha nne najwa ukonjelo." **17** Na ibhaga a Nnungu bhunkwashemanga Atati, bhai mmumanyanje cuti bhenebho bhanaukumula bhandu bhowe kwa itendi yabhonji, gwangali kuagulanya. Kwa nneyo ntamangane kwa lipamba lya kwaajogopa a Nnungu kwa mobha genunjiga tama mbuti bhajeninji pa shilambolyo pano. **18** Na mmanganya mmumanyinji

cuti nshigombolwanga kukopoka ku gwangali gwa mmbone
gwenunji gumwauposhelenje kukopoka kwa ashainabhenunji.
Numbe mmangagombolwanga kwa indu iangabhanika, ela na
shaabhu, **19** ikabhe kwa minyai ja mmbone ja a Kilishitu, bhaaliji
malinga mwana ngondolo jwa mmbone na jwangali ilebho. **20**
Bhenebho bhashinkuagulwa na a Nnungu kutandubhila bhukala,
shilambolyo shikanabhe panganya, ikabheje kuyaka ya
kumpelo ino gubhalangwilwe kwa ligongo lyenu mmanganyanji.
21 Kwa ligongo lya bhenebho, nnakwakulupalilanga a Nnungu
bhaayushiye bhenebho bhakaweje nikwaapa ukonjelo. Kwa
nneyo ngulupai yenunji ibhe kwa a Nnungu. **22** Pabha nnaino,
nshikundanga majiganyo ga kweli ga a Yeshu Kilishitu,
mmanganya mwiikonjeleyenje mmitima jenunji na kwaapinganga
bhandu ajenunji gwangali ya kwilambilila, bhai, mpinganganje
mpaka mmitima. **23** Pabha nshibhelekwanga gwabhili, nngabha
kwa mmbeju yawa, ikabhe kwa mmbeju yangawa, kwa lilobhe
lya a Nnungu likwete gumi, litama pitipiti. (*aiōn g165*) **24** Na
malinga Majandiko shigakuti bheleketa. “Bhandunji bhowe
malinga manyai, na ukonjelo gwakwe gowe na malinga lilubha
lya manyai. Manyai ganajumula na malubha ganapakatika.
25 Ikabheje lilobhe lya Bhakulungwa linatama pitipiti.” Na
lyene lilobhelyo ni Ngani Ja Mmbone jilungwiwe kwenu
mmanganyanji. (*aiōn g165*)

2 Bhai, nnekanje yowe yangali ya mmbone na ya unami na ya
ugulumba na ya lupimililo na malobhe ga lambilila ganapagwe
kabhili. **2** Malinga ashinambombe shibhakugapinganga mabhele,
nneila peila mmanganya nngapinganje mabhele ga mmbone
ga ukonjelo gwa a Nnungu, kupinga nkulanje ukoto muntapulo
gwa a Nnungu. **3** Malinga shigabheleketa Majandiko ga

Mmbone. "Nninganje nnolanje kuti Bhakulungwa ni bhanguja."

4 Bhai, mwaajendelanje Bhakulungwa! Bhenebho ni liganga likwete gumi likanilwe na bhandunji, ikabheje kwa a Nnunu ni liganga lya galama kaje liagwilwe. **5** Numbe mmanganya, malinga maganga gakwete gumi, nshishengwanga mmanganje nyumba jika Mbumu na mmanganje mmabhishilanga bha a Nnunu bhakwetenje ukonjelo na mmishilanje mbepei ipingwa na a Nnunu, kwa ligongo lya a Yeshu Kilishitu. **6** Pabha ishijandikwa Mmajandiko Gammbone. "Nnole, ngunaabhika liganga ku Shayuni, liganga likulu lya pa ndumba, liagwilwe lya galama. Na mundu ashaabhakulupalile akaigamba." **7** Kwenu mmanganya nkukulupalilanga, lyene ligangalyo ni lya galama, ikabheje kwa bhene bhangakulupalilanga bhala, "Liganga libhakanilenje bhaashenga, nnaino ni liganga likulu lya pa ndumba." **8** Na kabhili kuti. "Lyenelyo ni liganga lya kwiikubhala, liganga likulu lya gwiya bhandu." Bhandunji bhanakwiikubhalanga kwa ligongo lyangakulupalila lilobhe lila na bhene bhanganyabho bhashibhikwanga bhagapatanje genego. **9** Ikabheje mmanganya lubheleko luagwilwe, ashinkulondola bha a mpalume, bhandunji bha ukonjelo, bhandu bha bayene a Nnunu, nshiagulwanga nnunguyanje itendi yaikulungwa ya a Nnunu bhanshemilenje kukopoka ku lubhindu, nikunnjinjiyanga nshilangaya shabbo sha lapa bhandu. **10** Bhukala mmanganya nkalinginjiji mmandunji, Ikabheje nnaino ni bhandunji bha a Nnunu. Bhukala nkabphonelwangaga shiya. Ikabheje nnaino nnabphonelwanga shiya na a Nnunu. **11** Ashaambwiga ajangu, mmanganya nninginji malinga bhapita mpanda na bhalininginji mmwanja pa shilambolyo pano, ngunakunneyanga nnekanje ilokoli yangali ya mmbone ya nshiilu ikapinjikwa na ntima.

12 Ntamangane ukoto na bhandunji bhakakwaamanyanga a Nnungu, nkupinga bhannambilangaga kuti nkutendanga yangali ya mmbone, bhaibhonangaga itendi yenunji ya mmbone, bhaakuyanje a Nnungu lyubha lya ukumu. **13** Nkundanje yowe ilajilwa na bhandu, kwa ligongo lya Bhakulungwa, ibhaga a mpalume ni bhakwete ukulungwa, **14** ibhaga bhakulungwanji bha ilambo, ibhaga bhaagulwenje na bhenebho kupinga kwaapanyangulanga bhatendanga yangali ya mmbone na kwapanganga iukilo bhatendanga ya mmbone. **15** Pabha a Nnungu bhanapinga mpeyanje malobhe ga shibhelu ga bhandunji bhangalinginji lunda kwa itendi yenunji ya mmbone inkutendangayo. **16** Nnatamangane malinga bhangwana, ikabhe kwiitagwala kwenunji kunabhe kwa ishiya yangali ya mmbone, ikabhe ntamangane mbuti bhatumwa bha a Nnungu. **17** Mwaishimiyanje bhandu bhowe, mwaapinganje bhakilishitu ajenunji, mwajogopanje a Nnungu na mwaishimiyanje a mpalume. **18** Mmanganya bhatumwa, nkundanje inkubhalanjilwanga na bhakulungwa bhenunji kwa lipamba lya kaje, nngabha bhalinginji bha kwiitimalikangape ikabhe nkali bha nngomo. **19** Pabha gwenego ni uguja gwa kaje, mundu kwiipililila mboteko gwangali sha lebhile, kwa ligongo lya kwaishimiya a Nnungu shimpatanje mboka. **20** Pabha, shimpatanje upo yashi kwa kwiipililila kukomwa ga ilebho yenunji? Ikabheje mwiipililangaga mboteko akuno nnitendanga ya mmbone, a Nnungu bhananonyelwa kwa genego. **21** Genego ni gunshemelwenje, pabha a Kilishitu bhayene bhashinkupotekwa kwa ligongo lyenu mmanganyanji, nikunneshelanga nnandanyo, nkaguyanje ibhatendile bhanebho **22** Bhanebho bhangalebha, wala lilobhe lya unami lyangapilikanika nkang'wa jabho. **23**

Pubhatukanwaga bhangagalabhula, pubhapotekwaga bhanebho bhangakalipa, ikabhe bhashinkwaaleshela a Nnungu, bha ukumula kwa aki. **24** Bhenebho bhayene bhashinkwijigala yambi yetu nshiilu shabho panani nshalabha, nkupinga kwa itendi ya yambi, tubhoneshe mbuti tuwile, na kwa itendi aki tukole gumi, bhai tulame kwa ligongo lya itendi ya aki. Na kwa komwa kwabho mmanganya nnamiywenje. **25** Mmanganya pumwalinginji mbuti ngondolo iobhile, ikabheje nnaino mmujengene ku Bhashunga, Bhaulinda bha mitima jenunji.

3 Na mmanganya mmandonyanji nnombilwenje, nkundanje inkubhalanjilwanga na ashimbuje bhenunji, nkupinga ibhaga bhapalinji bhanabhalume bhakaakulupalilanga ga lilobhe lya a Nnungu, bhai bhaibhonangaga itendi yenunji ya mmbone bhakulupalilanje. Wala gwangali kubheleketa lilobhe, **2** pabha shibhaibhonanje itendi yenunji ya mmbone na ya kwaajogopa a Nnungu. **3** Kwiikelengelela kwenunji kunabhe kwa indu ya bhoneka palangape na kuwalila indu ya shaabhu na nngubho ya konja. **4** Ikabheje, kukonja kwenunji pukupinjikwa kubhe kwa gundu gwenunji gwa muntima, gwa indu yangaangabhanika, yani, ntima gwa uguja na kwiitimalika pabha genego ni gapinjikwa na a Nnungu. **5** Nneyo ni shibhaikelengelelangaga bhanabhakongwe bha bhukala bhalinginji bha ukonjelo na bha kwaakulupalilanga a Nnungu na kunda ibhabhalanjilwangaga na ashimbuje bhabhonji.

6 Malinga a Shala bhatendaga kunda ibhabhalanjilwaga na a Bhulaimu nikwaashema bhenebho bhakulungwa bhabho. Numbe mmanganya shimmanganje ashibhana bhabho ntendangaga ga mmbone gwangali kola lipamba lya shindu shoshowe. **7** Numbe mmashileunji nnombilenje, nkolanje lunda punkutamangana na ashaakongobhenunji, nnapinjikwanga mwaatetelesheyange

malinga iumbe yangali mashili, pabha mpinga poshelanga mboka ya gumi pamo, nkupinga kujuga Nnungu kwenunji kunaibhililwe. **8** Kungai nguti, nnapinjikwanga nkolanje ntima gumo na ng'aniyo imo na mpingane shiulongo na mwiitimalikanje **9** Nnagalabhalanje yangali ya mmbone kwa yangali ya mmbone ku bhandu, eu kugalabhula matukano kwa matukano, ikabheje bhakuntendelanga yangali ya mmbone mwaajujilanje mboka, pabha mmanganya nshishemelwanga mboka na a Nnungu. **10** Malinga shigalugula Majandiko, "Apinga kuangalila kulama, na kugabhona mobha ga mboka, aibhilile lulimi lwakwe lunabhelekete yangali ya mmbone, na kang'wa jakwe jinabhelekete ya unami. **11** Aleshe yangali ya mmbone, atende ya mmbone, auloleye ulele na aukagulile kwa kaje. **12** Pabha meyo ga Bhakulungwa ganakwaloleyanga bhakwetenje aki, na makutu gabho ganapilikanishiya kujuga kwabhonji. Ikabheje bhaatendanga yangali ya mmbone bhakakubhonanga kumeyo kwa Bhakulungwa." **13** Gani shampotekanje ntumbilangaga kutenda ya uguja? **14** Ikabheje, nkali mpotekwangaga kwa ligongo lya tenda ya aki, bhai mbaya. Nnannjogopanje mundu jojowe, wala nnakolanje lipamba. **15** Ikabheje mwaaishimiyanje Kilishitu mmitima jenunji. Mmanganje tayali kunnjangula mundu jojowe shammuyanje ga ngulupai jili mmitima jenunji. **16** Mwiibhikanje ng'aniyo yenunji ya muntima ibhe ya mmbone, nkupinga bhakummelekatanga ya kunnambililanga bhakolanje oni pubhakwiibhonanga itendi yenunji ya mmbone ya Shkilishitu. **17** Pabha, mbaya kupotekwa kwa ligongo lya tenda ya uguja, monaga a Nnungu bhapinjile, nngabha kupotekwa kwa ligongo lya tenda yangali ya mmbone. **18** Pabha a Kilishitu bhayene bhapotekwe kamope, kwa ligongo lya

bhandunji bhalebhilenje, mundu akwete aki kwa ligongo lya bhandunji bhangalinginji aki, kuinga bhampelekanje mmanganya kwa a Nnungu. Shiilu shabho gushibhulegwe, ikabheje kwa mashili gaka Mbamu, gubhapatile gumi kabhili, **19** na kwa gwene gumigo nigubhapite kukwaalungushiyanga ashimbumu bhatabhilwenje bhala. **20** Bhene bhanganyabho ni bhakanilenje kwaakunda a Nnungu, pubhaipililile kwaalindililanga a Nuu mobha gubhaalayaga shapina. Bhandunji bhashokope, yani bhandunji nane, gubhatapulwenje kuwa na mashi. **21** Gene mashigo pugaliji malinga ubhatisho, ukuntapulanga mmanganya agano mobha gano. Ubhatisho nngabha ushoya ya nyata nshiilu, ikabhe malagano kwa a Nnungu ga tumbilila kutenda ya uguja. Unakuntapulanga kwa yuka kwabho a Yesu Kilishitu, **22** nnaino a Yesu bhapite kunnungu na bhatemi kunkono nnilo gwa a Nnungu, bhanatagwala ashimalaika bha a Nnungu na ukulungwa gowe.

4 Pabha, a Kilishitu bhashinkupotekwa nshiilu, na mmanganya nneila peila nnapinjikwanga mwiishimilikanje na tumbilila kutenda nneyo peyo, pabha mundu apotekwaga nshiilu, aleshile yambi. **2** Bhai, kutandubhila nnaino kwa mobha gannepeshelenje kutama pa shilambolyo pano, nnapinjikwanga ntamangananje malinga shibhapinga a Nnungu, nnatamangane kwa kagulila ilokoli yenunji ya nshiilu. **3** Mobha gapitilego, mwashinkwiibhukanga kaje nkutenda ibhatendangaga bhandunji bhakakwamanyanga a Nnungu, mwayobhelelenje kutenda ya labhalabha, na ilokoli yangali ya mmbone, na ya kolelwa, na ya joloka, na kutindibhalila yanamu, na nngoma ya mashetani, yoweyo ni ikwaashima a Nnungu. **4** Nnaino bhandunji bhakakwaamanyanga a Nnungu bhala bhanakunkanganigwanga, pubhakummonanga nkalongana

nabhonji kabhili mwiitendi yabthonji yangali ya mmbone. Bhai, nikuntukanangaga. **5** Ikabheje shibhapinjikwanje katalashiya ga ndamo yabthonji kwa a Nnungu bhalii tayali kwa ukumula bhabhakotonji na bhawilenje! **6** Kwa lyene ligongolyo nkali bhawilenje bhashilungushiywanga Ngani ja Mmbone, nkupinga bhaukumulwanje nshiilu, malinga shibhaukumulwanga bhananji, ikabhe bhakolanje gumi mmbumu, malinga a Nnungu shibhali na gumi. **7** Ikabheje mpelo gwa indu yowe ubhandishile. Kwa nneyo nnaapinjikwanga nkolanje lunda na kwiluma na sheya, nkujuga Nnungu. **8** Nakupunda genego mpingane kwa kaje, pabha kупingana kunaunishila gwinji gwa ilebho. **9** Nnagushiyanganje gwangali ya inginika. **10** Kila mundu atendele liengo shiloi shapegwilwe na a Nnungu nkwaajangutilanga bhananji malinga ntumishi jwa mmbone, jwa nema ja a Nnungu. **11** Mundu akwete shiloi sha bheleketa, alunguye ntenga gwa a Nnungu, akamula maengo, akamule kwa mashili gapegwilwe na a Nnungu, nkupinga kwa gowe gatendeka bhakuywe a Nnungu, kwa ligongo lya a Yesu Kilishitu bhakwete ukonjelo na mashili pitipiti!

Amina. (aiōn g165) **12** Ashaambwiga ajangunji, nnakanganigwanje ga malinjilo ga mboteko gunkugapatanga, nnabhonanje mbuti shindu shijeni kwenu mmanganya. **13** Ikabheje mwiinonyelanje pabha numbe mmanganya nnapotekwanga malinga a Kilishitu, nkupinga kumwinonyelanje mobha pushuiyiye bhoneka ukonjelo gwabho. **14** Monaga ntukanwangaga kwa ligongo lya lina lya a Yesu Kilishitu mbaya, pabha Mbamu jwa ukonjelo gwa a Nnungu, pali na mmanganya. **15** Anapagwe mundu jojowe munkumbi gwenunji apinjikwa kupotekwa kwa ligongo lyabha nkubhulaga, eu nngwii eu malinga mundu aoleya ngani ya bhandu ajakwe. **16** Ikabheje mundu apotekwaga kwa ligongo

lyabha nkilishitu, bhai, anakole oni, ikabhe abhakuye a Nnungu pabha anashemwa kwa lina lya a Kilishitu. **17** Pabha mobha ga ukumu gaishe na ukumu kujitandubhila nnyumba ja a Nnungu. Na ibhaga ukumu jitandubhila kwetu uwe, bhai, mpelo gwa bhandunji bhakaakulupalilanga Ngani ja Mmbone ja a Nnungu shiubhe bhuli? **18** Malinga shigataya Majandiko ga ukonjelo, "Ibhaga ikomala kutapulwa mundu akwete aki, shiibhe bhuli kwa bhandunji bhakakwaajogopanga a Nnungu na bhakwetenje ilebho?" **19** Bhai kwa nneyo, bhaapotekwanga kwa pinga kwabho bhayene a Nnungu, bhanapinjikwanga kwa itendi yabhonji ya mmbone, bhaikamuyanje kwa Ashipanganya bhaakulupalika.

5 Nne nili kalongolele nnjenunji jwa likanisha na nkukong'ondela jwa mboteko ya a Kilishitu nneila peila shingundikanywe muukonjelo upinga bhoneka kungaigo, ngunakunshondelesheyanga, **2** nnishunganje likundi lya a Nnungu limpegwilwenje, nnigoyanje nngabha kwa shishilishiywa, ikabhe kwa engwa malinga shibhapinga a Nnungu. Ntendanje lyene liengolyo nngabha kwa lukobho lwa ela ikabhe kwa ntima gwa kwaatumishila a Nnungu. **3** Nnaabhuyanje bhandunji bhumpegwilwenje kwaalongoyanganga, ikabhe mmanganje nnandanyo gwa kaguya nnikundimo. **4** Pushakoposhele Nshunga Nkulu shimpegwanje shilemba sha ukonjelo shangaangabhanyika. **5** Nneyo peyo numbe mmanganya mmangwendo nkundanje inkubhalanjilwanga na bhanangulungwa bha makanisha. Mmanganya mmowenji mwiitimalikanje nnijangutilananga, pabha Majandiko ga ukonjelo gakuti. "A Nnungu bhanakwaataukanga bhandunji bha kwiipuna, ikabheje bhanakwapanganga nema bhakwiitimalikanga." **6** Bhai, mwiitimalikanje mmakono ga Bhakulungwa a Nnungu, nkupinga

bhannjinulanje pa malanga ga pwaa. **7** Mwaapeleshelanje ngolobha yenunji yowe, pabha shibhampanganje inkuloleyanga. **8** Mwitetelesheyanje na nsheyanje! Pabha mmagongo njenunji Lishetani, anakonangona mbuti imba jitongola jililoleya jwa kunkamula. **9** Mwiishimilikanje nngulupai na munkananje, akuno nnikumumanyanga kuti ashaapwenunji nshilambolyo bhanapatanga mboteko yoyo. **10** Na a Nnungu bhakwete nema, bhanshemilenje kujinjila muukonjelo gwabho gwa pitipiti nkulundana na Kilishitu, mpotekwangaga kwa mobha gashoko, bhayene shibhanng'alayanje, nikunshimilikanga na kumpanganga mashili. (aiōnios g166) **11** Bhenebho ni a Nnungu bhakwete mashili pitipiti! Amina. (aiōn g165) **12** Njikunnjandishilanga malobhe gashokope gano kwa jangutilwa na a Shilibhanushi, bhunaamanyi kuti bhakilishitu ajangu bha kulupalika. Ngunakuntaganga ntima kwa kunnkong'ondelanga kuti jejino kweli nema ja a Nnungu. Ntamangane ukoto na jene nema jino. **13** Bhandunji ajenunji bha a Nnungu bhalinginji ku Bhabhuloni kuno na a Maliko bhanakunnamushilanga. **14** Nnamushilanjanje kwa pingana Shikilishitu. Ngunakunnujilanga ulele mmowenji, nninginji bha a Kilishitu.

2 Petili

1 Nne a Shimoni Petili, ntumishi na ntume jwa a Yesu Kilishitu, ngunakunnjandishilanga mmanganya mpatilenje ngulupai jikulungwa malinga jitupatile uwepe jila, kwa aki ja a Nnunu bhetu na a Yesu Kilishitu bhaatapula. **2** Ngunakunnjujilanga nema na ulele nkwaamanya a Nnunu na a Yesu Kilishitu Bhakulungwa bhetu. **3** Kwa kombola kwabho bhayene, a Nnunu bhashikutupa indu yowe itukwiipinga nkupinga tutame kwa kwaishimiya na kwaamanya kuti bhenebho ni bhatushemile kwa ukonjelo gwabho na uguja gwabho bhayene. **4** Kwa nneyo bhashikutupa indu ya mmbone malinga shibhalajile mmiadi jabho, nkupinga kwa yeneyo nkombolanje kwiikana ilokoli yangali ya mmbone ya indu ya pashilambolyo iangabhanya bhandu na tulandane na bhayene a Nnunu. **5** Kwa lyene ligongo lya ngulupai jenunji mpundanje kukola uguja na kwa gwene ugujago mpundanje kukola lumanyio. **6** Kwa lumanyio lwenunji, mwiiumanje na nkwiiluma kwenunji, mwiipilililanje na nkwiipilillila kwenunji mwiitimalikanje na mwaishimiyanje a Nnunu, **7** nnongananje nkwaajuganga a Nnunu, na nkwaajuganga a Nnunu kwenunjiko, mpingane shiulongo na mwapinganje bhandu bhowe. **8** Pabha mpundangaga kushulushilwa na yenei, nkakolanga ukata na shimmanganje bhandunji bha pwaa nkwaamanya Bhakulungwa bhetu a Yesu Kilishitu. **9** Pabha jwangali gene malangogo pali malinga nangalole eu akakwiibhona indu ya kwa taliya, na alibhalile kuti aleshelelwe yambi yakwe ya bhukala. **10** Bhai, kwa nneyo bhakilishitu ajangunji, nshemilwenje na a Nnunu ntumbilanje kukong'ondela kushemwa kwenunji kunshemilwenje na a Nnunu kulonjeye nndamo jenunji, pabha ntendangaga nneyo nkaikubhalanga.

11 Kwa nneyo shintendelwanje mituka ja jnjila muukulungwa gwa pitipiti gwa Bhakulungwa bhetu na Bhaatapula bhetu a Yesu Kilishitu. (aiōnios g166) **12** Kwa nneyo mobha gowe shimbunde kunkumbushiyanga gegano, nkali nngamanyinjiyo na mwiishimilikenje kwa jene kweli jinnijiposhelenjejo. **13** Ngunabhona sha aki, ninjumuyanje na nintaganje ntima na kunkumbushiyanga gegano mobha gowe nilitama pashilambo pano. **14** Numumanyi kuti kuwa kwangu kubhandishile, malinga Bhakulungwa bhetu a Yesu Kilishitu shibhashite nangula. **15** Bhai, shindumbile kunkumbushiyanga nkupinga nkali ng'waga nkumbushilanje gegano mobha gowe. **16** Pabha putwannugulilangaga ga kwiya kwabho Bhakulungwa bhetu a Yesu Kilishitu, tukannugulilangaga ndango ya ugulumba. Ikabheje uwe twaashayene tushikuubhona kwa meyo getu ukulungwa gwabho. **17** Pabha bhashinkupegwia ishma na ukonjelo kukopoka kwa Atati a Nnungu, lilibheleketeta, “Jweneju ni Mwanangu jungumpinga kwa kaje.” **18** Na, uwe twaashayene twalipilikene lyene lilobhelyo kukopoka kunnungu putwaaliji na bhenebho kuntundu shitumbi sha ukonjelo shila. **19** Na kabhili, ntenga gwa ashinkulondola bha a Nnungu unakong'ondela genego, na mmamganya nnitendanga mwammbone malinga shinkulolelanga mbuti shenje shikolela pa lubhindu mpaka kuika kwa a Yesu bhali shilangaya shetu. **20** Kupunda genego, gwakwapi ukulondola uli Mmajandiko ga Ukonjelo ulondwele kwa mashili ga nkulondola nnyene. **21** Pabha gwakwapi ukulondola ukoposhela kwa pinga mundu, ikabhe bhandunji bhalondolanga bhanalongoywanga naka Mbamu jwa Ukonjelo.

2 Ikabheje munkumbi gwa Bhaishilaeli gubhakoposhelenje ashinkulondola bha unami, malinga shibhaapinga koposhelanga bhaajiganya bha unami munkumbi gwenunji. Kwa nng'yo bhene bhandunjibho shibhajiganyanje majiganyo ga puganya bhandu, akuno bhalikwaakananga Bhakulungwa a Yesu bhaagombwelenje na kwa gwene utendego shibhaimushilanje bhaiobhiyenje ashaayenenji. **2** Na bhandunji bhabhagwinji shibhakaguyanje itendi yabthonji ya nyata na kwa ligongo lya bhene bhanganyabho mpanda gwa kweli shiutukanwe.

3 Kwa ilokoli yabthonji yangali ya mmbone ya pinga indu, shibhapwaikanje kwenu mmanganya kwa kummalanjilanga malobhe ga unami. Ikabheje kuumila bhukala Nkuukumula jwabthonji aibhishile ukoto, na mboteko yabthonji ikakabha!

4 Na nkali ashimalaika bhatendilenje ilebho, a Nnunu bhangaabphonelanga shiya, ikabhe bhashinkwaaleshelanga nniimbo, nikwaatabhangaa nnubhindu bhatamangane mwenemo mpaka lyubha lya ukumu. (**Tartaroō g5020**) **5** Wala

a Nnunu bhangashibhonela shiya shilambolyo sha bhukala, bhashinkupeleka nduluko nshilambolyo sha bhandu bhakaajogopangaga a Nnunu, ikabhe a Nuu bhalunguyaga ya aki, gubaatapwile na bhandunji bhananji shabha. **6** A Nnunu kabili gubhaiukumwile ilambo ya Shodoma na Gomola, nikwiitiniya na moto ibhe shilangulo sha gapinga kwaapatanga bhandunji bhakakwaajogopanga a Nnunu. **7** A Nnunu gubaatapwile a Lutu, bhandu bhaawkwete aki, bhainkikaga ga ikubho yangali ya mmbone yatendwaga na bhandunji. **8** Pabha mundu akwete aki atamaga munkumbi gwabthonji jula, atendaga kwiibhona na pilikana itendi yabthonji yangali ya mmbone, kwa nneyo ntima gwakwe gwatendaga injika mobha gowe. **9** Bhai,

Bhakulungwa bhamumanyi namuna ja kwaatapulanga bhandunji bhakwaajogopanga a Nnungu. Numbe bhanakwaalindililanga bhandunji bhaatendanga yangali ya mmbone mpaka lyubha lya ukumu. **10** Bhene bhandunjibho bhanaakagulilanga ilokoli ya nyata ya nshiiyu, na petekuya mashili ga ukulungwa gwa a Nnungu. Bhene bhaajiganyabho bhashikolanga mbwinya na kwipuna, bhakaajogopanga kwiitukana iumbe ya kunani ipegwilwe ukonjelo. **11** Ikabheje ashimalaika bhakwetenje mashili na kombola kupunda bhene bhaajiganya bha unamibho, bhakakwaashitakiyanga ku Bhakulungwa. **12** Bhene bhandunjibha bhananyegayanga indu ibhakakuimanyanga, mbuti bhannyama bhangalinginji lunda bhabhelekwenje nkupinga bhakamulwanje na ingwa. Na bhalabhonji mbuti bhannyama shibhabhulagwanje. **13** Shihapatanje mboteko kwa ligongo lya ilebho ibhaatendelenje bhandu ajabhonji. Inakwaanonyelanga kutenda shoshowe shijipinga mitima jabhonji, nkali mui nakalanga. Bhene bhanganyabho bhanakuntokomayanga pubhakwianganyanga na mmanganya nkulya shalya sha pamo sha Bhakilishitu, akuno bhalinonyelwanga na ikubho yabhonji ya nyata. **14** Meyo gabhonji ganalokolila ya labhalabha na bhakaatogolelanga kulebha, bhalikwaatekeyanga bhandunji bhakwetenje mitima ja shopoli. Na mitima jabhonji jiobhelele kulokolila indu ya bhandunji bhaloshilwenje na a Nnungu. **15** Bhashikuulekanga mpanda ugolweshe, niobha, nikagula mpanda gwa a Bhalaamu bhanabhabho a Bheoli, yaanonyelaga kuposhela mmbiya kwa itendi ya lulunganya. **16** Ikabheje gubhakalipilwe ga ya nyata yabho. Na mbunda jwabho, nnyama akabheleketa, gwabhelekete mbuti mundu, gwapeshiye shalubha sha bhene ankulondolabho. **17** Bhene bhandunjibha

paalinginji bhangali bha mmbone mbuti injweshwe ijumilile,
na mbuti maunde gapepeluywa na mbungo, na lubhindu lwa
totolo lushihibikwa kubha ndamo jabhonji. (questioned) **18** Kwa
malobhe gabhonji ga nyata, na ga kwiipuna, na kwa ilokoli
yabhonji yangali ya mmbone ya nshiilu bhanakwaatanjiyang
bhandunji bhaiepuyenje kunnaino na nkumbi gwa bhandunji
bhaatamangana muunami. **19** Bhalikwaalugulilanga bhandunji
kuti shibhabhanganje bhangwana kwa leshelelwa yambi yabhonji,
akuno ashaayene bhalinginji bhatumwa bha itendi ya nyata,
pabha mundu anabha ntumwa jwa shoshowe shikuntagwala.
20 Pabha bhandunji bhaikombolelenje kwiibhutuka ya nyata
ya pashilambolyo, kwa kwaamanya Bhakulungwa bhetu na
Bhaatapula a Yesu Kilishitu, bhatanjilangaga kabhili nibhujila ya
nyata ila, mpelo gwa ndamo yabhonji unapunda kubha gwangali
gwa mmbone kupunda kundandubho. **21** Bhene bhanganyabho
mbaya bhakanaumanyanje gwene mpanda gwa akigo, nngabha
kuumanya nileka malajilo ga ukonjelo gubhaposhelenje gala. **22**
Ikabheje kwa bhene bhanganyabho ishibha malinga shibheleketo,
shilugula. "Mbwa anakugabhujila matapi gakwe," na shibheleketo
shina shikuti, "Ngulubhe jwankundwe, anabhujila kugalabhuka
kabhili mmatope!"

3 Ashaambwiga ajangunji, jejino bhaluwa jabhili
ngunakunnjandishilanga mmanganya. Kwa bhaluwa inabhili
njilinga kuiimuya ng'aniyo ya mmbone kwa kunkumbushiyanga
 gegano. **2** Kupinga nkumbushilanje gene malobhe gabheleketwe
bhukala na ashinkulondola bha ukonjelo na malajilo ga
Bhakulungwa gumpegwilenje kuitila kwa ashimitume bhenunji
gala. **3** Ntandubhanje kumumanya kuti mobha ga kumpelo
shibhaijyangane bhandunji na mbetepete yabhonji, bhandunji

bha petekuya, bhandunji bhakaguyanga ilokoli yabhonji yangali ya mmbone, **4** bhalinkutinji. "Pubhalajile kuti shibhaishe! Igala, bhali kwei? Pabha, kutandubhila pubhawilenje ashinakulu bhetu indu yowe pwili nneila peila, malinga shiyapengenywe kundandubho!" **5** Bhashilibhalilanga meeple kuti kwa lilobhepe, a Nnungu bhashinkupanganya kunnungu na shilambolyo kuumila bhukala kwa nneyo shilambolyo mushakoposhele mmashi na kwa mashi. **6** Kwa mashi pego shilambolyo sha bhukala shashinkutolwa na ndanje jikulu shikuobhaga. **7** Ikabheje kwa lilobhe lyolyo, kunnungu na shilambolyo sha nnaino, inagoywa nkupinga kwiitiniywe moto. Inagoywa mpaka lyubha lya ukumu, na bhandunji bhakakwajogopanga a Nnungu shibhatitimiyanje. **8** Ikabheje ashaambwiga ajangunji, nnalibhalilanje shindu shimo! Kuti ku Bhakulungwa lyubha limo ni malinga yaka elupu, na yaka elupu ni malinga lyubha limo. **9** Bhakulungwa bhakakabha kutenda ibhalajile malinga bhandunji bhana shibhaganishiyanga kuti bhanakabhiya. Bhenebho bhanakwiipililila kwa ligongo lyenunji, pabha bhakaapinga mundu jojowe aobhe, ikabhe bhowe bhaipetanje. **10** Ikabheje lyubha lya Bhakulungwa shiliishe malinga nngvii. Lyene lyubhalyo kunnungu kupinga obha kwa nng'indo gwa nkulungwa, indu yowe ya tangu na tangu ipinga tiniywa na moto na angabhanywa na shilambolyo na indu yowe ili nkati jakwe ipingatininywa. **11** Indu yowe ipinga angabhanywa, bhai ibhaga nneyo, mmanganya punkupinjikwanga mmanganje bhandu bhashi? Nnapinjikwanga mmanganje bhandunji bha ukonjelo na kwaajogopa a Nnungu, **12** akuno nnikulilolelanga lyubha lya a Nnungu na nnijuganga liishe shangu. Lyubha lya tiniywa kunnungu na moto na angabhanywa, na indu yakwe ya tangu na tangu ipinga tiniywa

na moto. **13** Ikabheje uwe, kwa malagano gabho tunalindilila
kunnungu kwa ambi na shilambolyo sha ambi, shigumbele aki.
14 Kwa nneyo ashaambwiga ajangunji, akuno nnikulilolelanga
lyene lyubhalyo, ntamangane ukoto kwa ulele na a Nnungu,
nnakolanje ilebho wala sha gambwa. **15** Nnapinjikwanga
nkubhonanje kwiipililila kwa Bhakulungwa kuti ntapulo gwestu,
malinga apwetu a Pauli shibhashite kunnjandishilanga kwa lunda
lubhapegwilwe na a Nnungu. **16** Genego ni gubaakumbushiya
mmalua yabho yowe. Mmalua yabhomo ipali indu ina ya ukomu
kwiimanya, indu ipuganywa na bhandunji bhangalinginji lunda
na bhangaishimilikanga, malinga shibhapuganyanga malobhe
gana ga Mmajandiko. Kwa nneyo bhanakwiiangabhanyanga
ashaayenenji. **17** Bhai mmanganya ashaambwiga ajangunji,
mwiimanyinji yenei. Mwiiteiganje nnapuganywanje na bhene
bhatendanga yangali ya mmbonebho, nnaagwanganga nileka
kuishimilika kwenunji. **18** Ikabheje mpundanje kukula nnema
na nkwaamanya Bhakulungwa bhetu na Bhaatapula a Yesu
Kilishitu. Ukonjelo ubhe na bhenebho, nnaino na piti piti! Amina.

(aiōn g165)

1 Yowana

1 Tunakunnjandishilanga mmanganyanji ga Lilobhe Iya Gumi,
Iyaapali kuumila kundandubho, uwe twalipilikene, twalibhweni
kwa meyo getu twaashaayene, twashinkulibhona kwa meyo
getu na kulikwaya kwa makono getu twaashayene. **2** Gwene
gumigo pugwalangwilwe kwetu uwe twaubhweni. Kwa lyene
ligongoli tunakuukong'ondela na kunnungushiyanga ngani ja
gwene gumi gwa pitipiti uli na a Tati na ulangwilwe kunngwetu
(aiōnios g166) **3** Lyene litulibhweni na kulipilikana lila, ni litulguya
kunngwenunji nkupinga na mmanganya nnundananje na uwe.
Na kulundana kwetu, ni kubha pamo na a Tati na Bhana bhabho
a Yeshu Kilishitu. **4** Tunakunnjandishilanga mmanganyanji gene
malobhe gano nkupinga tubhowe pamo, tuangalale kwa kaje.
5 Gegano ni malobhe gutupilikene kukoposhela kwa a Yeshu
Kilishitu na gutukunnungushiyanga ni gegano. A Nnungu ni
shilangaya, na kwa bhenebho kwangali lubhindu. **6** Tujilaga
kuti tuli pamo na Bhenebho, akuno tulitama nkutenda ya
nyata, penepo tunalambil, na itendi yetu nngabha ya kweli.
7 Ikabheje tutamaga nshilangaya malinga Bhenebho shibhali
nshilangaya, bhai uwe tunabha pamo, na minyai ja a Kilishitu,
jinakututakaya yambi yetu yowe. **8** Tubheleketaga kuti twangali
yambi tunakwiitemba twaashayene, wala twangali kweli mmunda
jetu. **9** Ikabheje twiilugulaga yambi yetu, pabha a Nnungu ni
bhaakulupalika na bhanatenda aki, bhai shibhatuleshelele yambi
yetu, na kututakaya na ya nyata yowe itukwete. **10** Tujilaga kuti
tukanabhe tenda yambi, tunakwaatenda a Nnungu bhanami, na
lilobhe lyabho likaatama mmunda jetu.

2 Ashibhanangu bhungumpinganga, ngunakunnjandishilanga
gene malobhe gano nkupinga nnatendanje yambi. Ibhaga mundu

atendaga yambi, tukwete bhakutubheleketela kwa a Tati, na bhene bhakutubheleketelabho, ni a Yesu Kilishitu bhakwete aki.

2 Bhenebho ni mbepei jishoshiywe kwa ligongo lya leshelelwa yambi yetu, wala nngabha kwa ligongo lya yambi yetu pe, ikabheje kwa ligongo lya yambi ya bhandu bhowe. **3** Uwe tumumanyi kuti twaamanyi a Nnungu, ibhaga tukunduga amuli yabho. **4** Mundu aitembaga kuti, abhamanyi a Nnungu akuno akaakunda amuli yabho, jwenejo ni nnami, na jwangali kweli mmunda jakwe. **5** Ikabheje jwene akunda lilobhe lya a Nnungu, analangula shakuti kwaapinga a Nnungu mmunda jakwe. Kwa lyeneli, tumumanyi kuti tunaalundana na a Nnungu. **6** Mundu jojowe abheleketa kuti analundana na a Nnungu, anapinjikwa kutama malinga shibhaatemi a Yesu Kilishitu. **7** Bhakilishitu ajangunji ngakunnjandishilanga amuli ja ambi, ikabheje ja bhukala jinnjimanyinji kuumila kundandubho. Na jene amuli ja bhukala, ni lilobhe limpilikenenje lila. **8** Nkali nneyo ngunakunnjandishilanga amuli ja ambi, yani lilobhe lili lya kweli nkati jabho a Kilishitu na nkati jetu, pabha lubhindu lunapita na shilangaya sha kweli tayali shinalangaya. **9** Mundu abheleketa kuti mwali nshilangaya akuno alikumpata nkilishitu nnjakwe, jwenejo launo mwali nnubhindu. **10** Jwene akumpinga nkilishitu njakwe, anatama nshilangaya na nkati jakwe shakwapi sha kummulaya kutenda yambi. **11** Ikabheje akumpata nkilishitu njakwe, anatama na owa nnubhindu na akakukumanya kwa kwenda, pabha lubhindu lushikunng'ibhila meyo. **12** Ngunakunnjandishilanga mmanganya ashibhanangu, pabha nshileselelwanga yambi yenunji kwa lina lya a Kilishitu. **13** Ngunakunnjandishilanga mmanganyanji bhananglungwa, pabha mwaamanyinji Bhene bhaapali kuumila kundandubho ja indu yowe, ngunakunnjandishilanga mmanganya

mmashanda, pabha nshikunkombolanga Lishetani jula. **14**
Ngunakunnjandishilanga mmanganyanji ashibhanangu, pabha
mwaamanyinji a Tati. Ngunakunjandishilanga mmanganyanji
bhanangulungwa, pabha mwaamanyinji bhaaliji kundandubho ja
indu yowe. Ngunakunnjandishilanga mmanganyanji mmashanda,
pabha nshikolanga mashili na lilobhe lya a Nnungu linatama
nkati jenunji, na munkombwelenje Lishetani. **15** Nnashipinganje
shilambolyo, wala indu itama nshilambolyo. Mundu ashipingaga
shilambolyo akakombola kwaapringa a Tati a Nnungu. **16**
Pabha kila shindu shili pa Shilambolyo, malinga kukongolela
ilokoli ya pa shiilu, ilokoli ya meyo, na kuipuna kwa nndamo,
yene yowei ikaakoposhela kwa a Tati, ikabheje kuikopoka ku
shilambolyo. **17** Shilambolyo na ilokoli yakwe inapita, ikabheje
mundu atenda ibhaapinga a Nnungu shatame pitipiti. (*aiōn g165*) **18**
Ashibhanangu, gegano ni malanga ga kumpelo. Mwapilikenenje
kuti akakwaakunda a Kilishitu shaaishe, ikabheje nkali nnaino
bhakwaataukanga a Kilishitu bhabhagwinji bhaikengenenje. Kwa
nneyo tumumanyi kuti gegano ni malanga ga kumpelo. **19** Bhene
bhandunjibha, mubhakoposhelenje munkumbi gwetu, ikabheje
bhakalinginjiji bhetu, na kwa lyene ligongolyo bhatuleshilenje.
Kaliji bhakalinginji na uwe, bhakatemingene na uwe. Ikabheje
bhashikutulekanga kupinga imanyishe kuti bhakalinginjiji bha
munkumbi gwetu. **20** Ikabheje nshigumbaywanga naka Mbumu
jwa Ukonjelo, na mmowenji nnjimanyinji kweli. **21** Bhai,
nangannjandishilanga pabha nkakujimanyanga kweli, ikabheje
pabha nnjimanyinji kweli na kabhili pabha gwakwa unami gogowe
ukoposhela nkwelli. **22** Gani ali nnami? Ni jwene atauka kuti
a Yeshu nngabha a Kilishitu. Jweneju ni akakwaakunda a
Kilishitu, pabha anakwaakana a Tati naka Mwana gwabho.

23 Jwene akumposhela Mwana, akakwaaposhela na a Tati
nneila peila, ikabheje akumposhela Mwana, anakwaaposhela
a Tati nneila peila. 24 Kwa nneyo nkamulanje mmitima
jenunji majiganyo gumpilikenenje kuumila ku ndandubho.
Ibhaga nkagulilangaga majiganyo gumpilikenenje kuumila ku
ndandubho, shintamangananje nkati jika Mwana na a Tati 25
Na a Kilishitu bhayene bhatupele miadi ja gumi gwa pitipiti.

(aiōnios g166) 26 Njikunnjandishilanga gene malobhega kwa
ligongo lya bhandu bhaapinganga kumpuganyanga. 27 Ikabheje
a Kilishitu bhashikutupa Mbamu jwa Ukonjelo. Na pabha Mbamu
jwa Ukonjelo anatama nkati jetu, nkapinjikwanga kujiganywa
naka mundu jojowe, pabha Mbamu jwabho anakunnjiganyanga
indu yowe. Jwene Mbamujo anakunjiganyanga ya kweli na
wala akabheleketa unami. Bhai malinga Mbamu shakuti
kunjiganyanga, ntamangane nkati ja a Kilishitu. 28 Na nnaino
ashibhanangu, ntamangananje nkati jabho a Kilishitu, nkupinga
tubhe na ngulupai ja kweli malanga gubhapinga koposhela,
na tunakole oni lyubha lishibhabhuje. 29 Mmumanyinji kuti a
Kilishitu ni bhakwete aki, kwa nneyo nnapinjikwanga nneila
peila kumumanya kuti kila mundu atenda aki, ni mwana jwa a
Nnungu.

3 Bhai nnolanje, Atati shibhakuti kutupinga mpaka muntima,
nikutushemba bhana bha a Nnungu, na nneyo ni
shituli uwe. Shilambolyo bhakakutumanyanga uwe pabha
bhakakwaamanyanga a Nnungu. 2 Bhakilishitu ajangunji,
uwe nnaino ni tubhana bha a Nnungu, ikabheje ikanabhe
manyika shitubhe bhuli pushibhakoposhele a Kilishitupo. Ikabheje
tumumanyi kuti shitulandane nabho pabha shitwaabhone
shibhali. 3 Bhai kila mundu akulikulupalila lyeneli mwa a Kilishitu,

anakwiibhika ukoto mbuti a Kilishitu shibhali bha ukonjelo. 4
Kila mundu atenda shambi anakujikana shalia ja a Nnungu
pabha shambi ni kujikana shalia. 5 Mmumanyinji kuti a Kilishitu
bhashinkuika kuushoya yambi yetu na bhenebho bhangali
shambi shoshowe. 6 Bhai kila atama nkulundana na a Kilishitu
akayobhelela kutenda shambi, ikabheje kila mundu atenda
shambi akanabhe kwaabhona a Kilishitu, wala akakwaamanya
a Kilishitu. 7 Bhai ashibhanangu nnakundanje kupuganywa
naka mundu jojowe. Mundu atenda itendi ya mmbone, jwenejo
akwete aki malinga a Kilishitu shibhali bha aki 8 Ikabheje
ayobhelela kutenda shambi, jwenejo juka Lishetani, pabha
Lishetani ayobhelele kutenda shambi kuumila kundandubho.
Ikabhe Mwana jwa a Nnungu, ashinkuika pa shilambolyo
kuangabhanya maengo gaka Lishetani. 9 Kila mwana abhelekwe
na a Nnungu, akayobhelela kutenda shambi pabha Unnunu uli
nkati jakwe, wala akayobhelela kutenda shambi, pabha jwenejo
ni mwana jwa a Nnungu. 10 Nneyo peyo ni pwii Kumanyika
mwana jwa a Nnungu na mwana juka Lishetani. Mundu jojowe
akaatenda ya aki, na akakwaapinganga bhaakulupalilanga
ajakwe, jwenejo nngabha mwana jwa a Nnungu. 11 Ntenga
gumpilikenenje kuumila kundandubho ni gweguno, tunapinjikwa
kupingana twaashayene. 12 Tunabhe mbuti Kaini, jwenejo paaliji
juka Lishetani, ashinkummulaga mpwakwe. Kwa ligongo lyashi
ashinkummulaga mpwakwe? Kwa ligongo lya itendi yakwe
nnylene ishinkubha ya nyata, ikabheje ika mpwakwe puyaliji ya
aki. 13 Bhai bhaakulupalilanga ajangunji, nnakanganigwanje
ibhaga shilambolyo shikakumpinganga mmanganyanji. 14
Uwe tumumanyi kuti tupitile kukopoka nshiwo nikwenda ku
gumi, pabha tunakwaapinganga Bhakilishitu ajetunji. Mundu

akakwaapinganga bhakilishitu ajakwe anatama nshiwo **15**

Kila akakumpinga akulupalila nnjakwe jwenejo nkubhulaga,
na mmanganyanji mmumanyinji kuti jojowe abhulaga jwangali
gumi gwa pitipiti nkati jakwe. (*aiōnios g166*) **16** Uwe putukumanyi
kupingana ni nneino. A Yesu Kilishitu bhashinkwiishoya gumi
gwabho kwa ligongo lyetu uwe, numbe uwe tunapinjikwa
kwiiishoya gumi gwetu kwa ligongo lya bhaakulupalilanga
ajetu **17** Bhai mundu akolaga mali ga pashilambo pano, na
ammonaga nnjakwe ali nshilaje, nikola ntima gwa nonopa
gwangali kummonela shiya, a Nnungu shibhampinje bhuli
jwenejo? **18** Ashibhanangu kupingana kwetu kunabhe malobhe
jika, ikabhe tupingane kwa kweli na kwa itendi. **19** Nneyo ni
pushitumumanye kuti uwe ni tubhandu bha kweli, na tukakola
lipamba kwa a Nnungu. **20** Ibhaga ndumbililo yetu ituukumulaga,
tumumanyi kuti a Nnungu ni bhakulungwa kupunda ndumbililo
yetu, na kuti Bhenebho bhashimanyi kila shindu. **21** Ashaambwiga
ajanganji, ibhaga mitima jetu jangali sha kutuukumula, bhai
shitukombole kubha na makangala ga kwaajendela a Nnungu.
22 Na shituposhele kwa bhenebho shoshowe shitujuga, pabha
tunakagulila malajilo gabho, na tenda ikwaanonyela. **23** Na
malajilo gabho ni nnei, twaakulupalile Bhanabhabho a Yesu
Kilishitu, na tupingane malinga shibhatulajile. **24** Akagulila
malajilo ga a Nnungu, anatama nkulundana na a Nnungu, na
a Nnungu bhanatama nkulundana na jwenejo. Kupitila kuka
Mbamu jubhatupeleshele a Nnungu, uwe tumumanyi kuti a
Nnungu, bhanatama nkulundana na uwe.

4 Bhakilishitu ajanganji, nnankulupalilanje kila mundu abheleketa
kuti ashikola Mbamu jwa a Nnungu, ikabheje munninganje
ibhaga jwene mundujo anaalongoywa naka Mbamu jwa

a Nnungu, pabha ashinkulondola bha unami bhabhagwinji bhashikoposhelanga pa shilambolyo. 2 Mpingangaga kummany kuti jwene mundujo analongoywa naka Mbamu jwa a Nnungu, shimummanyanje nnei. Kila akunda kuti a Kilishitu bhashinkuika nibha mundu, jwenejo akwete Mbamu jwa a Nnungu. 3 Ikabheje jojowe akakwaakunda a Kilishitu, jwenejo jwangali Mbamu akopoka kwa a Nnungu. Jwenejo ashikola mbamu ataukangana na a Kilishitu, mmanganyanji mwapilikenenje kuti alikwiya, na nnaino tayali aishe pa shilambolyo. 4 Ikabheje Mmanganyanji ni bhana bha a Nnungu, numbe mwaakombwelenje bhene ashinkulondola bha unami, pabha Mbamu ali nkati jenunji, ni nkulungwa kupunda mbamu ali nkati jabhonji bhene bhalinginji bha shilambolyo. 5 Bhanganyanjibho ni bha pa shilambolyo, na ibhabheleketanga indu ya pa shilambolyo, na shilambolyo shinakwaapilikanishiyanga, pabha bhene bhanganyanjibho ni bha pa shilambolyo. 6 Uwe ni tubha a Nnungu. Mundu abhamanyi a Nnungu anakutupilikanila, mundu akakwaamanya a Nnungu akakutupilikanila. Bhai nneyo, ni shitukombola kummany Mbamu jwa Kweli na mbamu jwa unami. 7 Bhakilishitu ajangunji, tupingane, pabha kupingana kukukoposhela kwa a Nnungu. Kila mundu akumpinga nnjakwe, jwenejo ni mwana jwa a Nnungu na anakwaamanya a Nnungu. 8 Mundu akakwaapinganga ashaajakwe jwenejo akakwaamanya a Nnungu, pabha a Nnungu ni kupingana. 9 A Nnungu bhashinkulanguya kuti bhanakutupinga uwe pubhampeshe Mwanagwabho jwa jika pa shilambolyo, nkupinga tuplicate gumi kuka jwenejo. 10 Kweneku ni kupingana, nngabha kuti uwe tushinkutandubhila kwaapinga a Nnungu, ikabhe Bhenebho bhashinkutupinga kuishila kuntuma Mwanagwabho abhe mbepei

ja kutuleshelela yambi yetu. **11** Bhakilishitu ajangunji, ibhaga a Nnungu bhashinkutupinga nneyo, bhai, numbe uwe tunapinjikwa kipingana. **12** Jwakwa mundu abhabhweni a Nnungu, ikabheje tupinganaga a Nnungu bhanatama nkulundana na uwe na kutupinga kwabho kunashimilika nkati jetu. **13** Tumumanyi kuti tunatama nkulundana na a Nnungu, na Bhalabho a Nnungu bhanatama nkulundana na uwe, pabha bhenebho bhashikutupa Mbumu jwabho. **14** Uwe tugabhweni, numbe tunakwakong'ondelanga bhananji kuti, Atati bhashinkwaatuma Bhanabhabho bhabhe bhaatapula bha shilambolyo. **15** Kila mundu akwaakunda a Yeshu Kilishitu kuti Mwana jwa a Nnungu, a Nnungu bhanatama nkulundana na jwene mundujo, na jwenejo anatama nkulundana na a Nnungu. **16** Bhai uwe tumumanyi na tunakulupalila kuti a Nnungu bhanakutupinga. A Nnungu ni pingana, na mundu jojowe atama nkupingana, anatama nkulundana na a Nnungu, na a Nnungu bhanatama nkulunduna na jwenejo. **17** Kwa nneyo kipingana kutimilile nkati jetu nkupinga tukole makangala lyene lyubha lya ukumu, pabha kutama kwetu pa shilambolyo pano, shikubhe mbuti kutama kwa a Kilishitu. **18** Pukutemi kipingana pangali bhoga, elo, kipingana kwa timilika kunashoya bhoga gowe. Bhai, mundu akwete bhoga akanabhe timilika nkupingana, pabha bhoga unakagulana na kupanyangulwa. **19** Uwe tunapingana pabha a Nnungu ni bhatandwibhe kutupinga uwe. **20** Mundu abheleketaga kuti anakwaapinga a Nnungu, akuno akakumpinga nkilishitu njakwe, jwenejo analambilia. Pabha mundu akakumpinga njakwe jwa kummona, akakombola kwaapinga a Nnungu akakwaabbona. **21** Bhai jejino ni amuli jibhatupele a Kilishitu. Akwaapinga a Nnungu anapinjikwa kumpinga nkilishitu njakwe.

5 Mundu jojowe akulupalila kuti a Yesu ni a Kilishitu, jwenejo ni mwana jwa a Nnungu na kila mundu akwaappinga a Tati, nneila peila anakumpinga mwana gwabho. **2** Nnei ni putukumumanya kuti tulikwaappinganga bhana bha a Nnungu, kwa kwaappinga a Nnungu na kuikamula amuli yabho. **3** Pabha kwaappinga a Nnungu ni kukagulila amuli, na amuli yabho yangali ukomu. **4** Pabha kila mwana jwa a Nnungu anakushikombola shilambolyo. Tunakushikombola shilambolyo kupertila ngulupai yetu. **5** Gani akushikombola shilambolyo? Ni jwene akulupalila kuti a Yesu ni mwana jwa a Nnungu. **6** A Yesu Kilishitu ni bhaaishe kwa bhatishwa kwabho mmashi, na kwa minyai ja kuwa kwabho. Bhanngaika kwa mashipe, ikabheje pamo na mashi na minyai. Na Mbumu ni akong'ondela yene indu ila, pabha Mbumu ni jwa kweli. **7** Pabha pubhalinginji bhaakong'ondela bhatatu. **8** Mbumu, Mashi na Minyai na bhanaatatu lilibhe lyabhonji limope. **9** Ibhaga tuukunda ukong'ondelo gwa bhandunji, ukong'ondelo gwa a Nnungu ni gwankulungwa kaje, na gwenego ni ukong'ondelo gubhakong'ondele a Nnungu, ga bhanabhabho. **10** Kila mundu akunkulupalila mwana jwa a Nnungu, akwete gwene ukong'ondelogo muntima gwakwe. Ikabheje jwene akakwaakulupalila a Nnungu, ashikwaatenda kuti bhanami, pabha jwangakulupalila ukong'ondelo gubhakong'ondele a Nnungu, ga bhanabhabho. **11** Na gwenegu ni ukong'ondelo, kuti a Nnugnu bhashikutupa gumi gwa pitipiti, na gwene gumigu muuli mwa bhanabhabho. (*aiōnios g166*) **12** Jwene akwete bhanabhabho a Nnungu, akwete gumi, ikabheje jwene jwangali bhanabhabho a Nnugnu, jwangali gumi. **13** Ngunakunnjandishilanga gene malobhe gano mmanganyanji nkulikulupalilanga lina lya bhanabhabho a Nnungu, kupinga

mmumanyanje kuti nkwenetene gumi gwa pitipiti. (aiōnios g166) 14

Na uwe tukwete makangala ga muntima kwa a Nnungu. Pabha tumumanyi kuti shibhatupilikane twaajugaga shindu shoshowe, malinga shibhapinga bhayene. 15 Bhai, ibhaga tumumanyi kuti bhanakutupilikana putukwaaajuga, tumumanyi kuti bhatupele shoshowe shitwaajujile. 16 Mundu ammonaga nkilishitu njakwe alitenda shambi shikaapeleshela shiwo, anapinjikwa annjujile kwa a Nnungu, na a Nnungu shibhampe jwene mundujo gumi. Yani mundu atendile shambi shikaapeleshela shiwo. Pabha shipali shambi shiipeleshela shiwo, ikabheje ngaabheleketa ajuje ga shene shambisho. 17 Kila shitendi shangali aki ni shambi, ikabheje shipali shambi shikaapeleshela shiwo. 18 Tumumanyi kuti kila mwana jwa a Nnungu akaatenda yambi, pabha Bhanabhabho a Nnungu shibhampe ulinda, na Lishetani akakombola kunkwaya. 19 Tumumanyi kuti uwe ni bhana bha a Nnungu, nkali Shilambolyo showe shitagwalwa na Lishetaniyo. 20 Tumumanyi nneila peila kuti mwana jwa a Nnungu aishe, na jwenejo atupele lumanyio kupinga twaamanye a Nnungu bhalibha kweli. Na uwe tunalundana na a Nnungu bha kweli, kuitila bhana bhabho a Yesu Kilishitu. Bhenebha ni a Nnungu bha kweli na gumi gwa pitipiti. (aiōnios g166) 21 Mmana bhungumpinganga, mwiembuyanje na kuitindibhalila yanamu.

2 Yowana

1 Jene bhaluwa jino kujikopoka kwangu nne nkulungwa jwa likanisha. Ngunakunnjandishila mmanganya bhandunji bha likanisha, bhungumpinganga mpaka muntima. Nngabha nne jikape ngumpinganga, ikabheje nneila peila na bhowe bhakujimanyanga kweli, bhanakumpinganga. **2** Pabha jene kweliji jinatama nkati jetu, na shijilonjeye tama na uwe pitipiti. (aiōn g165) **3** Atati a Nnungu pamo na a Yesu Kilishitu bhana bhabho, bhanakutupa nema na shiya na ulele, bhene bhatama nkwelli na pingana bhala. **4** Njiangalala kwa kaje kubhona kuti bhananji munkumbi gwa ashibhana bhenu, bhanatamangananga nkwelli malinga Atati shibhashite kutuamulisha. **5** Na nnaino a mama ngunakunshondelesheya, nngabha kuti ngunakunnjandishila amuli ja ambi, ikabheje ni amuli jituposhele kuumila ku ndandubho, tupingane. **6** Na kupingana ni kutama nkukagulila amuli ya a Nnungu. Jeneji ni amuli jinnjipilikenje kuumila ku ndandubho, ntamangane nkupingana. **7** Bhaunaminji bhabhagwinji bhakaakundanga kuti a Yesu Kilishitu bhaaishe bhalii na shiili shabho, bhakoposhelenje pa shilambolyo. Mundu jwa nneyo analambilna akakwaakunda a Kilishitu. **8** Mwiiteiganje nnaobhianga shene shintendelenje maengo shila, ikabhe mpatanje upo itimilile. **9** Mundu jojowe akaatama mmajiganyo ga a Kilishitu, jwenejo jwangali a Nnungu. Na jojowe akalonjeya mmajiganyo ga a Kilishitu na kugaleka, jwenejo jwangali a Nnungu. Jojowe atama mmajiganyo, akwete Atati na Mwana nneila peila. **10** Nnamposhelanje mundu jojowe akunjilanga gwangali kumpeleshelanga gene majiganyo gano, numbe nnaposhelanje mmajumba genunji. **11** Jojowe akumposhela mundu jwa nneyo, na jwalakwe anakwiilunda

mwiiitendi yangali ya mmbone. **12** Ngwete indu yaigwinji,
ikabhe ngaapinga kunnjandishilanga kwa kalatashi na wino,
ikabheje kuengwa kwangu ninng'owelanje kutukungulushe pamo
na mmanganya tulibhonegana, nkupinga kuangalala kwetu
kutimilile. **13** Bhana bha alumbu bhenu bhaagwilwe na a Nhungu,
bhanakunnamushilanga.

3 Yowana

1 Nne kalongolele jwa likanisha, ngunakunnjandishila mmwe ambwiga ajangu a Gayo bhungumpinga mpaka muntima. **2** Ambwiga ajangu, ngunakunnujila nkole ndamo ja mmbone na shiilu shiangalale malinga ntima gwenu shiguangalala. **3** Pabha ishinonyela kwa kaje, pubhaikengene bhakilishitu bha kweneko ningong'ondelanga ga kulupalika kwenu, na shinkuti kamulila ya kweli ga a Kilishitu. **4** Shakwa shipundile kunonyela, malinga shene sha pilikana kuti ashibhanangu bhanatamangana nkweli. **5** Ambwiga ajangu, kwa yene inkwaatendelanga bhakilishitu ajenunji nkali na bhajeninji, ni ikuntenda nkulupalilwe. **6** Bhene bhandunjibho bhashikong'ondelanga nnikanisha kuti nshikola ntima gwa pinga bhandu. Kwa nneyo, shintende ya mmbone mwaajangutilangaga bhene bhakilishitubho, mmwanja gwabhonji malinga shibhaapinga a Nnungu. **7** Pabha kwa ligongo lya lina lya a Yesu, bhashinkujabkulangana gwangali kukunda kuposhela shindu sha kwaajangutilanga, kukopoka ku bhandunji bha ilambo ina. **8** Bhai uwe tunapinjikwa kwaatendelanga mituka bhene bhandunjibho, nkupinga tukamule liengo lya kweli pamo. **9** Nashinkujandika ku likanisha bhaluwa, ikabhe a Deotilipa bhaapinga kwibhika kubha akalongolele munkumbi gwabhonji, bhashinkukana kutupilikanila. **10** Kwa nneyo, ng'ikaga kweneko shinugule indu yowe yangali ya mmbone ibhatendile na malobhe ga unami gubhatulambilile, numbe kupunda genego, bhenebho bhanakana kwaaposhelanga Bhakilishitu ajetunji bhene bhaapinganga kwaaposhelanga bhala, bhanakwaalimbiyangna na kwaabbinganga nnikanisha. **11** Ambwiga ajangu, nnayaye indu ya nyata, ikabhe nnyaye ya mmbone. Pabha jwene atenda indu ya mmbone ni jwa a Nnungu,

ikabhe jwene atenda indu ya nyata akakwaamanya a Nnungu.

12 Bhandu bhowe bhanakwalumbilanga a Demetulushi, numbe
uwe tunakwaakong'ondela na mmumanyinji kuti ukong'ondelo
gwetu, ni gwa kweli. **13** Ngwete indu yaigwinji ya kunnjandishila,
ikabheje ngaapinga kunnjandishila na kalamu na wino. **14**
Ikabheje shitubhonegane nikunguluka, tuli tutemi pamo. Ulele
utame na mmwe. Ashambwiga ajetu bhanakunkumbushilanga,
mwaalamushilanje ashaambwiga ajetunji bha kweneko bhowe,
nnikwalugulanga kwa mena gabhonji.

Yuda

1 Nne Yuda ntumwa jwa a Yesu Kilishitu, mpwabho a Yakobho. Ngunakunjandishilanga nkupingwanga na Atati a Nnungu na kubhikwa muulele kwa ulinda gwa Yesu Kilishitu.

2 Ngunakumpinjilanga nnjenjesheywanje shiya na ulele na kipingana. 3 Ashaalongo, nkali napinjile kunnjandishilanga ga ngani ja ntapulo gwetu uwe tubhowe, gumweni kuti ngunapinjikwa kunnjandishilanga, nkukwiyanga mpundanje kukamulila ukoto ngulupai jimpegwilwenje mmandunji bha ukonjelo kamope. 4 Pabha bhapalinji bhandu bhaijinjiyenje kwa nng'yo, bhajandishilwenje kupanyangulwa kuumila bhukala, bhaatendanga ya nyata ikwashima a Nnungu, bhalikugupuganya ntenga gwa nema ja a Nnungu bhetu kubha shindu shangali sha mmbone, na kwaakananga a Yesu Kilishitu bhalibha jikape, na Bhakulungwa bhetu a Yesu Kilishitu.

5 Nkali mwimanyinji yowei ngunakunkumbushiyanga kuti, Bhakulungwa nankali Bhaatapwilwenje Bhaishilaeli ku Mishili, bhene bhakakwetenjeje ngulupai bhala gubhabhulegwenje.

6 Na nkali ashimalaika bhalepelenje kutama ukoto ndamo jabhonji, bhashitabhwanga na a Nnungu mindondolo ja itale ja pitipiti nnubhindu, mpaka pushiliishile lyubha likulu lya ukumu. (a^{udios} g126) 7 Nkumbushilanje bhandunji bhalilambo ya ku Shodoma na ku Gomola na ya tome na kweneko, bhashinkutendanga malinga bhene ashimalaika bhala bhalitendanga ya labhalabha na ilokoli yangali ya mmbone ya nshiilu, bhalilekanga mwa kawaida nitenda ikapinjikwa, nipanyangulwa mmoto gwa pitipiti, kubha shilangulo kubhandunji bhowe. (a^{ōnios} g166) 8 Nneyo peyo nkali bhanganyabha, agamii yabhonji inanyatiya iilu yabhonji na nikuunyegaya

ukulungwa gwa a Nnungu na kuilosha iumbe ya ukonjelo gwa kunnungu. **9** Nkali a Mikaeli bhakulungwa bha ashimalaika bha kunnungu, pubhataukanganaga naka Lishetani ga shiilu sha a Musha, bhangalinga kummeleketa kwa kunng'ukumula kwa malobhe ga matukano, ikabheje gwaalugwilepe, "Bhakulungwa bhayene bhakukalipile." **10** Ikabheje bhene bhandunjibha bhanakwiolahanga indu ibhakakwimanyanga, na indu ibhakwiganishiyanga nng'aniyo yabbonji ni ikwaobhiyanga malinga bhanyama bhangalinji lunda. **11** Ole gwabhonji! Pabha bhashikagulanga mpanda gwa a Kaini. Bhashibhutushilanga kupata mbwaiko muilebho malinga ya a Bhalaamu na gubhatitimilenje malinga shibhatitimile a Kola. **12** Bhene bhandunjibha, mapyotopyoto ga jogoya, bhunkulyanabhonji shalya malanga gunkuimananga kwaakumbushila a Nnungu. Bhalyanganga pamo na mmanganya, gwangali lipamba. Paalinginji mbuti maunde ganokolwa na mbungo gwangali kunya ula. Numbe malinga mikongo jipakatishe maamba na wala jikaogoya iepo na jiwile na jitutumbwilwe. **13** Bhene bhandunjibho pubhalinginji malinga mabhimbili gamakulungwa ga bhaali, gakaibhilika na itendi yabbonji ya tokomaya ilitutuma liulo mbuti ndondwa ijimajima, a Nnungu bhaabhisihilenje shibhiko nnubhindu lwa totolo lwa pitipiti. (*aiōn g165*) **14** Na a Eneko bhandu bha lubheleko lwa shabha kuumila a Adamu, bhashinkulondola ga bhene bhandunjibho bhalinkuti, "Mpilikananje! Bhakulungwa bhanakwiya na bha ukonjelo bhabho maelupu kwa maelupu, **15** kuinga bhaaukumulanje bhandunji bhowe na kwaapotekanga bhandu bhowe bhakakwaakundanga a Nnungu, ligongo lya itendi yabbonji ya ilebho ibhatendilenje, na ligongo lya malobhe gabhonji gowe ga nyata gubhabheleketenje bhandunji bha ilebhobha,

kwa a Nnungu.” **16** Bhene bhandunjibha bhanainginikanga na kwigutanjila, bhalikagulilanga ilokoli yabhonji ya nyata, bhalikwiiniyanga na kwaalumbililanga bhananji kwa unami nkupinga pwaika. **17** Ikabheje mmanganyanji bhakilishitu ajangu, nkumbushilanje malobhe gummalanjilwenje bhukala na ashimitume bha Bhakulungwa bhetu a Yeshu Kilishitu. **18** Bhammalanjilenje kuti, “Mobha ga kumpelo shibhakoposhelanje bhandunji bha mbenji bhaakagulilanga ilokoli yabhonji ya nyata.” **19** Bhene bhandunjibho bhaakumbuyanga malekano na mipwilingano, bhandunji bha ilokoli ya nshiilu na lunda lwa shibhelekwe, bhangalinginji Mbumu jwa a Nnungu. **20** Ikabheje mmanganyanji bhakilishitu ajangunji ntamangane ukoto nngulupai yenunji ya mmbone nnilongoywanga naka Mbumu jwa Ukonjelo nkujuga. **21** Ntamangane malinga shibhapinga a Nnungu, akuno nnilindililanga shiya sha Bhakulungwa bhetu a Yeshu Kilishitu mpaka mpatanje gumi gwa pitipiti. (aiōnios g166)

22 Mwaabphonelanje shiya bhandunji bhakwetenje lipamba, **23** Bhananji mwaatapulanje pa moto gwa ukumu. Mwaabphonelanje shiya nnikwiiteiganga na nnishimwanga na yambi inyatiya iilu yabhonji. **24** Kwa Bhene bhaakombola kumpanganga ulinda nnaikubhalanje nigwa na bhakummi kanga muukonjelo gwabho gwangali ilebho na kwa nng'angalo gwa punda, **25** Bhenebho ni a Nnungu bha jikape, Bhaatapula bhetu kupitila a Yeshu Kilishitu Bhakulungwa bhetu, ukonjelo ku bhenebho na ukulungwa na mashili kuumila bhukala, na nnaino na pitipiti. Amina. (aiōn g165)

Nng'ibhulo

1 Gweguno ni nng'ibhulo gwa a Yesu Kilishitu gubhapegwilwe na a Nnungu, nkupinga bhaalanguanje bhatumishi bhabho indu ipinga koposhela shangupe. Bhashinkulangula yene indui kwa kuntuma malaika jwabho kwa a Yowana bhatumishi bhabho, 2 bhenebho bhakong'ondele ga kila shindu shibhashibhwene, ga lilobhe lya a Nnungu na ukong'ondelo gwa a Yesu Kilishitu. 3 Apegwe mboka jwene akwaashomelanga nnikanisha malobhe ga gweguno ukulondola guno, nneila peila bhapegwanje mboka bhene bhaapilikananga na kugabhika muntima gajandikwe mwemuno gano, pabha malanga gabhandishile. 4 Nne a Yowana ngunakugajandishila makanisha shabha gali kunkoa gwa Ashia. Ngunakumpinjilanga nema na ulele kukopoka kwa a Nnungu bhapali, bhaapali na bhaapinga kwiya kukoposhela kwa ashi Mbumu shabha bhalinginji mmujo ja shitengu sha upalume, 5 na kwa a Yesu Kilishitu bhaakong'ondela bhaakulupalika, bhalibha lyelo ku bhawilenje, na bhakulungwa bha bhapalume bha pa shilambolyo. Bhenebho bhanakutupinga na bhashikututakaya yambi yetu kwa minyai jabho, 6 ni gubhatutendile uwe kubha upalume gwa bhaabhisila nkupinga twaatendele liengo a Nnungu, bhalibha aina bhabho. Ukonjelo na mashili ibhe na bhenebho pitipiti, amina. (aiōn g165) 7 Nnole bhenebho bhanakwiya na maunde na kila mundu shaabhabhone nkali bhene bhaao milenje lipanga bhala, na ilambo yowe ya pashilambolyo shiigutanjile kwa ligongo lyabho. Elo nneyo ni shiipinga kubha. 8 Bhakulungwa a Nnungu Bhakwete Mashili bhakuti, "Nne ni jwa ntai na jwa mpelo, mbali, naapali na mbinga kwiya." 9 Nne a Yowana nankukulupalila nnjenunji, nili mmboteko pamo na mmanganyanji muupalme gwa a Nnungu na nkupunda kwiipililila, nashinkubhikwa jikape ku

shilambo shitimbiliwe na mashi shiishemwa Patimo kwa ligongo
lya lunguya lilobhe lya a Nnugnu na kong'ondela ga a Yeshu. **10**
Bhai, lyubha limo lya Bhakulungwa, nili ng'umbelwe naka Mbamu,
gumbilikene lilobhe likulungwa mbuti lya lipenga kunyuma
jangu **11** lilinkuti, "Nnjandishe nshitabhu gowe gunkugabhonaga,
npeleshe ku makanisha shabha, yani ku Epesho, na ku Shimilina,
na ku Peligamo, na ku Tiatila, na ku Shalidi, na ku Piladelipia,
na ku Laodikia." **12** Penepo nigundendebhwishe nole, ni gani
abheleketaga na nne. Ngatendebhusheje niguniibhwene itengu
shabha ya kandili ya shaabhu. **13** Pakati pakati yene itengu
ya kandili ila, nigunaabhwene bhandu bhamo malinga Mwana
jwa Mundu, awete likoti lya lileu na nshipi gwa shaabhu pa
ntima. **14** Ntwe gwakwe na umbo yakwe puyaaliji yanawe
malinga mabhetya ga ngondolo, eu malinga ndambwe, na
meyo gakwe pugaaliji malinga lilamba lya moto. **15** Makotwa
gakwe pugaaliji malinga shitale shiukengwe kaje, eu mbuti
shijoshilwe pa moto gwa shipala, na lilobhe lyakwe pulyaaliji
malinga mabhimbili ga mashi gamagwinji. **16** Munkono gwakwe
gwa nnilo ashinkukamulila ndondwa shabha, na nkangw'a
jakwe ushinkukopoka upanga gwa tema akuno na kukuno.
Lubhombo lwakwe luliiimelemeta kwa kaje, mbuti lyubha lya
nakalanga. **17** Ngaabhoneje ngugwaga pa makongono gabho
mbuti mundu awile. Penepo nigubhamishile nkono gwabho
gwa nnilo bhalinkuti, "Nnjogope, Nne ni na jwa ntai na jwa
mpelo. **18** Nne ni jwene akwete gumi, na awile na nnole nnaino,
na jwa nkoto piti piti, na ni ngwete mashili ga kundamo ja
bhawilenje. (aiōn g165, Hadēs g86) **19** "Bhai nnaino nnjandishe
indu imuibhwene, ipali na yene ipinga koposhela kungai. **20**
Ga shinjubhi sha yene ndondwa shabha imuibhwene munkono

gwangu gwa nnilo ila, na itengu shabha ya kandili ya shaabhu ni nnei, ndondwa shabha ila ni ashimalaika bha Makanisha shabha, na itengu shabha ila, ni Makanisha shabha."

2 Kuka malaika jwa likanisha lya ku Epesho nnjandishe. "Genego ni malobhe ga bhene bhaakamula ndondwa shabha munkono nnilo gwabho, na bhapita jimajima pakatipakati itengu ya kandili shabha ya shaabhu. 2 Nishimanyi shinkutenda, nimumanyi kutumbilila kwenu nniengo na shinkuti kwiipililila. Nimumanyi kuti nkaakombola kumpililila mundu jwangali jwa mmbone, na kuti nshikwaalinganga bhene bhakwiishemanga kuti ashimitume, mbena nngabha, na mwaabhwениnji kuti bhanami.

3 Mmwe nnakwiipililila nipotekwa kwa ligongo lyangu nne, na mwangalepela. **4** Ikabheje gegano ni gungwete kwenu mmwe, nnaino nkaambinga malinga shimwambingaga bhukala. **5** Nkumbushile punnepele. Ntendebhushe ntende shimwatendaga bhukala. Monaga nkaipete, shinyie shoya kandili jenu pa shitengu shakwe. **6** Ikabheje ngunakunnumbilila ga shindu shimo, inakunshima yaakutendanga Bhanikolai, malinga shiikunjima nne." **7** "Akwete makutu, bhai apilikane yaabheleketa Mbamu ku makanisha." Shihakombolanjebho shinaalekanje bhalyanganje iepo ya nkongo gwa gumi, uli mungunda gwa a Nnungu. **8** Kuka malaika jwa likanisha lya ku Shimilina nnjandishe. "Gegano ni malobhe ga bhene bhalibha ntai na bha kumpelo, bhaawile nnaino ni bhakoto. **9** Nigamanyi ga shilaje shenu, nimumanyi kuti mmwe mmaalaga. Ikabheje mmwe ni tajili, nimumanyi shibhashite kuntokomayanga bhene bhakwiitembangga kuti Bhayaudi ikabheje nngabha, bhene bhanganyabho ni likundi lika Lishetani. **10** Nnajogope shindu shoshowe shipinga kumpoteka. Mpilikane, Lishetani shanninganje kwa kuntendanga mmananji

munkumbi gwenunji ntabhwanje nnigelesha, na shimmnganje mmboteko kwa mobha likumi limo. Mwiishimilikanje nngulupai na nkali mpinjikwangaga kuwa, numbe nne shinimpanganje gumi, ibhe upo kwa kombola kwenunji.” **11** Akwete makutujo, bhai apilikane gaabheleketa Mbamu ku makanisha. Jwene shaakombolejo, akapotekwa na shiwo sha bhili. **12** Kuka malaika jwa ku likanisha lya ku Peligamo nnjandishe. “Gegano ni malobhe gubhaabheleketa bhene bhakwete upanga gwa tema akuno na kukuno bhala. **13** Nikumanyi kunkutama, mmwe kunkutama ni kushitengu sha upalume shika Lishetani. Ikabheje mwangangana, na wala mwangaleka kungulupalila, nkali mobha ga a Antipashi, bhaakong'ondela bhangu bhaakulupalika, pubhabhulegwe munkumbi gwenunji kwene kulitama Lishetani. **14** Ikabheje ipali ishoko ingwete kungwenu mmwe, bhapalinji munkumbi gwenunji bhaakagulilanga majiganyo ga a Bhalaamu, bhaajigenye a Bhalaki bhaalongoyanje Ishilaeli bhatendanje yambi kwa kwaatendanga bhalyanganje yalya ishoshiwe mbepei kuyanamu na itendi ya labhalabha. **15** Na nneyo peyo bhapalinji bhandunji munkumbi gwenunji bhaakagulilanga majiganyo ga Bhanikolai. **16** Bhai nnaino nnekanje yambi yenunji, nkalekanje shining'ishilanje shangupe kuukomana na bhene bhandunjibho na upanga gwankulungwa ukopoka nkang'wa jangu.” **17** Monaga nkwetenje makutu, bhai, mpilikananje gaabheleketwa naka Mbamu ku makanisha. Jwene shaakombole jula shinimpe shalya shiishiye shila. Shinimpe na liganga lyanawe lijandikwe lina lya ambi likamanyika na mundu jojowe ikabheje jwene apegwilwe jula. **18** Kuka malaika jwa ku likanisha lya ku Tiatila, nnjandishe. “Gwenego ni ntenga ukopoka kuka Mwana jwa a Nnungu, meyo gakwe mbuti lilamba lya moto, makotwa gakwe

ganamelema mbuti liabha lyalikubhule. **19** Niimanyi yowe inkutenda. Nikumanyi kupinga kwenu, kukulupalika kwenu, liengo lyenu na kuipililila kwenu. Nimumanyi kuti nnaino nnatenda indu yaigwinji kupunda imwatendaga bhukala. **20** Ikabheje ngwete lilobhe lya kummalanjila, mmwe nnakwaaleshelela bhakongwe a Jeshebheli, bhakwiishema bhayene ankulondola. Kwa majiganyo gabho bhanakwaapuganyanga bhatumishi bhangu, nkupinga bhatendanje ya labhalabha na kulya yalya ishoshiwe mbepei ku yanamu. **21** Nne naapele malanga ga kwiipeta yambi yabho, ikabheje bhakaapinga kuleka ya labhalabha yabho. **22** Kwa nneyo shinaagwishiye pa shinanda sha mboteko bhene bhakongwebho na bhowe bhagonilenje na bhenebho na bhalabhonji shibhapotekwanje kwa kaje. Shindende yenei nnainope ibhaga bhakaipetanje na indu ya nyata ibhatendilenje na bhene bhakongwebho. **23** Numbe shinaabhlaganje bhene bhakwaakagulanga bhene bhakongwebho, na makanisha gowe shibhamumanyanje kuti nne ngunatonela ya mmitima na ng'aniyo ya kila mundu. Shinimpe kila mundu malinga shatendile." **24** Ikabheje mmananji nninginji ku Tiatila mwangakagulanga gene majiganyogo, na mwangaijiganyanga yene ishemwa injubhi ika Lishetani. Nguti mmanganya, ngantwikanga nshigo guna. **25** Ikabheje nkamulilanje ukoto shoshowe shimpatilenje mpaka pushimujepo. **26** Shaakombole, na shaatende ingupinga nne mpaka kumpelo, shinimpe ukulungwa ku bhandunji bha ilambo ina. **27** Shaabhalongoyanje na imbo ja shitale, na shaabbakaanyanje mbuti ikelelo ya lilongo, malinga nne shimboshele ukulungwa kopoka kwa Atati. **28** Jwene shaakombolejo, shinimpe lutondwa lwa nng'andu. **29** Akwete makutujo, bhai, apilikane yaabheleketa Mbumu ku makanisha.

3 Kuka malaika jwa Likanisha ly a Shalidi nnjandishe nnei.
“Gegano ni malobhe ga bhene bhakwete mbumu shabha
ya a Nnungu, na ndondwa shabha ila. Niimanyi itendi yako,
nkali ushuma kuti ukwete gumiyo, ugwe uwile. **2** Jumuka na
ubhishe ukoto yowe ili tome nawa, pabha niibhweni itendi
yako kuti yangakamilika pa meyo ga a Nnungu bhangu. **3**
Bhai kumbushila majiganyo guupegwilwe na guupilikene gala,
ugakamulile nikwiipeta yambi yako. Ukashey, shinikujiile
shiiushila malinga shakwiya nngwii, wala ukagamanya malanga
gushinikujiile. **4** Ikabheje ukwete bhandu bhashoko ku Shalidi
bhakanabhe nyatiyanga nngubho yabbonji. Bhene bhanganyabho
ni shibhalongane na nne bhawetenje nngubho yanawe, pabha
ni bhaapinjikwanga.” **5** Jwene shaakombolejo shawashwe
nngubho yanawe malinga bhanganyabho, na nne ngalishoya
lina lyakwe nshitabhu sha gumi, ikabheje shingong'ondele lina
lyakwe pa meyo ga Atati na pa meyo ga ashimalaika bhabho. **6**
Jwene akwete makutujo apilikane, gene gabhelenje Mbamu ku
makanisha. **7** Kuka malaika jwa Likanisha ly a Piladelipia
nnjandishe nnei. “Gegano ni malobhe gubhaabheleketa bhene
bha ukonjelo na bha kweli, bhakwete upunguo gwa a Daudi.
Bhaugulaga jwakwa shaakombole kuugala, na bhaugulaga
jwakwa shaakombole kuugula. **8** Niimanyi itendi yako. Lola mmujo
jako njibhika nnango gwanng'ugulwe na jwakwapi shaakombole
kuugala. Nimumanyi kuti ukwete mashili gashoko, ikabheje
ushikamulila lilobhe lyangu na gwangalikana lina lyangu. **9** Lola,
shinikupe bhene bha nyumba jika Lishetani bhakwiishemanga
Bhayaudi bhalinginji nngabha Bhayaudi, mbena bhanami.
Shinaatendanje bhakutindibhalilanje pa makongono gako,
bhamumanyanje kuti nne nikupinjile. **10** Pabha ushikamulila

lilobhe lyangu lya kwiipililila, numbe nne shinkubhishile ulinda ushoshe mmalanga ga shilaje gakwiya pa shilambolyo powe, nkupinga kwaalinganga bhaatamangana pa shilambolyo. **11** Ngunakwiya shangu. Ukamulile ukoto shiukwete, nkupinga mundu anakupokonyole shilemba shako.” **12** Jwene shaakombole kutenda ukoto kupunda bhananjijo, shinintende kubha lipoto lya liekalu lya a Nnungu bhangu, na akashoka mwenemo kabhili. Na kabhili pa ntundu jakwe shinyandishe lina lya a Nnungu bhangu, na lina lya shilambo sha a Nnungu bhangu, yani Yelushalemu ja ambi, jituluka kopoka kunnungu, kwa a Nnungu bhangu. Nneila peila pa ntundu jakwe shinyandishe lina lyangu lya ambi. **13** Akwete makutujo apilikane gene gabhelenje Mbumu ku makanisha. **14** Kuka malaika jwa Likanisha lya ku Laodikia nnjandishe nnei. Gegano ni malobhe ga bhene bhali Amina yani, Nneyo Peyo, bhaakong'ondela bhaakulupalika na bha kweli, bhali nantando jwa indu yowe ipengenywe na a Nnungu. **15** Niimanyi itendi yako kuti ugwe ukaima na wala ukaabhabhula, mbaya ukaliji jwa ima eu jwa bhabhula. **16** Bhai, pabha ugwe ushibha jwa ntukuta, ukaima na wala ukaabhabhula shinikuune ukoposhe nkang'wa jangu. **17** Pabha ukuti, nne tajili ngwete indu yaigwinji na ngatubhilwa na shindu, ukakwiimanya kuti gwangali mashili, na unalaga, na gwangali shindu na nangalole na uli makonope. **18** Kwa nneyo, ngunakuupa lunda, kuume kwangu nne shaabhu jijitwilwe pa moto ubhe tajili, na kuume nngubho yanawe uwale pabha uli makonope gwijijambate. Na kabhili kuume ntela gwa taga mmeoyo gakogo nkupinga ulole. **19** Nne ngunakwaakalipilanga na kwaakomanga bhowe bhungwaapinganga, kwa nneyo utumbilile kwiipeta yambi yako. **20** Lola, ngunajima pa nnango niolishiya, mundu

apilikanaga lilobhe lyangu niugula, shinyinjile munngwakwemo, na shutulye pamo. **21** Jwene shaakombole kutenda ukoto kupunda bhananjiyo, shinimmishe tome na shitengu shangu sha upalume, malinga nne shingombwele kutenda ukoto, gundemi tome na Atati pa shitengu shabho sha upalume. **22** Akwete makutujo, apilikane gene gabheleketa Mbamu ku Makanisha.

4 Gakapiteje genego nashinkulola gunigubhweni nnango uugwilwe kunnungu. Na lyene lilobhe linatandwibhe kupilikana mbuti lilobhe lya lipenga lila gulishite, "Nnjiye kunani kuno, nne shininnanguye gaapinga koposhela kungai." **2** Shangupe, Mbamu gwandolile, gunishibhweni shitengu sha upalume kunnungu, na panani jakwe bhapali bhaatemi. **3** Bhene bhaatemi panani jakwe bhala pubhaaliji mbuti alimashi na liganga lya nashe lya konja. Lipinda lya a Nnunu lya melemeta mbuti shumalidi lyatendaga kushitimbilila shitengu showe sha upalume **4** Lyashinkupagwa likungo lya itengu makumi gabhili na nsheshe kushitimbilila shitengu sha upalume shila, na panani ja yene itenguyo, bhashinkutamangana bhanangulungwa makumi gabhili na nsheshe, bhali bhawetenje nngubho ya nawe na ilemba ya shaabhu mmitwe jabhonji. **5** Kumeta na lindimila na kubhalula kwa nnjai, yatendaga koposhela pene pa shitengu sha upalume pala. Mmujo mwa shitengu sha upalume yashinkupagwa kandili shabha ilikolela, yene kandiliyo ni ashimbamu shabha bha a Nnunu. **6** Numbe mmujo mwa shene shitengu sha ukulungwasho shashinkupagwa shindu mbuti bhaali ja shioo sha melemeta mbuti liganga lya melemeta kaje. Kila mmbali ja shene shitengu sha ukulungwa na nnyenje jakwe, yashinkupagwa iumbe nsheshe ikwete gumi. Yene iumbeyo yashinkukola meyo mmujo na nnyuma. **7** Shiumbe jwa ntai paaliji mbuti imba,

jwa bhili mbuti ng'ombe, jwa tatu ashinkukola na lubhombo lwa mundu, na jwa nsheshe paaliji mbuti litumbui. **8** lumbe yowe yashinkukola mapapiko nng'ano na limo kila jumo, na bhashinkukolanga meyo kila mmbali, nkati jabhonji na palanga. Shilo na mui bhatendaga jimbanga bhalinkutinji, "Mmaukonjelo, mmaukonjelo, mmaukonjelo, Mmakulungwa a Nnungu Nkwete mashili, bhaapali, bhapali na bhakwiyabho." **9** Na kila yene iumbeyo puyaainiyangaga na kwaishimiya na kwaatendela eja, bhene bhatemi panani shitengu sha ukulungwa bhakwete gumi gwa piti piti bhala, (aiōn g165) **10** bhanangulungwa makumi gabhili na nsheshe bhala, bhatendaga kotimanga mmujo ja bhene bhatemi pa shitengu sha ukulungwa na kwaatindibhalila bhene bhakwete gumi gwa piti piti bhala, na bhalibhikanga ilemba yabhonji ya ukulungwa, mmujo ja shitengu sha ukulungwa shila bhalinkutinji, (aiōn g165) **11** "Mmwe ni Mmakulungwa na a Nnungu bhetu, nkupinjikwa kuposhela ukonjelo na ishima na mashili. Pabha mmwe nshipanganya indu yowe, na ishipanganywa na ipali kwa pinga kwenu."

5 Bhai gunishibhweni shitabhu munkono gwa nnilo gwa bhene bhatemi pa shitengu sha ukulungwa, na shene shitabhusho shashinkujandikwa nkati na palanga na shashinkutabhwa iundo shabha. **2** Kabhili gunimmweni malaika akwete mashili aliutiya lilobhe alinkuti. "Gani apinjikwa kugopola yene iundoi nikushiunukula shene shitabhu shino?" **3** Ikabheje jwakwa mundu jojowe kunnungu, wala pa shilambolyo wala pai kubhawilenje, akombwele kuunukula shene shitabhusho eu kulola nkati. **4** Bhai, nne gung'utile kaje pabha jwangabhoneka mundu apinjikwa kuunukula shene shitabhusho eu kulola nkati. **5** Ikabheje bhamo munkumbi gwa bhanangulungwa bhala, gubhanugulile,

“Unagute, lola, Imba jwa shipinga sha a Yuda, jwa lubheleko
lwa a Daudi, akombwele. Jwenejo shaakombole kuigopola
iundo shabhayo na kuunukula shene shitabhusho.” **6** Na
gunimweni Mwana Ngondolo ajimi pakati shitengu sha upalume,
shitimbililwe kila mmbali na yene iumbe nsheshe ikwete gumi
ila, na bhanangulungwa bhala. Jwene Mwana Ngondolo jula
pabhonekaga mbuti ashiingwa. Ashinkukola mbembe shabha
na meyo shabha na yeneyo ni ashi Mbumu shabha bha a
Nnungu bhapelekwenje kila mmbali pa shilambolyo. **7** Mwana
Ngondolo nigwapite tola shene shitabhu shila, munkono nnilo
gwa bhatemi pa shitengu sha upalume bhala. **8** Shangupe
akatoleje shene shitabhu shila, yene iumbe ikwete gumi ila,
na bhene bhanangulungwa makumi gabhili na nsheshe bhala,
gubhagwilenje namanguku mmujo jika Mwana Ngondolo jula.
Kila shiumbe ashinkukamula shingushingushi na nkungu gwa
shaabhu ugumbeywe lubhani, yani malobhe ga bhandunji bha
ukonjelo nkwaajuganga a Nnungu. **9** Na gubhajimbilenje Iwimbo
lwa ambi bhalinkutinji. “Mmwe ni nkupinjikwa kutola shene
shitabhusho, na gopola iundo yakwe. Pabha mmwe nshiingwa,
na kwa minyai jenu nshikwaumila a Nnungu bhetu bhandunji
koposhela kila likabhila, na bha kila shibheleketi, na bha kila
ulongo, na bha kila shilambo. **10** Nshikwaatendanga bhabhe
upalume gwa bhakulungwanji bha bhishila bhaatumishilanje a
Nnungu bhetu, na shibhatagwalanje pa shilambolyo.” **11** Gunolile
kabili, gumbilikene malobhe ga a shimalaika bhabhagwinji kaje,
maelupu na mamillioni, bhatimbililenje shitengu sha upalume, na
yene iumbe nsheshe ikwete gumi ila, na bhanangulungwa bhala,
12 kwa lilobhe lya utiya nigubhashitenje, “Mwana Ngondolo
ainjilwe, jwenejo ni apinjikwa kuposhela mashili ga kombola,

utajili, lunda, mashili, ukonjelo na iniywa.” **13** Gumbilikene iumbe yowe kunnungu, na pa shilambolyo, na pai shilambo na mbhaali, iumbe yowe pa shilambolyo ilijimba. “Kwa bhene bhaatama pa shitengu sha upalume, na kuka Mwana Ngondolo, kupagwe kuiniya na ishima na ukonjelo na ukulungwa piti piti.” (aiōn g165)

14 Na yene iumbe nsheshe ikwete gumi ila guishite, “Nneyo peyo.” Na bhanangulungwa bhala gubhagwilenje namanguku, nkwaatindibhalila.

6 Bhai, gunimmwene Mwana Ngondolo pagopolaga shiundo shimo munkumbi gwa iundo shabha ila, nigumbilikene jumo munkumbi gwa bhene nsheshe bhakwetenje gumi bhala, alibheleketa kwa lilobhe lya mbuti nnjai alinkuti, “Nnjiye.” **2** Ngaloleje niginimmwene palashi jwanawe, na ankwelile jula ashinkukola upinde, nigwapegwilwe shilemba, bhai nigwakopweshe malinga akombola ngondo na apunde kombola. **3** Mwana Ngondolo akagopoleje shiundo sha bhili gunimpilikene jwene akwete gumi jwa bhili jula alinkuti, “Nnjiye” **4** Nigwakoposhele palashi jwa bhili jwanashe, na jwene ankwelilejo ashinkupegwa mashili ga kuushoya ulele pa shilambolyo, nkupinga bhandu bhabhulagane, na ashinkupegwa upanga gwankulungwa. **5** Mwana Ngondolo pagopolaga shiundo sha tatu, gunnimpilikene jwene akwete gumi jwa tatu lula alinkuti, “Nnjiye!” Nnole, gunimmwene palashi jwanapi na jwene ankwelile jula ali na shipimilo munkono gwakwe. **6** Nigumbilikene mbuti lilobhe koposhela munkumbi gwa bhakwetenje gumi nsheshe bhala alinkuti, “Kilo jimo ja utandi gwa ngano, shijiushwe kwa nshaala gwa liengo lya lyubha limo, na kilo itatu ya utandi gwa shaili, shiushwe kwa nshaala gwa liengo lya lyubha limo. Ikabheje nnajonanje mauta ga nsheituni wala divai.” **7** Na Mwana

Ngondolo pagopolaga shiundo sha nsheshe, nigumbilikene
lilobhe koposhela kuka akwete gumi jwa nsheshe jula alinkuti,
“Nrjiye.” **8** Nnole, nigunimmwene palashi jwa langi ja liu, na
ankwelilejo lina lyakwe ni Shiwo, na Kundamo ja bhawilenje
alikagula nnyuma. Na bhalabhonji nigubhapegwilwenje mashili ga
tagwala, shipande shimo nngabhanyaga shilambolyo pa sheshe,
bhaabhlaganje bhandu kwa upanga, na kwa shibhang, na
kwa ilwele, na kwa bhannyama bha jogoya bha pa shilambolyo.

(Hadēs g86) **9** Mwana Ngondolo pagopolaga shiundo sha nng'ano,
nigunijibhwene pai shitala mitima ja bhabhulegwenje kwa ligongo
lya lilobhe lya a Nnungu, na kwa ligongo lya ukong'ondelo
gubhakwetenje. **10** Nigubhagutilenje kwa utiya bhalinkutinji,
“Ama, a Nnungu Nkwete Mashili, Mmwe ni bha ukonjelo na
Mmaakulupalika, mpaka shakani pushinng'ukumule na pindikulila
ku bhandu bhaatamangana pa shilambolyo kwa ligongo lya
minyai jetu?” **11** Kungai na bhalabhonji nigubhapegwilwenje
majoo ganawe, nigubhabhalanjilwenje bhalindanje kwa malanga
gashoko, mpaka bhatimililanje bhatumishi na ashalongo ajabhonji
bhaapinjikwanga kubhulagwa, malinga shibhabhulegwenje
bhanganayabho pushigaishile. **12** Nigunolile, Mwana Ngondolo
pagopolaga shiundo sha shita, shilambolyo shikutetemelaga
kwa kaje, na lyubha nibha lyanapi mbuti nngubho ja likang'anda.
Mwei gowe guupindikwishe nibha gwanashe mbuti minyai. **13**
Na ndondwa kumaunde niguigwile pai, mbuti shiikugwa nndolo
ya iepo ya nkongo utikinywa na mbungo jikulu. **14** Kumaunde
kukushoywaga mbuti kalatashi jiiligwa, na itumbi yowe, na kila
patimbililwe na mashi nigupashoshiywe. **15** Na bhapalume bha
pa shilambolyo, na bhakulungwanji, na bhakulungwanji bha
manjola, na matajili, na bhakwetenje mashili, na bhatumwa,

na bhangwana, nigubhaiishiyanje mmashembo na mwiitumbi ya maganga. **16** Nigubhaishemilenje itumbi na mandandawe bhalinkutinji, “Ntugwilanje, ntuiyanje na lubhombo lwa bhene bhaatama pa shitengu sha ukulungwa na ntuembuyanje na nnjimwa jika Mwana Ngondolo. **17** Pabha lyubha lya nnjimwa jabhonji liishe. Gani shaalame?”

7 Gakapiteje genega, gunaabhwенинji ashimalaika nsheshe bhalibhalingenje nndumba nsheshe ya shilambolyo, bhalibhilinga mbungo nsheshe ya shilambolyo, nkupinga panapagwe mbungo ja puga pa shilambolyo, na pantundu bhaali, wala panani nkongo gogowe. **2** Nigunimmwene malaika juna aliikwela kukopoka kulikoposhela lyubha, ali na lulembo lwa a Nnungu bhakwete gumi. Nigwabhashemilenje kwa lilobhe lya utiya ashimalaika nsheshe bhapegwilwenje mashili ga kushiangabhanya shilambolyo na bhaali alinkuti, **3** “Nnashiangabhanyanje shilambolyo wala bhaali, na wala mikongo, mpaka pushitubhishe lulembo pa shenyi sha kila ntumishi jwa a Nnungu bhetu.” **4** Penepo nigumbilikene ishabhu ja bhabhishilwenje lulembo, yani bhandunji 144,000 kukoposhela ku makabhila gowe ga Ishilaeli. **5** Kukoposhela ku likabhila lya a Yuda bhandunji 12,000, kukoposhela ku likabhila lya a Lubheni bhandunji 12,000, kukoposhela ku likabhila lya a Gadi bhandunji 12,000, **6** kukoposhela kulikabhila lya a Asheli bhandunji 12,000, kukoposhela ku likabhila lya a Naputali bhandunji 12,000, kukoposhela ku likabhila lya a Menashi bhandunji 12,000, **7** kukoposhela ku likabhila lya a Shimoni bhandunji 12,000, kukoposhela ku likabhila lya a Lawi bhandunji 12,000, kukoposhela ku likabhila lya a Ishakali bhandunji 12,000, **8** kukoposhela ku likabhila lya a Shabhloni

bhandunji 12,000, kukoposhela ku likabhila lya a Yoshepu bhandunji 12,000, na kukoposhela ku likabhila lya a Bhenjamini bhandunji 12,000. **9** Gakapiteje genega, gunilibhweni likuga lya bhandunji lyangakombola mundu kubhalanganya. Bhandunji kukoposhela kila shilambo, na bha kila likabhila, na bha kila shipinga, na bhandunji bha kila ulongo, na bha kila shibheleketi. Bhajimingenenje mmujo ja shitengu sha upalume, na mmujo jika Mwana Ngondolo, bhalibhawetenje nngubho yanawe na bhalibhakamwilenje maagala ga mitende mmakono gabhonji. **10** Na bhene bhanganyabho bhatendaga utiyanga lilobhe bhalinkutinji, "Ntapulo ukoposhela kwa a Nnungu bhetu, bhaatama pa shitengu sha upalume na kuka Mwana Ngondolo!" **11** Na ashimalaika bhowe, gubhajimingenenje kutimbilila shitengu sha upalume shila, na bhanangulungwa makumi gabhili na nsheshe, na yene iumbe nsheshe ikwete gumi ila. Nigubhagwilenje namanguku mmujo ja shene shitengu sha upalume nikwaatindibhalila a Nnungu, **12** bhalinkutinji, Amina, yani Nneyo Peyo! Kuiniywa, na ukonjelo, na lunda, na tenda eja, na ishima, na kukombola, na mashili, ibhe kwa a Nnungu bhetu piti piti Amina. (**aiōn g165**) **13** Penepo jumo munkumbi gwa bhene makumi gabhili na nsheshe bhala, nigubhamushiye, bhene bhawetenje nngubho yanawebha ni ashi gani, na bhaakoposhelanga kwei? **14** Nigunaajangwile, "Mmakulungwa, mmwe mmumanyi." Na bhalabho nigubhamalanjile, "Bhanganyabha ni bhakoposhelenje nshilaje sha punda, na bhashapilenje nngubho yabonji mminyai jika Mwana Ngondolo, nikuitenda ibhe yanawe kaje. **15** Kwa nneyo, bhanajimangana mmujo ja shitengu sha upalume, nkwaakamulila a Nnungu maengo, shilo na mui Nniekalu lyabho. Na bhene bhaatama pa shitengu sha upalume, shibhaabhirikanje

muulinda kwa kwaunishilanga liema lyabho. **16** Bhakakolanga shibhanga kabhili, wala nnjota. Lyubha likaabhalilanga, na wala lyoto likaabhabhulilanga. **17** Pabha Mwana Ngondolo ali pakatipakati shitengu sha upalume shaabhe nshunga jwabhonji, jwalakwe shaabhalongoyanje ku shinjweshwe sha mashi gawkete gumi. Na a Nnungu shibhaaungutanje minyoi jowe mmeyo gabhonji."

8 Mwana Ngondolo pagopolaga shiundo sha shabha, kunnungu kukujilaga malanga ga nushu shaa. **2** Nigunaabhweninji ashimalaika shabha, bhaajimangana mmujo ja a Nnungu bhala, nigubhapegwilenje mapenga shabha. **3** Malaika junu gwaishe, nijima mmujo ja shitala shila, ajigele nkungu gwa shaabhu gwa bhishila lubhani. Gwapegwilwe lubhani lwalungwinji, nkupinga abhishile na malobhe ga bhandunji bha ukonjelo, pa shitala sha shaabhu shijima pa shitengu sha upalume. **4** Lyo iya lubhani lila, na malobhe ga kwaajuga a Nnungu ga bhandunji bha ukonjelo, guipite kwa a Nnungu kupitila nkono uka malaika. **5** Penepo malaika gwatolile nkungu gwa bhishila lubhani gula, nikuugumbaya moto koposhela pa shitala pala, na gwauleshele ku shilambolyo. Penepo guikoposhele kulindimila, na nnjai, na lilobhe, na kumeta, na tetemela kwa litaka. **6** Bhai, bhene ashimalaika shabha bhala, bhalinginji na mapenga shabha, gubhaibhishilenje ukoto bhagagombanje. **7** Malaika jwa ntai gwagobile lipenga lyakwe, gujikoposhele ula ja maganga na moto uanganyishe na minyai, guileselwe pai, nngabhanyaga shilambo showe pa tatu, shipande shimo gushitinishe, na nngabhanyaga mikongo jowe patatu, lipungu limo iya mikongo gulitishe, na maamba gowe ganashibhii gugatinishe. **8** Malaika jwa bili gwagobile lipenga lyakwe, na shindu mbuti

shitumbi shikulungwa shilikolela moto, gushileshelwe mbhaali. Na nngabhanyaga bhaali jowe pa tatu, shipande shimo, nibha minyai. **9** Nngabhanyaga iumbe yowe itama mbhaali pa tatu, lipungu limo guiwile na nneyo peyo, meli lipungu limo ikuangabhwanywaga. **10** Malaika jwa tatu gwagombile lipenga lyakwe na lutondwa lukulungwa lulikolela mbuti kandili, gulugwile koposhela kumaunde, nngabhanyaga pa tatu nushi yowe ya mab hutuka na injweshwe, shipande shimo nigushigwililwe na lwene lutondwa lula. **11** Lwene lutondwalo pulushemwa, "Kubhabha" na shene shipande shagwililwe na lwene lutondwalo, mashi gakwe gatendaga bhabha, na bhandunji bhabhagwinji gubhawilenje kwa ligongo lya gene mashigo, pabha gatendaga bhabha kwa kaje. **12** Numbe malaika jwa nsheshe gwagombile lipenga lyakwe na nngabhanyaga lyubha, mwei na ndondwa yowe pa tatu, shipande shimo gushikomilwe, kwa nneyo shipande shimo sha shilangaya nibha lubhindu. Shipande shimo sha mui nibha lubhindu, na shipande shimo nibha shilo. **13** Ngaloleje kabhili, gunimpilikene litumbui jumo aliguluka kunani kaje, kwa lilobhe lya utiya alinkuti, "Ole, ole, ole ku bhandu bhaatamangana pa shilambolyo, kwa ligongo lya mapenga gana gapinga gombwa na ashimalaika."

9 Malaika jwa nng'ano gwagombile lipenga lyakwe, na gunilubhweni lutondwa lukulungwa lwagwile koposhela kumaunde mpaka ku litaka. Lwene lutondwalo lushinkupegwua upunguo gwa ku Jeanamu. (*Abyssos* g12) **2** Akaunukuleje ku Jeanamu, lyoi gulikwelile kukoposhela mwenemo, mbuti lyoi liikoposhela nnituto lyalikulungwa kaje. Kwa ligongo lya lyoi lyakoposhelaga mwenemo lyubha na liunde nibha lubhindu. (*Abyssos* g12) **3**

Nnyoimo gugakoposhele maije, gugapite kunani shilambo showe,

na gene maije gala gashinkupegwā mashili mbuti ga ibhalabhalā
ya pa shilambo pano. 4 Gubhalugulilwenje bhanaangabhanyanje
manyai eu mikongo eu mitipo ja pa shilambo, ikabhe
bhandu bhowe bhangalinginji shilangulo shoshowe sha a
Nnungu pa shenyi. 5 Gubhalugulilwenje bhaapotekanje
kwa miei nng'ano, ikabheje bhanaabhlaganje. Kupoteka
kwakwe pukwaliji mbuti mundu alumilwe na shibhalabhalā. 6
Gene mobhago bhandunji bhaapinga kushiloleyanga shiwo
ikabheje bhakashibhonanga, bhaapinga lokolilanga kuwa,
ikabheje shiwo shiipinga kwaab hutukanga. 7 Gene maije gala
pugaaliji mbuti palashi, ibhishilwe ukoto ijende ku ngondo.
Ku mitwe jabhonji bhashinkukolanga shindu mbuti shilemba
sha shaabhu, na ku meyo kwabhonji pukwaaliji mbuti kuka
mundu. 8 Bhashinkukolanga umbo ya manyololo mbuti
ya bhanabhakongwe, na meno gabhonji pugaliji mbuti ga
imba. 9 Bhashinkuwalanga shindu sha mbuti itale kuibhila pa
ntima, na mapapiko gabhonji gatendaga ona mbuti nnindimo
gwa mutuka yaigwinji ya palashi ibhutushila ku ngondo. 10
Bhashinkukolanga mishila ja mibha ja lumila bhandu mbuti
shibhalabhalā. Mashili ga kwaapotekanga bhandu miej owe
nng'ano kugakoposhelaga mmishila jabhonjimo. 11 Pubhalinginji
naka mpalume, malaika koposhela ku Jeanamu, mpalume
jwabhonji, jwenejo kwa Shiebhulania pashemwaga Abhadoni, na
Shiyunani pashemwaga Apolioni. (Abyssos g12) 12 Limbukute lya
ntai lipitile, gaigele mambukute gabhili na ganakwiya. 13 Malaika
jwa shita gwagombile lipenga lyakwe, numbe nne gumbilikene
lilobhe lilikoposhela nndumba nsheshe ja shitala sha shaabhu
shaaliji mmujo ja a Nnungu. 14 Lyene lilobhelyo gulinrugulile
jwene malaika jwa shita akwete lipenga jula, "Gwaugulilanje

ashimalaika nsheshe bhala bhatabhilwenje nnushi lukulungwa lushemwa Pulateshi.” **15** Bhai bhene ashimalaika nsheshe bhala gubhaugulilwenje bhali bhabhishilwenje ukoto kwa gene malangago na lyene lyubhalo na gwene mweigo na shene shakasho, bhandu bhowe nngabhanyaga patatu, lipungu limo bhaabkulaganje. **16** Manjola bhakwelilenje palashi pubhalinginji milioni mmia pa bhili. **17** Na nkulola kwangu, guniibhwani palashi na bhakwelilenje palashi. Bhakwelilenje palashi bhala bhashinkukolanga ngao ya itale ya langi janashe mbuti moto na ina ya langi ja buluu janapi na ja lindani. Mitwe jabhonji bhene ashipalashi bhala pujaaliji mbuti ja imba. Moto na lyoi na bhonga shilikoposhela nkang'wa yabhonji. **18** Bhandu bhowe nngabhanyaga patatu, lipungu limo gubhabhulegwenje kwa ligongo lya mambukute gatatu, yani, moto, lyoi, na bhonga, yakoposhelaga nkang'wa ja ashipalashi. **19** Mashili ga ashipalashi mugaaliji nkang'wa yabhonji na mmishila jabhonji. Mishila jabhonji pujaaliji mbuti mitwe ja lijoka, na kwa jene mishilajo, bhatendaga ulayanga bhandu. **20** Ikabheje, bhandu bhalepekenje gwangali kubhulagwa bhashinkukananga kuipeta na leka kuntindibhalila Lishetani na indu ibhaeleyenje kwa makono gabhonji yani, yanamu ya shaabhu, na ya ela, na ya shitale, na ya maganga, na ya mikongo, ikaakombola kulola, wala kupilikana, wala kujimajima. **21** Bhangaipetanga nileka itendi yabhonji ya bhulaga, na ya uabhi, na ya labhalabha na wala ya gwii gwabhonji.

10 Kabhili nigungimmwene malaika akwete mashili alielela kukoposhela kunnungu. Atimbililwe na liunde, na lipinda lya a Nnunu pantundu ntwe gwakwe. Lubhombo Iwakwe lushinkubhala mbuti lyubha na makongono gakwe pugaaliji mbuti mapoto ga moto. **2** Munkono gwakwe ashinkukamula shitabhu

shishoko shashiunukulwe. Nigwabhisile lukongono lwakwe
lwa nnilo mbhaali na lukongono lwa nshinda pai papajumu, 3
Na gwashefile kwa utiya mbuti imba atuluma. Akajobheleje,
nigujipilikanishe milindimo shabha ja nnjai. 4 Na yene nnjai
shabha ila ikalindimileje nappingaga kutandubha kujandika,
ikabheje nigumbilikene lilobhe kukoposhela kunnungu lilinkuti,
“Nnagajandishe gene gabheleketwe na yene nnjai shabha gala,
ntende ga nng’iyo.” 5 Na malaika junammweni ajimi papajumu
na mbhaali, nigwajinwile nkono gwakwe gwa nnilo kuloya
kunnungu. 6 Nigwalumbile kwa lina lya a Nnungu bhaatama
pitipiti na pitipiti, bhapengenyenye kunnungu na yowe ili nkatimo,
na indu yowe ili nshilambolyo, pamo na bhaali na yowe ili
nkatimo, alinkuti, malanga ga lindilila kabili gamalile. (aiōn g165)

7 Ikabheje mobha malaika jwa shabha gapinga gomba lipenga
lyakwe, shinjubhi sha a Nnungu shishitimilile, malinga shibhashite
kwaalungushiyanga bhatumishi bhabho ashinkulondola. 8
Penepo lyene lilobhe linalipilikene kukoposhela kunnungu,
nigulibhelekete na nne kabili lilinkuti, “Nnjende nkatole shene
shitabhu shiunukwilwe, shili munkono gwa jwene malaika ajimi
mbhaali na pai papajumu.” 9 Bhai guninnjendele malaika jula
guninnjujile ambe shene shitabhusho. Nigwamalanjile, “Ntole na
nshilye, shipinga bhabha mmatumbo genu, ikabheje shiipinga
nong’ a mbuti bhushi nkangw’ a jenu.” 10 Kwa nneyo nigundolile
shitabhu shishoko kukoposhela munkono gwakwe jwene malaika
jula gunile. Ninong’ a mbuti bhushi nkangw’ a jangu, ikabheje
ngamileje, matumbo gakumbotekaga. 11 Kabili nigumalanjilwe,
“Nnapinjikwa kulondola kabili, ga makabhila gamagwinji, na ga
ilambo, na ga ibheleketi, na ga bhalapume bhabhagwinji!”

11 Penepo nigumbegwilwe nnai gwaapimila gwa mbuti imbo, nigumalanjilwe, "Nnjende nkapime liekalu pamo na shitala, na mwaabhalanganyanje bhakwaajuganga a Nnungu mwenemo. **2** Ikabheje nnapime lugwani lwa palanga lwa liekalu nneshe, pabha lugwanilo bhashipegwanga bhandunji bha ilambo ina. Bhene bhanganyabho shibhalibhatanje shilambo sha ukonjelo kwa myei makumi nsheshe na jibhili. **3** Na nne shinaatumanje bhaakong'ondela bhangu bhabhili, na shibhalondolanje kwa mobha 1,260 bhalil bhawetenje nngubho ya shililo." **4** Bhene bhanganyabha ni jene misheituni jibhili jila, na itengu ibhili ya kandili, ijima mmujo ja bhakulungwa bha shilambo showe. **5** Ibhaga mundu jojowe apingaga kumpotekanga, moto shiukoposhe nkangw'a jabhonji, nikwaatiniyanga ashaamagongo ajabhonji. Nneyo peyo shaapinjikwa kubhulagwa, mundu apinga kumpotekanga. **6** Bhene bhandunjibha bhakwetenje mashili ga tabha maunde jinanye ula, mobha ga ukulondola gwabhonji. Na shibhakolanje mashili ga pindikula mashi kubha minyai, na kushikoma shilambolyo kwa limbukute lyolyowe, malinga shibhaapinganga. **7** Bhai pushibhamaliyanje ukong'ondelo gwabhonji, jwene nnyama akoposhela ku Jeanamu, ashaakomane nabhonji ngondo, na ashaabhakombolanje nikwaabhlulaganga. (*Abyssos* g12) **8** Mitui jabhonji shijileshwe mumpanda gwa shilambo shikulungwa, kwa lina lya nng'iyo pushashemwaga, Shodoma eu Mishili, kubhapotekwe Bhakulungwa bhabhonji. **9** Kwa malanga ga mobha gatatu na nushu, bhandu bha kila likabhila, na kila ulongo, na bha kila shibheleketi, na bha kila shilambo, shibhajilolanje jene mituijo, na bhakapinganga jishikwe. **10** Bhandunji bhaatamangana pa shilambolyo, shibhaangalalanje kwa shiwo

sha bhene ashinkulondola bhabhilibho, kwa pelegana upo, pabha bhene ashinkulondolabho bhashinkwaapotekanga bhandunji bhaatamangana pa shilambolyo. **11** Ikabheje kumpelo gwa gene mobha gatatu na nushugo, mbumu jwa gumi kukoposhela kwa a Nnungu nigwabhayushiyenje, na bhandu bhowe bhaibhwenenje yenei nigubhajogopenje kwa kaje. **12** Kungai ashinkulondola bhabhili bhala gubhapilikenenje lilobhe lyu utiya kukoposhela kunnungu lilikwaabhalanjilanga, "Nnjiyangane kunani kuno." Nabhalabhonji gubhapitengene kunani ku mmaunde, akuno ashaamagongo ajabhonji bhalinkwaalolesheyanga. **13** Malanga gogo pego niguukoposhele nng'ungumilo gwankulungwa gwa pa shilambolyo, na shipande shimo sha ipande kumi ya shilambolyo nigushigwile. Bhandunji elupu shabha nigubhawilenje kwa gwene nng'ungumilogu, na bhaigelenje bhala nigubhajogopenje kaje, nikwaakuya a Nnungu bha kunnungu. **14** Limbukute lyu bhili lipitile, nnole, limbukute lyu tatu linakwiya. **15** Kungai malaika jwa shabha gwagombile lipenga lyakwe, malobhe ga utiya gakupilikanikaga kukoposhela kunnungu galinkuti, "Upalume gwa shilambolyo, nnaino ushibha upalume gwa Bhakulungwa bhetu na gwa a Kilishitu bhabho na bhenebho shibhatagwale pitipiti."

(aiōn g165) **16** Na bhakulungwanji makumi gabhili na nsheshe bhala, bhatemingenenje mmujo ja a Nnungu pa itengu yabhonji ya upalume, nigubhagwilenje namanguku nkwaatindibhalila a Nnungu **17** bhalinkutinji, "Tunakuntendela eja mmakulungwa a Nnungu, mpali, na mwaapali, pabha kwa mashili genu ga purda, nshikombola kuubhika upalume gwenu! **18** Bhandunji bha ilambo ina bhashitumbalanga, ikabheje malanga ga nnjimwa yenu gaishe. Malanga gaishe ga kwaukumulanga bhawilenje, na kwaapanganga upo bhatumishi bhenu ashinkulondola na

bha ukonjelo, pamo na bhowe bhakuliishimunji lina lyenu, bhakulungwanji na bhashoko, ni malanga ga kwaangabhanyanga bhakushiangabhanyanga shilambolyo.” 19 Penepo liekalu lya a Nnungu lili kunnungu guliugwishe na lishanduku lya malagano lyabho gulibhoneshe nniekalumo. Guikoposhele kumeta, malobhe ga utiya, kulindimila kwa nnjai, na nng'ungumilo gwa shilambolyo, na ula jikulungwa ja maganga.

12 Kungai, shilangulo shikulungwa shikubhonekaga kunnungu, jwankongwe awashiyewe lyubha na mwei uli pai makongono gakwe, na pa ntwe gwakwe shilemba sha ndondwa likumi limo na ibhili. 2 Ashinkukola shitumbo, aliguta kupoteka ushunu gwa kola mwana. 3 Shilangulo shina shikubhonekaga kunnungu, lijoka likulungwa lyanashe lya mitwe shabha na mbembe shabha na kila ntwe na shilemba. 4 Na nshila gwakwe nipejila ndondwa lipungu limo lya gatatu ga ndondwa yowe ya kunnungu, nikwiigwiya pa shilambolyo. Na lijoka jula gwajimi mmujo muka jwankongwe aliji tome na kola mwana jula, nkupinga abhelekwaga ammile. 5 Na jwankongwe jula gwakwete mwana jwannume, jwenejo shatagwale ilambo yowe kwa imbo ja shitale. Na mwana jula gwanyakwilwe kupelekwa kwa a Nnungu ku shitengu shakwe sha upalume 6 Jwankongwe jula gwabbutushile kuanga kweneko a Nnungu bhashinkuntendela ndamo, nkupinga kweneko bhammikanje muulinda kwa mobha elupu jimo na mmia pa bhili na makumi shita. 7 Bhai jikutandubhaga ngondo kunnungu. Mikaeli na ashimalaika bhakwe gubhakomenenje ngondo naka lijoka jula, najwalakwe lijoka jula na ashimalaika bhakwe gwakomene nabhonji. 8 Ikabheje lijoka jula na ashimalaika bhakwe gubhalepelenje na kunnungu kula bhangakolanga ndamo kabhili. 9 Bhai, lijoka

nkulungwa jula akuleshelwaga palanga. Jwene lijokajo ni lijoka jwa bhukala ashemwa Ibhilishi eu Lishetani lipuganya bhandu pa shilambolyo. Gwaleshelwe mpaka kushilambolyo pamo na ashimalaika bhakwe. **10** Gumbilikene lilibhe likulungwa kukoposhela kunnungu lilinkuti. "Nnaino uishe ntapulo na mashili na upalume gwa a Nnunu bhetu na ukulungwa gwa a Kilishitu bhabho. Pabha akwaashitakiyanga ashaapwetu kwa a Nnunu jula, aleshelwe pai. Elo aleshelwe pai akwaashitakiyanga shilo na mui. **11** Ashaapwetu bhankombwelenje kwa minyai jika Mwana Ngondolo na kwa lilibhe libhakong'ondelenje, pabha bhangapinganga gumi gwabhonji, mpaka nibha tayali nkali kuwa. **12** Kwa nneyo mwinonyelanje kunnungu na indu yowe itama kunnungu. Ikabheje, ole pa shilambolyo na mbhaali. Pabha Ibhilishi ashikunnjiilanga ali na nnjimwa ya kaje, pabha amumanyi kuti mobha gakwe galepeshe gashokope." **13** Lijoka jula akabhoneje kuti aleshelwe pai pashilambolyo, gwatandwibhe kunkagulila jwankongwe akwete mwana jwa shileu jula. **14** Ikabheje jwankongwe jula gwapegwilwe mapapiko gabhili mbuti ga litumbui jwankulungwa kupinga agulushe kwataliya kummutuka lijoka jula, mpaka ku ndamo jakwe ku anga kweneko abhikwe muulinda gwangali shigwegwe kwa yaka itatu na myei shita. **15** Bhai, lijoka jula gwakopweye mashi gamagwinji mbuti lushi lwa mabutuka, galikunkagula jwankongwe jula nnyuma kupinga gantole. **16** Ikabheje ntaka ukunnjangutilaga jwankongwe jula, nikwiunukula mbuti kang'wa nikugamila mashi ga mabutuka gakopokaga nkang'wa muka lijoka jula. **17** Bhai, lijoka lila gulintumbalile jwankongwe jula, gulijabhwile likakomane ngondo na bhana bhalepekenje bhabhelekwenje

naka jwankongwe jula, yani bhowe bhaakundanga malajilo ga a Nnungu na kwaakong'ondela a Yesu.

13 Bhai, lijoka lila gulijimi nnyenje bhaali. Gunimmwene nnyama jumo alikopoka mbhaali. Ashinkukola mitwe shabha na mbembe likumi limo, na kila lupembe Iwashinkubhikwa shilemba. Muntundu mitwe jakwe gashinkujandikwa mena ga kwaatukana a Nnungu. **2** Jwene nnyama junammwene jula paaliji mbuti ubhi, makongono gakwe mbuti liogo na ntwe gwakwe mbuti imba. Lijoka jula gwanngabhile nnyama jula mashili gakwe na shitengu shakwe sha ukulungwa na mashili ga kaje. **3** Ntwe gwakwe gumo pugwabhonekaga mbuti ushiulaywa libhangya shiwo, ikabheje libhangya lyakwe liponile. Shilambo showe shikunkanganigwaga nnyama jula nigubhankagulenje. **4** Bhandunji bhowe gubhantindibhalilenje lijoka jula kwa pabha nnyama jula ashinkunngabhila mashili gakwe. Gubhantindibhalilenje na nnyama jula bhalinkutinji, “Gani ali malinga aju nnyamaju? Numbe gani akombola kukomana najo?” **5** Na nnyama jula gwaleshilwe abhelekete malobhe ga kwitapa na ga kwaatukana a Nnungu, gwapegwilwe mashili ga tenda liengo lyakwe kwa myei makumi nsheshe na jibhili. **6** Bhai, gwatandwibhe kwaatukana a Nnungu na alitukana na lina lyabho na ndamo jabho na bhowe bhaatamangana kunnungu. **7** Na gwaleshilwe akomane ngondo na bhandunji bha ukonjelo nikwaakombolanga. Gwapegwile ukulungwa kubhandunji bha kila kabhila, na kila shipinga, na kila shibheleketi, na kila shilambo. **8** Bhowe bhaatamangana pa shilambolyo shibhantindibhalilanje, ikabheje bhene bhajandikwenje mena gabhonji nshitabhu sha gumi shika Mwana Ngondolo ainjilwe, kuumila ku ndandubho kwa panganywa shilambolyo. **9** Akwete makutujo, apilikane! **10**

Mundu atumbiliilwe kukamulwa utumwa, shaakamulwe utumwa,
na mundu jwa bhulagwa na upanga, shabhulagwe na upanga.
Kwa nneyo, bhandunji bha ukonjelo bhaipilililanje na bhakolanje
ngulupai. **11** Kabhili, gunimmwene nnyama juna alikopoka
nnitaka. Ashinkukola mbembe ibhili mbuti ya ngondolo, ikabheje
atendaga bheleketa mbuti lijoka. **12** Ashinkukola mashili
gapegwilwe nagwe nnyama jwa ntai jula, na gwalangwile mashili
gakwe kuka nnyama jula. Akushitendaga shilambolyo, na bhowe
bhaatamangana mwenemo, kuntindibhalila nnyama jwa ntai,
akwete libhangaliponile jula. **13** Gwatendile ilapo yaikulungwa,
akubhulayaga moto ukoposhe kunnungu utulushe pa shilambolyo,
nibhoneka ku bhandu bhowe. **14** Alikwaapuganyanga bhandunji
bhaatamangana pa shilambolyo, kwa ilapo yapegwile kwitenda
paka nnyama jwa ntai jula. Alikwaabhalanjilanga bhaatamangana
pa shilambo bhanng'alashianje shanamu nnyama jwa ntai
auleywe kwa upanga nilama kabhili jula. **15** Nigwapegwilwe
mashili ga pepetela mbumu ya gumi nshanamu shika nnyama jwa
ntai jula, mpaka gushikombwele kubheleketa nikwaabkulaganga
bhandunji bhowe bhashitindibhalilenje shanamu shika nnyama
shila. **16** Na alikwaatendanga bhowenji, bhashoko na
bhakulungwanji, matajili, na bhaalaga, na bhangwana, na
bhatumwa bhalembwanje lulembo munkono gwabhonji gwa nnilo
eu pa shenyi shabhonji. **17** Na kabhili kuti mundu jojowe anaume
shindu eu kuusha, ikabheje mundu alembilwe lwene lulembolo,
yani lina lika nnyama jula eu eshabhu ja lyene linalyo. **18** Penepa
panapinjikwa lunda! Akwete lunda shagamanye malombolelo ga
eshabhu jika jwene nnyamajo, pabha ni eshabhu jikunnombola
mundu. Jene eshabhujo, mmia shita na makumi shita na shita.

14 Kabhili, gunishibhweni shitumbi sha Shayuni, na Mwana Ngondolo ajimi pantundu jakwe, na bhandunji 144,000, bhalinginji pamo na jwenejo, bhajandikwenje lina lyakwe, na lya Ainagwe, pa shenyi shabbonji. **2** Bhai, gumbilikene lilobhe kukopoka kunnungu lya mbuti mashi gamagwinji galibhutuka na lilobhe lya mbuti kubhalula kwa nnjai. Lyene lilobhelyo pulyaaliji mbuti lya bhaagombanga ingwaya. **3** Bhatendaga jimbanga lwimbo lwaambi pa shitengu sha ukulungwa, na mmujo ja iumbe nsheshe ila, na bhanangulungwa bhala. Jwakwapi mundu akombwele kwijiganya lwene lwimbolo, ikabhe bhene bhandunji 144,000 bhala, bhagombolwenje pa shilambolyo. **4** Bhene bhandunjibho bhangainyatiyanga na bhanabhakongwe, pabha pubhalinginji bha ukonjelo. Bhene bhanganyabho bhanakunkagulanga Mwana Ngondolo kokowe kushajende. Bhashigombolwanga kukopoka munkumbi gwa bhandunji bhana, nibhanganga nnimbu kwa a Nnungu na kuka Mwana Ngondolo. **5** Bhangabheleketanga ya unami, wala bhangalebhanga. **6** Kungai, gunimmweni malaika junia aliguluka kunani ali na Ngani ja Mmbone ja a Nnungu, ja pitipiti, alunguye ku bhandu bhaatamangana nshilambolyo, bha ilambo yowe, na makabhila gowe, na bhandunji bha ibheleketi yowe, na ipinga yowe. (*aiōnios g166*) **7** Kwa lilobhe likulungwa gwashite. “Mwaatindibhalilanje a Nnungu na mwaakuyanje! Pabha lyubha lya ukumu liishe. Mwaatindibhalilanje bhenebho bhapengenye kunnungu na shilambolyo na bhaali na injweshwe ya mashi.” **8** Malaika jwa bhili jwa a Nnungu gwankagwile malaika jwa ntai jula alinkuti, “Agwile! Elo, Bhabhuloni nkulu agwile! Abhapangangaga bhandunji bha ilambo yowe ukana bhang'wanganje, ukana gwa bhabha gwa labhalabha kwakwe!” **9** Malaika jwa tatu jwa a Nnungu gwabhakagwilenje bhabhili bhala

alibheleketa kwa utiya alinkuti, "Mundu jojowe akuntindibhalila jwene nnyama jula, na shanamu shakwe nikunda kulembwa lulembo lwakwe pashenyi eu munkono gwakwe, **10** na jwalakwe shaapapile ukana gwa nnjimwa ja a Nnungu, utajilwe nshing'welo sha nnjimwa jabho gwangali kuimula na mashi. Jwene mundujo apinga potekwa kwa moto na bhonga pa ashimalaika bha ukonjelo na Mwana Ngondolo. **11** Na lyoi lya moto gwa mboteko yabthonji nitutuma kwenda kunani pitipiti. Bhene bhandunji bhangtindibhalilene jwene nnyama jula na shanamu shakwe nilembwa lulembo lwa lina lyakwe, bhakapumulilanga shilo na mui." (*aiōn g165*) **12** Kwa nneyo, bhandunji bha ukonjelo, bhaakundanga malajilo ga a Nnungu, nikwaakulupalila a Yesu, bhanapinjikwanga bhaipilililanje. **13** Gumbilikene lilobhe kukopoka kunnungu lilinkuti, "Nnjandishe cuti, kutandubhila nnaino mbaya bhandunji bhaawanganga bhalibhalundenenje na Bhakulungwa." Na jwalakwe Mbamu, akuti! "Elo! Shihapumulilanje shilaje shabthonji, pabha shibhalongananje na itendi yabthonji." **14** Nigunilibhweni liunde lyanawe. Na pantundu liunde lila ashinkupagwa mbuti Mwana juka Mundu atemi. Awete shilemba sha shaabhu muntwe gwakwe akamwile mbopo ja tema munkono gwakwe. **15** Kungai malaika juna gwakopweshe nniekalu, na kwa lilobhe lya utiya gwammalanjile jwene atemi pantundu liunde jula, "Shonde, tola mbopo jako ukaneng'ene, pabha miongwe ja maneng'eno jiishe, maneng'eno pa shilambolyo gatendeshe." **16** Bhai, bhatemi pantundu liunde bhala gubhaleshele mbopo jabho pa shilambolyo na maneng'eno pa shilambolyo na guganeng'enwe. **17** Kungai malaika juna gwakopweshe nniekalu lili kunnungu, najwalakwe ali na mbopo jakwe ja tema. **18** Na malaika juna akwete mashili ga amulisha moto, gwakopweshe

ku shitala, gwammalanjile kwa utiya malaika akwete mbopo ja tema jula, "Na ugwe utele mbopo jako, ukaneng'ene matunje ga shabhibhu ya pa shilambolyo, pabha shabhibhu yakwe ishejele!" **19** Bhai, jwene malaika jula gwaleshele mbopo jakwe pa shilambolyo, gwakabhile shabhibhu ya pa shilambolyo, gwaleshele nshikelelo shikulungwa sha minyila shabhibhu, shikelelo sha nnjimwa ja a Nnungu. **20** Shabhibhu guiminyilwe nshikelelo shaaliji kunyenje shilambo kula, gujikopweshe ndanje ja minyai nshikelelo mula, ja ishila shanga shika mundu nibhutuka, mwanja gwa maili mmia pa bhili.

15 Kabhili gunishibhweni shilangulo shina kunnungu, shikulungwa na sha imongwa. Bhashinkupagwanga ashimalaika bha a Nnungu shabha, bhakwetenje mambukute shabha ga kumpelo. Kwa gene mambukute shabhago, nnjimwa ja Nnungu jimalile. **2** Na kabhili gunishibhwene shindu mbuti bhaali ja shiyoo, jiengenyewe na moto. Gunaabhwelenenje kabhili bhandunji bhankombwelenje nnyama alugwilwe lina lyakwe kwa jene eshabhu jila, na shanamu shakwe. Bhene bhandunji bhajimingene nnyenje bhaali ja shiyoobho, bhalinginji na ingushingushi ibhapegwilenje na a Nnungu. **3** Bhalijimbanga Iwimbo lwa a Musha, bhatumishi bha a Nnungu na Iwimbo luka Mwana Ngondolo. "Mmwe Mmakulungwa a Nnungu Nkwete Mashili gowe, itendi yenu yaikulungwa na ya lapa! Mmwe a Mpalume bha ilambo ina. Mipanda jenu ni ja aki na ja kweli! **4** Mmakulungwa, gani akakunnjogopa mmwe? Gani akakulikuya lina lyenu? Mmwe jikape ni Mmaukonjelo. Ilambo yowe shiinjile nikuntindibhalila, pabha itendi yenu ya aki imanyishe." **5** Gakapiteje genego, gunolile nikukubhona kunnungu na nkati jakwe liema likong'ondela kupagwa kwa a

Nnungu liugwilwe. 6 Bhai, ashimalaika shabha bha a Nnungu, bhakwetenje mambukute shabha bhala, gubhakopokengene nniekalu ly a Nnungumo, bhawashiywenje nngubho ya kitani ja takata, ya melemeta na bhatabhilwenje mishipi ja shaabhu pantima. 7 Na jumo munkumbi gwa iumbe nsheshe ikwete gumi ila, gwabhapelenje ashimalaika bha a Nnungu bhala mikungu shabha ja shaabhu jigumbele nnjimwa ja a Nnungu, bhakwete gumi gwa piti piti. (aiōn g165) 8 Liekalu likugumbalaga lyoi likopweshe muukonjelo gwa a Nnungu na mashili gabho, jwakwapi akombwele kujinjila nniekalu, mpaka gamalile mambukute ga ashimalaika shabha bha a Nnungu bhala.

16 Nigumbilikene lilobhe likulungwa kukopoka nniekalu, lilikwaabhalanjilanga ashimalaika shabha bha a Nnungu bhala lilinkuti, "Nnjendangane nkajitanje mikungu ja nnjimwa ya Nnungu nshilambolyo." 2 Bhai, malaika jwa ntai jula gwapite jita nkungu gwakwe pa shilambolyo. Shangupe mabhanga ga potesheya, gakwaapatangaga bhowenji bhakwetenje lulembo luka nnyama jula, na bhashitindibhalilenje shanamu shakwe. 3 Na malaika jwa bhili gwapite jita nkungu gwakwe mbhaali. Na bhaali jikubhaga minyai malinga jika mundu awile, na iumbe yowe mbhaali guiwile. 4 Malaika jwa a Nnungu jwa tatu, gwapite jita nkungu gwakwe nnushi ya mabbutuka, na mwinjweshwe ya mashi na yalakwe ikubhaga minyai. 5 Gumbilikene malaika nkulungwa jwa mashi alinkuti, "Mmwe mmaukonjelo, mmatangu na tangu! Nshitenda aki kuukumula nneyo. 6 Pabha bhashinkwaabhalaganga bhandunji bha ukonjelo, na ashinkulondola bhabho, na mmwe nshikwapanganga minyai bhapapilanje, ishipinjikwa bhaukumulwanje nneyo!" 7

Gumbilikene lilobhe ku shitala lalinkuti, “Elo, Mmakulungwa a Nnunu Nkwete Mashili gowe! Ukumu yenu, ya kweli na ya aki!” **8** Na malaika jwa nsheshe gwajitile nkungu gwakwe kunani lyubha. Na lyubha gulipegwilwe mashili ga joka bhandu na moto gwakwe. **9** Bhai, bhandunji gubhatiniyenje kwa kaje, nigubhaatukenenje a Nnunu bhakwete mashili kwa gene mambukutego. Ikabheje bhangaipetanga nikwaakuya a Nnunu. **10** Malaika jwa nng’ano gwajitile nkungu gwakwe pa ntundu shitengu sha ukulungwa shika nnyama jula. Lubhindu lukutabhaga muukulungwa gwakwe, bhandunji gubhaitaunenje nnjeje yabhonji kwa poteka. **11** Gubaatukenenje a Nnunu bha kunnunu kwa ligongo lya mboteko yabhonji na mabhanga gabhonji. Ikabheje bhangaipetanga itendi yabhonji yangali ya mmbone. **12** Na malaika jwa shita nigwajitile nkungu gwakwe pantundu lushi lukulungwa lwa mabbutuka lushemwa Pulateshi. Mashi gugajumilile, kwa nneyo guuyushile mpanda gwa pita bhapalume kukopoka kulikopoka lyubha. **13** Gunaabhwelenje ashimbumu bhatatu bha nyata, bha mbuti yula, kukopoka nkangw’ a muka lijoka jula, na nkangw’ a muka nkulondola jwa unami jula. **14** Bhene bhanganyabho ni mbumu ya ashimaoka bhatendanga ilapo. Ni bhakwendangana ku bhapalume bha pa shilambolyo, nikwashemanga pamo kungondo ja lyene lyubha likulu lya a Nnunu Bhakwete Mashili gowe lila. **15** “Mpilikane! Nne ngunakwiya malinga nngwii! Na mbaya mundu asheya akuno awete nngubho yakwe anajime jime makonope nitokomala.” **16** Bhai, bhene ashimbumubho gubhaashemilenje pamo bhapalume ku mmbali jishemwa kwa Shiebhulania, Alimagedoni. **17** Na, malaika jwa shabha gwajitile nkungu gwakwe kunani. Lilibhe likulungwa likupilikanikaga kukopoka kushitengu sha ukulungwa,

nniekalu, lilinkuti, "Uiophile mpelo!" **18** Gwuitandwibhe kumeta na nnjai, na kulindimila, na kuungumila kukulungwa kwa shilambo, kukanabhe koposhela kutandubhila pubhampengenye mundu. **19** Shilambo shikulungwa shila shikugabhanikaga ipande itatu, na ilambo ina nshilambolyo ikuangabhanikaga. Na Bhabhuloni shilambo shikulu, shikukumbushilwaga na a Nnunu. Gushipegwilwe shingw'elo sha ukana gwa nnjimwa ja a Nnunu. **20** Na ilambo yowe itimbililwe na mashi ikuobhaga na itumbi yangabhoneka kabhili. **21** Ula ja matalila gamakulungwa, ga topa ga malinga kilo makumi nng'ano kwa kila limo, gugaanyeelenje bhandunji. Na bhandunji gubaatukenenje a Nnunu kwa ligongo lya mboteko ya ula ja matalila jila. Pabha, lyene limbukute lya ula ja matalilajo pulyaaliji lya jogoya.

17 Malaika jumo munkumbi gwa bhakwetenje mikungu shabha bhala, nigwajile malanjila, "Jiya akuno, nikulangule ukumu ja pegwilwe lijajana nkulu, atama pantundu mashi gamagwinji jula. **2** Bhapalume bhagonilenje nagwe jwenejo na bhaatamangana pa shilambolyo, bhakolelwenje ukana gwa labhalabha kwakwe." **3** Gwandolile, Mmbumu mpaka kuanga. Kweneko gunimmwene jwankongwe atemi pantundu nnyama jwanashe. Jwene nnyamajo ashinkujandikwa nshiilu showe, mena ga matukano, ashinkukola na mitwe shabha na mbembe likumi limo. **4** Jwene jwankongwejo ashinkuwala nngubho ja langi ja shambalau na nnangali, ali aikelengelele na yuma ya shaabhu, na madini ga ela yaigwinji na lulu. Munkono gwakwe ashinkukamula shikombe sha shaabhu, shigumbele yangali ya mmbone, na ya nyata ya labhalabha kwakwe. **5** Pashenyi shakwe ashinkujandikwa lina lya nng'iyo, "Bhabhuloni Nkulu, Nyinamundu jwa Majajana, na ya Nyata ya pa Shilambolyo." **6** Gunimmwene jwene jwankongwe akolelwé

minyai ja bhandunji bha ukonjelo, na bhandunji bhabhulegwenje kwa ligongo lya kwaakong'ondela a Yeshu. Ngammoneje nashinkukanganigwa kwa kaje. **7** Ikabheje malaika gwamalanjile, "Kwa nndi unakanganigwa? Nne shinukubhalanjile malombolelo ga nng'yo gaka jwene jwankongweju na nnyama jwannjigele akwete mitwe shabha na mbembe likumi limoju. **8** Jwene nnyama jugummwenejo, bhukala paaliji jwankoto, ikabheje nnaino awile. Nkali nneyo, akakabha kukwela kukopoka ku Jeanamu, ikabheje shabhulagwe." Bhatamangana pa shilambolyo shibhakanganigwanje, elo, bhandunji bhowe bhangajandikwanga mena gabhonji nshitabhu sha gumi kuumila nantando gwa shilambolyo, shibhakanganigwanje kummona jwene nnyamajo, aliji jwankoto bhukala, niwa na nnaino anakoposhela kabili!

(Abyssos g12) **9** Penepo panapinjikwa lunda na lumanyio! Mitwe shabha jila ni itumbi shabha yatamila jwene jwankongwejo. Na kabili jene mitwejo ni bhapalume shabha. **10** Munkumbi gwa bhene bhapalume shabbabho, nng'ano bhagwilenje, jumo ni atgwala nnaino, na junu akanabhe ika, pushaishepo shalonjeye mobha gashokope. **11** Jwene nnyama aliji bhukala jwankoto, ikabheje nnaino jwakwapi kabili, jwenejo ni mpalume jwa nane, na jwalakwe nneila peila ni munkumbi gwa shabha bhala, na apinga bhulagwa. **12** "Mbembe likumi limo ila, ni bhapalume bhakanabhe tandubhanga kutagwala. Ikabheje shibhapegwanje mashili ga tagwala kwa shaa jimo nagwe nnyama jula. **13** Bhene likumi limo bhala bhanatumbililanga shindu shimo na shibhampanganje nnyama jula mashili na ukulungwa gwabhonji. **14** Shihakomananje ngondo naka Mwana Ngondolo, ikabheje Mwana Ngondolo shaabhakombolanje, pabha jwalakwe ni Nkulungwa jwa bhakulungwanji na Mpalume

jwa bhapalume. Na shaabhe pamo na bhashemilwenje na agulwa bhala, na bhalinginji bha kulupalika.” **15** Kabhili malaika gwamalanjile, “Mashi guugabhweni patemi lijajana pala, ni lugwinjili lwa bhandunji bha kila shilambo, na kila langi, na kila shibheleketi. **16** Na mbembe likumi limo yugwiibhwene na nnyama jula, shibhanshimanje lijajana jula. Shibhatolanje kila shindu shakwete, na bhannekanje makonope, shibhalyanganje nnyama jakwe na malepei, bhatiniyanje na moto. **17** Pabha a Nnungu bhashinkutenda mitima jabhonji jitumbilile kutenda gaka jwenejo, yani bhatabhanile ashaayene, na kumpa nnyama jula ukulungwa gwabhonji gwa tagwala, mpaka pushigamalile gubhabhelekete a Nnungu gala.” **18** “Na jwankongwe jugwammwene jula, ni shilambo shikulu shikwete ukulungwa kwa bhapalume bha pa shilambolyo.”

18 Gakapiteje genego, gunimmwene malaika juna alituluka kukopoka kunnungu. Ashinkukola mashili ga punda, na shilambolyo shikulangaywaga kwa ukonjelo gwakwe. **2** Bhai, gwakweshiyе lilobhe alinkuti, “Shigwile, shilambo shikulu sha Bhabhuloni shigwile! Nnaino shishibha ndamo ja mashetani, na ashimaoka bhangali bha mmbone, ndamo ja ijuni yangali ya mmbone na ya nyata. **3** Pabha ilambo yowe ishikolelwa ukana gwa labhalabha, na bhapalume bha shilambolyo bhashigona nabhonji. Na bhaatendanga upindi bha pa shilambolyo, gubhapatilenje mali kwa ligongo lya shonanga shakwe.” **4** Kungai gumbilikene lilobhe lina kukopoka kunnungu lilinkuti, “Mmandu bhangu, nshokangane shene shilambosho, nnaikundikanyanje mwilebho yakwe, mwiembuyanje na mboteko yakwe. **5** Pabha ilebho yakwe ishipunda kushuluka, ishigumbala mpaka niika kunnungu, na a Nnungu bhaikumbushile ilebho

yakwe. **6** Muntendelanje malinga shantendelenje mmanganya, muntendelanje pabhili yantendelenjeyo. Nshing'welo shakwemo munngumbashiyanje pabhili. **7** Mumpanganje mboteko na kuinjika, malinga shaitapaga, na malinga shaikonjaga. Pabha sha muntima akuti. 'Ndemi apano, nne akongwa a mpalume. Nne nngabha najwankongwe nshitenga, na wala nangali sha kwiigutanjila!' **8** Kwa lyene ligongolyo mambukute shiganng'imane lyubha limope, shiwo na shililo na shibhanga. Shatiniywe na moto, pabha bhakunng'ukumula, ni a Nnungu Bhakwete Mashili gowe." **9** Bhalikwiikonjanga kwa shonanga, shibhagutanje na kunngutanjila, pushibhalibhonanje lyoi lya tiniyuwa kwakwe. **10** Shihajimangane kwa talika kwa ligongo lya jogopa mboteko yakwe, bhalinkutinji, "Ole! Ole, nnole shilambo sha Bhabhuloni, shilambo shikulungwa shikwete mashili! Pabha kwa shaa jimore ukumu jako jikuishile." **11** Bhaatendanga upindi bha pa shilambolyo, shibhagutanje na kunngutanjila, pabha jwakwa auma kabhili upindi gwabhonji, **12** Atendaga uma indu ya igwinji. Shaabhu na ela, na maganga ga ela yaigwinji, na lulu, na nngubho ya kitani ja mmbone, na nngubho ya langi ja shambalau, na alili, na nngubho yanashe, na kila nkongo gwa nunjila, na kila shikelelo shieleywe kwa mbembe, na kila shikelelo sha mikongo ja ela yaigwinji, na sha shabha, na sha shitale, na sha malumalu, **13** na nndalashini, na ilunjilo, na lubhani, na mauta ga nunjila, na udi, na mvinyo, na mauta ga nsheituni, na utandi gwa mmbone, na ngano, na ng'ombe, na ngondolo, na palashi, na mutuka, na bhatumwa, yani bhandunji. **14** Bhaatendanga upindi bhalikummalanjilanga. "Mbwaiko yowe yugwaloleyaga ila iobhile, na utajili na kushuma kula kupelile, ukakombola kwiipata kabhili!"

15 Bhaatendanga upindi bhapatilenje mali kwa upindi na shene shilambosho, shibhajimangane kwa taliya kwa ligongo lya jogopa mboteko yakwe, bhaligutanga kwa ililo, **16** bhalinkutinji, "Ole! Ole, shene shilambo shikulungwashi. Gwayobhelele kuwalila nngubho ya kitani, ya langi ja shambalau, na yanashe, na kwiikwatula na shaabhu, na maganga ga ela yaigwinji, na lulu! **17** Kwa shaa jimope utajili gwako uobhile!" Na bhowe bhaendeshanga meli, na bhandunji bhowe bhakwendangana mmeli, na indu ina ikwenda mmashi, na bhandunji bhakwiipashilanga mmeli, na bhaakamulanga maengo mmeli, gubhajimimgene kwa taliya, **18** pushibhalibhonanje lyoi lya moto gwa tiniywa kwakwe, shibhagutanje kwa utiya bhalinkutinji. "Shikanabhe koposhela shilambo shikulungwa malinga sheneshi!" **19** Gubhaitutulilenje ndutuli mmitwe jabhonji, akuno bhaligutanga kwa shililo, bhalinkutinji. "Ole! Ole, nnole shilambo shikulungwa shila! Bhowe bhakwetenje meli, bhapwaikenje na utajili gwakwe. Kwa shaa jimope indu yowe ititimile! **20** Nng'angalalanje kunnungu na mmandunji bha ukonjelo, ashimitume na ashinkulondola bha a Nnungu! Pabha a Nnungu bhashiukumula kwa ligongo lya itendi, yantendelenje mmanganya!" **21** Na malaika jumo akwete mashili, gwajinwile liganga lya mbuti liganga likulungwa lya yajila, gwalileshele mbhaali, alinkuti, "Nneyo na shilambo shikulu sha Bhabbuloni, shipinga leshelwa pai, na wala shikabhoneka kabhili. **22** Nyimbo ya bhaagomba ingushingushi na bhaajimba, na bhaagomba imbeta na mbalapala, wala ikapilikanika kabhili munngwako. Munngwako akabhoneka kabhili pundi, wala akwete shilo shoshowe. Na liganga lya yajila likapilikanika kabhili munngwako. **23** Shilangaya sha kandili shikalangaya kabhili munngwako, wala njobhela ya nng'angalo gwa ndoa,

ukapilikanika kabhili munngwako. Pabha bhaatendanga upindi bhako, pubhalinginji bhandunji bha manyika pa shilambolyo. Ilambo yowe ishipuganywa kwa uabhi gwako.” 24 Mmitala jako jibhoneshe minyai ja ashinkulondola, na bhandunji bha ukonjelo bha a Nnungu, na minyai ja bhandunji bhowe bhabhulegwenje pa shilambolyo.

19 Gakapiteje genega, gumbilikene llobhe lya mbuti llobhe likulungwa lya lugwinjili lwa bhandu kunnungu lilinkuti, “Aleluya! Ntapulo na ukonjelo, na mashili ni ya a Nnungu bhetu! 2 Pabha ukumu yabho, ni ya kweli, na ya aki. Bhashikunng’ukumula lijajana nkulu, apuganyaga shilambolyo kwa labhalabha kwakwe. A Nnungu bhampanyangwile kwa ligongo lya kwaabhalaganga bhatumishi bhabho!” 3 Kabhili nigubhashitenje, “Bhainiywe a Nnungu! Lyoi lya moto utiniya shene shilambosho, lilitutuma kwenda kunani piti piti!” (aiōn g165) 4 Na bhanangulungwa makumi gabhili na nsheshe bhala, na iumbe nsheshe ikwete gumi ila, gubhaigwishiyenje pai, nikwaatindibhalila a Nnungu bhatemi pa shitengu sha ukulungwa bhalinkutinji, Amina! Aleluya! 5 Gulipilikanishe llobhe kukopoka ku shitengu sha ukulungwa lilinkuti. “Mwainiyanje a Nnungu bhetu, mmanganya ashintumishi bhabho bhowe, mmowenji nkwaishimianga, mmashoko na mmakulungwanji.” 6 Kabhili, gumbilikene njobhela ya mbuti njobhela ya lugwinjili lwa bhandunji, na mbuti ngungungu ja mashi ga magwinji, na mbuti nnindimilo gwa punda gwa nnjai, lilinkuti, “Aleluya! Pabha Bhakulungwa a Nnungu bhetu Bhakwete Mashili gowe bhanatagwala! 7 Tuangalale na angalila, twaakuye. Pabha lyubha lya ndoa jika Mwana Ngondolo liishe, na mwali nkulombwa ali tayali. 8 Ashipegwā nngubho ya kitani, ja takata janawe, imelemeta awalile!” Jene nngubho ja kitani

ja takatajo, ni itendi ya mmbone ya bhandunji bha ukonjelo.

9 Na malaika jula gwamalanjile, "Jandika gegano. Mbaya bhashemilwenje ku kalamu ja ndoa jika Mwana Ngondolo!" Kabhili nigwamalanjile, "Genego ni malobhe ga kweli ga a Nnungu."

10 Bhai, nne ngugwaga pa makongono gakwe, ngulipinga kuntindibhalila. Ikabheje jwalakwe gwamalanjile, "Unatende nneyo! Nne ntumishipe, malinga ugwe na bhaakulupalila ajako, tubhowe tunakong'ondela ga a Yesu. Gwaatindibhalile a Nnungu. Pabha ukong'ondelo gwa a Yesu, ni mbumu jwa ukulondola." **11** Kungai, gunikubhwene kunnungu kuugwilwe, na kweneko ashinkupagwa palashi jumo jwanawe, na ankwelile jula lina lyakwe "Jwa Kulupalika" na "Jwa Kweli." Jwenejo anaukumula na komana ngondo kwa aki. **12** Na meyo gakwe mbuti lilamba lya moto, ashinkutabha ilemba yaigwinji muntwe. Ashinkujandikwa lina lyangalimanya mundu, ikabhe nnyenepe. **13** Ashinkuwala lijoo lishubhikwe mminyai. Na jwenejo lina lyakwe, "Lilobhe lya a Nnungu." **14** Makukute ga manjola ga kunnungu, gugankagwile bhali bhakwelilene palashi bhanawe, na bhali bhawetenje nngubho ya kitani yanawe, ya takata. **15** Upanga gwa tema ulikopoka nkang'wa jakwe, na kwa gwene upangago shaabhakombolanje bhandunji bha ilambo ina. Jwalakwe shatagwale kwa imbo ja shitale, na shaminye divai nshikelelo sha minyla shabbihbu ya nnjimwa jikulungwa ja Nnungu, Bhakwete Mashili gowe. **16** Nnijoo lyakwe, na nshiga shakwe, ashinkujandikwa lina, "A Mpalume bha Bhapalume, na Bhakulungwa bha Bhakulungwanji." **17** Kungai, gunimmwene malaika jumo ajimi pa lyubha. Gwakweshiye lilobhe kwaabhalanjilanga ashiijuni bhowe bhaagulukanga kunani alinkuti, "Nnjiyangane! Nng'imane pamo ku kalamu

jikulu ja a Nnungu, **18** nnjiyangane kunniyanganje nnyama ya bhapalume, na ya bhakulungwanji bha manjola, na ya bhandunji bhakwetenje mashili, na ya ashipalashi, na ya bhaakwelenga palashi bhabho, nnjiyangane kuniyanganje nnyama ya bhandunji bhowe, bhalinginji bhangwana na bhatumwa, bhashoko na bhakulungwanji.” **19** Kabhili, gunimmweni nnyama jula, ali pamo na a mpalume bha shilambolyo, na ashimanjola bhabhonji bhaiimenenje pamo, nkupinga bhakomane na jwene atemi pantundu palashi, na likukute lyakwe lya manjola. **20** Ikabheje nnyama jula, gwatolilwe ubhanda pamo na nkulondola jwa unami, antendelaga ilapo. Kwa yene ilapoyo, ashikwaapuganyanga bhakwetenje lulembo luka nnyama bhala, na bhashitindibhalilenje shanamu shakwe. Jwene nnyamajo pamo nagwe nkulondola jwa unami jula, gubhaleshelwenje bhalinginji bhakotonji, nnitanda likolela moto gwa bhonga. (*Limnē Pyr g3041 g4442*) **21**

Makukute gaigele ga manjola, gugabhulegwenje na upanga gwakoposhelaga nkang'wa jika jwene akwelile palashi jula. Ashijuni bhowe bhakujukutangaga nnyama yabhonji.

20 Kabhili gunimmwene malaika jumo alituluka kukopoka kunnungu, ali na nshungulo gwa ku Jeanamu, na nndondolo gwankulungwa munkono gwakwe. (*Abyssos g12*) **2** Gwalikamwile lijoka lila, lijoka lya bhukala, Ibhilishi eu Lishetani, gwalitabhile yaka elupu. **3** Malaika jwa a Nnungu jula gwalijaille ku Jeanamu, gwaugele nnango gwa jinjilila kweneko, na gwatajile muuli kupinga linakombole kupuganya kabhili ilambo, mpaka pushiimalile yaka elupu. Ikabheje ipitaga yene yakayo, inapnjikwa ligopolwe kabhili, kwa mobha gashokope. (*Abyssos g12*) **4** Alapu guniibhwene itengu ya ukulungwa na bhandu bhatemingene, bhene bhandunjibho gubhapegwilwenje mashili ga ukumula.

Nneila peila gunijibhwene mitima ja bhandunji bhainjilwenje kwa ligongo lya kwaakong'ondela a Yeshu, na kwa ligongo lya lilobhe lya a Nnungu. Bhene bhanganyabha bhagantindibhalilanga nnyama jula, wala shanamu shakwe, na wala bhangalembwanga lulembo pashenyi, eu mmakono gabhonji. Gubhayushilenje nitagwala pamo na a Kilishitu, kwa yaka elupu. **5** Bhawilenje bhaigelenje bhala, bhangayukanga mpaka imalile yaka elupu. Kweneku ni kuyuywa kwa ntai. **6** Mboka yabhonji na ukonjelo, bhowe bhalinginji munkumbi gwa yuywa kwa ntai. Shiwo sha bhili shikakola mashili kwa bhene bhanganyabho, shibhabhanganje bhabhishila bha a Nnungu, na bha a Kilishitu, na shibhatagwalanje pamo na a Kilishitu kwa yaka elupu. **7** Na yaka elupu imalilaga, Lishetani shiligrapolwe likoposhe nshitabho shakwe. **8** Bhai, na shilijende kuupuganya bhandu bha ilambo yowe, mmbali inansheshe ya shilambolyo, yani Gogu na Magogu. Lishetani shilibhashemanje pamo ku ngondo, gwinji gwabhonji shiubhe mbuti nng'anji gwa nnyenje bhaali. **9** Gubhapitengene mmbali yowe ya shilambolyo, gubhashitimililenje shigono sha bhandunji bha ukonjelo, na shilambo shipingwa na a Nnungu shila. Ikabheje moto guutulwiche kukopoka kunnungu, ukwaapeyangaga. **10** Na Ibilishi abhapuganyangaga jula, gwaleshelwe nnitanda likolela moto gwa bhonga, mubhalinginji nnyama jula na nkulondola jwa unami jula, na shibhapotekwanje mwenemo, mui na shilo pitipiti. (aiōn g165, Limnē Pyr g3041 g4442) **11** Alapu, gunishibhweni shitengu shikulungwa shanawe sha ukulungwa, na jwene atemi pantundu jakwe. Shilambolyo na kumaunde gwiobhile pa meyo gakwe na yangabhoneka kabili. **12** Gunaabhweninji bhandunji bhawilenje bhakulungwanji na bhashoko, bhajimingene mmujo ja shitengu sha ukulungwa, na itabhu gwiunukwilwe.

Na shitabhu shina, yani shitabhu sha gumi, na shenesho gushiunukwilwe. Bhandunji bhawilenje gubhaukumulwenje ga itendi yabbonji, malinga shijandikwe mwitabhu mula. **13** Bhaali jikukopoyaga bhawilenje bhalinginji nkati jakwe, shiwo na kundamo ja bhawilenje ikwaakopoyangaga bhawilenje bhalinginji mwenemo. Kila mundu gwaukumwilwe ga itendi yakwe. (**Hadēs g86**) **14** Shiwo na kundamo ja bhawilenje ikuleshelwaga nnitanda lya moto. Na lyene litanda lya motoli, ni shiwo sha bhili. (**Hadēs g86, Limnē Pyr g3041 g4442**) **15** Mundu jojowe jwangabhoneka lina lyakwe lijandikwe nshitabhu sha gumi, alileshelwa nnitanda lya moto lila. (**Limnē Pyr g3041 g4442**)

21 Alapu, gunikubhwene kunnungu kwa ambi, na shilambolyo sha ambi. Kunnungu kwa bhukala kula, na shilambolyo sha bhukala shila iobhile, wala bhaali jikapaliji kabhili. **2** Gunishibhwene shilambo sha ukonjelo, ku Yelushalemu kwa ambi, kulituluka kukopoka kunnungu kwa a Nnungu, shieleywe ukoto mbuti mwali jwa shilombani, awashiywe kupinga aimane naka mbujegwe. **3** Na gumbilikene lilobhe likulungwa kukopoka ku shitengu sha ukulungwa lilinkuti, “Nnole! Ndamo ja a Nnungu jili pamo na bhandunji. Shibhatende ndamo jabho pamo na bhanganyabho, shibhabhanganje bhandu bhabho, nabhalabho shibhabhe a Nnungu bhabhonji. **4** Bhenebho shibhaaungutanje minyoi jabhonji jowe, pabha shiwo shikapagwa kabhili, wala kwiigutanjila, wala ililo wala mboteko, pabha ga bhukala gapitile.” **5** Na bhene bhatemi pa shitengu sha ukulungwa bhala gubhashite, “Nnole, ngunaatenda yowe kubha ya ambi.” Kabhili gubhamalanjile, “Nnjandishe kuti, gene malobhe gano, ni gaakulupalika na ga kweli!” **6** Kungai gubhamalanjile, Gamaliile! Nne Alpha na Omega, yani, Nantando na Mpelo.

Akwete nnjotajo, shinimpe mashi ga papila, ga shinyenyei sha mashi ga gumi, gwayoyo. **7** Jwene shaakombolejo, shaapate yene mboka yowei, na nne shimme a Nnungu bhakwe, na jwalakwe shaabhe mwanangu. **8** Ikabheje bhandunji bha bhoga na bhakaakulupalilanga, na bhaatendanga ya nnjimwa, na bhaabkulaganga, na bha labhalabha, na bhaabhi, na bhakwiitindibhalilanga yanamu, na bha unami bhowe, ndamo jabhonji shijibhe nnitanda likolela moto gwa bhonga, shenesho ni shiwo sha bhili. (*Limnē Pyr g3041 g4442*) **9** Na malaika jumo, munkumbi gwa shabha bhakwetenje mikungu shabha, jagumbele mambukute shabha ga kumpelo bhala, nigwajile malanjila, "Nnjiye akuno, ninnangule mwali nkulombwa, nkagwe Mwana Ngondolo!" **10** Bhai nili Mmbumu, malaika jula gwambeleshe kuntundu shitumbi shikulungwa shashileu. Gwanangwile shilambo sha ukonjelo Yelushalemu, shilituluka kukopoka kunnungu, ku bhakulungwa a Nnungu, **11** shiling'anyima kwa ukonjelo gwa a Nnungu. Shilangaya shakwe pushaliji mbuti sha liganga lya mmbiya yaigwinji, mbuti yashipi ja takata malinga shiyoo. **12** Shashinkukola lugwani lukulungwa lwaluleu lwa matopali, na milango likumi limo na jibhili, na mmilango mula bhashinkupagwanga ashimalaika bha a Nnungu, likumi limo na bhabhili. Na kila pantundu nnango lyashinkujandikwa lina limo, lya munkumbi gwa mena ga makabhila likumi limo na gabhili, ga Ishilaeli. **13** Kila mmbali jashinkupagwa milango jitatu, kulikopoka lyubha milango jitatu, na kuliwila lyubha milango jitatu, na kuntundu jakwe, milango jitatu, na kwibhanda jakwe, milango jitatu. **14** Makumba ga lugwani lwa shene shilambosho, gashinkushengwa mmaganga ga tandubhila likumi limo na gabhili, na kila liganga pantundu jakwe, pashinkujandikwa lina


limo, lya munkumbi gwa mena ga mitume likumi limo na bhabhili, bhaka Mwana Ngondolo bhala. **15** Na malaika abheleketaga na nne jula, ashinkukola imbo ja pimila ja shaabhu, nkupinga apime shene shilambosho, na milango jakwe, na makumba ga lugwani lwakwe. **16** Shilambo shiyene pushaliji sha ndumba nsheshe ya lingana kila upande. Bhai, nigwapimile shilambo shila kwa imbo jakwe, shashinkukola uleu, na shannyenje, na shipunda, puyaliji kilometra elupu mbili, na mmia pasheshe. **17** Gwapimile na likumba lya lugwani lwakwe, pulyaaliji shipunda mita makumi shita kwa shipimilo sha meyo ga shigundu, shapimile malaika jula. **18** Lwene lugwanilo lwashinkushengwa kwa maganga ga mmbiya yaigwinji ga yashipi, shilambo shiyene shashinkushengwa kwa shaabhu ja takata, ja mbuti shiyoo. **19** Kila liganga lya tandubhila lya lwene lugwanilo, lyashinkukelengelelwa na maganga ga mmbiya yaigwinji, ga kila namuna. Liganga lya ntai lya tandubhila pulyaaliji lya yashipi, na lya bhili yakuti shamawi, na lya tatu kalikedoni, na lya nsheshe shumalidi, **20** na lya nng'ano shadoniki, na lya shita akiki, na lya shabha kilisholito, na lya nane shabalajadi, na lya tisha yakuti ja lindani, na lya kumi kilishopulasho, na lya kumi na limo iakinto, na lya kumi na gabhili ametishito. **21** Na milango kumi na jibhili jila, pujaliji lulu kumi na ibhili. Kila nnango gwashinkualaywa na lulu jimo. Mpanda njindo gwa shilambo, gwashinkualaywa na shaabhu ja takata mbuti shiyoo. **22** Nangalibhona liekalu shene shilambosho, pabha Bhakulungwa a Nnungu Bhakwete Mashili gowe naka Mwana Ngondolo jula, ni liekalu lyakwe. **23** Na shene shilambosho shikaalolela shilangaya sha lyubha wala sha lwei, pabha ukonjelo gwa a Nnungu unalangaya, na kandili jakwe ni Mwana Ngondolo jula. **24** Bhandunji bha ilambo ina, shibhaowanje nshilangaya

shakwe, na bhapalume bha pa shilambolyo shibhapelekanje ukonjelo gwabhonji mwenemo. 25 Milango jakwe jikaugalwa mui gowe, pabha mwenemo shikapagwa shilo. 26 Ukonjelo na ishima ya bhandunji bha ilambo ina shiipelekwe mwenemo. 27 Ikabheje shakwa shoshowe sha nyata shipinga jinjila mwenemo, wala mundu jojowe atenda indu yangali ya mmbone, eu ya unami akajinjila mwenemo. Ikabheje bhene bhajandikwenje nshitabhu sha gumi, shika Mwana Ngondolo ni shibhajinjilangane mwenemo.

22 Penepo Malaika jula, gwanangwile lushi lwa mashi ga mabhutuka, gawkete gumi, ga konja galikoposhela pa shitengu sha ukulungwa sha a Nnungu, na Mwana Ngondolo. 2 Lwene lushilo lwatendaga bhutuka pakatipakati mpanda njindo, gwa shene shilambo shila. Nnyenje lwene lushilo, gwashinkupagwa nkongo gwa gumi kila ng'ambu ja lushi. Gwene nkongogo gwatendaga ogola iepo ya namna likumi limo na ibhili, iepo yakwe yatendaga ogola kila mwei. Na maamba ga gwene nkongogo pugaliji ni ntela gwa lamia bhandunji bha ilambo ina. 3 Pene pa shilambopo shikapagwa kabhili shindu shoshowe shiloshilwe, pabha shitengu sha ukulungwa gwa a Nnungu na Mwana Ngondolo shishipagwe mwenemo na bhatumishi bhabho, bhalikwaatindibhalilanga maengo. 4 Na bhalabhonji shibhalubhonanje lubhombo lwabho, numbe lina lyabho shilibhe pa shenyi pa lubhombo lwabhonji. 5 Shilo shikapagwa kabhili, wala bhakapinganga shilangaya sha kandili eu sha lyubha, pabha Bhakulungwa a Nnungu shibhabhe shilangaya shabhonji, na bhene bhanganyabho shibhatagwalanje pitipiti na pitipiti. (aiōn g165) 6 Numbe jwene malaika jula nigwanugulile, "Gegano malobhe gano ni gaakulupalika kaje na ga kweli. Bhakulungwa a

Nnungu bhakwaapanganga a ashinkulondola Mbumu jwabho, bhashinkutuma malaika jwabho, kukwaalanguyangha bhatumishi babho gene gapinga koposhela shangupe gala.” **7** Nhole, ngwiyajo nnainope, apatile mboka jwene akunda malobhe ga ukulondola ga sheshino shitabhu shino. **8** Nne a Yowana ni napilikene na kugabhona gegano. Na nne ngagabhoneje na kugapilikana, ngugwaga pai nkupinga nintindibhalile pa makongono, jwene malaika anangwiye genego. **9** Ikabheje jwenejo nigwanugulile, “Nnatende nneyo, nne ni ntumishi malinga mmwe, na bhaakulupalila ajenunji ashinkulondola, na bhowe bhaakundanga malobhe ga sheshino shitabhu shino. Mwaatindibhalile a Nnungu.” **10** Numbe gwanugulile, “Nnaiye malobhe ga ukulondola gali amuno nsshitabhu muno, pabha malanga gabhandishile ga koposhela kwa genega. **11** Atenda yangali ya mmbone, apunde kutenda yangali ya mmbone, na akwiinyatiya, apunde kwiinyatiya. Atenda ya mmbone, na apunde kutenda ya mmbone, na ali jwa ukonjelo, apunde kubha jwa ukonjelo.” **12** A Yeshu bhakuti, “Nhole! Ngwiyajo nnainope, shinimpe mundu upo, ilingana na itendi yakwe. **13** Nne ni Alpha na Omega, yani, Nantando na Mpelo.” **14** Mbaya bhene bhaashapanga nngubho yabhonji, nkupinga bhakolanje aki ja jinjila nshilambo kutila mmilango, na bhakolanje aki ja lya iepo, ya nkongo gwa gumi. **15** Ikabheje palanga bhapalinji, mmbwa, na bhaabhi, na bha labhalabha, na bha bhulaga, na bha tindibhalila yanamu, na bhowe bha pinganga kubheleketa unami, bhakajinjilanga mwenemo. **16** “Nne, a Yeshu, njikuntuma malaika jwangu ankong’ondelanje gegano mmakanisha. Nne ni jwa lubheleko lwa shipinga sha a Daudi. Nne ni lutondwa lwa nng’andu luubhala!” **17** Mbumu na a Mwali bhaalombwa, bhakutinji,

"Nnjiye," na kila mundu apilikana genega na abhelekete, "Nnjiye," Akwete nnjotajo ajiye, na apingajo, apapile mashi ga gumi, gwayoyo. **18** Nne a Yowana ngunakwaaleyanga bhandu bhowe, bhaapilikananga malobhe ga ukulondola ga shene shitabhu shino. Mundu jojowe ajenjesheyaga shindu shoshowe, a Nnunu shibhannjenjesheye mambukute gajandikwe nsshitabhu muno. **19** Mundu jojowe apunguyaga shoshowe, mmalobhe ga ukulondola ga shene shitabhu shino, a Nnunu shibhampokonyole shipande shakwe sha nkongo gwa gumi, na shipande shakwe sha shilambo sha ukonjelo, malinga shijandikwe nsshitabhu muno. **20** Na bhene bhaakong'ondela gegano bhakuti, "Kweli ngwiyajo nnainope!" Amina. Nnjiye Mmakulungwa a Yesu. **21** Ngunakumpinjilanga mmowe nema ja Bhakulungwa a Yesu. Amina.



*Gunishibhwene shilambo sha ukonjelo, ku Yelushalemu kwa ambi, kulituluka kukopoka
kunnungu kwa a Nnunu, shieleywe ukoto mbuti mwali jwa shilombani, awashiywe kupinga
aimane naka mbujegwe. Na gumbilikene lilibhe likulungwa kukopoka ku shitengu sha ukulungwa
lilinkuti, "Nhole! Ndamo ja a Nnunu jili pamo na bhandunji. Shibhatende ndamo jabho pamo na
bhanganyabho, shibhabhanganje bhandu bhabho, nabhalabho shibhabhe a Nnunu bhabhonji."*

Nng'ibhulo 21:2-3

Reader's Guide

Mwera at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, "*As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him.*" Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, "*And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned.*" So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, "*Do your best to present yourself approved by God, a worker who does not need to be ashamed, properly handling the word of truth.*" 2 Timothy 2:15. "*God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,*" 2 Peter 1:4-8.

Glossary

Mwera at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonomous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Mwera---Mwera-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

Luka 8:31	Itendi 3:21	1 Petili 1:25
Bhaloma 10:7	Itendi 15:18	1 Petili 4:11
Nng'ibhulo 9:1	Bhaloma 1:25	1 Petili 5:11
Nng'ibhulo 9:2	Bhaloma 9:5	2 Petili 3:18
Nng'ibhulo 9:11	Bhaloma 11:36	1 Yowana 2:17
Nng'ibhulo 11:7	Bhaloma 12:2	2 Yowana 1:2
Nng'ibhulo 17:8	Bhaloma 16:27	Yuda 1:13
Nng'ibhulo 20:1	1 Bhakolinto 1:20	Yuda 1:25
Nng'ibhulo 20:3	1 Bhakolinto 2:6	Nng'ibhulo 1:6
	1 Bhakolinto 2:7	Nng'ibhulo 1:18
	1 Bhakolinto 2:8	Nng'ibhulo 4:9
	1 Bhakolinto 3:18	Nng'ibhulo 4:10
	1 Bhakolinto 8:13	Nng'ibhulo 5:13
	1 Bhakolinto 10:11	Nng'ibhulo 7:12
	2 Bhakolinto 4:4	Nng'ibhulo 10:6
	2 Bhakolinto 9:9	Nng'ibhulo 11:15
	2 Bhakolinto 11:31	Nng'ibhulo 14:11

aïdios

Bhaloma 1:20	
Yuda 1:6	

aiōn

Matei 12:32	
Matei 13:22	
Matei 13:39	
Matei 13:40	
Matei 13:49	
Matei 21:19	
Matei 24:3	
Matei 28:20	
Maliko 3:29	
Maliko 4:19	
Maliko 10:30	
Maliko 11:14	
Luka 1:33	
Luka 1:55	
Luka 1:70	
Luka 16:8	
Luka 18:30	
Luka 20:34	
Luka 20:35	
Yowana 4:14	
Yowana 6:51	
Yowana 6:58	
Yowana 8:35	
Yowana 8:51	
Yowana 8:52	
Yowana 9:32	
Yowana 10:28	
Yowana 11:26	
Yowana 12:34	
Yowana 13:8	
Yowana 14:16	
	Itendi 3:21
	Itendi 15:18
	Bhaloma 1:25
	Bhaloma 9:5
	Bhaloma 11:36
	Bhaloma 12:2
	Bhaloma 16:27
	1 Bhakolinto 1:20
	1 Bhakolinto 2:6
	1 Bhakolinto 2:7
	1 Bhakolinto 2:8
	1 Bhakolinto 3:18
	1 Bhakolinto 8:13
	1 Bhakolinto 10:11
	2 Bhakolinto 4:4
	2 Bhakolinto 9:9
	2 Bhakolinto 11:31
	Bhagalatia 1:4
	Bhagalatia 1:5
	Bhaepheso 1:21
	Bhaepheso 2:2
	Bhaepheso 2:7
	Bhaepheso 3:9
	Bhaepheso 3:11
	Bhaepheso 3:21
	Bhaepheso 6:12
	Bhapilipi 4:20
	Bhakoloshai 1:26
	1 Timoteo 1:17
	1 Timoteo 6:17
	2 Timoteo 4:10
	2 Timoteo 4:18
	Tito 2:12
	Bhaebhulania 1:2
	Bhaebhulania 1:8
	Bhaebhulania 5:6
	Bhaebhulania 6:5
	Bhaebhulania 6:20
	Bhaebhulania 7:17
	Bhaebhulania 7:21
	Bhaebhulania 7:24
	Bhaebhulania 7:28
	Bhaebhulania 9:26
	Bhaebhulania 11:3
	Bhaebhulania 13:8
	Bhaebhulania 13:21
	1 Petili 1:23

aiōnios

Matei 18:8
Matei 19:16
Matei 19:29
Matei 25:41
Matei 25:46
Maliko 3:29
Maliko 10:17
Maliko 10:30
Luka 10:25
Luka 16:9
Luka 18:18
Luka 18:30
Yowana 3:15
Yowana 3:16
Yowana 3:36
Yowana 4:14
Yowana 4:36
Yowana 5:24
Yowana 5:39
Yowana 6:27
Yowana 6:40
Yowana 6:47
Yowana 6:54
Yowana 6:68

Yowana 10:28
Yowana 12:25
Yowana 12:50
Yowana 17:2
Yowana 17:3
Itendi 13:46
Itendi 13:48
Bhaloma 2:7
Bhaloma 5:21
Bhaloma 6:22
Bhaloma 6:23
Bhaloma 16:25
Bhaloma 16:26
2 Bhakolinto 4:17
2 Bhakolinto 4:18
2 Bhakolinto 5:1
Bhagalatia 6:8
2 Bhateshalonike 1:9
2 Bhateshalonike 2:16
1 Timoteo 1:16
1 Timoteo 6:12
1 Timoteo 6:16
2 Timoteo 1:9
2 Timoteo 2:10
Tito 1:2
Tito 3:7
Pilimoni 1:15
Bhaebhulania 5:9
Bhaebhulania 6:2
Bhaebhulania 9:12
Bhaebhulania 9:14
Bhaebhulania 9:15
Bhaebhulania 13:20
1 Petili 5:10
2 Petili 1:11
1 Yowana 1:2
1 Yowana 2:25
1 Yowana 3:15
1 Yowana 5:11
1 Yowana 5:13
1 Yowana 5:20
Yuda 1:7
Yuda 1:21
Nng'ibhulo 14:6

eleēsē

Bhaloma 11:32

Geenna

Matei 5:22
Matei 5:29
Matei 5:30
Matei 10:28
Matei 18:9
Matei 23:15
Matei 23:33
Maliko 9:43

Maliko 9:45
Maliko 9:47
Luka 12:5
Yakobho 3:6
Hadēs
Matei 11:23
Matei 16:18
Luka 10:15
Luka 16:23
Itendi 2:27
Itendi 2:31
1 Bhakolinto 15:55
Nng'ibhulo 1:18
Nng'ibhulo 6:8
Nng'ibhulo 20:13
Nng'ibhulo 20:14
Limnē Pyr
Nng'ibhulo 19:20
Nng'ibhulo 20:10
Nng'ibhulo 20:14
Nng'ibhulo 20:15
Nng'ibhulo 21:8

Sheol
Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6
Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48

Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9


Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō

2 Petili 2:4

Questioned

2 Petili 2:17




Abraham's Journey


Kwa ngulupai, a Bhulaimu bhashinkukunda pubhashemilive na a Nnunyu bhajende kushilambo shibhalajilwe kupergwa kwa miadi shibhe ulishi gwabho.
Gubhaleshile shilambo shabho, bhalii bhakakukumanya kubhakwenda. - Bhaethhulania 11:8

Israel's Exodus


N ▲



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



Pabha nne Mwana juka Mundu nangaika kuitumishila, ikabhe kutumishila na shoyet gumi gwangu kwa ligango lya kwaaggombolanga bhandu bhabhagwinji. - Matiko 10:45



Paul's Missionary Journeys

1. from Antioch with Barnabas
2. from Antioch with Silas
3. from Antioch to Churches
4. from Jerusalem to Rome in chains

Nne Pauli ntumwa jwa a Yeshu Kilishi, njemilwe na a Nnunyu kubha ntume jwa lunguya Ngani ja Mbogne. - Bhaloma 1.1

Creation 4004 B.C.

- Adam and Eve created
Tubal-cain forges metal
- Enoch walks with God
- Methuselah dies at age 969
- God floods the Earth
- Tower of Babel thwarted
- Abraham sojourns to Canaan
- Jacob moves to Egypt
- Moses leads Exodus from Egypt
- Gideon judges Israel
- Ruth embraces the God of Israel
- David installed as King
- King Solomon builds the Temple
- Elijah defeats Baal's prophets
- Jonah preaches to Nineveh
- Assyrians conquer Israelites
- King Josiah reforms Judah
- Babylonians capture Judah
- Persians conquer Babylonians
- Cyrus frees Jews, rebuilds Temple
- Nehemiah rebuilds the wall
- Malachi prophesies the Messiah
- Greeks conquer Persians
- Seleucids conquer Greeks
- Hebrew Bible translated to Greek
- Maccabees defeat Seleucids
- Romans subject Judea
- Herod the Great rules Judea**

New Heavens and Earth

- Christ returns for his people
- Jim Elliot martyrdom in Ecuador
- John Williams reaches Polynesia
- Zinzendorf leads Moravian mission
- Japanese kill 40,000 Christians
- Jesuits reach Mexico
- Martin Luther leads Reformation
- Gutenberg prints first Bible
- Franciscans reach Sumatra
- Ramon Llull trains missionaries
- Crusades tarnish the church
- The Great Schism
- Adalbert martyred in Prussia
- Bulgarian Prince Boris converts
- Boniface reaches Germany
- Alopen reaches China
- Longinus reaches Alodia / Sudan
- Saint Patrick reaches Ireland
- Carthage ratifies Bible Canon
- Ulfilas reaches Goth / Romania
- Nicæa proclaims God is Trinity
- Denis reaches Paris, France
- Tertullian writes Christian literature
- Titus destroys the Jewish Temple
- Paul imprisoned in Rome, Italy
- Thomas reaches Malabar, India
- Peter reaches Gentile Cornelius
- Holy Spirit empowers the Church**

Jesus Christ born 4 B.C.
(The Annals of the World, James Usher)

(Wikipedia, Timeline of Christian missions)

Resurrected 33 A.D.

What are we?	▶ Genesis 1:26 - 2:3	Mankind is created in God's image, male and female He created us
How are we sinful?	▶ Romans 5:12-19	Sin entered the world through Adam and then death through sin
		When are we? ▼
Where are we?		Innocence Fallen Glory
	Eternity Past Creation 4004 B.C.	Fall to sin No Law 1500 B.C. Christ 33 A.D. Church Age Kingdom Age
God	Father John 10:30 God's perfect fellowship	1 Timothy 6:16 Living in unapproachable light John 8:58 Pre-incarnate Psalm 139:7 Everywhere Genesis 1:31 God's perfect fellowship with Adam in The Garden of Eden
	Son	John 1:14 Incarnate John 14:17 Living in believers
Holy Spirit	Living	Epistles 2:1-5 Serving the Savior or Satan on Earth Luke 16:22 Blessed in Paradise
Mankind	Deceased believing	Luke 16:23, Revelation 20:5-13 Punished in Hades until the final judgment
	Deceased unbelieving	Hebrews 1:14 Serving mankind at God's command
Who are we?	Holy	2 Peter 2:4, Jude 6 Imprisoned in Tartarus
	Imprisoned	Revelation 20:13 Thalaasa
	Fugitive	Matthew 25:41 Revelation 20:10
Angels	First Beast	Lake of Fire prepared for the Devil and his Angels
	False Prophet	Revelation 19:20 Lake of Fire
	Satan	Revelation 20:2 Abyss
Why are we?	▶ Romans 11:25-36, Ephesian 2:7	For God has bound all over to disobedience in order to show mercy to all

Destiny

Mwera at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels.'*" Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, "*You did not choose me, but I chose you*," John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



Bhai, mnjendangane nkaatendanje bhandunji bha l'ambo yowe bhabbe bhaajiganywa bhangu, nnikwabhatishanga kwa lina ly'a Atati na lilika Mwana na Mbamu jwa Ukonjelo,

- Matei 28:19